


Nuevo Testamento en  
mixteco



New Testament in Mixtec, Atatláhuca (MX:mib:Mixtec,  
Atatláhuca)

# Nuevo Testamento en mixteco

## New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

### Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022  
9665e546-39d0-5bd5-8bd0-38916a94951f

## Contents

SAN MATEO . . . . .	1
SAN MARCOS . . . . .	60
SAN LUCAS . . . . .	97
SAN JUAN . . . . .	158
HECHOS . . . . .	204
ROMANOS . . . . .	260
1 CORINTIOS . . . . .	283
2 CORINTIOS . . . . .	304
GÁLATAS . . . . .	318
EFESIOS . . . . .	326
FILIPENSES . . . . .	334
COLOSENSES . . . . .	339
1 TESALONICENSES . . . . .	344
2 TESALONICENSES . . . . .	349
1 TIMOTEO . . . . .	352
2 TIMOTEO . . . . .	358
TITO . . . . .	362
FILEMÓN . . . . .	365
HEBREOS . . . . .	367
SANTIAGO . . . . .	384
1 PEDRO . . . . .	390
2 PEDRO . . . . .	397
1 JUAN . . . . .	401
2 JUAN . . . . .	407
3 JUAN . . . . .	408
JUDAS . . . . .	409
APOCALIPSIS . . . . .	411

## JNUHUN VAHA NI TEE SAN MATEO

### *Lista ñayuu yucün jeē ní quiji Jesucristo*

*(Lc. 3.23-38)*

<sup>1</sup> Yáha cúu lista ñayuu yucün jeē ní quiji Jesucristo. Te máá yá ni quiji nuū yucün rey David, te David ni quiji nuū yucün Abraham.

<sup>2</sup> Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. <sup>3</sup> Te Judá ni cuu de tátá Fares jíin Zara, te náná ndíndúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. <sup>4</sup> Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. <sup>5</sup> Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. <sup>6</sup> Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

<sup>7</sup> Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. <sup>8</sup> Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. <sup>9</sup> Te Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. <sup>10</sup> Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías.

<sup>11</sup> Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup> Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. <sup>13</sup> Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. <sup>14</sup> Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. <sup>15</sup> Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. <sup>16</sup> Te Jacob ni cuu de tátá José, tēe ni cuu yíi María. Te María ni cuu ña náná Jesús, Yáa naní Cristo.

<sup>17</sup> Te nde Abraham te nde David ni ñyo uxí cuñ yucün. Te nde David te nde náa cuángoo ñayuu Israel preso ñuu Babilonia ni ñyo inga uxí cuñ yucün. Te nde ná ni jengoo i preso te nde ni cacu Cristo, suni ni ñyo inga uxí cuñ yucün.

### *Jeē ní cacu Jesucristo*

*(Lc. 2.1-7)*

<sup>18</sup> Te jeē ní cacu Jesucristo, súcuan ni cuu: Náná yá María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun sēhe ña ni sáha Espíritu Santo. <sup>19</sup> Te José, tēe quijnáhan ña jíin, chí tēe ndaā cúu de. Te tu ní cúní de cuāha de jñūhun canu ña, chí sa cúní de jeē na jécuiñí sáhi jéé ma quijnáhan de jíin ña. <sup>20</sup> Te níni súcuan nácani ni de, te jíin jéni ni quee-ni ñin ndajéhé máá Jítoho yō Yáa Dios nuū de, te ni cahān yā jíin de:

José, sēhe yucün David, ma yūhu ró cueca ró ñasihí ró María, chí sēhe jeē scácu ña, vēji i nde nuū máá Espíritu Santo. <sup>21</sup> Te scácu ña ñin sēhe yíi. Te snání ró i Jesús, chí máá i cúu Yáa ñnama ñayuu nuū cuéchi i, áchí ndajéhé.

<sup>22</sup> Súcuan ni cuu táca jñiñu yáha, návāha squícu jñūhun Jítoho yō Yáa Dios jeē ní cahān tēe ni nacani jñūhun ya nde jenahān. Te suhva ni cahān de:

<sup>23</sup> Coó ñin sūchi sñí, te nihñ sēhe i,  
te scácu i ñin sēhe yíi,  
te conaní sūchí un Emanuel.

Achí tutu. Te s̄hví yáha cúní cahān: Yaā Dios ndeé yá jíin yó.

<sup>24</sup> Te ni natahū ni José, te ni sáha de nájñuhun ni cahān ndajéhé Jitoho yō jíin de. Te ni jeca de María ni cuu ña ñasihí de. <sup>25</sup> Te tu ní quíxí de jíin ña, chí nde ni scácu ña sēhe yíí núú ña. Te ni snani de i Jesús.

*Jeē ní quijicoo tēe mago nuū yā*

## 2

<sup>1</sup> Te ná ni cacu Jesús ini ñuu Belén ndañūū Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuáha siquí quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. <sup>2</sup> Te ni cacajñuhún de ñayuu:

¿Nde nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná ñin quími cáhnu jeē cúu seña jeē ní cacu i. Te vējicoo ná chíñuhún ná i, áchí de.

<sup>3</sup> Te rey Herodes, ná ni jini de jñuhun yáha, te ni cunéé ni de, nde jíin táca ñáyuu ñuu Jerusalén. <sup>4</sup> Te ni nastútú de táca sútú cácujuhnu jíin tēe cástéén tutu ley Yaā Dios nuū ñáyuu. Te ni cajñuhún de tēe un ndé nuū cacu Cristo achí tutu. <sup>5</sup> Te ni cacachi nuū de:

Ini ñuu Belén ndañūū Judea. Chi suhva cáhán nuū tútu ni tee tēe ni nacani jñuhun ya nde jenahán:

<sup>6</sup> Te róhó ñáyuu ñuu Belén ndañūū Judá, cújéhu ga ñuu rō vēsú táca gá jeē cujéhu ini Judá. Chi suu ini ñuu rō quenda ñin Yaā ndácu jniñu, te coto ya ñayuu maá rí Israel, achí Yaā Dios. Achí tutu.

<sup>7</sup> Yūcuán na te Herodes ni cana sáhi de táca tēe ndíchí un jēe naní mago. Te ni cajñuhun yúcún de ndé quíví ní cane quími ún. <sup>8</sup> Te ni tají de tēe un quíngoo de ñuu Belén. Te ni cahān de:

Cuángoo ní te cajñuhun yúcún ní ndé nuū íne sūchí lúlí un. Te núu ni nanihīn ní i, te quijicoo ní castūhun ní nuū ná, návāha suni máá ná quichiñuhún ná i, áchí rey.

<sup>9</sup> Te jeē ní cajini de jñuhun ni cahān rey, te cuángoo de. Te máá quími cáhnu jeē ní cajito de ichi núú cáne niāndii, yósnúu núú de cuahān nde ni jinū nuū íne sūchí lúlí un, te yūcuan ní jecuiñí. <sup>10</sup> Te ná ni cajito de jeē ní jecuiñí quími ún, te yōhyo ní cacusi ní de. <sup>11</sup> Te ni jinūcoo de ní quívicoo de ini vehe, te ni cajito de nuū sūchí lúlí un jíin náná i María. Te ni cajecuiñí yití de nuū i, te ni cachiñuhún de i. Te ni canune de yejnū de, te ni casocó de oro jíin sūje cūtú jíin sūje uvuā nuū i. <sup>12</sup> Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

*Jeē ní jinu José cuángoo de nación Egipto*

<sup>13</sup> Te náa cuánuhun táca tēe mago, te ni scóto jēni José jeē ñin ndajéhé maá Jitoho yō Yaā Dios ni cahān yā jíin de:

Ndocuiñí te cunu ró quíngoo ró jíin sūchí lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchí lúlí jíin jeē cáhni de i. Achí yá.

<sup>14</sup> Te ni natahū ni José. Te cuángoo de jíin sūchí lúlí jíin náná i, te ñuu ní cajica de cuángoo de nación Egipto. <sup>15</sup> Te ni coyūcú de yūcuan ndé ni jihī Herodes. Te sūcuan ni cuu návāha squícu jñuhun Jitoho yō Yaā Dios jeē ní

cáhān tēe ni nacani jñūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

*Jeē ní ndacu Herodes jniñu jeē na cúu tāca súchi yí lúli*

<sup>16</sup> Yūcuán na te Herodes ni jini de jeē súcuan ni castáhú tēe mago un de, te yōhyo ni quití ni de. Te ni tají de soldado cuango, te ni cajehni tāca súchi yí lúli jēe uú cuiyā jíin jēe yiquín gá jeē cáyūcú ini ñuu Belén jíin tāca ñuu yajni. Chi je ni cajñūhun yúcun de tāca tēe mago un nasaa tiempo ni cuu jeē ní cacu Jesús. <sup>17</sup> Te súcuan ni squícu jñūhun ni cahān Jeremías, tēe ni nacani jñūhun Yaā Dios nde jenahán, chi ni cahān de:

<sup>18</sup> Ini región Ramá ni jini sōho ri

jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácu ni ña ndusiñ ni ña, chi ni cajihí i.

Achí tutu.

<sup>19</sup> Yūcuán na te ni jihí Herodes. Te ni scóto jēni José jeē ñin ndajéhé Jitoho yō Yaā Dios ni cahān yā jíin de nuū ndeé de nación Egipto. <sup>20</sup> Te ni cahān yā jíin de:

Ndocuñiñ te nuhun rō ñuu rō Israel jíin súchi lúli jíin náná i. Chi je ni cajihí tēe cáncuñi cahni súchi lúli jíin nuū. Achí ndajéhé.

<sup>21</sup> Yūcuán na te ni ndocuñiñ de, te cuanuhun de nación Israel jíin súchi lúli jíin náná i. <sup>22</sup> Te ni nihīn de jñūhun jeē Arquelao ni nucuiñiñ de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quihín de región Galilea, te cuango de. <sup>23</sup> Te ni jinū de yūcuán, te ni coyūcú de ñuu nani Nazaret. Súcuan ni cuu návaha squícu jñūhun ni cacahān tēe ni canacani jñūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

*Jñūhun Juan tēe scuándute*

*(Mr. 1.1-8; Lc. 3.1-9, 15-17; Jn. 1.19-28)*

### 3

<sup>1</sup> Te ni yāha tiempo, te ni jinū Juan tēe scuándute nde nuū ñūhun téhé ndañū Judea, nácani de jñūhun suhva:

<sup>2</sup> Nacani ni rō jijnáhan ró jēe stóo ró cuéchi ró, chi je ni cuyajni Yaā ndeé andiví jēe ndacu ya jniñu nuū rō. Achí de.

<sup>3</sup> Te Isaías, tēe ni nacani jñūhun Yaā Dios nde jenahán, suhva ni tee de jñūhun Juan nuū tútu:

Coo ñin tēe cana jee nde nuū ñūhun téhé:

Sátūhva ró máa ró jijnáhan ró, chi quee máa Jitoho yō.

Te sáha ró jniñu ndaā, chi vēji ya, achi de.

Achí Isaías.

<sup>4</sup> Te sahma ñūhun Juan cúu ixi quití nání camello, te núhni ñin cinturón ñiñ chíji de. Te jeē tēcu de cúu tīca ndicuéhyí jíin ndúxi yocō. <sup>5</sup> Te ñayuu ñuu Jerusalén jíin tāca ñayuu región Judea jíin ñayuu yúcu yajni yuyúte Jordán, ni quijicoo i nuū de. <sup>6</sup> Te ni canacani ndaā i cuéchi i nuū Yaā Dios, te ni scuándute de i ini yūte Jordán.

<sup>7</sup> Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va séhe coō cácuu ró, chí xeēn rō nájñūhun coō. ¿A cájeni ni rō jeē cuu cunu ró cácu ró nuū castigo xeēn jeē quíji? <sup>8</sup> Núu súcuan te sáha ró jniñu váha, te

súcuan stéén rō jeē ní canacani ndije ni rō jeē stóo ró cuéchi ró. <sup>9</sup> Te ma cáni ni rō cahán rō jeē cuu cácu ró síquī jeē cácuu ró yúcūn Abraham. Chi cáhán rī jín ró jeē cuu sáha Yaā Dios jeē táca yúu yáha nduu sēhe Abraham jeē candije vāha, te núu cúní yā. <sup>10</sup> Te cácuu ró nájñuhun nundēhé jeē tu jéhe ndehē vāha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva ìn cāa jeē cahnde nde yoho yujnu. Núu súcuan te sáha ya jín ró nájñuhun jín táca yujnu jeē tu cún ndehē vāha, jeē tahndé te cayū nuū ñuhún. <sup>11</sup> Te ruhū chi jín ndute scuándute ri rohó, te yúcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quíji, chí nájñuhun scuándute ya rohó cúu jeē cuáha ya Espíritu Santo condee ìni anuá rō, te poder yā cúu nájñuhun ñuhún. Te Yaā quiji chí cújéhnū ndasí yá. Chí tú na vé jéhnū cuiti cúu ri nuū yā, ni jeē cuajñíñu ri nuū yā vésú ìn jniñu lúli gá nájñuhun jeē quénehen ri ndijēn yā. <sup>12</sup> Te sáha ya nájñuhun sáha tēe scánda trigo, chí sásín ya ñayuu vāha jín ñáyuu cunéé, nájñuhun cúndoo trigo jeē quénda sín paja. Te nastútú yá trigo yā ndívi ìni yacá yā. Te paja chí jnaa yā nuū ñuhún jeē ma ndahvá cuiti. Achí Juan.

### *Jeē ní jendute Jesús*

*(Mr. 1.9-11; Lc. 3.21-22)*

<sup>13</sup> Yūcuán na te ni quenda Jesús región Galilea, te ni quee yā yūte Jordán nuū ìne Juan, návāha scuándute de ya. <sup>14</sup> Te tu ní cúní Juan scuándute de ya, chí ni cahán de jín yá:

Sa suhva cánuú jeē scuándute máá ní sǎñá, ¿te ndese cúu jeē sa nuū ná vēji ní? áchí de.

<sup>15</sup> Te ni cahán Jesús jín de:

Tuú chí sáha ró, chí súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. <sup>16</sup> Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cāa nájñuhun ìn paloma, te ni quee xiní yā. <sup>17</sup> Te ichí ándiví ni cahán ìn jñuhun:

Yáha cúu Sēhe ri jeē maní ndasí rí jín, te yōhyo cúsí ni rí jín, áchí.

### *Jeē ní jito ndee jexeén Jesús*

*(Mr. 1.12-13; Lc. 4.1-13)*

## 4

<sup>1</sup> Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chí cúní jeē sáha ya cuéchi.

<sup>2</sup> Te ni iyo ndite ni yā uū xico nduú uū xico ñuú, sáá te jí yā sōco. <sup>3</sup> Te ni quee máá jéxeén jeē coto ndee un yá, te ni cahán jín yá:

Núu máá ró cúu Sēhe Yaā Dios, te cahán rō jeē yuú yúcu yáha na ndúu staa caji rō, achí.

<sup>4</sup> Te ni cahán yā jín:

Tuú chí yósó núu tútu ì: Nasūu máni máá jín stáa cátecu ñayuu, chí suni jín táca jñuhun cáhán Yaā Dios, achí yá.

<sup>5</sup> Yūcuán na te cuahán jexeén un jín yá nde ñuu ì Jerusalem. Te ni jeni ya xiní torre templo. <sup>6</sup> Te ni cahán jín yá:

Te núu Sēhe Yaā Dios chí rō, te sǎngava ró máá ró nde nuū ñuhun, chí jnama ya rohó. Chí yósó núu tútu:

Tejníñu ya ndajéhé yá quijicoo coto róhó.

Te cunundee yá rohó jínáhan ya,

návāha ma cáchihí ró jéhē rō nuū yuú.

Achí tutu. Achí jexeén.

<sup>7</sup> Te ni cahān Jesús:

Tuú chí suni yósó núū tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

<sup>8</sup> Te jexeén un ní jeca tucu ya cuahān jíin yá nde xinī ñin yucu súcún ndasí. Te ni steén tǎcá nación ní cáhnu ñayiví núū yá, te yōhyo luu cáa ndihí. <sup>9</sup> Te ni cahān jíin yá:

Tǎcá ñuu yáha cuáha ri nuū rō, te núu cuiñí yítí ró chíñúhún ró ruhū, achí.

<sup>10</sup> Yūcuán na te ni cahān Jesús nuū jexeén:

Satanás, cujiyo quihīn rō, chí yósó núū tútu jeē chíñúhún ñayuu maá Jitoho i Yaā Dios, te nuū maá-ni ya cuajniñu i. Achí yá.

<sup>11</sup> Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejniñu nuū yá.

*Jeē ní quejéé Jesús nácani ya jñūhun región Galilea*

(Mr. 1.14-15; Lc. 4.14-15)

<sup>12</sup> Te ná ni nihīn Jesús jñūhun jeē íne Juan vecāa, te cuanuhun yā región Galilea. <sup>13</sup> Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un íne yumar, máa región Zabulón jíin Neftalí. <sup>14</sup> Te súcuan ni squícu jñūhun ní tee Isaías, tēe ni nacani jñūhun Yaā Dios nde jenhán:

<sup>15</sup> Región Zabulón jíin Neftalí,

ichi jeē yñi yumar, lado yūte Jordán nuū cáne niāndii,

jíin región Galilea nuū cáyūcú ñayuu tǎcá nación tu jíiní jñūhun ya.

<sup>16</sup> Ñayuu ún chí nájñūhun cáyūcú i nuū nēé,

te coto i nájñūhun ñin luz cáhnu.

Te ñayuu je yajni naa, nihīn i jñūhun váha ndasí,

suu jñūhun jeē jnama ya anuá i.

Achí Isaías.

<sup>17</sup> Te nde quiví yúcuan ní quejéé Jesús nácani ya jñūhun, te ni cahān yā suhva:

Nacani ní rō jíinánhan ró jéé stóo ró cuéchi ró, chí je ni cuyajni Yaā ndeé andiví jéé ndacu ya jniñu nuū rō, achí yá.

*Jeē ní cana ya cuūn tēe jññ chācá*

(Mr. 1.16-20; Lc. 5.1-11)

<sup>18</sup> Te jica Jesús yumar Galilea cuahān yā. Te ni jito ya nuū uú jnánhan ñani. Te ñin de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar. <sup>19</sup> Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájñūhun cánihīn rō chācá, achí yá.

<sup>20</sup> Yūcuán na te ni castóo-ni de ñunu de, te ni candiquīn de ya.

<sup>21</sup> Te ni jica ya jecu gā, te ni jito ya nuū inga uú jnánhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñi de ñunu de. Te suni ní cana ya de jeē cóndiquīn de ya. <sup>22</sup> Te ni castóo-ni de tátá de jíin barco, te ni candiquīn de ya cuangoo de.

*Jeē ní steén yā nuū cuehē ñayuu*

(Lc. 6.17-19)

<sup>23</sup> Te ni jica cuu Jesús ní región Galilea, ni steén yā jñūhun ini tǎcá vehe ñi jeē cúu sinagoga. Te ni nacani ya jñūhun váha ndese ndácu Yaā Dios jniñu. Te ni



nasávaha ya ñayuu cácuñũ táca-ni cuehyĩ. <sup>24</sup> Te ni jitē núu jñũhun ya cuahān ñĩ región Siria. Te nuũ yā ni caquindecā i táca ñáyuu cácuñũ, ñayuu cándoho tijni nuũ cuehyĩ, jiin jéé jetú, jiin jéé ñũhun tachĩ ini, jiin jéé jĩhĩ yĩhĩ, jiin jéé ni ijin. Te ni nasávaha ya i jijnáhan i. <sup>25</sup> Te cuehē ñayuu región Galilea jiin Decápolis, jiin ñáyuu ñuu Jerusalén jiin región Judea, jiin táca ñuu ichi núu cáne niāndii yũte Jordán, ni cacondiquĩn i ya.

*Jeē ní nacani ya jñũhun nde nuũ yúcu*

## 5

<sup>1</sup> Te ni jito Jesús nuũ ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jiin yá, ni jinũcoo de nuũ yā yũcuán. <sup>2</sup> Te ni quejéé yá ni steén yā táca jñũhun yáha nuũ de:

*Jñũhun yōhyo ndetũ*

*(Lc. 6.20-23)*

<sup>3</sup> Yōhyo ndetũ ñayuu jeē cánacuni i jeē tu iyó váha ánuá i siquĩ cuéchi i, chi je ni quivicoo i ndaha Yaā andivĩ jéé ndácu ya jniñu nuũ i.

<sup>4</sup> Yōhyo ndetũ ñayuu cácuñũhyá ni, chi ndusĩ ni i sáha Yaā Dios.

<sup>5</sup> Yōhyo ndetũ ñayuu cáhĩyo vītá suchĩ ini, chi ni jejnũhun ya jeē cutahũ i ñayivĩ.

<sup>6</sup> Yōhyo ndetũ ñayuu jeē nájñũhun jeē cájiĩ i sōco cájichĩ i, súcuan jnāá i sáha i jniñu ndaā, chi máa yá chindéé ñáhán yá i jeē cuu sáha i.

<sup>7</sup> Yōhyo ndetũ ñayuu cácuñũhú ni jnáhan, chi suni cuñdáhú ni Yaā Dios i.

<sup>8</sup> Yōhyo ndetũ ñayuu cáhĩyo ndoo ini anuá, chi coto i nuũ Yaā Dios.

<sup>9</sup> Yōhyo ndetũ ñayuu cánasámanĩ jnáhan, chi cahān Yaā Dios jeē sēhe ya cácuu i.

<sup>10</sup> Yōhyo ndetũ ñayuu jeē cájito xeēn inga ñayuu i siquĩ jeē casáha i jniñu ndaā, chi je ni quivicoo i ndaha Yaā andivĩ jéé ndácu ya jniñu nuũ i.

<sup>11</sup> Yōhyo ndetũ máa ró jijnáhan ró núu cácahān neé i nuũ rō jeē siquĩ ruhũ, te coto xeēn i rōhó, te stáú yáhu i rōhó, vēsú tú cuéchi ró. <sup>12</sup> Na cúsnĩ ni rō jijnáhan ró núu súcuan, te sa víhyá gā cusĩ ni rō, chi cáhnu ndasĩ coo tahũ rō nde andivĩ. Chi suni súcuan ni cajito xeēn i táca tēe ni canacani jñũhun Yaā Dios jeē ní quijicoo xĩhna gā vēsú rohó.

*Jñũhun yátá siquĩ ñĩ jijn siquĩ luz*

*(Mr. 9.50; Lc. 14.34-35)*

<sup>13</sup> Máa ró jijnáhan ró cájejniñu ró ini ñayivĩ nájñũhun jéjniñu ñĩ nuũ cúñu návaha tú tehyũ. Te núu ñĩ ún na náā jeē uhvuá, ¿te ndese nduu uhvuá tucu? Tuá cuajniñu cuiĩ gā, chi sa cate ñayuu te cueñũ i siquĩ.

<sup>14</sup> Máa ró cácuu nájñũhun luz jeē steén ini anuá ñayuu ñayivĩ. Te cácuu ró nájñũhun ñn ñuu íne xĩnĩ yúcu, jeē ma cúu quisáhĩ. <sup>15</sup> Te ni tu nástĩn ñayuu ñn lámpara te chune i chĩji cajón, chi sa suhva jéni i nuũ súcun, návaha cundijin nuũ táca jéé cáyũcú ini vehe. <sup>16</sup> Te suni súcuan na stéén rō luz máa ró nuũ táca ñáyuu, te suu cúu jeē cúni i jniñu váha casáha ró, te cahān i jeē yóhyo váha Yaā cúu Tátá rō jeē ndeé yá andivĩ.

*Jeē ní stéén yā siquĩ ley Yaā Dios*

<sup>17</sup> Ma cáni ni rō jijnáhan ró jéé véji ri snáá rĩ ley jeē ni jéhe Yaā Dios nuũ Moisés, jiin jéé snáá rĩ táca jñũhun ni cacahān tēe ni canacani jñũhun ya jenahán. Tú véji ri jeē snáá rĩ, chi sa suhva jeē steén cajĩ rĩ jñũhun ndíso. <sup>18</sup> Chi jendaá cahán rĩ jiin ró jeē núu níni iyó andivĩ jiin ñayivĩ, te ma náā cuiĩ ni

in punto ni in letra nuū tūtu ley yā, chi nde na squicu tācā ndihi jnūhun jeē cahán. <sup>19</sup> Nūu sūcuan te nūu in ñayuu tu squicu i in jnūhun yáha jéē ndácu ley yā, vēsū in jnūhun lulí gá cúu, te nūu stéén i jeē suni sūcuan sáha sava ga ñayuu, nūu sūcuan te cuu i ñayuu nūu ga ichi andiví nuū ndácu Yaā Dios jniñu. Te nūu in ñayuu squicu i te stéén i jeē squicu ñayuu, yūcuán na te cujéhnu i ichi andiví nuū ndácu Yaā Dios jniñu. <sup>20</sup> Chi cahán rī jín ró jeē nūu tu coo ndaā gā jniñu cásáha ró vēsū jniñu cásáha tēe cástéén tutu ley yā jín tēe grupo fariseo, te ma quívicoo cuiti rō ndaha Yaā andiví jéē ndacu ya jniñu nuū rō.

*Jeē ni stéén yā jeē ma quití ni yō*  
(Lc. 12.57-59)

<sup>21</sup> Je ni cajini ró jnūhun ni cacahán jín ñayuu jenahán, jeē ma cáhni i ndīyi, te na-ni ñayuu nūu cahni i ndīyi, te cundaā cuēchi i nuū tāca tóhō, achí. <sup>22</sup> Te ruhū chi cahán rī jín ró, vēsū nūu máá jéē quití ni in ñayuu jito i jnánhan i, suni cundaā siquí cuēchi i ún. Te nūu in ñayuu cahán neé i nuū jnánhan i, nūu sūcuan te cundaā cuēchi i un nūu justicia cujéhnu ga. Te nūu in ñayuu cahán i nuū jnánhan i: Róhó jéē canéé í, achi i, nūu sūcuan te quívi i nuū ñuhún infierno te nūu ma nácani ni i.

<sup>23</sup> Jeē yūcuan te nūu ni jinū rō nuū altar jín jéē socó rō nuū Yaā Dios, te nūu ni nucūhun ni rō jeē ni sáha ró cuéchi siquí jnánhan ró, <sup>24</sup> nūu sūcuan te squéndō ró jéē socó rō ún xiin altar, te xihna gā quihín rō ndumaní rō jín jnánhan ró. Yūcuán na te nandicó ró socó rō.

<sup>25</sup> Te nūu in ñayuu quihín i jín ró nuū tohó jeē cacān i cuēchi siquí rō, nūu sūcuan te níni cuáhán rō jín i ichi te sándaā maá ró jín i, návaha ma squívi i róhó nūu juez. Chi juez siáha de róhó nūu policía, te chune de róhó vecāa. <sup>26</sup> Te jendaá cahán rī jín ró jeē ma quéndā cuiti rō yūcuán, chi nde chunaa rō ndihi cuiti xūhun jéē cájicān de.

*Jeē ni stéén yā jeē ma cósiquí ndéē jnánhan*

<sup>27</sup> Ni cajini ró jnūhun ni cacahán jenahán jeē ma cósiquí ndéē jnánhan ñayuu. <sup>28</sup> Te ruhū chi cahán rī jín ró jeē nūu in tēe ndéhe de nuū in ñahan jeē ndīyo ni de ña, yūcuán na te je ni casíquí ndéē de ñahan ún ini anuá de.

<sup>29</sup> Nūu sūcuan te nūu tinūu lado váha ró sáha jeē quívi ró cuéchi, váha ga quenehen ró te scāne ró, návaha tuá sáha ró cuéchi. Chi váha gā jeē náá in tinūu ró vēsū jeē cóo ndihi yiqui cúñu rō te quihín rō infierno. <sup>30</sup> Te nūu ndaha váha ró sáha jeē quívi ró cuéchi, váha ga cahnde rō te scāne ró, návaha tuá sáha ró cuéchi. Chi váha ga jeē náá in ndaha ró vēsū jeē cóo ndihi yiqui cúñu rō te quihín rō infierno.

*Jeē ni stéén yā jeē ma ndusín jnánhan*  
(Mt. 19.9; Mr. 10.11-12; Lc. 16.18)

<sup>31</sup> Te suni ni cacahán nde jenahán: Nūu ndé in cúní stóo ñasihí, te na cuáha acta nuū ña jeē ndusín jín ña. <sup>32</sup> Te ruhū chi sa cahán rī jín ró jeē nūu in tēe stóo de ñasihí de, te nūu nasūu jéē tíjni ni ña, nūu sūcuan te sáha de jeē casíquí ndéē ña de, chi condee ña jín inga tēe. Te nūu in tēe condeca de ñahan ní ndusín, suni casíquí ndéē de ña.

*Jeē ni stéén yā siquí jnūhun jéjnūhun téyí*

<sup>33</sup> Te suni ni cajini ró jnūhun jeē ni cáhán jín ñayuu nde jenahán: Nūu ni jejnūhun téyí ró jeē squicu ró, jito jínúu Yaā Dios, nūu sūcuan te cánuú squicu ró jéē ni cáhán teyí ró un, achí. <sup>34</sup> Te ruhū chi cahán rī jín ró jijnánhan ró jeē ní in siquí jniñu ma cahán teyí ró nde jín síhvi Yaā Dios, ni ma cahán teyí ró

jeē jító jínū yā. Te núu jéjnūhun téyí ró te tú vāha jeē ndácunehen ró andiví ni ñayiví. Chi andiví cúu nuū ín mesa nuū ndácu Yaā Dios jniñu. <sup>35</sup> Te ñayiví cúu nájñūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu maá Yaā cúu Rey cujéhu. <sup>36</sup> Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuiti sáha ró jéē ni ñn íxi xíní rō nducujín chí ndujnú. <sup>37</sup> Chi suhva-ni cahán rō: Cuu, achí rō. Tuú, achí rō. Chi núu chisóó gá rō jñūhun cahán rō, te nuū jexeén vēji.

*Jeē ni stéén yā jeē ma cuāha yó jéē ndútahū ñayuu*

*(Lc. 6.29-30)*

<sup>38</sup> Ni cajini ró jñūhun jeē ni cahán jíin ñayuu jenahán: Núu ñn tēe ndahva de tinūu jñáhan de, suni súcuan na ndáhva tinūú de. Te núu ñn tēe stáva de jñūhun jñáhan de, suni súcuan na stáva jñūhun de, achí. <sup>39</sup> Te ruhū chí sa cahán rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yiqui núu lado váha ró, te váha ga suni cuāha ró inga lado cani de, vēsú jeē nácuāha ró jéē ndútahū de. <sup>40</sup> Te núu ndé tēe stáu yáhu de róhó te quēnde de camisa rō, suni cuāha ró jñūhun jeē na quíhín de jíin ndé ticāchi ró. <sup>41</sup> Te núu ndé tēe scāca de róhó jéē condiso ró ndajniñu de ñn kilómetro, te caca ró úu kilómetro jíin de. <sup>42</sup> Te na-ni ñayuu núu jíicán i ndajniñu ró, te cuāha ró núu i. Te ñayuu jíicán núu ndajniñu nuū rō, ma sasáhán ró cuāha ró núu i.

*Jñūhun jeē cundáhú ni yō ñayuu cájito uhū yohó*

*(Lc. 6.27-28, 32-36)*

<sup>43</sup> Te suni ni cajini ró jñūhun jeē ni cahán nde jenahán: Cundáhú ni rō ñayuu cáhíyo maní jíin ró, te coto uhū rō ñayuu cájito uhū rohó, achí. <sup>44</sup> Te ruhū chí sa cahán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha váha ró jíin ñayuu cácuítí ni núu rō. Te cacān tahū rō jehē ñayuu cácahān neé núu rō te cájito xeēn i róhó. <sup>45</sup> Te súcuan stéén rō jeē cácuu ró séhe maá Tátá rō, Yaā ndeé andiví, chí maá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu neé. <sup>46</sup> Chi núu íyó maní rō jíin maá-ni ñayuu jeē maní jíin ró, te tú na tahū niñin rō nuū yā. Chí nde tēe cástútú xúhun renta jeē castáhú, suni súcuan casáha de. <sup>47</sup> Te núu máni jñáhan ró cahán yñíhún ró jíin, ¿te na vé jeē váha ga sáha ró núu súcuan? Chí nde ñayuu tu cácañje Yaā Dios, suni súcuan casáha i. <sup>48</sup> Núu súcuan te ndaā na cóo ndíhi jeē sáha ró, nájñūhun íyó ndaā ndíhi jeē sáha Tátá rō, Yaā ndeé andiví.

*Jeē ni stéén yā ndese sáha yó jniñu váha*

## 6

<sup>1</sup> Te jeē sáha ró táca jniñu váha nuū Yaā Dios, coto ró jéē ma sáha ró maá siquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha maá Tátá rō, Yaā ndeé andiví. <sup>2</sup> Jeē yúcuu te jeē sáha ró caridad, te ma sáha ró jéē cúni táca ñayuu, nájñūhun casáha tēe stáhú-ni, cáhín de nuū cúchitú ñayuu ini táca vehe íi sinagoga jíin núu yáhu. Chi súcuan casáha de návāha cuajnúhún ñayuu de jeē váha casáha de. Jendaá cahán rī jíin ró jeē tahū de cúu jeē jejnúhún ñayuu de. <sup>3</sup> Te róhó jíjñáhan ró, núu casáha ró caridad, te sáha yuhu rō, návāha nde amigo váha ró tú cuni jeē sáha ró. <sup>4</sup> Súcuan na sáha yuhu rō caridad. Te maá Tátá rō jeē jító ya jeē sáha yuhu rō, ñn quiví te cuāha ya tahū cuu rō.

*Jeē ni stéén yā ndese cacān tahú yō  
(Lc. 11.2-4)*

<sup>5</sup> Te jeē cájicān tahú rō, te ma sáha ró nájñuhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini táca vehe i sinagoga jiín táca yíqui yáhu, náváha cuni ñayuu te cuajnúhún i de. Jendaá cahán rī jiín ró jeē maá yúcuan-ni cúu tahū jeē nihín de, suu jeē jejnúhún ñayuu de. <sup>6</sup> Te róhó jijnáhan ró, núu cájicān tahú rō, te ndívi ró ini vehe ró te casi ró yehyí. Te cacān tahú rō nuū maá Tátá rō, Yaā ndeé yuhu jiín ró. Yūcuán na te maá Tátá rō jeē jito ya jeē súcuan sáha yuhu rō, sáha ya jeē jicán rō.

<sup>7</sup> Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñuhun cásáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahán i, te sáá te cuni sōho ya, te tuú. <sup>8</sup> Núu súcuan te ma sáha ró nájñuhun cásáha maá i. Chi maá Tátá rō, je jíní yā na vé cájini ñúhún ró nde ná tu cacān rō nuū yā. <sup>9</sup> Núu súcuan te suhva cacān tahú rō:

Tátá maá ná jijnáhan ná jéē ndeé ní andívi,  
níní na cóo yíñúhún ná nuū ní, chi Yaā ií cúu ní.

<sup>10</sup> Te ñúhún ni na jéē yachī quiji quivī ndacu ní jniñu ní ñáyivi yáha. Te na cóo táca jniñu núnahan ni ní,

nájñuhun iyó ini andívi, súcuan na cóo ini ñáyivi.

<sup>11</sup> Staá jeē cátecu na táca quívī, cuáha ní núu ná vijna.

<sup>12</sup> Te cone cahnu ni ní núu táca cuéchi cásáha ná núu ní, nájñuhun cáhine cáhnu ni na núu ñayuu casáha cuéchi nuū ná.

<sup>13</sup> Te ma cuáha ni jnúhun jeē coto ndee jexeén saña, chi sa suhva jnama ní saña núu táca jéē neé.

Chi maá ní cúu Yaā ndácu jniñu, te jni ní poder,  
te yōhyo luu cújéhu ní ní cáni. Súcuan na cóo. Amén.  
Achi rō jijnáhan ró.

<sup>14</sup> Chi núu cone cáhnu ni rō nuū ñayuu casáha cuéchi nuū rō, te suni súcuan cone cáhnu ni maá Tátá rō andívi nuū cuéchi ró. <sup>15</sup> Te núu ma cóne cáhnu ni rō nuū ñayuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jijnáhan ró.

*Jeē ni stéén yā siqui jnúhun condite ni*

<sup>16</sup> Te núu condite ni rō jeē chiñúhún ró Yaā Dios, te ma sáha ró nájñuhun cásáha tēe stáhú-ni. Chi cásáha de jeē coto xií de, te súcuan stéén de nuū ñayuu jeē iyó ndite ni de, náváha cuajnúhún i de. Jendaá cahán rī jiín ró jeē maá yúcuan-ni cúu tahū jeē nihín de, suu jeē jejnúhún ñayuu de. <sup>17</sup> Te maá ró jijnáhan ró, núu iyó ndite ni rō, te sa chuhun váha ró xíní rō te nandahá núu rō, <sup>18</sup> náváha ma cuni ñayuu jeē iyó ndite ni rō. Chi maá-ni Tátá rō jeē ndeé yuhu yā jiín ró, cuni yā, te ñin quívī te cuáha ya tahū cuu ró.

*Ndese coo cúcá yó nde andívi  
(Lc. 12.33-34)*

<sup>19</sup> Ma cóndihvi ni rō caya rō ndajniñu cúcá ini ñáyivi yáha, chi quívī tiquíxin, te cáne xehyu, te tvi. Te suni quívicoo ñacuñhá te sácuñhá. <sup>20</sup> Chi sa suhva sáha ró táca jniñu váha náváha cayā tahū rō nde andívi. Chi yúcuan má quívī tiquíxin ni ma cáne xehyu jeē tvi. Ni ma cúu quívī ñacuñhá sácuñhá. <sup>21</sup> Chi nde nuū nihín ró tahū váha ró, yúcuan cúu nuū cóndihvi ni rō siqui.

*Tinūu cúu lámpara yiqui cúñu  
(Lc. 11.34-36)*

<sup>22</sup> Tinūu ró cúu nájnūhun lámpara nuū yiqui cúñu rō. Núu súcuan te núu tinūu ró iyó ndijin, te ní-ni yiqui cúñu rō cúndijin. <sup>23</sup> Te núu tinūu ró tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chí núu máni jeē jéni néé ni rō, te nacá jeē nee gá iyó ini anuá rō núu súcuan.

*Jeē ma cóndihvī ni yō siquī xūhun*  
(Lc. 16.13)

<sup>24</sup> Ni ñin mozo ma cúu cuajniñu de nuū uū patrón. Chí quitī ni de nuū ñin te coo manī de jíin inga, chí squícu váha de nuū ñin te sájéē ni de nuū inga. Te suni súcuan ma cúu cuajniñu ró núu Yaā Dios te núu máni siquī xūhun ndihvī ni rō.

*Yaā Dios ndíto ya yohó*  
(Lc. 12.22-31)

<sup>25</sup> Núu súcuan te cáhán ri jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chí Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē cáji rō jíin jéē cúhun ró. <sup>26</sup> Condēhe ró ndese cátecu saa, chí tu cátaji ti, ni tu cánastútú tí jeē chūvāha ti, ni tú yacā tí. Te vēsú súcuan te máá Tátá rō andiví scáji yā tí. Te cánuú ndasí gá rō jijnáhan ró vēsú táca saa ún. <sup>27</sup> ¿Te ndé ñin ró, á cuu scuéhu ró máá ró sava metro gā, vēsú na nácani ndasí ni rō?

<sup>28</sup> ¿Te najehē cánacani ndasí ni rō jeē ma nihín rō sahma? Condēhe jíjnáhan ró ndese jée ita táca yúcū. Chí tu sájniñu, ni tu táu. <sup>29</sup> Te cáhán ri jíin ró jeē ni rey Salomón, quivī ní ñūhun de sahma váha ndasí, tu ní ñūhun de sahma lúu súcuan nájnūhun ita ún. <sup>30</sup> Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu róhó jíjnáhan ró jéē ma sáha ya jeē nihín rō sahma. ¿Te naun tu cácandíje nihín ró jéē ndíto ya rohó? <sup>31</sup> Núu súcuan te ma nácani ndasí ni rō siquī jeē cáji rō, jeē coho ró, jeē cuhun ró. <sup>32</sup> Chí táca ñayuu ñayiví jéē tu cácandíje cúu jeē máni siquī jeē yáha cándihvī ni i. Te máá ró jíjnáhan ró, chí iyó Tátá rō andiví, te jíni yā jeē cájini ñuhún ró táca jéē yáha. <sup>33</sup> Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jíin siquī jeē sáha ró jniñu ndaā jeē nújnahan ni yā. Yūcuán na te sáha ya jeē nihín rō táca jéē yáha. <sup>34</sup> Núu súcuan te ma nácani ni rō siquī jeē cóo sajnē, chí vijna cúu vijna te sajnē cúu sajnē. Chí cani ni rō siquī jnúndóho jeē iyó ná ñin ná ñin-ni quiví.

*Jeē ma cahán yō siquī cuéchi jnánhan yó*  
(Lc. 6.37-38, 41-42)

## 7

<sup>1</sup> Ma cahán ró siquī ñayuu ndese sáha i, návāha suni ma cahán Yaā Dios cuéchi siquī máá ró jeē casáha ró súcuan. <sup>2</sup> Chí nájnūhun cácahān ró siquī cuéchi ñayuu, suni súcuan cahān yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. <sup>3</sup> Chí cuéchi jnánhan ró cúu nájnūhun jeē íne ñin yāca lúli tinūu i. ¿Te naun cásáha ró cuenta jeē súcuan, te tu cásáha ró cuenta cuéchi máá ró jeē cúu nájnūhun jeē íne ñin nduhu tinūu máá ró? <sup>4</sup> ¿Te naun cácahān ró jíin jnánhan ró: Na táva ri yāca íne tinūu ró, te tu cánacani ni rō jeē íne ñin nduhu tinūu máá ró? <sup>5</sup> Tēe stáhu-ní cácuu ró núu súcuan. Xíhna gā tinūu máá ró tava rō nduhu, te yūcuán na te cuu condēhe váha ró jéē táva rō yāca tinūu jnánhan ró.

<sup>6</sup>Ma sáha fuerza rō ñayuu cunéé quívicoo i nuū jnúhun iī yā núu tu cúní i. Chi ndonda i siquī rō nájñuhun ina jeē cáyihí tí rohó. Te ma nácani ró jnúhun ya nuū ñáyuu jeē tu cúní cuiti cuajnúhún. Chi cándaā i nájñuhun quíñí jeē jeñú tí siquī perla jeē ndeé yahu ga.

*Cacān yō nuū yā te nihīn yō*  
(Lc. 11.9-13; 6.31)

<sup>7</sup>Cacān rō nuū Yaā Dios, te cuāha ya nuū rō. Te nducú ró tāca jéē váha íyó núu yā, te nihīn rō sáha ya. Te cacān tahú rō nde nihīn rō, nájñuhun sáha ñayuu cahán yehyí ndé nune quíñí i. <sup>8</sup>Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

<sup>9</sup>¿Te ndé ñn rōhó núu sēhe ró jícán i staā nuū rō, te á cuāha ró ñn yuū nuū i? <sup>10</sup>¿Te núu jícán i ñn chācá, te á cuāha ró ñn coō nuū i? Tú cuiti súcuan. <sup>11</sup>Núu súcuan te máá ró jijnáhan ró, vésú ñayuu iyó cuéchi cácuu ró, te cájini ró cuāha ró jéē váha nuū séhe ró. Te nagā ni cuu máá Tátá rō andiví jéē ma cuāha ya jeē váha nuū ñáyuu jicán nuū yā.

<sup>12</sup>Te nájñuhun cúní rō jeē sáha váha ñayuu jín ró, suni súcuan na sáha váha ró jín i. Chi tutu ley Moisés súcuan ndácu jniñu, jín táca tutu tēe ni canacani jnúhun Yaā Dios.

*Siquī jeē quíñí yó yéhyí túū*  
(Lc. 13.24)

<sup>13</sup>Condihví ni rō quívicoo ró ndaha Yaā Dios. Chi cúu nájñuhun ñn yéhyí túū. Chi yéhyí jín ichi jeē cuahán nuū jnahnú ndetū ñayuu, jité te cáhnu, te cuehē i quívicoo yūcuán. <sup>14</sup>Te yéhyí jín ichi jeē cuahán nuū nihín tahú i cotecu i, chi tuū yehyí te cuíñí ichi, te jecu-ni i cánihīn i.

*Jín jniñu cásáha ñayuu te nácuni yō ndese ñayuu cácuu i*  
(Lc. 6.43-44)

<sup>15</sup>Te ma cándije cuiti rō tēe stáhú jéē cácahán de jeē jnúhun Yaā Dios cánacani de. Chi nájñuhun lanchi, quiti tú xeēn, súcuan cásáha de vējicoo de nuū rō. Te ini anuá de chi cácuu de nájñuhun yihí, quiti xéén. <sup>16</sup>Jín jniñu cásáha de te nacuni rō de ndese tēe cácuu de. Chi cúu nájñuhun jeē tu scóyo ró ndehē uva xinī íñu, ni tu scóyo ró higo xinī íñu yóquin. <sup>17</sup>Te tācá yujnu váha chi jéhe ndehē váha, te yujnu neé chi cúun ndehē neé. <sup>18</sup>Ñn yujnu váha ma cúun ndehē neé, te ni ñn yujnu neé ma cuāha ndehē váha. <sup>19</sup>Te tācá yujnu jeē tu jéhe ndehē váha, chi tahndē te cayū nuū ñuhún. <sup>20</sup>Te suni súcuan cácuu tēe ún, chi jín jniñu cásáha de te nácuni rō ndese tēe cácuu de.

*Nasūú ndihí ñayuu quívicoo andiví*  
(Lc. 13.25-27)

<sup>21</sup>Nasūú ndihí ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máá nene ñayuu jeē squícu jniñu cúní Tátá rī andiví. <sup>22</sup>Te quíñí jeē sándaā rī jniñu ñayuu, te cuehē i cahán jín rī: Jitoho na jijnáhan ná, ni canacani ná jnúhun jín síhví ní, te ni caquenehen ná táchí jín síhví ní, te ni casáha ná cuehē jniñu jéhnu jín síhví ní jeē náā ni ñayuu sáha. Achi i. <sup>23</sup>Yūcuán na te cahán rī jín ñáyuu ún: Tu jíní cuiti rī rohó. Cuijiyo quingoo ró, chi ñayuu casáha jniñu neé cácuu ró, achi rī.

*Siquī úu vehe*  
(Lc. 6.47-49; Mr. 1.22)

<sup>24</sup> Núu súcuan te tāca ñáyyu jeē cájini sōho jnūhun cáhán rī te squícu i, cácuu i nájñūhun ñn tēe ni nacani vāha ní, te ni jeni de vehe de siquī cáva. <sup>25</sup> Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cotúú, chí siquī cáva ndéé. <sup>26</sup> Te tāca ñáyyu jeē cájini sōho jnūhun cáhán rī te tu squícu i, cácuu i nájñūhun ñn tēe cánée jeē ní jeni de vehe de nuū ñfti. <sup>27</sup> Te ni cuun saū, te ni quíji ndute ñúhún cuéhē, te ni quee tachī xeén, te ni cachundahá vehe ún. Te ni cotúú-ni, te ni naa ñ-ni. Achí yá jíin i jíjnáhan i.

<sup>28</sup> Te ná ni jínu ni cahán Jesús tāca jnúhun yáha, te ñayuu cuehē un ní canaa ni i ni cajini i jnūhun ni steén yā. <sup>29</sup> Chí ni steén vāha ya nuū i, chí máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de.

*Jeē ní nasávāha ya ñn tēe ndóho cuehyī stehyú*  
(Mr. 1.40-45; Lc. 5.12-16)

## 8

<sup>1</sup> Te ni nanuu Jesús yucu ún, te cuehē ñayuu cándiquīn i ya. <sup>2</sup> Te ñn tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahán de jíin yá:

Jíni na jēe cuu sáha ní jēe nduvāha ná, te núu cúní ni, áchí de.

<sup>3</sup> Te Jesús ni soó yá ndaha ya siquī de, te ni cahán yā:

Cúní rī. Te na ndúvāha ró, áchí yá.

Te ná ni cahán yā súcuan, te ni nduvāha-ni tēe ndóho cuehyī stehyú un.

<sup>4</sup> Yūcuán na te ni cahán Jesús jíin de:

Ma cáchi cuiñi rō nuū ní ñn. Chí quisteén rō maá ró nuū sutú, te condahá ró jeē socó rō nuū Yaā Dios, nájñūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán*  
(Lc. 7.1-10)

<sup>5</sup> Te ni quívi Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahán ndahú de jíin yá:

<sup>6</sup> Mozo na cátú i vehe ná, chí ni íjin i te ndóho xeén i, áchí de.

<sup>7</sup> Te ni cahán Jesús:

Quihín rī nasávāha ri i núu súcuan, áchí yá.

<sup>8</sup> Te ni cahán capitán jíin yá:

Tu cújéhu ná jēe quihín ni quívi ní vehe ná. Chí máá jēe cahán-ni ní, te na ndúvāha-ni mozo na. <sup>9</sup> Chí máá ná suni ndíso jniñu ná ní casáha tēe cácujeñu ga. Te cújéhu ná núu táca soldado na. Te núu cáhán na jíin ñn de jeē na quihín de, te cuahán de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

<sup>10</sup> Te jeē ní jini Jesús jnūhun yáha, te ni naa ni yā. Te ni cahán yā jíin ñayuu cándiquīn yā ún:

Jendaá cahán rī jíin ró jeē ni nación yō Israel tu ní níhín rī ni ñn ñayuu cándije níhin súcuan, nájñūhun cándije tēe yáha, vesú tēe nación tu jíni jnūhun Yaā Dios cúu de. <sup>11</sup> Te cáhán rī jíin ró jeē quíjicoo cuehē ñayuu ichi núu cáne niándii jíin ichi núu queé niándii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. <sup>12</sup> Te sava ñayuu nación Israel jeē maá i quívicoo núu, te sa quenehen ya i quihín i nuū néé, chí tu ní cácujeñu i. Te yūcuán ndáhyū i te nacayihí yuhu i jeē ndoho xeén i. Achí yá.

<sup>13</sup> Yūcuán na te ni cahán yā jíin tēe cúu capitán:



Cuánuhun vehe ró, chi sáha ri nájnūhun cándije ró jēē sáha ri.  
Te mozo de un ní nduvāha-ni i máá hora un.

*Jeē ní nasávāha ya naná chīsō Pedro*  
(Mr. 1.29-31; Lc. 4.38-39)

<sup>14</sup> Te ni jehēn Jesús vehe Pedro. Te ni jito ya naná chīsō de jeē catú ña yíhi quíji ña. <sup>15</sup> Te ni jnī ya ndaha ña, te ni quenda-ni quíji ún ña. Te ni ndocuiñī ña, te ni sáha ña jeē ní cayeyi de jíin yá.

*Jeē ní nasávāha ya cuehē ñayuu*  
(Mr. 1.32-34; Lc. 4.40-41)

<sup>16</sup> Te jeē ní cuaa ní quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuángoo jíin jnúhun cáhán-ni ya. Te suni ní nasávāha ya táca ñayuu cácuñū. <sup>17</sup> Te súcuan ní cuu návāha cundaā jnúhun ní cahān Isaías, tēe ní nacani jnúhun Yaā Dios jenahán: Máá yá ní tejyio ndinuū cuehyī cándoho yó, áchí Isaías.

*Siquī ñayuu jeē cácuñi i condiquīn i ya*  
(Lc. 9.57-62)

<sup>18</sup> Te ni jito Jesús jeē ní ndicó nduū cuehē ñayuu yá. Te ni cahān yá jíin tēe cáscuáha jíin yá jeē na yáha de jíin yá inga lado mar. <sup>19</sup> Te ñn tēe stéén tutu ley Yaā Dios, ní quee de nuū yá, te ni cahān de:

Maestro, condiquīn na níhín quihīn yō ndé-ni cúu-ni nuū quihín ni, áchí de.

<sup>20</sup> Te ni cahān Jesús jíin de:

Tāca ñūcuñi, iyó yáú cava cáñuhun tí. Te suni saa, iyó táca tí. Te ruhū, Yaā ní nduu tēe, tuú nuū cusú rī, achí yá.

<sup>21</sup> Te inga tēe ní cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xihna gā. Yūcuán na te condiquīn na níhín, áchí de.

<sup>22</sup> Te ni cahān Jesús jíin de:

Condiquīn ruhū na quihín yō. Te stóo táca ndíyī na chíndūji jnáhan ndíyī, chí ndíyī cácuu ñayuu tu cácandije. Achí yá.

*Jeē ní jecuiñī tachī níhin jíin mar ní sáha ya*  
(Mr. 4.35-41; Lc. 8.22-25)

<sup>23</sup> Yūcuán na te ní quívi Jesús ini barco, te tēe cáscuáha jíin yá ní quívicoo de cuahān de jíin yá. <sup>24</sup> Te nuū mar ní jecuiñī ñn tachī níhin, te ní stóna ndute mar, ní quívi ini barco un. Te Jesús chí quíxí yá. <sup>25</sup> Te tēe cáscuáha jíin yá ní castóna de ya, te ní cacahān de:

Jnama ní yóhó, chí je quee yó chíji ndute, áchí de.

<sup>26</sup> Te ni cahān yá jíin de:

¿Naun cáyūhú ndasí ró? Te tu cácandije níhin ró jēē cácu ró sáha ri, achí yá.

Yūcuán na te ni ndocuiñī yá, te ni cahān yá nuū tachí níhin un jíin núu mar. Te ni cuu nayúú í-ni. <sup>27</sup> Te ni canaa ní de jíin náhan de, te ni cacahān de:

¿Ndé ñn ga cúu tēe yáha, jēe ndé tachī níhin jíin mar cájetáhú jēe cahán de? áchí de.

*Tēe Gadara jeē cándoho tachī*  
(Mr. 5.1-20; Lc. 8.26-39)

<sup>28</sup> Te ní jinū yá inga lado mar, máá región ñayuu Gadara. Te uū tēe ní quendacoo de nde nuū yíndūji ndíyī, ní quiijnahan de ya. Te cáñuhun tachī ini de, te siquī jeē yóhyo xeēn tachī ún, te ní ñn ñayuu tu cúu yáha i ichi yúcuan.

<sup>29</sup> Te ní cacana cóhó de ní casáha tachī:



¿Naun vēji ní núū ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívī? áchí.

<sup>30</sup> Te nde jicá jecu cáhīn cuehē quīnī cájitu ti. <sup>31</sup> Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívīcoo ná ini quīnī cáhīn yūcuán, áchí.

<sup>32</sup> Te ní cahān yā jíin:

Cuángoo núu súcuan.

Te ní quendacoo tachī ún ini tēe ún, te ní quívīcoo ini quīnī. Te quīnī un ní cajinu ti ní canīngava ti ĩn yucáva, te ní ndaquīhī ti ndute mar, ni cajihī tī.

<sup>33</sup> Te tēe cándito ti ní cajinu de cuango de jeē ní cayūhú de. Te ní najinūcoo de ñuu. Te ní cacastūhún de tēcá jniñu yūcuan, jíin ndese ní cuu jeē ní quendacoo tachī ini ndīndúú tēe ún. <sup>34</sup> Yūcuán na te ndīvī ñayuu ñuu un, ní quendacoo i cuacondēhé i Jesús. Te ná ní jinūcoo i nuū ĩne ya, te ní cacahān ndahú i jíin yá jeē na quēnda ya región yūcuan quīhūn yā.

*Jeē ní nasávāha ya ĩn tēe ndóho cuehyī ní ĩjin*  
(Mr. 2.1-12; Lc. 5.17-26)

## 9

<sup>1</sup> Yūcuán na te ní ndīvī Jesús ini barco. Te ní nayāha ya cuahān yā inga lado mar, te ní najinū yā ñuu maá yá. <sup>2</sup> Te ní caquindeca ñayuu ĩn tēe ndóho cuehyī ní ĩjin, cátú de nuū ĩn camilla. Te ní jini Jesús jeē cácandīje i jeē cúu nasávāha ya tēe ní ĩjin ún. Te ní cahān yā jíin de:

Na ndúndeyí ní rō séhē, chí je ĩne cáhnu ní rī nuū tāca cuéchi ró, áchí yá.

<sup>3</sup> Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahān tēe yáha súcuan, chí cáhān de jnúhun ndevāha jeē quití ni Yaā Dios. <sup>4</sup> Te ní jini Jesús jeē súcuan cájeni ni de, te ní cahān yā jíin de:

¿Naun cájeni ní rō jeē cahān ndevāha rī? <sup>5</sup> Jeē uú jnúhun yáha, ¿ndé ĩn yíí gá cáa? ¿A jéé cahān rī jíin tēe cúhú: Je ĩne cáhnu ní rī nuū tāca cuéchi ró? ¿Chí yíí gá jeé cahān rī: Ndocuīñī te caca ró, chí je ní nduvāha ró, achi rī? <sup>6</sup> Te vijna te na stéén rī jeē maá rí, Yaā ní nduu tēe, ndíso jniñu rī ini ñayīvī yáha jéé cóne cáhnu ní rī nuū cuéchi.

Yūcuán na te ní cahān yā jíin tēe ní ĩjin ún:

Ndocuīñī te naquihīn ró camilla rō te quīnūhun rō vehe ró, áchí yá jíin de.

<sup>7</sup> Yūcuán na te ní ndocuīñī-ni tēe ún, te cuanuhun de vehe de. <sup>8</sup> Te ná ní cajito ñayuu un jéé súcuan ní sáha ya, te ní cayūhú i. Te ní cacahān i jeē yóhoyo vāha Yaā cúu Yaā Dios jeē súcuan ní jēhe ya poder nuū ĩn tēe jeē cúu nasávāha de ñayuu, achi i cájito i Jesús.

*Jeē ní cana ya Mateo*  
(Mr. 2.13-17; Lc. 5.27-32)

<sup>9</sup> Te ní quenda Jesús yūcuan cuāhān yā. Te ní jito ya nuū ĩn tēe nání Mateo, néne de nuū cutútú xúhun renta. Te ní cahān yā jíin de:

Condiquīn ruhū na quīhīn yō.

Te ní ndocuīñī de, te cuahē de jíin yá.

<sup>10</sup> Yūcuán na te ní jehēn yā ní yeji yā staā vehe de. Te cuehē tēe cástútú xúhun renta jíin inga tēe cáśáha cuéchi, suni cáyūcú de cáyeje de staā jíin Jesús jíin tēe cáśuáha jíin yá. <sup>11</sup> Te tēe grupo fariseo, ni cajito de, te ní cacahān de jíin tēe cáśuáha jíin yá:

¿Naun yéji maestro rō jíin tée cástútú xúhun renta jíin inga tēe cásáha cuēchi? áchí de.

<sup>12</sup> Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñuhún i tēe tájné, chí ñayuu cácuḥú cúu jeē jíni ñuhún. <sup>13</sup> Cuáhán jíjnáhan ró núu súcuan, te nacani ni rō na vé cúu jeē cahán jnūhun yáha jéé yosó núu tútu i: Cúni rí jeē na cúndáhú ni rō jnánhan ró, nasūu jéé socó rō quiti nuū rí, achí Yaa Dios nde jenahán. Te ruhū nasūu jéé véji ri cana ri ñayuu tú cuēchi, jeē cúu i nájnūhun ñayuu cáhīyo vāha, chí sa suhva véji ri cana ri ñayuu iyó cuéchi, jeē na nácani ni i te stóo i cuēchi i. Achí yá.

*Jeē ní cacajñuhún de ya siquī jeē cóndite ni*  
(Mr. 2.18-22; Lc. 5.33-39)

<sup>14</sup> Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Saña jíin tée grupo fariseo, tijní jínu cáhīyo ndite ni na núu Yaa Dios. Te tēe cáscuáha jíin máa ní, ¿naun tu cásáha de súcuan?

<sup>15</sup> Te ni cahān Jesús jíin de:

¿A cuu condite ni de níní jéé iyó rí jíin de? ¿A cuu cucuíhyá ni ñayuu cáhīn vico nándāha, te núu níní néne tēe nándāha? Te quee quiví jeē cújiyo tēe nándāha, te quiví ún chí condite ni i.

<sup>16</sup> Te ni cahān yā uū jnūhun yatá siquī jeē tu quíjnáhan jnūhun jeé jéé steén yā jíin táca jnūhun jenahán. Achí yá:

Ni ñn tu náchuhun ñn pedazo sahma jéé núu ñn sahma túhú. Chí núu súcuan te ndiyí pedazo jeé un, te tahndé gā jeé tuhú un, te nducáñnu ga nuū catáhdé un. <sup>17</sup> Te suni tu cáchuhun vino jeé ini ññi túhú. Chí núu súcuan te ndatá ññi ún, te naa vino jíin ññi. Chí cánuú jéé chúhun i vino jeé ini ññi jéé, te súcuan te quéndōo vāha ndíndúú. Achí yá.

*Jnūhun sēhe síhí Jairo jíin ñahan ní quehé yusáhma ya*  
(Mr. 5.21-43; Lc. 8.40-56)

<sup>18</sup> Te níní cáhán Jesús táca jnūhun yáha, te ñn tēe cújéñnu nuū ñáyuu hebreo, ni quee de nuū yá. Te ni jecuíñi yití de nuū yá, te ni cahān de:

Sēhe síhí ná sá ní jihí i. Te núu na quihín yō soó ní ndaha ní siquī i, te natecu i. Achí de.

<sup>19</sup> Te ni ndocuíñi Jesús, te cuahān yā jíin de, te suni cuangoo tēe cáscuáha jíin yá. <sup>20</sup> Te mēñhu ñáyuu cuangoo jíin yá ni quee ñn ñahan, te je ni cuu uxí uū cuiyā ndóho ña cuehyí niñi. Te ni quee ña ichi yatá yá, te ni quehé ña yusáhma ya. <sup>21</sup> Chí ni jeni ni ña: Vēsú maá sahma ya na níñn rí quehé rí, te nduvāha ri, jeni ni ña. <sup>22</sup> Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéé cuu nasávāha ri rohó, te jeé yúcuan ni nduvāha rō, áchí yá.

Te ni nduvāha ña máa hora un.

<sup>23</sup> Te ná ni jinū Jesús vehe tēe cújéñnu ún, te ni jito ya nuū tée cácuu músico jeé quíchindūji de i, jíin núu ñáyuu cuehē, cásávaā i. <sup>24</sup> Te ni cahān yā jíin i:

Cujiyo jíjnáhan ró, chí sūchi síhí yáha, tu ní jihí i chí quixí-ni i, áchí yá.

Te ni cajecū catá i jeē ni cahān yá. <sup>25</sup> Te ni quenehen ya ñayuu cuehē ún, te ni quiví ya ini vehe. Te ni jñi ya ndaha sūchi síhí ní jihí ún, te ni ndocuíñi-ni i. <sup>26</sup> Te ní región yúcuan ní jité núu jnūhun jniñu jéñnu ní sáha ya ún.

*Jeē ní nasávāha ya uū tēe cuáá*

<sup>27</sup> Te ni quenda Jesús yūcuan cuáhān yā. Te uū tēe cuáá cuángoo de yatā yā, cácana jee de:

Maá ní jeē cúu ní Sēhe yucūn David, cundáhú ni ní sáña víi, achí de.

<sup>28</sup> Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cácanđije ró jeē cúu nanune ri tinūu ró? achí yá.

Te ni cacahān de:

Cácanđije ná, achí de.

<sup>29</sup> Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cácanđije ró, achí yá.

<sup>30</sup> Te ni cananene-ni tinūu de. Te Jesús ni cahān nīhin ya jíin de:

Ma cáchi cuiiti rō nuū ni ĩn, achí yá.

<sup>31</sup> Te maá de chí ni quendacoo de, te ni cajete-ni de jnūhun ná región yūcuan jeē súcuan ni sáha ya jíin de.

### *Jeē ní nasávāha ya ĩn tēe nīhín*

<sup>32</sup> Te nuū ní quendacoo tēe un cuángoo de, te ni quecoo ñayuu jíin ĩn tēe nīhín, jeē nūhun tachī ini de. <sup>33</sup> Te ni quenehen ya tachī un cuáhān. Te tēe nīhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiiti yō ni ĩn jniñu súcuan ini ñuu Israel, achí i.

<sup>34</sup> Te tēe grupo fariseo chí ni cacahān de:

Tēe yáha chí quēnehen de tachī jíin fuerza maá jexeén jeē cujéhnū nuū tachī, achí de.

### *Jeē cundáhú ni yā ñayuu cuehē*

<sup>35</sup> Te ni jica cuu Jesús tācá ñuu jíin rancho, te ni steén yā jnūhun ini tācá vehe ĩi sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuñū na-ni cuehyī cándoho i. <sup>36</sup> Te cundáhú ni yā jito ya nuū ñayuu cuehē ún. Chí cándoho i te cácuñíhyá ni i, chí cácuu i nájnūhun lanchi jeē tú jito ho tī, chí tu ndíquin i Yaā cúu Jito ho i. <sup>37</sup> Yūcuán na te ni cahān yā jíin tēe cácuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. <sup>38</sup> Núu súcuan te cacān tahu rō nuū maá Jito ho rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jnūhun ya nuū ñayuu. Achí yá.

### *Jeē ní nacāji ya uxī uū tēe apóstol* (Mr 3.13-19; Lc. 6.12-16)

## 10

<sup>1</sup> Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jeē nasávāha de ñayuu cácuñū tācá ndīnuū cuehyī.

<sup>2</sup> Te yáha cúu síhvī ndíhúxí uū tēe apóstol un: Tēe ĩn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. <sup>3</sup> Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, <sup>4</sup> jíin Simón tēe grupo cananista, jíin Judas Iscariote, tēe jeē ní nastúu de ya.

### *Jeē ní tají yá ndíhúxí uū de quinacani de jnūhun* (Mr. 6.7-13; Lc. 9.1-6)

<sup>5</sup> Te ni tají Jesús ndihúxi uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñáyuu Samaria. <sup>6</sup> Chi nuū maá-ni ñáyuu nacióon yō Israel quíngoo ró, chí cácuu i nájnūhun lanchi jeē ní sana. <sup>7</sup> Te jeē quíngoo ró te suhva nacani ró jnūhun: Je ni cuyajni Yaā ndeé andiví jeē ndacu ya jniñu nuū rō, achi rō. <sup>8</sup> Te nasávaha ró ñáyuu cándoho cuehyí stehyú jín ñáyuu cándoho táca gá cuehyí, te nastécu rō ndīyí te quenehen ró táchī ini ñáyuu. Te súcuau-ni ni jēhe ri poder nuū rō jeē sáha ró, te suni súcuau-ni sáha ró jín i.

<sup>9</sup> Te ma cóndiso ró xūhun oro, ni xūhun plata, ni centavo cuechí. <sup>10</sup> Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi siquí jniñu jeē nácani ró jnūhun nuū ñáyuu, te cánuu coto i róhō.

<sup>11</sup> Te na-ni ñuu chí rancho núu ni jinūcoo ró, te yūcuán nducú ró ñn ñáyuu vāha, te coyūcu ró vehe i nde quíngoo tucu ró. <sup>12</sup> Te jeē quíví ró vehe ñáyuu ún, te cahān rō jeē na quíji jnūhun ndeyí jnūhun sīñ ni nuū i. <sup>13</sup> Te núu ñáyuu vāha cácuu i, te jnūhun ndeyí ní cahān rō quendōo siquí i. Te núu nasūu ñáyuu vāha cácuu i, te jnūhun ndeyí ní cahān rō ma quéndōo siquí i. <sup>14</sup> Te núu iyó ñáyuu jeē tu cájetáhú i róhō, ni tu cúni i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuau steén rō jeē iyó cuéchi i jeē tu ní cájetáhú i. <sup>15</sup> Jendaá cahān rī jín rō jeē quíví juicio te xeēn gā coo castigo siquí ñuu casáha súcuau vēsú siquí ñuu Sodoma jín ñuu Gomorra nuū ní casáha ndasí ñáyuu cuéchi.

### *Jeē coto xeēn ñáyuu de jínáhan de*

<sup>16</sup> Cuni sōho ró, chí tají rí rohó quíngoo ró nájnūhun lanchi mēñu yāñi. Núu súcuau te coo listo rō nájnūhun coō, te coo vītá ni rō nájnūhun paloma. <sup>17</sup> Te condito ró máá ró nuū ñáyuu, chí quee quíví jeē quíndeca i róhō núu tohó, te cani i róhō ini táca vehe ñi sinagoga. <sup>18</sup> Te suni nde nuū táca gobernador jín rey quíndeca i róhō jēē siquí ruhū. Te súcuau te nune ichi jeē nacani ndaa rō jnūhun ri nuū de jín núu ñáyuu táca nacióon jeē tu jím jnūhun Yaā Dios. <sup>19</sup> Te núu ni jendeca i róhō núu táca téé ún, ma nácani ndasí ni rō ndese cahān rō. Chí máá hora un te máá yá steén nuū rō ndese cahān rō. <sup>20</sup> Chí nasūu máá ró cúu jeē cahān, chí Espírítu maá Tátá rō cúu jeē cahān jín yuhu ró.

<sup>21</sup> Te sava ñáyuu tu cácanđje, nastúu i ñani i jeē na cúu. Te tátá nastúu sēhe. Te sēhe ndonda siquí tatá jín náná jeē na cúu. <sup>22</sup> Te ndihí ñáyuu quítí ni i nuū rō jeē siquí ruhū. Te ñáyuu jeē cuiñi ñihin nde jeē jínu jnūndóho, ñáyuu ún chí cácu ánuá i. <sup>23</sup> Te núu cájito xeēn i róhō ñn ñuu, te cunu ró quíñin rō inga ñuu. Chí jendaá cahān rī jín rō jeē ma ndécava ró caca cuu ró ndihí nacióon yō Israel te ndiji-ni máá rí, Yaā ní nduu tēe.

<sup>24</sup> ñn tēe scuáha, tu cújéñu de nuū maestro de. Ni tēe cúu mozo, tu cújéñu de nuū patrón de. <sup>25</sup> Tēe scuáha chí nájnūhun ndóho maestro de suni súcuau ndoho nahín máá de, te tēe cúu mozo suni ndoho de nájnūhun ndóho patrón de. Núu súcuau te núu ruhū cácahān i jeē Satanás cúu ri, te nagā ni cuu jeē ma cahān i jeē rohó cácuu Satanás.

### *Jeē ní cachi yā ndé ñn cúu jeē yūhu yó*

*(Lc. 12.2-9)*

<sup>26</sup> Núu súcuau te ma yūhu ró coto ró ñáyuu. Chí táca jnūhun cácahān sáhi i ma quéndōo sáhi cuiti, chí ndihí natūu ndijín, te cuni ñáyuu. <sup>27</sup> Jnūhun ní cahān rī jín ró jeē tu ní jím ñáyuu, na nácastūhun cájí ró nuū i. Te jnūhun ní nacani

sāhi rí nuū rō, na nácani jee ró yátā tācá vehe. <sup>28</sup> Te ma yūhu ró coto ró ñáyuu cahni yiqui cúñu rō, chi ma cúu cahni i ánuá rō. Chi sa suhva yūhu ró jéé ma stívi ró núu Yaā Dios, chi cuu snáhnú ndetū yā rohó jéé quívi ánuá rō jíin yiqui cúñu rō infierno.

<sup>29</sup> Te tācá saa chi tú yahu ndéé tī, chi nde uū tī jeé ñin centavo lulí. Te ni ñin tī tu nínga nuū ñūhun te núu tu jéhe Tátá rō jñūhun, chi ndító ya tī. <sup>30</sup> Te nagá ni cuu rōhó jíjnáhan ró, chi nde ndihi ixi xíní rō je ni cahu ya. <sup>31</sup> Núu súcuan te ma yūhu ró jíjnáhan ró, chi cánuú ndasí gá rō nuū yā vésú cuehē tācá saa.

*Ñáyuu jejnúhún Jesucristo nuū inga ñáyuu*

*(Lc. 12.8-9)*

<sup>32</sup> Te tācá ñáyuu jeé cuajnúhún rúhū nuū inga ñáyuu, suni súcuan cuajnúhún rí i nuū Tátá rí, Yaā ndeé andiví. <sup>33</sup> Te tācá ñáyuu jeé ma cuajnúhún rúhū nuū inga ñáyuu, suni súcuan ma cuajnúhún rí i nuū Tátá rí, Yaā ndeé andiví.

*Jeé siquí Jesús te cusñin ini ñáyuu*

*(Lc. 12.51-53; 14.26-27)*

<sup>34</sup> Ma cáni ni rō jíjnáhan ró jéé véji ri jeé cóyūcu maní ñáyuu ñayiví. Tú véji ri jeé cóyūcu maní ñáyuu, chi sa suhva cuajnáhan i jeé siquí ruhū. <sup>35</sup> Chi jeé siquí ruhū te cusñin ini sēhe yí jíin tátá, te sēhe síhí jíin náná, te sēhe jēnu jíin náná chíso. <sup>36</sup> Chi tācá ñáyuu candije ruhū, chi jnáhan vehe i cúu jeé quitī ni nuū i.

<sup>37</sup> Te núu ndé ñin ñáyuu maní gā i jíin tátá i chí jíin náná i vésú jíin rúhū, nasū ñáyuu vāha cúu i jeé cóndiquín i ruhū. Te núu ndé ñin ñáyuu maní gā i jíin sēhe yí i chí jíin sēhe síhí i vésú jíin rúhū, te suni nasū ñáyuu vāha cúu i jeé cóndiquín i ruhū. <sup>38</sup> Te na-ni ñáyuu núu tu jéhe i jñūhun ndoho i jñúndóho vésú nde cuu i jeé siquí jeé cóndiquín i ruhū, nasū ñáyuu vāha cúu i jeé cóndiquín i ruhū. <sup>39</sup> Te núu ndé ñáyuu cúní i cácu i nuū jñúndóho quiiji nuū i jeé siquí ruhū, núu súcuan te jnahnū ndetū i ní cáni. Te núu ndé ñin ñáyuu vésú na cúu i jeé siquí ruhū, te cotecu i ní cáni.

*Jeé iyó táhū yō nuū Yaā Dios*

*(Mr. 9.41)*

<sup>40</sup> Te ñáyuu cuatáhú rōhó jíjnáhan ró, núu súcuan te ruhū cájetáhú i. Te ñáyuu cájetáhú rúhū, cájetáhú i Yaā ní tají rúhū véji ri. <sup>41</sup> Núu na-ni ñáyuu cuatáhú i ñin tēe nácani jñūhun Yaā Dios, siquí jeé jica de jñiñu Yaā Dios, núu súcuan te ñnuú-ni coo tahū de nuū Yaā Dios jíin tēe nácani jñūhun Yaā Dios. Te núu na-ni ñáyuu cuatáhú i ñin tēe ndaā, siquí jeé tēe ndaā cúu de, núu súcuan te ñnuú-ni coo tahū de nuū Yaā Dios jíin tēe ndaā. <sup>42</sup> Te núu ndé ñáyuu cuāha i vésú ñin ñajin ndute míjin coho ñin sūchi yáha, siquí jeé cúu i sūchi cándije ruhū, ndaā ndije cúu jeé nihín i tahū i. Achí yá.

*Jeé ní tají Juan uū tēe nuū ya*

*(Lc. 7.18-35)*

## 11

<sup>1</sup> Te ná ni jínu ni ndacu Jesús jñiñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeé steén yā te nacani ya jñūhun tācá ñuu región yūcuán.

<sup>2</sup> Te íne Juan vecāa. Te ni nihín de jñūhun tācá jñiñu sáha Cristo. Te ni tají de uū tēe cáscuáha jíin de, <sup>3</sup> cuacajnúhún de ya:

¿A máá ní cúu Cristo jeé achí tutu jeé quíji, chí condetu yó inga tēe quiiji? achí de.

<sup>4</sup> Te ni cahān yā jīn de:

Cuángoo te castūhun ró nuū Juan tācá jniñu cájito ró jīn jnūhun cájini ró. <sup>5</sup> Te cachi ró nuū de jeē ñáyuu cuaá cánanune tinūú i, te ñáyuu yacuá cánacaca i, te ñáyuu ndóho cuehyí stehyú cánduvāha i, te ñáyuu sohó cánanune sōho i, te ñáyuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i. <sup>6</sup> Te yōhyo ndetú tēe jeē ma nácani yátá ni de jeē ruhū cúu Cristo. Súcuān cachi ró nuū Juan. Achí yá jīn de.

<sup>7</sup> Te náa cuanuhun ndāndúú tēe ún, te ni quejéé Jesús cahán yā jnūhun Juan jīn ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sáha tachí? <sup>8</sup> Te núu tuú, ¿te na vé ni jécondēhe ró núu súcuān? ¿A ñn tēe cúni cujéhnū jeē ñūhun sahma lúu? Tuú chí cájini ró jeē tēe cáñuhun sahma lúu, máni ini vehe rey cáyūcú de. <sup>9</sup> ¿Te na vé ni jécondēhe ró núu súcuān? ¿A ñn tēe nácani jnūhun Yaā Dios? Cáhan rī jīn ró jeē suu ni jécondēhe ró, te cújéhnū ga Juan yáha vēsú tāca gá tēe ni canacani jnūhun Yaā Dios. <sup>10</sup> Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun rī cosnūú de ichi núu Cristo, návāha coo tūhva ñáyuu jeē jinú yā.

Achí Yaā Dios, achí tutu. <sup>11</sup> Te jendaá cahán rī jīn ró jeē ini ñayīvi yáha cújéhnū ga Juan tēe scuándute vēsú tāca gá tēe jeē ni iyo ini ñayīvi. Te vēsú súcuān te tāca tēe núu ga ini ñuu nuū ndācu Yaā andīvi jniñu, cújéhnū ga de vēsú Juan.

<sup>12</sup> Te nde quiví ní quee Juan tēe scuándute, te nde vijna, chí cánducú ndéyí ñáyuu quívicoo i ndaha Yaā andīvi jéē ndācu ya jniñu nuū i. Te nde ñáyuu xeēn cánducú ndéyí i siquí. <sup>13</sup> Chi nde ná tu quiji Juan, te ni iyo máá ley Moisés, te suni ni iyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. <sup>14</sup> Te ni cacahān de jeē ndíji Elías. Te núu cácuñi ró cuatáhú ró jnūhun, te jíní ró jeē máá Juan cúu tēe jeē ní cachi tutu jeē quíji, chí cúu de nájnūhun Elías. <sup>15</sup> Tāca róhó jéē jini sōho, na chúsóhó ró.

<sup>16</sup> Yáhá cachi rī ñn jnūhun yátá návāha na cúni ró ndese cúu ñáyuu tiempo vijna. Cúu i nájnūhun sūchi lúli cáhīn nuū yáhu cácasiquí i. Te cácana ndee i xiní jnáhan i: <sup>17</sup> Ni cativi rī scuillí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū ró, achí i. Te nájnūhun cándāa sūchi lúli un jéē tu ní núnjahan ni i ni ñn, súcuān cándāa ró. <sup>18</sup> Chi ni quiji Juan te cuehē jīnu ni iyo ndite ni de, te tu ní yéji de ni tu ní jíhi de. Te tu ní cánujnahan ni ró, chí ni cacahān ró jeē ñūhun tachí ini de. <sup>19</sup> Yūcuán na te ni quee máá rí, Yaā ní nduu tēe, te yéji rí jíhi rí, te tu cánujnahan ni ró, te chísoó jnūhun ró cacahān ró jeē máni máá jéē yéji rí jíhi ri vino. Te quíjnáhan rī jīn tēe cástútú xūhun renta jīn táca gá tēe casáha cuēchi, áchí ró. Te núu cúndíchí ñn tēe jīn jnūhun Yaā Dios, te jīn jniñu sáha de te natūu jeē tēe ndíchí cúu de. Achí yá.

*Jeē ní cuxeēn yā nuū sava ñuu nīhni ni*  
(Lc. 10.13-15)

<sup>20</sup> Yūcuán na te ni quejéé yá cuxeēn yā nuū tācá ñuu nuū ni sáha ya cuehē jniñu jéhnū, chí tu ní canacani ni i jeē stóo i cuēchi i. Te ni cahān yā:

<sup>21</sup> Nacá jeē xeēn ndoho ró, ñáyuu ñuu Corazín. Te nacá jeē xeēn ndoho ró, ñáyuu ñuu Betsaida. Chí núu ini ñuu Tiro jīn ñuu Sidón ni sáha rī jniñu jéhnū jeē ni sáha ri ini ñuu máá ró, te yachí nacani ni ñáyuu ñuu un jéē stóo i cuēchi i núu. Te sáha i seña jeē steén jeē nácani ni i siquí cuēchi i, chí cuhun i sahma jnūú te chuhun i yaa xiní i núu. <sup>22</sup> Núu súcuān te cáhān rī jīn ró jeē quíví coo

juicio te xeēn gā coo castigo siquī rō jijnáhan rō vēsú jeē ni íyo siquī ñuu Tiro jín ñuu Sidón. <sup>23</sup> Te róhó ñáyuu ñuu Capernaum, ¿á cájeni ni rō jeē cujéhu rō nájñuhun ñn jeē cáa cuahān ichi ándiví? Tuú chi sa nanuu rō ndé lugar nuū cáyūcu ánuá ndíyi. Chi núu ini ñuu Sodoma ni sáha ri jniñu jéhu jeē ni sáha ri nuū maá rō, te coo ñuu yúcuan ndé vijna núu. <sup>24</sup> Núu súcuan te cáhān rī jín rō jeē quiví coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

*Nehen nuū rī ndetātu rō, achí yá*  
(Lc. 10.21-22)

<sup>25</sup> Te suni quiví un ní cahān Jesús:

Na cútahū na núu ni Tátá, Jitoho andiví jín ñáyiví. Chi ni jesi ní táca jñuhun ndichí ní, jeē ma cūni ñayuu ndichí jín ñáyuu tūhva cuenta ñayiví yáha. Te ni steén ni núu ñáyuu cácuu nájñuhun sūchi lúli. <sup>26</sup> Chi súcuan ni nujnahan ni ni Tátá, achí yá.

<sup>27</sup> Te ní cahān gā yá:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátá rī cúu jeē jini yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jini. Te iyó ñáyuu jeē cuni maá Sēhe steén yā nuū i ndese Yaā cúu Tátá yā, te máá i suni cuni i. <sup>28</sup> Tāca rō jēē ni cuíta rō jín táca jniñu jín ley jeē yí sáha jín rō, nehen quivícoo rō ndaha ri, te ndetātu rō sáha ri. <sup>29</sup> Quiví rō núu jniñu ndácu máá rí, te scuáha rō coo rō nájñuhun iyó máá rí. Chi vitá ni rí te suchí ni rí. Te súcuan te ndetātu rō jín ánuá rō sáha ri. <sup>30</sup> Chi tú yí jēē cuandetū rō nuū rī, ni tú yí jēē squícu rō jniñu ndácu ri. Achí yá.

*Jeē ní cataxín de yoco trigo quiví ndetātu*  
(Mr. 2.23-28; Lc. 6.1-5)

## 12

<sup>1</sup> Te ñn quiví ndetātu ní yāha Jesús cuahān yā nuū cáa trigo. Te tēe cáscuáha jín yá, cáji de sóco. Te ní quejé de cátaxín de yoco trigo cáyeji de. <sup>2</sup> Te ni cajito tēe grupo fariseo, te ní cacahān de jín yá:

Condēhé, chi tēe cáscuáha jín rō casáha de jniñu jeē tu iyó váha sáha yó quiví ndetátú, achí ley Moisés.

<sup>3</sup> Te ní cahān maá yá jín de:

¿A tu ní cácahu rō tutu ndese ni sáha David, ñn quiví jeē ni jí de sóco jín tēe cáhiin jín de? <sup>4</sup> Te ní quiví de ini vehe Yaā Dios. Te ní yeji de pan ñi jeē yosó ndijin nuū Yaā Dios. Te tú na ley jeē cáji de, ni tēe cáhiin jín de, chi máá-ni sutū cuu cají. Te vēsú súcuan te tú na cuēchi ní íyo siquí de. <sup>5</sup> ¿Te á tu ní cácahu rō tutu ley Moisés, ndese casájniñu sutū ini templo, vēsú quiví ndetātu cúu? Te tú na cuēchi iyó siquí de, vēsú quiví ndetātu casájniñu de jniñu jeē cácuu de sutū. <sup>6</sup> Te cáhān rī jín rō jeē maá rí jeē iyó yáha, cújéhu ga rī vēsú templo. <sup>7</sup> Te tu cájecūhun ni rō jijnáhan rō jñuhun yáha jeē yosó núu tūtu ñi jeē ni cáhān Yaā Dios: Jeē cuní gā rí cúu jeē cundáhú ni rō jnáhan rō, vēsú jeē socó rō quiti nuū rī, achí yá. Te núu jeē ní cajecūhun ni rō jñuhun yáha, te ma cahān rō súcuan siquí tēe jeē tú na cuēchi núu. <sup>8</sup> Chi ruhū, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndetátú, achí yá.

*Jeē ní nduvāha tēe ni ichí ndaha*  
(Mr. 3.1-6; Lc. 6.6-11)

<sup>9</sup> Yūcuán na te cuahān Jesús, te ni quivī ya ini vehe iī sinagoga. <sup>10</sup> Te yūcuan íne iin tēe ni ichī iin ndaha de. Te cáculi tēe grupo fariseo jeē nihīn de cuēchi siquī yā, te ni cacajñuhún de ya:

¿A íyó ley jeē cuu nasávāha yó ñayuu cuhú quivī ndétátú? áchí de.

<sup>11</sup> Te ni cahān yā jíin de:

¿Nde iin róhó, núu névāha ró iin lanchi, te núu nínga ti ini iin yaū quivī ndétátú, te á tu jéhén rō natava rō tī, chí naún? <sup>12</sup> ¿Te á tu cánuú ndasí gá iin tēe vésú iin lanchi? Núu súcuan te vetū-ni sáha yó jniñu váha quivī ndétátú, áchí yá.

<sup>13</sup> Yūcuán na te ni cahān yā jíin tēe ni ichī ndaha ún:

Scaá ndaha ró.

Te ni scaá de, te ni nduvāha-ni nájnūhun íyó inga. <sup>14</sup> Yūcuán na te ni quendacoo tēe grupo fariseo, te ni candajñuhún de siquī Jesús, ndese cahni de ya.

### *Jñūhun Jesús jeē ni cahān Isaías nde jenhán*

<sup>15</sup> Te ni jini Jesús jeē súcuan cájeni ni de, te ni quenda ya yūcuan cuahān yā. Te cuéhē ñayuu cándiquīn i ya. Te ni nasávāha ya ndihī ñayuu cuhú. <sup>16</sup> Te ni ndacu ya jniñu nuū i jeē ma stéén i ya. <sup>17</sup> Te súcuan ni cuu návāha squicu jñūhun ni cahān Yaā Dios siquī Jesús, te ni nacani Isaías jñūhun ya un nde jenhán:

<sup>18</sup> Yāha cúu mozo rī jeē ní nacāji rī,  
te manī rī jíin yá, te cúsiñ ni rī jíin yá.

Te cuāha rī Espírītu rī coo jíin yá.

Te máá yá sándaā jniñu ñayuu táca nación.

<sup>19</sup> Ma tejnāhan ya, ni ma cána jee ya,  
te ni ma cahán jee ya ichi jeē cúni ñayuu.

<sup>20</sup> Ma sáha xeēn yā jíin ñáyuu ni cunihīn jñūndóho siquī,  
ni ma snāá yā ñayuu jeē maá lulí-ni cáculíje.

Chí cujéhnu ya siquī ndihī, te ndaā ndacu ya jniñu.

<sup>21</sup> Te ñayuu táca nación cocuhun ni i jeē jnáma ya i.  
Achí Yaā Dios, achí Isaías nde jenhán.

### *Jeē ní cacahān de jeē jejniñu ya fuerza Satanás*

(Mr. 3.19-30; Lc. 11.14-23; 12.10)

<sup>22</sup> Yūcuán na te ni caquindeca i nuū yā iin tēe cuáá ñihīn, chí ñūhun tachī ini de. Te ni nasávāha ya de. Te ni ndundijin tinūú de te ni nacahān de. <sup>23</sup> Te ndihī ñayuu cuéhē un ní canaa ni i cájito i, te ni cacahān i:

¿A tēe yáha cúu jeē ni cahān Yaā Dios jeē cacu nuū yucūn David? áchí i.

<sup>24</sup> Te tēe grupo fariseo, ni cajini de jeē súcuan cacahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnu nuū tachī, áchí de.

<sup>25</sup> Te Jesús ni jini yā jeē súcuan cájeni ni de, te ni cahān yā jíin de:

Táca nación jeē casásīn máá te cájejnāhan máá, núu súcuan te snāá jeē iyó váha máá. Te núu iin ñuu chí iin vehe casásīn máá te cájejnāhan máá, te ma cúu ga coyūcu cáhnu. <sup>26</sup> Te suni súcuan Satanás núu quénehen jñāhan tachī, núu súcuan te sásīn máá. ¿Te ndese cuiñi ñihīn Satanás jeē ndácu jniñu núu súcuan?

<sup>27</sup> Chí cacahān rō jeē jíin fuerza Satanás quénehen rī tachī. Te núu súcuan cúu núu, te ñayuu cascuáha jíin máá ró jijnāhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnāhan i cachi jeē ní castívī ndasí



suhva ró ni cacahān rō jeē cáquenehen ri tachī jín fuerza Satanás. <sup>28</sup> Te tuú chi sa jín Espíritu Yaā Dios cúu jeē quénehen ri tachī. Núu súcuan te je ndéé Yaā Dios mēhñu rō jeē ndácu ya jniñu.

<sup>29</sup> ¿Chi ndese cuu quívi ñn tēe ñni vehe tēe ndacuī jeē quenehen de ndajniñu de? Chi cánuú jeē xíhna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen rī tachī.

<sup>30</sup> Te ñayuu tu íyó mánī jín rí, núu súcuan te jíto uhū i ruhū. Te ñayuu tu nástútú jín rí, núu súcuan te sa jéte núu i ñayuu vējicoo nuū rī.

<sup>31</sup> Jeē yúcuan cáhán rī jín ró: Iyó modo coo jñuhun cáhnu ni nuū tāca cuéchi cásaħa ñayuu, jín nuū tāca jñuhun néé cácaħan i. Te núu cahān ndevāħa i siquī Espíritu Santo, te ma cóne cáhnu ni Yaā Dios nuū i. <sup>32</sup> Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāħa i siquī Espíritu Santo, ma cóne cáhnu ni Yaā Dios nuū i, ni jeē iyó i ñayīvi yáħa, ni ní tiempo quíji.

*Jñuhun yujnu váħa jín yujnu néé*  
(Lc. 6.43-45)

<sup>33</sup> Núu yujnu váħa, te váħa ndehē, te núu yujnu néé, te cánéé ndehē. Chi jín ndéhē te jínī yō ndese yujnu cúu. Te suni súcuan ñayuu. <sup>34</sup> Va sēhe coō cácuu ró, chi xeēn rō nájñuhun coō. ¿Ndese cuu cahān rō jñuhun váħa, chi ñayuu cásaħa néé cácuu ró? Chi jniñu jeē jéni ni anuá ñayuu, mánī yūcuán cáhán i. <sup>35</sup> Tēe váħa cáhán de jñuhun váħa, chi íyó ndāā anuá de. Te tēe sáħa néé cáhán de jñuhun néé, chi cánéé ánuá de. <sup>36</sup> Te cáhán rī jín ró jeē tāca na-ni jñuhun cácaħan ñayuu, nacuaħa i cuenta jñuhun un quívi coo juicio. <sup>37</sup> Chi jín jñuhun ni cahān rō sándaā yā siquī rō, núu jeē quéndō ndaā rō chí jéé cóndee cuéchi siquī rō. Achí yá.

*Jeē ní cajicān ñayuu tu cácadíje ñn jniñu jéħnu*  
(Mr. 8.12; Lc. 11.29-32)

<sup>38</sup> Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cácu ni jéé sáħa ní ñn jniñu jéħnu jeē steén núu máá ní cúu Yaā ní tají Yaā Dios, achí de.

<sup>39</sup> Te ni cahān yā jín de:

Ñayuu yáħa jeē casáħa jniñu néé, tu cájetáħú cuiti i Yaā Dios. Te cájicān i ñn jniñu jéħnu jeē steén núu Yaā ní tají Yaā Dios cúu rī. Te tuá na inga jniñu jéħnu stéén rī nuū i, chi máá-ni jniñu jéħnu nájñuhun ni cuu jín Jonás, tēe ni nacani jñuhun Yaā Dios. <sup>40</sup> Chi nájñuhun ni ñe Jonás chíji chácá cáhnu unī nduú unī ñuu, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuu, te sáá te natecu rī. <sup>41</sup> Te tāca ñayuu ñuu Nínive nuū ní nacani Jonás jñuhun, natecu i jín ñayuu tiempo yáħa, quívi juicio jeē sándaā yā cuéchi, te cahān i cuéchi siquī ñayuu yáħa. Chi máá i ni canacani ni i ni castóo i cuéchi i quívi ní nacani Jonás jñuhun nuū i. Te vijna chi cújéħnu ga ruhū Yaā ñe yáħá vēsú Jonás, te tu cácadíje ró rúhū. <sup>42</sup> Te reina jeē ní cújéħnu nación ichi sur, natecu ña jín ñayuu tiempo yáħa, quívi juicio jeē sándaā yā cuéchi, te cahān ña cuéchi siquī i. Chi nde jíca téyí ní quíji ña ni jini nahín ña jñuhun ndíchí ní cahān rey Salomón. Te vijna chi cújéħnu ga ruhū, Yaā ñe yáħá vēsú Salomón, te tu cácadíje ró rúhū.

*Tachī jeē nastútú jnáhan ndávi ini ñayuu*  
(Lc. 11.24-26)

<sup>43</sup> Núu ni quenda ñin tachī ini ñin tēe tu cándije, te jica cuu nuū ñúhun téhé, ndúcú nuū ndétátú, te tu níhín, yūcuán na te jéni ní maá: <sup>44</sup> Na quínuhun rī vehe nuū ní quenda rī. Te núu ni ndee tucu, te jito jeē tēe tu cándije ún, cúu de nájñuhun ñin vehe íyú te ni ndundoo. <sup>45</sup> Yūcuán na te jéquiñin uxā gā tachī neé gā vésú maá. Te quívicoo ini tēe un jéē cóyūcu yúcuán. Núu súcuán te xeñ gā ndoho tēe un jéē sándñí vésú jeē xíhna ñúhún. Te suni súcuán ndoho ñayuu tiempo yáha jeē casáha neé. Achí yá.

*Náná yā jíin ñani yā*  
(Mr. 3.31-35; Lc. 8.19-21)

<sup>46</sup> Te níni súcuán cáhán yā jíin ñayuu ún, te ni quee naná yā jíin táca ñani yā, íin ña nuū quéhe, te cúni ña cahán ña jíin yá. <sup>47</sup> Te ni cachi ñin tēe nuū yā:

Náná ni jíin táca ñani ni cáhñin nuū quéhe, te cáculi cahán jíin ní, achí de.

<sup>48</sup> Te ni cahán yā jíin tēe ni cahán súcuán jíin yá:

¿Ndé ñin cúu náná rī, te ndé ñin cácuu ñani rī? Achí yá.

<sup>49</sup> Te ni steén ndaha yá nde nuū cáyūcu tēe cáscuáha jíin yá. Te ni cahán yā:

Suni náná rī jíin ñani rī cácuu táca jéē yáha. <sup>50</sup> Chi táca ñayuu casquícu jñiñu cúni maá Tátá rī, Yaá ndeé andiví, suu cácuu ñani rī, cuáha rī, náná rī. Achí yá.

*Jñuhun yátá síqui tēe jéte trigo*  
(Mr. 4.1-9; Lc. 8.4-8)

## 13

<sup>1</sup> Te quíví un ní quenda Jesús vehe cuahán yā, te ni jinū yā ni cucōo ya yumar. <sup>2</sup> Te ni cutútú cuéhē ndasí ñayuu nuū yā. Te ni quíví ya ini ñin barco, ni cucōo ya. Te táca ñayuu un cáyūcú i yumar. <sup>3</sup> Te jíin jñuhun yátá ni cahán yá cuéhē jñuhun nuū i, te súcuán ni cahán yā:

Ñin tēe cate trigo, ni quenda de jeē cáte de. <sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeyi tí. <sup>5</sup> Te jecu gā trigo ni jité nuū ñúhun yuū, nuū tú cuéhē ñuhun. Te yachí-ni ni cane, chí tu cóquin ñuhun.

<sup>6</sup> Te nuū ní cane niándii, te ni ichí-ni, te ni casun, chí tu ní níhín nuū quihín yoho. <sup>7</sup> Te jecu gā trigo ni jité nuū náne iñu. Te ni jehnu iñu ún, te ni jesi nuū.

<sup>8</sup> Te jecu ni jité nuū ñuhun váha, te ni jēhe cuéhē nuní. Sava ni jēhe ciento jeē ñin ñin, te sava ni jēhe uní xico, te sava ga ni jēhe ocó uxí. <sup>9</sup> Táca róhó jéé jíni sōho, na chúsohó ró. Achí yá.

*Najehē cahán yā máni jñuhun yátá*  
(Mr. 4.10-12; Lc. 8.9-10)

<sup>10</sup> Yūcuán na te tēe cáscuáha jíin yá un ní quecoo de nde nuū yā, te ni cacajñuhún de ya:

¿Najehē cúu jeē máni jñuhun yátá cáhán ni jíin ñayuu? achí de.

<sup>11</sup> Te ni cahán yā jíin de:

Róhó jíjñáhan ró chí sáha ya jeē cájecūhun ni rō jñuhun ni yisáhi yáha, ndese quívicoo ñayuu ndaha Yaá andiví jeē ndacu ya jñiñu nuū i. Te ñayuu yáha jéé tu cáandije, chí ma jécūhun ni i. <sup>12</sup> Chi ñayuu je jécūhun ni, chí stéén gā yá nuū i, te víhyá gā cuni i. Te ñayuu tu cándije, sa suhva naa jecu jeé je jíni i ún. <sup>13</sup> Jeé yúcuán cáhán rī jñuhun yátá jíin i. Chí vésú cájito i, te quendōo i nájñuhun jeé tú na vé ni cájito i. Te vésú cájini sōho i, te ma jécūhun ní i, te quendōo i nájñuhun

jeē tú na vé ni cájini i. <sup>14</sup> Ñayuu yāhá chí squícu síquī i jñūhun ni cahān Yaā Dios jeē ní nacani Isaiás, tēe ni nacani jñūhun nde jenahán:

Vēsú cuni nahín ró, te ma jécūhun ni rō,  
te vēsú coto ró, te ma nácuni rō.

<sup>15</sup> Chí ñayuu yáha yōhyo ni ndunīhni ni i,  
te yōhyo uhū chusóhó i,  
te nájñūhun cájesi i tinūū i,  
návāha coo nájñūhun jeē tu cájito i,  
ni tu cájini nahín i,  
te ni ma jécūhun ni i,  
ni ma násāma ini i quivícoo i nuū rī  
jeē nasávāha rī anuá i nuū cuéchi i.  
Achí Yaā Dios, achí tutu.

<sup>16</sup> Te máá ró jijnáhan ró, yōhyo ndetū rō, chí cájito ró jíin tñūu ró, te cájini nahín ró jíin sóho ró. <sup>17</sup> Chí jendaá cahán rī jíin ró jeē cuehē tēe ni canacani jñūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sóho de jeē cájini sóho máá ró, te tu ní cájini de. Achí yá.

### *Jeē ní castūhun cájī yá jñūhun yátá tée jéte trigo*

*(Mr. 4.13-20; Lc. 8.11-15)*

<sup>18</sup> Núu súcuan te cuni nahín jijnáhan ró na vé cuni cahān jñūhun yátá tée jéte trigo: Trigo un cúu jñūhun Yaā Dios. <sup>19</sup> Te ñayuu cájini sóho jñūhun ndese ndácu Yaā andiví jñiñu, núu tu cájecūhun ni i te cácuu i nájñūhun trigo jeē ní jítē yuhíchi. Yūcuán na te quíji jexeén te quénde-ni jñūhun ini anuá i. <sup>20</sup> Te trigo jeē ní jítē nuū ñūhun yuū cúu nájñūhun ñayuu cájini sóho jñūhun, te yachi-ni cájetáhú i te cácusī ni i jíin. <sup>21</sup> Te tu cúcutú jñūhun ún ini anuá i, te jecu-ni quiví cájetáhú i. Te núu ni quejéé jñúndóho, chí jító xeēn ñayuu i síquī jñūhun ún, te quejéé nácani yátá ní i. <sup>22</sup> Te jeē ní jítē nuū náne iñu cúu ñayuu cájini nahín jñūhun, te cándihví ni i síquī jeē iyó ini ñayiví yáha, te cúni i cucúca i, te stáhú un i cujnéñu i jíin. Te ndihí jeē yáha jési nuū jñūhun ya, te tu íje i jíin jñūhun ya. <sup>23</sup> Te trigo jeē ní jítē nuū ñūhun váha cúu nájñūhun ñayuu cájini nahín jñūhun, te cájecūhun ni i, te cáhije i jíin jñūhun ya. Te sava i cúu nájñūhun nuní jeē jéhe ciento jeē ñin ñin, te sava ga i jéhe uní xico, te sava ga i jéhe ocō uxī. Achí yá.

### *Jñūhun yátá síquī ite lasú*

<sup>24</sup> Te ni cahān yā inga jñūhun yátá jíin de:

Jeē ndácu Yaā andiví jñiñu cúu nájñūhun ñin tēe jeē ní jete de trigo váha nuū ñūhun de. <sup>25</sup> Te iyó ñin tēe jító uhū de tēe chíi trigo. Te náa cáquixi tēe chíi trigo jíin táca jnáhan de, te ni jehēn ni jete ndiquin lású nuū trigo de, te cuahān. <sup>26</sup> Te nuū ní cane trigo ún, te ni cane yoco i, te suni súcuan ni jehnu ite lasú un. <sup>27</sup> Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū? <sup>28</sup> Te ni cahān de jíin i: ñin tēe jító uhū ruhū ní sáha jeē yáha. Te ni cacahān mozo un jíin de: ¿Núu súcuan te á cúni ní jéé na quíngoo ná te jñuhun ná? achí i. <sup>29</sup> Te ni cahān de: Tuú, chí nuū jñuhun ró lású un te sanaa te jñuhun ró ndé jíin trigo. <sup>30</sup> Vāha ga na cuéñhu máá ndé quiví tahndé. Te quiví un cáhān rī jíin tēe cahnde jeē xīhna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndiví ini yacā rī, achí de. Achí yá.

*Jnūhun yátá síquī ndiquin mostaza*  
(Mr. 4.30-32; Lc. 13.18-19)

<sup>31</sup> Te suni ni cahān yā inga jnūhun yátá jēē stéen yā ndese ndúcuehē ñayuu ndácu Yaā andiví jniñu nuū:

Ndúcuehē i nájñūhun jēhnu ñn ndiquin mostaza jeē ní jequín ñn tēe nuū ñūhun de. <sup>32</sup> Te jendaá jeē ñn ndiquin lúli gá cúu vēsú tāca gá ndiquin. Te núu ni jehnu, te cúu cáhnu ga vēsú tāca gá yucú, chí ndúu nájñūhun ñn yujnu. Te quíjicoo saa, te cásáha ti tacá tī chíji ndaha ún. Achí yá.

*Jnūhun yátá síquī levadura*  
(Lc. 13.20-21)

<sup>33</sup> Te inga jnūhun yátá ní cahān yā jíin de:

Jeē ndácu Yaā andiví jniñu nuū ñáyuu cúu nájñūhun levadura jeē ní quihin ñn ñahan. Te ni saca ña jíin únī kilo harina, nde ni ndaa ndihí ñujen ni sáha. Achí yá.

*Jeē máni jnūhun yátá cáhán yā jíin i*  
(Mr. 4.33-34)

<sup>34</sup> Tāca jnūhun yáha ní cahān Jesús jíin ñáyuu cuehē ún. Te tāca jēē ni stéen yā, máni jnūhun yátá ní cahān yā jíin i. <sup>35</sup> Súcuán ni sáha ya návāha squícu jnūhun ni cahān tēe ni nacani jnūhun Yaā Dios nde jenahān: Cahān rī tāca jnūhun yátá jíin ñáyuu, te cachi rī tāca jnūhun yísāhí ndé quiví ní jecōo ñayiví. Achí tutu, achí yá.

*Jeē ní castūhun cájí yá jnūhun ite lasú*

<sup>36</sup> Yūcuán na te ni nacuatáhú Jesús nuū ñáyuu. Te ni ndiví ya ini vehe. Te tēe cásáha un ní jinūcoo de nuū yā, te ni cacahān de jíin yá:

Nacani cájí ní jnūhun yátá ite lasú nuū ná, achí de.

<sup>37</sup> Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. <sup>38</sup> Te ñūhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. <sup>39</sup> Te tēe jíto uhū jeē ní jete lasú un cúu máá jexeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios. <sup>40</sup> Te nájñūhun tahndé ite lasú te cayú nuū ñuhún, súcuán coo quiví jínu ñayiví. <sup>41</sup> Chí máá rí, Yaā ní nduu tēe, tají rí ndajéhé rí quingoo. Te nastútú yá tāca ñáyuu casquíví jnāhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū. <sup>42</sup> Te jnaa ya i cayú i nuū ñuhún. Te yūcuán ndáhyū i te nacayihí yuhu i jeē ndoho xeén i. <sup>43</sup> Yūcuán na te ñayuu squícu nuū yā chí ndindéé i nájñūhun niāndii, te coyúcú i nuū ndácu máá Tátá i jniñu. Tāca róhó jēē jíni sōho, na chúsóhó ró.

*Jnūhun yátá síquī yejnū xūhún jeē yísāhí*

<sup>44</sup> Te jeē ndácu Yaā andiví jniñu nuū ñáyuu, suni cúu nájñūhun ñn yejnū xūhún jeē yísāhí chíji ñn ñūhun. Te ni nanihín ñn tēe, te ni nacasi tucu de síquī. Te jeē cúsíi ní de jíin, te ni jehēn de ni xícó ndihí de jeē névāha de, te ni jeen de ñūhun ún.

*Jnūhun yátá síquī perla jeē ndeé yahu*

<sup>45</sup> Te jeē ndácu Yaā andiví jniñu nuū ñáyuu, suni cúu nájñūhun ñn tēe jéen xícó, te ndúcú de perla vāha. <sup>46</sup> Te ni jini de ñn perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

### *Jñuhun yátá síquī ñunu jñi chácá*

<sup>47</sup> Te jeē ndácu Yaā andiví jñiñu nuū ñáyuu, suni cúu nájñuhun ñin ñunu jeē cásingava de ini mar, te quívicoo ndinuū chácá. <sup>48</sup> Te núu ni chitú ñunu ún, te cánatava de yundúte. Te cácucoo de cánacáji de chácá. Te chácá váha cájnaa de ini jíca, te chácá tú váha cáscáne de. <sup>49</sup> Te suni súcuan coo quiví jínu ñayiví. Chi quijicoo ndajéhé yá, te sásin ya ñayuu casáha jñiñu néé méhñu ñáyuu casáha jñiñu váha. <sup>50</sup> Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

### *Jñuhun yátá síquī ndajñiñu ndéé yahu*

<sup>51</sup> Te ni cajñuhun yá de jínahan de:

¿A ní cajecūhun ni rō tāca jñuhun yáha, chí tuú? áchí yá.

Te ni cacahān de jín yá:

Ni cajecūhun ni ná, áchí de.

<sup>52</sup> Te ni cahān yā jín de:

Iyó váha núu súcuan. Te ñin tēe stéén tutu ley Yaā Dios, núu je ni cutūhva de ndese ndácu Yaā andiví jñiñu, te cuu stéén de tāca jñuhun síquī ún. Chi cúu de nájñuhun ñin tēe chí vehe. Te ini yejnū de táva de ndajñiñu ndéé yahu, sava jeē jeé jín sava jeē je ni cunahān iyó. Achí yá.

### *Jeē cuánuhun yā ñuu Nazaret*

*(Mr. 6.1-6; Lc. 4.16-30)*

<sup>53</sup> Te ná ni ndihi ni cahān Jesús tāca jñuhun yátá yáha, te ni quenda ya yūcuan cuáhān yā. <sup>54</sup> Te ni najinū yā ñuu yā Nazaret. Te ni steén yā jñuhun ini vehe ñi sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndichí? ¿Te ndese cúu sáha de tāca jñiñu jéhu yāhá? <sup>55</sup> Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jín Judas. <sup>56</sup> Te suni cáyūcu cuáha de jín yó yāhá. ¿Te ndese jíní de tāca jñuhun yáha núu súcuan? Achí ñayuu.

<sup>57</sup> Te súcuan ni cacujéé ni i nuū Jesús. Te ni cahān yā jín i:

Tāca tēe nácani jñuhun Yaā Dios, iyó yíñuhún ñayuu jín de, te máni ñayuu ñuu máa de jín ñáyuu vehe máa de cúu jeē tu iyó yíñuhún jín de. Achí yá.

<sup>58</sup> Te tu ní sáha ya cuehé jñiñu jéhu yūcuán, chí tu cácandíje i ya.

### *Jeē ni jñi Juan tēe scuándute*

*(Mr. 6.14-29; Lc. 9.7-9)*

## 14

<sup>1</sup> Te tiempo yūcuan te Herodes, tēe ndácu jñiñu región Galilea, ni jini jñuhun de jñuhun Jesús. <sup>2</sup> Te ni cahān de jín ñáyuu cáhñin jín de:

Tēe yūcuan cúu Juan tēe ni scuándute, te ni natecu de. Jeē yūcuan iyó poder de sáha de jñiñu jéhu. Achí de.

<sup>3</sup> Chi Herodes, je ni ndacu de jñiñu jeē na quiví Juan vecāa, jín jéē na cónuhñi de jín cadena. Súcuan ní sáha de jeē síquí Herodías, ñasihí ñani de Felipe. <sup>4</sup> Chi Juan ni cahān de nuū Herodes:

Tu iyó ley condeca ró ña, áchí de.

<sup>5</sup> Te jeē yūcuan ní cuni Herodes cahni de Juan. Te yúhú de jeē quití ni ñayuu, chí ndihi i jéni ndije ni i jeē ñin tēe nácani jñuhun Yaā Dios cúu Juan. <sup>6</sup> Te ñin quiví ni sáha Herodes ñin vico quiví ní cacu de. Te sēhe síhí Herodías ni quiví i ni jita jéhe i nuū ñáyuu ní cana de ún. Te ni cusí ni Herodes ní sáha i. <sup>7</sup> Te

ni jejnūhun téyí de jeē cuáha de núu na vé cacān i nuū de. <sup>8</sup> Te ni jehēn i ni cajnūhún i náná i na vé cacān i. Te ni ndīvi i nuū Herodes, te ni cahān i:

Cuáha ní xíní Juan tēe scuándute, cone nuū ñn cohō, achí i.

<sup>9</sup> Yūcuán na te rey Herodes ni cucuíhyá ni de. Te siquí jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yūcuan ní ndacu de jniñu jeē na cuáha nuū i. <sup>10</sup> Te ni tají de soldado jeē na quícahnde xíní Juan ini vecāa.

<sup>11</sup> Te ni quee soldado un jíin xíní Juan, ñe nuū ñn cohō, te ni jēhe nuū súchi síhí un. Te máá i ni jendeca i nuū naná i.

<sup>12</sup> Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

*Jeē ni scáji yā uhūn mil tēe*

*(Mr. 6.30-44; Lc. 9.10-17; Jn. 6.1-14)*

<sup>13</sup> Te ná ni jini Jesús jnūhun, te ni cujiyo ya yūcuan cuáhān yā jíin barco, jeē cóne sñn ya ñn lugar nuū tú ñayuu. Te ni cajini ñayuu jeē cuahán yā. Te táca ñuu ni quendacoo i cájica jéhé i, cuajnahān i ya. <sup>14</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ní yā i, te ni nasávāha ya táca ñayuu cácuñu jeē véjicoo i jíin. <sup>15</sup> Te nuū ní ini, te tēe cáscuáha jíin yā, ni quecoco de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i táca ñuu, te cuaan i jeē cáji i.

<sup>16</sup> Te ni cahān Jesús jíin de:

Tu jíini ñūhún quíngoo i, chí cuáha máá ró jeē cáji i, achí yá.

<sup>17</sup> Te ni cacahān de jíin yá:

Tú na vé cánevāha ná yāha, chí uhūn-ni staā jíin úu-ni chācá, achí de.

<sup>18</sup> Te ni cahān yā jíin de:

Cuáha na quíji, achí yá.

<sup>19</sup> Te ni cahān yā jíin ñayuu un jéē na cúcōo i nuū íte. Te ni quihin ya ndihúhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéché yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñayuu cuehē ún. <sup>20</sup> Te ndīvii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxí uū jíca. <sup>21</sup> Te tēe ni cayeji un cúu nájnūhun uhūn mil, te sñn ga cúu ñahan jíin súchi lúli.

*Jeē ní jíca jéhé yá nuū mar*

*(Mr. 6.45-52; Jn. 6.16-21)*

<sup>22</sup> Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūu de quíngoo de nde inga lado mar, níni jéē nátají yá ñayuu un quínungoo i. <sup>23</sup> Te nuū ní cuu ni nacuatáhú yá nuū i, te máñūhún-ni ya ni caa ya yucu, cuacacān tahú yā. Te ni cuaa, te ñe máñūhún yá yūcuán. <sup>24</sup> Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachí ichi núu de. <sup>25</sup> Te jeē yínee gā ni quee Jesús nuū de, jíca jéhé yá nuū mar. <sup>26</sup> Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cohō de jeē cáyūhú de.

Jíhná cúu, achí de.

<sup>27</sup> Te ni cahān-ni Jesús jíin de:

Ndeyí coo ní rō, te ma yūhu ró, chí máá rí cúu, achí yá.

<sup>28</sup> Yūcuán na te ni cahān Pedro jíin yá:

Núu máá ní cúu, te cahān ni jín ná jéē na cáca jéhé ná nuū mar te jeē na núu ní, áchí de.

<sup>29</sup> Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. <sup>30</sup> Te nuū ní jini de jeē níhin yāhi tachī, te ni yūhú de. Te ni quejéé de queé de chíji ndute. Te ni cana cóhó de:

Jnama ní sáña, áchí de.

<sup>31</sup> Te Jesús ni jni-ni ya ndaha de. Te ni cahān yā jín de:

Tēe tu cándíje níhin cúu ró. ¿Naun ni nayūhu ró? Achí yá.

<sup>32</sup> Te ni quiví ya ini barco un jín de, te ni jecuiñi-ni tachī. <sup>33</sup> Yūcuán na te tēe cáhiin ini barco un, ni cajecuiñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

*Jeē ní nasávāha ya ñayuu cácuñi región Genesaret*

*(Mr. 6.53-56)*

<sup>34</sup> Te ni quenda jíyo ya jín de nuū mar un, ní jinū yā región Genesaret. <sup>35</sup> Te ñayuu yūcuan ní canacuni i ya. Te ni cascáca i jñūhun táca ndaúñi yūcuan jéē ní jinū yā. Te ñayuu ni caquindeca i ñayuu cácuñi nuū yā. <sup>36</sup> Te ni cacahān ndahú i jín yá jeē na quéhé i vésú yusáhma ya. Te táca ñayuu jeē ní caquehé sahma ya, ni canduvāha i.

*Siqui ndese cújnehén ñáyuu*

*(Mr. 7.1-23)*

## 15

<sup>1</sup> Yūcuán na te jecu tēe grupo fariseo jín tēe cástéén tutu ley Yaā Dios, ni quendaco de ñuu Jerusalén, te ni quecoo de nuū yā. Te ni cacahān de jíin yá:

<sup>2</sup> Tēe cácuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staá. Achí de.

<sup>3</sup> Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū ró? Chi sa costumbre maá ró cúu jeē cascuicu ró. <sup>4</sup> Chi ni cahān Yaā Dios: Coó yíñuhún ró jíin tátá ró jíin náná ró. Te núu ndé ñin cahān siquí tátá chí síquí naná, na cúu nahín, áchí Yaā Dios. <sup>5</sup> Te máá ró chi cacahān ró jeē cuu cahān ñin tēe jíin tátá de jíin náná de: Ma cúu chindéé ñáhán ná níhín cuáha na jéé cáji ni jéé cūhun ní, chi ndihi jeē névāha ná, je ni socó na núu Yaā Dios. <sup>6</sup> Te tēe cahān súcuan, tuá cánuu chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró. <sup>7</sup> Tēe stáhú-ni cácuu ró. Ndaā ni nacani Isaías jñūhun siquí ró nde jenahán, yósó núu tútu ñi jeē ni cáhān Yaā Dios:

<sup>8</sup> Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

<sup>9</sup> Te cáchiñuhún sáa-ni i ruhū, chi jñūhun cástéén i cúu jniñu ní candacu tēe, te nasūu jéē ní ndacu máá rí cúu.

Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jíin i:

Cuni sōho vāha jíjnáhan ró, te chuhun ni rō: <sup>11</sup> Nasūu jée quívi ini yuhu ñayuu cujnehén i sáha. Chi jnūhun jeé quénda yuhu i, yūcuan cúu jeé cujnehén i sáha, áchí yá.

<sup>12</sup> Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jée ní caquiti ní tēe fariseo jeé ní cajini sōho de jnūhun ni cahān ní? áchí de.

<sup>13</sup> Te ni cahān máa yá:

Cácuu de nájnūhun yajnu jeé tu ní náchuhun Tátá rī, Yāa ndeé andiví, te ñin quívi te jnūhun ya quihīn. <sup>14</sup> Na quíngoo máa de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndindúu de ninga de xehvā. Achí yá.

<sup>15</sup> Te ni cahān Pedro jíin yá:

Castūhun cájí ní jnūhun yátá yáha nuū na jíjnáhan ná, áchí de.

<sup>16</sup> Te ni cahān Jesús:

¿Te á suni máa ró ná tu jecūhun ni rō chí naún? <sup>17</sup> ¿A tu cájecūhun ni rō jeé táca jée yéji ñayuu, chi quívi chíji i, te quénda-ni cuahān? <sup>18</sup> Te jnūhun jeé quénda yuhu ñayuu, chi nde ini anuá i vēji, te yūcuan cúu jeé cujnehén i sáha. <sup>19</sup> Chi nde ini anuá ñayuu quénda jeé jéni néé ni, jeé jéhni ndiyi, jeé casíquí ndeé jnáhan, jeé jíca jnéni, jeé sacuíhna, jeé cahān jnūhun stáhú, jeé cahān yā síquí jnáhan. <sup>20</sup> Táca jée yáha cúu jeé cujnehén ñayuu sáha. Te núu tu squícu i costumbre jeé nándahá i te caji i staā, tu cúnéhén i sáha. Achí yá.

### *Ñahan inga nación jeé ní candije ñihin*

(Mr: 7.24-30)

<sup>21</sup> Te ni quenda Jesús yūcuan cuahān yā región Tiro jíin Sidón. <sup>22</sup> Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátá, Sēhe yucūn David, cundáhú ni ni sáña víi. Chi sēhe síhí ná, ñūhun tachí ini i, te yōhyo xeēn ndóho i, áchí ña jíin yá.

<sup>23</sup> Te tu ní cáhán cuiti yā jeé ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

<sup>24</sup> Te ni cahān yā jíin ña:

Nuū máa-ni ñayuu nación Israel ni taji Yāa Dios sáña vēji ná, chi cácuu i nájnūhun lanchi, quiti ní sana.

<sup>25</sup> Te ñahan ún chi ni quee ña, te ni jecuíñi yíí ña nuū yā, te ni cahān ña:

Tátá, chindéé ñáhán ní sáña víi, achí ña.

<sup>26</sup> Te ni cahān yatá yá jíin ña:

Tu íyó váha jeé quénde yō staā sēhe, te cuáha yó núu ína, achí yá.

<sup>27</sup> Te ni cahān ña:

Jendaá cahān ní Tátá, te chindéé ñáhán ní sáña vēsú cúu ná nájnūhun ina. Chi suni máa tí cánihīn nahín tí pedazo staā cuechí jée cóyo chíji mesa jitoho tí cáyeji tí, achí ña jíin yá.

<sup>28</sup> Yūcuán na te ni cahān Jesús:

Yōhyo vāha jeé cándije ñihin ní súcuan, nánā. Te na sáha ná jée cuní ni, achí yá.

Te máa hora un ní nduvāha-ni sēhe síhí ña.

*Jeé ní nasávāha ya cuehē ñayuu cácuhū*



<sup>29</sup> Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya. <sup>30</sup> Te cuehē ñayuu ni quecoo i nuū yā, te cāndeca i tāca jēē cājica chácua, jeē cuaá, jeē ñihín, jeē cacúhndú, jíin cuehé gā ñayuu cácuñ. Te ni cajequin i nuū jehé Jesús. Te ni nasávaha ya i jíjnahan i. <sup>31</sup> Te ni canaa ni ñayuu un cájito i jeē nácáhan ñayuu ñihín, ndúvaha ñayuu cuhndú, nácaca vāha ñayuu chacuá, nánune tinū ñáyuu cuaá. Te ni cacahān i jeē yóhoyo vaha Yaa cúu Yaa Dios ñuu i Israel.

*Jeē ni scáji yā cuñ mil tēe*

(Mr. 8.1-10)

<sup>32</sup> Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chi je ni cuu unī quivī cáyūcú i jíin rí, te tuá na vé caji i. Te tu cúni rī natajī rí i nuhun ndite i, chí núu súcuan te sava ichi te cuñta íi i. Achí yá.

<sup>33</sup> Te ni cacahān tēe cáscuáha jíin yá:

¿Te ndé nuū ñihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup> Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chácá lúli, achí de.

<sup>35</sup> Yūcuán na te ni cahān yā jíin ñayuu cuehē un jēē na cucōo i. <sup>36</sup> Te ni quihin ya ndihúxá staā jíin cháca ún, te ni nacuatáhú yá nuū Yaa Dios. Te ni tahué cuehí yá, te ni jēhe ya nuū tēe cáscuáha jíin yá, te máá de ni casaja nuū ñayuu.

<sup>37</sup> Te ndihí i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxá jíca. <sup>38</sup> Te tēe ni cayejí ún, nde cuñ mil de cúu, te sñn ga cúu ñahan jíin súchi lúli. <sup>39</sup> Yūcuán na te ni nacuatáhú yá nuū ñayuu ún, te cuanungoo i. Te ni ndiví ya ini barco, te cuahān yā región Magdala.

*Jeē cājicān de ñn jniñu jéhu nuū yā*

(Mr. 8.11-13; Lc. 12.54-56)

## 16

<sup>1</sup> Te ni quecoo tēe grupo fariseo jíin tēe grupo saduceo nuū yā. Chi cáconi de coto ndee de ya, te ni cājicān de jeē na sáha ya ñn jniñu jéhu jeē coo ñn seña ichi andiví. <sup>2</sup> Te máá yá ni cahān yā jíin de:

Núu ni ini, te cacahān rō: Nandii, chí ni nasácuéhé i andiví, achí ró. <sup>3</sup> Te jenéhen chí cacahān rō: Vijna te cuun saū, chí ni nasácuéhé i andiví, achí ró. Tēe stáhú-ni cácuu ró. Chí cājecūhun ni rō ndese stéén seña andiví, te tu cājecūhun ni rō ndese stéén táca jniñu jéhu sáha ri tiempo yáha. <sup>4</sup> Ñayuu yáha jeē casáha jniñu néé, tu cájjetáhú cuñti i Yaa Dios. Te cājicān i jeē sáha ri ñn jniñu jéhu jeē coo ñn seña andiví. Te tuá na inga jniñu jéhu stéén rī nuū i, chí máá-ni jniñu jéhu nájñuhun ni cuu jíin Jonás, tēe ni nacani jñuhun Yaa Dios nde jenahán. Achí yá.

Te ni stóo ya de jíjnahan de, te cuahān yā.

*Jñuhun levadura tēe fariseo*

(Mr. 8.14-21)

<sup>5</sup> Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. <sup>6</sup> Te ni cahān Jesús jíin de:

Coto má candíje ró levadura tēe grupo fariseo jiín tēe grupo saduceo, achí yá.

<sup>7</sup> Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuán cáhán yā súcuán, áchí de.

<sup>8</sup> Te ni jini Jesús, te ni cahān yā:

¿Najehē cácahān rō jeē ni cáhān rī súcuán siquī jeē tú na staā cándiso ró? Tēe tu cándíje nīhin cácuu ró. <sup>9</sup> ¿A ná tu jecūhun ni rō jeē tu ní cáhān rī súcuán siquī jeē tu ndíso ró stáā? ¿A tu cánucūhun ni rō jeē ní tahú cuéché rí uhūn staā ni cayejí uhūn mil tēe, te nasaa jīca ni canastútú ró jeē ni quéndōo? <sup>10</sup> ¿Te á tu cánucūhun ni rō jeē ní tahú cuéché rí uxā staā ni cayejí cuūn mil tēe, te nasaa jīca ni canastútú tucu ró? <sup>11</sup> ¿Te najehē tu cájecūhun ni rō jeē násūu siquī staā ni cáhān rī jiín ró jeē ni cáhān rī jeē coto má candíje ró levadura tēe fariseo jiín tēe saduceo? Achí yá jiín de.

<sup>12</sup> Yúcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yāhi levadura, chí sa suhva ni cahān yatá yá jeē ma cándíje de jnūhun stáhú cástéén tēe fariseo jiín tēe saduceo.

*Jeē ní cáhān Pedro jeē Jesús cúu Cristo  
(Mr. 8.27-30; Lc. 9.18-21)*

<sup>13</sup> Te nuū ní jinū Jesús región Cesarea Filipino jiín tēe cáscuáha jiín yá, te ni cajnūhun yá de:

Ruhū, Yaā ní nduu tēe, ¿ndé iin cúu ri cácahān ñayuu?

<sup>14</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

<sup>15</sup> Te ni cahān yā jiín de:

Te máá ró, ¿ndé iin cúu ri cácahān rō? achí yá.

<sup>16</sup> Te ni cahān Simón Pedro:

Máá ní cúu Cristo, Yaā ní taji Yaā Dios. Te cúu ní Sēhe Yaā Dios, Yaā técu ní cáni, áchí de.

<sup>17</sup> Te ni cahān Jesús:

Yōhoyo ndetū rō, Simón sēhe Jonás, chí nasūū iin ñayuu ni steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. <sup>18</sup> Te ruhū suni cáhān rī jiín ró jeē máá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē máá rí cúu Cristo, suu cúu nájñūhun iin yuū cáhnu. Te siquī yuū cáhnu yáha sáha rí jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuiti siquī i, ni jnūhun xeēn jeē cájihí i, tuá na vé cúu sáha jiín ánuá i. <sup>19</sup> Te máá ró condiso jniñū ró sáha ró jéé quívicoo ñayuu ndaha Yaā andiví jeē ndacu ya jniñū nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun. Achí yá.

<sup>20</sup> Yúcuán na te ni ndacu ya jniñū nuū tēe cáscuáha jiín yá, jeē ma cáchi de nuū ní iin ñayuu jeē cúu ya Cristo.

*Jeē ní castūhún Jesús jeē cúu yā  
(Mr. 8.31-9.1; Lc. 9.22-27)*

<sup>21</sup> Te nde saá ní quejéé Jesús cástūhun cáji yá nuū tēe cáscuáha jiín yá jeē jini ñūhún quihīn yā ñuu Jerusalén. Te tāca tēe jéhnu jiín sūtú cácujeñnu jiín tēe cástéén tutu ley, stóho ndasí de ya. Te cahni de ya, te nuū uní quiví te natecu

yā, achí yá. <sup>22</sup> Yūcuán na te Pedro, ni cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yāā Dios jeē cuu súcuan. Tu jíní ñuhún cuíti ndoho ní jnúndóho yáha, achí de.

<sup>23</sup> Te ni ndió cóto ya nuū Pedro, te ni cahān yā jíin de:

Cujiyo quihñ rō, chí cáhán rō ná cáhán Satanás. Chi tēe ndúcú stíví ruhū cúu rō. Te tu jéni ni rō nájnūhun jéni ni Yāā Dios, chí sa suhva jéni ni rō nájnūhun cájeni ni ñayuu. Achí yá.

<sup>24</sup> Yūcuán na te ni cahān yā jíin tēe cáscuáha jíin yá:

Na-ni ñayuu núu cúní i condiquñ i ruhū, na cási i jeē cuní maá i, te na condiquñ i ruhū te cuāha i jñūhun ndoho i jnúndóho jeē siquí rī, vēsú na cúu i. <sup>25</sup> Chi núu ndé ñáyuu cuní i cácu i nuū jnúndóho quiji nuū i jeē siquí ruhū, núu súcuan te jahnū ndetū i ñí cáni. Te núu ndé ñáyuu, vēsú na cúu i jeē siquí ruhū, te cotecu i ñí cáni. <sup>26</sup> ¿Chi ndé cuajníñu vēsú na cundeýí ñáyuu nihñ i ñí ñáyiví, te núu quiví i nuū jnahnū ndetū i? Chi tú na jíin cuíti chunaa ñayuu jeē cácu ánuá i. <sup>27</sup> Chi ruhū, Yāā ní nduu tēe, ndiji ri jíin táca ndajéhé rī, te yōhoyo luu cujéñu ri nájnūhun cújéñu Tátá rī. Yūcuán na te cuāha ri tahū nuū ñin ñin ñayuu núu ndese jniñu ni casáha i. <sup>28</sup> Te jendaá cahán rī jíin rō jeē sava tēe cáhññ yáhá, ma cúu de chí nde cuni de jeē maá rī, Yāā ní nduu tēe, ndácu ri jniñu jíin poder rī.

*Jeē tucu ni nduu ya  
(Mr. 9.2-13; Lc. 9.28-36)*

## 17

<sup>1</sup> Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahān sññ ya jíin de ñin yucu súcún. <sup>2</sup> Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya ni nducujín quiyi ndasí, nájnūhun nduva luz. <sup>3</sup> Te ni cajito-ni de jeē Moisés jíin Elías, tēe ni cahíyo jenahán, cándajñuhún de jíin yá. <sup>4</sup> Te ni cahān Pedro jíin yá:

Nacá jeē váha jeē cáhññ ná yáha. Te núu cúní ni te na sáha ná úní vehe ramada, ñin cuu máa ní, inga cuu Moisés, te inga cuu Elías, achí de.

<sup>5</sup> Te níni cáhán gā de, te ni quiji vicō ñuhun jéé yaa ndasí, ni jesi-ni nuū de. Te nuū vicō un ní cahān ñin jñūhun:

Yáha cúu Sēhe ri jeē maní ndasí rí jíin, te cúshñ ni rī jíin. Na cúní nahín rō jñūhun cáhán yā. Achí.

<sup>6</sup> Te jeē súcuan ni cajini sōho tēe cáscuáha ún, te ni cajecava ndeyi de, chí yōhoyo ni cayūhú de. <sup>7</sup> Yūcuán na te ni quee Jesús, te ni soó yá ndaha ya siquí de. Te ni cahān yā:

Ndocuññi, te ma yūhu rō jijnáhan rō, achí yá.

<sup>8</sup> Te ni candacoto de, te tuá tēe un ní cájito de, chí maá ñin na Jesús.

<sup>9</sup> Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñin jeē súcuan ni cajito rō, chí nde na nátecu maá rí, Yāā ní nduu tēe, achí yá.

<sup>10</sup> Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yāā Dios, ¿najehē cácahān de jeē cánuú ndiji Elías xñna gā, te sáá te quiji Yāā cúu Cristo? achí de.

<sup>11</sup> Te ni cahān Jesús jíin de:

Jendaá cúu jeē xñna gā quiji ñin tēe cuu nájnūhun Elías, te sátūhva de ndihñ, achí tutu. <sup>12</sup> Te cáhán rī jíin rō jeē jé ni quiji tēe ni cuu nájnūhun Elías, te tu ní

jíní ñayuu jeē suu de cúu. Te ni casáha ndevāha ñayuu jín de ndíhi jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

<sup>13</sup> Yūcuán na te tēe cáscuáha un, ní cajecūhun ní de jeē cahán yā jeē Juan tēe scuándute, ni cuu de nájñuhun Elías.

*Jeē ní nasávāha ya ñn sūchi jíhí yíhí*

*(Mr. 9.14-29; Lc. 9.37-43)*

<sup>14</sup> Te ni najinū yā jín de nuū ñayuu cuehē ún. Te ni quee ñn tēe, ni jecuiñí yití de nuū yā, te ni cahān de:

<sup>15</sup> Cundáhú ni ní séhe yí ná, chí yōhyo xeēn ndóho i cuehyí jíhí yíhí. Te je ni cuu cuehē jínu cótúú i nuū ñuhún jín núū ndúte. <sup>16</sup> Te ni quindecá ná i nuū tēe cáscuáha jín ní, te tu ní cúu sávāha de i, achí de.

<sup>17</sup> Te ni cahān Jesús:

Ñayuu yōhyo níhni ní cacuu ró chí tu cácadíje ró jēe cuu nduvāha i. ¿Nasaa ga quiví condee rí jín ró? ¿Te nasaa ga quiví cuandeyí ní rí jín ró? Cuáquihin sūchí un na quíi i, achí yá.

<sup>18</sup> Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

<sup>19</sup> Yūcuán na te tēe cáscuáha un, ní cacajnūhun sún de ya:

¿Najehē tu ní cúu quenehen ná tachí un jínáhan ná? achí de.

<sup>20</sup> Te ni cahān yā:

Siquí jeē tu cácadíje níhin ró jēe cuu sáha ró. Chí jendaá cahán rí jín ró, jeē núu candíje ró vésú ñn tíhlí-ní, cūhva nájñuhun ñn ndiquin mostaza, te cuu sáha ró táca-ni jniñu yí. Chí cuu cahān ró jeē na cújiyo yucu yáha quihín inga lado, te cujiyo-ni. Te táca-ni jniñu chí cuu sáha ró, te núu candíje níhin ró jēe cúu. <sup>21</sup> Te ñn tachí súcuan chí ma quénda cuiti quihín, te núu tu cacān tahú ró te coo ndite ní ró. Achí yá.

*Jeē ní cahān tucu ya jeē cúu yā*

*(Mr. 9.30-32; Lc. 9.43-45)*

<sup>22</sup> Te jíca cuu Jesús jín de jínáhan de región Galilea, te ni cahān yā jín de: Máá rí, Yaā ní nduu tēe, nastúu i ruhū nuū táca tēe xeēn. <sup>23</sup> Te cahni de ruhū, te nuū uní quiví te natecu rí, achí yá.

Te ni canducuíhyá ndasí ní de jeē ní cahān yā jñuhun yáha.

*Siquí xūhun cuajniñu ini templo*

<sup>24</sup> Te ni jinū yā ñuu Capernaum jín tēe cáscuáha jín yá. Te tēe cástútú xūhun templo ni quecoo de, te ni cacajnūhún de Pedro:

Te maestro maá ró jínáhan ró, ¿á tú cuāha de xūhún cuajniñu ini templo, chí naún? achí de.

<sup>25</sup> Te ni cahān Pedro:

Cuu, achí de.

Te ná ní quiví de ini vehe, te xíhna gā Jesús ni cahān yā jín de:

¿Ndese jéni ní ró, Simón? Táca tēe cacuu rey ini ñayiví yáha, ¿ndé núu cájicān de xūhun renta jín xūhun cuajniñu ñuu? ¿A núu séhe de chí núu ñayuu sún vehe? achí yá.

<sup>26</sup> Te ni cahān Pedro:

Nuū ñayuu sún vehe, achí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xūhún un núu i.

Súcuan ní cahān yā jeē cujéhnu ya cúu ya Sēhe Yaā Dios. Te ni cahān yā:

<sup>27</sup> Te na chúnaa yō, návaha tu squítí ni yō de. Núu súcuan te cuáhán ndé yumar, te scáne ró gancho jeē jn#i chácá, te tava rō chácá jéē jn#i xlhna gā. Te ndica rō yuhu ti, te yúcuan níhñ rō ññ xūhun jéē cánda chunaa rō jeē cájicān de. Te quindēca ró núu de jeē cúu ruhū jín róhó. Achí yá.

*Ndé ñáyuu cúu jeē cújéhu ga*  
(Mr. 9.33-37; Lc. 9.46-48)

## 18

<sup>1</sup> Te suni quíví un ní quecoo tēe cáscuáha un núu yā, te ni cacajñuhún de ya: ¿Ndé ññ cújéhu ga nuū ñáyuu jeē ndácu Yaā andíví jññu nuū? achí de.

<sup>2</sup> Te ni cana ya ññ sūchi lúli, te ni jení ya i mehñú de. <sup>3</sup> Te ni cahán yā:

Jendaá cahán rī jín ró, núu tú nandió cóo ni rō te cani ni rō nájñuhun ññ sūchi lúli, ma quíví cuiñi rō ndaha Yaā andíví jéē ndacu ya jññu nuū rō. <sup>4</sup> Núu súcuan te ñayuu jeē jení ni i jeē tu cújéhu i, nájñuhun jení ni sūchi lúli yáha, suu i cújéhu ga nuū ñáyuu jeē ndácu Yaā andíví jññu nuū. <sup>5</sup> Te na-ni ñayuu núu jeē siquí ruhū jetáhú i ññ sūchi lúli nájñuhun sūchi yáha, te ruhū jetáhú i. Achí yá.

*Xeēn coo siquí ñáyuu quíví nuū cuéchi*  
(Mr. 9.42-48; Lc. 17.1-2)

<sup>6</sup> Te núu ññ sūchi lúli yáha cándije i ruhū, te núu quíví i cuéchi sáha na-ni ñayuu, te vāha ga núu ni conuhñi ññ yōso cáhnu sucññ ñayuu ún, te quēe i chíji ndute mar nuū. <sup>7</sup> Nacā xeēn cúu jín ñáyuu ñayíví, chí máni íyó jéē nducú squíví ñayuu nuū cuéchi. Te máni súcuan coo ini ñayíví. Te nacā xeēn ndoho ñayuu jeē squíví jññan nuū cuéchi.

<sup>8</sup> Núu súcuan te núu ndaha ró chí jéhē rō sáha jeē quíví ró cuéchi, vāha ga cahnde rō te scáne ró na quihñ, návaha tuá sáha ró cuéchi. Chí vāha ga jeē coo chácua ró chí coo tícúhndu ró te quíví ró núu cotecu rō ní cáni, vēsú jeē cóndee ndíndúu ndaha ró jéhē rō te quíví ró núu ñuhún jeē cayú ní cáni. <sup>9</sup> Te núu tinūu ró sáha jeē quíví ró cuéchi, vāha ga tava rō te scáne ró na quihñ, návaha tuá sáha ró cuéchi. Chí vāha ga jeē coo ññ-ni tinūu ró te quíví ró núu cotecu rō ní cáni, vēsú jeē cóndee ndíndúu tinūu ró te quíví ró núu ñuhún infierno.

*Jññhun yátá siquí lanchi jeē ní sana*  
(Lc. 15.3-7)

<sup>10</sup> Coto ma sájéē ni rō nuū ní ññ sūchi lúli yáha. Chí cahán rī jín ró jeē tēcá ndajéhé andíví jéē ndíto ya i, níni cáhññ ya nuū maá Tátá rī andíví. <sup>11</sup> Chí ruhū, Yaā ní nduu tēe, vēji rī jeē jñña rī ñayuu jeē ní sana i nuū Yaā Dios.

<sup>12</sup> ¿Te ndese cájeni ni rō? Núu ññ tēe ndéca de ññ ciento lanchi, te núu sana ññ ti, ¿á tu stóo de cuññ xico xahññ cuññ gā tñ yucu, te ndicó de quinanducú de quítí ní sana ún? <sup>13</sup> Te núu ni nanihñ de ti, te ndaā jeē yóhoyo ga cúsi ni de jín quítí ún vēsú jín cúññ xico xahññ cuññ gā quítí jeē tu ní sana. <sup>14</sup> Te suni súcuan maá Tátá rō, Yaā ndeé andíví, tu cúní yā jeē jññhñú ndetú ni ññ sūchi lúli yáha.

*Siquí jeē cóne cáhnu ni yō nuū jññan yó*  
(Lc. 17.3)

<sup>15</sup> Te núu jññan ró ní sáha de cuéchi siquí rō, núu súcuan te castūhun ró nuū mañúhññ-ni de jeē ní sáha de cuéchi siquí rō. Te núu ni jetáhú de jññhun ni cahán rō jín de, núu súcuan te je ni ndumaní de jín ró ní sáha ró. <sup>16</sup> Te núu tu ní jetáhú de jññhun cahán rō, te quicāna ró ññ chí úu gā ñayuu quihññ rō jín

nū de, cuu i testigo jíin ró, te cundaā cuēchi de te ndumanī de jíin ró. <sup>17</sup> Te nū tu ní jétáhú tucu de jnūhun cácahān tēe ún, yūcuán na te castūhun ró nuū ñáyyu cácañdije. Te nū tu ní jétáhú tucu de jnūhun cahān ñáyyu cácañdije ún, te siáá rō de na cóo de nájñūhun ñin tēe tu cáñdije nuū Yaā Dios chí tēe stútú xūhun renta.

<sup>18</sup> Jendaá cahān rī jíin ró jēē tāca jēē cási rō jeē ma sáha ñáyyu ini ñáyivī yáha, suni casi jēē cáyūcú nde andiví. Te tāca jēē cuáha ró jnūhun sáha i ini ñáyivī yáha, suni jēē cáyūcú nde andiví cuáha jnūhun.

<sup>19</sup> Te suni cáhān rī jíin ró, nū uū jnáhan ró ini ñáyivī yáha, inuú cani ni rō siquī ñin jēē cacán tahu rō, nū sūcuan te máá Tátá rī andiví cuáha ya jēē cájicān rō. <sup>20</sup> Chi nū ndé mí ndútútú úu chí únī ñáyyu jēē cáchiñúhún i ruhú, te yūcuan íne rī jíin i, áchí yá.

<sup>21</sup> Yūcuán na te ni quee Pedro nuū yā, te ni cajñūhún de ya:

¿Nasaa jínu cone cáhnu ni na nū jnáhan ná jēē sáha de cuēchi siquī ná? ¿A ndé uxā jínu chí naún? áchí de.

<sup>22</sup> Te ni cahān Jesús:

Tu cáhān rī jíin ró jēē maá uxā jínu, chí nde uxā jínu jēē uní xico uxí.

### *Jnūhun yátá síquī mozo jēē tu ní íne cáhnu ni*

<sup>23</sup> Nū sūcuan te Yaā ndeē andiví, suhva cúu jēē íne cáhnu ni yā nuū ñáyyu ndacu ya jniñu nuū: Cúu nájñūhun ñin rey jēē cuní de sándaā de jíin mozo de jēē cátaū nuū de. <sup>24</sup> Te ni quejéé de sándaā de jíin i. Te ni caquindeca i ñin mozo jēē taú tijni millón peso nuū de. <sup>25</sup> Te tú na vé névāha mozo un chunaa nuū de. Te ni ndacu de jniñu jēē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táú. <sup>26</sup> Yūcuán na te ni jecuiñī yití mozo un, te ni cahān ndahú de jíin patrón de ún: Condetu ní, te na chúnaa ndihí ná xūhun ní, áchí de. <sup>27</sup> Te máá patrón ni cundáhú ni de mozo de. Te ni ine cáhnu ni de jēē taú mozo de ún, te ni siaá de jēē ma chúnaa gā. <sup>28</sup> Te ni quenda mozo un cuáhān de, te ni najnáhan-ni de jíin ñin jnáhan mozo de jēē taú jecu peso nuū de. Te ni jñi de tēe ún, te ni quitu de sucūn, te ni cahān de: Chunaa jēē taú rō nuū rī, achí de. <sup>29</sup> Te jnáhan mozo de un ní jecuiñī yití nū de, te ni cahān ndahú jíin de: Condetu te na chúnaa ndihí rī xūhun ró, achí. <sup>30</sup> Te máá de tu ní cúní de, chí ni chune de tēe un vécāa nde quivī nachunaa jēē taú nuū de. <sup>31</sup> Te tāca jnáhan mozo de ni cajito jēē sūcuan ní sáha de, te ni cajnahuhú ndasí ni de. Te cuangoo de nuū patrón de, te ni cacachi de ndihí ndese ni cuu. <sup>32</sup> Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chí ni ine cáhnu ni rī ndihí jēē taú rō nuū rī, chí ni cahān ndahú ró jíin rí. <sup>33</sup> Te nájñūhun ni cundáhú ni rī rohó, suni sūcuan ni jini ñúhún cundáhú ni rō jnáhan mozo rō nuú, áchí de. <sup>34</sup> Te ni quití ndasí ni patrón, te ni ndacu de jniñu jēē na quiví vecāa nde nachunaa ndihí jēē taú nuū de.

<sup>35</sup> Te ni jínu ni cahān yā, te áchí yá:

Nájñūhun ni sáha rey un jíin mozo de, suni sūcuan sáha máá Tátá rī andiví jíin táca rohó nū tu cone cáhnu ni rō nuū jnáhan ró nde jíin ini jíin ánuá rō, nū na-ni cuēchi sáha i nuū rō. Achí yá jíin de jíināhan de.

*Siquī jēē ma stóo jnáhan tēe jíin ñahan  
(Mr. 10.1-12; Lc. 16.18)*

## 19

<sup>1</sup> Te nuū ní ndihi ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núū cáne niāndii. <sup>2</sup> Te cuehē ñayuu ni candiquīn i ya, te yūcuan ní nasávaha ya ñayuu cácuhū.

<sup>3</sup> Yūcuán na te ni quecoo jecu tēe grupo fariseo nuū yā, chi cáconi de coto ndee de ya núu ndese cahān yā. Te ni cacajnúhún de ya:

¿A íyó ley jeē cuu ndusín in tēe jíin ñasihí de núu na-ni siquī cúu, chí naún? áchí de.

<sup>4</sup> Te ni cahān yā:

¿A tu ní cácahu ró tutu ii ndese ni sáha Yaā Dios ñayuu nde xīhna ñúhún? Chi tēe jíin ñahan ni sáha ya, achí. <sup>5</sup> Te suni ni cahān Yaā Dios: Jeē yúcuán cúu jeē stóo tēe tátá de náná de, te quijnáhan de jíin ñasihí de, te in na cuu ndindúú de, áchí Yaā Dios, achí tutu. <sup>6</sup> Núu súcuan te tuá cúu uū jnáhan de, chí in na cúu. Jeē yúcuán tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

<sup>7</sup> Te ni cacajnúhún de ya:

Núu súcuan ¿te naun ni ndacu Moisés jniñu jenahán jeē núu stóo in tēe ñasihí de, te na cúváha acta jeē ndusín de jíin ña? áchí de.

<sup>8</sup> Te ni cahān yā jíin de:

Siquí jeē níhni ní rō jijnáhan ró, jeē yúcuán ní jēhe Moisés jnúhun jeē stóo ró ñasihí ró. Te nde xīhna ñúhún chí nasūu súcuan ní cuu. <sup>9</sup> Te ruhū chí cáhán rī jíin ró, núu in tēe stóo de ñasihí de, te núu nasūu jéé tǐjni ní ña, te quijnáhan de jíin inga ñahan, núu súcuan te cásiquí ndéé de ña. Te núu in tēe condeca de ñahan ní ndusín, suni cásiquí ndéé de ña, áchí yá.

<sup>10</sup> Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te váha ga ma cóndeca de ñahan, áchí de.

<sup>11</sup> Te ni cahān yā jíin de:

Jnúhun ni cahān rō yāhá, tu níhín jniñu nuū ndihi tēe, chí máá nene tēe jeē ní sáha Yaā Dios jeē níhín jniñu nuū. <sup>12</sup> Chí íyó tǐjni siquí jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni máá de jeē ma cóndeca de ñahan siquí jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnúhun jeē ma cóndeca de ñahan, na cuatáhú de núu súcuan. Achí yá.

*Jeē ni jícān tahú Jesús jehē sūchi lúli*  
(Mr. 10.13-16; Lc. 18.15-17)

<sup>13</sup> Yūcuán na te ni quecoo ñayuu jíin sūchi lúli, jéé na sóo yá ndaha ya xiní i te cacān tahú yā jehē i. Te tēe cáscuáha jíin yá, ní cacahān de nuū ñáyuu vējicoo jíin i. <sup>14</sup> Te ni cahān Jesús:

Cuāha jnúhun na quíjicoo sūchi lúli jíin nuū rī, te ma cási ró jeē quíjicoo i. Chí ñayuu jeē ndió cóo ní i cani ní i nájnúhun sūchi yáha, suu i quíví ndaha Yaā andiví jéé ndacu ya jniñu nuū i, áchí yá.

<sup>15</sup> Te ni sóo yá ndaha ya xiní i jíjnáhan i. Te ni quenda ya yūcuan cuáhān yā.

*Jnúhun tēe cúca*  
(Mr. 10.17-31; Lc. 18.18-30)

<sup>16</sup> Te in tēe suchí ní quee de nuū Jesús, te ni cajnúhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihīn tahú na cotecu na ní cáni andiví? áchí de.

<sup>17</sup> Te ni cahān yā jīn de:

¿Naun cáhān rō jeē tēe vāha cúu ri? Tú ni ñin tēe vāha íyó, chi máá ñin-ni Yaā Dios. Te núu cúní rō cotecu rō ní cáni, te squícu rō jniñu ní ndacu ya. Achí yá.

<sup>18</sup> Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndéē jnāhan rō. Ma sacuíhná rō. Ma sajnúhún rō. <sup>19</sup> Cuatáhú rō nuū tatá rō nuū naná rō. Te cundáhú ni rō jnāhan rō nájñuhun cúndáhú ni rō maá rō, achí yá.

<sup>20</sup> Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmanī gā sáha ná núu súcuan?

<sup>21</sup> Te ni cahān Jesús:

Núu cúní rō squícu ndihí rō, cuáhān te xīco rō ndihí jeē névāha rō, te cuāha rō núu ñáyuu ndahú. Te nde andiví cuáha ya jeē ndetū ndasí coo rō. Yūcuán na te quiji rō condiquīn rō ruhū quihīn yō, achí yá.

<sup>22</sup> Te tēe suchí un, ná ni jini sōho de jñuhun yáha, te ni cucuíhyá ni de te cuahān de, chí cúcá ndasí de.

<sup>23</sup> Yūcuán na te ni cahān Jesús jīn tēe cáscuáha jīn yá:

Jendaá cahān rī jīn rō, tēe cúcá chí yōhoyo yí quívicoo de ndaha Yaā andiví jeē ndacu ya jniñu nuū de. <sup>24</sup> Te cáhān tucu rī jīn rō jeē yachí gā yāha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jniñu nuū í, achí yá.

<sup>25</sup> Te tēe cáscuáha jīn yá, yōhoyo ni canaa ni de jeē ní cajini de jñuhun yáha, te ni cacajñuhun jnāhan de:

¿Ndé ñáyuu cúu jeē cácu núu súcuan?

<sup>26</sup> Te ni ndacoto Jesús nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí ndihí-ni cuu sáha ya, achí yá.

<sup>27</sup> Yūcuán na te ni cahān Pedro:

Saña jijnāhan ná ní castóo ná ndihí jeē cánevāha ná, te cándiquīn na níhín. ¿Te na vé nihín na núu súcuan? áchí de.

<sup>28</sup> Te ni cahān Jesús jīn de:

Ruhū, Yaā ní nduu tēe, jendaá cahān rī jīn rō jijnāhan rō jéē ñin quíví conene rī mesa ndacu rī jniñu, te yōhoyo luu cujéhu rī ñin ñayíví jéé. Te quíví ún te máá rō jeē ní cacondiquīn rō ruhū, suni coyūcu rō nuū uxí uū mesa ndacu rō jniñu. Te sándaā rō jniñu ndihúxí uū yucūn ñayuu Israel. <sup>29</sup> Te tāca ñáyuu jeē ní stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i ñin ciento gā jeē súcuan. Te suni nihīn tahú i cotecu i ní cáni. <sup>30</sup> Te cuehē ñayuu jeē vijna cácuu i nuū, nduu i sandíhí. Te ñayuu jeē vijna cácuu i sandíhí, nduu i nuū. Achí yá.

*Jñuhun yátá síquī tēe cásjniñu*

## 20

<sup>1</sup> Te suhva cúu jeē ndácu Yaā andiví jniñu nuū ñáyuu: Cúu nájñuhun ñin tēe chíí ñuhun. Te ñin nehen ni quenda de, ndúcú de tijni mozo jeē taxín ndéhē uva de. <sup>2</sup> Te ni sándaā de jīn mozo un jéé chúnaa de ñin denario jeē quíví. Te ni tají



de tēe un cuángoo jeē taxín uva de. <sup>3</sup>Yūcuán na te ni quenda tucu de nájñuhun cahñn. Te ni jito de nuū sava ga tēe cáyūcu sáa-ni de nuū yáhu. <sup>4</sup>Te ni cahñn de jíin: Róhó jíinánhan ró, cuángoo taxín ró uva rí, te chunaa váha ri yáhu ró, áchí de. Te tēe un cuángoo de. <sup>5</sup>Te ni quenda tucu de jeē cuácuu cahuxí uū jíin jéé cuácuu cahuní, te suni súcuan ní nihñn tucu de mozo. <sup>6</sup>Te jeē cuácuu cahuhñn ní quenda tucu de. Te ni nihñn tucu de jecu gā tēe cáyūcu sáa-ni nuū yáhu. Te ni cahñn de jíin: ¿Najehē cáhñn sáa-ni ró yáha ní ndiáca? áchí de. <sup>7</sup>Te ni cacahñn tēe ún: Siquí jeē tú ni ñn ní cána sáña jéé sájñiñu ná. Te ni cahñn de jíin tēe ún: Núu súcuan te suni máá ró quingoo ró taxín ró ndehē uva rí, chí chunaa váha ri yáhu ró, áchí de. <sup>8</sup>Te nuū ní ini, te tēe chíí ñuhun ní cahñn de jíin tēe cújéhnu nuū mozo de: Cana xiní tēe casájñiñu te chunaa rō yáhu de, te xihna gā tēe ni quívicoo sandihí, te sáa te tēe ni quívicoo xihna ñúhún, áchí de. <sup>9</sup>Te ní quecoo tēe jeē ní quívicoo cahuhñn. Te ñn denario ní caquihñn ñn ñn de. <sup>10</sup>Yūcuán na te ni quecoo tēe jeē ní quívicoo xihna ñúhún. Te cájeni ni de jeē cuehē gā quiyáhu de. Te ñn-ni denario ní caquihñn ñn ñn de. <sup>11</sup>Te nuū ní caquihñn de, te ní caquejeé de cácahñn sōo de siquí tēe chíí ñuhun, áchí de: <sup>12</sup>Máá ná jíinánhan ná, ndiáca ní casájñiñu ná, te ní candoho ná jéé jihní. Te tēe yáha jéé ní quívicoo sandihí, chí máá ñn hora-ni ní casájñiñu de. Te ñnuú-ni ní chiyáhu ní sáña jíin de, áchí de. <sup>13</sup>Te tēe chíí ñuhun ní cahñn jíin ñn de: Amigo, nasúu jéé tú váha sáha rē ní jíin ró. ¿A tu ní sándaá yō jeē ñn denario quiyáhu ró, chí naún? <sup>14</sup>Núu súcuan te quihñn yáhu ró te quinhun rō. Chí cúní rí jeē tēe ní quívicoo sandihí yáha, ñnuú quiyáhu de jíin máá ró. <sup>15</sup>¿Te á tu cuu sáha ri ndese cúní rí jíin xúhun máá rí? ¿Te chí cúcuésún ní rō jeē ní chiyáhu váha ri de jíinánhan de siquí jeē váha ní rí? áchí de. <sup>16</sup>Te nájñuhun ní sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nácáji ya máá i jeē ndúu i sēhe ya. Achí yá.

*Jeē ní cahñn tucu Jesús jeē cúu yā  
(Mr. 10.32-34; Lc. 18.31-34)*

<sup>17</sup>Yūcuán na te ná ní quihñn Jesús ichi cuahñn yā ñnuu Jerusalén, te ni cana sñn ya ndihúxí uū tēe cáscuáha jíin yá. Te ni cahñn yā jíin de:

<sup>18</sup>Cuní sōho ró, chí je cuángoo yō ñnuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujeñnu jíin núu tēe cástéén tutu ley. Te ndonda de siquí rí jeē cúu rí. <sup>19</sup>Te squívi de ruhū nuū tēe nación Roma jeē cáyūcú Jerusalén cándacu jñiñu. Te táca tēe un sácatá de nuū rí. Te caní de ruhū, te sáa te cahni de ruhū jicá cruz. Te nuū uní quiví te natecu rí. Achí yá.

*Jeē ní jíicān naná Jacobo jíin Juan ñn favor nuū yā  
(Mr. 10.35-45)*

<sup>20</sup>Yūcuán na te ni quee ñasihí Zebedeo nuū yā jíin sēhe ña Jacobo jíin Juan. Te ni jecuiññ yití ña nuū yā, jíicān ña ñn favor nuū yā. <sup>21</sup>Te ní cajñuhun yá ña:

¿Na vé cuní rō?

Te ní cahñn ña:

Cuāha ní jñuhun jeē quiví ndácu ní jñiñu te conēne ndíndúú sēhe ná yáha xiin ní, ñn i lado váha ní, te inga i lado jecó ní, achí ña.

<sup>22</sup>Yūcuán na te ní cahñn Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jñúndóho nájñuhun jeē quíji siquí rí? ¿Te á canda ró ndoho xeñ rō nájñuhun ndoho ri? Achí yá.

Te ní cacahñn de:

Cuu sáha ná.

<sup>23</sup> Te ni cahān yā jín de:

Jendaá jeē ndoho ró jnúndóho nájñuhun jeē quiji siquī rī, te ndoho xeēn rō nájñuhun ndoho ri. Te jeē cónēne ró lado váha ri jín lado jecó rí, nasūu rúhū cúu jeē cuáha jñuhun. Chi je iyó túhva cuu tāca tēe jeē ní nacāji Tátá rī, te tēe un níhñ. Achí yá.

<sup>24</sup> Te uxī gā tēe cáscuáha jín yá ní cajini de jñuhun yáha. Te ni caquitī ni de nuū uú ñani ún. <sup>25</sup> Te Jesús ni cana ya de, te ni cahān yā jín de:

Cájini rō ndese cásaha tēe cácujeñhu nuū ñayuu tāca nación. Chi cándacu níhñ de jñiñu nuū i, te máá de cáchí ndese coo. <sup>26</sup> Te máá ró jijnáhan ró, chi ma sáha ró súcuan. Chi núu ndé ññ ró cúní cujeñhu, sa suhva cuajñiñu ró núu jnánhan ró. <sup>27</sup> Te núu ndé ññ ró cúní cuu nuū, sa suhva sáha ró máá ró mozo nuū jnánhan ró. <sup>28</sup> Chi suni súcuan sáha ruhū, Yaā ní nduu tēe, chi nasūu jéé véji ri jeē cuajñiñu ñayuu nuū rī, chi sa suhva véji ri jeē cuajñiñu ri nuū ñayuu. Te cuáha ri máá rí cuu rī návaha jnama ri cuehē ñayuu, achí yá.

*Jeē ní nasávāha ya uū tēe cuáá*

*(Mr. 10.46-52; Lc. 18.35-43)*

<sup>29</sup> Yūcuán na te ni quenda ya jín de ñuu Jericó. Te cuehē ndasí ñayuu ni candiquñ i ya. <sup>30</sup> Te yuhíchi un cáyūcu uū tēe cuáá. Te ni cajini de jñuhun jeē Yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ní sáña, achí de.

<sup>31</sup> Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ní sáña ví, achí de.

<sup>32</sup> Te ni jecuiñí Jesús, te ni cana ya ndñndúú tēe cuáá un, te ni cajñuhun yá de:

¿Na vé sáha ri jín ró cácuni rō?

<sup>33</sup> Te ni cacahān de jín yá:

Jeē na ndúndijin tinūu ná cácuni ná, achí de.

<sup>34</sup> Te ni cundáhú ni yā de. Te ni tee ya ndaha ya tinūu de. Te ni candundijin-ni tinūu de. Te ni candiquñ de ya cuango de jín yá.

*Jeē ni quívi Jesús ñuu Jerusalén*

*(Mr. 11.1-11; Lc. 19.28-40; Jn. 12.12-19)*

## 21

<sup>1</sup> Te nuū cuácuyajni ya ñuu Jerusalén, te ni jinū yā jín tēe cáscuáha jín yá ñuu Betfagé, jeē íne jehē yucu Olivos. Te ni tají yá uū tēe cáscuáha jín yá jeē quíngoo de. <sup>2</sup> Te achí yá jín de:

Cuáhán ñuu lulí íne ichi núú. Te yūcuan níhñ rō ññ burra, núhñí tī jín ññ burro lulí. Te ndají ró tī, quijicoo ró jín tī nuū rī. <sup>3</sup> Te núu ndé ññ cahān jín ró, te cachi rō nuū: Máá Jítoho yō jini ñúhún yá tī, achi rō. Yūcuán na te siáá-ni i tī, quiji ró jín tī, achí yá.

<sup>4</sup> Te súcuan ni cuu táca jñiñu yáha návaha squícu jñuhun ni cahān tēe ni nacani jñuhun Yaā Dios nde jenahán, yósó nuū tútu:

<sup>5</sup> Cachi rō nuū ñayuu ñuu Jerusalén jeē naní ñuu Sión:

Yáha condēhe ró jeē véji Rey rō.

Tu sájéñhu ya máá yá, chi máá burra-ni yósó yá,

jín burrito, sēhe quití ndíso.

Achí tutu.

<sup>6</sup> Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de. <sup>7</sup> Te ndéca de burra jíin séhe ti, ni ndecoo de nuū yā. Te ni casoó de sahma de siquī tī, te ni jecosō yā tī. <sup>8</sup> Te cáhiin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. <sup>9</sup> Te ñayuu cuangoo ichi núú jíin ñayuu cuangoo ichi yátá, cácana jee i:

Yōhoyo cújēhnu Yaā cúu Sēhe yucūn rey David. Yōhoyo vāha Yaā cúu Yaā jeē véji jíin jniñu máá Jítoho yō Yaā Dios. Te yōhoyo cújēhnu máá Yaā Dios. Achí i.

<sup>10</sup> Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnāhan:

¿Ndé tēe cúu tēe yáha? achí i.

<sup>11</sup> Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúú Galilea. Achí i.

*Jeē ní quenehen ya ñayuu ini templo*  
(Mr. 11.15-19; Lc. 19.45-48; Jn. 2.13-22)

<sup>12</sup> Yūcuán na te ni quívi Jesús ini templo cáhnu Yaā Dios. Te ni quenehen ya tāca ñayuu cájeen quiti te cánaxico núú ñayuu jeē socō i. Te ni scotúú ndeyi ya tāca mesa tēe cástáyi xūhún, jíin silla tēe cáxícó paloma. <sup>13</sup> Te achí yá jíin i:

Yósó núú tútu ñi jeē cahán Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jijnāhan ró, chi nájnūhun yaū cava ñacuíhná ni canasáha ró. Achí yá.

<sup>14</sup> Yūcuán na te sava ñayuu cuaá jíin ñayuu chacuá ni quecoo i nuū yā ini templo un. Te ni nasávaha ya i. <sup>15</sup> Te sutú cácujeñnu jíin tēe cástéén tutu ley Yaā Dios, ni cajito de táca jniñu jēhnu sáha ya, te ni cajini de jeē cácana jee sūchi lúli ini templo: Yōhoyo cújēhnu Yaā cúu Sēhe yucūn rey David, achí i. Te ni caquiti ni de. <sup>16</sup> Te ni cacahān de jíin yá:

¿A tu jíni ró jēe súcuan cacahān sūchi yáha? achí de.

Te ni cahān Jesús jíin de:

Jíni ri. ¿Te á ná tu cahu ró jēe yosó núú tútu ñi jeē suhva cáhán ñin tēe jíin Yaā Dios?

Sáha ní jēe tāca sūchi lúli jíin sūchi cájexin, vāha ndasí cáhán i jeē Yaā cujēhnu cúu Cristo. Achí.

<sup>17</sup> Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

*Jeē ní cáhān yā nuū yújnu higo*  
(Mr. 11.12-14, 20-26)

<sup>18</sup> Te jenéhen inga quívi cuanuhun yā ñuu Jerusalén, te jíi yā sōco. <sup>19</sup> Te ni jito ya ñin nundéhe higo, ñin yuhíchi. Te ni jehēn yā jehē. Te tú na ndehē ni níhín yā, chi máá ndaha-ni ñin. Te ni cahān yā jíin:

Vijna te ma cúun cuiti gā ndehē xinī rō, achí yá.

Te ni ichi-ni yujnu higo ún. <sup>20</sup> Te tēe cáscuáha jíin yá, ni canaa ni de cájito de. Te ni cacajnūhún de ya:

¿Ndese ni sáha ní jēe yachí-ni ni ichi yujnu higo? achí de.

<sup>21</sup> Te ni cahān yā jíin de:

Jendaá cahán rī jíin ró, núu candíje ró te tú cani siquī ni rō, te cuu sáha ró jniñu jēhnu nájnūhun ni sáha ri jíin yujnu higo. Te nde jniñu jēhnu ga cuu sáha ró, chi nde cuu cahān rō jeē cújiyo yucu yáha, quihīn nuū mar, te sáha nájnūhun

cahān rō. <sup>22</sup> Te tāca jēē cacān tahū rō jijnáhan rō, te núu candíje rō jēē nihín rō, te nihín rō. Achí yá.

*Siquí jeē ndíso jniñu Jesús  
(Mr. 11.27-33; Lc. 20.1-8)*

<sup>23</sup> Te ni quívi tucu ya ini templo cáhnu. Te níni stéén yā jnūhun, te sutū cácujeñhu jíin táca téé jéñhu jeē cándacu jniñu nuū ñáyuu hebreo, ni quecoo de nuū yā. Te ni cacajñuhún de ya:

¿Ndé ní nihín jniñu rō jéē sáha rō jniñu yáha? ¿Te ndé ñin ni tee jniñu siquí rō jeé sáha rō súcuan? Achí de.

<sup>24</sup> Te ni cahān Jesús:

Suni ruhū, cajñuhun rí rohó ñin jnūhun jijnáhan rō, te núu cuu stíó cuíñí rō, yūcuán na te cachí rí nuū rō ndé ní nihín jniñu ri jeē sáha ri jniñu yáha. <sup>25</sup> ¿Ndé ñin ni tee jniñu siquí Juan jeē ni scuándute de? ¿A Yaā Dios chí táca téé? áchí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un síquí Juan, te cahān de jíin yó: Núu súcuan ¿te najehē tu ní cácañdije rō de? <sup>26</sup> Te núu cahān yō jeē ñáyuu ni catee jniñu un síquí de, te cáyūhu yó ñáyuu, chí ndívi i cácañdije i jeē téé ni nacani jnūhun Yaā Dios ni cuu ndije Juan. Achí de cácahān máá de.

<sup>27</sup> Te ni cacahān de jíin Jesús:

Tu cájini rí, achí de.

Yūcuán na te ni cahān yā jíin de:

Ni ruhū, suni ma cáchi rí nuū rō ndé ñin ni tee jniñu siquí rí sáha ri jniñu yáha, áchí yá.

*Jnūhun yátá síquí uú sēhe yí*

<sup>28</sup> Te ni cahān gā yā jíin de:

Cuni nahín rō jnūhun yátá yáha: ñin tēe ni ñyo uú sēhe yí de. Te ni cahān de jíin ñin i: Séhē, quihín rō taxín rō ndehē uva rí vijna, áchí de. <sup>29</sup> Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. <sup>30</sup> Te tēe un ní jehēn de nuū ñnga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jéhén i. <sup>31</sup> ¿Te ndese cájeni ni rō? Jeē ndindúú i, ¿ndé ñin i ni squícu jniñu cúní tatá i? áchí yá.

Te ni cacahān de:

Sūchi jéē ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rí jíin rō jeē téé cástútú xúhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá rō jijnáhan rō chí ma quívi rō. <sup>32</sup> Chí ni quiji Juan, ni stéén de ndese condiquín rō jnūhun ndaā, te tu ní cácañdije rō jnūhun ni cahān de. Te sa suhva tēe cástútú xúhun renta jíin ñahan cájica jnéni, ni cacandije i jnūhun ni cahān de. Te máá rō, vēsú ni cajito rō jéē ní cacandije i, te tu ní cánacani cuiti ni rō jeē candíje rō. Achí yá.

*Jnūhun yátá síquí tēe néé cásjniñu nuū uva*

*(Mr. 12.1-12; Lc. 20.9-19)*

<sup>33</sup> Cuni sóho ñnga jnūhun yátá jíin náhan rō: Ni ñyo ñin tēe chí ñuhun. Te ni nachuhun de cuehē ndehē uva. Te ni jesi de corral, te ni sáha de ñin nuū cūhun ndehē un táxín. Te ni jeni de ñin vehe súcún návaha cuu coto de ñí cáhnu.

Te ni stóo de nuū sava tēe sájnīñu nuū, te cuu sava de ndehē jíin. Te ni tee de ichi cuahān jicá de. <sup>34</sup> Te máá tiempo ndutútú uva, te ni tají de jecu mozo cuanuquihin sava uva nuū tēe cásájnīñu ún. <sup>35</sup> Te tēe un ní cajñi de mozo un. Te ñin i ni cacani de, te inga i ni cajehni de, te inga i ni cajēhe de yuū xiní. <sup>36</sup> Te tēe chíí uva ni tají tucu de jecu gā mozo cuangoo, cuehē gā vēsú jeē xíhna ñúhún. Te suni súcuan ni casáha tēe un jíin ndihí mozo un.

<sup>37</sup> Te jeē sándihí na te ni tají de sēhe de cuahān. Te jéni ni de: Tēe ún chi cuatáhú de jíjnáhan de nuū séhe ri. <sup>38</sup> Te tēe cásájnīñu ún, núu ní cajito de nuū séhe tēe chíí uva, te ni cacahān maá: Tēe chíí táhú cúu jeē yáha. Na cáhni yō de, te ndōo tahū de cuu yó, áchí. <sup>39</sup> Te ni cajñi de i, te ni caquenehen de i inga lado, te ni cajehni de i. Achí yá.

<sup>40</sup> Yūcuán na te ni cajñūhun yá de:

Núu súcuan te núu na quíji tēe chíí uva un, ¿te ndese sáha de jíin tēe cásájnīñu ún? áchí yá.

<sup>41</sup> Te ni cacahān de jíin yá:

Ma cundáhú cuítí ni de tāca tēe cásáha jniñu néé un, chi cahni de. Te cuāha de ñuhun cáá uva un núu inga sava tēe sájnīñu nuū, cuu sava de ndehē jíin. Te quiví ndutútú ndehē, te tēe ún nacuāha de sava ndehē nuū tēe chíí uva. Achí de.

<sup>42</sup> Te ni cahān Jesús jíin de:

¿Te á ná tu cahu ró jñūhun yáha jeē yosó núu tútu ñi, jeē ruhū cúu nájnūhun ñin yuū? Chi áchí tutu:

Yuū jeē ní casquéhichí tēe cájeni vehe,  
yuū yáha nduu jeē quítuu vehe.

Máá Jítoho yō Yaā Dios ni sáha ya súcuan,  
te cánaa ni yō jíto yó jniñu yáha.

Achí tutu. <sup>43</sup> Núu súcuan te cáhán rí jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúní yá. <sup>44</sup> Te ñayuu tu cácandíje, ndoho i nájnūhun ndóho ñayuu jeē cotúú siquí yuū te jnánhú i. Te quiví sándaā Yaā Dios cuēchi, te ñayuu tu cácandíje, ndoho i nájnūhun ndóho ñayuu jeē nínga yuū siquí i te cundihí i sáha. Achí yá.

<sup>45</sup> Te sutū cácujeñhu jíin tēe grupo fariseo ni cajini sōho de tāca jñūhun yátá ní cahān yá. Te ni cajecūhun ni de jeē siquí maá de cúu jñūhun yátá ní cahān yá siquí tēe cásájnīñu nuū uva jíin tēe cájeni vehe. <sup>46</sup> Te ni canducú de modo jñi de ya. Te cáyūhú de jeē quítí ni ñayuu, chi cájeni ni i jeē tēe nácani jñūhun Yaā Dios cúu ya.

*Jñūhun yátá siquí vico nándāha*

## 22

<sup>1</sup> Yūcuán na te ni cahān tucu Jesús inga jñūhun yátá jíin de jíjnáhan de:

<sup>2</sup> Súcuan cúu jeē ndácu Yaā andiví jniñu nuū ñáyuu: Cúu nájnūhun ñin rey jeē sáha de ñin vico jeē nándāha sēhe yí de. <sup>3</sup> Te ni tají de tāca mozo de cuacana ñayuu jeē ni cáhán de jíin jéé quíjicoo. Te ñayuu ún tu ní cácani i quíjicoo i. <sup>4</sup> Te ni tají tucu de jecu gā mozo quingoo, te áchí de jíin: Cahān jíin ñáyuu ní cana ri un jéé iyó túhva ndeyu. Chi je ni jehni rí stiquí rí jíin táca gá quítí ní nduu, te ndihí je iyó túhva. Nehen jíjnáhan ró vico nándāha. Achí ró jíin i. Achí de. <sup>5</sup> Te ñayuu ní cana de ún tu ní cásáha i cuenta. Chi ñin i cuahān nuū ítu i, te inga i cuahān nuū jniñu sáha i. <sup>6</sup> Te sava ga i ni cajñi i tāca mozo rey, te ni casácatá

i nuū, te ni cajehni i. <sup>7</sup> Yūcuán na te yōhoyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyī ún, te ni cajehmu de ñuu i. <sup>8</sup> Yūcuán na te ni cahān de jín sava ga mozo de: Ndihi je iyó tūhva jeē cóo vico nándāha. Te ñayuu ní cana ri ún, tu iyó váha jeē quíjicoo i chí nasūu ñayuu váha cácuu i. <sup>9</sup> Núu súcuan te cuáhán jijnáhan ró táca nuū náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. <sup>10</sup> Te ni quendacoo mozo un cuángoo táca ichi. Te ni castútú de ndihi ñayuu ni canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

<sup>11</sup> Te ni quīvi rey ini vehe jeē cahán de jín ñáyuu ni cutútú. Te ni jito de nuū ñn tēe jeē tu ñūhun sahma jeē ni jéhe de cuhun ñayuu quijicoo vico nándāha. <sup>12</sup> Te ni cahān de jín tēe ún: Amigo, ¿ndese ni quīvi ró yáha jēe tu ñūhun ró sahma vico nándāha? áchí de. Te máá tēe ún tu ní cahán cuiti de. <sup>13</sup> Yūcuán na te ni cahān rey jín tēe cájeni cohō: Jni de te cuhni rō ndaha de jehē de, te quenehen ró de na quihín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey. <sup>14</sup> Chí cána Yaā Dios cuehē ñayuu jeē na cándije i. Te jecu-ni i candíje, te máá i nácāji ya jeē ndúu i sēhe ya. Achí Jesús.

### *Siquī xūhun renta*

*(Mr. 12.13-17; Lc. 20.20-26)*

<sup>15</sup> Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñn jnūhun jeē nihín de cuēchi siquī yā. <sup>16</sup> Te ni catajī de jecu tēe cáscuáha jín máá de jín tēe grupo Herodes cuangoo de. Te ni cacahān de jín yá:

Maestro, cájini na jēe tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñn ñayuu siquī ní, chí tu sáha ní cuenta ndese cúu ñn i, chí inuú-ni sáha ní jín i. <sup>17</sup> Núu súcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jnū nación yō, chí tuú? áchí de.

<sup>18</sup> Te ni jini Jesús jeē cájito ndee de ya. Te ni cahān yā jín de:

Tēe stáhú-ni cácuu ró. ¿Najehē cájito ndee rō ruhú? <sup>19</sup> Stéén xūhun jēe jéconā renta na cóto ri, achí yá.

Te ni castéén de ñn denario nuū yā. <sup>20</sup> Te ni jito ya, te ni cajnūhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yáha?

<sup>21</sup> Te ni cacahān de jín yá:

Nuū jín síhví rey un cúu, áchí de.

Yūcuán na te ni cahān yā jín de:

Núu súcuan te nacuāha ró núu rey un jēe yáhi cuenta nuū de, te nacuāha ró núu Yaā Dios táca jēe yáhi cuenta nuū maá yá, achí yá.

<sup>22</sup> Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

### *Jeē ní cacajnūhún de siquī jeē nátecu ndīyī*

*(Mr. 12.18-27; Lc. 20.27-40)*

<sup>23</sup> Te suni quīvi un ní quecoo jecu tēe grupo saduceo nuū yā. Te tēe un cacahān jeē tu nátecu cuiti ndīyī. Te ni cacahān de jín yá siquī ñn jnūhun, áchí de:

<sup>24</sup> Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuiñī nuū ndīyī ñani de. Achí Moisés. <sup>25</sup> Te ñuu

na ní ìyo uxá ñani. Te tēe núú ní quijnáhan de jíin ñahan. Te ni jihí de. Te jeē tú sēhe de ní ìyo, te ni ndōo ñasihí de nuū ñáni de. <sup>26</sup> Te tēe ún suni ni jihí de, te tú na sēhe de ní ìyo tucu. Te suni súcuan tēe unī, nde jíin ndihúxá de. <sup>27</sup> Te nuū ní ndihí de ni cajihí, te suni ni jihí ñahan ún. <sup>28</sup> Núú súcuan te quiví nátecu ndīyí, ¿ndé ìin de cuu ña ñasihí de? Chi ndihúxá de ni condeca de ña. Achí de jíin yá.

<sup>29</sup> Yūcuán na te ni cahān yā jíin de:

Yōhyo cástiví ró jnūhun siquī jeē tu cájecūhun ni rō jeē cahán tutu ìi, ni tu cájini rō jeē iyó poder Yāā Dios jeē nastécu yā ndīyí. <sup>30</sup> Chi quiví nátecu ndīyí, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yāā Dios andiví. <sup>31</sup> Te siquī jeē nátecu ndīyí, ¿á tu ní cácahu ró tutu jnūhun jeē cahán Yāā Dios jíin ró? <sup>32</sup> Máá rí cúu Yāā Dios Abraham jíin Isaac jíin Jacob, achí Yāā Dios. Chi vēsú je ni cajihí de, te cátecu de nuū iyó máá yá, chí cúu ya Yāā sáha jeē técu ñayuu níí cáni. Achí yá jíin de.

<sup>33</sup> Te ñayuu un ní canaa ni i cájini nahín i jnūhun stéén yā.

*Jniñu cánuú ndasí gá jeē ní ndacu Yāā Dios*

*(Mr. 12.28-34)*

<sup>34</sup> Yūcuán na te tēe grupo fariseo ni cajini de jeē ní cajesí tēe saduceo yuhu de ni sáha ya. Te ni candutútú de nuū yā. <sup>35</sup> Te ìin de jeē cúu tēe stéén tutu ley Yāā Dios, ni cajñūhún de ya, chí coto ndee de ya cuní de:

<sup>36</sup> Maestro, ¿ndé ìin cúu jnūhun ndácu jniñu cánuú ndasí gá nuū tútu ley? achí de.

<sup>37</sup> Te ni cahān Jesús jíin de:

Coo maní ndasí ró jíin máá Jítóho rō Yāā Dios, nde jnāā ndasí ró sáha ró ndihí jeē cúshí ni yā, nde jíin ini jíin ánuá rō, jíin níí jéé níjnūní rō, achí tutu. <sup>38</sup> Yāha cúu jniñu ndácu ya jeē cujéhu ga te cánuú ndasí gá. <sup>39</sup> Te jniñu uū jeē ní ndacu ya, suni súcuan cáhán: Cundáhú ní rō jnáhan ró nájñūhun cundáhú ní rō maá ró. <sup>40</sup> Te chíjī ndindúú jnūhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yāā Dios, achí yá.

*Siquī jeē cúu Cristo sēhe yucūn David*

*(Mr. 12.35-37; Lc. 20.41-44)*

<sup>41</sup> Te níni cáyūcu tútú gá tēe fariseo un, te Jesús ni cajñūhun yá de:

<sup>42</sup> ¿Nde se cájēni ní rō siquī Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

<sup>43</sup> Te ni cahān yā jíin de:

Núú súcuan ¿te ndese cúu jeē David ni cahān de Jítóho de ya, ni sáha Espiritu Santo nde jenahán? Chi ni cahān de:

<sup>44</sup> Máá Jítóho yō Yāā Dios ni cahān yā jíin Jítóho rī, Yāā quiiji:

Cucōo ró lado váha rī nuū cujéhu ró,

te na sáha rī jeē quende rō poder táca jéé cájito uhū rohó.

Achí Yāā Dios. Achí David. <sup>45</sup> Te núú sēhe yucūn David cúu Cristo, ¿te ndese cúu jeē ní cáhán de jeē Jítóho de cúu ya? áchí yá.

<sup>46</sup> Te ni ìin de tu ní cúu stió cuñí cuiti de jnūhun nuū yā. Te nde quiví ún tuá ni ìin de ní chūndeyí ni de cajñūhún de ya.

*Jeē ni cáhán yā jeē iyó cuéchi de jíjnáhan de*

*(Mr. 12.38-40; Lc. 11.37-54; 20.45-47)*

## 23

1 Yūcuán na te ni cahān Jesús jín ñayuu jín tēe cáscuáha jín yá:

2 Tēe cástéén tutu ley Yaā Dios jín tēe grupo fariseo, cájeni ni de jeē ndíso jniñu de jeē steén de ley jeē ni jéhe ya nuū Moisés. 3 Núu súcuan te cuatáhú ró te squícu ró táca jéé cándacu de nuū rō. Te ma sáha ró nájñuhun cásaáha máa de. Chí cácahān-ni de, te tu cáscuícu de. 4 Chí suni cástéén de táca ley ni catava maá de jeē yí sáha, te cátee de siquī ñayuu, te tu cácuñdeyí i squícu i. Te máa de jijnáhan de, chí ni ñn xinī ndáha de tu cáscánda de jeē squícu de. 5 Te máni siquī jeē na cuájñuhún ñayuu de cúu ndihi jeē casáha de. Chí cánujñahan ni de cuhni de cuehē jñuhun tutu i jneē de jín ndaha de. Te suni cáscááni ga de yuhvá yusáhma de jeē steén jeē cácujuhnu ga de vésú inga ñayuu. 6 Te cánujñahan ni de cucōo de nuū silla yñíuhún gá nuū cáyeji ñayuu vico, jín silla yñíuhún gá ini vehe i sinagoga. 7 Te suni cánujñahan ni de jeē cahán yñíuhún ñayuu jín de nuū calle, jín jéé cahán i maestro jín de.

8 Te máa ró jijnáhan ró, ma cuáha ró jñuhun jeē cahán ñayuu maestro jín ró. Chí inuú cácuu ndihi ró jéé cácuu ró hermano, te iyó ñn-ni Maestro ró jeē cúu ruhū, Cristo. 9 Te ma chíñíuhún ró ni ñn tēe ñayvī yáha jeē cahán ró padre jín de. Chí iyó ñn-ni Tátá ró jijnáhan ró, Yaā ndeé andiví. 10 Te suni ma cuáha ró jñuhun jeē cahán i jitoho jín ró. Chí iyó ñn-ni Jitoho ró, te suu cúu ruhū, Cristo. 11 Te tēe mēhñu ró jijnáhan ró jeē jejníñu nuū jñáhan, suu de cúu jeē cujéñu ga. 12 Chí tēe jeē sajeñnu de máa de, sa ndululí de. Te tēe jeē sálulí de máa de, sa ndujéñnu de.

13 Nacā xeēn ndoho róhó tēe cástéén tutu ley jín róhó tēe fariseo, chí tēe stáhú-ni cácuu ró. Chí cájesi ró jeē quívi ñayuu ndaha Yaā andiví jéé ndacu ya jniñu nuū i. Chí tu quívicoo máa ró, ni tu cájēhe ro jñuhun quívicoo ñayuu nducú quívi.

14 Nacā xeēn ndoho róhó tēe cástéén tutu ley jín róhó tēe fariseo, chí tēe stáhú-ni cácuu ró. Chí cáquende ró vehe ñahan ní caquendōo ndáhú. Yūcuán na te cájicān tahú nahán ró návāha cani ni ñayuu jeē tú na cuēchi ró. Jeē yúcuān xeēn gā ndoho ró castigo.

15 Nacā xeēn ndoho róhó tēe cástéén tutu ley jín róhó tēe fariseo, chí tēe stáhú-ni cácuu ró. Chí ní ñuhun íchi jín ní mar cájica cuu ró cánducú ró ñn ñayuu scandíje ró sáhān máa ró. Te núu ni candíje i, te cásaáha ró jéé vihyá gā cúu cuēchi i jeē quihín i infierno vésú máa ró.

16 Nacā xeēn ndoho ró, chí cácuu ró nájñuhun tēe cuáá jéé steén ichi nuū ñayuu. Chí cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. 17 Tēe cánéé tēe cuáá cácuu ró jéé castívi ró jñuhun cácahān rō. ¿Ndeé ñn cúu jeē cujéñnu ga, á oro un chí Yaā Dios jeē ndeé ini templo jeē sáhí oro un? 18 Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajñíñu jeē cáscō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. 19 Tēe cánéé tēe cuáá cácuu ró jéé castívi ró jñuhun cácahān rō. ¿Ndeé ñn cúu jeē cujéñnu ga, á ndajñíñu yúcu nuū altar, chí Yaā Dios jeē sáhí yā ndajñíñu ún? 20 Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jín ndajñíñu yúcu nuū altar ndácunehen



de. <sup>21</sup> Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. <sup>22</sup> Te tēe jéjnūhun téyí, te núu ndácunehen de andívi, núu súcuan te suni ndácunehen de mesa Yaā Dios te nde jíin máa Yaā Dios jeē ndeé nuū mesa un.

<sup>23</sup> 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi cásaá ró úxí uxí nuhnī tamínū jíin yucū anís jíin yucū comino, te cáscō rō ñin ñin siquī tāca úxí un núu Yaā Dios. Te cástóo rō jnúhun cánuú ndasí gá nuū ley, suu jeē cáca ndaā rō, jíin jéē cundáhú ni rō jnáhan rō, jíin jéē candíje rō. Tāca jéē yáha cánuú sáha rō núú, te suni ma stóo rō jéē socó rō tāca yucū ún. <sup>24</sup> Cácuu rō nájnūhun tēe cuáá jéē steén ichi nuū ñayuu. Chi cásqúcu rō ñin jeē lulí gá un, te cástóo rō jéē cánuú gá. Te suu cúu nájnūhun jeē cátava rō chūcún ndíhī jeē ñūhun nuū ndúxi, te cácocó rō ñin quití cáhnu jeē naní camello.

<sup>25</sup> 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi nájnūhun jeē cánacate rō yātā vaso jíin yātā cohó. Te ichi íni rō chi ñūhun máni máa jnúhun cuíhná jíin jnúhun ndíyo ni. <sup>26</sup> Tēe cuáá cácuu ró, fariseo. Xihna gā sáha rō jéē coo ndoo ini anuá rō, te yūcuán na te suni coo ndoo tāca jéē casáha rō jéē cájito ñayuu nuū.

<sup>27</sup> 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi cándāa rō nájnūhun vehe ndíyi nuū panteón jeē cáyaa. Chi ichi yátá jíto luu, te ichi íni ñūhun chítú yiqui ndíyi jíin tāca jéē tehyú. <sup>28</sup> Te súcuan cácuu máa ró, chi ichi yátá rō casáha rō jeē tēe ndaā cácuu ró núu ñayuu. Te ichi íni rō ñūhun chítú jnúhun stáhú-ni jíin jnúhun néé.

<sup>29</sup> 'Nacā xeēn ndoho róhó tée cástéén tutu ley jíin róhó tée fariseo, chi tēe stáhú-ni cácuu ró. Chi casáha rō vehe siquī nuū yíndūji ndíyi jíi rō, tēe ni canacani jnúhun Yaā Dios nde jengahán. Te casáha luu rō vehe siquī nuū yíndūji tāca tēe ni iyo ndaā. <sup>30</sup> Te cácahān rō: Núu jeē suni yúcu yó tiempo jeē ní cotecu ndíyi jíi yō, te ma squívi nduu yō jíin de jeē cáhni yō tēe ni canacani jnúhun Yaā Dios, achí rō. <sup>31</sup> Te súcuan cácahān ndaā rō jeē máa ró cácuu yucūn ñayuu ni cajehni tēe ni canacani jnúhun ya. <sup>32</sup> Núu súcuan te tāca cuéchi jeē ní casquéjéé ndíyi jíi rō, máni un casáha ga máa ró.

<sup>33</sup> 'Va sēhe coō cácuu ró, chi xeēn rō nájnūhun coō. ¿Ndese cācu rō jéē ma jnahnú ndetú rō quingoo rō infierno? <sup>34</sup> Núu súcuan te tají rí tāca tēe nacani jnúhun Yaā Dios nuū rō, jíin tāca tēe ndíhí jéē cástéén jnúhun ya. Te sava de cahni rō, te sava de cata caa rō jicá cruz. Te sava ga de cani rō de ini tāca vehe íi sinagoga, te scúnu rō de quingoo de tāca ñuu. <sup>35</sup> Te súcuan te condee cuéchi siquī máa ró jeē ní cajehni jíi rō tāca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mehñu cuarto íi jíin altar. <sup>36</sup> Jendaá cahán rí jíin ró jeē tāca cuéchi yáha condee siquī ñayuu iyó vijna.

*Jeē cucuíhyá ni yā jíto ya ñuu Jerusalén  
(Lc. 13.34-35)*

<sup>37</sup> 'Róhó ñuu Jerusalén, jéhni rō tēe cánacani jnúhun Yaā Dios, te jéhe ro yúū xiní tēe táji Yaā Dios vējicoo nuū rō. Te cuehē jínu ni cuni rí nastútú rí sēhe rō, nájnūhun nduji jéē nastútú tí sēhe tí chíji ndijēn tí, te tu ní cúní rō. <sup>38</sup> Núu súcuan te vijna te stóo uun na rí rohó jíin sēhe rō. <sup>39</sup> Chi cáhān rí jíin ró jéē ndé vijna te ma cóto cuíti gā rō nuū rí, chí nde quiji quiví jeē cahán sēhe rō: Yōhoyo vāha Yaā cúu Yaā véndiji jíin jniñu máa Jítoho yō Yaā Dios, achí i. Achí yá.

*Jeē ní cachi yā jeē náā templo  
(Mr. 13.1-2; Lc. 21.5-6)*

## 24

<sup>1</sup> Te ni quenda Jesús ini templo cáhu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnáhan jeē cúu máa templo un. <sup>2</sup> Te ni cahān yā jíin de:

Tāca jēe cājito ró yáha, jendaá cahān rī jíin ró jeē quiji quivī jeē ma cóso jnáhan ga ni ñin yuū, chí ndihī jnanū. Achī yá.

*Na seña coo nuū cuácuyajni ndihī ñayivī  
(Mr. 13.3-23; Lc. 21.7-24; 17.22-24)*

<sup>3</sup> Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajnúhun sīn de ya:

Castūhun ní ndé quivī coo tāca jēe ní cachi ní jēe coo. ¿Te na seña coo núu ni cuyajni quivī ndíji ní jíin jēe jínu ñayivī? áchī de.

<sup>4</sup> Te ni cahān Jesús:

Coto ró jēe máa ma stahú ni ñin de róhó. <sup>5</sup> Chí quijjicoo cuehē tēe jeē stahú jíin síhvī rí. Máa rí cúu Cristo, achī de. Te súcuan stahú de cuehē ñayuu. <sup>6</sup> Te nihīn ró jnúhun jeē tāca lado iyó guerra, chí je yajni coo guerra. Te ma yūhu ró, chí cánúu coo súcuan. Te ni ná tu jinū quivī ndihī ñayivī. <sup>7</sup> Chí ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyi xeēn. Te cháha chúcuan jnáa. <sup>8</sup> Te tāca jēe yáha cácuu jnūndóho quejéé xīhna ñúhún gá.

<sup>9</sup> Yūcuán na te nastúu i róhó jíjnáhan ró jēe stóho i róhó te cahni i róhó. Te ndihī ñayuu quivī ni i nuū ró jeē siquī ruhū. <sup>10</sup> Te quivī ún chí cuehē ñayuu candije caca yátá i, te quivī ni i nuū jnáhan i, te nastúu jnáhan i. <sup>11</sup> Te canecoo cuehē tēe stahú, te cahān de jeē jnúhun Yaā Dios cánacani de, te stahú de cuehē ñayuu. <sup>12</sup> Te nducuehē jniñu néé, te jeē yúcuan cuehē i ma cóo manī gā i. <sup>13</sup> Te ñayuu cuiñi nihin jíin jnúhun rī nde quivī jínu, ñayuu ún chí cācu. <sup>14</sup> Te jnúhun yáha síquī ndese ndácu Yaā Dios jniñu, cuiñi núu ní cáhu ñayivī, návāha cuni ñayuu tācá nación. Yūcuán na te jínu ñayivī.

<sup>15</sup> Te Daniel, tēe ni nacani jnúhun Yaā Dios, ni tee de jnúhun ñin tēe néé jēe quíji. Te róhó jēe cácahu tutu ún, na jécūhun ní ró. Chí ñin quivī te cuni ró jeē sáha ndevāha de jeē stívī de tācá ndajniñu iñi ini templo, te cuiñi de ini lugar iñi. <sup>16</sup> Te núu cuni ró jeē súcuan cúu, te ñayuu cáyūcú región Judea, na cúnu i caa i yucu quingoo i. <sup>17</sup> Te ñayuu cáyūcu núu quēhe, ma ndívi i ini vehe jeē quénehen i ndajniñu i, chí cánúu cunu yachī i návāha cācu i. <sup>18</sup> Te ñayuu cáhīin nuū ítu, ma ndíji i vehe jeē quíhin i sahma i. <sup>19</sup> Te quivī ún nacá jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachī ña. <sup>20</sup> Te cacān tahú ró jeē ma quíji jnūndóho un jēe cunu ró máa tiempo cúun yuhvā ni quivī ndétátú. <sup>21</sup> Chí jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayivī te nde vijna. Te jeē ndihī jnūndóho ún te ni ma cóo ga jeē súcuan. <sup>22</sup> Te núu tú nastíyi Yaā Dios tiempo jnūndóho ún, te ni ñin ñayuu ma cácu cuiñi i. Te jeē siquī ñayuu cácandije jeē ní nacāji ya, jeē yúcuan nastíyi ya tiempo un.

<sup>23</sup> Núu súcuan te núu ñin ñayuu cahān jíin ró: Yáhá condēhe ró íne Cristo, chí: Yūcuán condēhe ró íne ya, achī i, te ma candije ró jēe cahān i. <sup>24</sup> Chí canecoo tēe cástahú jēe achī de jeē Cristo cúu de, chí achī de jeē tēe nácani jnúhun Yaā Dios cúu de. Te sáha de jniñu jéhu jeē naa ni ñayuu coto i, návāha stahú de nde

maá ñayuu ní nacāji ya, te núu na cúu. <sup>25</sup> Je ni castūhun rí nuū rō vijna nde ná tu coo. <sup>26</sup> Núu súcuan te núu cahān ñayuu jíin ró: Cuácondēhe ró, chí nde nuū ñúhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candije ró jíjnāhan ró. <sup>27</sup> Chí nájñūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quiví ndiji ruhū, Yāa ní nduu tēe, chí ndihi ñayuu coto. <sup>28</sup> Te nájñūhun jeē cutútú téji ndé-ni cúu nuū catú quiti ní jihí, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

*Ndese coo quiví ndiji Yāa ní nduu tēe*  
(Mr. 13.24-37; Lc. 21.25-33; 17.26-30, 34-36)

<sup>29</sup> Yūcuán na te núu ni ndihi tāca jñúndóho quiví ún, te cojnúú niāndii, te yoó ma ndíi gā. Te ningoo quími andiví. Te tāca jéē ín andiví chí quisi i. <sup>30</sup> Yūcuán na te coto ñayuu nuū maá rí, Yāa ní nduu tēe, ndiji ri ichi ándiví. Te ndahyū ñayuu tāca nación ñí cáhnu ñayiví. Te coto i nuū ruhū, Yāa ní nduu tēe, ndiji ri jíin vícō andiví, te condiso rí cuehē poder; te yōho luu kujéhnu ri. <sup>31</sup> Te tají rí ndajéhé rí quingoo, te tiví ñihin ya trompeta. Te quínastútú yá ñayuu ní nacāji ri ndicúun lado ñayiví, nde ñin lado ñayiví jíin ndé inga lado.

<sup>32</sup> Vijnā te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihni. <sup>33</sup> Te suni súcuan núu ni cajini rō jeē ní quejéé cúu tācá jñiñu jeē ni cáhān rī, yūcuán na te na jécūhun ni rō jeē ní cuyajni quiví ndiji ri, te yachí coo. <sup>34</sup> Jendaá cahán rī jíin ró jeē ma cúu ndihi ñayuu jeē coto jñúndóho ún, chí nde squícu ndihi jñiñu ún. <sup>35</sup> Andiví jíin ñayiví chí naa, te tāca jñúhun cáhān rī chí ma náa, chí ndihi squícu.

<sup>36</sup> Te quiví jíin hora jeē ndíji ri, tú ni ñin ñayuu jiní, ni máa ndajéhé cáhīyo andiví, ni máa rí, Sēhe Yāa Dios. Chí máa ñin ni Tátá rí Yāa Dios cúu jeē jiní.

<sup>37</sup> Chí nájñūhun ni cuu quiví ní íyo Noé, suni súcuan coo quiví ndiji ruhū, Yāa ní nduu tēe. <sup>38</sup> Chí quiví ún, nde ná tu cuun saū xeén, te cáyeji i cájini i, cánandāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. <sup>39</sup> Te tu ní cácandije ñayuu jeē cuun saū xeén, te ni cuun, te ni ndaa ndute ni cajihí ndihi i. Te suni súcuan coo núu na ndíji ruhū, Yāa ní nduu tēe. <sup>40</sup> Te quiví ún cone uū tēe sájniñu nuū ítu. Te ñin de naquihin ri, te inga de ndōo. <sup>41</sup> Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chí tu ní cácandije i.

<sup>42</sup> Núu súcuan te ndito na cóo ni rō, chí tu cájini rō na quiví ndiji Jitoho rō. <sup>43</sup> Te na chúhun ni rō jeē cahán jñūhun yátá yáha: Tēe chíi vehe, núu jeē jini de na hora quiji ñacuñhá, te condito de, te ma cuáha de jñūhun sácuñhá ndajniñu vehe de núu. <sup>44</sup> Te rōhó jíjnāhan ró, suni súcuan coo tūhva ró, chí máa hora jeē tú na vé cájeni ni rō, te ndiji ruhū, Yāa ní nduu tēe.

*Jñūhun yátá síquí mozo*  
(Lc. 12.41-48)

<sup>45</sup> Núu súcuan te coo ró nájñūhun ñin mozo jeē ndíto xiní te squícu vāha. Te máa patrón ni jeni de mozo un jéē cóto i ñayuu vehe de, návāha scáji i máa hora. <sup>46</sup> Te yōho ndetū mozo un jéē núu ni ndee patrón, te cuni de jeē súcuan squícu vāha i. <sup>47</sup> Jendaá cahán rí jíin ró jeē cani de mozo un jéē cóto i ndihi ndajniñu de. <sup>48</sup> Te núu mozo sáha néé cúu i, te jeni ni i jeē ma ndíji yachí patrón i, <sup>49</sup> te quejéé i cani i jñāhan mozo i, te caji i coho i jíin tēe cánajini, <sup>50</sup> núu súcuan te ndee-ni patrón quiví jeē tu ndétu i jíin hora jeē tú na vé jeni ni i. <sup>51</sup> Te stóho

xeēn de i, te squiví de i nuū cáhīn tēe stáhú-ni. Te yūcuan ndáhyū i te nacayihí yuhu i jeē ndoho xeēn i. Achí yá.

*Jnūhun yátá síquī uxī sūchi síhí*

## 25

<sup>1</sup> Te suhva cúu jeē ndácu Yaā andíví jniñu nuū ñáyyuu: Cúu nájñūhun ñn vico nándāha. Te ni ñyo uxī sūchi síhí jeē ní caquihin i linterna cándaha i, te ni quendacoo i cuajnahān i ñn tēe nandāha. <sup>2</sup> Te uhūn i chí tú ndito xinī i, te uhūn i chí ndito xinī i. <sup>3</sup> Te sūchi tú ndito xinī, cándaha i linterna i, te tu cándaha i petróleo jeē náchuhun i. <sup>4</sup> Te sūchí ndito xinī, chí cándaha i botella petróleo jín linterna i. <sup>5</sup> Te níni cúcuéé quiji tēe nandāha ún, te ni quee máhná, te ni caquixí ndihí i. <sup>6</sup> Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jijnáhan rō, áchí. <sup>7</sup> Yūcuán na te tāca sūchi síhí un ní candonda i, te ni casátūhva i linterna i. <sup>8</sup> Te sūchi tú ndito xinī, ni cacahān i jín sūchi ndito xinī: Cuāha jecu petróleo nuū rī jijnáhan rō, chí cuandahvā linterna rī, achí i. <sup>9</sup> Te ni cacahān sūchí ndito xinī: Ma cúu, chí ma cánda jeē cúu máá rī jín máá rō. Vāha ga quingoo rō nuū cúyāhu, te cuaan rō jēe cúu máá rō. Achí i. <sup>10</sup> Te níni cuángoo i cuaan i, te ni quee-ni tēe nandāha. Te sūchi cáhīyo tūhva un, ní quivícoo i jín de vico nándāha de. Te ni ndihyū yehyí. <sup>11</sup> Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, áchí i. <sup>12</sup> Te ni cahān maá de: ¿Ndé nuū véjicoo rō? Chí tu jíní rī rohó, áchí de. Achí yá.

<sup>13</sup> Yūcuán na te ni cahān yā:

Núu súcuan te ndito coo ni rō, chí tu cájini rō na quiví na hora ndiji ruhū, Yaā ní nduu tēe. Achí yá.

*Jnūhun yátá síquī tēe ní jēhe núu xūhun núu tāca mozo*

<sup>14</sup> Te suhva cúu jeē ndácu Yaā andíví jniñu nuū ñáyyuu: Cúu nájñūhun ñn tēe jeē quihin jicá de inga ñuu. Te nde ná tu quihin de te ni cana de mozo de jijnáhan, te ni jēhe núu de xūhún de nuū i, jeē na sájñiñu i jín návāha nducuehē.

<sup>15</sup> Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chí jíní de nasaa canda ñn ñn i sájñiñu i jín. Yūcuán na te ni quihin de ichi cuahān jicá de. <sup>16</sup> Te mozo jeē ní quihin uhūn mil xūhún, ni sájñiñu de jín. Te ni nihūn de uhūn gā mil síquī. <sup>17</sup> Te mozo jeē ní quihin uū mil xūhún, suni ni nihūn de uū gā mil síquī. <sup>18</sup> Te mozo jeē ní quihin ñn mil xūhún, ni jehēn de ni jete de yaū, te ni chisáhí de xūhún patrón de.

<sup>19</sup> Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. <sup>20</sup> Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jín uhūn gā mil jeē ni nihūn de síquī. Te ni cahān de: Ni jēhe ní uhūn mil nuū ná, te yāha iyó uhūn gā mil jeē ni nihūn na síquī. Achí de. <sup>21</sup> Te ni cahān patrón jín de: Iyó váha núu súcuan. Yōhoyo váha mozo cúu rō jēe squícu váha rō. Chí váha ní squícu rō ñn jniñu lúli-ni, te vijna te cuāha ri jniñu jéhnu ndacu rō. Te quiví rō núu cusí ni rō jín rí. Achí de. <sup>22</sup> Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní uū mil nuū ná, te yāha iyó uū gā mil jeē ni nihūn na síquī. Achí de. <sup>23</sup> Te ni cahān patrón jín de: Iyó váha núu súcuan. Yōhoyo váha mozo cúu rō jēe squícu váha rō. Chí váha ní squícu rō ñn jniñu lúli-ni, te vijna te cuāha ri jniñu jéhnu ndacu rō. Te quiví rō núu cusí ni rō jín rí. Achí de.

24 Te ni quee mozo jeē ní quihín ñn mil xūhún un, te ni cahān de jín patrón: Je jíní na níhín jéē tée xeēn cúu ní. Chí cuehē gā cuní ni vēsú jeē cúu sāha mozo ní, te cuehē gā nānacān ní vēsú jeē ní jéhe ní. 25 Te jeē yúcuān ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. 26 Te ni cahān patrón jín de: Mozo cuxí cúu ró te máni jniñu néé sāha ró. Chí jeni ní rō jeē cuehē gā cuní rí vēsú jeē cuu sāha mozo rí, te cuehē gā nānacān rí vēsú jeē ní jéhe rí. 27 Núu jeē ní chūne ró xūhun rí nuū banco nuū, te jeē ní ndee rí te naquihín rí xūhun rí nde jín séhe xūhun núú. Achí de jín i. 28 Te ni cahān de jín táca gā mozo de: Núu súcuān te quende rō mil xūhun jínā nuū i, te cuāha ro nuū mozo névāha uxí mil. 29 Chí ñayuu jeē névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. 30 Te mozo yāha jéē tu sājniñu vāha, quenehen ró i na quihín i nuū quéhe nuū néé. Te yúcuān ndáhyū i te nacayihí yuhu i jeē ndoho xeēn i. Achí patrón un.

### *Siqui jeē cóo juicio tācá nación*

31 Te ni cahān gā yā:

ñn quiví te ndiji máa Yaā ní nduu tēe, te cuu ya Rey nuū ñayuu. Te tācá ndajéhe yā cuiñi ní xiin ya. Te cucōo ya mesa nuū ndácu ya jniñu, te yōhyo luu cujéhu ya. 32 Te ndutútú ñayuu tācá nación nuū yā. Te sásñn ya i jínáhan i, nájñuhun cúsñn lanchi jín ndixúhú sāha tēe ndító ti. 33 Te ñayuu váha jeē cúu nájñuhun lanchi, chucú yá i lado váha ya. Te ñayuu neé jeē cúu nájñuhun ndixúhú, chucú yá i lado jecó yá. 34 Yúcuán na te cahān Rey jín ñayuu cáhiin lado váha ya: Nacá ndetú rō jeē ní sāha Tátá rí jín ró. Nehen quivícoo ró núu ndácu ró jniñu. Chí nde quiví ní jecōo ñayiví te je ní sātúhva ya nuū ndacu ró jniñu. 35 Chí ní jii rí sóco, te ní cajēhe ro jéē ní yeji rí. Ni jichí rí ndute, te ní cajēhe ró jéē ní jihí rí. Ni quiji rí nde ñuu jicá, te ní cajēhe núú ró vehe ní ndōo rí. 36 Ni cumaní sahma rí, te ní cajēhe ró. Ni cocuhū rí, te ní jecondēhe ró ruhū. Ni ine rí vecāa, te suni ní jecondēhe ró ruhū. Súcuān cahān yā jín ñayuu cáhiin lado váha ya. 37 Yúcuán na te cahān ñayuu váha un jín yá: ¿Na quiví ní cajito ná níhín jéē jín ní sóco, te ní cajēhe na jéē ní yeji ní, chí jéē jichí ní ndute, te ní cajēhe ná ní jihí ní? 38 ¿Te na quiví ní cajito ná jéē ní quiji ní ndé ñuu jicá, te ní cajēhe núú ná vehe ní ndōo ní, chí jéē cumaní sahma ní, te ní cajēhe ná? 39 ¿Te na quiví ní cajito ná jéē cuhú ní, chí jéē ine ní vecāa, te ní jecondēhe ná níhín? achí i. 40 Yúcuán na te cahān Rey jín i: Jendaá cahán rí jín ró jéē ná ní casáha ró súcuān jín ñn tācá hermano rí jeē cácanđije, vēsú ñayuu núu ga cúu i, te nuū maá rí ní casáha ró.

41 Yúcuán na te suni cahān Rey jín ñayuu cáhiin lado jecó yá: Ñayuu jñahnū ndetú cácuu ró. Cuijiyo quingoo ró núu ñuhún jeē cayú ní cání, nuū iyó túhva cone jexeēn jín táca táchí jeē cájejniñu nuū. 42 Chí ní jii rí sóco, te tu ní cajēhe ro jéē caji rí. Ni jichí rí ndute, te tu ní cajēhe ro jéē coho rí. 43 Ni quiji rí nde ñuu jicá, te tu ní cajēhe núú ró vehe ndōo rí. Ni cumaní sahma rí, te tu ní cajēhe ró. Ni cocuhū rí, ni ine rí vecāa, te tu ní jecondēhe ró ruhū. Súcuān cahān yā jín ñayuu cáhiin lado jecó yá. 44 Yúcuán na te cahān ñayuu un jín yá: ¿Na quiví ní cajito ná níhín jéē jín ní sóco, chí jéē jichí ní ndute, chí jéē ní quiji ní ndé ñuu jicá, chí jéē cumaní sahma ní, chí jéē cuhú ní, chí jéē ine ní vecāa, te tu ní cajēhe na jéē cumaní nuú ní? Achí i. 45 Yúcuán na te cahān yā jín i: Jendaá cahán rí jín ró, jeē tu ní casáha ró súcuān jín ñn tācá hermano rí jeē cácanđije, vēsú ñayuu núu ga cúu i. Núu súcuān te suni nuū maá rí cúu jeē tu ní casáha ró, achí

yā. <sup>46</sup> Yūcuán na te quingoo ñayuu un núū ndóho i ñí cáni. Te ñayuu váha un quívicoo i nuū cótecu i ñí cáni. Achí Jesús.

*Jeē ní casqujñáhan de jñūhun jeē jñí de Jesús*  
(Mr. 14.1-2; Lc. 22.1-2; Jn. 11.45-53)

## 26

<sup>1</sup> Te nuū ní ndíhi ni cahān Jesús táca jñūhun yáha, te ni cahān yā jíin téē cáscuáha jíin yá:

<sup>2</sup> Je cájini rō jeē uū na quivī te coo vico pascua. Te ruhū, Yaā ní nduu téē, nastúu i ruhū jeē cúu rī jicā cruz, achí yá.

<sup>3</sup> Yūcuán na te sutú cácujeñhu, jíin téē cástéén tutu ley, jíin táca téē jéñhu jeē cándacu jñíñu nuū ñáyuu hebreo, ni candutútú de ini patio vehe palacio maá sutú cujeñhu ga jeē naní Caifás. <sup>4</sup> Te ni candajnūhún de ndese jñí de Jesús jíin jñūhun stáhú, te cahni de ya. <sup>5</sup> Te ni cacahān de:

Ma jñí yó de maá quivī vico, chi ndonda ñayuu siquī yō, achí de.

*Jñūhun ñahan jeē ní chuhun perfume xini yā*  
(Mr. 14.3-9; Jn. 12.1-8)

<sup>6</sup> Te íne Jesús ñuu Betania vehe Simón, téē ni ndoho cuehyī stehyú. <sup>7</sup> Te ni quee ñin ñahan nuū yā, ndáhá ña ñin frasco yuū luu jeē ñūhun aceite perfume jeē yóhyo yahu ndéé. Te ni chuhun ña xini yā níni jéē yéji yā staā. <sup>8</sup> Te ni cajito téē cáscuáha jíin yá, te ni caquiti ni de, te ni cacahān de:

¿Najehē cúu jeē náa saá-ni perfume jíñā? <sup>9</sup> Chi cuu xicó yahu yó núú, te cuāha yo xūhun núū ñáyuu ndahú. Achí de.

<sup>10</sup> Te ni jini Jesús jñūhun cácahān de. Te ni cahān yā jíin de:

¿Naun cásaáa ró jéē nácani uhū ni ñahan yáha? Chi ñin jñíñu váha cúu jeē ni sáha ña jíin rí. <sup>11</sup> Chi níni coyūcu ñáyuu ndahú jíin ró, te ruhū chi tuá condee rī jíin ró. <sup>12</sup> Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji ri. <sup>13</sup> Jendaá cahān rī jíin ró jeē ñí cáhnu ñayivi ndé-ni cúu nuū cuité jñūhun yáha jéē jnáma ri ñayuu, suni nacani i jñūhun jeē ni sáha ñahan yáha, návāha cocuhun ni ñayuu ña, achí yá.

*Jeē ní nastúu Judas yā*  
(Mr. 14.10-11; Lc. 22.3-6)

<sup>14</sup> Yūcuán na te ñin jeē ndihúxi uū téē cáscuáha ún, nání de Judas Iscariote, ni jehēn de nuū sutú cácujeñhu. <sup>15</sup> Te ni cahān de jíin:

¿Nasaa cuāha ní núū ná, te na nastúu ná de nuū ní? achí de.

Te ni cajēhe ocó uxí xūhun plata nuū de. <sup>16</sup> Yūcuán na te nde quivī un ní quejéé de ndúcu de modo ndese nastúu de ya nuū sutú jijnáhan.

*Jeē ní jequin yā Cena yā*  
(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Te maá quivī jeē quejéé vico jeē cáyeji ñayuu pan jeē tú na levadura yíhi, te ni quijicoo téē cáscuáha un núū Jesús. Te ni cacahān de jíin yá:

¿Ndé nuū cuní ní jéē quísatūhva ná cuxíni ní vico pascua? achí de.

<sup>18</sup> Te ni cahān yā:

Cuángoo nde ñuu, vehe téē jeē jé ni cacahān yō, te cahān rō jíin de: Achí maá Maestro jeē ní cuyajni quivī cuu yā. Te vijna te caji yā vico pascua ini vehe ní jíin téē cáscuáha jíin yá, achi rō. Achí yá.

<sup>19</sup> Te téē cáscuáha jíin yá, ni casáha de nájnūhun ni ndacu Jesús jñíñu nuū de, te ni casátūhva de jeē cuxíni ya vico pascua.

20 Te jeē cuácuuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. 21 Te níni yéji yā jíin de te ni cahān yā:

Jendaá cahán rī jíin ró jeē ĩn rōhó nastúu ruhū vijna, áchí yá.

22 Te ni cacucuíhyá ndasí ni de. Te ná ĩn ná ĩn de ni cacajñuhún de ya:

¿A sáña cúu? áchí de.

23 Te ni cahān yā:

ĩn rōhó jéē cáyeji cáhnu jíin rí ĩn cohō, suu ró nastúu ruhū. 24 Te ruhū, Yaa ní nduu tēe, jendaá cúu jeē quihín rī cuu rī, nájnūhun yósó jñūhun rī nuū tútu ĩ. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

25 Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

26 Te níni jéē cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiqui cúñu rī, achí yá.

27 Yūcuán na te ni quihin ya ĩn copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. 28 Chí yāha cúu niñī rī jeē cuáha rī jeē cúu contrato jeē, te cati jeē ndundoo cuēchi cuehē ñayuu, te coo jñūhun cáhnu ni nuū cuēchi ĩ. 29 Te cáhán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Tátá rī jniñu ní ñayiví, te sáa te coho tucu rī jíin ró jijnáhan ró. Achí yá.

*Jeē ní cachi yā jeē yūhu Pedro cahān de jeē jiní de ya  
(Mr. 14.26-31; Lc. 22.31-34; Jn. 13.36-38)*

30 Te ni jita ya ĩn yaa ĩ jíin de jijnáhan de. Te ni quenda ya cuahān yā jíin de nde yucu Olivos. 31 Yūcuán na te ni cahān yā:

Ndivii rō nayūhu ró jeē siquí ruhū jecuāa vijna. Chí suhva je yósó jñūhun rī nuū tútu ĩ, ni cahān Yaa Dios: Cuáha rī jñūhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí. 32 Te jeē nátecu rī, te xīhna ruhū cosnúu rí quihín rī región Galilea, te sáa te najinūcoo ró, áchí yá.

33 Yūcuán na te ni cahān Pedro:

Vēsú ndihí de na náyūhú de, te máa ná chí ma náyūhú cuíti ná, áchí de jíin yá.

34 Te ni cahān yā jíin de:

Jendaá cahán rī jíin ró jeē jecuāa vijna, nde ná tu cana líhli, te yūhu ró jeē jñī ñayuu rohó, te uní jínu cahān rō jeē tu jíní rō ruhū, achí yá.

35 Te ni cahān Pedro jíin yá:

Vēsú núu cuu na jíin ní, te ma cahán cuíti na jéē tu jíní na níhín, áchí de.

Te suni súcuan ni cacahān ndihí tēe cáscuáha jíin yá.

*Jeē ní jícān tahú yā nuū huerto Getsemaní  
(Mr. 14.32-42; Lc. 22.39-46)*

36 Yūcuán na te ni jínū Jesús jíin tēe cáscuáha jíin yá ĩn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī yūcuan cácan tahú rī, achí yá.

37 Te ni jeca ya Pedro jíin ndindúú séhe Zebedeo cuahān yā jíin de. Te ni quejéé yá cucuíhyá ndasí ni yā te cúxí ni yā jeē quiji jñūndóho siquí yā.

38 Yūcuán na te ni cahān yā jíin de:



Yōhyo cúcuíhyá ni rī, te ndúcu sáha jeē cúu rī. Yāhá condetu ró te condito ró jíin rī.

<sup>39</sup> Te ni jica ya jecu gā, te ni jecuiñi yití yá ni jequin ya nuū yā nuū ñúhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jnúndóho yáha jéé ma quíji siquī ná. Te nasūu jéé cuní maá ná, chí jeé cuní maá ní na cóo, áchí yá.

<sup>40</sup> Yūcuán na te ni ndee yā nuū ndinúni téé cáscuáha jíin yá, te ni jito ya jeé cáquixī de. Te ni cahān yā jíin Pedro:

¿A tu ní cánda ró condito ró jíin rī vēsú ñn hora? <sup>41</sup> Coó ndito ní rō te cacān tahú rō jeé chindéé ñáhán yá rohó jéé ma sáha ró cuéchi jeé coto ndee jeneé rohó. Chí cuní ndije ánuá rō squícu vāha ró, te yiqui cúñu rō chí tu fuerza, achí yá.

<sup>42</sup> Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnúndóho yáha jeé ma ndóho ná, te na cóo jeé cuní maá ní núu súcuan, áchí yá.

<sup>43</sup> Te ni ndee tucu ya nuū de, te ni jito ya jeé cáquixī tucu de, chí yōhyo cájiī de māhná. <sup>44</sup> Te ni stóo ya de, te cuahān tucu ya cuacacān tahú yā vuelta unī. Te suni jnūhun yūcuan ní cahān yā. <sup>45</sup> Yūcuán na te ni ndee tucu ya nuū de jíjnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jñi tēe cáñiyo cuéchi ruhū. <sup>46</sup> Ndocuiñi jíjnáhan ró, chí je vēji tēe nastūu ruhū, te qahūn yō jíin de, áchí yá.

### *Jeé ní cajñi de Jesús*

*(Mr. 14.43-50; Lc. 22.47-53; Jn. 18.2-11)*

<sup>47</sup> Te sá cáhán gā yā súcuan, te ni quee-ni Judas, ñn jnáhan jeé uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutú cácujuhnu jíin táca téé jéñu cándacu jñiñu nuū ñáyuu hebreo, ni catajī téé ún. <sup>48</sup> Te Judas, tēe nastūu ya ún, je ni jēhe de ñn seña nuū téé un jíjnáhan, chí ni achi de:

Tēe jeé téchūhu rí un cúu. Te jñi ró jíjnáhan ró, áchí de.

<sup>49</sup> Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. <sup>50</sup> Te ni cahān Jesús jíin de:

Amigo, ¿na jñiñu vēji ró? áchí yá.

Yūcuán na te ni jinūcoo táca gā tēe ún, te ni cajñi de Jesús.

<sup>51</sup> Te ñn tēe jeé cáñiñ jíin Jesús, ni tava de espada de, te ni jehnde de sōho ñn mozo maá sūtú cujéñu ga. <sup>52</sup> Yūcuán na te ni cahān Jesús jíin de:

Nachuvāha espada rō, chí táca jéé cájeñáhan jíin espada, suni jíin espada cuu. <sup>53</sup> ¿Te á tu cájini rō jeé cuu cacān tahú rī nuū Tatá rī, te vijna ñúhún tají yá víhyá gā uxí uū mīl ndajéhé andiví jeé jnama ruhū? <sup>54</sup> Te núu súcuan, ¿te ndese cuu squícu jnūhun cáhán tutu ñi jeé cánuú ndoho rī súcuan? áchí yá.

<sup>55</sup> Yūcuán na te ni cahān yā jíin ñáyuu cuehē ún:

¿Te va tēe cuíhná cúu rī jeé véjicoo ró jíin espada jíin yujnu jeé jñi ró rúhū jeé súcuan. Táca quíví ní cucōo rī jíin ró jíjnáhan ró ñni templo cáñu, ni steén rī jnūhun, te tu ní cáñiñ ró rúhū. <sup>56</sup> Te súcuan cáśaha ró návāha na squícu jeé cahān tutu ñi jeé ní catee tēe ní canacani jnūhun Yaā Dios, achí yá.

Yūcuán na te ndiñi tēe cáscuáha jíin yá, ni castóo de ya, ni cajinu de cuangoo de.



*Jeē ní indichi Jesús nuū junta tēe cácujeñhu ga  
(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Te tēe ni cajniñi Jesús, cuango de jíin yá nuū Caifás, tēe cúu sutū cujéñhu ga. Te yūcuán cáhiin tútú tēe cástéén tutu ley jíin táca tēe jéñhu cándacu jniñu.

<sup>58</sup> Te Pedro chi jíca-ni ndíquín de ya, te ni jinū de patio sutū cujéñhu ga. Te ni quívi de ini patio, te ni cucōo de jíin táca policia, návaha coto de ndese coo síquī yā.

<sup>59</sup> Te sutū cácujeñhu jíin táca tēe jéñhu jíin ndiñi tēe casáha junta cujéñhu ga, ni canducú de tēe cahān jñūhun yáá síquī Jesús, chi cahni de ya cácuni de. <sup>60</sup> Te vésú ni quecoo cuehē ñayuu cácahān yaá, te tu ní cániñi de cuēchi síquī yā jeē cáhni de ya. Te jeē sándiñi te ni quecoo uū testigo jeē cahān yaá síquī yā. <sup>61</sup> Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichi sáha de, áchí.

<sup>62</sup> Yūcuán na te ni ndocuñiñi maá sūtū cujéñhu ga, te ni cahān de jíin yá:

¿Naun tu cáhān cuiti rō? ¿A iyó ndāa jeē cácahān tēe yáha síquī rō? Achí de.

<sup>63</sup> Te Jesús tu ní cáhān cuiti yā. Te ni cahān maá sūtū cujéñhu ga:

Ndácú ri jniñu nuū rō jeē cahān ndāa rō cuni nahín maá Yaā Dios, Yaā técu. Cachi cají te núu maá ró cúu Cristo, Sēhe Yaā Dios, achí de jíin yá.

<sup>64</sup> Te ni cahān yā:

Suu ri cúu, nájñūhun cáhān rō. Te na cástūhun rí nuū rō jijnáhan ró jēe táca quívi jeē quíji te coto ró rúhū, Yaā ní nduu tēe, condee rí lado váha Yaā iyó poder. Te coto ró jēe ndíji ri ichi ándiví jíin vícō. Achí yá.

<sup>65</sup> Yūcuán na te sutū cujéñhu ga ni jehnde de sahna de jeē quiti ndasí ni de, te ni cahān de:

Tēe yáha chí cáhān de jñūhun ndeváha jeē quiti ni Yaā Dios, chí sáha de maá de Sēhe Yaā Dios. ¿Ndé jíni ñúhún gá yō testigo núu súcuan? Chí je ni cajini ró jñūhun ndeváha cáhān de. <sup>66</sup> ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahān de súcuan, te jíni ñúhún cuu de, áchí.

<sup>67</sup> Yūcuán na te ni catesiñi de nuū yā, te ni cacani de ya. Te sava ga de ni cacatu de nuū yā. <sup>68</sup> Te ni cacahān de:

Te núu Cristo cúu ró, te cachi rō ndé ñn cúu jeē ní cani róhó, áchí de.

*Jeē ní cachi Pedro jeē tu jíni de ya  
(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Te níni jēe súcuan cúu, te Pedro néne de nuū quéhe ini patio. Te ni quee ññ nahān jéjñiñu vehe ún, te ni cahān ña jíin de:

Róhó chí suni ni jica ró jíin Jesús tēe Galilea, achí ña.

<sup>70</sup> Te maá de tu ní cáchi de, chí ni cahān de ni cajini ndiñi ñayuu:

Tu jíni rí na jñūhun cáhān rō, achí de.

<sup>71</sup> Te ni quenda de yéhyí núu quéhe, te ni jito ñnga ñahan nuū de. Te ni cahān ña jíin ñayuu cáhiin yūcuán:

Tēe yáha chí suni ni jica de jíin Jesús, tēe ñuu Nazaret, achí ña.

<sup>72</sup> Te ñga jínu tu ní cáchi tucu de, chí sa ni cahān teyí de:

Tu jíni rí tēe ún, achí de.

<sup>73</sup> Te ni cunúu jecu gā, te ñayuu cáhiin yūcuán ní quecoo i nuū Pedro, te ni cacahān i:

Jendaá ndije jeē suni jñáhan tēe un cúu ró, chí ndijin cahān rō jeē tēe Galilea cúu ró, áchí i.

<sup>74</sup> Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní cuíti rī tēe ún, áchí de.

Te ni cana-ni líhli. <sup>75</sup> Te ni nucūhun ni de jnūhun ni cahān Jesús jíin de: Nde ná tu cana líhli, te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

*Jeē cuángoo de jíin yá nuū Pilato*  
(Mr. 15.1; Lc. 23.1-2; Jn. 18.28-32)

## 27

<sup>1</sup> Yūcuán na te ni cundijin. Te táca sūtū cácujeḥnu jíin táca tēe jéhu jeē cándacu jniñu nuū ñayuu hebreo, ni casquijnáhan de jnūhun ndese sáha de jeē cuu Jesús. <sup>2</sup> Te ni cajihni de ya, te cuangoo de jíin yá nuū Poncio Pilato, tēe cúu gobernador.

*Jeē ni jhī Judas*

<sup>3</sup> Yūcuán na te Judas, tēe ni nastúu ya un, ní jito de jeē ní cunīhin siquī yā jeē cúu yā. Te ni jnahuhū ni de, te ni nacūaha de ocō uxī xūhun plata jeē ní níhīn de nuū sutū cácujeḥnu jíin núu táca tēe jéhu. <sup>4</sup> Te ni cahān de jíin:

Cuēchi ni sáha ná jéé ní nastúu ná ñn tēe cuu de, te tú na cuēchi de.

Te máá sūtū un ní cacahān de:

¿Vé jítú ní ruhū? Cuēchi máá ró cúu. Achí de.

<sup>5</sup> Te ni scāne Judas xūhún un ini templo. Te ni quenda de cuahān de, te ni scuēhne de máá de.

<sup>6</sup> Te sutū cácujeḥnu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jéé ni jéconaa jeē cúu ñn tēe cúu, áchí de.

<sup>7</sup> Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návaha yūcuán quindūji ñayuu ñuu jicá. <sup>8</sup> Jeē yúcuán cúu jeē ndé vijna nání ñuhun ún Lugar Ñuhun Niñ. <sup>9</sup> Te súcuan ní squícu jnūhun ni cahān Jeremías, tēe ni nacani jnūhun Yaā Dios nde jenahán: Ní caquihin de ndihóco uxī xūhun plata, te súcuan-ni cúu ñn yāhu jeē ní casáha ñayuu Israel cuenta jeē ndeé yā nuū i. <sup>10</sup> Te jíin xūhun un ní cajeen de ñuhun quíxin, nájñuhun ni ndacu máá Jítoho yō Yaā Dios jniñu nuū rī. Achí Jeremías.

*Jeē ní indichi Jesús nuū Pilato*  
(Mr. 15.2-5; Lc. 23.3-5; Jn. 18.33-38)

<sup>11</sup> Te nuū ní jinūcoo de jíin Jesús nuū gobernador, tēe cúu Pilato, te ni cajñuhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhán rō.

<sup>12</sup> Te sutū cácujeḥnu jíin tēe jéhu cándacu jniñu, ni cacahān de cuēchi siquī yā. Te tú na vé ní cáhán cuíti yā. <sup>13</sup> Yūcuán na te ni cahān Pilato jíin yá:

¿A tu jíiní ró jéé cácahān de cuehē cuēchi siquī rō? achí de.

<sup>14</sup> Te tu ní cáhán cuíti yā ní ñn jnūhun jíin de. Te nahán ní naa ni gobernador jeē tú na vé ní cáhán yā jíin de.

*Jeē ní cundaā jeē cúu yā*  
(Mr. 15.6-20; Lc. 23.13-25; Jn. 18.38-19.16)

15 Te íyó costumbre gobernador jeē quivī víco un siaá de ñn tēe ñne vecāa, núu na-ni tēe cáconi ñayuu. 16 Te suu quivī un íyó ñn tēe ñne vecāa, nání de Barrabás, te je ni jítē núu jñuhun jeē ni sáha de cuēchi xeēn. 17 Te nuū ní candutútú ñayuu, te ni cahān Pilato jíin i:

¿Ndé tēe cáconi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

18 Súcuán ni cahān de chí cúní de siaá de Jesús. Chí je ni jecūhun ni de jeē ní cacucúsún ni tāca sūtú un cájito de ya, te jeē yúcuán ní quijicoo jíin yá nuū de.

19 Te níni jēe néne Pilato silla nuū sándaā de jñiñu, te ñasihí de ni tají ña jñuhun nuū de: Ma quivī nduu rō jíin ñayuu siquī tēe ndaā jíñā, chí yōhyo ni siūhu jéni ruhū cuni jeē siquí de, achí ña.

20 Te sutú cácujuhnu jíin táca tēe jéhu, ni cascáhán de ñayuu jeē na cácan i jeē siaá de Barrabás, te na cúu Jesús. 21 Yūcuán na te ni cajñuhún tucu gobernador:

Jeē uú de, ¿ndé ñn de cáconi rō jeē siaá rī? achí de.

Te ni cacahān i:

Siaá ni Barrabás, achí i.

22 Te ni cajñuhún Pilato:

Núu súcuán te ¿ndese cáconi rō jeē sáha ri jíin Jesús, tēe cúu Cristo? achí de.

Te ni cacahān ndihí i:

Cata caa ní de jicā cruz, na cúu de, achí i.

23 Yūcuán na te ni cahān Pilato:

¿Na cuēchi ni sáha de núu súcuán? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

24 Te ni jíni Pilato jeē tu cúndeyí de jíin ñayuu, chí sa víhyá gā cácuvaā i. Te ni ndacu de jñiñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá ró jijnáhan ró na cóndee. Achí de.

25 Te ni cacahān ndihí ñayuu:

Suu siquī maá ná jíin siquī séhe ná na cóndee cuēchi jeē cúu de, achí i.

26 Yūcuán na te ni siaá de Barrabás. Te ni ndacu de jñiñu jeē na cáni táca soldado un Jesús, jíin jéé cáta caa de ya jicā cruz.

27 Yūcuán na te soldado un cuango de jíin Jesús ini palacio. Te ni cacana de ndihí jñáhan de ni candutútú núu yā. 28 Te ni caquenehen de sahma ya, te ni cachuhun de ya ñn sahma cuehé jeē cúu sahma rey. 29 Te ni casáha de ñn corona iñu, ni cachuhun de xiní yā. Te ni cachihi de ndaha váha ya ñn yujnu jeē nájnūhun bastón. Te ni casácatā de nuū yā, chí ni cajecuiñí yití de, casáha de jeē chíñuhún de ya.

Nacā jeē váha rey cúu Rey ñayuu hebreo, achí de.

30 Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xiní yā. 31 Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuango de jíin yá jeē cata caa de ya jicā cruz.

*Jeē ní cacata caa de ya jicā cruz  
(Mr. 15.21-32; Lc. 23.26-43; Jn. 19.17-27)*

<sup>32</sup> Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejníñu de tēe un jeē cóndiso de cruz yá.

<sup>33</sup> Te ni jinūcoo de ñin lugar nuū naní Gólgota, jeē cuní cahān Lugar Yiquí Xíní. <sup>34</sup> Te ni cajēhe de vino jeē ni sácā núu jíin ñin jeē uvuá jeē cóho ya. Te nuū ní jito ndee ya, te tu ní cúní yā coho ya.

<sup>35</sup> Te nuū ní cuu ni cacata caa de ya jicā cruz, te ni casáha de sorteo jeē siquī ndese nihīn ñin ñin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquī ndese nihīn ñin ñin de sahma ri, achi yā, achí tutu. <sup>36</sup> Yūcuán na te ni cacucōo de yūcuan jeē cóto de nde cuu yā. <sup>37</sup> Te ni catee de ñin jnūhun xinī cruz yā jeē cahán na siquī ni jíhī yā: Yāha cúu Jesús, Rey ñayuu hebreo, achi.

<sup>38</sup> Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá. <sup>39</sup> Te ñayuu cáyāha yūcuan cáscuicó i xinī i, te cácahān neé i:

<sup>40</sup> Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Séhe Yaā Dios cúu ró, te nuu ró jíicā cruz vī, achí i.

<sup>41</sup> Te sutū cácujeñnu, jíin tēe cástéén tutu ley, jíin tēe grupo fariseo, jíin tēe jeñnu jíjnáhan de, suni súcuan ni cacahān catá de, te achí de cácahān maá de:

<sup>42</sup> Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. <sup>43</sup> Ni candíje de Yaā Dios, te na jnáma ya de vijna te núu cundáhú ni yā de, chi ni cahān de jeē cúu de Séhe ya. Achí de jíjnáhan de.

<sup>44</sup> Te tēe cuíhná jeē cándita caa xiin ya, suni súcuan ni cacahān neé de.

### *Jeē ni jíhī Jesús*

*(Mr. 15.33-41; Lc. 23.44-49; Jn. 19.28-30)*

<sup>45</sup> Te nuū ní cuu cahuxī uū, te ni cunee ní cáhnu nde cahunī. <sup>46</sup> Te nájñūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní saña?

<sup>47</sup> Te sava ñayuu cáhīn yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

<sup>48</sup> Te ni jinu-ni ñin tēe, ni jequihin de ñin cachī, te ni chundaji de nuū vinagre iyá. Te ni tee de xinī ñin yujnu, te ni tee de yuhu ya jeē coho ya. <sup>49</sup> Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, achí de.

<sup>50</sup> Te Jesús ní cana jee ya inga jínu, te ni jihī-ni ya. <sup>51</sup> Te sahma ndíta caa jeē ndihyú cuarto ñi ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. <sup>52</sup> Te ni cananune yaū nuū yíndūji ndiyi. Te cuehē ndiyi jeē ní cacandíje i Yaā Dios, ni canatecu i. <sup>53</sup> Te nuū ní natecu Jesús, te ni quendacoo i nuū yíndūji i. Te ni ndivicoo i ini ñuu ñi Jerusalén, te cuehē ñayuu ni cajito nuū i.

<sup>54</sup> Te ná ni jihī Jesús, te tēe cúu capitán jíin tēe cáhīn jíin de jeē cándito de nde cuu yā, ni cajini de jeē ní jnáa, jíin táca gá jniñu ní cuu. Te yōhyo ni cayuhú de, te ni cacahān de:

Jendaá ndije jeē Séhe Yaā Dios cúu tēe yáha, achí de.

<sup>55</sup> Te yūcuan cáhīn cuehē ñahan, cándēhe jíicā ña. Te suu ñahan un ní candiquín ña Jesús nde Galilea, vējicoo ña cájejnīñu ña nuū yā. <sup>56</sup> Te uní

ñahan un cácuu María ñuu Magdala, jíin María naná Jacobo jíin José, jíin naná ndindúú séhe Zebedeo.

### *Jeē ní quindūji Jesús*

(Mr. 15.42-47; Lc. 23.50-56; Jn. 19.38-42)

<sup>57</sup> Te nuū ní ini quiv̄i ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. <sup>58</sup> Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. <sup>59</sup> Te José ní quihin de yiqui cúñu yā, te ni chusúcún de ñn sahna cuitá íyo ndoo. <sup>60</sup> Te névāha de ñn yaū jeē ní caan jeē jíca ñn cava, nuū ná tu quindūji ndīyi. Te yūcuan ní chindūji de ya. Te ni jesi de ñn yuū cáhnu yuhu yaú un, te cuahān de. <sup>61</sup> Te María ñuu Magdala, jíin ñnga María, cáyūcú ña ichi núú nuū yindūji ya.

### *Jeē ní cacondito soldado nuū yindūji ya*

<sup>62</sup> Te ni cuu táca jniñu yāha máa quiv̄i jeē casátūhva ñayuu jeē quiji quiv̄i ndétātú. Yūcuán na te ni cundijin máa quiv̄i ndétātú. Te sutú cácujuhnu jíin tēe grupo fariseo ni jengoo de nuū Pilato. <sup>63</sup> Te ni cacahān de:

Cānucūhun ni na jeē nde na técu tēe stáhú néé un te ni cahān de jeē nátecu de nuū uní quiv̄i. <sup>64</sup> Núu súcuan te ndacu ní jniñu na cóto vāha táca soldado yuhu yaú un nde núu ni yāha uní quiv̄i. Chī núu tuú te sanaa te quijicoo tēe ni cascuáha jíin de, te tava cuīhná de ndīyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhu gá cuu jnūhun stáhú yūcuan vēsú jeē xīhna ñūhún. Achí de.

<sup>65</sup> Te ni cahān Pilato:

Yāha cáhiyo soldado. Cuángoo jíin de, te sácutú vāha ró yuhu yaú un, te coto vāha ró, núu ndese vāha ga cuu sāha ró. Achí de.

<sup>66</sup> Te cuangoo de, te ni casácutú de yuū jeē ndihyú yuhu yaú nuū yindūji ya, te ni castūn ñihin de. Te ni castóo de táca soldado un cándito.

### *Jeē ní natecu Jesús*

(Mr. 16.1-8; Lc. 24.1-12; Jn. 20.1-10)

## 28

<sup>1</sup> Te ni yāha quiv̄i ndétātú un, te ni cundijin quiv̄i domingo. Te María ñuu Magdala jíin ñnga María un, ní jecondēhé ña nuū ní yindūji Jesús. <sup>2</sup> Yūcuán na te ñn sanaa-ni te ni jnāa ñihin ndasí. Chī ñn ndajéhé máa Jítoho yō Yaā Dios ni cuun ya ichi ándiví, ni quee ya nuū ní yindūji Jesús. Te ni stāa ya yuū ndihyú yuhu yaú un, te ni cucōo ya siquī. <sup>3</sup> Te ndíndēe núu yā nájñūhun taja, te sahna ñūhun ya yaa quiyi nájñūhun yuhvā volcán. <sup>4</sup> Te soldado cándito yūcuan ní quisi i de jeē cáyūhú de cájito de ya. Te ni cacuu ndīyi de. <sup>5</sup> Te ni cahān ndajéhé jíin ndindúú ñahan ún:

Ma yūhu ró, chī jíin rī jeē vécondēhe ró Jesús, Yaā ní jíhī jíca cruz. <sup>6</sup> Tuá yā yāhá, chī je ni natecu yā, nájñūhun ni cahān yā. Nehen condēhe ró nuū ní cachindūji de ya. <sup>7</sup> Te yachī quingoo ró, te cachi rō nuū tēe cáscuáha jíin yā jeē ní natecu yā. Te xīhna gā máa yā jíin Galilea, te sáa te najinūcoo de. Te yūcuán coto de nuū yā. Achí rō na cūni de. Je ni castūhun rī nuū rō, achí ndajéhé.

<sup>8</sup> Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tēe cáscuáha jíin yā. <sup>9</sup> Te níni cuángoo ña, te ni quee-ni Jesús nuū ña, te ni cahān yā jíin ña.

Te ni quecoo ña nde nuū yā, te ni canundee ña jehē yā, te ni cachiñúhún ña ya. <sup>10</sup> Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rī, jeē na núngoo de nde Galilea, te yūcuán coto de nuū rī. Achí yá.

### *Jnūhun ní cacahān soldado*

<sup>11</sup> Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujeñhu tācá jniñu jeē ní cuu. <sup>12</sup> Te sutú cácujeñhu ni candutútú de nuū tāca tēe jēhnu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núū soldado jijnáhan. <sup>13</sup> Te ni cacahān de jíin:

Cahān rō jijnáhan ró jēe tēe cáscuáha jíin de ni quijicoo jecuāā, te ni catava cuñhna ndíy: un níní cáquixī rō, achi rō. <sup>14</sup> Te núu na cūni gobernador jnūhun yáha, te máá rí quiscahán rī de, návāha tú nihīn rō castigo jijnáhan ró. Achí de.

<sup>15</sup> Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijnā chi súcuan cácahān ñayuu hebreo nájñūhun ni cacahān soldado un.

### *Jeē ní tejnñū ya de nacani de jnūhun*

(Mr. 16.14-18; Lc. 24.36-49; Jn. 20.19-23)

<sup>16</sup> Te ndihúxí ñin tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. <sup>17</sup> Te nuū ní cajito de nuū yā, te ni cachiñúhún de ya. Te sava de tu cácañdije vāha de jeē máá yá cúu. <sup>18</sup> Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rī jniñu andiví jíin ñáyiví. <sup>19</sup> Núu súcuan te cuángoo nuū ñayuu tācá nación, te stéén rō jnūhun rī nuū i návāha na cándije i. Te scuándute ró i jeē ní cacandije i máá Tátá jíin Séhe jíin Espíritu Santo. <sup>20</sup> Te stéén rō nuū i jeē na cuátáhú i tācá jniñu ní ndacu rī nuū rō. Te cocuhun ni rō jeē máá rí ñe rī jíin ró ní cáni nde quiví jínu ñáyiví. Achí yá. Te ni cuu. Amén.

## JNUHUN VAHA NI TEE SAN MARCOS

### *Jñuhun Juan tēe scuándute*

(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Yáha quejéé jñuhun vâha máá Jesucristo Sêhe Yaâ Dios, jeê ní quiji ya jeê jnama ya yohó.

<sup>2</sup> Isaías, tēe ni nacani jñuhun Yaâ Dios nde jenahán, súcuan ni tee de jñuhun Juan nuū tútu:

Tají rí tēe nacani jñuhun ri cosnūú de ichi núú rō, návâha coo tūhva ñayuu jeê jinú rō, achí Yaâ Dios jíin Cristo.

<sup>3</sup> Te tēe ún cana jee de nde nuū ñúhun téhé:

Sátūhva ró máá ró jíjnáhan ró, chi quee maá Jítoho yō.

Te sáha ró jniñu ndaā, chí vēji ya, achi de.

Achí Isaías. <sup>4</sup> Te Juan ni jinú de nde nuū ñúhun téhé, scuándute de ñayuu. Te cáhán de jíin i jeê na nácani ni i jeê stóo i cuēchi i te cuandute i, návâha cone cáhnu ni Yaâ Dios nuū cuēchi i. <sup>5</sup> Te tāca ñáyuu región Judea jíin ñáyuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaâ Dios, te ni scuándute de i ini yūte Jordán.

<sup>6</sup> Te sahna ñúhun Juan cúu ixí camello, te núhni ñin cinturón ñi chīji de. Te jeê técu de cúu tíca ndicuéhyí jíin ndúxi yocō. <sup>7</sup> Te suhva ni nacani de jñuhun:

Quiji máá Yaâ cujéhu ndasí. Chi tú na vé jéhu cuiú cúu ri nuū yā, ni jeê cuajniñu ri nuū yā vesú ñin jniñu lúli gá nájnūhun jeê cuíta ndeyi ri ndají ri correa ndijēn yā. <sup>8</sup> Te ruhū chi jíin ndute scuándute ri rohó jíjnáhan ró, te Yaâ ún chi nájnūhun jeê scuándute ya rohó cúu jeê cuáha ya Espíritu Santo condee ini anuá rō, achí Juan.

### *Jeê ní jendute Jesús*

(Mt. 3.13-17; Lc. 3.21-22)

<sup>9</sup> Te ni cuu jecu quiví, te Jesús ni quenda ya ñuu Nazaret ndañú Galilea, te Juan ni scuándute de ya ini yūte Jordán. <sup>10</sup> Te ná ni quenda ya nuū ndúte, te ni jito ya jeê ní nune-ní andiví, te ni cuun Espíritu Santo ni quee xiní yā, te cáa nájnūhun ñin paloma. <sup>11</sup> Te ichi ándiví ní cahān ñin jñuhun:

Máá ró cúu Sêhe ri jeê maní ndasí rí jíin, te yōhyo cúsiñi ni rí jíin ró, achí.

### *Jeê ní jito ndee jexeén Jesús*

(Mt. 4.1-11; Lc. 4.1-13)

<sup>12</sup> Yūcuán na te ni jinū Jesús nde nuū ñúhun téhé ní sáha Espíritu Santo. <sup>13</sup> Te uū xico quiví ni condee yā nuū ñúhun téhé un núú ñin quiú yúcu. Te ni jito ndee Satanás yā, chí cúní jeê sáha ya cuēchi. Te nuū ní cujiyo Satanás cuahān, te ni quecoo ndajéhe Yaâ Dios, ni cajejniñu nuū yā.

### *Jeê ní quejéé Jesús nácani ya jñuhun*

(Mt. 4.12-17; Lc. 4.14-15)

<sup>14</sup> Yūcuán na te ná ní cachune de Juan vecāa, te ni jinū Jesús región Galilea, nácani ya jñuhun vâha ndese ndácu Yaâ Dios jniñu. <sup>15</sup> Te ni cahān yā:

Je ni jinú quiví, te je ni cuyajni jeê ndácu Yaâ Dios jniñu nuū rō. Nacani ni rō jeê stóo ró cuēchi ró jíjnáhan ró, te candíje ró jñuhun jeê jnáma ya yohó. Achí yá.

*Jeē ní cana ya cuūn tēe jn# chācá**(Mt. 4.18-22; Lc. 5.1-11)*

<sup>16</sup> Te jica Jesús yumar Galilea cuahān yā. Te ni jito ya nuū Simón jiín ñani de Andrés. Te tēe cājñi chācá cácuu de, te cásinga de ñunu de ini mar. <sup>17</sup> Te ni cahān yā jiín de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

<sup>18</sup> Yūcuán na te ni castóo-ni de ñunu de, te ni candiquīn de ya.

<sup>19</sup> Te ni jica ya jecu gā, te ni jito ya nuū Jacobo jiín ñani de Juan, sēhe Zebedeo, suni cáyūcú de ini barco de, cānachiññi de ñunu de. <sup>20</sup> Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jiín mozo de, te ni candiquīn de ya cuango de.

*Jeē ní quenehen ya tachī ini ñn tēe**(Lc. 4.31-37)*

<sup>21</sup> Te ni jinū yā jiín de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnūhun. <sup>22</sup> Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndiso jñiñu siquī ndihi. Te tēe cástéén tutu ley Yaā Dios, tu súcuan cástéén de. <sup>23</sup> Te ini vehe iī sinagoga ñuu un ñne ñn tēe jeē ñūhun tachī ini. Te ni cana cohó de:

<sup>24</sup> ¿Naun vēji ní nūū na jíjnāhan ná, Jesús ñuu Nazaret? ¿A vēji ní jēe snāā ni sáña, chí naun? Je jíní na ndé ñn cúu ní, chí Sēhe iī Yaā Dios cúu ní. Achí de.

<sup>25</sup> Te Jesús ni cahān xeēn yā jiín tachī ún:

Casi yuhu ró te quenda ró ini de, áchí yá.

<sup>26</sup> Te tachī ún xeēn ni jehni yihí tēe ún. Te ni cana cohó, te ni quenda ini de cuahān. <sup>27</sup> Te ndihi ñayuu ni cayūhú i, te cácajnūhun jñāhan i:

¿Na vé cúu jeē yáha? ¿A ñn jnūhun jéé cúu jeē yáha? Chi tēe yáha cújéhu de jeē ndácu de jñiñu nde nuū tachī te quēndacoo, áchí i.

<sup>28</sup> Te yachī ní jitē núu jnūhun Jesús cuahān ní cáhu región Galilea.

*Jeē ní nasávāha ya naná chīsó Simón Pedro**(Mt. 8.14-15; Lc. 4.38-39)*

<sup>29</sup> Te ni quenda ya jiín de jíjnāhan de ini vehe iī sinagoga. Te Jesús ni jehēn yā jiín Jacobo jiín Juan nde vehe Simón jiín Andrés. <sup>30</sup> Te naná chīsó Simón, catú ña yihí quíji ña. Te ni cacastūhún de nuū yā jeē cuhú ña. <sup>31</sup> Yūcuán na te ni quindehe ya nuū catú ña, te ni jñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayeji de jiín yá.

*Jeē ní nasávāha ya cuehē ñayuu**(Mt. 8.16-17; Lc. 4.40-41)*

<sup>32</sup> Te ni quēe niāndii te ni cuaa. Te ni quecoo ñayuu jiín táca ñáyuu cácuñū jiín jéé ñūhun tachī ini. <sup>33</sup> Te táca ñáyuu ñuu un ní cacutútú i yéhyí un. <sup>34</sup> Te ni nasávāha ya cuehē ñayuu cácuñū tijni nuū cuehyí, te ni quenehen ya cuehē tachī un cuango. Te tachī chí je cajini un yá, te tu ní jéhe ya jnūhun jee cástūhun ndé ñn cúu ya.

*Jeē ní nacani ya jnūhun región Galilea**(Lc. 4.42-44)*

<sup>35</sup> Te nehen ndasí ní ndonda ya, nde yínee gā. Te ni quenda ya cuahān sūn ya yatá ñūū nuū tú ñayuu, te yūcuan ní jícan tahú yā. <sup>36</sup> Te Simón jiín tēe cáhīn jiín de, ni jenanducú de ya. <sup>37</sup> Te ni cananihīn de ya, te ni cacahān de jiín yá:

Tāca ñáyuu cānanducú i níhīn, áchí de.



38 Te máá yá ni cahān yā:

Sa suhva na quihín yō tāca gá ñuu íne yajni, návāha suni nacani ri jñuhun nuū i, chí jeē yúcuan ní quee rī. Achí yá.

39 Te súcuan te ní jica cuu ya ní región Galilea, ní nacani ya jñuhun ini vehe íi sinagoga tācá ñuu, te ní quenehen ya tachī ini ñayuu.

*Jeē ní nasávāha ya ñn tēe ndóho cuehyī stehyú*  
(Mt. 8.1-4; Lc. 5.12-16)

40 Te ñn tēe ndóho cuehyī stehyú, ní quee de ní jecuiñī yití de nuū yā, te ní cahān de jíin yá:

Jíni na jeē cuu sáha ní jeē nduvāha ná, te núu cúní ní, áchí de.

41 Te Jesús ní cundáhú ní yā de, te ní soó yá ndaha ya siquī de, te ní cahān yā:

Cúní rī. Te na ndúvāha ró, áchí yá.

42 Te ná ní cahān yā súcuan, te ní nduvāha-ni tēe ndóho cuehyī stehyú un.

43 Yūcuán na te nátají yá de quinhun de, te ní cahān níhin ya jíin de:

44 Ma cáchi cuítí rō nuū ní ñn. Chí quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ní ndacu Moisés jniñu jenhán. Te súcuan te cuni ñayuu jeē ní nduvāha ró. Achí yá.

45 Te ní quenda de cuahān de, te ní quejé de nácani de jñuhun nuū ndihi ñayuu ndese ní nduvāha de. Te siquī yúcuan tuá ní cúu quiví Jesús tācá ñuu, chí cúchitú ndasí ñayuu nuū yā. Te ní jica ya yatā tācá ñuu nuū tu cúchitú ñayuu. Te tāca lado ní quijicoo ñayuu nuū yā.

*Jeē ní nasávāha ya ñn tēe ndóho cuehyī ní íjin*  
(Mt. 9.1-8; Lc. 5.17-26)

## 2

1 Te ní cuu jecu quiví, te ní quiví tucu Jesús ñuu Capernaum. Te ní cajini ñayuu jeē néne ya vehe. 2 Te ní cacutútú-ni cuehē ñayuu, te ní chitú vehe jeē ndé yehyí tuá núne. Te ní nacani ya jñuhun Yaā Dios nuū i. 3 Yūcuán na te ní quecoo cuñn tēe nuū yā, cándiso de ñn tēe ndóho cuehyī ní íjin. 4 Te tu ní cúu quivícoo de nuū yā siquī jeē chitú ñayuu. Te ní cacoo de siquī véhe, te ní canune de ndaā nuū íin ya, te yaū un ní cascúun de tēe cúhú, cáttú de nuū ñn camilla. 5 Te ní jini Jesús jeē cácan dije de jeē cúu nasávāha ya tēe cúhú un. Te ní cahān yā jíin tēe cúhú un:

Séhē, je íne cáhnu ní rī nuū tāca cuéchi ró, áchí yá.

6 Te yúcuan cáyucú jecu tēe cástéén tutu ley Yaā Dios, te tēe un ní cajeni ní de siquī yā: 7 ¿Naun cáhán tēe yáha súcuan? Cáhán de jñuhun ndevāha jeē quití ní Yaā Dios, chí nasūu Yáā Dios cúu de jeē cóne cáhnu ní de nuū cuéchi. 8 Te ní jini Jesús jeē súcuan cájeni ní de, te ní cahān yā jíin de:

¿Naun cájeni ní rō jeē cahán ndevāha rí? 9 Jeē uú jñuhun yáha, ¿ndé ñn yíí gá cáa? ¿A jéé cahán rī jíin tēe cúhú: Je íne cáhnu ní rī nuū tāca cuéchi ró? ¿Chí yíí gá jeē cahān rī: Ndocuiñī te naquihin ró camilla rō, te caca ró, achí rí? 10 Te vijna te na stéén rí jeē maá rí, Yaā ní nduu tēe, ndíso jniñu rí ini ñayiví yáha jeē cóne cáhnu ní rī nuū cuéchi.

Yūcuán na te ní cahān yā jíin tēe ní íjin ún:

11 Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

<sup>12</sup> Yūcuán na te ni ndocuiñi-ni tēe ún, te ni naquihin de camilla de, te ni quenda de cuahān de, jito jínūū ndihi ñayuu. Te ndivii i ni canaa ni i cájito i, te ni cacahān i jeē yóhyo váha Yaā cúu Yaā Dios. Te áchí i:

Ná tu coto cuíti yō ni ñn jniñu súcuan, áchí i.

*Jeē ní cana ya Levi*

(Mt. 9.9-13; Lc. 5.27-32)

<sup>13</sup> Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jnūhun nuū i. <sup>14</sup> Yūcuán na te ni yāha ya cuahān yā, te ni jito ya nuū Levi sēhe Alfeo, néne de nuū cutútú xūhun renta. Te ni cahān yā jiín de:

Condiquīn ruhū na quihín yō.

Te ni ndocuiñi de, te cuahān de jiín yá.

<sup>15</sup> Yūcuán na te ni jehēn yā ni yeji yā staā vehe de. Te cuehē tēe cástútú xūhun renta jiín inga tēe cásaáa cuēchi, suni cáyucú de cáyeji de staā jiín Jesús jiín tēe cáscuáha jiín yá, chí iyó cuehē de jeē cándiquīn de ya. <sup>16</sup> Te tēe cástéén tutu ley Yaā Dios jiín tēe grupo fariseo, ni cajito de jeē véji yā staā jiín ndihi tāca tēe ún. Te ni cacahān de jiín tēe cáscuáha jiín yá:

¿Naun véji maestro rō jiín tēe cástútú xūhun renta jiín inga tēe cásaáa cuēchi? áchí de.

<sup>17</sup> Te ni jini Jesús, te ni cahān yā jiín de:

Ñayuu cáhiyo váha, tu jini ñuhún i tēe tájna, chí ñayuu cácuñu cúu jeē jini ñuhún. Te ruhū nasūu jēe véji ri cana ri ñayuu tú cuēchi, jeē cúu i nájñuhun ñayuu cáhiyo váha. Chí sa suhva véji ri cana ri ñayuu cáhiyo cuéchi, jeē na nácani ni i te stóo i cuēchi i. Áchí yá.

*Jeē ní cacajñuhún de ya siquī jeē cóndite ni*

(Mt. 9.14-17; Lc. 5.33-39)

<sup>18</sup> Te ni cuu ñn quivī jeē cáhiyo ndite ni tēe cáscuáha jiín Juan, jiín tēe cáscuáha jiín grupo fariseo. Te ni quecoo jecu tēe, ni cacahān de jiín Jesús:

Tēe cáscuáha jiín Juan jiín jēe cascuáha jiín grupo fariseo, tijni jínu cáhiyo ndite ni de. Te tēe cáscuáha jiín máá ní, ¿naun tu cásaáa de súcuan?

<sup>19</sup> Te ni cahān Jesús jiín de:

¿A cuu condite ni de níni jēe iyó rí jiín de? ¿A cuu condite ni ñayuu cáhiin vico nándāha, te núu níni néne tēe nándāha? Chí núu néne tēe nándāha, te ma cúu condite ni i. <sup>20</sup> Te quee quivī jeē cújiyo tēe nándāha, te quivī ún chí condite ní i.

<sup>21</sup> Te ni cahān yā uū jnūhun yátá síquī jeē tu quíjnáhan jnūhun jeé jēe steén yā jiín táca jnūhun jenahán. Áchí yá:

Ni ñn tu náchuhun ñn pedazo sahma jēe núu ñn sahma túhú. Chí núu súcuan te ndiyi pedazo jeé un, te tahndē gā jeé tuhú un, te nducáñnu ga nuū cátañndé un. <sup>22</sup> Te suni tu cáchuhun vino jeé ini ññ túhú. Chí núu súcuan te vino jeé un ndatá ññ ún, te naa vino jiín ññ. Jeé yúcuan cánuú jēe chúhun i vino jeé ini ññ jéé.

*Jeē ní cataxín de yoco trigo quivī ndétātu*

(Mt. 12.1-8; Lc. 6.1-5)

<sup>23</sup> Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jiín yá, cájica de cuahān de, te ni quejéé de cátaxín de yoco trigo cáyeji de. <sup>24</sup> Yūcuán na te tēe grupo fariseo ni cacahān de jiín yá:

Condēhē. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñn jniñu quivĩ ndétátú. Achí de.

<sup>25</sup> Te ni cahān maá yá jíin de:

¿A tu ní cácahu cuiti rō tutu ndese ni sáha David, ñn quivĩ ní cumani jeē cáji de, te ni jíi de sōco jíin tēe cáhīn jíin de? <sup>26</sup> Te ni quivĩ de ini vehe Yaā Dios. Te Abiatar ni cuu sutū kujēhu ga. Te ni yeji de pan ñi jeē yosó ndijin nuū Yaā Dios. Te tú na ley jeē cáji ni ñn tēe, chí máa-ni sutū cuu caji. Te suni ni jehē de ni cayeji tēe cáhīn jíin de. Te tú na cuēchi ní íyo siquĩ de. Achí yá.

<sup>27</sup> Te suni ni cahān yá jíin de jíjnáhan de:

Tu ní jéconaa ñayuu jeē ndóho i nuū quivĩ ndétátú, chí ni jeconaa quivĩ un jéē ndétátú i. <sup>28</sup> Núu súcuan te ruhū, Yaā ní nduu tēe, máa rí cúu jeē ndácu jniñu siquĩ ndese sáha ñayuu quivĩ ndétátú, áchí yá.

*Jeē ní nduvāha tēe ni ichĩ ndaha*  
(Mt. 12.9-14; Lc. 6.6-11)

### 3

<sup>1</sup> Te ni quivĩ tucu Jesús ini vehe ñi sinagoga. Te yūcuan íne ñn tēe ni ichĩ ñn ndaha de. <sup>2</sup> Te tēe grupo fariseo cájito yuhu de ya núu nasávāha ya tēe un quivĩ ndétátú, návāha nihīn de cuēchi siquĩ yā. <sup>3</sup> Yūcuán na te ni cahān yá jíin tēe ni ichĩ ndaha ún:

Ndocuĩñi te condichi rō mēhñu yáha, áchí yá.

<sup>4</sup> Te ni cajñuhun yá de jíjnáhan de:

¿Ndesē cáhán ley siquĩ quivĩ ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéē cúu i? áchí yá.

Te máa de tú na vé ni cacahān de. <sup>5</sup> Te ni quivĩ ni yá ni jito ya nuū de jíjnáhan de, te ni cucuhyá ni yá jeē nihni ni de. Te ni cahān yá jíin tēe ni ichĩ ndaha:

Scáá ndaha ró.

Te ni scaá de, te ni nduvāha-ni ndaha de. <sup>6</sup> Yūcuán na te ni quendacoo tēe grupo fariseo, te ni casquijnáhan de jñuhun jíin tēe grupo Herodes siquĩ yā, ndese cahni de ya.

*Jeē ní quecoo cuehē ñayuu nuū yá yumar*

<sup>7</sup> Te Jesús cuahān yá nde yumar jíin tēe cáscuáha jíin yá. Te cuehē ñayuu región Galilea ni candiquĩn i ya. <sup>8</sup> Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jñuhun i jniñu jéhu ni sáha ya, te ni quecoo i nuū yā. <sup>9</sup> Te ni cahān yá jíin tēe cáscuáha jíin yá jeē na cóo túhva ñn barco quivĩ ya, návāha ma chitú nihin ñayuu cuehē ún xiin ya. <sup>10</sup> Chi cuehē ñayuu je ni nasávāha ya, te jeē yūcuan vējicoo cuehē gā ñayuu cándoho táca núu cuehyĩ, te chitú nihin i xiin ya jeē quehé i ya cácuni i. <sup>11</sup> Te ñayuu cáñuhun tachí ini, núu ni cajito nuū yā, te cájecuĩñi yití núu yā, te cácana cóhó:

Máa ní cúu Sēhe Yaā Dios, achí.

<sup>12</sup> Te ni ndacu nihin ya nuū tachí un jéē ma cáhán gā jeē cúu ya Sēhe Yaā Dios.

*Jeē ní nacāji ya uxĩ uū tēe apóstol*  
(Mt. 10.1-4; Lc. 6.12-16)

<sup>13</sup> Yūcuán na te ni caa ya cuahān yá ñn yucu. Te ni cana ya táca tēe jeē cuní maá yá caca jíin yá, te ni quecoo de nuū yā. <sup>14</sup> Te ni jeni ya uxĩ uū de jeē cuĩñi de jíin yá, te tají yá de quingoo de nacani de jñuhun. <sup>15</sup> Te ni sáha ya

jeē cóndiso jníñu de nasávāha de ñayuu cuhú te quenehen de tachī ini ñayuu. <sup>16</sup> Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. <sup>17</sup> Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nājnūhun yíhi fuerza taja. <sup>18</sup> Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, <sup>19</sup> jíin Judas Iscariote, tēe jeē ní nastúu de ya.

*Jeē ní cacahān ñayuu jeē jejnīñu ya fuerza Satanás*  
(Mt. 12.22-32; Lc. 11.14-23; 12.10)

Yūcuán na te ni quīvi ya ñn vehe jíin tēe cáscuáha jíin yá un. <sup>20</sup> Te ni ndutútu tucu cuehē ñayuu, te ni tuá ni cúu caji yā staā jíin de. <sup>21</sup> Te tāca jnāhan vehe ya ni cajini jnūhun jeē súcuan cúu. Te ni quecoo de venūquīhin de ya. Chi cacahān de jeē ní sana xinī yā.

<sup>22</sup> Te suni tēe cástéén tutu ley Yāā Dios jeē ní quijicoo nde ñuu Jerusalén, ni cacahān de:

Tēe yāha ñūhun Satanás ini de, jeē cujēhnu nuū tachí. Te jíin fuerza un quēnehen de tachī, achí de.

<sup>23</sup> Te ni cana ya de jíjnāhan de, te ni cahān yā ñn jnūhun yátá jíin de:

¿Ndese cuu quenehen Satanás máá? <sup>24</sup> Chi núu ñn nación sásñn máá te cuajnáhan máá, nación un má cúu ga coyūcu cáhnu. <sup>25</sup> Te núu ñayuu ñn vehe sásñn máá te cuajnáhan máá, ñayuu un má cúu ga coyūcu cáhnu. <sup>26</sup> Te suni súcuan Satanás jíin jnāhan tachī, chi núu sásñn máá te cuajnáhan máá, núu súcuan te ma cóo ga, chi sa suhva naa.

<sup>27</sup> Te ni ñn tēe ma cúu quīvi de ini vehe tēe ndacuī jeē quenehen de ndajníñu de. Chi cánuú jeē xihna gā cuhni de tēe ndacuī ún. Te suni súcuan cúu jeē jíhni rī Satanás te quēnehen rī tachí.

<sup>28</sup> Te jendaá cahán rī jíin ró jeē iyó modo coo jnūhun cáhnu ni nuū tāca cuéchi cásáha ñayuu, te suni nuū tāca jnūhun néé cacahān i. <sup>29</sup> Te núu cahān ndevāha i siquī Espíritu Santo, te ma cóne cáhnu ni Yāā Dios nuū i, chi sa suhva condee cuéchi siquī i ní cáni, áchí yá.

<sup>30</sup> Súcuan ni cahān yā, chi ni cacahān i jeē quēnehen ya tachī jíin fuerza Satanás.

*Náná yā jíin ñani yā*  
(Mt. 12.46-50; Lc. 8.19-21)

<sup>31</sup> Yūcuán na te ni quee naná yā jíin táca ñani yā. Te lín ña nuū quéhe, te ni tají ña jnūhun cuahān nuū yā jeē cána ña ya. <sup>32</sup> Te ñayuu cáyūcu ní xiin ya, ni cacahān i jíin yá:

Náná ni jíin táca ñani ni cáhñn nuū quéhe, te cácuni cahān jíin ní, áchí i.

<sup>33</sup> Te ni cahān máá yá:

¿Ndé ñn cúu náná rī jíin ñani rī? achí yá.

<sup>34</sup> Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñáyuu yáha. <sup>35</sup> Chi tāca ñáyuu casquícú jniñu cúni Yāā Dios, suu cácuu ñani rī, cuāha ri, náná rī, achí yá.

*Jnūhun yátá siquī tēe jéte trigo*  
(Mt. 13.1-9; Lc. 8.4-8)

## 4

<sup>1</sup> Te yumar ni quejéé tucu Jesús steén yā jnūhun. Te ni cutútú cuéhē ndasí ñáyyu nuū yā, te jeé yúcuan ní quívi ya ni cucōo ya ini ñin barco nuū mar. Te tāca ñáyyu un cāyūcú i yumar. <sup>2</sup> Te jíin jnūhun yátá ni steén yā cuehē jnūhun nuū i, te súcuan ni cahān yā:

<sup>3</sup> Cuni nahín jíjnāhan ró: ñin tēe cate trigo, ni quenda de jeé cáte de. <sup>4</sup> Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tí. <sup>5</sup> Te jecu gā trigo ni jité nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun. <sup>6</sup> Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup> Te jecu gā trigo ni jité nuū náne iñu. Te ni jehnu iñu ún, te ni jesi nuū, te tu ní jéhe nunī. <sup>8</sup> Te jecu ni jité nuū ñūhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeé ñin ñin nunī, te sava ga ni jéhe unī xico, te sava ga ni jéhe ciento. Achí yá.

<sup>9</sup> Yūcuán na te ni cahān yā jíin de:

Tāca rōhó jéé jíni sōho, na chúsóhó ró. Achí yá.

*Najehē cahān yā máni jnūhun yátá*

*(Mt. 13.10-17; Lc. 8.9-10)*

<sup>10</sup> Yūcuán na te ni quendōo máa na yā, jíin ndihúxi uū tēe cáscuáha jíin yá, jíin jecu gā ñáyyu cáhīin jíin de. Te ni cacajñuhún de ya na vé cuni cahān jnūhun yátá un. <sup>11</sup> Te ni cahān yā jíin de:

Róhó, chi sáha Yaā Dios jeé cájecūhun ni rō jnūhun ni yisáhi yáha, ndese quívicoo ñayyu ndaha ya ndacu ya jniñu nuū i. Te ñayyu jeé cáhīin sñin siquī, chi máni jíin jnūhun yátá cáhān rī tāca jnūhun jíin i. <sup>12</sup> Súcuan cáhān rī návaaha vesú cájito i, te quendōo i nájñuhun jeé tú na vé ni cájito i. Te vesú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, achí yá.

*Jeé ní castūhun cájī yá jnūhun yátá téé jéte trigo*

*(Mt. 13.18-23; Lc. 8.11-15)*

<sup>13</sup> Te ni cahān gā yā jíin de jíjnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gā jnūhun yátá núu súcuan? <sup>14</sup> Tēe jéte trigo cúu tēe scuíté núu jnūhun Yaā Dios. <sup>15</sup> Te trigo jeé ni jité yuhíchi cúu nájñuhun ánuá sava ñayyu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. <sup>16</sup> Te trigo jeé ni jité nuū ñūhun yuū, chi cúu nájñuhun ánuá sava ñayyu cájini nahín jnūhun, te yachī-ni cájetáhú i te cácusñ ni i jíin. <sup>17</sup> Te tu cúcutú jnūhun ún ini anuá i, te jecu-ni quívi cájetáhú i. Te núu ni quejéé jnúndóho, chí jito xeēn ñayyu i siquī jnūhun ún, te quejéé nácani yátá ni i. <sup>18</sup> Te jeé ni jité nuū náne iñu cúu nájñuhun jecu gā ñayyu. Chi vesú ni cajini sōho i, <sup>19</sup> te cándihvi ni i siquī jeé iyó ini ñayvi yáha. Te cácuni i cucúcá i, te stáhú un i jeé cutóo ni i siquī táca ndajniñu. Te ndihí jeé yáha cácuñéñu i jíin, te jesi nuū jnūhun ya, te tu íje i jíin jnūhun ya. <sup>20</sup> Te trigo jeé ni jité nuū ñūhun váha cúu nájñuhun ñayyu cájini nahín jnūhun, te cájetáhú i, te cáhije i jíin jnūhun ya. Te sava i cúu nájñuhun nunī jeé jéhe ocō uxī jeé ñin ñin, te sava i jéhe unī xico, te sava ga i jéhe ciento. Achí yá.

*Jnūhun yátá siquī lámpara*

*(Lc. 8.16-18)*

<sup>21</sup> Suni ni cahān yā jíin de:

Núu nástáin ñayuu ñn lámpara, ¿a chüne i chíji ñn cajón chí chíji jito? Tuú, chí jéni i nuú sucún návaha cundijin. <sup>22</sup> Te suni súcuan, tu iyó ni ñn jñuhun sáhi jéé ma cúni ñayuu, chí ndíhi táca jñuhun natúu ndijin te cuni ñayuu. <sup>23</sup> Táca róhó jéé jíni sôho, na chúsóhó ró, áchí yá.

<sup>24</sup> Te suni ni cahán yā jíin i:

Cuni sôho vāha ró. Chí cūhva jeé chusóhó ró jñuhun Yaā Dios, suni cūhva un cuāha ya nuú rō, te vīhyá gā cuāha ya nuú maá ró jeé chusóhó vāha ró. <sup>25</sup> Chí ñayuu je jécūhun ni, stéén gā yā nuú i. Te ñayuu tu cándíje, máá jecu jeé jíni i ún, sa suhva naa. Achí yá.

*Jñuhun yátá síquī trigo jeé jéhu*

<sup>26</sup> Te ni cahán gā yā:

Súcuan cúu jeé ndácu Yaā Dios jniñu nuú ñayuu: Cúu nájñuhun trigo jeé ní jete ñn tēe. <sup>27</sup> Yūcuán na te quíxí de te ndóna de, te súcuan jíca quiví cuahán. Te trigo un cáne te jéhu. Te máá de tu jíni de ndese cúu jeé jéhu. <sup>28</sup> Chí máá ñuhun sáha jeé jéhu trigo, xihna gā yucū, sáá te cáne yoco, yūcuán na te íje máá núni. <sup>29</sup> Te núu ni cuaan trigo un, te quéjéé ñayuu cájehnde i, chí je ni jinú quiví tahndé. Achí yá.

*Jñuhun yátá síquī ndiquin mostaza*  
(Mt. 13.31-32; Lc. 13.18-19)

<sup>30</sup> Te suni ni cahán yā:

Na cáhán rī ñn jñuhun yátá návaha cuni rō ndese ndúcuehē ñayuu jeé ndácu Yaā Dios jniñu nuú. <sup>31</sup> Ndúcuehē i nájñuhun jéhu ñn ndiquin mostaza jeé jéquin i nuú ññuhun. Te yūcuán cúu ñn ndiquin lúli gá vésú táca ndiquin jeé iyó. <sup>32</sup> Te ná ni jequin i, te cáne te jéhu ga vésú táca gá yucū, te cúnáhu ndaha. Te táca saa chí sáha tí tacá tí nuú cuándahū xiní ún. Achí yá.

*Jeé máni jñuhun yátá cáhán yā jíin i*  
(Mt. 13.34-35)

<sup>33</sup> Te cuehē jñuhun yátá súcuan ni cahán yā jíin ñayuu, núu nasaa cánda i jecūhun ni i. <sup>34</sup> Te táca jéé ni stéén yā, máni máá jñuhun yátá ní cahán yā jíin i. Te nuú tēe cáscuáha jíin yá chí ni nacastūhun cáji yá jñuhun ún.

*Jeé ní jecuíñī tachī ñhin jíin mar ni sáha ya*  
(Mt. 8.23-27; Lc. 8.22-25)

<sup>35</sup> Te jeé cuácuaa quiví ún, te ni cahán yā jíin tēe cáscuáha jíin yá:

Na yáha yó quíhīn yō inga lado mar, achí yá.

<sup>36</sup> Te ni casquéndō de ñayuu cuehē ún, te ni quívicoo de ini barco nuú je íne Jesús, cuango de jíin yá. Te suni cuango jecu gā barco jíin de jíjnáhan de. <sup>37</sup> Te ni jecuíñī ñn tachī ñhin, te ni stóna ndute mar, te ni quiví ini barco. Te je yajni chítú ndute ini barco. <sup>38</sup> Te Jesús cátú yá yatá de ini barco, quíxí yā te yíhi ñn sahma cástíhi xiní yā. Te ni castóna de ya, te ni cacahán de:

Maestro, ¿a tu sáha ní cuenta jeé quée yó chíji ndute te cuu yō? achí de.

<sup>39</sup> Te ni ndocuíñī yā, te ni cahán yā nuú tachí ñhin un jíin núu mar:

Jecuíñī te nayúú-ni coo ró, achí yá.

Te ni jecuíñī tachí, te ni cuu nayúú í-ni. <sup>40</sup> Te ni cahán yā jíin de jíjnáhan de: ¿Naun cáyūhú ndasí ró? ¿Naun tu cándíje ró jéé cácu ró sáha rí?

<sup>41</sup> Te yōhyo ni cayūhú de, te ni cacahán de jíin jnáhan de:

¿Ndé ñn ga cúu tēe yáha jéé nde tachí ñhin jíin mar cájetáhú jéé cahán de? achí de.

*Tēe Gadara jeē ndóho tachī  
(Mt. 8.28-34; Lc. 8.26-39)*

## 5

<sup>1</sup> Te ni jinū Jesús jín de jínáhan de inga lado mar, región Gadara. <sup>2</sup> Te ná ni quenda ya ini barco un, te in tēe ñuhun tachī ini, ni quenda de nde nuū yíndūji ndīyi, te ni quee de nuū yā. <sup>3</sup> Tēe un ndéé de nuū yíndūji ndīyi. Te tu jéjníñu jeē jíñni ñayuu de, ni jíñ cadena. <sup>4</sup> Chi cuehē jínu ni conuhnī jehē de ndaha de jíñ cadena. Te tāca jínu jéhnde de, te sácuéché de. Te tú ni in cúndeyí jíñ de. <sup>5</sup> Te nduú ñuū jíca de yucu jíñ núū yíndūji ndīyi, te cána cóhó de, te stújí de máa de jíñ yúū. <sup>6</sup> Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. <sup>7</sup> Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéñu téyí? Cáhán ndahú ná jíñ ní, jíni nahín Yaā Díos, ma stóho ní sáña, áchí de.

<sup>8</sup> Súcuan ni cahān de, chi je ni cahān Jesús:

Táchī, quenda ini tēe yáha quihín rō.

<sup>9</sup> Te ni cajñuhun yá de:

¿Na vé nani ró?

Te ni cahān de:

Legión nani ná, chi cuehē tachī ñuhun ini ná, áchí de.

<sup>10</sup> Te ni cahān ndahú ndasí de jíñ yá jeē ma tájí yá tachī quendacoo región ún. <sup>11</sup> Te yajni yucu yúcuan cáhlin cuehē quini cájitu ti. <sup>12</sup> Te tachī jeē ñuhun ini tēe un ní cacahān ndahú jíñ yá:

Núu tají ní sáña, te cuáha ní jñuhun quivicoo ná ini quini yūcuán, áchí.

<sup>13</sup> Te Jesús ni jēhe ya jñuhun. Te ni quendacoo tachī ún ini tēe ún, te ni quivicoo ini quini, te iyó nájñuhun uū mīl ti. Te quini un ní cajinu ti ni ñingoo ti in yucáva, ni quivicoo ti nuū mar. Te ni ndaquihí ti ndute, ni cajihí ti.

<sup>14</sup> Te tēe cándito ti, ni cajinu de cuango de jeē ní cayuhú de. Te ni jinūcoo de ni cacastühún de nuū ñayuu ñuu un jíñ ñayuu tāca rancho. Te cuango ñayuu un cuácondēhé i na vé ni cuu. <sup>15</sup> Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñuhun de sahma, te je ni nducájí xíní de. Te ni cayuhú ñayuu ún. <sup>16</sup> Te tēe ní cajito, ni canacani de jñuhun nuū ñayuu, ndese ni nduváha tēe ni ñuhun tachī ini, jíñ ndese ni candoho quini ún. <sup>17</sup> Yūcuán na te ni caquejéé i cacahān ndahú i jíñ yá jeē na cújiyo ya región yūcuan quihín ya.

<sup>18</sup> Te ni ndīvi ya ini barco. Te tēe ni ñuhun tachī ini un ní cahān ndahú de jíñ yá jeē na cuáha ya jñuhun quihín de jíñ yá. <sup>19</sup> Te Jesús tu ní jēhe ya jñuhun, chi ni cahān yá jíñ de:

Cuánuhun vehe ró núū jñahan ró, te nacani ró jñuhun nuū i ndese yōhyo jéñu jniñu ni sáha máa Jítóho rō jíñ ró, te ndese ni cundáhú ni yā rohó, áchí yá.

<sup>20</sup> Te ni quenda de cuahān de, te ni quejéé de nácani de jñuhun tācá ñuu Decápolis ndese yōhyo jéñu jniñu ni sáha Jesús jíñ de. Te ndivii ñayuu un ní canaa ni i cájini nahín i.

*Jñuhun sēhe sñí Jairo jíñ ñahan ní quehé yusáhma ya  
(Mt. 9.18-26; Lc. 8.40-56)*

<sup>21</sup> Te ni nayáha tucu Jesús cuanuhun yá inga lado mar jíñ barco. Te ni quecoo cuehē ñayuu nuū yā, nuū íne ya yumar. <sup>22</sup> Te ni quee in tēe cújéñu

ini vehe iī sinagoga, naní de Jairo. Te ná ni jito de nuū yā, te ni jecuiñī yití de nuū jehé yā. <sup>23</sup> Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquī i nāvāha na ndúvāha i te cotecu i, áchí de.

<sup>24</sup> Yūcuán na te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuango i. <sup>25</sup> Te mēhñu ñayuu un cuahān iñ ñahan cūhú, jeē ní cuu uxí uū cuiyā ndóho ña cuehyī niñī. <sup>26</sup> Te yōhyo ni ndoho ña, chí ni jexin ña tāca jéē névāha ña jíin cuehē tēe tájná, te tu ní jéjníñu jeē ndúvāha ña, chí sa suhva víhyá gā sáha. <sup>27</sup> Te ñahan yáha ná ni níhín ña jñūhun Jesús, te ni quee ña ichi yátá yā mēhñu ñayuu cuehē ún, te ni quehé ña yusáhma ya. <sup>28</sup> Chí ni jeni ní ña: Vésú maá sahma ya na níhín rī quehé rí, te nduvāha rī, jení ní ña. <sup>29</sup> Te ni jecuiñī-ni niñī ña, te ni jini ña jeē ní nduvāha ña cuehyī ún. <sup>30</sup> Te Jesús ni jini yā jeē ní nduvāha iñ ñayuu jíin fuerza yā. Te ni ndió cóto ya nuū ñayuu cuehē, te ni cahān yā:

¿Ndé iñ ni quehé sahma rī? Achí yá.

<sup>31</sup> Te tēe cáscuāha jíin yá, ni cacahān de:

Jíto ní jéē ñayuu cuehē yāha ní chitú níhin i xiin ní te cáquīhi i níhín ní cáni ichi, te cájnūhun ní ndé iñ ni quehé sahma ní.

<sup>32</sup> Te maá yá jíto ya cháha chúcuán, cúní yā jeē na cáchi ñayuu ní sáha. <sup>33</sup> Te ñahan un yúhú ña te quísi i ña, te je jíiní ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndihí ndese ni cuu jíin ña. <sup>34</sup> Te ni cahān yā jíin ña:

Séhe, ní candíje ró jéē cuu nasávāha rī rohó, te jeē yúcuán ní nduvāha ró. Cuahán te na ndúsī ni rō, chí je ni nduvāha ró cuehyī ní ndoho ró, áchí yá.

<sup>35</sup> Te níiní cáhán gā yā súcuán, te ni quecoo ñayuu cáyucú vehe tēe cújéhu ini vehe iī sinagoga, te ni cacahān i jíin de:

Je ni jihí sēhe síhí ní. Te ma sajnēñu ga ní Maestro, achí i.

<sup>36</sup> Te Jesús tu ní sáha ya cuenta jeē súcuán cácahān i, te ni cahān yā jíin tēe cújéhu ini vehe iī sinagoga:

Ma yūhu ró, chí candíje ró jéē nastécu rī i, áchí yá.

<sup>37</sup> Te tu ní jéhe ga yā jñūhun condiquīn ñayuu yā, chí maá-ni Pedro jíin Jacobo, jíin Juan ñani Jacobo. <sup>38</sup> Te ní jinū yā vehe tēe cújéhu ini vehe iī sinagoga, te ni jito ya ñayuu, cácuvaā i, te cándahyū i, te cácana cóhó i. <sup>39</sup> Te ní quīvi ya, te ni cahān yā:

¿Najehē yōhyo cásvaā rō te cándahyū rō? Sūchi síhí yáha, tu ní jihí i, chí quíxí-ni i, áchí yá.

<sup>40</sup> Te ni cajecū catá i jeē ni cahān yā. Te ni quenehen ndihí ya i cuahān i nuū quehé. Te ni cana ya maá-ni tátá jíin náná sūchi síhí un, jíin tēe cáhīn jíin yá, te ni quīvi ya jíin de nuū catú sūchi síhí ní jihí ún. <sup>41</sup> Te ni jñī ya ndaha i, te ni cahān yā jíin i:

Talita cumi, achí yá. Te jñūhun un cúní cahān: Síhí, cáhán rī jíin ró, ndocuiñī, achí yá.

<sup>42</sup> Te ni ndocuiñī-ni sūchi síhí un, te ni nacaca i, chí je íyó i uxí uū cuiyā. Te yōhyo ní canaa ni ñayuu cájito i. <sup>43</sup> Te ni ndacu níhin ya jñīñu nuū i jíjnāhan i jeē ma cáchi cuítí i nuū ní iñ. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret  
(Mt. 13.53-58; Lc. 4.16-30)*



## 6

<sup>1</sup> Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuango de jíin yá. <sup>2</sup> Te máá quivī ndétatu ní steén yā jñuhun ini vehe ñi sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutúhva tēe yáha táca jñuhun yáha? ¿Te ndese cúu jeē cahán de jñuhun ndichí yáha jíin jeē sáha de jñiñu jéhu yáha? <sup>3</sup> Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yāhá. Achí i.

Te súcuan ni cacujēē ni i nuū Jesús. <sup>4</sup> Te ni cahān yā jíin i:

Táca tēe nácani jñuhun Yaa Dios, íyó yñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yñúhún jíin de. Achí yá.

<sup>5</sup> Te tu ní cúu sáha ya cuehē jñiñu jéhu yūcuán. Chi jecu-ni ñayuu cácuñi ni soó yá ndaha ya siquī i, te ni nasávaha ya i. <sup>6</sup> Te náa ni yā jíto ya jeē tu cácañje ñayuu jijnáhan i. Yūcuán na te ni jica cuu ya táca ñuu yajni, ni steén yā jñuhun.

*Jeē ní tají yá ndihúxí uū de cuanacani de jñuhun*

(Mt. 10.5-15; Lc. 9.1-6)

<sup>7</sup> Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jñiñu de quenehen de tachí ini ñayuu. <sup>8</sup> Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xuhún. Chi máá vara-ni condahá de. <sup>9</sup> Te quihí de ndijēn, te ma quihín de jíin uū sahma, áchí yá. <sup>10</sup> Te suni ni cahān yā jíin de:

Na-ni vehe núu ni quivícoo ró, te yūcuán coyūcu ró ndé quenda tucu ró quihín ró inga ñuu. <sup>11</sup> Te núu ñiñ ñuu tu cájetáhú i róhó, ni tu cúní i cuni nahín i jñuhun cahān rō, na quéndacoo ró yúcuan, te sócío ró tícachā jehē rō, te súcuan steén rō jeē íyó cuéchi i jeē tu ní cájetáhú i. Jendaá cahán rī jíin ró jeē quiví coo juicio te xeñ gā coo castigo siquī ñuu cásaña súcuan vēsú siquī ñuu Sodoma jíin ñuu Gomorra nuū ní casáha ndasí ñáyuu cuéchi.

<sup>12</sup> Te ni quendacoo de cuahān de, te ni canacani de jñuhun jeē na nácani ni ñayuu jeē stóo i cuéchi i. <sup>13</sup> Te suni ni caquenehen de cuehē tachí ini ñayuu. Te ní cachihí de aceite cuehē ñayuu cácuñi, te ní canduváha i.

*Jeē ní jihí Juan tēe scuándute*

(Mt. 14.1-12; Lc. 9.7-9)

<sup>14</sup> Te rey Herodes ní jini jñuhun de jñuhun Jesús, chí ni jité núu jñuhun ya ñi cáhnu. Te ní cahān de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jñiñu jéhu. Achí de.

<sup>15</sup> Te sava ga ñayuu ni cacahān i:

Tēe un cúu Elías jeē ní nácani jñuhun jenahán.

Te sava ga i ni cacahān:

Tuú chí ñiñ tēe nácani jñuhun Yaa Dios cúu de, nájñuhun tēe ni canacani jñuhun ya nde jenahán, áchí i.

<sup>16</sup> Te ná ni jini Herodes, te ni cahān de:

Tuú chí yúcuan cúu Juan jeē ní ndacu ri jñiñu ni tahndē xiní, te ni natecu de núu súcuan, áchí de.

<sup>17</sup> Chi máá Herodes ní ndacu de jñiñu jeē na quiví Juan vecāa, jíin jéē na cónuñi de jíin cadena. Súcuan ní sáha de jeē siquí Herodías, ñasihí ñani de Felipe. Chi Herodes ní quihin de ña jeē cúu tucu ña ñasihí de. <sup>18</sup> Te Juan ni cahān de nuū Herodes:

Tu iyó ley jeē cóndeca ró ñasihí ñani rō, achí de.

<sup>19</sup> Te jeē yúcuán Herodías ni jito uhū ña Juan, te cúní ña jeē na cúū de, te tu ní níhín ña modo. <sup>20</sup> Chi Herodes yuhú de cahni de Juan, chi jíní de jeē tēe ndaa tēe ndoo cúū Juan. Te jeē yúcuán ní jesi de jeē nducú ña jeē cúū Juan. Te núnjahan ni de jíní nahín de jñūhun cáhán Juan, vēsú tu jécūhun vāha ni de. <sup>21</sup> Te ni quee ñin quiví jeē ní cundeyí Herodías. Chi ní sāha Herodes ñin vico quiví ní cacu de, te ni jēhe de jeē ní cacuxíni tēe cándiso jñíñu nuū de, jíin tēe cácuu capitán, jíin tēe cácujeñnu región Galilea. <sup>22</sup> Te ni quiví sēhe síhí máá Herodías, ni jita jéhé i nuū chitú un. Te ni cacusí ni rey Herodes jíin tēe cácuíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

<sup>23</sup> Te ni cahān teyí de jeē cuāha de núu na vé cuní i cacān i, vēsú nde sava región jeē yñi ndaha de. <sup>24</sup> Te ni quenda i, ni jecajñuhún i náná i:

¿Na vé cacān na núū de? áchí i.

Te ni cahān ña:

Xiní Juan tēe scuándute cacān rō nuū de, áchí ña.

<sup>25</sup> Yūcuán na te ni ndīvi-ni i nuū rey, te ni cahān i:

Cúní na jēē vijna ñuhún-ni cuāha ní xiní Juan tēe scuándute, cone nuū ñin cohō, achí i jíin de.

<sup>26</sup> Yūcuán na te ni cucuíhyá ndasí ni rey un jeē ní cundeyí Herodías jeē cúū Juan. Te siquí jeē ní jéjnūhun téyí de, jíin jēē ní cajini sōho tēe cáyeji staa jíin de, jeē yúcuán tu ní cúní de sásáhán de jeē ní jícān i. <sup>27</sup> Te ni tají-ni de ñin soldado jeē quíquihín de xiní Juan. <sup>28</sup> Te ni jehēn soldado un vecāa, te ni jehnde de xiní Juan. Te ni quee de jíin xiní Juan, ñe nuū ñin cohō. Te ni jēhe de nuū súchi síhí un, te máá i ni jēhe i nuū naná i.

<sup>29</sup> Te tēe cáscuáha jíin Juan ni canihín de jñūhun, te ni jengoo de, ni candonehen de yiquí cúñu Juan, te ni cachindūji de.

### *Jeē ni scáji yā uhūn mīl tēe*

*(Mt. 14.13-21; Lc. 9.10-17; Jn. 6.1-14)*

<sup>30</sup> Yūcuán na te tēe cácuu apóstol jeē ní tají yā cuangoo nacani jñūhun, ni ndecoo de nuū Jesús. Te ni canacani de nuū yā táca jñiñu ni casáha de, jíin jñūhun ni castéed de. <sup>31</sup> Te ni cahān yā jíin de:

Na quíngoo yó ñin lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní nūne ya jeē caji yā staa jíin de. <sup>32</sup> Yūcuán na te ni quiví ya ñin barco jíin táca tēe apóstol un, te cuangoo ñin ya jíin de ñin lugar nuū tú ñayuu. <sup>33</sup> Te cuehē ñayuu ní cajito i jeē cuahán yā jíin de, te ni canacuni i jeē máá yá cúu. Te nde táca ñuu ní quendacoo i, te yachí cuangoo i, te xihna gā i ni jinūcoo vēsú máá yá. <sup>34</sup> Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chí cúu i nájñūhun lanchí jeē tú jitohó tē. Te ni steén yā cuehē jñūhun nuū i. <sup>35</sup> Te nuū ní ini, te tēe cáscuáha jíin yá, ni queeco de nuū yā, te ni cacahān de:

Je ni ini, te yāhá chí tú na ñayuu yúcu. <sup>36</sup> Núu súcuán te tají ní ñayuu na quíngoo i táca rancho jíin ñuu yajni, te cuaan i staa caji i, chí tú na vé cándiso i caji i, achí de.

<sup>37</sup> Te ni cahān Jesús jíin de:

Cuāha máá ró jeē caji i, achí yá.

Te ni cacahān de:

¿Te ndese cuu? Chi ni ma cúu vēsú núu quicuáan ná ndé uū ciento denario staa caji ñayuu, achí de.

38 Te ni cahān yā jiín de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jiín uū chācá íyó, áchí de.

39 Yūcuán na te ni cahān yā jiín ñáyuu jeē na cūcōo s̄in i cuenta grupo nuū íte. 40 Te ni cacucōo s̄in ciento ciento i, jiín cincuenta cincuenta i. 41 Te ni quih̄in ya ndihúh̄un staā jiín uū chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tée cáscuáha jiín yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i. 42 Te ndivii i ni cayejí, te ni candutú ch̄iji i. 43 Yūcuán na te ni canastútú de pedazo staā jiín chācá jéé ní quendōo, te ni chitú úx̄i uū j̄ica. 44 Te tēe ni cayejí, chí uhūn mil de cúu.

*Jeē ní jica jéhé yá nuū mar*

*(Mt. 14.22-27; Jn. 6.16-21)*

45 Yūcuán na te ni cahān-ni Jesús jiín tée cáscuáha jiín yá jeē na quívico de barco, te cosnūu de yāha de inga lado mar ñuu Betsaida. Te máá yá chí nataj̄i yá ñáyuu quinhun i, te sáá te suni quih̄in yā. 46 Te nuū ní cuu ni nataj̄i yá i, te ni caa ya yucu cuacacān tahú yā. 47 Te jeē ní cuaa, te barco un je ni cuu sava nuū mar cuahān, te máñúh̄un-ni ya ni quendōo nuū ñūhun íchi. 48 Te ni jito ya jeē yóh̄yo j̄n̄undóho cáscáca de barco, chí ñih̄in vēj̄i tach̄i ichi núú de. Te jeē yínee gā ni quee ya nuū de, j̄ica jéhé yá nuū mar. Te yāha ya nuū de quih̄in yā nuú. 49 Te ní cajito de jeē j̄ica ya nuū mar, te ni cajeni ni de jeē j̄ihná cúu, te ni cacana cóhó de. 50 Chí ndih̄i de ni cajito nuū yā, te ni cayuhú ndasí de. Te ni cahān-ni ya jiín de:

Ndeyí coo ni rō, te ma yūhu ró, chí máá rí cúu, áchí yá.

51 Te ni quívi ya ini barco un, te ni jecuíñ̄-ni tach̄i. Te yóh̄yo ni canaa ni de cajito de. 52 Chí cándāa neé gá jeē níjn̄uní de, chí ni jiín j̄niñu jéhnu jeē ní nducuehē staā, tu ní cájecūhun ni de jeē máá yá cúu Yaā ní taj̄i Yaā Dios.

*Jeē ní nasávāha ya ñáyuu cácuñ̄u región Genesaret*

*(Mt. 14.34-36)*

53 Te ní quenda j̄yo ya jiín de nuū mar ún, ní jinū yā región Genesaret. Te yundúte un ní cajih̄ni de barco. 54 Te nuū ní quenda ya jiín de ini barco, te ñáyuu yúcuan ni canacuni-ni i ya. 55 Te yach̄i ni jengoo i táca ndaíñu yūcuán, te ni caquindeca i ñáyuu cácuñ̄u, cáyosó i nuū camilla, vēj̄icoo ñáyuu nuū ní jito i íne ya. 56 Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñáyuu cácuñ̄u yuhíchi, te cácahān ndahú i jiín yá jeē na quéhé i vēsú yusáh̄ma ya. Te táca ñáyuu jeē ní caquehé sah̄ma ya, ni canduvāha-ni i.

*Siquí ndese cúj̄nehén ñáyuu*

*(Mt. 15.1-20)*

## 7

1 Yūcuán na te tēe grupo fariseo jiín jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. 2 Te tēe un ní cajito de jeē sava tée cáscuáha jiín Jesús, ni cayejí j̄nehén de staā, chí tu ní cáscuáca de costumbre jeē nándahá de nuū Yaā Dios. Te ni cacahān siquí de. 3 Chí tēe fariseo jiín ndih̄i ñáyuu hebreo, névāha i costumbre jenahán jéē ma cáji i staā núu tu nandahá váha i x̄ihna gā. 4 Te núu ni ndecoo i jeē ni jéngoo i nuū yáhu, te

tu cáyeji i te núu tu nandahá i. Te íyó cuehē gā costumbre jenahán jeē casquícu i, nájnūhun jeē ndúndoo taza, tĩndohō, cohō cáa, jíin jíto. <sup>5</sup> Te tēe fariseo jíin tēe cástēen tutu ley Yaā Dios, ni cacajnúhún de ya:

Tēe cáscuáha jíin ró, ¿naun tu cáscuácu de costumbre ñayuu jenahán? Chi sa cáyeji jnehén de staā, achí de.

<sup>6</sup> Te ni cahān yā jíin de:

Ndaā ni nacani Isaiás jnūhun síquī rō jijnáhan ró jeē tēe stáhú-ni cácuu ró. Chí súcuau ni tee de jnūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū,  
te nasūu ndé jíin ini jíin ánuá i.

<sup>7</sup> Te cáchiñúhún sáá-ni i ruhū,  
chí jnūhun cástēen i cúu jniñu ní candacu tēe,  
te nasūu jeē ní ndacu máá rí cúu.

Achí Yaā Dios. Achí Isaiás. <sup>8</sup> Súcuau cácuu ró, chi ni casiáá rō jniñu ní ndacu Yaā Dios nuū rō, te cáscuácu ró costumbre jeē ní cajequin ñayuu, jeē ndúndoo tĩndohō jíin taza. Te cuehē gā costumbre súcuau cáscuácu ró, áchí yá.

<sup>9</sup> Te suni ni cahān yā:

Cásiáá rō jniñu ní ndacu Yaā Dios, návāha squícu ró costumbre ni cajequin máá ró. <sup>10</sup> Chí Moisés ni cahān de: Coó yíñúhún ró jíin tátá rō jíin náná rō. Te núu ndé ĩn cahān síquī tátá chí síquī naná, na cúu nahín. Achí Moisés.

<sup>11</sup> Te máá ró chí cácahān rō jeē cuu cahān ĩn tēe jíin tátá de náná de: Ma cúu chindéé ñáhán ná níhín cuáha na jeē cáji ni jeē cúhun ní, chí ndĩhi jeē névāha ná, chí Corbán cúu, áchí ró. (Te jnūhun Corbán cuní cahān jeē ni sócō nuū Yaā Dios.) <sup>12</sup> Te cácahān rō jeē núu súcuau cahān ĩn tēe, te tuá cánuú chindéé ñáhán de tátá de náná de. <sup>13</sup> Te súcuau cástívi ró jniñu ní ndacu Yaā Dios, jeē síquí costumbre ni cajequin ñayuu jenahán vēji. Te cuehē gā jniñu súcuau cásaáha ró, áchí yá.

<sup>14</sup> Te ni cana tucu ya ñayuu cuehē ún, te ni cahān yā jíin i:

Cuni sōho vāha ró jijnáhan ró, te chuhun ni rō: <sup>15</sup> Tāca jeē iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuau cúu jeē cujnehén i sáha. <sup>16</sup> Tāca rōhó jeē jíini sōho, na chúsóhó ró, áchí yá.

<sup>17</sup> Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajnúhún de ya síquī jnūhun yátá yáha jeē ni cahān yā. <sup>18</sup> Te ni cahān yā jíin de:

¿A máá ró suni ná tu jecúhun ni rō, chí naún? ¿A tu cájini rō jeē tāca jeē quívi ini ñayuu, ma cúu cujnehén i sáha? <sup>19</sup> Chi tu quívi ini anuá i, chí chíji i quívi, te quénda-ni cuahān, achí yá.

Súcuau ni steén yā jeē tāca jeē yéji ñayuu, tu cújnehén ánuá i sáha. <sup>20</sup> Te ni cahān gā yā:

Jeē quénda ini anuá ñayuu, yūcuau cúu jeē cujnehén i sáha. <sup>21</sup> Chi nde ini anuá ñayuu quénda jeē jéni néé ni, jeē casíquí ndéé jnáhan, jeē jíca jnéni, jeē jéhi ndíyi, <sup>22</sup> jeē sacuíhná, jeē ndíyo ni ndajniñu jnáhan, jeē sáha néé, jeē stahú jnáhan, jeē máni cuéchi sáha, jeē cucuésun ni, jeē cahān yāa síquí jnáhan, jeē sandúxí máá, jeē canéé xínī. <sup>23</sup> Tāca jniñu néé yáha, máni ini anuá ñayuu quénda, te cújnehén i sáha, áchí yá.

*Ñahan inga nación jeē ní candíje nĩhin  
(Mt. 15.21-28)*

24 Te ni quenda ya yūcuan cuáhān yā región Tiro jíin Sidón. Te ni quivī ya ĩn vehe, te cúní yā jeē tú ni ĩn ñayuu cuni jeē ĩne ya yūcuán. Te vēsú súcuan, te tu ní cúu cone sáhi yá. 25 Te ĩn ñahan íyó sēhe síhí ña jeē ñúhun tachī ĩni i, ni nihīn-ni ña jñūhun jeē ĩne ya. Te ni quee ña, te ni jecuiñī yití ña nuū jehé yā. 26 Te ñahan ñuu jicá cúu ña, chi nde Sirofenicia cúu nación ña. Te ni cahān ndahú ña jíin yá jeē na quénehen ya tachī ĩni sēhe síhí ña. 27 Te ni cahān Jesús jíin ña:

Nasūu núu maá ní vēji ná, chi máni nuū ñáyuu cácuu sēhe Israel. Chi tu íyó váha jeē quénde yō staā sēhe te cuāha yó núu ĩna, achí yá.

28 Te ni cahān ña:

Jendaá cahān ni Tātā, te chindéé ñáhán ní sáña vēsú cúu ná nájñūhun ina. Chi suni maá tí cáhiin tí chíji mesa, cáhihīn tí staā cuechí jéé cóyo yuhu sūchi lúli cáyeji tí, achí ña.

29 Yūcuán na te ni cahān yā jíin ña:

Vāha ni cahān ní. Cuáhán ní núu súcuan, chi je ni quenda tachī ún ĩni sēhe síhí ní, achí yá.

30 Te ni najinū ña vehe ña, te ni jito ña jeē catú sēhe síhí ña nuū jito, te je ni quenda tachī ún ĩni i.

### *Jeē ní nasávāha ya ĩn tēe sóho cástéte*

31 Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. 32 Te ni caquindeca i ĩn tēe sóho cástéte nuū yā, te ni cacahān ndahú i jíin yá jeē na sóo yá ndaha ya siquí de. 33 Te ni quenehen sñin ya de nuū ñáyuu cuehē ún, te ni chune ya xinī ndáha ya sóho de, te ni tesñi yá, te ni quehé yá yaá de. 34 Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

35 Te ni nanune-ni sóho de, te ni nduvāha yáá de, te ni nacahān vāha de.

36 Te ni ndacu ya jniñu nuū ñáyuu un jéé ma cáchi i nuū ní ĩn. Te vēsú ni cahān nihin ya jíin i, te vihyá gā ni cajete i jñūhun. 37 Te yōhyo ni canaa ni i cájito i, te ni cacahān i:

Vāha sáha ya táca jniñu, chi nde tēe cásohó, cánacuni sóho de, te tēe cándāa ññhīn, cánacahān vāha de sáha ya, achí i.

### *Jeē ní scáji yā cuñ mil ñayuu (Mt. 15.32-39)*

## 8

1 Te tiempo un ní candutútú cuehē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

2 Cúndahú ni rī ñayuu yāhá, chi je ni cuu unī quivī cáyūcú i jíin rí, te tuá na vé caji i. 3 Te núu natajī rí i quinuhun ndite i vehe i, te cuíta lí i sava ichi, chí íyó sava i jeē jicá véjicoo i, achí yá.

4 Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yúcu, achí de.

5 Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, achí de.

<sup>6</sup> Yūcuán na te ni cahān yā jíin ñáyyu cuehē un jēē na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuéchi yá, te ni jēhe ya nuū tēe cáscuáha jíin yá. Te máá de ni casaja de nuū ñáyyu cuehē ún. <sup>7</sup> Te suni cándiso de jecu chācá lúli. Te ni nacuatáhú yá siquī, te ni cahān yā jēē suni saja de jíināhan de. <sup>8</sup> Te ndihí i ni cayeji, te ni candutú chíji i. Yūcuán na te ni canastútú de pedazo jēē ní quendōo, te ni chitú úxā jīca. <sup>9</sup> Te tēe ni cayeji un, iyó nájnuhun cuūn mil de. Te ni nacuatáhú yá nuū ñáyyu ún, te cuanungoo i. <sup>10</sup> Yūcuán na te ni ndīvi-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñin jniñu jēhnu nuū yā*  
(Mt. 16.1-4; Lc. 12.54-56)

<sup>11</sup> Yūcuán na te ni quecoo tēe grupo fariseo, te ni caquejēē de stíchi de Jesús. Te cácuni de coto ndēe de ya, te ni cajicān de jeē sáha ya ñin jniñu jēhnu jeē coo ñin seña ichi ándiví. <sup>12</sup> Te ni jitū ni yā siquī jeē tu cácandíje de jíināhan de, te ni cahān yā:

¿Naun cájicān ñayuu yáha ñin jniñu jēhnu nuū rī? Jendaá cahán rī jeē ma stéén rī ni ñin jniñu jēhnu nuū ñáyyu yāhá.

<sup>13</sup> Te ni squéndōo ya de jíināhan de, te ni ndīvi tucu ya ini barco, te cuahān yā inga lado mar.

*Jnūhun levadura tēe fariseo*  
(Mt. 16.5-12)

<sup>14</sup> Te tēe cáscuáha jíin yá ni canaa ni de condiso de jeē cáji de, chí ñin-ni pan cánevāha de ini barco. <sup>15</sup> Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

<sup>16</sup> Te ni cacahān tēe cáscuáha un jíin táca jnāhan de:

Va siquī jeē tú na staā ndíso yó, jeē yúcuán cáhán yā súcuán, áchí de.

<sup>17</sup> Te ni jini Jesús, te ni cahān yā:

¿Najehē cándajnūhun ró jeē ní cáhán rī súcuán siquī jeē tú na staā cándiso ró? ¿A ná tu cuni rō, á ná tu jecūhun ní rō jeē tu ní cáhán rī súcuán siquī jeē tu cándiso ró stāá? ¿A yóhoyo uun ní rō candíje ró? <sup>18</sup> Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ní rō? <sup>19</sup> Chi ná ni tahu cuéchi rí uhūn staā ni cayeji uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, áchí de.

<sup>20</sup> Te suni súcuán ná ni tahu cuéchi rí uxā staā ni cayeji cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, áchí de.

<sup>21</sup> Te ni cahān yā jíin de:

Te nde vijna ¿á ná tu jecūhun ní rō jijnāhan ró?

Súcuán ní cahān yatá yá jeē ma cándíje de jnūhun stáhú cástéén tēe ún.

*Jeē ní nasávāha ya tēe cuáá ñuu Betsaida*

<sup>22</sup> Yūcuán na te ni jinū yā jíin de ñuu Betsaida. Te ni caquindeca ñayuu ñin tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

<sup>23</sup> Yūcuán na te ni jniñi ya ndaha tēe cuáá un, te ni quenehen ya de yatá ñūu

ún. Te ni tee ya tesīhi yá tinūú de, te ni tee ya ndaha ya siquī. Te ni cajñuhun yá de núu cuu coto de jecu. <sup>24</sup> Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chí ná cáa yujnu cáa i, áchí de.

<sup>25</sup> Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni tinūú de, te ni jito cájí de ndihi-ni. <sup>26</sup> Te ni natajǎ yá de quínuhun de vehe de, te áchí yá:

Ma quivǎ ró ñuu, ni ma cáchi cuiṭi rō nuū ní ñn, áchí yá.

*Jeē ni cáhān Pedro jeē Jesús cúu Cristo*

*(Mt. 16.13-20; Lc. 9.18-21)*

<sup>27</sup> Yūcuán na te Jesús jíin tée cáscuáha jíin yá, cuahān yā tācá ndañūú Cesarea Filipo. Te ichi un ní cajñuhun yá de:

Ruhū, ¿ndé ñn cúu rǐ cácahān ñayuu?

<sup>28</sup> Te ni cacahān de:

Sava i cácahān jeē cúu ní Juan tée ni scuándute. Te sava ga i cácahān jeē cúu ní Elías, tée ni nacani jñuhun Yaā Dios nde jenahán. Te sava ga i cácahān jeē inga tée ni nacani jñuhun Yaā Dios cúu ní.

<sup>29</sup> Yūcuán na te ni cajñuhun yá de:

Te máá ró, ¿ndé ñn cúu rǐ cácahān rō?

Te ni cahān Pedro:

Máá ní cúu Cristo, Yaā ní tajǎ Yaā Dios, achí de.

<sup>30</sup> Te ni ndacu ya jniñu nuū de jíjñahan de jeē ma cáchi de jñuhun yáha nuū ní ñn ñayuu.

*Jeē ní castuhún Jesús jeē cúu yā*

*(Mt. 16.21-28; Lc. 9.22-27)*

<sup>31</sup> Te ni quejéé yá steén yā nuū de:

Máá rǐ, Yaā ní nduu tée, cánuú ndoho xeēn rǐ. Te tāca tée jéhu jíin sūtū cácujeñu jíin tée cásteén tutu ley, squéhichǐ de ruhū, te cahni de ruhū. Te nuū unǐ quivǎ te natecu rǐ, achí yá.

<sup>32</sup> Te cájí ní cahān yā jñuhun yáha. Yūcuán na te Pedro, ni cana máñuhún de ya, te ni quejéé de cáhān de nuū yā jeē ma cuáha ya jñuhun coo súcuan. <sup>33</sup> Te máá yá ni ndió cóto ya ni jito ya nuū tée cáscuáha jíin yá. Te ni cahān yā nuū Pedro:

Cujuyo quihǐn rō, chí cáhān rō ná cáhān Satanás. Chí tu jéni ní rō nájnñuhun jéni ní Yaā Dios, chí sa suhva jéni ní rō nájnñuhun cájeni ní ñayuu, achí yá.

<sup>34</sup> Te ni cana ya tée cáscuáha jíin yá jíin ñáyuu cuehē ún, te ni cahān yā:

Na-ni ñayuu núu cúnǐ i condiquǐn i ruhū, na cási i jeē cunǐ máá i, te na cóndiquǐn i ruhū te cuáha i jñuhun ndoho i jñúndóho jeē siquǐ rǐ, vesú na cúu i. <sup>35</sup> Chí núu ndé ñáyuu cunǐ i cácu i nuū jñúndóho quiǐi nuū i jeē siquǐ ruhū, núu súcuan te jñahnú ndetú i ní cáni. Te núu ndé ñáyuu, vesú na cúu i jeē siquǐ ruhū jíin siquǐ jeē scáca i jñuhun jeē jñáma rǐ ñayuu, núu súcuan te cotecu i ní cáni. <sup>36</sup> ¿Chí ndé cuajniñu vesú na cúndeyǐ ñáyuu nihǐn i ní ñáyivǐ, te núu quivǐ i nuū jñahnú ndetú i? <sup>37</sup> Chí tú na jíin cuiṭi chunaa ñayuu jeē cácu ánuá i. <sup>38</sup> Te ñayuu yáha tu cácañdǐje cuiṭi i, te máni máá cuéchi cásaaha i. Te núu na-ni ñayuu cúcanu i nuū ñáyuu yáha jeē siquǐ ruhū, Yaā ní nduu tée, jíin siquǐ jñuhun cáhān rǐ, suni súcuan cucanu rǐ jeē siquǐ máá i, quivǐ ndǐji rǐ jíin táca ndajéhé ndoo rǐ. Te quivǐ ún chí yōhoyo luu cujéñu rǐ nájnñuhun cújéñu Tátá rǐ. Achí yá.

## 9

<sup>1</sup> Te suni ni cahān yā jíin de jíjñahan de:

Jendaá cahán rī jín ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jín poder yā, achí yá.

*Jeē tucu ni nduu ya*  
(Mt. 17.1-13; Lc. 9.28-36)

<sup>2</sup> Yūcuán na te nuū iñu quivī te Jesús ni jeca ya Pedro jín Jacobo jín Juan, cuahān sīn ya jín de iñ yucu súcun. Te yūcuán, tucu ni nduu ya nuū de. <sup>3</sup> Te sahna ya ni ndindéé, te ni nducujín quiyi, nájñuhun yuhvā volcán. Te tú ni iñ ñayuu ñayivi yáha cuu nacate jeē ndúquiyi ndasí súcuan. <sup>4</sup> Te ni cajito de jeē Elías jín Moisés cándajñuhún de jín yá. <sup>5</sup> Yūcuán na te ni cahān Pedro jín Jesús:

Maestro, nacā jeē váha jeē cáhīn na yáha. Te na sáha ná únī vehe ramada, iñ cuu máá ní, inga cuu Moisés, te inga cuu Elías, achí de.

<sup>6</sup> Chi yōhoyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de. <sup>7</sup> Te ni quiji vicō ñuhun ní jesi-ni nuū de. Te nuū vicó un ní cahān iñ jñuhun:

Yáha cúu Sēhe ri jeē maní ndasí rí jín. Te na cúni nahín ró jñuhun cáhán yā. Achí.

<sup>8</sup> Te ni candacoto-ni de, te tuá tēe un ní cájito de, chi máá iñ na Jesús.

<sup>9</sup> Te ni cananuu de jín yá yucu ún. Te ni ndacu ñihin ya jniñu nuū de jeē ma cáchi de nuū ní iñ jeē súcuan ní cajito de, chi nde na nátecu máá yá, Yaā ní nduu tēe, achí yá. <sup>10</sup> Jeē yúcuan ní cachuvāha de tāca jēé ní cuu ún, te cácajnūhun jnáhan de na jñuhun cúu jeē nátecu yā. <sup>11</sup> Te ni cacajnūhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xihna gā, te sáá te quiji Yaā cúu Cristo? achí de.

<sup>12</sup> Te ni cahān yā:

Jendaá cúu jeē xihna gā quiji iñ tēe cúu nájñuhun Elías, te sátuhva de ndihi, achí tutu. ¿Te ndese cáhān tucu tutu iñ siquī ruhū, Yaā ní nduu tēe? Cáhán jee ndoho xeēn rī, te sájéé ni i nuū rī. <sup>13</sup> Te cáhán rī jín ró jeē jé ní quiji tēe ni cuu nájñuhun Elías, te ni casáha ndevāha ñayuu jín de tāca jēé ní cacuu ni máá i, nájñuhun cáhān jñuhun de nuū tútu, achí yá.

*Jeē ní nasávāha ya iñ sūchi ñuhun tachī ini*  
(Mt. 17.14-21; Lc. 9.37-43)

<sup>14</sup> Te ni najinū yā jín de nuū sava ga tēe cáscuáha jín yá, te ni cajito ya ñayuu cuehē ndasí, ni cajicō ndúú i de. Te suni cáhīn tēe cástéén tutu ley Yaā Dios, cátejnáhan jín de. <sup>15</sup> Te nuū ní cajito tāca ñayuu un jéé véji ya, te ni canaa ni i. Te cájino i cuangoo i nuū yā jeē cahān i jín yá. <sup>16</sup> Te ni cajñuhun yá i:

¿Na siquī cátejnáhan ró jín de jijnáhan de? achí yá.

<sup>17</sup> Te ni cahān iñ tēe íne yūcuán:

Maestro, vendeca ná sēhe ná núú ní, chí ñuhun iñ tachī ini i, te ni cuññhín i ní sáha. <sup>18</sup> Te ndé-ni cúu nuū íne i, te tachī un scótúú i, te jéhni yīhí-ni i. Te jéé tiñū yuhu i, te squiññi jñuhun i. Te cuacuxií ndasí i sáha. Te ni cahān ndahú ná jín tēe cáscuáha jín ní jeē na quénehen de tachī ún, te tu ní cúu sáha de, achí de.

<sup>19</sup> Te ni cahān yā jín de jijnáhan de:

Ñayuu tu cándíje cuiti cácuu ró. ¿Nasaa ga quivī condee rī jín ró? ¿Te nasaa ga quivī cuandeyí ni rī jín ró? Cuáquihin sūchí un, na quíji i, achí yá.

<sup>20</sup> Te ni caquindeca de i nuū yā. Te nuū ní jito tachī un núú yā, te ni jehni yīhí-ni i. Te ni cotúú i, te cónéhén cócáni i, te jéé tiñū yuhu i. <sup>21</sup> Te Jesús ni cajñuhun yá tatá i:



¿Nasaa cuiyā ni cuu jeē sāha súcuan jíin i?

Te ni cahān de:

Nde lulí i. <sup>22</sup> Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sāha ní, te cundáhú ni ní chindéé ñáhán ní sãña jeē ndúvaha sēhe ná, áchí de.

<sup>23</sup> Te ni cahān Jesús jíin de:

Núu cuu candíje ró jeē sāha ri, chí ñayuu candíje te cuu tāca jeē cuní i, áchí yá.

<sup>24</sup> Te máá tátá sūchí un ní cahān jee de:

Candíje ná, te chindéé ñáhán ní sãña jeē candíje ñihin ga ná, áchí de.

<sup>25</sup> Te ni jito Jesús jeē ní cutútú cuehē ñayuu nuū yā. Te ni cahān yā nuū tachí: Tachí jeē sañhín sásóhó, ruhū ndácu ri jniñu jeē na quénda ró ini sūchi yáha, te ma ndávi ga rō ini i, áchí yá.

<sup>26</sup> Yūcuán na te ni cana cóhó táchī ún, te ni jehni yíhí tucu i, te ni quenda cuahān. Te sūchí un ní cuu i nájnūhun ndáyi. Te ni cacahān cuehē ñayuu jeē jé ni jihí i. <sup>27</sup> Te Jesús ni jniñi ya ndaha i, te ni ndonehen ya i, te ni nucuíñi-ni i.

<sup>28</sup> Yūcuán na te ni quívi ya ini ñin vehe, te tēe cáscuáha jíin yá, ni cacajnūhun sáin de ya:

¿Najehé tu ní cúu quenehen ná tachí un jíjnáhan ná? áchí de.

<sup>29</sup> Te ni cahān yā:

Ñin tachí súcuan chí ma quénda cuíti te núu tú cacān tahu rō te coo ndite ni rō, áchí yá.

*Jeē ni cahān tucu ya jeē cúu yā*

(Mt. 17.22-23; Lc. 9.43-45)

<sup>30</sup> Te ni quenda ya yūcuan jíin de jíjnáhan de, te ni yāha ya ndañú Galilea cuahān yā. Te tu ní cúní yā jeē cúní ni ñin ñayuu. <sup>31</sup> Chí stéén yā nuū tēe cáscuáha jíin yá, te áchí yá:

Máá rí, Yaa ní nduu tēe, nastúu i ruhū nuū tāca tēe xeēn. Te cahni de ruhū, te núu ní jihí rí, te nuū uní quívi te natecu rí, áchí yá.

<sup>32</sup> Te tu ní cájecūhun ni de jnūhun yáha, te cáyūhú de cajnūhún de ya siquí jnūhun ni cahān yā.

*Ndé ñayuu cúu jeē cújéhu ga*

(Mt. 18.1-5; Lc. 9.46-48)

<sup>33</sup> Te ni jinū yā jíin de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

<sup>34</sup> Te tu ní cacahān cuíti de, chí ichi un ní cacahān de siquí núu ndé ñin de cújéhu ga. <sup>35</sup> Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñin ró cúní cújéhu ga, na cúu ró tēe núu ga nuū tāca jnáhan ró, te cuajniñu ró núu jnáhan ró.

<sup>36</sup> Yūcuán na te ni jniñi ya ndaha ñin sūchi lulí, te ni jeni ya i mēhñú de jíjnáhan de. Te ni nundee yā i, te ni cahān yā jíin de:

<sup>37</sup> Na-ni ñayuu núu jeē siquí ruhū jetáhú i ñin sūchi lulí nájnūhun sūchi yáha, te ruhū jetáhú i. Te ñayuu jetáhú ruhū, nasūu máá ñin-ni ruhū, chí suni Yaa ní tají rúhú jetáhú i, áchí yá.

*Ñayuu tu cáhán siquí yā, ñin i jíin yá*

(Mt. 10.42; Lc. 9.49-50)

<sup>38</sup> Yūcuán na te ni cahān Juan jíin yá:

Maestro, ni cajito ná ñin tēe jeē jíin síhví ní quénehen de tachī ini ñayuu. Te ni cajesi ná jeē sáha de, chí tu jica de jíin yó, achí de.

<sup>39</sup> Te ni cahān Jesús jíin de:

Ma cási rō jeē sáha de. Chí ni ñin tēe jeē jíin síhví rí sáha de jniñu jéhnū, ma cúu nacahān de síquī rī. <sup>40</sup> Chí tēe tu cáhān síquī yō, íin de jíin yó. <sup>41</sup> Te na-ni ñayuu núu jeē síquī ruhū cuāha i vēsú ñin ñajin ndute coho rō, síquī jeē cácadíje rō ruhū, ndaā ndije cúu jeē nihín i tahū i. Achí yá.

*Xeēn coo síquī ñáyuu quívi nuū cuéchi*  
(Mt. 18.6-9; Lc. 17.1-2)

<sup>42</sup> Te núu ñin sūchi lúli yáha cándíje i ruhū, te núu quívi i cuéchi sáha na-ni ñayuu, te váha ga núu ni conuhní ñin yōso cáhnu sucūn ñayuu ún, te quēe i chíji ndute mar nuū. <sup>43</sup> Te núu ndaha rō sáha jeē quívi rō cuéchi, váha ga cahnde rō na quíhín, návaha tuá sáha rō cuéchi. Chí váha ga jeē cóndee ñin-ni ndaha rō te quívi rō núu cotecu rō níí cáni, vēsú jeē cóndee ndindúú ndaha rō te quívi rō infierno, nuū cayú ñuhūn jeē ma ndahvá cuítí. <sup>44</sup> Te yūcuán chí tu cájihí tindacú, te tu ndáhvá cuítí ñuhūn. <sup>45</sup> Te núu jehē rō sáha jeē quívi rō cuéchi, suni váha ga cahnde rō na quíhín, návaha tuá sáha rō cuéchi. Chí váha ga jeē cóo cúhndu rō te quívi rō núu cotecu rō níí cáni, vēsú jeē cóndee ndindúú jehē rō te quívi rō infierno, nuū cayú ñuhūn jeē ma ndahvá cuítí. <sup>46</sup> Te yūcuán chí tu cájihí tindacú, te tu ndáhvá cuítí ñuhūn. <sup>47</sup> Te núu tinūu rō sáha jeē quívi rō cuéchi, váha ga tava rō na quíhín, návaha tuá sáha rō cuéchi. Chí váha ga jeē quívi rō ñuu nuū ndácu Yaā Dios jniñu jíin ñin na tinūu rō, vēsú jeē cóndee ndindúú tinūu rō te quívi rō infierno. <sup>48</sup> Te yūcuán chí tu cájihí tindacú, te tu ndáhvá cuítí ñuhūn.

<sup>49</sup> Chí nájñuhun quénda váha oro sáha ñuhūn, súcuan quénda váha ñayuu sáha jñundóho. Te táca cúñu jeē socó ñayuu nuū yā, cúhuhvuá sáha ññ. <sup>50</sup> Váha íyó ññ, te núu ññ ún na náa jeē uhvuá, ¿te ndese nduu uhvuá tucu sáha rō? Núu súcuan te cuu rō ñáyuu váha, nájñuhun íyó váha ññ. Te na cóyūcu váha rō jíin jnáhan rō. Achí yá jíin de.

*Síquī jeē ma stóo jnáhan tēe jíin ñahan*  
(Mt. 19.1-12; Lc. 16.18)

## 10

<sup>1</sup> Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñuhun nuū i, nájñuhun sáha ya. <sup>2</sup> Yūcuán na te jecu tēe grupo fariseo ni quecoo de nuū yā, chí cácuini de coto ndee de ya núu ndese cahān yā. Te ni cacajñuhún de ya núu íyó ley jeē cuu ndusñin ñin tēe jíin ñasihí de. <sup>3</sup> Te ni cahān yā jíin de:

¿Na jniñu ni ndacu Moisés nuū rō nde jenahán?

<sup>4</sup> Te ni cacahān de:

Moisés ni jēhe de jñuhun jeē cúváha ñin acta jeē ndusñin de jíin ña, te ndōo ña, achí de.

<sup>5</sup> Te ni cahān Jesús jíin de:

Síquī jeē níhni ní rō jijnáhan rō, jeē yūcuan ní ndacu de jniñu yáha núu rō.

<sup>6</sup> Te nde xihna ñuhún, ná ni sáha Yaā Dios ndihi, chí tēe jíin ñahan ni sáha ya.

<sup>7</sup> Jeē yūcuan cúu jeē stóo tēe tátá de náná de, te quijnáhan de jíin ñasihí de. <sup>8</sup> Te ñin na cuu ndindúú de, achí Yaā Dios. Núu súcuan te tuá cúu uū jnáhan de, chí

ɨn na cúu. <sup>9</sup> Jeē yúcuau tu íyó váha jeē stóo jnáhan, chi jeē ni squíjnéhan Yaā Dios cúu, áchí yá.

<sup>10</sup> Te tēe cáscuáha ún nuū ni quívicoo de vehe, te ni cacajnúhún tucu de ya siquí jnúhun ún. <sup>11</sup> Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuau te cásiquí ndéē de ñasihí de. <sup>12</sup> Te núu ɨn ñahan stóo ña yá ña te condeca ña inga tēe, suni cásiquí ndéē ña de. Achí yá.

*Jeē ni jicān tahu Jesús jehē sūchi lúlí  
(Mt. 19.13-15; Lc. 18.15-17)*

<sup>13</sup> Yúcuán na te ni quecoo ñayuu jíin sūchi lúlí, jēē na sóo yá ndaha ya xiní i. Te tēe cáscuáha jíin yá, ni cacahān de nuū ñayuu vējicoo jíin i. <sup>14</sup> Te ni jito Jesús, te ni quiṭí ni yā, te ni cahān yā jíin de:

Cuāha jnúhun na quíjicoo sūchi lúlí jíin nuū rí, te ma cási rō jeē quíjicoo i. Chi ñayuu jeē ndió cóo ni i caní ni i nájnūhun sūchi yáha, suu i quíví ndaha Yaā andíví jeē ndacu ya jniñu nuū i. <sup>15</sup> Te jendaá cahān rí jíin ró, núu ɨn ñayuu tú cuatáhú i jeē ndácu Yaā Dios jniñu nuū i, nájnūhun jétáhú ɨn sūchi lúlí, ma quíví cuití i ndaha ya, achí yá.

<sup>16</sup> Te ni nundee ya i, te ni soó yá ndaha ya xiní i, te ni jicān tahu yā jehē i jíjnáhan i.

*Jnúhun tēe cúcá  
(Mt. 19.16-30; Lc. 18.18-30)*

<sup>17</sup> Yúcuán na te ni quihín tucu ya ichi cuahān yā. Te jíinu ɨn tēe ni quee de, te ni jecuñí yití de nuū yā, ni cajnúhún de ya:

Tēe váha cúu ní Maestro. Te cachi ní, ¿na jniñu váha sáha ná te nihín tahu na cotecu na ní cáni andíví? áchí de.

<sup>18</sup> Te ni cahān yā jíin de:

¿Naun cahān rō jeē tēe váha cúu rí? Tú ni ɨn tēe váha íyó, chi máá ɨn-ni Yaā Dios. <sup>19</sup> Je jíin rō táca jniñu ní ndacu Yaā Dios: Ma cosíquí ndéē jnáhan ró. Ma cáhni rō ndíyí. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

<sup>20</sup> Te ni cahān tēe un jíin yá:

Táca jniñu yáha je ni squícuo ná ndé ná lúlí ná, Maestro, achí de.

<sup>21</sup> Yúcuán na te ndáhú jito ya nuū de jeē cúsi ni yā jíin de. Te ni cahān yā:

ɨn na jniñu cúmaní sáha ró núu súcuau. Cuáhán te xico ró ndihi jeē névaha ró, te cuāha ró núu ñayuu ndahú. Te nde andíví cuāha ya jeē váha ndasí nuū rō. Yúcuán na te quiji ró condiquín rō ruhū, te cuāha ró jnúhun ndoho ró jnúndóho jeē siquí rí, achí yá.

<sup>22</sup> Te ná ni jini sōho de jnúhun yáha, te ni jnahuhū ni de, te cúcuíhyá ni de cuahān de, chi cúcá ndasí de.

<sup>23</sup> Yúcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chi yōhyo yá quívicoo de ndaha Yaā Dios jeē ndacu ya jniñu nuū de, achí yá.

<sup>24</sup> Te tēe cáscuáha jíin yá, yōhyo ni canaa ni de jeē ní cajini de jnúhun ni cahān yá. Te ni cahān tucu ya jíin de:

Séhē, ñayuu tēnuū xūhún, yōhyo yá quívicoo i ndaha Yaā Dios jeē ndacu ya jniñu nuū i. <sup>25</sup> Yachí gā yáha ɨn camello yaū yutícuí, vēsú jeē quíví ɨn ñayuu cúcá ndaha Yaā Dios jeē ndacu ya jniñu nuū i, achí yá.

<sup>26</sup> Te víhyá gā ni canaa ni de cájini de, te ni cacajñuhun jnáhan de:  
¿Nde ñáyyu cúu jeē cácu núu súcuan?

<sup>27</sup> Te ni ndacoto ya nuū de, te ni cahān yā:

Ñayyu chí ma cúu squívi i máá i ndaha Yaā Dios, te máá yá chí cuu sáha ya, chí ndíhi-ni jniñu cuu sáha ya, achí yá.

<sup>28</sup> Yūcuán na te ni cahān Pedro jiín yá:

Saña jíjnáhan ná, ní castóo ná ndíhi jeē cánevāha ná, te cándiquīn na níhín, achí de.

<sup>29</sup> Te ni cahān Jesús:

Jendaá cahán rí jiín ró jijnáhan ró, núu na-ni ñayyu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquī ruhū jiín siquī jeē scáca i jñuhun jeē jnáma rí ñayyu, <sup>30</sup> núu súcuan te nanihín i ñn ciento gā jeē súcuan vijna, cúu vehe, cúu ñani, cúu cuáha, cúu náná, cúu séhe, cúu ñuhun, te nde jiín jéé cóto xeēn ñayyu i. Te nde inga vida quiji te cotecu i ñí cáni. <sup>31</sup> Te cuehē ñayyu jeē vijna cácujuhnu, nduu i ñayyu núu ga. Te ñayyu jeē núu ga vijna, chí ndujéhu i, achí yá.

*Jeē ni cahān tucu ya jeē cúu yā  
(Mt. 20.17-19; Lc. 18.31-34)*

<sup>32</sup> Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sóho de jñuhun ni cahān yā. Te cáyühú de cuángoo de jíin yá. Yūcuán na te ni cana sín tucu ya ndíhúxí uū tée cáscuáha, te ni quejéé yá cástühún tucu ya nuū de táca jéé quiji siquī yā. <sup>33</sup> Achí yá:

Cuni sóho ró, chí je cuángoo yó ñuu Jerusalén vijna, te yūcuán nastúu ñayyu ruhū, Yaā ní nduu tée, nuū sutú cácujuhnu jíin núu tée cástéén tutu ley. Te ndonda de siquī rí jeē cúu rí, te squívi de ruhū nuū tée nación Roma jeē cáyūcú Jerusalén cándacu jniñu. <sup>34</sup> Te táca tée un sácatá de nuū rí, te caní de ruhū, te tesihí de nuū rí, te sáá te cahni de ruhū. Te nuū uní quiví te natecu rí, achí yá.

*Jeē ní jícān Jacobo jíin Juan ñn favor nuū yā  
(Mt. 20.20-28)*

<sup>35</sup> Yūcuán na te Jacobo jíin Juan, ndíndúú séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñn jeē cacán na núu ní, achí de.

<sup>36</sup> Te ni cahān yā jíin de:

¿Ndese cácuni rō jeē sáha rí jíin ró? achí yá.

<sup>37</sup> Te ni cacahān de:

Cuáha ní jñuhun jeē cónēne ná xiin ní quiví ndujéhu ní, ñn ná lado váha ní, te inga ná lado jecó ní, achí de.

<sup>38</sup> Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quiji siquī rí? ¿Te á canda ró ndoho xeēn rō nájnūhun ndoho rí? achí yá.

<sup>39</sup> Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quiji siquī rí, te ndoho xeēn rō nájnūhun ndoho rí. <sup>40</sup> Te jeē cónēne ró lado váha rí jíin lado jecó rí, nasūu ruhū cúu jeē cuáha jñuhun. Chí je iyó túhva cuu táca tée jeē ní nacáji Tátá rí, te tée un níhín, achí yá.

<sup>41</sup> Te uxí gā tée cáscuáha un, ní cajini de jñuhun yáha, te ni caquiñi ni de nuū Jacobo jíin Juan. <sup>42</sup> Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu nīhin de jniñu nuū i, te máa de cáchí ndese coo. <sup>43</sup> Te máa ró jijnáhan ró, chí ma sáha ró súcuan. Chi núu ndé ñin ró cúní cujéhnú, sa suhva cuajniñu ró núu jnáhan ró. <sup>44</sup> Te núu ndé ñin ró cúní cuu nuū, sa suhva sáha ró máa ró mozo nuū tāca jnáhan ró. <sup>45</sup> Chi suni súcuan sáha ruhū, Yaá ní nduu tēe, chí nasūu jéé vēji ri jeé cuajniñu ñayuu nuū rī, chí sa suhva vēji ri jeé cuajniñu ri nuū ñáyuu. Te cuáha ri máa rī cuu ri náváha jnama ri cuehē ñayuu, achí yá.

*Jeē ní nasáváha ya Bartimeo tēe cuáá*  
(Mt. 20.29-34; Lc. 18.35-43)

<sup>46</sup> Yūcuán na te ni jinū yā ñuu Jericó jín tēe cáscuáha jín yá. Te sáá te ni quenda ya yūcuan jín de jín ñáyuu cuehē ndasí. Te Bartimeo tēe cuáá, séhe Timeo, néne de yuhíchi, jícán de caridad. <sup>47</sup> Te ni jini de jnūhun jeē Jesús ñuu Nazaret vēji ya. Te ni quejéé de cána jee de:

Jesús Séhe yucūn David, cundáhú ni ni sáña, áchí de.

<sup>48</sup> Te cuehē ñayuu ni cacahān i nuū de jeē na cási de yuhu de. Te máa de víhyá gā ni cana jee de:

Máa ní jeē cúu ní Séhe yucūn David, cundáhú ni ni sáña víí, achí de.

<sup>49</sup> Yūcuán na te ni jecuiñí Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñí, na quíhín yō, chí cána ya rohó, áchí i jín de.

<sup>50</sup> Yūcuán na te ni scáne de ticáchí de, te yachí ni ndocuiñí de, te ni jinū de nuū Jesús. <sup>51</sup> Te ni cahān yā jín de:

¿Na vé cuní rō jeé sáha ri jín ró?

Te máa de ni cahān de:

Maestro, jeé na ndúndijin tinūu ná cuní na, áchí de.

<sup>52</sup> Te ni cahān Jesús jín de:

Cuáhán núu súcuan. Ni candíje ró jeé cuu nasáváha ri rohó, te jeé yūcuan ní nduváha ró, áchí yá.

Te ni ndundijin-ni tinūu de, te ni ndiquin de Jesús cuahān de jín yá ichi ún.

*Jeē ní quávi Jesús ñuu Jerusalén*  
(Mt. 21.1-11; Lc. 19.28-40; Jn. 12.12-19)

## 11

<sup>1</sup> Te ni cuyajni ya ñuu Jerusalén, vēji ya ñuu Betfagé jín ñuu Betania, jeē íne jehē yucu Olivos. Te ni tají yá uū tēe cáscuáha jín yá jeé quíngoo de. <sup>2</sup> Te áchí yá jín de:

Cuangoo ñuu lulí íne ichi núu. Te núu ni quávi-ni ró yūcuan, te nihīn rō ñin burro núhni tí, jeé ní ñin tēe ná tu coso de tí. Te ndají ró tí, quijicoo ró jín tí. <sup>3</sup> Te núu ndé ñin cajnūhún naun cándají ró tí, te cachi rō: Máa Jítoho yō jini nūhún yá tí, te yachí natají yá tí ndiji tí, achi rō. Achí yá jín de.

<sup>4</sup> Te cuangoo de, te ni canihīn de burro un núhni tí yehyí núu quéhe nuū náquijnáhan ichi. Te ni candají de tí. <sup>5</sup> Te sava ñayuu cáhīn yūcuan ní cacahān jín de:

¿Na vé cúu jeé casáha ró jeé cándají ró burro jínā? achí i.

<sup>6</sup> Yūcuán na te ni cacahān de nájñūhun ní cachi Jesús. Te ni casiaá i tí vējicoo de jín tí. <sup>7</sup> Te ni ndecoo de jín tí nuū Jesús, te ní casoó de sahma de siquí tí, te ni jecosō yā tí. <sup>8</sup> Te cuehē ñayuu ní cascáa i sahma i ini ichi. Te sava ga i ní cajehnde i ndaha ñúu, te ní cachucun i ini ichi ún.

<sup>9</sup> Te ñayuu cuangoo ichi núu jíin ñáyuu cuangoo ichi yátá, cácana jee i: Yōhoyo cújéhnú ya. Yōhoyo vāha Yaā cúu Yaā jeē véji jíin jniñú máá Jítóho yō Yaā Dios. <sup>10</sup> Te yōhoyo luu coo, chí je yajni ndacu ya jniñú nájñūhun ni ndacu jíi yō rey David. Te yōhoyo cújéhnú máá Yaā Dios. Achí i.

<sup>11</sup> Te ni quiví Jesús ñuu Jerusalén, jíin ini templo cáhnu. Te ni jito ya nuū tācá ndajniñú yúcu ní yúcuán. Te ni quenda ya cuahān yā ñuu Betania jíin ndihúxí uū de, chí je ni ini.

*Jeē ni cáhān yā nuū yújnu higo*  
(Mt. 21.18-19)

<sup>12</sup> Te inga quiví ún, nuū ní quenda ya ñuu Betania cuahān yā jíin de, te jíi yā sōco. <sup>13</sup> Te nde jícá ni jito ya in nundēhe higo jeē ín ndaha. Te ni jecondēhe yā núu sanaa te nihīn yā ndehē caji yā. Te tú na vé ni nihín yā, chí máá ndaha-ni ín. Chí nasūu tiempo ndehē cúu. <sup>14</sup> Yúcuán na te ni cahān yā nuū yujnu ún:

Tuá na ndehē cuun cuiti xiní rō jeē caji ñayuu, achí yá.  
Te tēe cáscuáha jíin yá ni cajini de jeē súcuan ni cahān yā.

*Jeē ní quenehen ya ñayuu ini templo*  
(Mt. 21.12-17; Lc. 19.45-48; Jn. 2.13-22)

<sup>15</sup> Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quití te cánaxico núu ñáyuu jeē socó i. Te ni scotúú ndeyi ya tāca mesa tēe cástáyí xuhún, jíin silla tēe cáxicó paloma. <sup>16</sup> Te tu ní jéhe ya jñūhun jeē yáha ñayuu ini templo jíin ndajniñú ndiso i. <sup>17</sup> Te ni steén yā jñūhun nuū i, achí yá:

Yósó núu tútu íi jeē cahān Yaā Dios: Vehe ri chí vehe nuū cájicān tahuñ ñayuu tācá nación cúu, achí yá. Te máá ró jijnáhan ró chí nájñūhun yaū cava ñacuñhna ní canasáha ró, achí yá.

<sup>18</sup> Te tēe cástéén tutu ley Yaā Dios jíin sūtū cácujeñnu, ni cajini de jñūhun yáha, te ni quejéé de cánducú de modo ndese cahni de ya. Chí cáyuhú de jeē ndujéñnu ga máá yá vēsú máa de, chí tāca ñáyuu yōhoyo cácusñ ní i cajini i jñūhun steén yā. <sup>19</sup> Te jeē cuácuua, te ni quenda ya ñuu Jerusalén cuahān yā.

*Jeē ni ichí nundēhe higo*  
(Mt. 21.20-22)

<sup>20</sup> Te jenéhen inga quiví ni nayāha ya jíin de cuahān yā. Te ni cajito de jeē nundēhe higo un je ní ichí nde yoho. <sup>21</sup> Yúcuán na te ní nucūhun ni Pedro, te ní cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

<sup>22</sup> Te ni cahān Jesús jíin de:

Candíje ró jéé sáha Yaā Dios jeē jícán rō. <sup>23</sup> Chí jendaá cahān rí jíin ró, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani siquí ni i, chí sa suhva candíje i jeē cóo nájñūhun ni cahān i, yúcuán na te cundaá jeē ní jícán i. <sup>24</sup> Jeē yúcuán cáhān rí jíin ró, tāca jéé cacān tahuñ rō, te núu candíje ró jéé nihín rō, te nihīn rō. <sup>25</sup> Te jeē cájicān tahuñ rō, te cone cáhnu ní rō nuū ñáyuu casáha cuéchi siquí rō, návāha máá Tátá rō jeē ndeé yá andiví, suni cone cáhnu ní yā nuū cuéchi rō. <sup>26</sup> Chí núu tú cone cáhnu ní rō nuū jñāhan ró, te suni máá Tátá rō jeē ndeé yá andiví, ma cóne cáhnu ní yā nuū cuéchi ró, achí yá.

*Siquí jeē ndiso jniñú Jesús*  
(Mt. 21.23-27; Lc. 20.1-8)

<sup>27</sup> Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujuhnu jíin téé cástéén tutu ley Yaā Dios jíin téé jéhnu cándacu jniñu, ni quecoo de nuū yā. <sup>28</sup> Te ni cacajñuhún de ya:

¿Ndé ní nihīn jniñu ró jéé sáha ró jniñu yáha? ¿Te ndé ñn ni tee jniñu siquī rō jeé sáha ró súcuan? áchí de.

<sup>29</sup> Te ni cahān Jesús:

Suni ruhū, cajñuhun rí rohó ñn jñuhun jíjnáhan ró. Te núu cuu stío cuíñi rō, yūcuán na te cachi rī nuū rō ndé ní nihīn jniñu ri jeé sáha ri jniñu yáha. <sup>30</sup> ¿Ndé ñn ni tee jniñu siquī Juan jeé ni scuándute de? ¿A Yaā Dios chí táca téé? Cachi nuū rī, achí yá.

<sup>31</sup> Yūcuán na te ni candajñuhun máa de:

Núu cahān yō jeé Yaā Dios ni tee ya jniñu un siquī Juan, te cahān de jíin yó: Núu súcuan ¿te najehē tu ní cácandíje ró de? <sup>32</sup> Te núu cahān yō jeé ñayuu ni catee jniñu un siquī de, te quitī ni ñayuu nuū yō, achí de cácahān máa de.

Chí cáyūhú de jeé quitī ni ñayuu, chí ndivii i cácandíje i jeé téé ni nacani jñuhun Yaā Dios ni cuu ndíje Juan. <sup>33</sup> Jeé yúcuan ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, achí yá.

*Jñuhun yátá siquī tēe néé cásjniñu nuū uva  
(Mt. 21.33-46; Lc. 20.9-19)*

## 12

<sup>1</sup> Te ni quejéé yá cahán yā jñuhun yátá jíin de jíjnáhan de:

Ñn tēe ni nachuhun de cuehē uva, te ni jesi de corral, te ni sáha de ñn nuū cūhun ndehē un táxīn. Te ni sáha de ñn vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jíca de. <sup>2</sup> Te máa tiempo ndutútú uva, te ni tají de ñn mozo de cuanuquīhin sava uva nuū téé cásjniñu ún. <sup>3</sup> Te tēe un ní cajñi de mozo un, te ni cacani de i, te ni canatají de i cuanuhun i súcuan-ni. <sup>4</sup> Yūcuán na te tēe chíí uva un ní tají tucu de inga mozo cuahān. Te tēe cásjniñu un ní cajēhe de yuū xinī mozo un, te ni castújí de, te ni cacahān ndevāha de nuū. <sup>5</sup> Te tēe chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup> Te tēe chíí uva, íyó ñn sēhe de jeé maní ndasí de jíin. Te jeé sándihī na ni tají de sēhe de un cuahān nuū téé cásjniñu. Te jeni ni de: Tēe ún chí cuatáhú de jíjnáhan de nuū sēhe rī. <sup>7</sup> Te tēe cásjniñu un ní cacahān máa: Tēe chíí táhú cúu jeé yáha. Na cáhni yō de, te ndōo tahū de cuu máa yó, achí. <sup>8</sup> Te ni cajñi de i, ni cajehni de i, te ni cascāne de i inga lado. Achí yá.

<sup>9</sup> Yūcuán na te ni cajñuhun yá de:

Núu súcuan ¿te ndese sáha tēe chíí uva un? Ndihi de te cahni de tēe cásjniñu ún, te cuāha de ñuhun cóá uva un núū inga sava tēe sájniñu nuū.

<sup>10</sup> ¿Te á ná tu cahu ró jñuhun yáha jéé yosó núū tútu iī, jeé ruhū cúu nájñuhun ñn yáhu? Chí áchí tutu:

Yuū jeé ní casquéhichī tēe cájeni vehe,  
yuū yáha nduu jeé quituu vehe.

<sup>11</sup> Máa Jítoho yō Yaā Dios ni sáha ya súcuan,

te cánaa ni yō jító yó jniñu yáha.  
Achí tutu, achí yá.

<sup>12</sup> Yūcuán na te ni canducú de modo jn# de ya. Chi ni cajecūhun ni de jeē siquī maá de cúu jñuhun yátá ní cahān yā siquī tée cásájniñu nuū uva jín tée cájeni vehe. Te siquī jeē cáyūhú de jeē quitī ni ñayuu, te ni castóo de ya te cuangoo de.

*Siquī xúhun renta*  
(Mt. 22.15-22; Lc. 20.20-26)

<sup>13</sup> Yūcuán na te ni catají de sava tée grupo fariseo jín tée grupo Herodes cuangoo de nuū yā, ndúcú de ndese sáha de návaha cahān yā ñin jñuhun jeē nihín de cuēchi siquī yā. <sup>14</sup> Te ni quecoo de, te ni cacahān de jín yá:

Maestro, cájini na jéé tée cáhán ndaā cúu ní, te tu yúhú ní jeē cahán ni ñin ñayuu siquī ní. Chi tu sáha ní cuenta ndese cúu ñin ñin í, chí inuú-ni sáha ní jín í. Te stéén ndaā ní ndese squícu ñayuu nuū Yaā Dios. ¿Te á iyó váha jeē chúnua yó renta nuū rey nación Roma jeē jn# nación yō, chí tuú? ¿A chúnua yō, chí má chúnua yō? Achí de jín yá.

<sup>15</sup> Te máa yá jini yá jeē stahú-ni de, te ni cahān yā jín de:

¿Najehē cájito ndee rō ruhū? Cuāha ñin xūhún na cóto rí, achí yá.

<sup>16</sup> Te ni cajēhe de xūhún. Te ni jito ya, te ni cajñuhun yá de:

¿Ndé ñin nuū cúu jeē ndeé nuū xúhun yáha, te ndé síhví cúu jeē ndeé yāhá? Te ni cacahān de jín yá:

Nuū jín síhví rey un cúu, achí de.

<sup>17</sup> Yūcuán na te ni cahān yā jín de:

Núu súcuan te nacuaāha ró núu rey un jéé yñi cuenta nuū de, te nacuaāha ró núu Yaā Dios tāca jéé yñi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajñuhún de siquī jeē nátecu ndíyi*  
(Mt. 22.23-33; Lc. 20.27-40)

<sup>18</sup> Yūcuán na te jecu tée grupo saduceo ni quecoo de nuū yā. Te tée un cacahān jeē tu nátecu cuiiti ndíyi. Te ni cacahān de jín yá siquī ñin jñuhun, achí de:

<sup>19</sup> Maestro, Moisés ni tee de nuū tútu jeē cánevāha yó: Núu ñin tée cuu de, te ndōo ñasihí de, te núu tu ní iyó sēhe de jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuñi i nuū ndíyi ñani de, achí tutu. <sup>20</sup> Núu súcuan te ni Iyo uxā ñani. Te tée núu ní quijnáhan de jín ñahan. Te ni jihí de, te tú sēhe de ní iyó. <sup>21</sup> Te tée uñ ni naquihin de ña, te suni ni jihí de, te tú sēhe de ní iyó. Te suni súcuan tée uní. <sup>22</sup> Te ndihúxá de ni condeca de ña, te ni ñin de tú sēhe de ní iyó. Te jeē sándihí te suni ni jihí ñahan ún. <sup>23</sup> Núu súcuan te núu na nátecu de jijnáhan de quiví nátecu ndíyi, ¿te ndé ñin de cuu ña ñasihí de? Chí ndihúxá de ni condeca de ña. Achí de jín yá.

<sup>24</sup> Yūcuán na te ni cahān yā jín de:

Yōhyo cástívi ró jñuhun siquī jeē tu cájecūhun ni rō jeē cahán tutu íi, ni tu cájini rō jeē iyó poder Yaā Dios jeē nastécu yā ndíyi. <sup>25</sup> Chí quiví nátecu ndíyi, te tuá na jñuhun quijnáhan tée jín ñahan coo. Chí coo i nájñuhun ndajéhé Yaā Dios andíví. <sup>26</sup> Te siquī jeē nátecu ndíyi, ¿á tu ní cácahu ró tutu ní tee Moisés, ndese ni cahān Yaā Dios jín de mēhñu yúcū jeē cayú yáñuhūn? Máá rí cúu Yaā Dios Abraham jín Isaac jín Jacob, achí yá jín Moisés. <sup>27</sup> Chí vēsú je ni



cajihī de, te cátecu de nuū iyó máá yá, chí cúu ya Yaā sāha jeē técu ñayuu ní cání. Yōhyo cástivi ró jñūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios*  
(Mt. 22.34-40)

<sup>28</sup> Te ní quee ñin tēe stéén tutu ley Yaā Dios, te ní jini de jeē castíhí jñáhan tēe un jíin Jesús. Te ní jini de jeē váha ní nastíó cuñí yā jñūhun. Te ní cajñūhún de ya:

¿Ndé ñin cúu jñūhun ndácu jniñu cánuú ndasí gá nuū tāca gá jniñu ní ndacu ya jengahán? áhí de.

<sup>29</sup> Te ní cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá ñin-ni ya iyó. <sup>30</sup> Núu súcuan te coo maní ndasí ró jíin máá Jítoho ró Yaā Dios, nde jñáa ndasí ró sāha ró ndihí jeē cúsiñ ní yā, nde jíin ini jíin ánuá ró, jíin ní jeē níjnūní ró, jíin ní fuerza ró. Yāha cúu jniñu ndácu ya jeē cánuú ndasí gá. <sup>31</sup> Te jniñu uū jeē ní ndacu ya, suni súcuan cáhán: Cundáhú ní ró jñáhan ró nájñūhun cundáhú ní ró maá ró. Tuá ñga jñūhun ndácu jniñu cánuú gá iyó, chí suu máá jēe yāha-ni. Achí yá jíin de.

<sup>32</sup> Yūcuán na te ní cahān tēe stéén tutu ley jíin yá:

Vāha ní cahān ní, Maestro. Chí ndaa chí iyó ñin-ni Yaā Dios, te tuá na ñga yā iyó. <sup>33</sup> Te cánuú jēe coo maní ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ní yō jñáhan yó nájñūhun cundáhú ní yō maá yō. Te cánuú ndasí gá jeē yāha vésú jeē cáhmu yó quiti jíin tāca gá jeē socó yō nuū yā. Achí de jíin yá.

<sup>34</sup> Yūcuán na te ní jini Jesús jeē váha ní stió cuñí de, te ní cahān yā jíin de:

Je yajni cuu quivi ró ndaha Yaā Dios jeē ndacu ya jniñu nuū ró, achí yá.

Yūcuán na te ní ñin ga de, tuá ní chūndeyí ní de cajñūhún de ya.

*Siqui jeē cúu Cristo sēhe yucūn David*  
(Mt. 22.41-46; Lc. 20.41-44)

<sup>35</sup> Te stéén Jesús jñūhun ini templo, te ní cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? <sup>36</sup> Chí máá David suhva ní cahān de jñūhun ya ní sāha Espíritu Santo nde jengahán:

Máá Jítoho yō Yaā Dios ní cahān yā jíin Jítoho rī, Yaā quiiji:

Cucōo ró lado váha rī nuū cujéhnu ró,

te na sāha rī jeē quende ró poder tāca jēe cájito uhū rohó.

Achí Yaā Dios. Achí David. <sup>37</sup> Te núu sēhe yucūn David cúu Cristo, ¿te ndese cúu jeē ní cáhán de jeē Jítoho de cúu ya? áhí yá.

Te ñayuu cuehē, cánujnahān ní í cájini nahín í tāca jñūhun cáhán yā.

*Jeē ní cáhán yā jeē iyó cuéchi de jñáhan de*  
(Mt. 23.1-36; Lc. 11.37-54; 20.45-47)

<sup>38</sup> Te stéén yā jñūhun, te ní cahān yā jíin í:

Coto má candíje ró tāca tēe cástéén tutu ley. Chí cácusñ ní de cáñuhun de sahna cání jeē steén jeē cujéhnu de, cájica cuu de jíin. Te cánujnahān ní de jeē cahān yññúhún ñayuu jíin de ini calle. <sup>39</sup> Te cánujnahān ní de cucōo de nuū silla yññúhún gá ini vehe ñi sinagoga, jíin silla yññúhún gá nuū víco cáyeji ñayuu. <sup>40</sup> Te cáquende de vehe ñahan ní caquendōo ndáhú. Te nahán cájicān tahú de návāha caní ní ñayuu jeē tú na cuéchi de. Tēe yāha jñáhan de chí xeñ gā ndoho de castigo. Achí yá.

*Jeē ni sócō ñahan viuda xūhún*  
(Lc. 21.1-4)

<sup>41</sup> Te ñin quiví néne Jesús ini templo ichi núu táca yéjnū nuū cásocō i xūhún. Te jito ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. <sup>42</sup> Te ni quee ñin ñahan viuda jeē ndóho ndáhú. Te ni chuhun ña uū centavo lulí ini yejnū ún. <sup>43</sup> Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán rí jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca ñayuu cucá. <sup>44</sup> Chi táca i ni casocō i jeē ni ndóho siquī xūhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

*Jeē ní cachi yā jeē náa templo*  
(Mt. 24.1-2; Lc. 21.5-6)

## 13

<sup>1</sup> Te ni quenda Jesús ini templo cáhnu, te ñin tēe scuáha jíin yá ni cahān de: Maestro, condēhe ní ná luu jito táca vehe yáha jéē cúu templo, jíin táca yúú jeē ní cuvāha, áchí de.

<sup>2</sup> Te ni cahān yā jíin de:

Táca vehe náhnu yáha jéē cájito ró, chí ma cóso jnáhan ga ni ñin yuū, chí ndihí jnanū. Achí yá.

*Na seña coo nuū cuácuyajni ndihí ñayiví*  
(Mt. 24.3-28; Lc. 21.7-24; 17.22-24)

<sup>3</sup> Te ni jehēn yā jíin de yucu Olivos jeē íne ichi núu templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sñin de ya:

<sup>4</sup> Castūhun ní nuū ná, ¿ndé quiví coo táca jéē ní cachi ní jéē coo? ¿Te na seña coo núu cuacuyajni sñiúcu táca jéē ní cahān ní? áchí de.

<sup>5</sup> Te ni cahān yā jíin de:

Coto ró jéē ma stahú ni ñin de róhó. <sup>6</sup> Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stáhú de cuehē ñayuu.

<sup>7</sup> Te nihīn rō jñuhun jeē táca lado iyó guerra, chí je yajni coo guerra. Te ma yūhu ró, chí cánuu coo súcuan. Te ni ná tu jinū quiví ndihí ñayiví. <sup>8</sup> Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuán jñaa, te coo jnamā, te ndonda ñayuu siquī jnáhan i. Te táca jéē yáha cácuu jñúndóho quejéé xíhna ñūhún gá.

<sup>9</sup> Te condito ró máá ró, chí nastúu i róhó núu táca tóhō, te ini táca vehe ñi sinagoga caní i róhó. Te quindeca i sava ró núu táca gobernador jíin núu táca rey, te cahān i cuēchi siquī rō siquī jeē cácanđje ró rúhū. Te súcuan te cuu nacani ró jñuhun ri nuū de. <sup>10</sup> Te jíni ñūhún jéē xíhna gā cuité núu jñuhun nuū táca nación ndese jnama ri i, te sáa te ndihí quiví. <sup>11</sup> Te núu ni cajñi de róhó cuángoo de jíin ró nuū táca tóhō, te ma nácani ní rō xíhna gā ndese stíó cuñí rō nuū de te cácu ró. Chí máá hora un te máá Yaā Dios cuāha ya jñuhun nuū rō ndese cahān rō, te jñuhun ún cahān rō. Chí nasūu máá ró cúu jeē cahān, chí Espíritu Santo cúu jeē cahān. <sup>12</sup> Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. <sup>13</sup> Te táca ñayuu quiví ni i nuū rō jeē siquī ruhū. Te ñayuu cuñi nihin jíin jñuhun ri nde quiví jíinu, chí cácu i.

<sup>14</sup> Te Daniel, tēe ni nacani jñuhun Yaā Dios, ni tee de jñuhun ñin tēe néé jéē quíji. Te róhó jéē cácahu tutu ún, na jécuhun ní rō. Chí ñin quiví te cuni rō jeē

sáha ndevāha de jeē stívi de tācá ndajníñu īi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. <sup>15</sup> Te ñayuu cáyūcu nuū quēhe, ma ndívi i ini vehe jeē quēnehen i ndajníñu i, chí cánuú cunu yachī i návāha cácu i. <sup>16</sup> Te ñayuu cáhīn nuū ítu, ma ndíji i vehe jeē quíhin i sahma i. <sup>17</sup> Te quivī ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachī ña. <sup>18</sup> Te cacān tahú rō jeē ma quíji jñūdóho un jée cunu rō máá tiempo cúun yuhvā. <sup>19</sup> Chí jeē quejée un te coo cuehē jñūdóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jñūdóho ún te ni ma cóo ga jeē súcuan. <sup>20</sup> Te núu tú nastívi máá Jítoho yō Yaā Dios tiempo jñūdóho ún, te ni ñin ñayuu ma cácu cuiñi i. Te jeē siquí ñáyuu cáandíje jeē ní nacāji ya, jeē yúcuan nastívi ya tiempo un.

<sup>21</sup> Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jée cahán i. <sup>22</sup> Chí canecoo tēe cástáhú te cahān de jeē Cristo cúu de, chí cáhān de jeē tēe nácani jñuhun Yaā Dios cúu de. Te sáha de jniñu jéhnú jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. <sup>23</sup> Te ndito na cóo ni rō, chí je ni castūhun rí nuū rō vijna nde ná tu coo.

*Ndese coo quivī ndíji Yaā ní nduu tēe*  
(Mt. 24.29-35, 42-44; Lc. 21.25-36)

<sup>24</sup> Te quivī ún, núu je ni ndíhi jñūdóho ún, te kujnúú níandii, te yoō ma ndíi gā. <sup>25</sup> Te níngoo quími íin andiví. Te tāca jée íin andiví chí quisi i. <sup>26</sup> Yūcuán na te coto ñayuu nuū maá rí, Yaā ní nduu tēe, ndíji rí jíin vícō, te condiso rí cuehē poder, te yōhoyo luu kujéhnú rí. <sup>27</sup> Yūcuán na te tají rí ndajéhé rí quinastútú yá ñayuu ní nacāji rí ndicúún lado ñayiví, nde nuū ndíhi ñayiví te nde nuū ndíhi andiví.

<sup>28</sup> Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. <sup>29</sup> Te suni súcuan núu ni cajini rō jeē ní quejée cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndíji rí, te yachī coo. <sup>30</sup> Jendaá cahán rī jíin ró jeē ma cúu ndíhi ñayuu jeē cóto jñūdóho ún, chí nde squícu ndíhi jniñu ún. <sup>31</sup> Andiví jíin ñáyiví chí naa, te tāca jñuhun cáhān rī chí ma náā, chí ndíhi squícu.

<sup>32</sup> Te quivī jíin hora jeē ndíji rí, tú ni ñin ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chí máá ñin ni Tátá rī cúu jeē jiní.

<sup>33</sup> Núu súcuan te na cócuhun ni rō tāca jñuhun yáha, te ndito na cóo ni rō, te cacān tahú rō, chí tu cájini rō na quivī ndíji rí. <sup>34</sup> Chí coo nájnūhun ñin tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñin ñin de. Te ni ndacu de jniñu nuū tēe ndito yéhyí jée na cóndito de. <sup>35</sup> Te suni súcuan róhó jíjnāhan ró, ndito na cóo ni rō. Chí cúu rí nájnūhun jítoho vehe ún, te tu cájini rō na hora ndíji rí, á jée cuácuaa, chí ñuú, chí jée cána líhli, chí jénéhen. <sup>36</sup> Chí ñin sanaa-ni te ndíji rí, te coto ró jée ma nánihīn rī rohó jée tu ndíto ró. <sup>37</sup> Te jñuhun cáhān rī jíin ró jíjnāhan ró, suni cáhān rī jíin ndivii ñayuu: Ndito na cóo ni rō jíjnāhan ró. Achí yá.

*Jeē ní casquíjnāhan de jñuhun jeē jñi de Jesús*  
(Mt. 26.1-5; Lc. 22.1-2; Jn. 11.45-53)

## 14

<sup>1</sup> Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñhu jíin tée cástéén tutu ley, ní canducú de modo ndese jñi de Jesús jíin jñuhun stáhú, te cahni de ya. <sup>2</sup> Te ni cacahān de:

Ma jñi yó de máá quivī víco, chi ndonda ñayuu siquī yō, achí de.

*Jñuhun ñahan jeē ní chuhun perfume xinī yā*  
(Mt. 26.6-13; Jn. 12.1-8)

<sup>3</sup> Te íne Jesús ñuu Betania vehe Simón, tēe ni ndoho cuehyī stehyú. Te níni yéji yā staā, te ni quee ñin ñahan nuū yā, ndáhá ña ñin frasco yuū luu jeē ñuhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yā. <sup>4</sup> Te sava tēe cáhlin yūcuan ní caquiti ní de, te ni cacahān de:

¿Najehē cúu jeē náa saá-ni perfume jiñā? <sup>5</sup> Chi cuu xīcō yahu yó víhyá gā unī ciento denario, te cuāha yo núu ñayuu ndahú núú, áchí de.

Te ni cacahān sōo de jíin ña.

<sup>6</sup> Te ni cahān Jesús:

Ma stáhān rō ña. ¿Naun casáha ró jéē nácani uhū ní ña? Chi ñin jñiñu váha cúu jeē ní sáha ña jíin rí. <sup>7</sup> Chi níni coyūcu ñayuu ndahú jíin ró, te núu cácuni rō te cuu sáha vāha ró jíin í. Te ruhū chi tuá condee rí jíin ró. <sup>8</sup> Chi ní sáha ña ndihi jeē cuu sáha ña jeē maní ña jíin rí. Chi nde ná tu quindūji rí te je ní sátūhva ña ruhū jeē ní chuhun ña perfume ruhū. <sup>9</sup> Jendaá cahán rí jíin ró jeē ní cáhnu ñayiví ndé-ni cúu nuū cuité núu jñuhun jeē jnáma rí ñayuu, suni nacani i jñuhun jeē ní sáha ñahan yáha, návāha cocuhun ní ñayuu ña, áchí yá.

*Jeē ní nastúu Judas yā*  
(Mt. 26.14-16; Lc. 22.3-6)

<sup>10</sup> Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñhu, ní sándaā de jíin jéē nastúu de Jesús nuū jijnáhan. <sup>11</sup> Te nuū ní cajini sōho sutú un jéē cahán de, te ní cacusi ní, te ní cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

*Jeē ní jequin yā Cena yā*  
(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájñuhun ní ndacu Yaā Dios jñiñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ní jéē quísátūhva ná cuxíni ní vico pascua? achí de.

<sup>13</sup> Te ni tají yá uū tēe cáscuáha ún quingoo de, te áchí yá jíin de:

Conángoon dé ñuu, te yūcuán najñáhan ró jíin ñin tēe ndiso quiyi ndute. Te condiquin rō de quihñ rō jíin de. <sup>14</sup> Te vehe jeē ndivi de, yūcuan cahān rō jíin tēe chíi vehe: Achí máá Maestro: ¿Ndé ñin cúu cuarto vehe ní cuāha núú ní núu cuxíni ya vico pascua jíin tēe cáscuáha jíin yá? achí rō. <sup>15</sup> Te máá de stéén de ñin cuarto cáhnu nde xinī véhe jeē je íyó túhva. Te yūcuan sátūhva ró jéē cuxíni yó, achí yá jíin de.

<sup>16</sup> Te cuango tēe cáscuáha ún, te ní jinūcoo de ñuu, te ní canihñ de nájñuhun ní cahān yá jíin de. Te ní sasátūhva de jeē cuxíni ya vico pascua.

<sup>17</sup> Te jeē cuácuaa, te ni quee ya jíin ndihúxí uū de. <sup>18</sup> Te ni cacucōo de mesa cáyeji de staā, te ni cahān yā:

Jendaá cahán rí jíin ró jeē ñin rōhó jéē yéji jíin rí, nastúu ro rúhū, achí yá.

19 Yūcuán na te ni cacucuíhyá ni de, te ná ñin ná ñin de ni cacajñuhún de ya:

¿A sáña cúu? áchí ñin de.

Te suni súcuan inga de:

¿A sáña cúu? áchí ñin ñin de.

20 Te ni cahān yā jín de:

Ñin jeē uxí uū rō jeē cáyeji cáhnu jín rí ñin cohō, suu nastúu ruhū. 21 Te ruhū, Yaā ní nduu tēe, jendaá cúu jeē quihín rī cuu rī, nájñuhun yósó jñuhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

22 Te níni cáyeji de jín yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jín yá. Te ni cahān yā:

Caji rō jijnáhan ró, chí yāha cúu yiqui cúñu rī, achí yá.

23 Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya ni cajihí ndihí de. 24 Te ni cahān yā jín de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. 25 Te jendaá cahán rī jín ró jeē ndé vijna te ma cóho ga rī ndūxi ndehē uva yahá, chí nde quiji quivī ndacu Yaā Dios jñiñu ní ñayiví, te sáa te coho tucu ri jín ró jijnáhan ró. Achí yá.

*Jeē ní cachi yā jeē yūhu Pedro cahān de jeē jini de ya*

(Mt. 26.30-35; Lc. 22.31-34; Jn. 13.36-38)

26 Te ni jita ya ñin yaa iī jín de jijnáhan de. Te ni quenda ya cuahān yā jín de nde yucu Olivos. 27 Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chí suhva je yósó jñuhun ri nuū tútu iī, ni cahān Yaā Dios: Cuāha ri jñuhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí. 28 Te jeē nátecu rī, te xīhna ruhū cosnúu rí quihín rī región Galilea, te sáa te najinūcoo ró, achí yá.

29 Yūcuán na te ni cahān Pedro:

Vēsú ndihí de na náyūhú de, te máa ná chí ma náyūhú cuíti ná, áchí de jín yá.

30 Te ni cahān yā jín de:

Jendaá cahán rī jín ró jeē jecuáa vijna, nde ná tu cana líhli uū jínu, te yūhu ró jeē jñi ñayuu rohó, te unī jínu cahān rō jeē tu jini rō ruhū, achí yá.

31 Te ni cahān teyí de jín yá:

Vēsú núu cuu na jín ní, te ma cahán cuíti na jēe tu jini na níhín, áchí de.

Te suni súcuan ni cacahān ndihí de.

*Jeē ni jicān tahú yā nuū huerto Getsemaní*

(Mt. 26.36-46; Lc. 22.39-46)

32 Yūcuán na te ni jín Jesús jín tēe cáscuáha jín yá ñin lugar nuū naní Getsemaní. Te ni cahān yā jín de:

Yāhá-ni cucōo ró, te na quihín rī cacān tahú rī, achí yá.

33 Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxí ni yā jeē quiji jñundóho siquí yā. 34 Te ni cahān yā jín de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró, áchí yá.

35 Te ni jica ya jecu gā, te ni jecuiñi yítí yá ni jequin ya nuū yā nuū ñuhun. Te ni jicān tahú yā nuū Yaā Dios jeē núu cuu te ma ndóho ya jñundóho jeē quejéé quiji siquí yā. 36 Te suhva ni cahān yā:

Tátá maá ná, ndihí-ni jniñu cuu sáha maá ní. Te tejiyo ní jnúndóho yáha jéē ma quíji siquí ná. Te nasūu jéē cuní maá ná, chí jeē cuní maá ní na cóo, áhí yá.

<sup>37</sup> Te ni ndee yā nuū ndinúni tēe cáscuáha jíin yá, te ni jito ya jeē cáquixī de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vēsú ñn hora? <sup>38</sup> Coó ndito ní rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé róhó. Chí cúní ndije ánuá rō squícu vāha ró, te yíqui cúñu rō chí tu fuerza, achí yá.

<sup>39</sup> Te ni jehēn tucu ya, ni jicān tahú yā, te suni jnūhun yúcuán ní cahān yā.

<sup>40</sup> Te ni ndee ya nuū de, te ni jito ya jeē cáquixī tucu de, chí yōhyo cájī de māhná. Te tuá ni cániñ de jnūhun stíó cuñí de nuū yā. <sup>41</sup> Te ni ndee yā jeē vuelta unī, te ni cahān yā jíin de:

Vijna te cusú rō te ndetātu ró. Te tuú chí je ni cuu, chí je ni quee hora, te ruhū, Yāá ní nduu tēe, natūu ri te jni tēe cáhīyo cuéchi ruhū. <sup>42</sup> Ndocuñí jijnáhan ró, chí je vēji tēe nastúu ruhū, te quihñ yō jíin de. Achí yá.

### *Jeē ní cajñi de Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Te sá cáhán gā yā súcuán, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujuhnu jíin tēe cástéén tutu ley jíin tēe jéñu cándacu jniñu, ni catajī de tēe ún. <sup>44</sup> Te Judas, tēe nástúu ya ún, je ni jēhe de ñn seña nuū tēe un jíjnáhan, chí ni cachi de:

Te jeē téchūhu rí un cúu. Te jni ró jíjnáhan ró quihñ rō jíin, te ma siaá cuiti rō, achí de.

<sup>45</sup> Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. <sup>46</sup> Te tāca gá tēe un ní cajñi de ya, te cuango de jíin yá.

<sup>47</sup> Te ñn tēe íne jíin yá ni tava de espada de, te ni jehnde de sōho ñn mozo maá sūtū cujéñu ga. <sup>48</sup> Te ni cahān Jesús jíin ñáyuú cuehē ún:

¿Te va tēe cuíhná cúu ri jeē vējicoo ró jíin espada jíin yujnu jni ró rúhū jeē súcuán? <sup>49</sup> Tāca quíví ni ine ri jíin ró jijnáhan ró ini templo cáñu, ni steén rī jnūhun, te tu ní cájni ró rúhū. Te súcuán cása ha ró návaha na squícu jeē cahán tutu i, achí yá.

<sup>50</sup> Yūcuán na te ndihí tēe cáscuáha jíin yá, ni castóo de ya, ni cajinu de cuango de.

### *Tēe suchí jeē ní jinu*

<sup>51</sup> Te ñn tēe suchí, ndíquín de ya cuahān de jíin yá. Te ndí de máá ñn sahma cuitá. Te ni cajñi tēe ún de. <sup>52</sup> Te máá sahma cuitá un ní canihñ. Te ni jinu máá ñni de cuahān de.

### *Jeē ní indichi Jesús nuū junta tēe cácujuhnu ga*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yūcuán na te ni jinūcoo de jíin Jesús nuū sutū cujéñu ga. Te tāca sūtū cácujuhnu jíin tēe jéñu cándacu jniñu jíin tēe cástéén tutu ley, ni candutútú de.

<sup>54</sup> Te Pedro chí jíca-ni ndíquín de ya, te ni jinū de nde ini patio sutū cujéñu ga. Te ni cucōo de jíin tāca policía, násaā de ñuhñ.

55 Te sutū cácujeñhu jíin ndihi tēe cásáha junta cujéñhu ga, ni canducú de cuēchi siquī Jesús, chí cahni de ya cácuñi de. Te tu ní cániñin de. 56 Chí cuehē de ni cacahān yaá siquī yā, te tu ní quíjnáhan jñūhun ni cacahān de. 57 Yūcuán na te ni candocuiñī sava de, te ni catee de cuēchi siquī yā, achí de:

58 Máá ná ni cajini ná cáhán de jeē canu de templo yáha jēē ní cuvāha ni casáha tēe, te nuū uní quivī te nacani de inga jeē násūu jíin ndaha tēe cuvāha, achí de. Achí jíjnáhan.

59 Te ni jñūhun yáha tu ní quíjnáhan tucu jeē cácahān de siquī yā.

60 Yūcuán na te sutū cujéñhu ga ni ndocuiñī de nuū ñáyuu cuehē ún, te ni cajñūhún de Jesús:

¿Naun tu cáhán cuiti rō? ¿A iyó ndáa jeē cácahān tēe yáha siquī rō? achí de.

61 Te máá yá tu ní cáhán cuiti yā, chí tú na vé ni stío cuñī yā. Te sutū cujéñhu ga ni cajñūhún tucu de ya:

¿A máá ró cúu Cristo, Sēhe Yaā vāha jeē cujéñhu? achí de jíin yá.

62 Te ni cahān yā:

Suu ri cúu. Te coto ró jēē ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíin vícō, achí yá.

63 Yūcuán na te sutū cujéñhu ga ni jehnde de sahma de jeē quití ndasí ni de, te ni cahān de:

¿Ndé jíni ñūhún gá yō testigo núu súcuan? 64 Chí je ni cajini ró jēē cahán de jñūhun ndevāha jeē quití ní Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

65 Te sava de ni catesihí de nuū yā, te ni cajesi de sahma nuū yā, te ni cacani de ya. Te cácahān de jíin yá:

Cachi ndé ñn cúu jeē ní cani rōhó, achí de.

Te tāca tēe policia ni cacani de nuū yā.

### *Jeē ní cachi Pedro jeē tu jíni de ya*

(Mt. 26.69-75; Lc. 22.56-62; Jn. 18.15-18, 25-29)

66 Te íne Pedro ini patio ichi chíji nuū cáhīn de jíin Jesús. Te ni quee ñn ñahan jéjñū vehe sutū cujéñhu ga ún. 67 Te ni jito ña nuū de jeē néne de násaā de yuñūhún. Te ni jito vāha ña nuū de, te ni cahān ña:

Róhó chí suni ni jica ró jíin Jesús, tēe ñuu Nazaret, achí ña.

68 Te máá de tu ní cáchi de, chí ni cahān de:

Tu jíni rī de, ni tu jíni rī na jñūhun cáhán rō, achí de.

Te ni quenda de yéhyí núu quéhe. Te ni cana-ni líhli. 69 Te ñahan jéjñū un ní jito tucu ña nuū de, te ni quejéé ña cáhán ña jíin ñáyuu cáhīn yūcuán:

Tēe yáha suni jñáhan tāca tēe un cúu, achí ña.

70 Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jíin Pedro:

Jendaá ndije jeē suni jñáhan de cúu ró, chí tēe Galilea cúu ró, te inuū-ni cáhán rō jíin de jíjnáhan de. Achí i.

71 Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíni rī tēe un jēē cácahān rō jñūhun de, achí de.

72 Yūcuán na te ni cana-ni líhli vuelta uū. Te ni nucūhun ni de jñūhun ni cahān Jesús jíin de: Nde ná tu cana líhli uū jíinu, te yūhu ró te cahān rō uní jíinu jeē tu jíni rō ruhū. Te ni nacani ni de siquī jñūhun ún, te ni ndahyū de.

*Jeē ní indichi Jesús nuū Pilato  
(Mt. 27.1-2, 11-14; Lc. 23.1-5; Jn. 18.28-38)*

## 15

<sup>1</sup> Te jeē ní cundijin, te sutū cácujeñnu ni candutútú de jíin tée jéñnu cándacu jniñu, jíin tée cástéén tutu ley, jíin ndihi tée casáha junta cujeñnu ga, te ni casquijnáhan de jñuhun. Te ni cajihni de Jesús, te cuangoo de jíin yá nuū Pilato, tée cúu gobernador. <sup>2</sup> Te Pilato ni cajñuhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhān rō.

<sup>3</sup> Te sutū cácujeñnu un ní cacahān de cuehē cuēchi siquī yā. <sup>4</sup> Te Pilato ni cajñuhún tucu de ya:

¿Naun tu cáhān cuiti rō? ¿A tu jíni ró jéē cuehē cuēchi cácahān de siquī rō? achí de.

<sup>5</sup> Te tu ní cáhān cuiti yā ni ñn jñuhun jíin de. Te nahán ní naa ni Pilato ndéhé de nuū yā.

*Jeē ní cundaā jeē cúu yā  
(Mt. 27.15-31; Lc. 23.13-25; Jn. 18.38-19.16)*

<sup>6</sup> Te iyó costumbre Pilato jeē quiví víco un siaá de ñn tēe íne vecāa, núu na-ni tēe cácuni ñayuu. <sup>7</sup> Te iyó ñn tēe nání Barrabás, íne de vecāa jíin táca jñáhan de siquī jeē ní candonda de siquī tohō te ni cajehni de ndíyi. <sup>8</sup> Te ni quecoo ñayuu cuehē, te ni cacahān i jíin Pilato jeē na sáha de nájnūhun iyó costumbre de. <sup>9</sup> Te ni cahān Pilato jíin i:

¿A tu cácuni rō jeē siaá rī tēe cúu Rey rohó ñayuu hebreo? achí de.

<sup>10</sup> Súcuan ni cahān de, chí cúní de siaá de Jesús. Chí je ni jecūhun ni de jeē ní cacucésún ni táca sūtú un cájito de ya, te jeē yúcuán ní quijicoo jíin yá nuū de.

<sup>11</sup> Te sutū cácujeñnu un ní cascáhān de ñayuu cuehē un jéē váha ga na cácan i jeē siaá Pilato Barrabás. <sup>12</sup> Yūcuán na te ni cajñuhún tucu Pilato:

Núu súcuan ¿te ndese cácuni rō jeē sáha ri jíin tée jeē cácahān rō jeē cúu de Rey rohó ñayuu hebreo? achí de jíin i.

<sup>13</sup> Te ni cacana jee i:

Cata caa ní de jicā cruz, na cúu de, achí i.

<sup>14</sup> Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, achí i.

<sup>15</sup> Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni táca soldado Jesús, jíin jéē cata caa de ya jicā cruz.

<sup>16</sup> Yūcuán na te soldado un cuángoo de jíin yá ini patio palacio, jeē sácata de nuū yā. Te ni canastútú de ndihi jñáhan de. <sup>17</sup> Te ni cachuhun de ya ñn sahma cuehé ndihí jéē cúu sahma rey. Te ni casáha de ñn corona iñu, ni cachuhun de xinī yā. <sup>18</sup> Yūcuán na te ni cacana de:

Nacā jeē váha rey cúu Rey ñayuu hebreo, achí de.

<sup>19</sup> Te ni cacani de yujnu xinī yā, te ni catesihí de nuū yā, te ni cajecuñiñi yití de nuū yā, casáha de jeē chiñuhún de ya. <sup>20</sup> Te nuū ní cuu ni casácata de nuū yā, te ni catava de sahma cuehé ndihí un, te ni canachuhun de ya sahma máá yā. Te ni caquenehen de ya jeē cata caa de ya jicā cruz.



*Jeē ní cacata caa de ya jicā cruz*  
(Mt. 27.32-44; Lc. 23.26-43; Jn. 19.17-27)

<sup>21</sup> Te ñin tēe nání Simón ñuu Cirene, tēe cúu tátá Alejandro jíin Rufo, vendiji de jeē ní jēhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

<sup>22</sup> Te cuango de jíin yá ñin lugar nuū naní Gólgota, jeē cuní cahān Lugar Yiquí Xíní. <sup>23</sup> Te ni cajēhe de vino jeē ní sácā núu jíin súje uvuā jeē cóho ya, te tu ní jíhi ya. <sup>24</sup> Te ni cacata caa de ya jicā cruz. Te ni casáha de sorteo jeē siquí ndese níñin ñin ñin de sahma ya.

<sup>25</sup> Te cahān ni cacata caa de ya. <sup>26</sup> Te jñūhun ni catee de xiní cruz cahán na siquí ní jíhi yā: Yāha cúu Rey ñayuu hebreo, achí. <sup>27</sup> Te suni ni cacata caa de uū tēe cuíhná núu uū gā cruz, ñin de lado váha ya, te inga de lado jecó yá. <sup>28</sup> Te ní squícu jñūhun cáhán tutu íi: Ni casquínáhan de ya jíin tēe casáha neé, áchí.

<sup>29</sup> Te ñayuu cáyāha yūcuán cáscuícó í xiní í, te cácahān neé í: Jājaān. Róhó chí cáhán rō jeē cánu rō templo cáhnu, te nuū uní quiví te nucondíchi sáha ró. <sup>30</sup> Núu súcuan te jnama ró máá ró, te nuu ró jicā cruz víi, achí í.

<sup>31</sup> Te suni súcuan ni cacahān catá sutū cácujuhnu jíin tēe cástéén tutu ley, te áchí de cácahān maá de:

Núu inga ñayuu ní jnama de, ¿te naun tu cúu jnama de máá de vijna? <sup>32</sup> Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnhān de.

Te tēe cándita caa jíin yá, suni súcuan ni cacahān neé de.

*Jeē ní jíhi Jesús*  
(Mt. 27.45-56; Lc. 23.44-49; Jn. 19.28-30)

<sup>33</sup> Te nuū ní cuu cahuxí uū, te ní cunee ní cáhnu nde cahuní. <sup>34</sup> Te nuū ní cuu cahuní, te ní cana jee Jesús:

Eloi, Eloi, ¿lama sabactani? achí yá. Te jñūhun un cúni cahān: Yāā Dios maá ná, Yāā Dios maá ná, ¿naun ní stóo ní sáña?

<sup>35</sup> Te sava ñayuu cáhñin yūcuan, ní cajini í jñūhun ún, te ni cacahān í:

Cuni nahín, chí cána de xiní Elías, tēe ní nacani jñūhun Yāā Dios jenahán, achí í.

<sup>36</sup> Te ní jinu ñin tēe, ní jechundaji de cachí nuū vinagre iyá. Te ní tee de xiní ñin yujnu, te ní tee de yuhu ya jeē cóho ya. Te ní cahān de:

Na cóndēhe yó núu quiiji Elías nasnúu de, achí de.

<sup>37</sup> Te máá Jesús ní cana jee ya, te ní jíhi-ni ya. <sup>38</sup> Yūcuán na te sahma ndíta caa jeē ndihyú cuarto íi ini templo cáhnu, ní ndatá sava sava nde xiní te nde nuū jehé. <sup>39</sup> Te tēe ñuu Roma jeē cúu capitán, índichi de nuū yā, te ní jini de jeē ní cana jee ya te ní jíhi yā. Te ní cahān de:

Jendaá ndije jeē Séhe Yāā Dios cúu tēe yáha, achí de.

<sup>40</sup> Te suni cáhñin sava ñahan, cándēhe jíca ña. Te uní ña cácuu María ñuu Magdala, jíin María naná José jíin Jacobo suchí, jíin ñahan nání Salomé. <sup>41</sup> Te ñahan yáha ní candiquín ña ya, ní cajejníñu ña nuū yā nde náa jíca ya Galilea. Te suni cáhñin cuehé gā ñahan jeē ní jéngoo jíin yá ñuu Jerusalén.

*Jeē ní quindūji Jesús*  
(Mt. 27.57-61; Lc. 23.50-56; Jn. 19.38-42)

<sup>42</sup> Te ní ini quiví ún. Te quiví sātūhva cúu, chí sajnē cúu quiví ndetātú. <sup>43</sup> Te ní quee José, tēe ñuu Arimatea. Te cúu de ñin tēe cújéñnu nuū junta cujéñnu ga. Te suni ñūhun ní de jeē quiiji quiví jeē ndacu Yāā Dios jniñu. Te tu yúhú de chí

ni quiv̄i de nuū Pilato, ni jicān de yiqui cúñu Jesús. <sup>44</sup> Te Pilato chi náā ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā. <sup>45</sup> Yūcuán na te ni cucáhnū ni de jeē ni cáhān capitán jíin de, te ni jēhe de jnūhun jeē quihin José yiqui cúñu yā. <sup>46</sup> Te José ni jeen de ĩn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ĩn yaū jeē quindūji ndīyī, jeē ní caan jicā ĩn cava. Te ni jesi de ĩn yuū yuhu yaū un. <sup>47</sup> Te María űuu Magdala, jíin María naná José, ní cajito űa nuū ní cachindūji de ya.

*Jeē ní natecu Jesús*

*(Mt. 28.1-10; Lc. 24.1-12; Jn. 20.1-10)*

## 16

<sup>1</sup> Te ni ini quiv̄i ndétátú, te María űuu Magdala, jíin María naná Jacobo, jíin Salomé, ní cajeen űa tǎcá perfume jeē quíchuhun űa yiqui cúñu yā. <sup>2</sup> Te jenéhen quiv̄i domingo, jeē ní cane niāndii, te ni jinūcoo űa nuū ní yindūji ya. <sup>3</sup> Te cácahān űa:

¿Ndé nihīn yō tēe tejiyo yuū ndihyú yuhu yaú? áchí űa.

<sup>4</sup> Te ni candacoto űa, te ni cajito űa jeē jé ni cujiyo yuū cáhnu un cuáhān.

<sup>5</sup> Te ni quiv̄icoo űa ini yaū ndīyī. Te ni cajito űa ĩn ndajéhé Yaā Dios jeē cá nájñuhun tēe suchí, néne ya ichi lado váha, űúhun ya ĩn sahma cuijín cáni. Te ni cayūhú űa. <sup>6</sup> Te ni cahān yā jíin űa:

Ma yūhu ró jijnáhan ró. Chi vecondēhe ró Jesús űuu Nazaret, Yaā ni jíhī jicā cruz. Tuá yā yāhá, chí je ni natecu yā. Yāhá condéhé ró nuū ní cachindūji de ya. <sup>7</sup> Cuánungoo te cachi rō nuū tēe cáscuáha jíin yá, jíin núu Pedro, jeē xīhna gā maá yá jinū Galilea, te saá te najinūcoo de. Te yūcuán coto de nuū yā, nájñuhun ní cahān yā jíin de nde saá, áchí yá jíin űa.

<sup>8</sup> Yūcuán na te űahan un ní quendacoo űa nuū ní yindūji ya, te cájinu űa cuangoo űa. Chi quísi i űa jeē cáyūhú űa. Te tu ní cácachi cuiti űa nuū ní ĩn, chí cáyūhú űa.

*Jeē ní nane Jesús nuū María űuu Magdala*

*(Jn. 20. 11-18)*

<sup>9</sup> Te Jesús ní natecu yā jenéhen quiv̄i domingo. Te xīhna gā ni nane ndijin yā nuū María űuu Magdala, űahan jeē ní quenehen ya uxā tachí ini. <sup>10</sup> Te cuahān űa cuacastūhún űa nuū tǎca tēe ní cajica jíin yá jeē ní nane ya nuū űa. Te cácucliyá ní de te cándahyū de. <sup>11</sup> Te nuū ní cajini de jnūhun jeē ní jito űa nuū yā jeē técu yā, te tu ní cácañdije de jnūhun cáhān űa.

*Jeē ní nane ya nuū uū tēe cáscuáha jíin yá*

*(Lc. 24.13-35)*

<sup>12</sup> Yūcuán na te ni quendacoo uū jnáhan tēe ún, cájica de cuahān de ichi rancho, te sĩn modo ni nane ndijin yā nuū de. <sup>13</sup> Te ni canandicó de, ní cacastūhún de nuū tǎca gá jnáhan de. Te ni tu ní cácañdije tucu jnáhan de jeē cácahān ndindúu de.

*Jeē ní tejníñu ya de nacani de jnūhun*

*(Mt. 28.16-20; Lc. 24.36-49; Jn. 20.19-23)*

<sup>14</sup> Te cúcuéé gá te ni nane ndijin yā nuū ndihúxí ĩn de jeē cáyūcú de mesa cáyeji de staā. Te ni cahān yā nuū de, chí nihni ní de jeē tu cácañdije de jeē cácahān jnáhan de un, jēe ní natecu yā ní cajito de ya. <sup>15</sup> Te ni cahān yā jíin de:

Cuángoo jíjnéhan ró ní ñayīvī, te nacani ró jnúhun ri nuū tāca ñáyuu ndese jnáma ri i. <sup>16</sup> Te ñayuu candíje te cuandute i, chi cācu i. Te ñayuu tú candíje, chi jnahnú ndetū i. <sup>17</sup> Te ñayuu candíje, sáha i tācá jniñu jéhu yáha jeē steén jeē iyó rí jíin i: Jíin síhvī rí quenehen i tachī ini ñayuu. Te cahān i tijni yuhu jéé. <sup>18</sup> Te núu ni jñi sanaa i coō, chí núu ni jñi i veneno, te ma sáha dañó jíin i. Te suni soó i ndaha i síquī ñáyuu cácuñu, te nduvāha. Achí yá jíin de.

*Jeē ní ndaa ya cuanuhun yā andiví*

*(Lc. 24.50-53)*

<sup>19</sup> Yūcuán na te nuū ní ndihí ni cahān máá Jítóho yō jíin de jíjnéhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhu ya. <sup>20</sup> Te máá de ni quendacoo de, ni canacani de jnúhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhu jeē steén jeē iyó ndáa jnúhun cánacani de. Te ni cuu. Amén.

## JNUHUN VAHA NI TEE SAN LUCAS

<sup>1</sup> Cuehē tēe ni cajicu de ni catee yúcun de historia Jesús, tãca jniñu jeē ni sãha ya ni cajito yó. <sup>2</sup> Te ni catee de tãca jnũhun jeē ní cacastũhun ñáyyu nuũ yó, jeē ní cajito i jniñu yúcuan nde ná ni quejéé, te ni canacani i jnũhun ya. <sup>3</sup> Te maá ná, suni ni nanducú yúcun ná tãca jnũhun ya, nde nuũ ní quejéé. Te ni jeni ni na jéē suni iyó váha jeē tée cáji ná tãca jnũhun yáha nuũ ní, amigo Teófilo. <sup>4</sup> Te súcuan te cuni ni jéé iyó ndãá tãca jnũhun jeē ní cacastũhún i nuũ ní.

### *Jeē ní cachi ndajéhé jeē cacu Juan tēe scuándute*

<sup>5</sup> Tiempo jeē ní cuu Herodes rey región Judea, te ni Iyo ñn sutũ ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucũn maá sũtũ Aarón cúu ña. <sup>6</sup> Te ndĩndúú de cahĩyo ndaã de nuũ Yaã Dios, te ndaã váha cásquicu de jniñu ndácu ley maá Jítoho yó Yaã Dios, cájito tãca ñáyyu. <sup>7</sup> Te tú sēhe de iyó, chí ñahan númá cúu Elisabet, te je jéñu ndĩndúú de.

<sup>8</sup> Te ñn quivĩ te jéjniñu Zacarías nuũ jniñu jeē cúu de sutũ nuũ Yaã Dios, chí ni quee quivĩ jeē ndĩvi grupo de. <sup>9</sup> Te ni casáha de sorteo, nãjnũhun iyó costumbre sutũ. Te ni sãha tocar Zacarías jeē quivĩ de ini cuarto ñi templo Jítoho yó Yaã Dios, te cahmu de sũje cũtú. <sup>10</sup> Te hora jeē cayú sũje cũtú, te tãca ñáyyu cuehē cáhĩn i fuera, cájicãn tahú i. <sup>11</sup> Te ni cane ñn ndajéhé maá Jítoho yó nuũ de, ñn ya lado váha altar nuũ jéñu de sũje cũtú. <sup>12</sup> Te ni cunéé ni Zacarías ni jito de nuũ yã, te yõhyo ni yũhú de. <sup>13</sup> Te ni cahãn ndajéhé un jĩn de:

Zacarías, ma yũhu ró, chí je ni chíhi Yaã Dios cuenta jeē ni jicãn tahú rō. Te ñasihí ró Elisabet, scácu ña ñn sēhe yĩí, te snání ró i Juan. <sup>14</sup> Te yõhyo cusĩ ni rō. Te cuehē ñayuu cusĩ ni jeē cácu i. <sup>15</sup> Chí cujéñu sēhe ró sãha maá Yaã Dios. Te ma cóho i vino ni ndixi cuĩí. Te cunuú maá Espiritu Santo jĩn i, nde ná tu cacu i. <sup>16</sup> Te sãha i jeē cuehē ñayuu nación rō Israel ndĩvicoo i nuũ Jítoho i Yaã Dios. <sup>17</sup> Te xĩhna gã Juan quiji nacani jnũhun Jítoho yó Jesús, te sáa te quiji ya. Te sãha i nãjnũhun ni sãha Elías, tēe ni nacani jnũhun Yaã Dios jenahán, te coneváha i poder jeē nãcani i jnũhun, nãjnũhun ni coneváha Elías. Te sãha i jeē tãca tátá ndumanĩ de jĩn sēhe de. Te suni sãha i jeē ñáyyu nĩhni ni cuatáhú i nuũ Yaã Dios, nduu i ñayuu ndaã. Súcuan sãtũhva i ñayuu návãha candĩje i maá Jítoho yó jeē quiji ya. Achí ndajéhé.

<sup>18</sup> Te Zacarías ni cajnũhún de ya:

¿Ndesé cucáñu ni na núu jendaá cúu? Chí tēe jéñu cúu ná, te suni jéñu ñasihí ná, áchĩ de.

<sup>19</sup> Te ni cahãn ndajéhé un jĩn de:

Maá rí cúu Gabriel, te ñne ri nuũ Yaã Dios, jejniñu ri nuũ yã. Te ni tají yá ruhũ vëji ri cahãn rĩ jĩn ró, te nãcani ri jnũhun váha yáha nuũ rō. <sup>20</sup> Te jeē tu ní candĩje ró jnũhun ni cahãn rĩ, te cuñhín ró, te ma cúu cahãn rō, chí nde na cácu sēhe ró. Te squicu nahĩn jnũhun cáhãn rĩ yãhá, na quee quivĩ, achí ndajéhé.

<sup>21</sup> Te ñayuu cáhĩn ichi fuera, cándetu i Zacarías, te cájeni ni i na vé ni cuu jeē cucuéé de ini cuarto ñi templo. <sup>22</sup> Te nuũ ní quenda de, te tuá ni cúu cahãn de jĩn i. Te ni cajecũhun ni i jeē ini templo ni jito ndijin de ñn jeē ni stéén yã nuũ de. Te maá seña na ni sãha de nuũ i, chí ni cuñhín de.

<sup>23</sup> Te nuū ni jīnu quivī ni jejniñu de ini templo, te cuanuhun de vehe de. <sup>24</sup> Te ni cuu jecu quivī, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhén ña. Te jéni ni ña: <sup>25</sup> Súcuān ni sáha máá Jítoho yō jíin rí, te ni tejiyo ya jñūhun jeē cúcanu rī nuū ñáyuu jeē tú sēhe rí, jéni ni ña.

### *Jeē ní cachi ndajéhé jeē cacu Jesús*

<sup>26</sup> Te nuū iñu yoō, te ni taji Yaā Dios ndajéhé yā Gabriel, ni jehēn yā ñn ñuu naní Nazaret, ndañū Galilea. <sup>27</sup> Te ni jehēn yā nuū ñn sūchi síhí naní María. Te je ni cundaā jeē quijnáhan ña jíin ñn tēe nání José, te sēhe yucūn rey David cúu de. <sup>28</sup> Te ni quivī ndajéhé un nūū ndeé ña, te ni cahān ya:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhyo ndetū gā cúu ró nūū tāca gā ñahan, áchí yá.

<sup>29</sup> Te nuū ni jíto ña nuū yā, te ni cunéé ni ña jeē súcuān cáhān yā, te jéni ni ña naun cáhān yā súcuān jíin ña. <sup>30</sup> Te ni cahān gā ndajéhé un jíin ña:

Ma yūhu ró María, chí ni sáha Yaā Dios jeē váha jíin ró. <sup>31</sup> Te jecūhun sēhe ró te scácu ró ñn sēhe yí, te snání ró i Jesús. <sup>32</sup> Te kujéhu i, te conaní i Sēhe Yaā kujéhu téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájnūhun jíi i David ni cuu de rey. <sup>33</sup> Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

<sup>34</sup> Yūcuān na te ni cajñūhún María:

¿Nde se coo jeē ni cáhān ní? Chí ná tu coo yí ná, áchí ña.

<sup>35</sup> Te ni cahān ndajéhé un:

Máá Espiritu Santo quiji siquí rō, te poder máá Yaā kujéhu téyí sáha ñn jniñu jéhu jíin ró. Te jeē yúcuān máá sūchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i. <sup>36</sup> Te suni cástūhun rí nuū rō jeē jñáhan ró Elisabet, suni scácu ña ñn sēhe vésū je jéhu ña. Te vijna iyó iñu yoō jeē tuá cácahān ñayuu jeē cúu ña ñahan nómá. <sup>37</sup> Chí ndíhi-ni cuu sáha Yaā Dios, te tu iyó ni ñn jeē ma cúu sáha ya, achí ndajéhé un.

<sup>38</sup> Yūcuān na te ni cahān María:

Cuu nūū súcuān, chí sáha ná táca jniñu ndácu Jítoho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

### *Jeē ní jécondéhé María Elisabet*

<sup>39</sup> Te ni cuu jecu quivī, te yachí cuahān María, ni caa ña yucu cuahān ña ñn ñuu región Judea. <sup>40</sup> Te ni jinū ña vehe Zacarías, te ni cahān ña jíin Elisabet.

<sup>41</sup> Te nuū ní jini Elisabet jeē cahān María jíin ña, te sūchi ñūhun chíji ña ni canda-ni i. Te ni cunuú Espiritu Santo ini anuá ña. <sup>42</sup> Te ni cahān jee ña:

Ni sáha Yaā Dios jeē yóhyo ndetū gā cúu ró nūū tāca gā ñahan, jíin jéē yóhyo ndetū sēhe ró. <sup>43</sup> ¿Te ndese cúu jeē ní quee naná máá Jítoho rí nuū rí? Chí tu cújéhu cuiti rí. <sup>44</sup> Chí jeē ní jini-ni ri jñūhun ni cahān rō jíin rí, te sūchi ñūhun chíji ri ni canda i jeē cúsi ni i. <sup>45</sup> Te nacā ndetū rō jeē ní candíje ró, chí squícu nahín táca jñūhun ni cahān máá Jítoho yō jíin ró. Achí Elisabet.

<sup>46</sup> Yūcuān na te ni cahān María:

Cáhān rí jeē kujéhu ndasí máá Jítoho yō Yaā Dios,

<sup>47</sup> te cúsi ni rí jíin Yaā Dios, Yaā jnáma ruhū.

<sup>48</sup> Chí ni sáha ya cuenta ruhū, vésū tu cújéhu rí.

Te na squícu ri jniñu ndácu ya.

Te nde vijna te táca ñáyuu jeē nácacu, cahān i jeē yóhyo ndetū rí.

<sup>49</sup> Chí Yaā jñí ndíhi poder, ni sáha ya jniñu jéhu jíin rí.

Te Yaā iī ndoo cúu ya.

<sup>50</sup> Te ní cáni cundáhú ni yā tāca ñáyyuu ndíso Iyo nuū yā.

<sup>51</sup> Ni sáha ya jniñu jéhnú jíin poder yā,

chi ni scúnu ya ñayuu casándúxí máa,

<sup>52</sup> te ñayuu cácujuhnu, ni quende ya jeē cujuhnu i.

Te ñayuu ndahú chi ni sajuhnu ya i,

<sup>53</sup> te ñayuu cájii sōco ni jéhe ya jeē cáji vāha i.

Te ñayuu cucá ní natají yá i súcuan-ní.

<sup>54</sup> Te ni chindéé ñáhán yá yohó, ñáyyuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

<sup>55</sup> Chi súcuan ni jejnūhun ya nuū tāca jíi yō,

nuū Abraham jíin táca yúcūn de jeē cóo ní cáni.

Achí María.

<sup>56</sup> Te ni condee ña jíin Elisabet nájnūhun unī yoō. Yūcuán na te cuanuhun ña vehe ña.

### *Jeē ní cacu Juan tēe scuándute*

<sup>57</sup> Te ni jinū quivī jeē scácu Elisabet sēhe ña, te ni scácu ña iñ sēhe yí. <sup>58</sup> Te tāca ñáyyuu ndeé yajni jíin ña jíin táca jnánhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sīi ni jíin ña. <sup>59</sup> Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquin un. (Te yūcuán cúu iñ jnunī nuū yiqui cúñu tāca sūchi yí hebreo jeē steén jeē cácuu i ñayuu Yaā Dios.) Te snání i sūchi un síhví tátá i Zacarías nuú.

<sup>60</sup> Te ni cahān naná i:

Ma cúu, chí Juan conaní i, áchí ña.

<sup>61</sup> Te ni cacahān i jíin ña:

¿Te naun? Chí tú ni iñ jnánhan ró nání súcuan, áchí i.

<sup>62</sup> Yūcuán na te jíin seña ni cacajnūhún i tátá sūchí un ndese cúní de jeē cónaní i. <sup>63</sup> Te máa de ni jicān iñ tutu, te ni tee de: Juan conaní i. Te tāca ñáyyuu un ní canaa ni i cájito i. <sup>64</sup> Te ni nduvāha Zacarías jeē ní cuññhín de, te ni quejéé de cáhán de jeē yóhoyo vāha Yaā cúu Yaā Dios. <sup>65</sup> Te tāca ñáyyuu ndeé yajni jíin de, yóhoyo ni canaa ni i. Te ní yucu región Judea ni jité núu tāca jnūhun yáha jeē súcuan ni cuu. <sup>66</sup> Te tāca ñáyyuu jeē ní cajini jnūhun, ni quejéé i cánacani ni i, te cácajnūhun jnánhan i:

¿Ndesee coo na cuéhnu sūchi yáha? áchí i.

Chí máa Jítoho yō yóhoyo ni sáha ya jeē vāha jíin i.

### *Jnūhun luu jeē ní nacani Zacarías*

<sup>67</sup> Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

<sup>68</sup> Yóhoyo vāha Yaā cúu máa Jítoho yō, Yaā Dios yohó ñáyyuu Israel, chí ni quiiji ya nuū yō jeē cácuu yó ñáyyuu yā, te ni jnama ya yohó.

<sup>69</sup> Te ni jeni ya iñ Yaā iyó poder jeē jnáma ya yohó,

te Yaā ún cacu yucūn mozo yā rey David.

<sup>70</sup> Chí súcuan ni jejnūhun ya, ni cacahān tāca téee ndoo ánuá jeē ní canacani de jnūhun ya jenhán.

<sup>71</sup> Chí ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

<sup>72</sup> Chí ni cundáhú ni yā tāca jíi yō jijnánhan, te tu ní náa ni yā contrato iī yā.

73 Chi suu un ní jejnūhun téyí yá nuū jíi yō Abraham,

74 suu jeē jnáma ya yohó núū ñáyyu cájito uhū yohó, návāha cuajniñū yó núū yā, te ma yūhu yó i.

75 Te coo ndaā coo ndoo ánuá yō, cuajniñū yó núū yā tāca quívi jeē cótecu yō.

76 Te róhó súchi lúli, cuu ró téē nacani jnūhun Yaā cujéhu téyí.

Chi cosnūu ró ichi núú maá Jítóho yō, návāha sátūhva ró ñáyyu, te sáá te quiji ya.

77 Te castūhun ró nuū ñáyyu maá yá jeē jnáma ya i, jíin jeē cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cúndáhú ni yā yohó.

Jeē yúcuan taji yá maá Yaā jeē sáha jeē cúndijin ini anuá yō, quiji ya nde andívi,

79 návāha jecūhun ni yohó jeē cáyūcu nájnūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

80 Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quívi ní quenda ndijin i nuū ñáyyu Israel.

### *Jeē ní cacu Jesús (Mt. 1.18-25)*

## 2

1 Te ni cuu jecu quívi, te Augusto, téē cúu rey, ni ndacu de jniñū jeē coo censo jeē núcosō síhví ndívii ñayuu ní cáhnu nuū ndácu de jniñū. 2 Yāha cúu censo xīhna ñúhún jéē ní casáha de ná ni cuu Cirenio gobernador nación Siria.

3 Te ndívii ñayuu cuanungoo i ná ñuu ná ñuu maá i jeē nácuāha i síhví i. 4 Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. 5 Te ni jehēn de návāha nacuāha de síhví de jíin María, chí je yajni quijnáhan ña jíin de. Te ñūhun sēhe ña ni sáha Espíritu Santo.

6 Te níni cáhīn de yūcuán te ni jinū quívi jeē cácu sēhe ña. 7 Te ni scácu ña sēhe yí núú ña, te ni chusúcún ña i sahma cuitá, te ni jequin ña i ini ñn nundōo núú yéji quiti, chí tuá núne mesón condee ña.

### *Jeē ní canecoo ndajéhe yā nuū pastor*

8 Te yajni ñuu Belén cáhīn téē cácuu pastor, te cándito de lanchi de ní ñiñū jecuāā nde yucu ún. 9 Te ñn sanaa-ni te ni cane ñn ndajéhe maá Jítóho yō nuū de, te nduva maá Jítóho yō ni ndindēe ní núú cáhīn de. Te yōhoyo ni cayuhú de. 10 Te ni cahān ndajéhe un jíin de:

Ma yūhu ró jijnáhan ró, chí vēji ri castūhun rí jnūhun vāha nuū rō, te sáha jeē cúsiñ ndasí ni tāca ñáyyu: 11 Chi vijna nde ini ñuu David ni cacu ñn Yaā jnama róhó, te maá Jítóho yō Cristo cúu ya. 12 Te súcuan nacuni rō súchi yíquin un, chí ñúsúcún i sahma cuitá te cátú i ini ñn nundōo núú yéji quiti. Achí yá.

13 Te ñn sanaa-ni te ni canecoo cuehē gā ndajéhe andívi, cáhīn ya jíin ndajéhe un, te cacāhan yā jeē yōhoyo vāha Yaā cúu Yaā Dios. Te áchí yá:

14 Yōhoyo luu cújéhu Yaā Dios nde nuū sucún.

Te na ndúvāha ni tāca ñáyyu ñayívi, sáha ya jeē cúsiñ ni yā jíin i. Achí táca ndajéhe.

15 Yūcuán na te cuanungoo ndajéhe un andívi. Te téē cácuu pastor ni cacāhan de jíināhan de:

Na quihín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

<sup>16</sup> Te yachī cuangoo de, te ni nanihín de María jiín José jiín sūchi yíquín un, cátu i ini nundōo núu yéji quití. <sup>17</sup> Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. <sup>18</sup> Te ni canaa ni tāca ñáyuu cájini nahín i jnūhun cácahān tēe cácuu pastor. <sup>19</sup> Te María, ni quendōo tāca jnūhun yáha nuū jeē níjnūní ña, te nácani ni ña siquī. <sup>20</sup> Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jéē ní cajini sōho de jiín jéē ní cajito de, chí ni squícu nahín nájñūhun ni cahān ndajéhé yā jiín de.

### *Jeē ní castéén de i nuū Yaā Dios ini templo*

<sup>21</sup> Te ni cuu unā quivī jeē ní cacu ya, te ni casáha de circuncidar sūchi yíquín un. Te ni casnání de i Jesús, chí síhvī yúcuán ní cachi ndajéhé yā nuū María nde ná tu jecūhun i.

<sup>22</sup> Te ni jīnu quivī jeē casquícu ña costumbre jeē ndúndoo ña nuū Yaā Dios jijnáhan ña, nájñūhun cáhān ley jeē ní jéhe ya nuū Moisés. Te ni jengoo de jiín i ñuu Jerusalén jeē nácuāha de i nuū máá Jítóho yō Yaā Dios. <sup>23</sup> Súcuán ni casáha de, chí yósó núu tútu ley yā: Tāca sūchi yí ní núu jéē cácacu, quihí cuenta i nuū Jítóho yō Yaā Dios, achí tutu. <sup>24</sup> Te suni cuasocó de nájñūhun cáhān ley máá Jítóho yō: Socō rō uū livi chí úu paloma, achí tutu.

<sup>25</sup> Te ni Iyo ñin tēe nání Simeón, ndéé de ñuu Jerusalén tiempo un. Te tēe ndaa, tēe chíñúhún vāha nuū Yaā Dios cúu de. Te ñūhun ni de jeē quée máá Yaā jnama ñayuu nación de Israel. Te máá Espiritu Santo íyo yá jiín de. <sup>26</sup> Te je ni castūhun yá nuū de jeē ma cúu cuiti de chí nde coto de nuū Cristo jeē tají máá Jítóho yō Yaā Dios. <sup>27</sup> Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jiín i, jeē nácuāha de i nuū Yaā Dios nájñūhun cáhān ley Moisés. <sup>28</sup> Te Simeón ni ñunundee de i, te ni cahān de jeē yóhoyo vāha Yaā cúu Yaā Dios, te áchí de:

<sup>29</sup> Tátá Yaā Dios, vijna te cuu cuāha ni jnūhun jeē cuu ná, chí je ni cusī ni ná. Chí je ni squícu ní jnūhun ni jejnūhun ní núu sãña jéē cúu ná mozo ni.

<sup>30</sup> Chí ni jito jínúu na núu Yaā jnama sãña jijnáhan ná.

<sup>31</sup> Chí ni jeni ní yá jeē jnama ya tāca ñáyuu ñayiví.

<sup>32</sup> Te máá yá sáha jeē cúndijin ini anuá ñayuu tācá nación, návāha jecūhun ni i siquī ní.

Te sáha ya jeē kujéhu ñayuu máá ní Israel.

Achí Simeón.

<sup>33</sup> Te José jiín náná i cánaa ni de cájini nahín de jnūhun ni cahān Simeón siquī i. <sup>34</sup> Te ni jicān tahú Simeón jehē de jijnáhan de, te ni cahān de jiín náná i María:

Sūchi yáha vēji i jeē candíje cuehē ñayuu nación yō Israel, te cācu i jijnáhan i. Te sava i ma candíje i, te jahnū ndetū i. Chí cúu i Yaā ní tají Yaā Dios, te sa squéhichí ni cuehē ñayuu i. <sup>35</sup> Te súcuán te quenda ndijin ndese cájeni ni tāca ñáyuu. Te máá ró chí jnahuhū ndasí ni rō coto ró jéē ndóho i. Achí Simeón.

<sup>36</sup> Te suni íne ñin ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jiín yí ña uxā cuiyā. <sup>37</sup> Yúcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéñíñu ña nuū Jítóho yō Yaā Dios nduú ñuú, te ndite ni ña te jicān tahú ña. <sup>38</sup> Te suni hora un ní quee ña, te ni



nacuatáhu ña nuū Yaā Dios. Te ni cahān ña jnūhun sūchi yíquin un jín táca ñáyuu Jerusalén jeē cáñuhun ni i jeē quee Yaā jnama i.

### *Jeē cuánungoo de ñuu Nazaret*

<sup>39</sup> Te ni jīnu ni casquicu de tāca jniñu ndácu ley maá Jítóho yō Yaā Dios, te cuanungoo de ñuu de Nazaret, ndañúu Galilea. <sup>40</sup> Te sūchi lúli un ní jehnu i, te ni ije i, te ni cundichí gá i. Te ni sáha Yaā Dios jeē váha ndasí jín i.

### *Jeē íne sūchi lúli Jesús ini templo*

<sup>41</sup> Te ndijnahan cuiyā jéngoo tátá i náná i ñuu Jerusalén, jeē cúu vico pascua. <sup>42</sup> Te nuū ní cuu uxí uū cuiyā i, te cuangoo tucu de Jerusalén, nájñuhun sáha sáha de quiví vico ún. <sup>43</sup> Te ni yáha vico, te cuanungoo de. Te sūchi lúli Jesús, ni quendō i Jerusalén, te tu ní cájini José jín náná i. <sup>44</sup> Te cájeni ni de jeē cuahán i mēhñu ñáyuu cájica ichi ún. Te ni cajica de ñin quiví, te sáa te ni cananducú de i mēhñu táca jnáhan de jín ñáyuu cájini jnáhan de jín. <sup>45</sup> Te tu ní cánanihīn de i. Te ni canandicó de cuangoo de Jerusalén, cuananducú de i.

<sup>46</sup> Te nuū uní quiví te ni cananihīn de i ini templo, néne i mēhñu tēe cástéén tutu ley Yaā Dios, te jín nahín i jeē cácahān de te cájñuhún i de siquí jnūhun ún. <sup>47</sup> Te táca ñáyuu cájini jnūhun cáhán i, cánaa ni cájito jeē váha cájí xíní i te váha nástío cuiñí i jnūhun. <sup>48</sup> Te nuū ní cajito tátá i náná i nuū i, te ni canaa ni de. Te ni cahān naná i jín i:

Séhē, ¿naun ni sáha ró súcuan jín rí? Chi ruhū jín tátá rō, yōhyo ni canacani ni rí cánanducú rí rohó, achí ña.

<sup>49</sup> Yūcuán na te ni cahān i:

¿Naun cánanducú ní sãña? ¿A tu cájini ni jēe cánuu cocu ná jín jniñu Tátá na Yaā Dios? Achí i.

<sup>50</sup> Te tu ní cájecūhun ni tátá i náná i jnūhun ni cahān i.

<sup>51</sup> Yūcuán na te cuanuhun i jín de jijnáhan de ñuu Nazaret, te ni jendije i nuū de. Te náná i, ni quendō tāca jnūhun yáha núu jeē níjnūni ña. <sup>52</sup> Te Jesús ni jehnu ga i, te ni cundichí gá i, te cúsī ni Yaā Dios jín i, te suní súcuan táca ñáyuu.

### *Jñuhun Juan tēe scuándute*

*(Mt. 3.1-12; Mr. 1.1-8; Jn. 1.19-28)*

## 3

<sup>1</sup> Te ni cuu xahūn cuiyā jeē ndácu Tiberio jniñu nñ nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jín Traconite, te Lisantias cúu de gobernador Abilinia. <sup>2</sup> Te sutū cujēhnu ga cácuu Anás jín Caifás. Te ni quee jnūhun Yaā Dios nuū Juan séhe Zacarías, jeē íne de nuū ñuhun téhé. <sup>3</sup> Te ni jica nuu de táca ñuu jeē iyó yajni yute Jordán. Te cáhán de jín ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. <sup>4</sup> Te súcuan ni squicu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñin tēe cana jee nde nuū ñuhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya.

<sup>5</sup> Te táca xéhvā na ndúndaā, te táca yucu jín loma na ndúnduhvā, te na ndúyóhó ichi yácuá, te na ndúlñ ichi ndáyí.

Te ndihi un cúu jeē ndúvāha ndundaā anuá ñayuu nuū yā.

<sup>6</sup> Te ndihi i cuni i jeē jnáma Yaā Dios i.

Súcuan cahān Juan, achí tutu.

<sup>7</sup> Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cácu ró núu castigo xeēn jeē quíji? <sup>8</sup> Núu súcuan te sáha ró jñiñu váha, te súcuan stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cácu ró síquī jeē cácuu ró yúcūn Abraham. Chi cáhān rī jín ró jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā. <sup>9</sup> Te cácuu ró nájñūhun nundēhē jeē tu jēhe ndehē váha. Te vijna je iyó túhva Yaā Dios jeē cuáha ya castigo xeēn, nájñūhun je iyó túhva iin cáa jeē cahnde nde yoho yujnu. Núu súcuan te sáha ya jín ró nájñūhun jín táca yujnu jeē tu cúun ndehē váha, jeē tahndé te cayū nuū ñuhún. Achí de.

<sup>10</sup> Te ñayuu un ní cacajñūhún i de:

¿Te ndese sáha ná núu súcuan? Achí i.

<sup>11</sup> Te ni cahān de:

Róhó jéē cánevāha uū sahma, na cuáha ró iin nuū jeē tu névāha. Te róhó jéē cánevāha jeē yéji, suni súcuan na sáha ró, achí de jín i.

<sup>12</sup> Te suni jecu tēe cástútú xúhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jínáhan ná?

<sup>13</sup> Te ni cahān Juan jín de:

Ma scaá ró cácan rō xúhún, chi máá cúhva-ni jeē ní ndacu jniñu nuū rō, achí de.

<sup>14</sup> Te suni ni cacajñūhún jecu soldado:

Te máá ná, ¿ndese sáha ná jínáhan ná? achí de.

Te ni cahān Juan jín de:

Ma quénde rō ndajniñu ni iin jín jnúhun síuhú ni jín jnúhun stáu yáhu, te cusí ni rō jín yáhu rō, achí de.

<sup>15</sup> Te táca ñayuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. <sup>16</sup> Te ni cahān Juan jín i jínáhan i:

Ruhū chi jín ndute scuándute ri rohó. Te véji iin Yaā jeē nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhún. Te cújéhnu ndasí yá, chi tú na vé jéhnu cuíti cúu ri nuū yā, ni jeē cuajniñu ri nuū yā vésú iin jniñu lúlí gá nájñūhun jeē ndají rí vésú correa ndijēn yā. <sup>17</sup> Te sáha ya nájñūhun sáha tēe scánda trigo, chi sásin ya ñayuu váha jín ñáyuu cunéé, nájñūhun cúndoo trigo jeē quénda sín paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuíti. Achí Juan.

<sup>18</sup> Te súcuan te jín cuéhē gā jñūhun ni stihví ni de ñayuu un, ní nacani de jñūhun váha Yaā Dios nuū i. <sup>19</sup> Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. <sup>20</sup> Te sa víhyá gā ni sáha de jeē neé gá, chi ni chune de Juan vecāa.

*Jeē ní jendute Jesús*

*(Mt. 3.13-17; Mr. 1.9-11)*

<sup>21</sup> Te nde ná tu quívi Juan vecāa, ná ni ine de ni scuándute de táca ñáyuu, te suni ni scuándute de Jesús. Te jícán tahú yā, te ni nune-ni andíví. <sup>22</sup> Te ni cuun

Espíritu Santo ni quee xinī yā, te cáa nájñuhun ìn paloma. Te ichi ándiví ní cahān ìn jñuhun:

Máá ró cúu Sēhe ri jeē maní ndasí rí jín, te yōhyo cúsiī ni rí jín ró, achí.

*Lista ñayuu yucūn ní quiji Jesucristo*  
(Mt. 1.1-17)

<sup>23</sup> Te ná ni quejéé Jesús steén yā jñuhun, te íyó yá nájñuhun ocō uxī cuiyā. Te cájeni ni ñayuu jeē sēhe José cúu ya. Te José ni cuu sēhe Elí, <sup>24</sup> te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, <sup>25</sup> te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, <sup>26</sup> te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, <sup>27</sup> te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, <sup>28</sup> te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, <sup>29</sup> te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, <sup>30</sup> te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, <sup>31</sup> te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, <sup>32</sup> te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón, <sup>33</sup> te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, <sup>34</sup> te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor, <sup>35</sup> te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, <sup>36</sup> te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec, <sup>37</sup> te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, <sup>38</sup> te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chí ni sáha ya de.

*Jeē ní jito ndee jexeén Jesús*  
(Mt. 4.1-11; Mr. 1.12-13)

## 4

<sup>1</sup> Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ññuhun téhé ní sáha Espíritu Santo. <sup>2</sup> Te ni ine ya yūcuan ūū xico quiví, te ni jito ndee jexeén yā, chí cúní jeē sáha ya cuēchi. Te táca quiví ún tu ní yéji cuiṭi yā, te ná ni yāha quiví ún, te jí yā sōco. <sup>3</sup> Yūcuán na te ni cahān jexeén un jín yá:

Núu máá ró cúu Sēhe Yaā Dios, te cahān rō jeē yuū yāha na ndúu staā caji rō, achí.

<sup>4</sup> Te ni cahān Jesús jín:

Tuú chí yósó núu tútu ì: Nasūu máni máá jín stáā cátecu ñayuu, chí suni jín táca jñuhun cáhān Yaā Dios, achí yá.

<sup>5</sup> Yūcuán na te cuahān jexeén un jíin yá nde xinī ñn yucu súcún, te ñn núnú-ni ni steén nuū yā tācá nación nñ cáhnu ñayiví. <sup>6</sup> Te ni cahān jíin yá:

Nuū maá ró cuāha ri jeē cujéhnu ró núū ndivii nación yáha, chí yōhoyo luu cáa. Chí máá rí jnñ ndihi, te cuu cuāha ri nuū ndé ñn cúní rí. <sup>7</sup> Núu súcuan te núu cuiñi yítí ró chiñúhún ró ruhū, te cuāha ndihi ri nuū rō. Achí jexeén.

<sup>8</sup> Te ni cahān Jesús jíin:

Satanás, cujiyo quihñ rō, chí yósó núū tútu jeē chiñúhún ñayuu maá Jítoho i Yaā Dios, te nuū maá-ni ya cuajññu i. Achí yá.

<sup>9</sup> Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chí jnama ya rohó. <sup>10</sup> Chí yósó núū tútu:

Tejnñu ya ndajéhé yā quijicoo coto rohó.

<sup>11</sup> Te cunundee yā rohó jíjnáhan ya, návāha ma cáchihí ró jéhē rō nuū yuú.

Achí tutu. Achí jexeén.

<sup>12</sup> Te ni cahān Jesús:

Tuú chí suni yósó núū tútu jeē ma cóto ndee ñayuu Jítoho i Yaā Dios, núu jnama ya i chí tuú, áchí yá.

<sup>13</sup> Te tuá ni níhín jexeén modo coto ndee Jesús quiví ún, te ni cujiyo cuahān jecu-ni tiempo.

### *Jeē ní quejéé Jesús nácani ya jñuhun región Galilea*

*(Mt. 4.12-17; Mr. 1.14-15)*

<sup>14</sup> Te ni cunuú fuerza Espíritu Santo ini Jesús, te cuanuhun yā Galilea. Te nñ región yajni yūcuan ní jíitē núu jñuhun ya. <sup>15</sup> Te ni steén yā jñuhun ini tācá vehe ñi sinagoga, te ndihi ñayuu ni cajejnúhún i ya.

### *Jeē cuánuhun yā ñuu Nazaret*

*(Mt. 13.53-58; Mr. 6.1-6)*

<sup>16</sup> Te ni najinū yā ñuu Nazaret nuū ní jehnu ya. Te quiví ndétātú ni quiví ya ini vehe ñi sinagoga, nájñuhun sáha sáha ya. Te ni ndocuiñi yā jeē cahu ya tutu ñi. <sup>17</sup> Te ni cajéhe de tutu ni tee Isaías, tēe ni nacani jñuhun Yaā Dios nde jenahán. Te ni nune ya tutu ún, te ni nanihñn yā nuū yosó jñuhun ni cahu ya:

<sup>18</sup> Espíritu maá Jítoho yō Yaā Dios iyó yá jíin rí,

chí ní tejnñu ya ruhū jeē nácani ri jñuhun vāha nuū ñayuu ndahú.

Te ní tají yá ruhū vejí ri jíin jñuhun jeē ndúvāha ní ñayuu cáccucñhyá ní.

Te castúhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecúhun ni,

te jnama ri ñayuu jeē cándoho i sáha jnāhan i.

<sup>19</sup> Te nacani ri jñuhun jeē ní quee tiempo jeē sáha Jítoho yō Yaā Dios jeē vāha ñayuu.

Achí tutu ni cahu ya.

<sup>20</sup> Te ni nacasi yā tutu ún, te ni nacūaha ya nuū tēe jéjññu ini sinagoga, te ni nucōo ya jeē steén yā jñuhun nuū ñayuu cáhñn ini sinagoga. Te tācá i cájito vāha i nuū yā. <sup>21</sup> Te ní quejéé yá cahán yā jíin i:

Vijna te ní squícu jñuhun cáhán tutu ñi yāha ní cajini sōho ró, áchí yá.

<sup>22</sup> Te ndivii i ní cacahān jeē vāha tēe cúu ya, te cánaa ni i jeē ní cajini i tāca jñuhun luu ni cahān yā. Te ní cacajñuhun jnāhan i:

¿A násūu sēhe José cúu tēe yáha?

23 Te ni cahān yā jín i:

Jíní vāha ri jeē cájeni ni rō cahān rō jnūhun yátá yáha jín rí: Tēe tájné, sátájné ró maá ró núu súcuan. Te jnūhun yáha cúní cahān jeē nájnūhun ni nasávāha ri cuehē ñayuu cácuñi ini ñuu Capernaum ni canihin rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jín i.

24 Te ni cahān gā yā:

Jendaá cahān rī jín ró, ni ñin tēe nácani jnūhun Yaā Dios, tu cájetáhú ñayuu ñuu maá de nuū de. 25 Te suni jendaá cahān rī jín ró jeē ni íyo cuehē ñahan ní ndóo ndáhú ini naciún yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiñi saū uní cuiyā yosáva, te ni íyo ñin jnamā xeēn ní cáhnu naciún. 26 Te tu ní tájí Yaā Dios Elías quihñ de nuū ni ñin ñahan viuda naciún yō Israel, chi nuū máá ñin-ni ñahan viuda jeē ndeē ñuu Sarepta ndañú Sidón, ni jehēn de ní jito de jeē ní yeji ña. 27 Te ini naciún yō Israel suni ni íyo cuehē tēe ni candoho cuehyí stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñin de tu ní cándíje jeē ndúvāha de sáha Eliseo, chi sa suhva máñuhún-ni Naamán, tēe naciún Siria ni nduvāha. Achí yá.

28 Yūcuán na te tāca ñáyuu cáhiin ini sinagoga, yōhyo ni caquití ni i jnūhun ní cahān yā. 29 Te ni candocuiñí i, te ni caquenehen i ya yatá ñúu ún, cuahān i jín yá xiní yūcu íne ñuu ún, chí cácuñi i chundahá i ya ñinga ya cava ún. 30 Te tu ní cúu sáha i, chí ni yáha-ni ya mēhñú i cuahān yā.

*Jeē ní quenehen ya tachí ini ñin tēe*

*(Mr. 1.21-28)*

31 Yūcuán na te cuahān Jesús ñuu Capernaum región Galilea. Te quiví ndétātu ní steén yā jnūhun nuū ñáyuu. 32 Te ni canaa ni i cájini i jnūhun steén yā. Chí ni steén vāha ya nuū i, chí jíní vāha máá yá.

33 Te ini vehe sinagoga un íne ñin tēe jeē ñūhun tachí xeēn ini de. Te tēe un ní cana cóhó de:

34 Cuijiyo ní. ¿Naun vēji ní núu na jíjñahan ná, Jesús ñuu Nazaret? ¿A vēji ní jēe snáá ni sáña, chí naún? Je jíní na ndé ñin cúu ní, chí Séhe íi Yaā Dios cúu ní. Achí de.

35 Te Jesús ni cahān xeēn yā nuū tachí ún:

Casi yuhu ró te quenda ró ini tēe yáha, áchí yá.

Te ni cotúu-ni tēe un núu táca ñáyuu, ní sáha tachí ún. Te ni quenda ini de cuahān, te tú na vé ní sáha ga jín de. 36 Te ndihi ñayuu un ní cayuhú i, te ni cacahān i jín jñahan i:

¿Na jnūhun cúu yáha jēe ní cuu súcuan? Chí cújéhnu tēe yáha jēe ndácu ñihin de jniñu nuū tachí, te quéndacoo-ni, áchí i.

37 Te jnūhun ya ni jítē núu cuahān ní cáhnu región yūcuán.

*Jeē ní nasávāha ya naná chíso Simón Pedro*

*(Mt. 8.14-15; Mr. 1.29-31)*

38 Yūcuán na te ní quenda Jesús ini vehe íi sinagoga, te cuahān yā te ni jinū yā vehe Simón. Te náná chíso Simón, yíhi xeēn quíji ña, te ni cacahān ndahú de jín yá jehē ña. 39 Te ní jita ndeyi ya nuū ña, te ní cahān yā jeē na ndíco quíji ún. Te ni nduvāha-ni ña. Te ni ndocuiñí-ni ña, te ní sáha ña jeē ní yeji yá jín de.

*Jeē ní nasávāha ya cuehē ñayuu*

*(Mt. 8.16-17; Mr. 1.32-34)*

<sup>40</sup> Te jeē ni quée niāndii, te tāca ñáyyu jeē iyó jnáhan i cácuñū ndinuū cuehyī, ni caquindeca i jnáhan i un núu yā. Te ni soó yá ndaha ya siquī ñn ñn i, te súcuan ni nasávāha ya i. <sup>41</sup> Te suni cuehē ñayuu ni quendacoo tachī ini i, te cácana cóhó táchī ún:

Máa ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jñūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

*Jeē ní nacani ya jñūhun región Galilea*

(Mr. 1.35-39)

<sup>42</sup> Te nuū ní cundijin, te ni quenda ya cuahān sñn ya yatā ñúu nuū tú ñayuu. Te tāca ñáyyu cánanducú i ya, te ni jinūcúo i nuū íne ya. Te cástétu i ya jeē tú cujiyo ya nuū i. <sup>43</sup> Te ni cahān yā jíin i:

Suni cánuú jéē nacani ri jñūhun vāha nuū tāca gā ñuu siquī ndese ndácu Yaā Dios jñiñu, chí jeē yúcuan ní tají yá ruhū vēji ri. Achí yá.

<sup>44</sup> Te ni jica cuu ya ñí región Galilea, nácani ya jñūhun ini táca vehe ñi sinagoga.

*Jeē ní canihñ de cuehē chācá ni sáha ya*

(Mt. 4.18-22; Mr. 1.16-20)

## 5

<sup>1</sup> Te ñn quivī te íne Jesús yumar Genesaret. Te ni quecúo cuehē ñayuu, te ni chitú ñihñ i nuū yā, chí cácuñi i cuni nahín i jñūhun Yaā Dios. <sup>2</sup> Te ni jito ya jeē yúcu uū barco yajni yumar. Te tēe cájñi chācá, je ni quendacoo de ini barco, te cánacate de ñunu de. <sup>3</sup> Te ni quivī ya ini ñn barco jeē cúu barco Simón. Te ni cahān yā jíin de jeē na scáca yátá de quihñ jecu gā nuū ndúte. Te ni cucōo ya, te nde ini barco un ní steén yā jñūhun nuū ñáyyu cuehē jeē yúcu i yundúte un. <sup>4</sup> Te nuū ní jínu ni steén yā, te ni cahān yā jíin Simón:

Scáca ró barco na quihñ yō nde nuū iyó cúnú ndute, te sínga ró ñunu ró jñi ró chāca, áchí yá.

<sup>5</sup> Te ni cahān Simón:

Maestro, ñí niñu ni casínga ná ñunu jeē jñi ná tí, te tu ní níhñ cuiti ná ni ñn tí. Te jeē cahán maá ní súcuan, te na sínga tucu ná ñunu, áchí de.

<sup>6</sup> Te ni casínga de, te ni quivícoo cuehē ndasí chāca, nde nducú táhndē ñunu de. <sup>7</sup> Te ni cacaja ndahá de nuū jnáhan de cáhñ ini inga barco, na quíjicoo chindéé ñájnánan jíin de. Te ni quecúo de, te ni cascútú ndē de tí ndindúú barco, te nde je yajni quée barco. <sup>8</sup> Te ni jito Simón Pedro jeē súcuan ni cuu. Te ni jecuiñi yití de nuū Jesús, te ni cahān de:

Cujiyo ní núu ná, chí tēe íyó cuéchi cúu ná, áchí de.

<sup>9</sup> Chí máa de jíin táca tēe cáhñ jíin de, ni cayūhú de jeē ní canihñ de cuehē chācá un ní sáha ya. <sup>10</sup> Te suni ní cayūhú Jacobo jíin Juan, ndindúú séhe Zebedeo, chí tēe chindéé ñájnánan jíin Simón cácuu de. Te ni cahān Jesús jíin Simón:

Ma yūhu ró, chí nde vijna te sáha ri jeē nihñ ró cuehē ñayuu candíje ruhū, ñájnūhun ni nihñ ró cuehē chācá. Achí yá.

<sup>11</sup> Yūcuán na te nuū ní jinūcúo de jíin barco nuū ñūhun íchi, te ni castóo de ndihñ ndajniñu de, te ni candiquñ de ya cuango de.

*Jeē ní nasávāha ya ñn tēe ndóho cuehyī stehyú*

(Mt. 8.1-4; Mr. 1.40-45)

<sup>12</sup> Yūcuán na te ine Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñī yití de ni jequín de nuū de nde nuū ññhun, te ni cahān ndahú de jín yá:

Jíní na jēe cuu sáha ní jēe nduvāha ná, te núu cúní ni, áchí de.

<sup>13</sup> Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. <sup>14</sup> Te ni ndacu ya jniñu nuū de jeē ma cáchi cuiñi de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yāā Dios siquī jeē ndúndoo ró núu yā, nájññhun ni ndacu Moisés jniñu jenahān. Te súcuan te cuni ñayuu jeē ní nduvāha ró. Achí yá.

<sup>15</sup> Te víhyá gā ni jitē núu jññhun ya cuahān. Te ni cataca cuehē ñayuu jeē cúní nahín i jññhun stéén yā, jín jēe nasávāha ya i nuū tāca cuehyī cándoho i. <sup>16</sup> Te maá yá cuahān sñn ya nuū tú ñayuu, te ni jicān tahú yá.

*Jeē ní nasávāha ya ñn tēe ndóho cuehyī ni jín*

*(Mt. 9.1-8; Mr. 2.1-12)*

<sup>17</sup> Te ñn quivī te stéén yā jññhun, te jecu tēe grupo fariseo jín tēe cástéén tutu ley Yāā Dios, cáyūcú de yūcuán. Te tēe un ní quecoo de nuū yā jeē véjicoo de táca ndañū Galilea, jín ndañū Judea, jín ñuu Jerusalén. Te poder maá Yāā Dios iyó jín yá jeē nasávāha ya ñayuu cácuñ. <sup>18</sup> Yūcuán na te ni quecoo jecu tēe, cándiso de ñn tēe ndóho cuehyī ni jín, cátu de nuū ñn camilla. Te cánducú de squiví de tēe ún ini vehe, te caquin de nuū ine ya. <sup>19</sup> Te tu ní cáññ de modo quivicoo de jín tēe un, chí cáyūcú chitú ñayuu. Te ni cacoo de siquī véhe, te ni canune de teja. Te ni cascúun de tēe cúnú un jín camilla de nde nuū ine Jesús mēññ ñayuu. <sup>20</sup> Te ni jini Jesús jeē cácaññe de jeē cúu nasávāha ya tēe cúnú un. Te ni cahān yā jín tēe cúnú un:

Róhó, je ine cáñnu ni rī nuū tāca cuéchi ró, áchí yá.

<sup>21</sup> Yūcuán na te tēe cástéén tutu ley Yāā Dios jín tēe grupo fariseo, ni quejéé de cájeni ni de siquī yā: ¿Nde ñn cúu tēe yáha jēe cahān de jññhun ndevāha jeē quití ni Yāā Dios? Chí nasūu Yāā Dios cúu de jeē cóne cáñnu ni de nuū cuéchi.

<sup>22</sup> Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahān ndevāha rí? <sup>23</sup> Jeē uú jññhun yáha, ¿nde ñn yñ gá cáa? ¿A jēe cahān rī jín tēe cúnú: Je ine cáñnu ni rī nuū tāca cuéchi ró? ¿Chí yñ gá jeē cahān rī: Ndocuiñī te caca ró, chí je ni nduvāha ró, achi rí? <sup>24</sup> Te vijna te na stéén rī jeē maá rí, Yāā ní nduu tēe, ndíso jniñu rí ini ñayiví yáha jēe cóne cáñnu ni rī nuū cuéchi.

Yūcuán na te ni cahān yā jín tēe ni jín ún:

Cahān rī jín ró, ndocuiñī te naquihñ ró camilla rō, te quinhun rō vehe ró, áchí yá jín de.

<sup>25</sup> Te ni ndocuiñī-ni tēe ún, jito jínú ñayuu. Te ni naquihñ de camilla nuū ni cátu de, te cuanhun de vehe de. Te nácuatáhú de nuū Yāā Dios. <sup>26</sup> Te yōhyo ni canaa ni tāca ñayuu cájito i, te ni cacahān i jeē yōhyo vāha Yāā cúu Yāā Dios. Te suni yōhyo cáyuhú i, te cácañ i:

Vijna te ni cajito yó jniñu jéñnu téyí, áchí i.

*Jeē ní cana ya Leví*

*(Mt. 9.9-13; Mr. 2.13-17)*

<sup>27</sup> Yūcuán na te ni quenda ya cuahān yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahān yā jín de:

Condiquīn ruhū na quihín yō.

<sup>28</sup> Te ni ndocuiñī de, te ni stóo de ndihi ndajniñu de, te cuahān de jíin yá.

<sup>29</sup> Yūcuán na te ni sáha Leví ñn vico cáhnu vehe de, jeē cúsiñ ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staa jíin yá. <sup>30</sup> Te tēe grupo fariseo jíin tēe cástéén tutu ley Yaā Dios, ni quejéé de cácahān de siquī tēe cáscuáha jíin yá, te ni cacajñuhún de:

¿Najehē cáyeji rō cájiji rō jíin tēe cástútú xúhun renta jíin tēe cása ha cuēchi? áchí de.

<sup>31</sup> Te ni cahān Jesús:

Ñayuu cáhīyo vāha, tu jíini ñuhún i tēe tájna, chí ñayuu cácu hū cúu jeē jíini ñuhún. <sup>32</sup> Te ruhū nasūu jēe véji ri cana ri ñayuu tú cuēchi, jeē cúu i nájñuhun ñayuu cáhīyo vāha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

*Jeē ní cacajñuhún de ya siquī jeē cóndite ní*

*(Mt. 9.14-17; Mr. 2.18-22)*

<sup>33</sup> Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhīyo ndite ni de te cájicān tahu de. Te tēe cáscuáha jíin máá ní, ¿naun tu cása ha de súcuan? Chí cáyeji de cájiji de.

<sup>34</sup> Te ni cahān yā jíin de:

¿A cuu condite ni de níni jēe iyó rí jíin de? ¿A cuu sáha ró jēe condite ni ñayuu cáhīin vico nándāha, te núu níni néne tēe nándāha? <sup>35</sup> Te quee quivī jeē cújiyo tēe ni nandāha, te quivī ún chí condite ni i. Achí yá.

<sup>36</sup> Te suni ni cahān yā uū jñuhun yátá siquī jeē tu quíjnáhan jñuhun jeé jēe steén yā jíin táca jñuhun jenahán. Achí yá:

Ni ñn ñayuu tu jéhnde i ñn pedazo sahma jéé i, te nachuhun i nuū ñn sahma túhú i. Chí núu súcuan te stívī i sahma jéé i, te suni tu quíjnáhan jeé jeé un jíin jéé tuhú. <sup>37</sup> Te tú ni ñn chúhun vino jeé ini ññ túhú. Chí núu súcuan, te vino jeé un ndatá ññ, te naa vino jíin ññ. <sup>38</sup> Chí cánuú jēe chúhun vino jeé ini ññ jéé, te súcuan te quéndōo vāha ndíndú. <sup>39</sup> Te ñayuu cájiji vino áva, tu cúni i coho i jeé jeé, chí jeé áva cúu jeé vāha ga, achí i. Achí yá.

*Jeē ní cataxín de yoco trigo quivī ndétátú*

*(Mt. 12.1-8; Mr. 2.23-28)*

## 6

<sup>1</sup> Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ní cataxín de yoco trigo, te ni caquūn de ini ndaha de, te ni cayeji de. <sup>2</sup> Te sava tēe grupo fariseo ni cacajñuhún de:

¿Najehē casáha ró níñu jeē tu iyó vāha sáha ró quivī ndétátú?

<sup>3</sup> Te ni cahān Jesús jíin de:

¿A tu ní cácahu cuiti rō tutu ndese ni sáha David, ñn quivī jeē ni jíi de sóco jíin tēe cáhīin jíin de? <sup>4</sup> Te ni quivī de ini vehe Yaā Dios, te ni quihín de pan ñi jeé yosó ndíjin nuū Yaā Dios. Te ni yeji de, te suni ni jēhe de ni cayeji tēe cáhīin jíin de. Te tú na ley jeé cáji ni ñn tēe, chí máá-ni sutú cuu caji. Te vésú súcuan te tú na cuēchi ní iyo siquī de. Achí yá.

<sup>5</sup> Te ni cahān gā yā jíin de:

Ruhū, Yaā ní nduu tēe, máá rí cúu jeé ndácu jniñu siquī ndese sáha ñayuu quivī ndétátú, achí yá.



*Jeē ní nduvāha tēe ni ichī ndaha**(Mt. 12.9-14; Mr. 3.1-6)*

<sup>6</sup> Te inga quivī ndétātú, suni ni quivī ya ini vehe ī sinagoga, te ni steén yā jnūhun. Te yūcuan íne ñn tēe ni ichī ndaha váha de. <sup>7</sup> Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétātú, návāha nihin de cuēchi siquī yā. <sup>8</sup> Te máa yá je jíin yā ndese cájeni ni de. Te ni cahān yā jíin tēe ni ichī ndaha ún:

Ndocuñī, te condichi rō mēhñu yáha, áchí yá.

Te ni ndocuñī de, te ni jecondichi de mēhñú. <sup>9</sup> Yūcuán na te ni cahān yā jíin de jíināhan de:

Na cájnūhun rí rohó ñn jnūhun: ¿Ndese cáhán ley siquī quivī ndétātú? ¿A jéē sáha váha yó, chí sáha neé yó? ¿A jéē nasávāha yó ñáyuu je yajni cuu, chí sáha yó jéē cúu í? Achí yá.

<sup>10</sup> Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scaá ndaha ró.

Te ni scaá de, te ni nduvāha-ni ndaha de. <sup>11</sup> Te yōhyo ni caquitī ni tāca tēe un, te ni quejéé de cándajñuhún de siquī Jesús, ndese cahni de ya.

*Jeē ní nacāji ya uxī uū tēe apóstol**(Mt. 10.1-4; Mr. 3.13-19)*

<sup>12</sup> Te ni cuu jecu quivī, te ni quenda ya cuacacān tahú yā nde yucu. Te níñu ni jícān tahú yā nuū Yaā Dios. <sup>13</sup> Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jñíñu de nacani de jnūhun ya. <sup>14</sup> Te yāha cúu sñhví de jíināhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, <sup>15</sup> Mateo, Tomás, Jacobo sēhe Alfeo, Simón tēe grupo cananista, <sup>16</sup> Judas ñani Jacobo, jíin Judas Iscariote, tēe jeē ní nastúu de ya.

*Jeē ni stéén yā nuū ñáyuu cuehē**(Mt. 4.23-25)*

<sup>17</sup> Te ni nanuu ya yucu jíin tāca tēe un jéē cascuáha jíin yá, te ni jecuiñī yā ñn nduhvā jíin de. Te cuehē ñáyuu ñí región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jéē ndúvāha i cuehyī cándoho i. <sup>18</sup> Te ñáyuu jeē ñúhun tachí ini i, suni ni canduvāha i ni sáha ya. <sup>19</sup> Te ndivii ñáyuu cácuni i quehé i ya, chí súcuan ndúvāha i sáha ya jíin poder yā.

*Jnūhun ñáyuu yōhyo ndetū jíin ñáyuu jeē xeēn ndoho**(Mt. 5.1-12)*

<sup>20</sup> Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jéē cándoho ndáhú, chí quivī ró ñuu nuū ndácu Yaā Dios jñíñu.

<sup>21</sup> Yōhyo ndetū rohó jéē cájii sōco vijna, chí quiiji quivī jeē ndutú chíji ró.

Yōhyo ndetū rohó jéē cándahyū rō vijna, chí quiiji quivī jeē cuecú ró.

<sup>22</sup> Yōhyo ndetū rō te núu cáquitī ni ñáyuu nuū rō jeē siquī ruhū, Yaā ní nduu tēe, te cásqéhichí i röhó, te cácahān neé i nuū rō, te cácahān i jeē ñáyuu casáha jñíñu neé cácuu ró. <sup>23</sup> Te na cóo sñí ni rō quivī sáha i súcuan, te víhyá gā na cúsiñi ni rō, chí cáhnu téyí coo tahú rō nde andiví. Chí suni súcuan ni casáha uhū tāca jíi i jíin tēe ni canacani jnūhun Yaā Dios nde jenahán.

<sup>24</sup> Te nacā jeē xeēn ndoho róhó ñáyyu cucá, chi vijna-ni cúu jeē cáhīyo sīi ni rō.

<sup>25</sup> Nacā jeē xeēn ndoho róhó ñáyyu jeē vjna cáhīyo vetū chīji rō, chi quiiji quivī jeē cuu rō sōco.

Nacā jeē xeēn ndoho róhó ñáyyu jeē vjna cájecū rō, chi quiiji quivī jeē nducuihyá ni rō te ndahyū rō.

<sup>26</sup> Nacā jeē xeēn ndoho tāca rō núu cájejnúhún ñáyyu rohó, chi suni súcuan ni cajejnúhún jíi i tāca tée ni canacani jnūhun stáhú ndé jenahán.

*Jnūhun jeē cundáhú ni yō ñayyu cájito uhū yohó*  
(Mt. 5.38-48; 7.12)

<sup>27</sup> Te cahán rī jíin róhó jeē cájini sōho: Cundáhú ni rō ñayyu cájito uhū rohó. Te sáha vāha rō jíin ñáyyu cáquiti ni nuū rō. <sup>28</sup> Te cacān rō jeē váha coo ñayyu cácahān ndevāha síquī rō. Te cacān tahu rō jehē ñáyyu cácahān neé núu rō.

<sup>29</sup> Te núu ndé tée caní de ñin lado yiqui núu rō, te vāha ga suni cuāha rō inga lado caní de, vēsú jeē nácuāha rō jēe ndútahū de. Te núu ndé tée cúní de quende de ticāchi rō, suni cuāha rō jnūhun jeē na quhín de jíin ndé camisa rō. <sup>30</sup> Te na-ni ñayyu jicán nuū rō, te cuāha rō núu i. Te ñayyu quíhin ndajniñu rō, ma nándacān rō. <sup>31</sup> Te nájñūhun cáconi rō jeē sáha vāha ñayyu jíin rō, suni súcuan na sáha vāha rō jíin i.

<sup>32</sup> Chi núu íyó manī rō jíin máa-ni ñayyu jeē manī jíin rō, ¿te na vé jeē váha ga sáha rō núu súcuan? Chi nde tēe casáha cuēchi, suni manī de jíin tēe manī jíin máa de. <sup>33</sup> Te núu sáha vāha rō jíin máa-ni ñayyu jeē casáha vāha jíin rō, ¿te na vé jeē váha ga sáha rō núu súcuan? Chi nde tēe casáha cuēchi, suni súcuan casáha de. <sup>34</sup> Te núu cuāha núu rō núu máa-ni ñayyu jeē ñūhun ni rō nacuāha i nuū rō, ¿te na vé jeē váha ga sáha rō núu súcuan? Chi nde tēe casáha cuēchi, suni jēhe núu de nuū tāca gá tēe casáha cuēchi, návāha nanihin tucu de. <sup>35</sup> Núu súcuan te cundáhú ni rō ñayyu cájito uhū rohó, te sáha vāha rō jíin i, te cuāha núu rō núu i. Te ma cuāha rō máa síquī jeē caní ni rō jeē suni nacuāha i nuū rō. Te súcuan te cáhnu coo tahu rō, te stéén rō jeē cácuu rō séhe Yaā cujēhnu téyí. Chi máa yá vāha ni yā jíin ñáyyu tu nácuatáhú núu yā jíin ñáyyu casáha neé. <sup>36</sup> Núu súcuan te cundáhú ni rō ñayyu, nájñūhun máa Tátá rō cundáhú ni yā i.

*Ma cahán yō síquī cuēchi jnāhan yó*  
(Mt. 7.1-5)

<sup>37</sup> Ma cahán rō síquī cuēchi ñayyu ndese sáha i, návāha suni ma cahán Yaā Dios cuēchi síquī rō jeē casáha rō súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. <sup>38</sup> Cuāha rō núu ñáyyu, te suni súcuan cuāha Yaā Dios nuū rō. Chi vāha ndasí cuāha ya nuū rō, nájñūhun jeē chícuāha vāha ya, quisi ya, sáníhin ya, te nde scáa ya cuāha ya nuū rō. Chi cūhva jeē cájēhe rō núu ñáyyu, suni cūhva un cuāha ya nuū rō. Achí yá.

<sup>39</sup> Te ni cahán yā ñin jnūhun yátá jíin i:

Tēe cástéén jnūhun tú ndaā, cácuu de nájñūhun tēe cuáá. Te ñin tēe cuáá, ¿á cuu stéén de íchi nuū inga tēe cuáá? ¿A tú ñingava ndindúú de ini xehvā? <sup>40</sup> ñin tēe scuáha, tu cujēhnu de nuū maestro de. Te tēe scuáha ún, núu je ni cutūhva vāha de, te jinū de coo de nájñūhun maestro de.

<sup>41</sup> Te cuēchi jnāhan rō cúu nájñūhun jeē íne ñin yāca lúli tinūú i. ¿Te naun casáha rō cuenta jeē súcuan, te tu casáha rō cuenta cuēchi máa rō jeē cúu

nájnūhun jeē íne ñn nduhu tinūu máá ró? <sup>42</sup> ¿Te naun cácahān rō jín jnáhan rō: Condetu, na táva rī yāca íne tinūu ró, te tu cánacani ni rō jeē íne ñn nduhu tinūu máá ró? Tēe stáhū-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jēe táva rō yāca tinūu jnáhan rō.

*Jín jniñu cásaħa ñayuu te nácu ni yō ndese ñayuu cácuu i*  
(Mt. 7.17-20; 12.34-35)

<sup>43</sup> Tu íyó yujnu váha jeē jēhe ndehē neé, te ni tu íyó yujnu neé jēe jēhe ndehē váha. <sup>44</sup> Chi jín ndehē jeē jēhe ñn ñn yujnu, te jini yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza. <sup>45</sup> Te suni súcuan tēe vāha, cáhān de jñūhun vāha, chi vāha ánuá de. Te tēe sáħa neé cáhān de jñūhun neé, chi cáneé ánuá de. Chi modo ndese íyó ánuá ñayuu, máni jeē yúcuu cúu jeē cácahān i.

*Siquī uú vehe*  
(Mt. 7.24-27)

<sup>46</sup> ¿Najehē cácahān yiñūhún rō jín rí: Jitoho ná, áchí ró, te tu cásuícu rō jniñu ndácu rí? <sup>47</sup> Táca ñayuu vēji nuū rī te jini sōho jñūhun cáhān rī te squícu, na stéén rī nuū rō ndese cúu i. <sup>48</sup> Cúu i nájnūhun ñn tēe jeē ní jeni de vehe de, te ni jete cúnú de nde ni nihīn de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuíti sáħa, chi siquī toto íñ. <sup>49</sup> Te táca ñayuu jini sōho jñūhun cáhān rī, te tu squícu i, cúu i nájnūhun ñn tēe ni jeni de vehe de nuū ññūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ñ-ni. Achí yá jín i jínáhan i.

*Jeē ní nasávāha ya mozo capitán*  
(Mt. 8.5-13)

## 7

<sup>1</sup> Te nuū ni jínu ni cahān yā ni cajini nahín ñayuu ún, te cuahān yā ñuu Capernaum. <sup>2</sup> Te ñn tēe nación Roma jeē cúu capitán, íyó ñn mozo de jeē manī ndasí de jín. Te mozo un cúhú i te je yajni cuu i. <sup>3</sup> Te ni jini capitán jñūhun Jesús. Te ni tají de jecu tēe jēhnu cándacu jniñu nuū ñayuu hebreo, cuango de nuū yā jeē cahān ndahú de jín yá jeē na quíji ya sávāha ya mozo de. <sup>4</sup> Te ni jñūcoo tēe un nuū Jesús, te ni cacahān ndahú ndasí de jín yá:

Chindéé ñahán ní tēe cúu capitán, chi tēe váha cúu de. <sup>5</sup> Chi manī de jín nación yō, te máá de ni ndacu jniñu ni cuvāha ñn vehe sinagoga cuu yó. Achí de.

<sup>6</sup> Yūcuán na te cuahān Jesús jín de jínáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jín yá:

Achí capitán jeē tu cúní de sájneñu de níhín, chi tu cújēhnu de jeē quihín ni quívi ní vehe de. <sup>7</sup> Jeē yúcuu tu ní sájēhnu de máá de jeē quíji de nuū ní, áchí de. Te máá jēe cahān-ni ní, te na ndúvāha-ni mozo de, áchí de. <sup>8</sup> Chi máá de suni ndíso jniñu de ni casáħa tēe cácujeñu ga. Te cújēhnu de nuū táca soldado de, áchí de. Te núu cáhān de jín ñn tēe jeē na quhín de, te cuahān de. Te núu cáhān de jín inga tēe jeē na quíji de, te quíji de. Te núu ndácu de ñn jniñu nuū mozo de, te sáħa i, áchí de. Achí táca tēe un jín yá.

<sup>9</sup> Te jeē ní jini Jesús jñūhun yáħa, te ni naa ni yā. Te ni ndió cóto ya ni cahān yā jín ñayuu cuehē cándiquín yatā yā:

Jendaá cahán rī jíin ró jeē ni nación yō Israel tu ní níhín rī ni ñn ñayuu candíje níhin súcuan, nájñuhun cándíje tēe ún, vēsú tēe nación tu jíin jñuhun Yaā Dios cúu de. Achí yá.

<sup>10</sup> Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

*Jeē ní nastécu yā sēhe yí ñahan viuda*

<sup>11</sup> Yūcuán na te cuahān yā ñn ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá. <sup>12</sup> Te ná ni cuyajni ya yuñú ún, te yūcuan ní quendacoo ñayuu jeē quichindúji i ñn tēe suchí jéé ni jíhī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. <sup>13</sup> Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, achí yá.

<sup>14</sup> Yūcuán na te ni jinū yā nde nuū ndíy; ún, te ni jni; ya yejnū, te ni cajecuiñi tēe cándiso ún. Te ni cahān yā jíin súcui ní jíhī:

Cahán rī jíin ró, ndocuiñi, achí yá.

<sup>15</sup> Yūcuán na te ni nucōo súcui ní jíhī ún, te ni quejéé i nácahān i. Te ni nacuāha ya i nuū naná i. <sup>16</sup> Te ndivii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cacahān i:

Mēhñu yó ni quee ñn tēe cújéhnu nácani jñuhun Yaā Dios.

Te suni cacahān i:

Máá Yaā Dios ni quejéé yá chindéé ñahán yá ñayuu yā. Achí i.

<sup>17</sup> Te ni jitē núu jñuhun ya ní cáhnu región Judea jíin táca región yajni yūcuán.

*Jeē ní tají Juan uū tēe nuū yā  
(Mt. 11.2-19)*

<sup>18</sup> Te íne Juan vecāa, te tēe cáscuáha jíin de ni cacastūhun núu de jeē súcuan ni cuu táca jniñu yāha. <sup>19</sup> Te ni cana Juan uū tēe ún, te ni tají de cuango nuū Jesús, návāha cajñuhún de ya núu máá yá cúu ndíje Cristo jeē ní cachi Yaā Dios jeē tají yá, chí núu nasūu yá cúu te condetu de inga. <sup>20</sup> Te ni jinūcoo tēe un núu yā, te ni cacahān de:

Juan tēe scaúndute ni tají de sãña véjicoo ná cajñuhun ná níhín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

<sup>21</sup> Te máá hora un ní nasávāha ya cuehē ñayuu cácuñu, jíin ñáyuu cándoho cuehyí xeēn, jíin ñáyuu ñuhun tachí ini. Te suni cuehē ñayuu cuaá ní ndundijin tinúu i ní sáha ya. <sup>22</sup> Te ni cahān yā jíin de:

Cuango te castūhun ró nuū Juan táca jniñu ni cajito ró jíin jñuhun ni cajini ró. Te cachi rō nuū de jeē ñáyuu cuaá cánanune tinúu i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jíhí nátecu i sáha ri. Te suni nácani ri jñuhun nuū ñáyuu ndahú jéé jnama Yaā Dios i. <sup>23</sup> Te yóhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

<sup>24</sup> Te ná cuanuhun ndíndúú tēe ún, te ni quejéé Jesús cahán yā jñuhun Juan jíin ñáyuu:

¿Na vé ni jécondēhe ró jijnáhan ró ndé nuū ñuhun téhé? ¿A ñn tēe jéni ñn jéni uū ní, nájñuhun ite jeē cánda sáha tachí? <sup>25</sup> Te núu tuú, ¿te na vé ni jécondēhe ró núu súcuan? ¿A ñn tēe cúni cújéhnu jeē ñuhun sahma lúu? Tuú chí cájini ró jeē tēe cáñuhun sahma lúu te cánducú táca jéé cúsi ni, máni ini vehe rey cáyūcú de. <sup>26</sup> ¿Te na vé ni jécondēhe ró núu súcuan? ¿A ñn tēe nácani jñuhun Yaā Dios?

Cáhán rī jín ró jeē suu ni jecondēhe ró. Te cújēhnu ga Juan yáha vēsú tāca gá tēe ni canacani jnūhun Yaā Dios. <sup>27</sup> Chi jnūhun Juan cúu jeē ni cāhān Yaā Dios jeē yosó núu tútu i:

Tají rí tēe nacani jnūhun ri cosnúu de ichi núu Cristo, návāha coo tūhva ñayuu jeē jinú yā.

Achí Yaā Dios, achí tutu. <sup>28</sup> Te cáhán rī jín ró jeē ini ñayiví yáha cújēhnu ga Juan tēe scuándute vēsú tāca gá tēe jeē ni iyo ini ñayiví. Te vēsú súcuan te tāca tēe núu ga ini ñuu nuū ndácu Yaā Dios jniñu, cújēhnu ga de vēsú Juan. Achí yá.

<sup>29</sup> Te tāca ñayuu jín táca tēe cástútú xūhun renta, ni cajini i jnūhun cáhán yā, te ni cajetáhú i jeē Yaā ndaa cúu Yaā Dios, chi je ni cajendute i nuū Juan. <sup>30</sup> Te tēe grupo fariseo jín tēe cástéén tutu ley, ni casquéhichí de jnūhun jeē cuni Yaā Dios sáha ya jeē váha de, chi tu ní cájendute de nuū Juan. <sup>31</sup> Te ni cahān gā maá Jítoho yō:

Yáhá cachi rī ñn jnūhun yátá návāha na cúni rō ndese cúu ñayuu tiempo vijná. <sup>32</sup> Cúu i nájñūhun sūchi lúli cāhīn nuū yáhu cácasíqui i. Te cácana ndee i xiní jnāhan i: Ni cativí rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúli un jéé tu ní núnjahan ni i ni ñn, suní súcuan cándāa ró. <sup>33</sup> Chi ni quiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñūhun tachí ini de. <sup>34</sup> Yūcuán na te ni quee máá rí, Yaā ní nduu tēe, te yéji rí jíhi ri, te tu cánujnahan ni rō, te chísoó jnūhun ró cácahān rō jeē máni máá jéé yéji rí jíhi ri vino. Te quíjnāhan ri jín tēe cástútú xūhun renta jín táca gá tēe cásáha cuēchi, achí ró. <sup>35</sup> Te núu cúndichí ñn tēe jín jnūhun Yaā Dios, te jín jniñu sáha de te cájini tāca gá tēe ndíchí jeē ndíchí de. Achí yá.

### *Jeē íne Jesús vehe Simón tēe fariseo*

<sup>36</sup> Te ñn tēe fariseo ni cana de Jesús jeē cáji yā staā jín de. Te ni jinū yā vehe de, te ni cucōo ya mesa jeē cáji yā staā. <sup>37</sup> Yūcuán na te ñn ñahan sáha cuēchi, ndéé ña ñuu yūcuán, te ni jini ña jeē ni jínú Jesús vehe tēe fariseo un, yéji yā staā. Te ni quee ña jín ñn frasco yuū luu jeē ñūhun chítú aceite perfume. <sup>38</sup> Te íin yítí ña nuū jehé yā, te ndáhyú ña. Te ni quejéé ña stáji ña jehé yā jín ndute tínúú ña, te ni nasíchí ña jín ixi xiní ña. Te ni techuhú ña jehé yā, te ni chuhun ña perfume un. <sup>39</sup> Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jeni ni de. <sup>40</sup> Yūcuán na te ni cahān Jesús jín de:

Simón, cúni rí cahān rí jín ró ñn jnūhun.

Te ni cahān maá de:

Cahān ní, Maestro.

<sup>41</sup> Te ni cahān Jesús:

Ín tēe jéhe núu xūhún, ni iyo uū tēe táu nuū de. Ín de ni cotaū uhūn ciento denario, te inga de ni cotaū uū xico uxí denario. <sup>42</sup> Te tú na vé cánevāha tēe un jéé náchunaa de. Te tēe jéhe núu xūhun ní ine cáhnu ni de nuū ndindúú tēe ún. Núu súcuan te cachi rō: Jeē ndindúú tēe ún, ¿ndé ñn de coo maní gá jín de? Achí yá.

<sup>43</sup> Te ni cahān Simón:

Jení ni na jéé tēe ni cotaū cuehē gā, achí de.

Te ni cahān yā jín de:

Ndaā cahán rō, achí yá.

<sup>44</sup> Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájnūhun iyó costumbre. Te ñahan yáha ní stáji ña jehē rī jíin ndute tñúú ña, te ni nasíchi ña jíin ixi xíní ña. <sup>45</sup> Te tu ní téchūhu ró ruhū nájnūhun iyó costumbre. Te ñahan yáha, nde jeē ní quívi ri vehe ró, tu jécuiñi ña jeē téchūhú ña jehē rī. <sup>46</sup> Te tu ní chūhun ró aceite xiní rī nájnūhun iyó costumbre. Te ñahan yáha ní chuhun ña aceite perfume jehē rī. <sup>47</sup> Núu súcuan te cáhán rī jíin ró jeē ni stéén ña jeē yóhyo maní ña jíin rí siquī jeē ine cáhnu ni rī nuū tāca cuéchi ña, vésú cuehē cúu. Te núu cone cáhnu ni rī nuū ñn ñayuu iyó jecu-ni cuéchi, te jecu-ni stéén i jeē maní i jíin rí, achí yá.

<sup>48</sup> Te ni cahān yā jíin ña:

Je ine cáhnu ni rī nuū tāca cuéchi ró, achí yá.

<sup>49</sup> Yūcuán na te ñayuu cáyeji staā jíin yá, ni quejéé i cácahān maá i:

¿Ndé ñn ga cúu tēe yáha jéé cahán jeē ine cáhnu ni nuū cuéchi? achí i.

<sup>50</sup> Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama ri rohó. Cuahán te na ndúsñ ni rō. Achí yá.

*Jnūhun ñahan ní cajejníñu nuū yā*

## 8

<sup>1</sup> Yūcuán na te ni cuu jecu quívi, te ni jica cuu Jesús tācá ñuu náhnu jíin ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxi uū tēe cácuu apóstol, cájica de jíin yá. <sup>2</sup> Te suni iyó jecu ñahan cájica jíin yá, jeē ní quenehen ya tachí ini sava ña, te ni nasávaha ya sava ña jeē cándoho cuehyi. Te ñn ña cúu María ñuu Magdala, te ini ñahan un ní quenehen ya uxā tachí. <sup>3</sup> Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíin cuehē gā ñahan jeē cáchindéé ñahán ña, jéhe ña tāca jéé jíni ñúhún yá jíin de jíjnahan de.

*Jnūhun yátá síquī tēe jéte trigo*

*(Mt. 13.1-9; Mr. 4.1-9)*

<sup>4</sup> Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuehē ndasí ñayuu, te ni cahān yā ñn jnūhun yátá jíin i:

<sup>5</sup> ñn tēe cate trigo, ni quenda de jeé cáte de. Te ná ni quejéé de jéte de, te jecu trigo ni jité yuhíchi. Te ni cajejñu ñayuu siquī, te ni cayejí saa. <sup>6</sup> Te jecu gā ni jité nuū ñúhun yuū. Te ni cane, te ni ichí-ni, chí tú cuehē cajin. <sup>7</sup> Te jecu gā ni jité nuū náne iñu. Te ñnuú-ni ni canecoo iñu jíin, te ni jesí nuū. <sup>8</sup> Te jecu ni jité nuū ñúhun váha. Te nuū ní jehnu, te ni jéhe cuehē nuní, chí jeē ñn ñn ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

*Najehē cahán yā máni jnūhun yátá*

*(Mt. 13.10-17; Mr. 10-12)*

<sup>9</sup> Te tēe cáscuáha jíin yá ni cacajñuhún de ya na vé cuní cahān jnūhun yátá yáha. <sup>10</sup> Te ni cahān yā:

Róhó jíjnahan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin

jnūhun yátá cáhán rī jín sava ga i, návāha vēsú cájito i, te quéndō i nájñūhun jeē tú na vé ni cájito i. Te vēsú cájini sōho i, te ma jécūhun ni i.

*Jeē ní castūhun cáji yá jñūhun yátá téé jéte trigo*

*(Mt. 13.18-23; Mr. 4.13-20)*

<sup>11</sup> Jñūhun yátá yáha cūni cahān: Trigo un cúu jñūhun Yaā Dios. <sup>12</sup> Te trigo jeē ni jítē yuhíchi cúu nájñūhun ñayuu cájini sōho jñūhun, te quíji-ni jexeén te quénde-ni jñūhun ini anuá i, návāha ma candíje i te ma jnáma ri i. <sup>13</sup> Te trigo jeē ni jítē nuū ñūhun yuū cúu nájñūhun ñayuu cájini jñūhun, te cájetáhú i te cácusñi ni i jín. Te tu cúcutú jñūhun ún ini anuá i. Te jecu-ni quiví cácandíje i, te núu ni quejéé jñúndóho, te cájica yátá i. <sup>14</sup> Te trigo jeē ni jítē nuū náne iñu cúu nájñūhun ñayuu cájini jñūhun, te cuangoo i te cácuñéñu i jín jniñu i jín jéé cuni i cucúca i te coo siñi i. Te tu íje i jín jñūhun ya. <sup>15</sup> Te trigo jeē ni jítē nuū ñūhun váha cúu nájñūhun ñayuu cájini nahín jñūhun ya, te cájni váha i, chí íyó váha íyó ndáa anuá i. Te cáhije i jín jñūhun ya, chí cácandíje váha i.

*Jñūhun yátá siquí lámpara*

*(Mr. 4.21-25)*

<sup>16</sup> Núu nástññ ñayuu ññ lámpara, te tu jési i ni ññ siquí, ni tu jéni i chíji jito. Chí sa suhva jéni i nuū sucún, návāha cundijin nuū ñayuu quívicoo vehe. <sup>17</sup> Te suni súcuan tu íyó ni ññ jñūhun sáhi jéé ma cūni ñayuu, chí ndihí táca jñūhun cácahān i nane ndijin te cuni ñayuu.

<sup>18</sup> Núu súcuan te na cūni sōho váha ró, chí ñayuu je jécūhun ni, stéén gā yā nuū i. Te ñayuu tu cándíje, máa jecu jeē jéni ni i jeē jini i, sa suhva naa. Achí yá.

*Náná yā jín ñani yā*

*(Mt. 12.46-50; Mr. 3.31-35)*

<sup>19</sup> Yūcuán na te ni quee naná yā jín táca ñani yā nuū íne ya. Te tu ní cúu quívicoo ña nuū yā siquí jeé chitú ñayuu. <sup>20</sup> Te ññ ñayuu ni castūhun núu yā: Náná ni jín táca ñani ni cáhññ nuū quéhe, te cácuni cahān jín ní, achí i.

<sup>21</sup> Te ni cahān maá yá:

Suni náná rī jín ñani rī cácuu ñayuu cájini sōho jñūhun Yaā Dios te cáscuicu i, achí yá jín i.

*Jeē ní jecuññi tachí ñhñ jín mar ni sáha ya*

*(Mt. 8.23-27; Mr. 4.35-41)*

<sup>22</sup> Te ññ quiví ni quiví ya ññ barco jín téé cáscuáha jín yá, te ni cahān yā jín de:

Na yáha yó quíññ yō inga lado mar.

Te ni cascáca de barco cuangoo de. <sup>23</sup> Te níni cáscáca de barco, te ni quixí yā. Te ni jecuññ ññ tachí ñhñ nuū mar, te je yajni chitú ndute ini barco, te ndúcú quée barco. <sup>24</sup> Te ni castóna de ya, te ni cacahān de:

Maestro, Maestro, vijna te quée yó chíji ndute te naa yō, achí de.

Te ni ndocuññ-ni ya, te ni cahān yā nuū tachí ñhñ jín núu mar. Te ni cajecuññ-ni, te ni cuu nayúú í-ni. <sup>25</sup> Te ni cahān yā jín téé cáscuáha jín yá:

¿Naun tu cácandíje ró?

Te máa de yōhyo ni cayuhú de, te cánaa ni de, te cácahān de jín jñáhan de:

¿Ndé ññ ga cúu téé yáha jéé nde nuū tachí ñhñ jín núu ndute ndácu de jniñu te cájetáhú jéé cahān de? Achí de.

*Téé Gadara jeé ndóho tachí*

*(Mt. 8.28-34; Mr. 5.1-20)*

<sup>26</sup> Yūcuán na te ni cane ya jín de región Galilea, te cuahān yā región Gadara jeē íne inga lado mar Galilea. <sup>27</sup> Te nuū ní nanuu ya nuū ñúhun íchi, te ñn tēe ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiṭi de sahma, ni tu ndeé de vehe, chi sa suhva nuū cáyindūji ndīyí ndeé de. <sup>28</sup> Te ná ni jito de nuū Jesús, te ni jecuiñī yití de nuū yā, te ni cana cóho de:

¿Naun vēji ní núu ná, Jesús Sēhe Yaā cujéhnu téyí? Cáhán ndahú ná jín ní jeē ma stóho ní sáña, áchí de.

<sup>29</sup> Súcuan ní cahān de, chi je ni ndacu ya jniñu nuū tachī un jēe na quéndacoo ini de. Te ni cuu cuehē jínu sáha xeēn tachī jín de. Te cájihni ñayuu ndaha de jehé de jín cadena, návaha tú na vé sáha de. Te ndihi-ní jéhnde de, te jínu de jéhn de nde nuū ñúhun téhé sáha tachī ún. <sup>30</sup> Te Jesús ní cajñuhun yá de:

¿Na vé naní ró?

Te ní cahān de:

Legión naní ná.

Súcuan ní cahān de jeē naní de, chi ñúhun cuehē tachī ini de. <sup>31</sup> Te ni cacahān ndahú tachī un jín yá jeē ma tají yá quihīn ini túhnchi cúnú. <sup>32</sup> Te yucu yúcan cáhīn cuehē quīñí cájitu ti. Te tachī jeē cáñuhun ini tēe un ní cacahān ndahú jín yá jeē na cuáha ya jñuhun quivicoo ini quīñí ún. Te ni jēhe ya jñuhun. <sup>33</sup> Te ni quendacoo tachī ún ini tēe ún, te ni quivicoo ini quīñí. Te quīñí un ní cajinu ti ní ñingoo ti ñn yucáva, ni quivicoo ti nuū mar, te ni ndaquihī ti ndute, ni cajihī tí.

<sup>34</sup> Te tēe cándito ti ní cajito de jeē súcuan ní cuu, te ni cayúhu de. Te ni cajinu de cuacastuhún de nuū ñáyuu ñuu un jín ñáyuu táca rancho. <sup>35</sup> Te cuangoo ñayuu un cuácondéhé i na vé ní cuu. Te ni jinūcoo i nuū íne Jesús. Te ni cajito i nuū tēe ní quendacoo tachī ini, néne de nuū jehé Jesús, te ñúhun de sahma, te je ni nducájí xíní de. Te ni cayúhu ñáyuu ún. <sup>36</sup> Te tēe ní cajito ní canacani de jñuhun nuū ñáyuu, ndese ní nduváha tēe ní ñuhun tachī ini.

<sup>37</sup> Yūcuán na te táca ñáyuu ní región Gadara, ní caquejéé i cácahān ndahú i jín yá jeē na cújiyo ya quihīn yā, chí yōhoyo cáyúhu i. Te ni ndīvi ya ini barco jeē quínuhun yā. <sup>38</sup> Te tēe jeē ní quendacoo tachī ini, ní cahān ndahú de jín yá jeē na cuáha ya jñuhun quihīn de jín yá. Te Jesús ní cahān yā jeē na quéndōo de, te áchí yá:

<sup>39</sup> Cuánuhun vehe ró, te nacani ró jñuhun ndese yōhoyo jéhnu jniñu ní sáha Yaā Dios jín ró, achí yá jín de.

Te cuahān de, te ní nacani de jñuhun ní ñuu ún, ndese yōhoyo jéhnu jniñu ní sáha Jesús jín de.

*Jñuhun sēhe sñí Jairo jín ñahan ní quehé yusáhma ya*

*(Mt. 9.18-26; Mr. 5.21-43)*

<sup>40</sup> Te nuū ní najinū Jesús inga lado mar, te ñayuu un ní cacusī ní i jeē ní najinū yā, chí ndihí i cándetu i ya. <sup>41</sup> Te ní quee ñn tēe cújéhnu ini vehe íi sinagoga, naní de Jairo. Te ní jecuiñī yití de nuū jehé yā, te ní cahān ndahú de jín yá jeē na quihīn yā jín de vehe de. <sup>42</sup> Chí íyó ñn sēhe sñí de jeē mañúhún-ní i nuū de, te íyó i nájnūhun uxí uū cuiyā. Te sūchí un je yajni cuu i. Te cuahān yā jín de. Te cuehē ñayuu cándiquin i ya, te ní chitú níhin i xiin ya cuangoo i.

<sup>43</sup> Te méhñu ñáyuu un cuáhān ñn ñahan cúhu jeē ní cuu uxí uū cuiyā ndóho ña cuehyí niñí. Te ní jexin ína táca jéé néváha ña jín tēe tájná, te tu ní ndúváha ña sáha ní ñn de. <sup>44</sup> Te ní quee ña íchi yátá yā, te ní quehé ña yusáhma ya. Te ní jecuiñí-ní niñí ña.



<sup>45</sup> Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivii i ni cacahān jeē tu ní quehé i. Te Pedro jiín téē cáhīn jiín de, ni cacahān de:

Maestro, jito ní jéē ñáyuu cuehē yāha ní chitú nīhin i xiin ní, te cáquāhi i nīhín, te cájnūhun ní ndé ñn ni quehé sahma ní.

<sup>46</sup> Te ni cahān Jesús:

Tuú chi ñn ñayuu ni quehé sahma ri, chi ni jini rī jeē jiín fuerza rī ni nduvāha ñn ñayuu, achí yá.

<sup>47</sup> Te ni jini ñahan un jéē tu ní cúu coo yuhu jeē ni sáha ña. Te quísi i ña ni quee ña, te ni jecuiñi yití ña nuū jehé yá. Te jito jínúū tāca ñáyuu, te ni cachi cají ña najehé ni quehé ña yusáhma ya, jiín jéē ní nduvāha-ni ña. <sup>48</sup> Te ni cahān yā jiín ña:

Séhē, ni candíje ró jéē cuu nasávāha ri rohó, te jeē yúcuán ní nduvāha ró. Cuáhān te na ndúsī ní rō, achí yá.

<sup>49</sup> Te níni cáhān gā yā súcuán, te ni quee ñn téē vēji vehe Jairo, téē cújēhu ini sinagoga, te ni cachi nuū de:

Je ni jīhī séhe síhí ní. Te ma sájnēñu ga ní Maestro, achí de.

<sup>50</sup> Te ni jini Jesús jnūhun yāha, te ni cahān yā jiín Jairo:

Ma yūhu ró, chi candíje-ni ró, te nastécu rī séhe ró, achí yá.

<sup>51</sup> Te ni jinū yā vehe, te tu ní jéhe ya jnūhun quīvi ñayuu jiín yá, chi máa-ni Pedro jiín Juan jiín Jacobo jiín tátá naná sūchi síhí un. <sup>52</sup> Te cácuuñhíyá ni ndīhi ñayuu cáyucú ini vehe, te cándahyū i jehē sūchí un. Te ni cahān yā:

Ma ndahyū rō jijnāhan ró. Tu ní jíhí i, chi quíxi-ni i, achí yá.

<sup>53</sup> Te ni cajecū catá i jeē ní cáhān yā, chi cájini i jeē ní jīhī sūchi síhí un.

<sup>54</sup> Yūcuán na te ni jñi ya ndaha i, te ni cahān jee ya jiín i:

Sīhī, ndocuiñi, achí yá.

<sup>55</sup> Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeē cáji i. <sup>56</sup> Te tátá i naná i yōhyo ni canaa ni de cájito de. Te ni ndacu nīhin ya jniñu nuū de jeē ma cáchi de nuū ni ñn jeē súcuán ni cuu.

*Jeē ní tají yá ndihúxi uū de cuanacani de jnūhun  
(Mt. 10.5-15; Mr. 6.7-13)*

## 9

<sup>1</sup> Te ni nastútú yá ndihúxi uū téē cáscuáha jiín yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jiín jéē nasávāha de ñayuu cácuñu. <sup>2</sup> Te ni tají yá de quingoo de jeē nácani de jnūhun ndese ndácu Yāā Dios jniñu, jiín jéē nasávāha de ñayuu cácuñu. <sup>3</sup> Te ni cahān yā jiín de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihīn rō jiín ñn-ni camisa, te ma cóndiso ró inga. <sup>4</sup> Te na-ni vehe núu ni quivicoo ró, te yūcuán coyūcu ró nde quenda tucu ró quihīn rō inga ñuu. <sup>5</sup> Te núu ñn ñuu tu cájetáhú i rohó, na quéndacoo ró yúcuán, te scóyo ró ticachā jehé rō, te súcuán stéén rō jeē iyó cuéchi i jeē tu ní cájetáhú i. Achí yá.

<sup>6</sup> Te ni quendacoo de cuahān de, ni cajica nuu de táca ñuu, ni canacani de jnūhun jnáma Yāā Dios ñayuu. Te táca lado ni canasávāha de ñayuu cácuñu.

*Jeē ní jīhī Juan téē scuándute  
(Mt. 14.1-12; Mr. 6.14-29)*

<sup>7</sup> Te Herodes, téē cúu gobernador, ni jini jnūhun de táca jniñu sáha Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. <sup>8</sup> Te

sava ga i cácahān jeē ní nane Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya nde jenahán, ní natecu de. <sup>9</sup> Te ni cahān Herodes:

Juan chi ni ndacu ri jñiñu ni tahndē xinī. Núu súcuan ¿te ndé tēe cúu tēe yáha jeē jíni jñūhun ri jeē sáha de jñiñu jéñnu? Achí de.

Te ni nducú Herodes modo coto de nuū Jesús.

*Jeē ni scáji yā uhūn mīl tēe*

*(Mt. 14.13-21; Mr. 6.30-44; Jn. 6.1-14)*

<sup>10</sup> Te ni ndecoo tēe cácuu apóstol jeē ní tají yá ni canacani jñūhun. Te ni cacachi de nuū yā táca jñiñu ni casáha de. Te ni jeca ya de cuahān sñn ya jíin de ñn lugar nuū tú ñayuu, yajni ñnu Betsaida. <sup>11</sup> Te ni cajini ñayuu, te suni cuangoo i. Te ni jetáhú yá i, te ni nacani ya jñūhun ndese ndácu Yaā Dios jñiñu, te ni nasávāha ya ñayuu cácuñh.

<sup>12</sup> Te nuū cuáhini, te ni quecoo ndihúxi uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i táca ñnu jíin táca rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, áchí de.

<sup>13</sup> Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chi uhūn-ni staā jíin úu-ni chācá. Te vésú núu quicuaan ná stāa caji ndihí ñayuu cuehē yáha, te ni ma cúu, áchí de.

<sup>14</sup> Chi iyó nájñūhun uhūn mīl tēe. Te ni cahān yā jíin tēe cáscuáha ún:

Cahān jíin ñayuu na cúcōo sñn cincuenta cincuenta i, áchí yá.

<sup>15</sup> Te súcuan ni casáha de, te ni cacucōo ndihí ñayuu. <sup>16</sup> Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahú cuéchi yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē. <sup>17</sup> Te ndivii i ni cayejí, te ni candutú chíji i. Te ni canastútú de pedazo staā jeē ní quendōo, te ni chitú úxi uū jíca.

*Jeē ní cahān Pedro jeē Jesús cúu Cristo*

*(Mt. 16.13-19; Mr. 8.27-29)*

<sup>18</sup> Te ñn quiví ni cusñn Jesús, jícan tahú yā, te máá-ni tēe cáscuáha un cáhñn de jíin yá. Te ni cajñūhun yá de:

Ruhū, ¿ndé ñn cúu ri cácahān ñayuu? achí yá.

<sup>19</sup> Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya ni natecu de.

<sup>20</sup> Yūcuán na te ni cajñūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

*Jeē ní castūhún Jesús jeē cúu yā*

*(Mt. 16.20-28; Mr. 8.30-9.1)*

<sup>21</sup> Yūcuán na te ni ndacu nñhin ya jñiñu nuū de jeē ma cáchi de jñūhun yáha núu ní ñn ñayuu. <sup>22</sup> Te ni cahān yá:

Máá rí, Yaā ní nduu tēe, cánuu ndoho xeñn rī. Te táca tēe jéñnu jíin sūtú cácujeñnu jíin tēe cástéén tutu ley, squéhichí de ruhū. Te cahni de ruhū, te nuū uní quiví te natecu rī, achí yá.

<sup>23</sup> Yūcuán na te ni cahān yā jíin ndihi de:

Na-ni ñayuu núu cúní i condiquín i ruhū, na cási i jeē cuní maá i, te na condiquín i ruhū tāca quiví, te cuāha i jnūhun ndoho i jnūndóho jeē siquí rí, vēsú na cúu i. <sup>24</sup> Chi núu ndé ñayuu cuní i cācu i nuū jnūndóho quiji nuū i jeē siquí ruhū, núu súcuan te jahnū ndetū i ñí cāni. Te núu ndé ñayuu, vēsú na cúu i jeē siquí ruhū, te cotecu i ñí cāni. <sup>25</sup> ¿Chi ndé cuajniñu vēsú na cūndeyí ñayuu niñin i ñí ñáyiví, te núu squiví i máá i nuū jahnū ndetū i ñí cāni? <sup>26</sup> Chi núu na-ni ñayuu cúcanu i jeē siquí ruhū, Yāá ní nduu tēe, jíin síquí jnūhun cáhán rí, suni súcuan cucanu rí jeē siquí máá i, quiví ndíji rí. Te quiví ún chi yōhoyo luu cujéhu rí, nájnūhun cújéhu Tátá rí, te suni cácujehu ndajéhé ndoo ya sáha ya. <sup>27</sup> Te jendaá cáhán rí jíin ró jeē sava tēe cáhiin yáhá, ma cúu de chi nde cuni de jeē ndácu Yāá Dios jniñu jíin poder yā. Achí yá.

*Jeē tucu ni nduu ya  
(Mt. 17.1-8; Mr. 9.2-8)*

<sup>28</sup> Yūcuán na te nájnūhun nuū uná quiví jeē ni cahān yā jnūhun yáha, te ni caa ya ñin yucu, cuacacān tahu yā. Te Pedro jíin Jacobo jíin Juan cuangoo de jíin yá. <sup>29</sup> Te níni jícán tahu yā, te tucu ni nduu nuū yā, te sahma ya ni nducujín quiví, te ndíndēe. <sup>30</sup> Yūcuán na te ni canecoo uū tēe, cándajnūhún de jíin yá. Te cúu de Moisés jíin Elías, tēe ni cahíyo jenahán. <sup>31</sup> Te luu ndíndēe de cáhiin de, te ni cacahān de jíin yá siquí jeē ní cuyajni cuu yā ñuu Jerusalén. <sup>32</sup> Te Pedro jíin tēe cáyūcu jíin de, yōhoyo cáji de máhná, te vēsú súcuan te tu ní cáquixí de. Te ni cajito de jeē lúu ndíndēe yá jíin ndíndúú tēe cáhiin jíin yá. <sup>33</sup> Te nuū ní cacujiyó tēe un núu yā, te ni cahān Pedro jíin yá:

Maestro, nacá jeē yáha jeē cáhiin ná yáha. Te na sáha ná úní vehe ramada, ñin cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahān de. <sup>34</sup> Te níni cahān de súcuan, te ni quee vicō nūhun ní jesi nuū de jíjnáhan de. Te ni cayūhú de jeē cáhiin de chíji vicō ún. <sup>35</sup> Te nuū vicó un ní cahān ñin jnūhun:

Yáha cúu Sēhe rí jeē maní ndasí rí jíin. Te na cúní nahín ró jnūhun cáhán yā, achí.

<sup>36</sup> Te nuū ni jínu ni cahān jnūhun ún, te máá ñin na Jesús íin ya nuū de. Te máá de tu ní cacahān cuiñi de, te tāca quiví ún tu ní cácachi de nuū ni ñin jeē súcuan ni cajito de.

*Jeē ní nasávāha ya ñin sūchi ñūhun tachí ini  
(Mt. 17.14-21; Mr. 9.14-29)*

<sup>37</sup> Te inga quiví un ní nanuu ya yucu jíin de. Te cuehē ñayuu ni jejnahan i ya. <sup>38</sup> Te méhñu ñayuu cuehē un ní cana jee ñin tēe:

Maestro, jícán tahu na núu ni jéē condēhe ní sēhe yí ná, chí máñūhún i nuū ná. <sup>39</sup> Te máni jeē sáha xeēn tachí jíin i, te cána cóhó i sáha, te jéhni yíhí i, te jéē tíñu yuhu i. Te yōhoyo stóho i, te yōhoyo uhū siaá i. <sup>40</sup> Te ni cahān ndahú ná jíin tēe cácuáha jíin ní jeē na quénehen te tachí ún, te tu ní cúu sáha de, áchí de.

<sup>41</sup> Te ni cahān yā jíin de jíjnáhan de:

Ñayuu yōhoyo niñni ní cácuu ró, chí tu cácandíje ró jéē cuu nduvāha i. ¿Nasaa ga quiví cōndee rí jíin ró jeē cuándeyí ní rí jíin ró? Cuáquihin sēhe ró na quíji i, achí yá.

<sup>42</sup> Te níni véji i nuū yā, te ni cotúú i ni sáha tachí, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i

nuū tatá i. <sup>43</sup> Te ndivii ñayuu nahán ní canaa ni i cájito i jeē yóhyo jéhnū jniñū sáha Yaā Dios.

*Jeē ni cáhān tucu ya jeē cúū yā*  
(Mt. 17.22-23; Mr. 9.30-32)

Te níni cánaa ni i cájito i táca jniñū ni sáha Jesús, te ni cahān yā jíin téē cáscuáha jíin yá:

<sup>44</sup> Chuhun vāha ni rō jnūhun cáhān rī yāhá, te ma náā ni rō, chi ruhū, Yaā ní nduū tēe, nastúu i ruhū quīvī ri ndaha táca téē xeēn, achí yá.

<sup>45</sup> Te tu ní cájecūhun ni de jnūhun cáhān yā, chí tu ní cúu cuiti jecūhun ni de. Te ni cayūhú de cajnūhún de ya siquī jnūhun ni cahān yā.

*Ndé ñáyuu cúu jeē cujéhnū ga*  
(Mt. 18.1-5; Mr. 9.33-37)

<sup>46</sup> Yūcuán na te tēē cáscuáha jíin yá ni caquejéē de cácahān de siquī núu ndé in de cújéhnū ga. <sup>47</sup> Te Jesús ni jini yā jeē súcuan cájeni ni de. Te ni jni yá ndaha in sūchi lúli, te ni jeni ya i xiin ya. <sup>48</sup> Te ni cahān yā jíin de:

Na-ni ñayuu núu jeē siquī ruhū jetáhú i sūchi lúli yáha, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñū ró, máá i cújéhnū ga, achí yá.

*Ñayuu tu cáhān siquī yā, ín i jíin yá*  
(Mr. 9.38-40)

<sup>49</sup> Yūcuán na te ni cahān Juan:

Maestro, ni cajito ná in téē jeē jíin síhvī ní quénehen de tachī ini ñayuu. Te ni cajesi na jéē sáha de, chí tu jíca de jíin yó, achí de.

<sup>50</sup> Te ni cahān Jesús jíin de:

Ma cási rō jeē sáha de, chí tēe tu cáhān siquī yō, ín de jíin yó, achí yá.

*Jeē ni cáhān yā nuū Jacobo jíin Juan*

<sup>51</sup> Te ni cuyajni quīvī jeē quínuhun yā andiví, te ni tee téyí ni yā jeē quihín yā ñuu Jerusalén. <sup>52</sup> Te ni tají yá sava tēe yósnúu de jíin jnūhun jeē jinú yā. Te cuango de in ñuu Samaria návāha nducú de nuū ndóo ya. <sup>53</sup> Te ñayuu Samaria un tu ní cájēhe i vehe ndóo ya, chí ni cajini i jeē ndé Jerusalén quihín yā. <sup>54</sup> Te Jacobo jíin Juan, téē cáscuáha jíin yá, ni cajini de jeē súcuan cúu, te ni cacahān de jíin yá:

¿A cúni ní jéē ndácu yó jniñū quiji ñuhūn nde andiví, nájnūhun ni sáha Elías, návāha naa ñayuu yáha? Achí de.

<sup>55</sup> Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. <sup>56</sup> Chi ruhū, Yaā ní nduū tēe, tú vēji ri jeē snāá rī ñayuu, chí sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

*Siquī ñáyuu jeē cácuni i condiquīn i ya*  
(Mt. 8.19-22)

<sup>57</sup> Te níni jíca ya ichi jíin de, te ni cahān in téē jíin yá:

Condiquīn na níhín quihín yō ndé-ni cúu-ni nuū quihín ni, achí de.

<sup>58</sup> Te ni cahān Jesús jíin de:

Táca ñūcuii, íyó yáū cava cáñuhun tí. Te suni saa, iyó táca tí. Te ruhū, Yaā ní nduū tēe, tú nuū cusú rī, achí yá.

<sup>59</sup> Te ni cahān yā jíin inga de:

Condiquīn ruhū na quihín yō.

Te máá tée un ní cahān de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

<sup>60</sup> Te ní cahān Jesús jíin de:

Stóo tāca ndíyí na chíndūji jnāhan ndíyí, chí ndíyí cácuu ñayuu tu cácadnje. Te róhó, cuáhān te nacani ró jnūhun ndese ndácu Yaā Dios jniñu, áchí yá.

<sup>61</sup> Yūcuán na te suni ní cahān inga de:

Cúni na condiquīn na níhín, te cuāha ní jnūhun jeē xíhna gā quicahān na jíin ñayuu cáyūcú vehe ná, áchí de.

<sup>62</sup> Te ní cahān Jesús jíin de:

Núu na-ni tēe quéjéé de condiquīn de ruhū, te núu máni jeē nácani cuihyá ní de siquī tāca jēē ní stóo de, núu súcuan te cúu de nájñūhun ñn tēe jítu jíin yátá, te jícō coto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

*Jeē ní tají yá unī xico uxī de*

## 10

<sup>1</sup> Te ná ni cuu tācá jniñu yáha, te máá Jítóho yō ní nacāji ya unī xico uxī gā de. Te ní tají yá ndihuū ndihuū de jeē cósnūū de nuū yā, quíngoo de tācá ñuu jíin tāca lugar nuū jé yajni quihīn maá yá. <sup>2</sup> Te ní cahān yā jíin de:

Ñayuu yáha cácuu i nájñūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. Núu súcuan te cacān tahú rō nuū máá Jítóho rō Yaā Dios jeē na tají yá cuehē tēe na quíngoo de cahnde de trigo, cúu jeē nacani de jñūhun ya nuū ñáyuu. <sup>3</sup> Te cuángoo jíjnāhan ró, te na cástūhun rí nuū rō jeē tají rí rohó quíngoo ró nájñūhun londe mēhñu yñī. <sup>4</sup> Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajñūhun ró jíin ni ñn. <sup>5</sup> Te na-ni vehe núu ní quiví ró, te xíhna gā cahān rō: Na quíji jñūhun ndeyí jñūhun siī ní nuū rohó, ñáyuu vehe yáha, achí rō. <sup>6</sup> Te núu vehe yúcuan íyó ñáyuu vāha, te jñūhun ndeyí ní cahān rō jinū siquī i. Te núu tuú, te jñūhun ndeyí ní cahān rō ma jinū siquī i. <sup>7</sup> Te suni vehe yúcuan coyūcu ró, te caji ró coho ró jéē cuāha ñayuu nuū rō. Chí siquī jniñu jeē nácani ró jñūhun nuū ñáyuu, te cánuú coto i róhó. Ma quéndōo ró tijni vehe, chí ñn-ni vehe. <sup>8</sup> Te na-ni ñuu núu ní quivícoo ró, te núu cuatáhú i róhó, te caji ró tāca jéē cuāha i nuū rō. <sup>9</sup> Te nasávāha ró ñáyuu cácuñu ñuu yūcuán. Te cachi ró nuū i: Je ní cuyajni Yaā Dios jeē ndacu ya jniñu nuū rō, achí rō. <sup>10</sup> Te na-ni ñuu núu ní quivícoo ró, te núu tu ní cájetáhú i róhó, te quendacoo ró ini calle yūcuán, te cahān rō. <sup>11</sup> Nde ticachā ñuu rō yáha jéē ní jñá jehē rī, na nácóyo rí jeē cúu seña jeē íyó cuéchi ró jéē tu ní cájetáhú ró. Te na cónahán ró jeē Yaā Dios je ní cuyajni ya jeē ndacu ya jniñu nuū rō nuú. <sup>12</sup> Te cáhán rī jíin ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuéchi.

*Jeē ní cuxeēn yā nuū sava ñuu níhni ní*  
(Mt. 11.20-24)

<sup>13</sup> 'Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jíin ñuu Sidón ní sáha rí jniñu jéhu jeē ní sáha rí ini ñuu maá ró, te yachí nacani ní ñayuu ñuu un jéē stóo i cuéchi i núú. Te sáha i seña jeē steén jeē nácani ni i siquī cuéchi i, chí cuhun i sahma jnúú te chuhun i yaā xinī i núú. <sup>14</sup> Núu súcuan te quiví coo juicio te xeēn gā coo castigo siquī ró jijnāhan ró vēsú jeē ní íyo siquī ñuu Tiro jíin ñuu Sidón. <sup>15</sup> Te

róhó ñáyyu ñuu Capernaum, ¿á cájeni ni rō jeē cujéhnū ró nájnūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndiyi. Achí yá.

<sup>16</sup> Te ni cahān gā yā jiín téē jeē tají yá quingoo:

Ñayuu chusóhó jnūhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ni tají rúhū vēji rī. Achí yá.

### *Jeē ní ndecoo tēe ni tají yá*

<sup>17</sup> Te ni ndecoo unī xico uxī tēe un, cácusñ ni de te cácahān de jiín Jesús:

Nde tachī cájetáhú núu na jéē jiín síhví ní, chi quéndacoo ini ñayuu, achí de.

<sup>18</sup> Te ni cahān yā jiín de:

Súcuan cúu, chi ni jito rī jeē nájnūhun ñn taja ni ñingava Satanás ichi ándiví, chi ni quende rī ndihí poder un. <sup>19</sup> Te vijna te je ni jēhe rī fuerza nuū rō jeē cueñū rō nájnūhun siquī tāca cōō jiín tísuhma, te cundeyí ró siquī tāca fuerza maá jéē jito uhū yohó, te tú na vé sáha ga jiín ró. <sup>20</sup> Te ma cúsn ni rō maá-ni jeē cájetáhú táchi nuū rō, chi sa cusñ gā ni rō jeē yosó síhví ró nde ándiví. Achí yá.

### *Jeē ní cusñ ni Jesús*

*(Mt. 11.25-27; 13.16-17)*

<sup>21</sup> Te suni hora un ní cusñ ni Jesús, ni sáha Espíritu Santo, te ni cahān yā:

Na cútahū na núu ni Tátá, Jítoho ándiví jiín ñáyiví. Chi ni jesi ni táca jnūhun ndichí ní, jeē ma cúni ñayuu ndichí jiín ñáyuu túhva cuenta ñáyiví yáha. Te ni steén ni núu ñayuu cácuu nájnūhun sūchi lúlf. Chi súcuan ni nujnahan ni ni Tátá, achí yá.

<sup>22</sup> Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chí máá-ni Tátá rī cúu jeē jini yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jini. Te íyo ñayuu jeē cuni máá Sēhe steén yā nuū i ndese Yaā cúu Tátá yā, te máá i suni cuni i. Achí yá.

<sup>23</sup> Yūcuán na te jíto ya nuū téē cáscuáha ún, te ni cahān yā jiín máá-ni de:

Yōhoyo ndetū ñayuu cájito jniñu jéhnū jeē cájito máá ró. <sup>24</sup> Chí cáhán rī jiín ró jeē cuehē tēe ni canacani jnūhun Yaā Dios, jiín táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

### *Jnūhun ñn tēe vāha ni nación Samaria*

<sup>25</sup> Yūcuán na te ñn tēe steén tutu ley Yaā Dios, ni ndocuiñ de ni jecahān de jiín Jesús, chí cúni de coto ndee de ya. Te ni cajnūhún de:

Maestro, ¿na vé sáha ná te nihñn tahú na cotecu na ñí cáni ándiví? áchí de.

<sup>26</sup> Te ni cahān yā jiín de:

¿Ndeese yósó núu tútu ley? ¿Ndeese cáhán cáhu ró? Achí yá.

<sup>27</sup> Te máá téē un ní cahān de jeē cáhán nuū tútu:

Coo manī ndasí ró jiín máá Jítoho rō Yaā Dios, nde jnāā ndasí ró sáha ró ndihí jeē cúsn ni yā, nde jiín ini jiín ánuá rō, jiín ñí fuerza rō, jiín ñí jéē níjnūni rō. Te cundáhú ni rō jñāhan rō nájnūhun cundáhú ni rō maá ró, achí. Achí de.

<sup>28</sup> Te ni cahān yā jiín de:

Vāha ni cahān rō. Te núu cuu sáha ró súcuan te nihñn tahú rō cotecu rō ñí cáni, achí yá.

<sup>29</sup> Te máá té un cúní de jeē quéndōo ndaā de nuū yā jíin jnúhun ni cajnúhún de, te ni cahān de:

¿Te ndé ñáyuu cácuu jnáhan ná? áchí de.

<sup>30</sup> Te ni cahān Jesús:

Íin tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuñna núu de, te ni caquende ndihi ndajníñu de, te nde sahma ñúhun de. Te ni cacani ndevāha ún de jeē jé yajni cuu de núu. Te ni castóo ún de, te cuango. <sup>31</sup> Te ni cuu jeē ichi un yāha íin sutū quihín de, te ni jito de nuū tée ún, te ni síyo-ni de cuahān de. <sup>32</sup> Te suni súcuan íin tēe grupo levita jeē cájeñíñu ini templo, vēji de ichi ún, te ni jito de nuū tée ún, te ni yāha jíca-ni de cuahān de. <sup>33</sup> Te íin tēe nación Samaria, suni vēji de ichi ún, te nuū ní jito de, te ni cundáhú ni de tēe ún. <sup>34</sup> Te ni quee de nde nuū catú tée ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin tée un ndé íin mesón, te ni condito de. <sup>35</sup> Te inga quiví ún, hora jeē quihín de, te ni tava de uū xúhun cáa, ni jēhe de nuū tée chíí mesón. Te ni cahān de: Coto ní tée yāha, te núu caxín gā ní xúhun ní jíin de, te nuū nándicó ná te nachunaa ná núu ní, áchí de. <sup>36</sup> Núu súcuan ¿te ndese jéni ni rō? Jeē ndinúní tée ún, ¿ndé íin de ni chíhi cuenta jeē jnáhan de cúu tēe ni canecoo ñacuñna núu? Achí yā jíin tée stéén tutu ley.

<sup>37</sup> Te ni cahān de:

Tēe jeē ní cundáhú ni tēe ni tují, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yā.

### *Jeē ni íne ya vehe Marta jíin María*

<sup>38</sup> Yūcuán na te ni quihin tucu ya ichi cuahān yā, te ni jinū yā íin ñuu lulí. Te íin ñahan nání Marta, ni cana ña ya ni jēhēn yā vehe ña. <sup>39</sup> Te Marta, íyó íin cuhū ña nání María. Te María ni cucōo ña nuū jehé Jesús, jíni nahín ña jnúhun cáhán yā. <sup>40</sup> Te Marta chi cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sāña núu jniñu? Te cahān ni jíin ña na chéndéé ñáhán ña sāñá, áchí ña.

<sup>41</sup> Te ni cahān Jesús jíin ña:

Marta, yōhoyo ndíhví ni rō jíin cuéhē jniñu, te yōhoyo stóho ró máá ró jíin. <sup>42</sup> Te íyó íin-ni jniñu cánuú. Te María chi ni nacáji ña jniñu cánuú, suu jeē ndíhví ni ña síquī jnúhun Yā Dios, te ma quénehen yó ña nuū ún. Achí yā.

### *Jeē ni stéén yā ndese cacān tahú yō (Mt. 6.9-15; 7.7-11)*

## 11

<sup>1</sup> Te íin quiví íne Jesús íin lugar jíicán tahú yā. Te nuū ní ndihi ni jíicán tahú yā, te íin tēe scuáha jíin yā, ni cahān de:

Stéén ni núu ná ndese cacān tahú na jíjnáhan ná, nájnūhun ni steén Juan nuū tée ni cascuáha jíin de, áchí de.

<sup>2</sup> Te ni cahān yā jíin de:

Jeē cacán tahú rō, te suhva cahān rō:

Tátá maá ná jíjnáhan ná jéé ndeé ní andiví,

níní na cóo yíñúhún ná nuū ní, chí Yāā íi cúu ní.

Te ñúhun ní na jéé yachí quiji quiví ndacu ní jniñu ní ñáyiví yāha.

Te na cóo táca jniñu nújnahan ní ní,

nájñuhun íyó ini andiví, súcuan na cóo ini ñayiví.

<sup>3</sup> Staā jeē cátecu na táca quíví, cuāha ní núū ná vijná.

<sup>4</sup> Te cone cáhnu ni ní núū táca cuéchi cásáha ná núū ní, nájñuhun cáhine cáhnu ní na núū ñayuu casáha cuéchi nuū ná. Te ma cuáha ní jnúhun jeē coto ndee jexeén sañá, chí sa suhva jnama ní saña nuū táca jéē neé. Achi rō jijnáhan rō. Achí yá.

<sup>5</sup> Te ní cahān gā yā:

Núu ndé ñin rōhó íyó ñin amigo rō, te núu quihñ rō vehe de sava ñuú te cahān rō jiñ de: Amigo, cuāha núu unī staā nuū rī. <sup>6</sup> Chi ñin amigo rī jeē jíca de viaje, ni quee de vehe ri, te tú na vé névaha ri jeē cuáha ri caji de. Achi rō. <sup>7</sup> Te núu cahān tēe ñe ini vehe: Ma stáhān rō ruhū, chí ndihyú yehyí rí, te je cáquixí sēhe ri jiñ rí, te ma cúu ndonda ri jeē cuáha ri nuū rō, achi de. <sup>8</sup> Te cáhān rī jiñ rō, vēsú ma ndóna de cuāha de nuū rō siquī jeē cúu de amigo rō, te jeē yóhoyó stáhān rō de, jeē yúcuan ndonda de cuāha de ndihí jeē jíni ñúhún rō. <sup>9</sup> Núu súcuan te cáhān rī jiñ rō jijnáhan rō jeē suni súcuan cacān tahu rō nuū Yaā Dios, te cuāha ya nuū rō. Te nducú rō táca jéē váha íyó núu yā, te nihñ rō sáha ya. Te cacān tahu rō nde nihñ rō, nájñuhun sáha ñayuu cahān yehyí ndé nune quíví i. <sup>10</sup> Chi táca ñayuu jicán, cuāha ya nuū i. Te ñayuu nducú, suni nihñ i. Te ñayuu cahān, nune ya ichi nihñ i jeē cuní i.

<sup>11</sup> ¿Te ndé ñin rō cúu tátá, te núu sēhe rō jícan i staā nuū rō, te á cuáha rō ñin yuú nuū i? Te núu jícan i chācá, ¿te á cuáha rō ñin coó nuū i? <sup>12</sup> Chí núu jícan i ñin ndiví, ¿te á cuáha rō ñin tisuhma nuū i? Tú cuítí súcuan. <sup>13</sup> Núu súcuan te máá rō jijnáhan rō, vēsú ñayuu iyó cuéchi cácuu rō, te cájini rō cuāha rō jéē váha nuū sēhe rō. Te nagā ní cuu máá Tátá rō andiví jéē ma cuáha ya Espiritu Santo nuū ñayuu jicán nuū yā. Achí yá.

### *Jeē ní cacahān de jeē jejniñu ya fuerza Satanás*

*(Mt. 12.22-30; Mr. 3.19-27)*

<sup>14</sup> Te quénehen ya ñin tachí ñe ñin tēe, jeē ní cuñhín de ní sáha. Te nuū ní quenda tachí, te ní nacahān tēe ní cuñhín un. Te ní canaa ní ñayuu cájito i.

<sup>15</sup> Te sava ñayuu ún chí ní cacahān i:

Jiñ fuerza Satanás jeē cujéhu nuū tachí, quénehen tēe yáha táca táchí ñin ñayuu, achi i.

<sup>16</sup> Te sava ga i cuní i coto ndee i ya, te ní cajicān i jeē sáha ya jeē coo ñin seña ichi andiví. <sup>17</sup> Te máá yá jíni yā jeē súcuan cájeni ní i, te ní cahān yā:

Táca nación jeē sasñin máá te cuajnáhan máá, núu súcuan te snāa jeē iyó váha máá. Te núu ñayuu ñin vehe sásñin máá te cuajnáhan máá, núu súcuan te ma cúu ga coyúcu cáhnu. <sup>18</sup> Te suni súcuan Satanás, núu sásñin máá jíni jnáhan tachí, ¿te ndese cuiñi nihñ jeē ndácu jniñu núu súcuan? Chí cacahān rō jeē jíni fuerza Satanás quénehen ri tachí ñin ñayuu. <sup>19</sup> Te núu súcuan cúu núú, te ñayuu cascuáha jíni máá rō jijnáhan rō, ¿na jíni fuerza cáquenehen máá i tachí, cájeni ní rō? Núu súcuan te máá i jíni jnáhan i cachí jeē ní castívi ndasí rō ní cacahān rō jeē cáquenehen ri tachí jíni fuerza Satanás. <sup>20</sup> Te tuú chí sa suhva jíni fuerza Yaā Dios cúu jeē quénehen ri tachí. Núu súcuan te je ndéé Yaā Dios mēhñu rō jéē ndácu ya jniñu.

<sup>21</sup> Te núu ñin tēe ndacuí, ndíto de vehe de jíni nújijí de, núu súcuan te tú ní ñin ndajniñu de ndoñuhún. <sup>22</sup> Te núu quiji inga tēe ndacuí gā, te cundeyí jíni tēe ún, núu súcuan te quende nujijí de jeē ndíto de vehe de, te sáha de ndese cuní



maá de jíin ndajníñu jeē quénde de. Te nájñuhun tēe ndacuī gā ún, súcuan cúu maá rí nuū Satanás.

<sup>23</sup> Te ñayuu tu íyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

*Tachī jeē nastútú jñáhan ndávi ini ñayuu*  
(Mt. 12.43-45)

<sup>24</sup> Núu ni quenda ñin tachī ini ñin tēe tu cándíje, te jica cuu nuū ññuhun téhé, ndúcú núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda rí. <sup>25</sup> Te núu ni ndee tucu, te jíto jeē tēe tu cándíje un cúu de nájñuhun ñin vehe jeē ní ndundoo. <sup>26</sup> Yūcuán na te jéquihin uxā gā tachī xeén gā vēsú maá. Te quívicoo ini tēe un jéē cóyūcu yúcuán. Núu súcuan te xeén gā ndoho tēe un jéē sándihí vēsú jeē xíhna ññuhún. Achí yá.

*Yōhyo ndetū ñayuu cájini nahín jñuhun ya*

<sup>27</sup> Te níni cáhán yā jñuhun yáha, te ñin ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ní scáxin ña níhín, áchí ña.

<sup>28</sup> Te ní cahān yā:

Sa suhva yōhyo ga ndetū ñayuu cájini nahín jñuhun Yaā Dios te cásquicu i, áchí yá.

*Jeē ní cajicān ñayuu tu cácandíje ñin jñiñu jéhnu*  
(Mt. 12.38-42; Mr. 8.12)

<sup>29</sup> Te ní cataca cuehē gā ñayuu nuū Jesús, te ní quejéé yá cahán yā:

Ñayuu iyó vijna máni cásáha néé i. Te cájicān i ñin jñiñu jéhnu jeē steén núu Yaā ní tají Yaā Dios cúu rí. Te tú na inga jñiñu jéhnu steén rí nuū i, chí maá-ni jñiñu jéhnu nájñuhun ni cuu jíin Jonás, tēe ni nacani jñuhun Yaā Dios nde jengahán. <sup>30</sup> Chí nájñuhun ni cajini ñayuu ñuu Nínive jeē ní cuu ñin jñiñu jéhnu jíin Jonás, suni súcuan cuni ñayuu tiempo yáha jeē coo ñin jñiñu jéhnu jíin rúhū, Yaā ní nduu tēe, jeē quijnáhan jíin modo ni ndoho Jonás. <sup>31</sup> Te reina jeē ní cújéhnu nación ichi sur, natecu ña jíin ñáyuu tiempo yáha, quiví juicio jeē sándaā yā cuēchi, te cahān ña cuēchi siquī i. Chí nde jicá téyí ní quiji ña ní jini nahín ña jñuhun ndíchí ní cahān rey Salomón. Te vijna chí cújéhnu ga ruhū, Yaā íne yáha vēsú Salomón, te tu cácandíje ró rúhū. <sup>32</sup> Te táca ñáyuu ñuu Nínive nuū ní nacani Jonás jñuhun, natecu i jíin ñáyuu tiempo yáha, quiví juicio jeē sándaā yā cuēchi, te cahān i cuēchi siquī ñáyuu yáha. Chí maá i ní canacani ni i ni castóo i cuēchi i quiví ní nacani Jonás jñuhun nuū i. Te vijna chí cújéhnu ga ruhū, Yaā íne yáha vēsú Jonás, te tu cácandíje ró rúhū.

*Jñuhun yátá siquī lámpara*  
(Mt. 5.15; 6.22-23)

<sup>33</sup> Núu nástñin ñayuu ñin lámpara, tu chísáhi i, ni tu chúne i chíji ñin cajón. Chí sa suhva jéni i nuū sucún, náváha cundijin nuū ñáyuu quívicoo vehe. <sup>34</sup> Te tinūu ró cúu nájñuhun lámpara nuū yiqui cúñu rō. Núu súcuan te núu tinūu ró íyó ndijin, te ñí-ni yiqui cúñu rō cúndijin. Te núu tinūu ró tu íyó ndijin, te ñí-ni yiqui cúñu rō íyó nee. <sup>35</sup> Te suni súcuan cúu ánuá rō, te coto ró jéē ma cáni néé ní rō, náváha tu coo nee ini anuá rō. <sup>36</sup> Chí núu máni jñiñu váha cásáha ró, te tú na jñiñu néé cásáha ró, núu súcuan te luz yā cúndijin vāha ini anuá rō, nájñuhun ñin lámpara jeē sáha jeē cúndijin vāha. Achí yá.

*Jeē ni cahān yā jeē iyó cuéchi de jijnáhan de*

*(Mt. 23.1-36; Mr. 12.38-40; Lc. 20.45-47)*

<sup>37</sup> Te nuū ní cuu ní cahān yā, te iin tēe grupo fariseo ni cana de ya jeē caji yā staā vehe de. Te ni quīvi ya, te ni cucōo ya mesa jeē caji yā staā. <sup>38</sup> Te tēe fariseo un nāa ni de jito de jeē tu squicu ya costumbre jeē nandahá yá te caji yā staā. <sup>39</sup> Te ni cahān maá Jítoho yō jiiin de:

Róhó tēe fariseo jijnáhan ró, chí nájñuhun jeē cánacate ró yátā vaso jiiin yátā cohó cúu jeē nándahá ró. Te ichi íni ró chí ññuhun máni maá jñuhun cuíhná jiiin jñuhun néé. <sup>40</sup> Tēe cánéé cácuu ró. ¿A tu cájini ró jeē Yaā ní sáha yiqui cúñu ró, suni ní sáha ya anuá ró? <sup>41</sup> Te jeē cájēhe ró caridad nuū ñayuu ndahú, na sáha ró síquī jeē cundáhú ndije ní ró i. Te súcuan te coo ndaā anuá ró.

<sup>42</sup> Nacā xeēn ndoho róhó tēe fariseo, chí cásquicu ró táca jñiñu lúli, te tu cásquicu ró jñiñu cánuú. Chí casáha ró úxi nuhní tamīnu jiiin ruda jiiin táca yucū, te cásoō ró iin iin síquī táca úxi un núu Yaā Dios. Te tu casáha cuiti ró jñiñu ndaā, ní tu cáhiyo manī ró jiiin Yaā Dios. Táca jéé yáha cánuú sáha ró núu, te suni ma stóo ró jéé socó ró táca yúcū ún.

<sup>43</sup> Nacā xeēn ndoho róhó tēe fariseo, chí máni cánujnahān ní ró cucōo ró núu silla yññuhún gá ini vehe iī sinagoga. Te cánujnahān ní ró jeē cahán yññuhún ñayuu jiiin ró nuū calle.

<sup>44</sup> Te nacā xeēn ndoho róhó tēe cástéén tutu ley Yaā Dios, jiiin róhó tēe fariseo, chí tēe stáhú-ni cácuu ró. Chí cándāa ró nájñuhun yaū ndīyi jeē tú ndijin, chí cásnāa ró anuá ñayuu, te tu jíní i jeē súcuan casáha ró jiiin i. Achí yá jiiin de.

<sup>45</sup> Yūcuán na te ni cahān iin tēe stéén tutu ley:

Maestro, jeē ní cahān ní táca jñuhun yáha, suni nde síquī maá ná jijnáhan ná ní cahān ní, achí de jiiin yá.

<sup>46</sup> Te ni cahān yā:

Suni nacā xeēn ndoho róhó tēe cástéén tutu ley. Chí suni cástéén ró táca ley ní catava maá ró jeē yí sáha, te tu cácuñdeyí ñayuu squicu i. Te maá ró, chí ní iin xinī ndáha ró tu cáscánda ró jéé squicu ró.

<sup>47</sup> Nacā xeēn ndoho ró jijnáhan ró. Chí casáha ró vehe síquī nuū yíndūji ndīyi jii ró, tēe ní canacani jñuhun Yaā Dios nde jenahán. Te suni táca jii ró ní cajehni de tēe ún. <sup>48</sup> Te jeē casáha ró súcuan cúu jeē cáquijnáhan ró jiiin de síquī jñiñu ní casáha de. Chí maá de ní cajehni tēe ún, te maá ró casáha ró vehe ndīyi ún.

<sup>49</sup> Jeē yúcuan nde jenahán ní cahān Yaā Dios iin jñuhun ndíchi: Tají rí táca tēe nacani jñuhun rí jiiin táca tēe apóstol quingoo de nuū i. Te sava de cahni i, te sava ga de coto xeēn i, achí Yaā Dios. <sup>50</sup> Te súcuan te síquī ñayuu tiempo yáha na cóndee cuéchi jeē ní cajehni jii i tēe ní canacani jñuhun Yaā Dios, nde quiví ní jécōo ñayiví te nde vijna, <sup>51</sup> nde Abel xihna gā te nde Zacarías, tēe ní cajehni de ini templo sava mēhñu cuarto iī jiiin altar. Núu súcuan te cahán rí jiiin ró jeē síquī ñayuu tiempo yáha condee táca cuéchi ún.

<sup>52</sup> Nacā xeēn ndoho róhó jéé castéén tutu ley, chí cájesi ró ichi jeē jécūhun ní ñayuu jñuhun ya. Chí ní maá ró tu cácuñi ró jecūhun ní ró, ní tu cájēhe ró jñuhun jeē jecūhun ní ñayuu cácuñi. Achí yá.

<sup>53</sup> Te jeē ní cahān yā jñuhun yáha, te tēe cástéén tutu ley Yaā Dios jiiin tēe fariseo, yōhyo ní caquiti ní de nuū yā. Te ní caquejéé de cástíchi de ya síquī cuehē gā jñuhun. <sup>54</sup> Chí yuhu-ni cánducú de núu sanaa te stívi yá jñuhun cahān yā, návaha nihin de cuéchi síquī yā.

*Siqui jnūhun stáhú cácahān tēe fariseo***12**

<sup>1</sup> Te níní súcuan cúu, te ni cacutútú cuéhē mil ñayuu, chi nde cajeñū i siquī jehé jnāhan i. Te xihna gā ni quejéé yá cahān yā jíin tēe cáscuáha jíin yá:

Coto má candije ró levadura tēe grupo fariseo, chi suu cúu jnūhun stáhú cácahān de. Chi jíitē núu nuū ñayuu, nājnūhun ndécava levadura nuū ñūjen pan.

<sup>2</sup> Chi jnūhun stáhú un má quéndōo sáhi cuiti, chi ndihī natūu ndijin, te cuni ñayuu. <sup>3</sup> Núu súcuan te suni máá ró, táca jnūhun ni cacahān rō jeē tu ní jíin ñayuu, ñin quivī te cuni vāha i. Te táca jnūhun ni cacahān sáhi ró jeē ndihyú yehyí, ñin quivī te cahān jee ñayuu yatā táca vehe.

*Jeē ní cachi yā ndé ñin cúu jeē yūhu yó*  
(Mt. 10.28-31)

<sup>4</sup> 'Cahān rī jíin ró jijnáhan ró, amigo: Ma yūhu ró coto ró ñayuu cahni yiqui cúnu rō, chi núu ni cajehni i róhó, te tuá na vé cúu sáha ga i. <sup>5</sup> Te na cáchi rī nuū rō ndé ñin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te iyó poder yā chune ya rohó infierno. Suu máá yá cúu jeē yūhu ró jeē ma stívī ró nuū yā.

<sup>6</sup> Te táca saa chi tú yahu ndéé tī, chi nde uhūn tī jeē uú centavo lulí. Te ni ñin ti tu náā ni Yaā Dios jeē tu ndíto ya. <sup>7</sup> Te nagā ní cuu róhó jijnáhan ró, chi nde ndihī ixi xíní rō je ni cahu ya. Núu súcuan te ma yūhu ró jijnáhan ró, chi cánuú ndasí gá rō nuū yā vésū cuéhē táca saa.

*Ñayuu jejnūhún Jesucristo nuū inga ñayuu*  
(Mt. 10.32-33; 12.32; 10.19-20)

<sup>8</sup> Te cáhān rī jíin ró, táca ñayuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rī i nuū táca ndajéhé Yaā Dios. <sup>9</sup> Te táca ñayuu jeē ma cuajnúhún rúhū nuū inga ñayuu, suni súcuan ma cuajnúhún rī i nuū táca ndajéhé Yaā Dios.

<sup>10</sup> Te núu ndé ñayuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cone cáhnu ni Yaā Dios nuū i.

<sup>11</sup> Te núu cuandeca i róhó táca vehe ñi sinagoga nuū tēe cásandaā cuēchi, jíin núu tēe cácuu tohō, te ma nácani ndasí ni rō ndese stíó cuíñí rō jnūhun nuū de.

<sup>12</sup> Chi máá hora un te Espíritu Santo steén yā nuū rō ndese cahān rō. Achí yá.

*Siqui jeē ma tēnuū yō ndajniñu cúca*

<sup>13</sup> Yūcuán na te ñin tēe íne nuū ñayuu cuéhē un ní cahān de jíin Jesús:

Maestro, cahān ni jíin ñani na jéē na táhú sáva de tahū na jíin de, áchí de.

<sup>14</sup> Te ni cahān yā jíin de:

¿Ndé ñin ni jeni ruhū jeē ndacu ri jniñu tahū sáva tahū rō? Achí yá.

<sup>15</sup> Te ni cahān gā yā:

Condito ró máá ró jijnáhan ró jéē ma ndíyo ni rō xūhun jíin táca gá. Chi vésū cuéhē ndasí ndajniñu névāha ñin tēe, te nasūu jéē yúcuán sáha jeē quéndōo ndetú de, áchí yá.

<sup>16</sup> Yūcuán na te ni cahān yā ñin jnūhun yatá jíin i:

Ni iyo ñin tēe cúca jeē névāha ñuhun jeē cúu vāha ndasí itu. <sup>17</sup> Te tēe cúca un ní nacani ni de: ¿Ndese sáha ri? Chi tuá ndé cuhun niñi ri. Achí de. <sup>18</sup> Te ni jeni ni de: Suhva na sáha ri. Na cánu rī táca yácá rī, te nasáha ri jeē náhnu ga. Te yūcuán chuvāha ndihī ri niñi ri jíin táca ndajniñu ri. <sup>19</sup> Yūcuán na te cahān rī

jiin ánuá rī: Vijna te cuehē teyí névāha yó jéē canda cuehē cuiyā. Na ndétātu yó te caji yō coho yó, te na cúsī ni yō, ni jeni ni de. <sup>20</sup> Te ni cahān Yaā Dios jiin de: Tēe cānéé cúu ró. Chi jecuāá vijna cuu rō, te tāca jéē ní chuvāha ró, ¿ndé tée cuu? Achí Yaā Dios jiin de. <sup>21</sup> Te súcuan ndoho tāca tée jeē sacúcá de máá de, te tu ndúcú de jeē quendōo ndetū de sáha Yaā Dios. Achí yá.

### *Yaā Dios ndíto ya yohó*

*(Mt. 6.25-34)*

<sup>22</sup> Te ni cahān yā jiin tée cáscuáha jiin yá:

Núu súcuan te cáhán rī jiin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. <sup>23</sup> Chi Yaā Dios ni sáha ya jeē técu rō jiin yiqui cúñu rō, te nagā ni cuu jeē ma cuáha ya jeē cáji rō jiin jéē cúhun ró. <sup>24</sup> Condēhe ró ndese cátecu quiti cácuu nájnūhun calú, chi tu cátaji ti, ni tu cánastútú tí jeē chuvéha ti, ni tú yacá tí. Te vēsú súcuan te máá Yaā Dios scáji yā tí. Te cánuú ndasí gá rō jijnáhan ró vēsú táca quiti ún. <sup>25</sup> ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō? <sup>26</sup> Te núu ma cúu sáha ró vēsú ñn jniñu lúli súcuan, ¿te najehē cánacani ndasí ni rō siquī jeē cáji rō jiin jéē cuhun ró?

<sup>27</sup> Condēhe jijnáhan ró ndese jéē ita tāca yúcū. Chi tu sájniñu, ni tu táú. Te cáhán rī jiin ró jeē ni rey Salomón, quivī ní ñūhun de sahma váha ndasí, tu ní ñūhun de sahma lúu súcuan nájnūhun ita ún. <sup>28</sup> Te núu súcuan jéhe Yaā Dios sahma lúu ita un jéē jéē vijna te sajnē cayū nuū ñuhún, te nagā ni cuu róhó jijnáhan ró jéē ma sáha ya jeē nihín rō sahma. ¿Te naun tu cácandíje ñihin ró jéē ndíto ya rohó? <sup>29</sup> Núu súcuan te ma nácani cuíhyá ni rō ndese caji rō ndese coho ró. <sup>30</sup> Chi tāca ñayuu ñayivi jéē tu cácandíje cúu jeē máni siquī jeē yáha cándihví ni i. Te máá ró jijnáhan ró, chi íyó Tátá rō andiví, te jini yā jeē cájini ñuhún ró táca jéē yáha. <sup>31</sup> Te sa suhva cánuú gá jeē cóndihví ni rō siquī jniñu jeē ndácu Yaā Dios nuū rō. Yúcuan na te sáha ya jeē nihín rō táca jéē yáha.

### *Ndese coo cúcá yó nde andiví*

*(Mt. 6.19-21)*

<sup>32</sup> Ma yūhu ró jijnáhan ró chi cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsī ni yā jeē quívicoo ró ñuu nuū ndácu ya jniñu. <sup>33</sup> Xico ró jeē cánevāha ró, te cuáha ró xúhun un núu ñayuu ndahú. Te súcuan caya rō tahū rō nde andiví núu ma cútúhú, nájnūhun jeē chuvéha ró xúhun ini yijni. Chi nde andiví te ma náā jeē váha conevāha ró. Chi yúcuan má quíví ñacuñná, ni ma cúu stfvi tiquáxin. <sup>34</sup> Chi nde nuū nihín rō tahū váha ró, yúcuan cúu nuū cóndihví ni rō siquī.

### *Jeē na cóo tūhva yó jéē ndéē yā*

<sup>35</sup> Coo tūhva ró jijnáhan ró jéē ndéē Jitoho rō, te coo ró nájnūhun mozo jeē nastín i lámpara i. <sup>36</sup> Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahān de, te nune-ni i yéhyí jijnáhan i. <sup>37</sup> Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jiin ró jeē maá patrón sátūhva de máá de, te scúcoo de i mesa te cani de cohō i. <sup>38</sup> Te vēsú cucuéé de ndee de nde sava ñuu, chí jéē néē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. <sup>39</sup> Te na jécūhun ni rō jeē cahán jnūhun yátá yáha: Tēe chí vehe, núu ni jini de na hora quiiji ñacuñná, te condito de, te ma cuáha de jnūhun jeē sacuíñná vehe de núu. <sup>40</sup> Te suni súcuan coo tūhva ró jijnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jiin de.

*Jñūhun mozo vāha jín mozo tu squícu*  
(Mt. 24.45-51)

<sup>41</sup> Yūcuán na te Pedro ni cajñūhún de ya:

¿A jín máa-ni ná jínáhan ná cáhán ni jñūhun yátá yáha, chí suni cáhán ni jín ndihi ga ñayuu? achí de.

<sup>42</sup> Te ni cahán maá Jítoho yō:

Cáhán rī jín ndé-ni ñayuu cúu nájñūhun mozo jeē ndito xinī te squícu vāha. Te máa patrón sáha de jeē condiso jñíñu i coto i ñayuu vehe de, návāha scáji i máa hora. <sup>43</sup> Te yōhyo ndetū mozo un jéē núu ni ndee patrón, te cuni de jeē súcuán squícu vāha i. <sup>44</sup> Jendaá cahán rī jín ró jeē cani de mozo un jéē cóto i ndihi ndajñíñu de. <sup>45</sup> Te núu jéni ni i jeē ma ndíji yachī patrón i, te quejéé i cani i tēe jín ñahan cácuu jñáhan mozo i, te caji i coho i te najñi i, <sup>46</sup> núu súcuán te ndee-ni patrón quivī jeē tu ndétu i jín hora jeē tú na vé jéni ni i. Te stóho xeēn de i, te squívi de i ndoho i jín ñayuu tu cásquícu.

<sup>47</sup> Te mozo jeē jini i ndese núnjahan ni patrón i, te núu tu sátūhva i ni tu squícu i jeē cuni de, ndoho xeēn i jín yujnu xii. <sup>48</sup> Te mozo jeē tu jini i ndese núnjahan ni patrón i, te núu sáha i jniñu jeē cani de i, núu súcuán te cūhva-ni cani de i. Chí ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjñiñu ya i, suni cuehē gā nandacān yā nuū i.

*Jeē siquí Jesús te cusñ ini ñayuu*  
(Mt. 10.34-36)

<sup>49</sup> Ni quee rī jeē nájñūhun jeē scuíquín rī ñūhūn ini ñayiví, te suu cúu jeē cusñ ini ñayuu jeē siquí ruhū. Te cúní rī jeē yachī coo súcuán, návāha quivícoo ñayuu ndaha Yāā Dios. <sup>50</sup> Te íyō ñn jñūdóho cánuú ndoho rī, te cúcuíhyá ndasí ni rī chí nde jñu ndoho rī, te ndusñ ni rī. <sup>51</sup> ¿A cájeni ni ró jeē véji rī jeē cóyūcu máni ñayuu ñayiví? Cáhán rī jín ró jeē tuú, chí sa suhva jeē cusñ ini ñayuu jeē siquí ruhū. <sup>52</sup> Chí nde vijna te quejéé jéé uhūn ñayuu ñn vehe, sásñ máá jínáhan, unī siquī uú, te uū siquī uní. <sup>53</sup> Chí tátá cusñ ini jín séhe yíí, te séhe yíí jín tátá, te náná jín séhe sñí, te séhe sñí jín náná, te náná chíso jín séhe jēnú, te séhe jēnu jín náná chíso. Achí yá.

*Jeē ni cahán yā siquí seña andiví*  
(Mt. 16.1-4; Mr. 8.11-13)

<sup>54</sup> Te suni ni cahán yā jín ñayuu cuehē ún:

Núu cájito ró jeē náne vicō ichi núu cáne niāndii, te cácahán rō jeē cuun saū, te súcuán cúu. <sup>55</sup> Te núu quee tachī véji ichi sur te cácahán rō jeē nandii, te súcuán cúu. <sup>56</sup> Tēe stáhú-ni cácuu ró. Chí cájecūhun ni rō ndese stéén seña andiví jín ini ñayiví, ¿te naun tu cájecūhun ni rō ndé ñn cúu ruhū jeē sáha ri tacá jniñu jéhnu tiempo yáha?

*Jeē cóndihvī ni yō jeē ma cóndee cuēchi siquī yō*  
(Mt. 5.25-26)

<sup>57</sup> ¿Te najehē tu cánacani ni máa ró ndé ñn cúu jniñu ndaā sáha ró? <sup>58</sup> Te núu ñn ñayuu quihñ i jín ró nuū tohó jeē cacán i cuēchi siquí rō, núu súcuán te níni cuáhán rō jín i ichi te condihvī ni rō sándaā rō jín i. Chí núu tuú, te squívi i róhó núu juez, te juez siáha de róhó núu policía, te policía chune de róhó vecáa. <sup>59</sup> Te jendaá cahán rī jín ró jeē ma quénda cuiti rō yūcuán chí nde chunaa rō ndihi cuiti xūhun cájicān de. Te suni súcuán condihvī ni rō cahán ndahú ró jín Yāā Dios, návāha ma ndácunehen ya cuēchi siquí rō. Achí yá jín de.

*Jeē cánuú nacani ni yō jeē stóo yó cuéchi yó*

## 13

<sup>1</sup> Te ñn quivī yúcuán ní quecoo jecu tēe, ni canacani de jñuhun nuū yā ndese ni candoho jecu tēe Galilea. Chi ná cájehni de quiti jeē socó de, te ni quecoo mozo Pilato ni cajehni tēe ún. <sup>2</sup> Te ni cahān Jesús:

Tēe Galilea un, ¿á cájeni ni rō jeē súcuán ni candoho de siquī jeē xeēn gā ni iyo cuéchi de vēsú tāca gá ñayuu Galilea? <sup>3</sup> Cáhán rī jiín rō jeē tuú. Te róhó jijnáhan rō suni jnahnū ndetū rō núu tú nacani ni rō jeē stóo rō cuéchi rō. <sup>4</sup> Te xahūn unī tēe jeē ní cotúú torre Siloé siquī de, te ni cajihí de, ¿á cájeni ni rō jeē ní casáha de cuéchi xeēn gā vēsú tāca gá ñayuu ñuu Jerusalén? <sup>5</sup> Cáhán rī jiín rō jeē tuú. Te máá rō jijnáhan rō, suni jnahnū ndetū rō núu tú nacani ni rō jeē stóo rō cuéchi rō.

*Jñuhun yátá núndēhe higo*

<sup>6</sup> Yūcuán na te ni cahān yā jñuhun yátá yáha jēē steén yā ndese cácuu ñayuu tu squícu jñuhun Yaā Dios:

Cácuu i nájnñuhun ñn nundēhe higo jeē ñn nuū ññuhun ñn tēe. Te ni jecondēhē de núu ñn ndehē xinī, te tú na vé ñn. <sup>7</sup> Te ni cahān de jiín mozo sájniñu nuū ññuhun de: Vijna te je íyó únī cuiyā jeē quíji rī nducú rí ndehē xinī yújnu higo yáha, te tú na vé cúun xinī. Núu súcuán te cahnde rō, chi máá jēē sajnēñu nuū ññuhun, áchí de. <sup>8</sup> Te ni cahān mozo un jiín de: Stóo ní na cuiñi ñn na cuiyā, te na nástáyā ná jéhē te chuhun ná jéhen. <sup>9</sup> Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

*Jeē ní nasávāha ya ñn ñahan quivī ndétátú*

<sup>10</sup> Te ñn quivī ndétátú te stéén Jesús jñuhun ini vehe ñi sinagoga. <sup>11</sup> Te íyó ñn ñahan jeē ní cuu xahūn unī cuiyā huhú ña. Chi ñn tachī ni sáha jeē jíca tíhí ña, te tuá cúu cuiñi caca jnuu ña. <sup>12</sup> Te ni jito Jesús nuū ña, te ni cana ya ña, te ni cahān yā jiín ña:

Vijna te nduvāha ní jēē huhú ni.

<sup>13</sup> Te ni soó yá ndaha ya siquī ña, te ni nucuiñi jnuu-ni ña, te ni nacuatáhú ña nuū Yaā Dios. <sup>14</sup> Te tēe cújéñu ini vehe ñi sinagoga, ni quiti ni de nuū Jesús jeē ní nasávāha ya ñahan un quivī ndétátú. Te ni cahān de jiín ñayuu:

Ññu quivī íyó jēē sájniñu yó, te tāca quivī ún quijicoo rō nduvāha rō. Te quivī ndétátú chi ma cúu, áchí de.

<sup>15</sup> Yūcuán na te ni cahān máá Jítoho yō jiín de:

Tēe stáhú-ni cácuu rō. Quivī ndétátú ¿á tu cándají rō stiquī rō burro rō jēē quiscóho rō tí ndute? <sup>16</sup> Te ñahan yáha jēē cúu ña ñn sehe yucūn Abraham, chi nájnñuhun ni conuhñi ña xahūn unī cuiyā ni sáha Satanás. ¿Te á tu íyó váha jeē nájnñuhun nandají rí ña nuū cuehyī ndóho ña quivī ndétátú? Achí yá.

<sup>17</sup> Te jeē ni cahān yā súcuán, te tāca tēe cájito uhū de ya, ni cacucanu de. Te ndihí ñayuu ún chi ni cacusiñi ni i jito i tacá jniñu jéñu sáha ya.

*Jñuhun yátá siquī ndiquin mostaza*

*(Mt. 13.31-32; Mr. 4.30-32)*

<sup>18</sup> Te ni cahān yā:

Na cáhán rī ñn jñuhun yátá návāha cuni rō ndese ndúcuehē ñayuu ndácu Yaā Dios jniñu nuū. <sup>19</sup> Ndúcuehē i nájnñuhun jéñu ñn ndiquin mostaza jeē jéquin ñn tēe nuū ññuhun de, te ndúu nájnñuhun ñn yujnu. Te cúu cáhnu, te tacá saa chi casáha tí tacá tí chíji ndaha ún. Achí yá.

*Jñūhun yátá síquī levadura  
(Mt. 13.33)*

<sup>20</sup> Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: <sup>21</sup> Cúu nájñūhun levadura jeē ní quihñ in ñahan, te ni saca ña jíin únī kilo harina, te ni ndaa ndihī ñujen ni sáha. Achí yá.

*Siquī jeē quávi yó yéhyí túū  
(Mt. 7.13-14, 21-23)*

<sup>22</sup> Te jíca Jesús jeē cuahán yā ichi ñūū Jerusalén, te yáha ya táca ñuu náhnu jíin ñuu lulí, te steén yā jñūhun. <sup>23</sup> Te in ñayuu ni cajñuhñ i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

<sup>24</sup> Condiñvī ni rō quívicoo ró ndaha Yaā Dios. Chi cúu nájñūhun in yéhyí túū. Te cáhān rī jíin ró jeē in quivī te cuehē ñayuu nducú i quívicoo i, te ma cúu ga.

<sup>25</sup> Te quivī ún te sáha ri nájñūhun in tēe chíi vehe jeē ndocuiñi de te nacasi de yéhyí. Te ichi yátá véhe cuiñi ró jíin náhan ró, te scáján ró yehyí, te cahān rō: Nune ní yéhyí na quívicoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. <sup>26</sup> Yúcuán na te quejéé ró cahān rō jíin de: Ni cayejí ná ní cajihí ná jíin ní, te iní calle ñuu na ní steén ni jñūhun, achi rō. <sup>27</sup> Te cahān maá de: Cáhān rī jíin ró jeē tu jíin rī rohó ndé chí véjicoo ró. Cuijiyo quingoo ró, chí ñayuu casáha jniñu néé cácuu ró. Achi de. <sup>28</sup> Te quívicoo ró núū ndahyú rō, te nacayihí yuhu ró jéé ndoho xeén rō. Te coto ró núū Abraham jíin Isaac jíin Jacob jíin ndihí tēe ni canacani jñūhun Yaā Dios, cáyúcú de ñuu nuū ndácu ya jniñu. Te rohó, vésú cácuu ró yúcūn de, te quívicoo ró núū ndoho ró. <sup>29</sup> Te cuehē ñayuu, vésú tu cácuu i yucūn de, te quijicoo i ichi núú cáne niandii jíin ichi núú quéé niandii, ichi norte jíin ichi sur. Te cucóo i mesa caji i staā ñuu nuū ndácu Yaā Dios jniñu. <sup>30</sup> Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

*Jeē ní cucuihyá ni yā síquī ñáyuu ñuu Jerusalén  
(Mt. 23.37-39)*

<sup>31</sup> Te máá quivī un ní quecúo jecu tēe fariseo, te ni cacahān de jíin yá:

Cuijiyo ní quihñ ní inga lado, chí cúní Herodes cahni de níhín, áchí de.

<sup>32</sup> Te ni cahān yā:

Cuángoo te castūhun ró nuū tēe mañoso un jéé ná tu jíin quivī cuu rī, chí vijna jíin sájnē quenehen ri tachí iní ñayuu, te nasávāha rī ñayuu cácuu. Te isá te jínu jniñu sáha ri, achi rō. <sup>33</sup> Chí cánúú jéé cáca ri quihñ rī vijna jíin sájnē jíin isá, te jíin rī Jerusalén. Chí tēe cánacani jñūhun Yaā Dios, tu cájihí de inga lado, chí máá-ni iní ñuu Jerusalén cájehni i de. Achí yá.

<sup>34</sup> Rohó ñuu Jerusalén, jéhni rō tēe cánacani jñūhun Yaā Dios, te jéhe ró yúu xiní tēe tájí Yaā Dios véjicoo nuū rō. Te cuehē jínu ni cuni rī nastútú rí sēhe ró, nájñūhun ndují jéé nastútú tí sēhe tí chíji ndijēn tí, te tu ní cúní rō. <sup>35</sup> Núu súcuan te vijna te stóo uun na rī rohó jíin sēhe ró. Te cáhān rī jíin ró jéé ndé vijna te ma cóto cuiñi gā rō nuū rī, chí nde quiji quivī jeē cahān sēhe ró: Yōhyo váha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

*Jeē ní nasávāha ya in tēe cúhú cuehyí cuiñi*



## 14

<sup>1</sup> Te ñn quivĩ ndétātu ní jehēn yā vehe ñn tēe fariseo cujéhnu, ni jecaji yā staā jiín de. Te táca gá tēe fariseo cájito yuhu de ya núu stívi yá. <sup>2</sup> Te yūcuan ñne ñn tēe cúhú de cuehyĩ cuiñi, índichi de nuū yá. <sup>3</sup> Te ni cajñuhun yá tēe cástéén tutu ley Yaā Dios jiín táca tēe fariseo:

¿A iyó ley jeē nasávāha rí ñayuu cácuñu quivĩ ndétātu, chí tuú? áchí yá.

<sup>4</sup> Te máá de tu ní cácahān cuiti de. Te ni jñi ya tēe cúhú un, te ni nasávāha ya de, te ni cahān yā jeē na núhun de vehe de. <sup>5</sup> Te ni cahān yā jiín de jíjnāhan de:

¿Ndé ñn róhó núu burro ró chí stíquĩ rō ñingava ti ini pozo, te á tu yachĩ natava rō tĩ vēsú quivĩ ndétātu cúu, chí naún? Achí yá.

<sup>6</sup> Te tu ní cúu stío cuiñi de ni ñn jñuhun nuū yā jeē súcuan ni cahān yā.

### *Jñuhun siquĩ ñayuu jéngoo vico*

<sup>7</sup> Te ni jito Jesús jeē tēe ni cataca ún, cánacāji de silla yññuhún gá nuū mesa cucōo de. Te ni cahān yā jñuhun yáha jiín de:

<sup>8</sup> Núu ñn tēe cana de jeē quihín rō ñn vico nándāha, te ma cúcōo ró lugar nuū yññuhún gá. Chí núu súcuan te sanaa te je ni cana de ñn tēe cújéhnu ga vēsú rohó. <sup>9</sup> Te quee tēe ni cana róhó, te cahān de jíín ró: Ndonga, te na cúcōo tēe yáha jíñā. Yūcuán na te cucanu ró jeē quihín rō cucōo ró ndé sandihí na. <sup>10</sup> Chí sa suhva núu ni cana ñn tēe róhó, te cucōo ró ndé lugar sandihí na. Te núu quee tēe ni cana róhó, te cahān de jíín ró: Amigo, nehen cucōo ró ñn lugar nuū yññuhún gá, achí de. Yūcuán na te ñayuu cáyūcu mesa jíín ró coto i jeē sajhénu de róhó. <sup>11</sup> Súcuan ni cahān rĩ jñuhun yáha návāha cuni ró jeē táca ñayuu jeē sajhénu i máá i, nuu i sáha Yaā Dios. Te ñayuu jeē snúu i máá i, ndujéhnu i sáha ya. Achí yá.

<sup>12</sup> Te suni ni cahān yā jíín tēe ni cana ya yéji yā staā:

Núu sáha ró ñn vico cúsámá chí jéē cuxíni, te ma cána ró ñayuu cácuo amigo rō, jíín ñani rō, jíín jñāhan rō, jíín ñayuu cucá. Chí núu súcuan te suni máá i nacana i róhó, te súcuan nanihín rō jeē ni jéhe rō. <sup>13</sup> Chí sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíín ñayuu cuaá. <sup>14</sup> Te súcuan te quendōo ndetū rō, chí ma cúu nacuāha i nuū rō. Te nihín rō tahū rō quivĩ nátecu ñayuu ndaā, achí yá.

### *Jñuhun yátá síquĩ vico cúxíni*

<sup>15</sup> Te ñn tēe yéji staā jíín yá, ni jini de jñuhun yáha, te ni cahān de jíín yá:

Yōhyo ndetū ñayuu jeē cáji staā nde ñnu nuū ndácu Yaā Dios jñiñu, achí de.

<sup>16</sup> Yūcuán na te ni cahān Jesús ñn jñuhun yátá jéē steén yā jeē cána Yaā Dios ñayuu quivicoo i ñnu nuū ndácu ya jñiñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu.

<sup>17</sup> Te máá quivĩ cuxíni, te ni tají de mozo de cuacana ñayuu jeē quijicoo caji staā: Nehen ní jíjnāhan ní, chí je iyó túhva ndihí, achí mozo. <sup>18</sup> Te ndihí i ni cacahān i jeē na cóne cáhnu ni de chí ma quíngoo i. ñn tēe ni cahān de: Sáá ní jeen rĩ ñn ñuhun te cánuú quícondēhe rí, te na cóne cáhnu ni de chí ma jeē rĩ. Achí de. <sup>19</sup> Te inga de ni cahān: Ni jeen rĩ uhún yunta stíquĩ, te quihín rĩ coto ndee rĩ tĩ, te na cóne cáhnu ni de nuū rĩ chí ma jeé rĩ, achí de. <sup>20</sup> Te inga de ni cahān de: Sáá ní quijnāhan rĩ, te jeé yúcuana ma cúu jeé rĩ, achí de. <sup>21</sup> Te cuanuhun mozo un, te ni castūhún de nuū patrón de ndese ní cacahān ñayuu. Yūcuán na te ni quitĩ ni patrón, te ni cahān de jíín mozo de: Yachĩ quihín rō táca calle náhnu jíín calle lulí, te cana ró ñayuu ndahú, ñayuu cuhndú, ñayuu



chacuaá, jíin ñayuu cuaá, na quíjicoo i vico, áchí de. <sup>22</sup> Te ni jehēn mozo, te ni ndee de, te ni cahān de jíin patrón de: Je ni sáha ná jēe ni cahān ní, te cúmanī gā ñayuu te chitú vehe ní, áchí de. <sup>23</sup> Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quíjicoo i, návāha chitú vehe rí. <sup>24</sup> Chi cáhān rī jíin ró jeē ní ĩn tēe ni cana ri xīhna ñúhún, ma cuáha cuiṭi rī jñuhun jeē cuxíni de vehe rí, áchí de. Achí yá.

### *Jñuhun jeē cánuú nacani vāha ni yō te condiquīn yō Cristo*

<sup>25</sup> Te cuehē ndasí ñayuu cándiquīn i Jesús cuango i jíin yá, te ni ndió cóto ya nuū i, te ni cahān yā jíin i:

<sup>26</sup> Núu na-ni ñayuu cuní condiquīn ruhū, te núu manī gā i jíin tátá i, náná i, ñasíhí i, sēhe i, ñani i, cuáha i, vēsú jíin ruhū, ma cúu cuu i ñayuu scuáha jíin rí. Te núu ndíhví gā ni i siquī jeē cóo vāha máá i vēsú jeē cóndiquīn i ruhū, te suni ma cúu tucu. <sup>27</sup> Te na-ni ñayuu núu tu jéhe i jñuhun ndoho i jñūndóho vēsú nde cuu i jeē siquī jeē cóndiquīn i ruhū, te ma cúu cuu i ñayuu scuáha jíin rí. <sup>28</sup> Chi núu ndé ĩn ró cuní rō sáha ró ĩn vehe cáhnu, ¿á tu cánuú jēe xīhna gā cucōo ró te tava rō cuenta núu canda xūhun jēe sínu ró? <sup>29</sup> Chi núu tuú, te núu je ni jequīn rō cimiento, te tu cánda xūhun ró sínu ró, yūcuán na te táca ñayuu sácata i coto i róhó. <sup>30</sup> Te cahān i: Tēe yáha ní quejé de sáha de vehe, te tu ní cánda de sínu de, achi i. <sup>31</sup> Te suni súcuan núu ĩn rey quihīn de cuajnáhan de jíin inga rey jeē véji siquī de, ¿á tu cánuú jēe xīhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji siquī de jíin ócō mil soldado? <sup>32</sup> Chi núu tú canda de, te níni jíca gā vēji inga rey, te tají de tēe cándiso jníñu, cajnúhún de na vé cuní inga rey jeē cuáha de nuū, te jecuiñī-ni. <sup>33</sup> Te máá ró jijnáhan ró, suni súcuan cánuú jēe xīhna gā nacani ni rō cahnde ni rō stóo ró ndíhi jeē névāha ró, chi núu tuú te ma cúu cuu ró ñayuu scuáha jíin rí.

### *Jñuhun yátá siquī ñīñ* (Mt. 5.13; Mr. 9.50)

<sup>34</sup> Te ñayuu cácandíje cácuu i nájnūhun ñīñ. Vāha íyó ñīñ, te núu ñīñ ún na náá jeē uhvuá, ¿te ndese nduu uhvuá tucu? <sup>35</sup> Tuá cuajníñu cuiṭi, ni jeē chúhun ñayuu nuū ítu, ni jeē ndúu jēhen, chi máá cate ĩ-ni i. Táca róhó jēe jini sōho, na chúsohó ró. Achí yá.

### *Jñuhun yátá siquī lanchi ní sana* (Mt. 18.10-14)

## 15

<sup>1</sup> Te táca tēe cástútú xūhun renta jíin táca gá tēe casáha cuēchi, ni quecoo de nuū Jesús jeē cuni sōho de jñuhun cáhān yā. <sup>2</sup> Te táca tēe grupo fariseo jíin tēe cástéén tutu ley Yaā Dios, ni cacahān de siquī yā:

Tēe yáha jétáhú de táca tēe casáha cuēchi te yéji de jíin, áchí de.

<sup>3</sup> Te ni cahān yā jñuhun yátá yáha jíin de:

<sup>4</sup> ¿Ndé ĩn ró núu névāha ró ĩn ciento lanchi, te núu scuíta ró ĩn tí, te á tu stóo ró cūn xico xahūn cuūn gā tí yucu, te quinanducú ró quiṭi ní sana ún ndé nanihīn rō tí? <sup>5</sup> Te núu ni nanihīn rō tí, te cošo sūcun ró tí, te cusī ni rō. <sup>6</sup> Te núu ni ndee rō vehe ró, te nastútú ró táca amigo ró jíin ñayuu yúcu yajni jíin ró, te cahān rō jíin i: Na cúsi ni yō, chi ni nanihīn rī lanchi ri jeē ní sana. Achí rō. <sup>7</sup> Te cáhān rī jíin ró jeē suni súcuan cúu nde andiví. Chi cúsi gā ni yā

jiín ñin ñayuu iyó cuéchi núu nacani ni i jeē stóo i cuéchi i, vésú jiín cúun xico xahūn cuūn ñayuu iyó ndáa jeē tuá jini ñúhún nacani ni i.

### *Jnūhun yátá síquī ñahan ní scuíta xūhún*

<sup>8</sup> Te núu ñin ñahan névāha ña uxī peso cāa, te núu scuíta ña ñin, ¿á tu nastín ña lámpara te nastāa ña vehe, te nanducú yúcún ña nde nanihín ña? <sup>9</sup> Te núu ni nanihín ña, te nastútú ña táca amiga ña jiín ñayuu yúcu yajni jiín ña, te cahān ña jiín i: Na cúsi ni yō, chí ni nanihín rī xūhun jéē ní scuíta rī. Achí ña. <sup>10</sup> Te cáhān rī jiín ró jeē suni súcuān cúsi ni táca ndajéhé Yaā Dios síquī ñin ñayuu iyó cuéchi núu nacani ni i jeē stóo i cuéchi i. Achí yá.

### *Jnūhun yátá síquī sūchi ní jéhēn jecó*

<sup>11</sup> Te ni cahān gā yā:

ñin tēe ni iyo uū sēhe yí de. <sup>12</sup> Te tēe suchí gá ni cahān i jiín tátá i: Tátā, tahú sáva ní ndajniñu ní, te cuāha ní sava cuu tahū ná, áchí i. Te ni tahú sáva de tahū ndándúú i. <sup>13</sup> Te ni cuu jecu-ni quiñí, te tēe suchí gá un ní stutú ndíhi i ndajniñu i. Te ni quenda i cuahān i ñin ñuu jicá. Te yūcuān ní snáa i tahū i, chí ni jéxín cáhá i. <sup>14</sup> Te ná ni ndíhi ni jéxín i, te ni quee ñin jnamā xeén iní ñuu ún, te ni quejéé cúmaní jeē cáji i. <sup>15</sup> Yūcuān na te ni cuanducú jniñu i nuū ñin tēe ñuu ún. Te ni tají de i cuahān i rancho de jeē cóto i quiñí de. <sup>16</sup> Te cúni i caji i vésú soō ndúchi jeē cáyeji quiñí ún, návāha ndutú chíji i. Te ni ñin ñayuu tú na vé jéhe nuū i. <sup>17</sup> Yūcuān na te ni quejéé i nácani ni i: Táca mozo casájniñu vehe tátá rī, iyó cuéhē staā cáyeji i. Te ruhū chí jí rī sóco yāhá. <sup>18</sup> Na quiñuhun rī nuū tátá rī, te cahān rī jiín de: Tátā, ni sáha ná cuéchi nuū Yaā Dios jiín núu maá ní. <sup>19</sup> Vijna te nasūu gá tēe vāha cúu ná jéé cónaní ná sēhe ní. Te cuāha ní jnūhun cuu ná nájnūhun ñin mozo ní, achi rī. <sup>20</sup> Yūcuān na te ni naquihin i ichi cuanuhun i vehe tátá i.

Te níni jicá gá véji i, te ni jito tátá i nuū i, te ni cundáhú ni de i. Te jinu de cuajnahān de i, te ni nundee de sucūn i, te ni techūhú de i. <sup>21</sup> Yūcuān na te ni cahān i jiín de: Tátā, ni sáha ná cuéchi nuū Yaā Dios jiín núu maá ní. Vijna te nasūu gá tēe vāha cúu ná jéé cónaní ná sēhe ní. Achí i. <sup>22</sup> Te maá tátá i chí sa ni cahān de jiín táca mozo de: Cuáquihin sahma vāha ga te chuhun ró i. Te chuhun ró ñin xehyu ndaha i, te chíhi ró ndíjēn jehē i. <sup>23</sup> Te quiquihin ró becerro xéhen, te cahni rō tī na cáji yō, chí sáha yó vico. <sup>24</sup> Chí sēhe yí rī yáha, nájnūhun je ni jíhi i, te ni natecu i. Chí tu ní jíni rī ndé chí ní jéhēn i, te ni ndee i, áchí de. Te ni caquejéé de cásáha de vico.

<sup>25</sup> Te sūchi jévāha, íne i nde rancho, te vëndiji i, te ni cuyajni i yatá véhe. Te ni jini i jeē cúu yaa te cájita jéhé ñayuu. <sup>26</sup> Te ni cana i ñin mozo, te ni cajnūhún na vé cúu jeē cúu. <sup>27</sup> Te ni cachí mozo un núu i: Ni ndee ñani rō, te tátá rō ni jehni de becerro xéhen, chí ni ndee vāha i nuū de, áchí mozo. <sup>28</sup> Yūcuān na te ni quiñí ni sūchi jévāha, te tu ní cúni i ndívi i. Te ni quenda tátá i, te ni cahān ndahú de jiín i jeē na ndívi i. <sup>29</sup> Te ni cahān i jiín tátá i: Níni sáha ná jniñu ndácu ní, te tu cúniñi cuiñi ni na núu ní. Te tu jéhe ní vésú ñin lítú nuū ná, jeē sáha ná vico caji na jiín táca amigo na. <sup>30</sup> Te ni ndee sēhe ní yáha jeē ni jéxín cáhá i xūhun ní jíni táca ñahan. Te ni jehni ní becerro xéhen caji i, áchí i jíni tátá i. <sup>31</sup> Yūcuān na te ni cahān de jiín i: Sēhé, róhó chí níni ndéé ró jíni rī, te ndíhi jeē névāha rī chí suni cuenta maá ró cúu. <sup>32</sup> Te vijna chí iyó vāha jeē sáha yó vico te cúsi ni yō. Chí ñani rō yāhá, nájnūhun ni jíhi i, te ni natecu i. Chí tu ní jíni yō ndé chí ní jéhēn i, te ni ndee i, áchí de. Achí yá.

*Jñuhun yátá síquī mozo jeē ni stáhú de patrón de***16**

<sup>1</sup> Te suni ni cahān Jesús jín tēe cáscuāha jín yá:

Īn tēe cūcá ní ĩyo ĩn mozo de jeē ndiso jniñu nuū tāca gá mozo. Te ni cacahān jín patrón un jēe mozo un snāā cāhá ndajniñu de. <sup>2</sup> Te ni cana de mozo un, te ni cahān de jín: ¿Na jñuhun cúu yāha jēe nihín rī síquī rō? Nacuāha cuenta jniñu ndiso rō, chí ma cóndiso jniñu ga rō nuū mozo rī. Achí de. <sup>3</sup> Yūcuán na te jéni ní maá de: ¿Ndese sáha ri vijna? Chí patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chí cúcanu rī. <sup>4</sup> Núu súcuan te jín rī ĩn jeē sáha ri, návāha ñayuu cájeen nuū patrón rī, cuāha i vehe condee rī núu na quée quiví jeē quénehen de jniñu ri. <sup>5</sup> Te ni cana de ná ĩn ná ĩn tēe jeē cátaū nuū patrón de. Te ni cajñuhún de ĩn: ¿Nasaa táú rō nuū patrón rī? <sup>6</sup> Te ni cahān tēe ún: ĩn ciento barril aceite, achí de. Te ni cahān mozo un: Yáhá na cuāha ri lista rō, te cucōo yachī rō, te na sáha rō inga lista jeē uú xico uxí na, achí de. <sup>7</sup> Yūcuán na te ni cajñuhún de inga tēe: Te rōhó, ¿nasaa táú rō? Te tēe un ní cahān de: ĩn ciento cajón trigo, achí de. Te ni cahān de jín tēe ún: Yáhá na cuāha ri lista rō, te na sáha rō inga lista jeē cuún xico na, achí de. <sup>8</sup> Yūcuán na te patrón ni cahān de: Nacā jeē ndichí ní sáha tēe cúnée un, achí de. Te cáhán rī jín ró jeē ñáyuu ñayiví yáha, ndichí gá casáha i jeē quendōo vāha i nuū jnāhan i, vésú ñayuu cácadíje nuū Yaā Dios.

<sup>9</sup> Núu súcuan te cáhán rī jín ró jeē ndichí gá na sáha ró vésú jeē ní sáha mozo ndichí un. Chí ini ñayiví yáha nuū yíhi cuēchi, na sáha ró jniñu vāha jín xuhun ró, cuāha ró núu ñáyuu ndahú, návāha vésú núu ni ndihi xuhun ró ñayiví yáha, te quívicoo ró andiví núu coo vehe ró ní cání.

<sup>10</sup> Tēe jeē squícu vāha jín ĩn jniñu lúli-ni, suni squícu vāha de jín jniñu cáhnu. Te tēe jeē stahú jín ĩn jniñu lúli-ni, suni stáhú de jín jniñu cáhnu. <sup>11</sup> Núu súcuan te núu tu squícu vāha ró jín xuhun jeē iyó ñayiví yáha nuū yíhi cuēchi, te ma cuāha ya jeē vāha cuu ró ní cání andiví. <sup>12</sup> Te núu tu squícu vāha ró jín ndajniñu jeē ní jéhe núu ya nuū rō ñayiví yáha, te ma cuāha ya tahū cuu ró ní cání.

<sup>13</sup> Ni ĩn mozo ma cúu cuajniñu de nuū uū patrón. Chí quitī ni de nuū ĩn te coo manī de jín inga, chí squícu vāha de nuū ĩn te sájéé ni de nuū inga. Te suni súcuan ma cúu cuajniñu ró núu Yaā Dios te núu máni síquī xuhun ndíhvī ní rō, achí yá.

<sup>14</sup> Te tēe fariseo ni casacatā de nuū yā jeē ní cajini de tāca jñuhun cáhán yā, chí tēe rútóó xuhun cácuu de. <sup>15</sup> Te ni cahān yā jín de:

Máá ró cásáha ró jēe tēe ndaā cácuu ró núu ñáyuu. Te Yaā Dios chí jín yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

*Síquī ley Yaā Dios jín síquī jeē ndácu ya jniñu*

<sup>16</sup> Nde ná tu quiji Juan tēe scuándute, te ni ĩyo ley jeē ní jéhe Yaā Dios nuū Moisés, te suni ní castéén tāca tēe cánacani jñuhun ya. Yūcuán na te ná ní quiji Juan, te ni quejéé jít núu jñuhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

<sup>17</sup> Te yí gá cúu jeē náā ĩn letra nuū tútu ley yā vésú jeē náā andiví jín ñayiví, chí squícu ndihi jñuhun cáhán.

*Siqui jeē ma stóo jnáhan tēe jín ñahan*  
(Mt. 19.1-12; Mr. 10.1-12)

<sup>18</sup> Núu iin tēe stóo de ñasihí de te quijnáhan de jín inga ñahan, núu súcuan te cásiqui ndēe de ña. Te núu iin tēe condeca de ñahan ní ndusíin, suni cásiqui ndēe de ña, áchí yá.

*Jnūhun tēe cúcá jín Lázaro*

<sup>19</sup> Te ni cahān gā yā:

Ni iyo iin tēe cúcá, ní ñuhun de sahma lúu váha ndasí. Te ndiquiví ni iyo váha ndasí jēe ní yeji de. <sup>20</sup> Te suni ni iyo iin tēe ndáhú, nání de Lázaro, néne de yéhyí tēe cúcá un, te ní cáhnu de iin ndíhyi. <sup>21</sup> Te máni cúní de jeē ndutú chíji de jín stáa cuēchi jeē stívi tēe cúcá un. Te quécoo ina te cánayuu ti nuū ndíhyi de. <sup>22</sup> Te ni jihí tēe ndáhú un, te tǎcá ndajéhé Yāa Dios cuango ya jín ánuá de nde andiví nuū néne Abraham. Te suni ni jihí tēe cúcá un, te ni quindūji de. <sup>23</sup> Te tēe cúcá un xeēn ndóho de ine de lugar nuū cáyūcu ndíyi tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de. <sup>24</sup> Yūcuán na te ni cana cóhó de: Tátā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chí xeēn ndóho ná núu yáñuhūn yáhá. Achí de. <sup>25</sup> Te ni cahān Abraham jín de: Séhē, nucūhun ni rō jeē ni níhīn rō ndíhi jeē váha ná ni cotecu rō, te Lázaro chí sa suhva jnūndóho ni níhīn de. Te vijna je ni ndusíi ni de yáhá, te róhó chí ndóho rō jínā. <sup>26</sup> Te suni iyó iin jeē cunú téyi, ine mēhñu yó jijnáhan yó. Te ñayuu cáhīn yáhá, vésú cácu ni i yáha i jeē i nuū rō, te ma cúu. Te ni ma cúu yáha máá rō quijicoo rō yáha. Achí Abraham. <sup>27</sup> Yūcuán na te ni cahān tēe cúcá: Núu súcuan te cáhán ndahú ná jín ní, Tátā Abraham, tají ní Lázaro na quihín de vehe tátá na. <sup>28</sup> Chí iyó úhūn gā ñani ná, te na quícachi de nuū i jeē na nácani ni i te stóo i cuēchi i, návaha ma quívicoo i nuū ndóho ná yáha, áchí de. <sup>29</sup> Te ni cahān Abraham jín de: Je cáneváha i tutu jeē ní tee Moisés jín táca tēe ni canacani jnūhun Yāa Dios. Suu yūcuán na chúhun ni i, áchí Abraham. <sup>30</sup> Te ni cahān tucu tēe cúcá: Vésú súcuan, Tátā Abraham, te núu iin ñayuu ni jihí quihīn nuū i, yūcuán na te nacani ni i jeē stóo i cuēchi i, áchí de. <sup>31</sup> Te ni cahān Abraham jín de: Núu tu chúhun ni i jnūhun ni nacani Moisés jín táca tēe ni canacani jnūhun Yāa Dios, suni ma candíje cuiti i núu natecu iin ndíyi quihīn nuū i, áchí de.

*Xeēn coo siquí ñáyuu squívi jnáhan nuū cuéchi*  
(Mt. 18.6-7, 21-22; Mr. 9.42)

## 17

<sup>1</sup> Te ni cahān Jesús jín tēe cáscuáha jín yá:

Máni iyó jēe nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi. <sup>2</sup> Váha ga núu ni conuhnī iin yōso cáhnu sucūn i te quēe i chíji ndute mar, vésú jeē squívi i iin sūchi lúlí yáha núu cuéchi. <sup>3</sup> Coto ma sáha rō súcuan jijnáhan rō.

Te núu jnáhan rō sáha de cuēchi siquí rō, te cahān rō nuū de. Te núu nacani ni de, te cone cáhnu ni rō nuū de. <sup>4</sup> Te núu uxā jínu jeē iin quiví sáha de cuēchi siquí rō, te núu uxā jínu nácani ni de te cahān de jín rō jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

*Jeē yóhyo cújéhnu jnūhun cándíje*

<sup>5</sup> Te tēe cácuu apóstol ni cacahān de jín Jitoho yō:

Sáha ní jéē nīhin ga candíje ná jéē sáha Yaā Dios jeē cájicān na núu yā, achí de.

<sup>6</sup> Te ni cahān maá Jítoho yō jíin de:

Núu cácandíje ró vēsú ĩn tihlí-ni, nájnūhun ĩn ndiquin mostaza jeē tihlí-ni cáa, te cuu cahān rō jeē nūyūhndu yáha na quēnda te nucondichi nde nuū mar, te coo nájnūhun cahān rō.

### *Jeē cánuú squícu vāha yó núu yā*

<sup>7</sup> 'Ndé ĩn ró iyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. <sup>8</sup> Chi sa suhva cáhán rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō. <sup>9</sup> Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu. <sup>10</sup> Te suni súcuan maá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha ri máa-ni jeē cánuú sáha ri, achí rō. Achí yá.

### *Jeē ní nasávāha ya uxī tēe ndóho cuehyī stehyú*

<sup>11</sup> Te jíca Jesús ichi cuahān yā ñuu Jerusalén, te ni yáha ya cuahān yā mēhñū región Samaria jíin Galilea. <sup>12</sup> Te ni jinū yā ĩn ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de. <sup>13</sup> Te ni cacana jee de:

Jesús, Maestro, cundáhú ni ni sáña, áchí de jijnáhan de.

<sup>14</sup> Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sūtū jeē ní canduvāha ró, áchí yá.

Te níní cuángoo de te ni canduvāha-ni de. <sup>15</sup> Yūcuán na te ĩn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. <sup>16</sup> Te ni jecuiñī yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de. <sup>17</sup> Te ni cahān Jesús:

¿A násūú ndihúxi de ni canduvāha? Te ĩn gā de, ¿naun tu ní cánandicó de nacuatáhú de? <sup>18</sup> ¿A máñuhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

<sup>19</sup> Te ni cahān yā jíin tēe ún:

Ndocuiñī quinhun rō. Chí ni candíje ró jéē cuu nasávāha ri rohó, te jeē yúcuán ní nduvāha ró, áchí yá.

### *Ndese coo quivī jeē ndíji ya ndacu ya jniñu*

(Mt. 24.23-28, 36-41)

<sup>20</sup> Te tēe fariseo ni cacajnūhún de Jesús ndé quivī quejéé jéé ndácu Yaā Dios jniñu ĩni ñayiví. Te ni cahān yā jíin de:

Ma queé ndijin jeē ndácu Yaā Dios jniñu. <sup>21</sup> Ni ma cúu cahān ñayuu: Yáha íne ya ndácu ya jniñu, chí: Yūcuán íne ya, achí i. Chí je ndácu Yaā Dios jniñu mēhñu ró jijnáhan ró. Achí yá.

<sup>22</sup> Yūcuán na te ni cahān yā jíin tēe cáscuáha jíin yá:

Quee tiempo jeē yóhoyo cúu ni rō coto ró jéē ndíji ruhū, Yaā ní nduu tēe, te ma cóto ró jijnáhan ró. <sup>23</sup> Te cahān ñayuu jíin ró: Yáha íne ya, chí: Yūcuán íne ya, achí i. Te ma quíngoo ró condēhe ró, ni ma cóndiquín rō i. <sup>24</sup> Chí nájnūhun sáha taja jeē ndíndēé ĩn lado andiví te cúndijin nde inga lado, suni súcuan cuu quivī ndíji ruhū, Yaā ní nduu tēe, chí ndihí ñayuu coto. <sup>25</sup> Te jíni ñūhún jéé xíhna gā ndoho xeēn rī, te ñayuu iyó vijna, squéhichí i ruhū. <sup>26</sup> Chí nájnūhun ni cuu

quivī ni íyo Noé, suni súcuan cuu quivī ndíji ruhū, Yaā ní nduu tēe. <sup>27</sup> Chi quivī un ní cayeyi i, ni cajihi i, ni canandāha i, ni cajēhe i sēhe síhí i jeē nándāha, nde ni jinū quivī jeē ni quivī Noé ini barco cáhnu jeē naní arca. Te ni cuun saū xeén, te ni ndaa ndute ni cajihī ndihí i. <sup>28</sup> Te suni súcuan ni cuu quivī ni íyo Lot. Ni cayeyi i, ni cajihi i, ni cajeen i, ni caxīcō i, ni cataji i itu, ni cajeni i vehe. <sup>29</sup> Te quivī jeē ní quenda Lot ini űuu Sodoma cuahān de, te ni cuun űuhūn jīn azufre ichi ándiví, te ni snáa ndihí űayuu. <sup>30</sup> Te suni súcuan coo quivī jeē ndíji ruhū, Yaā ní nduu tēe.

<sup>31</sup> Te quivī ún te űayuu cáhīn yatā véhe, te ndajniűu i űūhun ini vehe, cáhán rī jīn i jeē ma ndiví i naquihin i, chi cánuú cunu yachí i jeē cácu i. Te suni súcuan űayuu casájniűu nuū ítu, ma quīnūhun i vehe i jeē quīhin i ndajniűu i. <sup>32</sup> Te nūcūhun ni rō ndese ni ndoho űasihí Lot jeē ni jíhí űa. <sup>33</sup> Te núu ndé űayuu cuní i cácu i nuū jnūdóho quiji nuū i jeē siquī ruhū, núu súcuan te jnahnū ndetū i ní cáni. Te núu ndé űayuu, vēsú na cúu i jeē siquī ruhū, te cotecu i ní cáni.

<sup>34</sup> Te cáhán rī jīn ró jeē quivī ndíji ri te quixí uū tēe ĩn jīto jecuáā, te ĩn de naquihin ri, te inga de ndōo, chi tu ní cándíje de. <sup>35</sup> Te coo uū űahan jeē ndíco cáhnu, te ĩn űa naquihin ri, te inga űa ndōo. <sup>36</sup> Te uū tēe sájniűu de nuū ítu, te ĩn de naquihin ri, te inga de ndōo. Achí yá.

<sup>37</sup> Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájniűun ni cahān ní? Achí de.

Te ni cahān yā jīn de:

Nájniűun jeē cutútú téji ndé-ni cúu nuū catú quiti ní jíhí, suni súcuan coo tāca jéē ni cáhán rī ndé-ni cúu-ni nuū cáhīyo űayuu.

*Jnūhun yatá siquī juez jīn űahan viuda*

## 18

<sup>1</sup> Te ni cahān yā ĩn jnūhun yatá jīn de jeē cánuú jeē niní cácan tahu de, te ma ndínuu ni de jīn. <sup>2</sup> Te ni cahān yā:

Ni íyo ĩn juez ini ĩn űuu. Te ni tu ndíso íyo de nuū Yaā Dios, ni tu yúhú de nuū ní ĩn űayuu. <sup>3</sup> Te suni űuu un íyó ĩn űahan ní ndóo ndáhú. Te űahan un jéhén-ni jéhén-ni űa nuū de, jícán űa jeē na sándaā de siquī ĩn űayuu jeē jito uhū i űa. <sup>4</sup> Te cuehē quivī tu ní cuní de sándaā de, te yūcuán na te ni jeni ni de: Vēsú tu ndíso íyo rī nuū Yaā Dios, ni tu yúhú rī nuū ní ĩn űayuu, <sup>5</sup> te űahan viuda yáha, yōhō stáhān űa ruhū, te jeē yúcuán na sándaā rī siquī űayuu jeē jito uhū i űa. Chi núu tuú, te quejéé rí jnaníní ni rī jeē quíji quíji űa. Achí de. Achí máá Jítoho yō.

<sup>6</sup> Te ni cahān gā yā:

Súcuan cúu jeē ni cáhán juez, tēe tú ndaā. <sup>7</sup> Te Yaā Dios, nasūu súcuan cúu ya, chi sándaā yā siquī jniűu űayuu ní nacāji ya jeē nduú űuú cácahān ndahú i jīn yá. Chi jnama ya i nuū tāca jéé cájito uhū i. ¿Te á cueé jnama ya i? <sup>8</sup> Cáhán rī jīn ró jeē yachí. Te quivī ndíji ruhū, Yaā ní nduu tēe, ¿á níhīn gā rī űayuu cácañdíje níhīn ini űayiví? Achí yá.

*Jnūhun yatá siquī tēe fariseo jīn tēe stútú xūhun renta*

<sup>9</sup> Te suni ni cahān yā jnūhun yatá yáha jīn jecu űayuu jeē cájeni ni i jeē űayuu ndaā cácuu i, te cájeni ni i jeē sava ga űayuu tu cáhīyo ndaā:

<sup>10</sup> ĩn tēe fariseo cuahān de templo jeē cacān tahu de. Te ĩn tēe stútú xūhun renta suni cuacacān tahu de templo. <sup>11</sup> Te tēe fariseo, índichi de, te súcuan

ni jicān tahu de: Tātā Yaā Dios, na cūtahū na nūū ní, chi tu cūu ná nájñūhun cándāa sava ga tēe, tēe cuihná, tēe néé, tēe cásiquí ndéē jnāhan cácuu de. Ni tu cūu ná nájñūhun cáa tēe yúcuan jeē stutú xūhun renta jeē scāa ga de jícán de nuū ñayuu. <sup>12</sup> Te uū jínu jeē semana iyó ndite ni na nūū ní, te jéhe ná nuū ní ññ ññ siquī tāca úxí ndajniñū níhín na, áchí de. <sup>13</sup> Te tēe stútú xūhun renta, ni jecuiñí jicá de nuū templo, ni tu ní chūndeyí ni de jeē ndonehen de nuū de, chi sa suhva ni caní de yiqui jicá de jeē cucuíhyá ni de. Te ni cahān de: Tātā Yaā Dios, cundáhú ni ní saña, chi tēe iyó cuéchi cūu ná, áchí de. <sup>14</sup> Te cáhán rī jín rō jeē tēe stútú xūhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajhēnu i máá i, sa ndululí i. Te ñayuu jeē sálulí i máá i, sa ndujéhnu i. Achí yá.

*Jeē ni jicān tahu Jesús jehē sūchi lúli*  
(Mt. 19.13-15; Mr. 10.13-16)

<sup>15</sup> Te ni quecoo ñayuu jín sūchi lúli nūū Jesús, jeē na sóo yá ndaha ya xini i. Te tēe cáscuāha un ní cajini de jeē súcuan cūu, te ni cacahān de nuū ñayuu vējicoo jín i. <sup>16</sup> Te máá Jesús ni cana ya de, te ni cahān yā:

Cuāha jñūhun na quíjicoo sūchi lúli jñā nuū rī, te ma cásí rō jeē quíjicoo i. Chi ñayuu jeē ndió cóo ni i caní ni i nájñūhun sūchi yáha, suu i quívi ndaha Yaā Dios jeē ndacu ya jniñū nuū i. <sup>17</sup> Te jendaá cáhán rī jín rō, nūu ññ ñayuu tú cuatáhú i jeē ndácu Yaā Dios jniñū nuū i, nájñūhun jétáhú ññ sūchi lúli, ma quívi cuiiti i ndaha ya, achí yá.

*Jñūhun tēe cucá*  
(Mt. 19.16-30; Mr. 10.17-31)

<sup>18</sup> Te ññ tēe cújéhnu ni cajñūhún de ya:

Tēe vāha cūu ní Maestro. ¿Te na jniñū vāha sáha ná te nihīn tahu na cotecu na ní cáni andiví? Achí de.

<sup>19</sup> Te ni cahān Jesús jín de:

¿Naun cáhán rō jeē tēe vāha cūu rí? Tú ni ññ tēe vāha iyó, chí máá ññ-ni Yaā Dios. <sup>20</sup> Je jini rō tācá jniñū ní ndacu Yaā Dios: Ma cosíquí ndéē jnāhan rō. Ma cáhni rō ndiyi. Ma sacuíhná rō. Ma sajnūhún rō. Cuatáhú rō nuū tatá rō nuū naná rō. Achí yá.

<sup>21</sup> Te ni cahān maá de:

Tācá jniñū yáha je ní squícu ná ndé ná lúli ná, achí de.

<sup>22</sup> Te Jesús ni jini ya jñūhun yáha, te ni cahān yā jín de:

Ññ na jniñū cūmaní sáha rō nūu súcuan. Xicó ndihí jeē névāha rō, te cuāha rō nūū ñayuu ndahú. Te nde andiví cuāha ya jeē vāha ndasí nūū rō. Yūcuán na te quiji rō condiquñ rō ruhū, achí yá.

<sup>23</sup> Te ná ni jini sōho de jñūhun yáha, te yōhoyo ni cucuíhyá ni de, chí cucá ndasí de. <sup>24</sup> Te jito Jesús jeē súcuan cucuíhyá ni de, te ni cahān yā:

Tēe cucá chí yōhoyo yí quívicoo de ndaha Yaā Dios jeē ndacu ya jniñū nuū de. <sup>25</sup> Yachí gā yāha ññ camello yaū yutícuí vésú jeē quívi ññ ñayuu cucá ndaha Yaā Dios jeē ndacu ya jniñū nuū i, áchí yá.

<sup>26</sup> Te tēe ní cajini jñūhun yáha, ní cacahān de:

¿Ndé ñayuu cūu jeē cácu nūu súcuan? Achí de.

<sup>27</sup> Te ni cahān yā jín de:

Ñayuu chí ma cūu squívi i máá i ndaha Yaā Dios, te máá yá chí cuu sáha ya, achí yá.

<sup>28</sup> Yūcuán na te ni cahān Pedro:



Saña jínáhan ná ní castóo ná ndihi jeē cánevāha ná, te cándiquīn na níhín, áchí de.

<sup>29</sup> Te máá yá ni cahān yā jíin de:

Jendaá cahān rī jíin ró jínáhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu núu ñáyuu, <sup>30</sup> núu súcuan te nanihín cuehē gā i ini ñayivi yáha, te tiempo quiji te cotecu i ní cáni, áchí yá.

*Jeē ni cáhān tucu ya jeē cúu yā*  
(Mt. 20.17-19; Mr. 10.32-34)

<sup>31</sup> Te ni cana sūn ya ndihúxi uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndihi jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán. <sup>32</sup> Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácata de nuū rī, te cahān neé de nuū rī, te tesihí de nuū rī. <sup>33</sup> Te cani de ruhū, te sáá te cahni de ruhū. Te nuū uní quivī te natecu rī. Achí yá.

<sup>34</sup> Te máá de tu ní cájecūhun cuiiti ni de tāca jnūhun yáha. Chi jnūhun yí cúu, te tu ní cúu jecūhun ni de jeē cahān yā.

*Jeē ní nasávāha ya ñn tēe cuáá ñuu Jericó*  
(Mt. 20.29-34; Mr. 10.46-52)

<sup>35</sup> Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícan de caridad. <sup>36</sup> Te ni jini sóho de jeē yáha cuehē ñayuu cuangoo i, te ni cajnūhún de naun cuángoo i. <sup>37</sup> Te ni cacahān i jíin de jeē Jesús, tēe ñuu Nazaret, yáha ya cuahān yā. <sup>38</sup> Yūcuán na te ni cana jee de:

Jesús Séhe yucūn David, cundáhú ni ní saña, áchí de.

<sup>39</sup> Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ní saña víi, achí de.

<sup>40</sup> Yūcuán na te ni jecuiñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnūhun yá de:

<sup>41</sup> ¿Na vé cuní ró jeē sáha rī jíin ró? achí yá.

Te ni cahān de:

Jeē na ndúndijin tinūu ná cuní na, áchí de.

<sup>42</sup> Te ni cahān Jesús jíin de:

Ndúndijin tinūu ró núu súcuan. Ni candíje ró jeē cuu nasávāha rī rohó, te jeé yúcuán ní nduvāha ró, áchí yá.

<sup>43</sup> Te ni ndúndijin-ni tinūu de, te ni ndiquīn de ya, te nácuatáhú de nuū Yaā Dios. Te ndihi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

*Jnūhun Zaqueo*

## 19

<sup>1</sup> Te ni quivī Jesús ini ñuu Jericó, te ni yāha-ni ya cuahān yā. <sup>2</sup> Te yūcuan íyó ñn tēe cúca nání de Zaqueo, te cújéhu de nuū tēe cástútú xūhun renta. <sup>3</sup> Te cúni de coto de návāha cuni de ndé ñn cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de. <sup>4</sup> Te jínu de ni cosnúu de. Te ni caa de xiní ñn nuyūhndú návāha coto de nuū yā, chi yūcuan yáha ya quihīn yā. <sup>5</sup> Te ni jinū yā yūcuán, te ni ndacoto ndaa ya nuū de. Te ni cahān yā:



Zaqueo, yachī nuu ró, chi jíni ñúhún jéé ndóo ri vehe ró vijna, áchí yá.

<sup>6</sup> Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de. <sup>7</sup> Te ni cajito ñayuu jeé súcuan ni cuu, te ni cacahān i siquī yā jeé cuahán yā ndóo ya vehe ñn tēe sáha cuēchi. <sup>8</sup> Yūcuán na te ni ndocuiñi Zaqueo, te ni cahān de jíin máá Jítoho yō:

Vijna te sava ndihi ndajniñu ná chi cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná únī gā siquī naquihin i, áchí de.

<sup>9</sup> Te ni cahān Jesús:

Vijna te vehe yáha je ni cācu ñn tēe jeé ma jnahnú ndetū de, chi ni candíje de nájñuhun ni candíje jíi de Abraham. <sup>10</sup> Chi ruhū, Yāá ní nduu tēe, ni quiiji ri nducú rí ñayuu jeé jnahnú ndetū, te jnama ri i, áchí yá.

### *Jñuhun yátá siquī uxī mozo jíin xúhun*

<sup>11</sup> Te nuū ñáyuu ní cajini táca jñuhun yáha, ní cahān gā Jesús ñn jñuhun yátá jeé steén yā ndese coo quiñi ndíji ya. Chi je ni cuyajni ya ñuu Jerusalén, te cájeni ní i jeé víjna ñúhún quejéé jéé ndácu ya jniñu sáha Yāá Dios. <sup>12</sup> Te ni cahān yā:

Ñn tēe cújéhu cuahān jicá de inga nación, návāha nihīn jniñu de cuu de rey, te ndiji de ndacu de jniñu. <sup>13</sup> Te nde ná tu quihīn de, te ni cana de uxī mozo de, te nuū ñn ñn i ni jéhe de ñn xúhun jéé ndeé yahu ndasí. Te ni cahān de jíin i: Sájniñu ró jéé na ndúcuehē xúhun yáha jíjnáhan ró níni jéé quihīn rī te ndee rī, áchí de. <sup>14</sup> Te ñayuu nación de cáquitiñi ní i nuū de, te ni catají i jecu tēe cándiso jíniñu cuangoo yatá de jeé cahān: Tu cánujnahan ní ñayuu nación na jéé cuāha ní jniñu nuū tēe yáha jéé cuu de rey nuū i, áchí. <sup>15</sup> Te vēsú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeé na quíjicoo mozo jeé ni jéhe de xúhun núu, návāha na cúni de nasaa ni canihīn ñn ñn i siquī. <sup>16</sup> Te ni quee ñn mozo un núu de, te ni cahān i: ñn xúhun jéé ni jéhe ní núu ná, ni nduu uxī, áchí i. <sup>17</sup> Te ni cahān maá rey: Vāha mozo cúu ró, te vāha ní sáha ró. Chi ní squícu vāha ró jíin ñn jniñu lúli-ni, te vijna te sáha rī jeé cújéhu ró ndacu ró jniñu nuū uxī ñuu jñí rī, áchí de. <sup>18</sup> Te ni quee inga mozo, te ni cahān i: ñn xúhun jéé ni jéhe ní núu ná, ni nduu uhūn, áchí i. <sup>19</sup> Te suni ni cahān de jíin mozo un: Róhó, cújéhu ró ndacu ró jniñu nuū uhún ñuu jñí rī, áchí de. <sup>20</sup> Te ni quee inga mozo, ni cahān i: Yāha nácuāha ná xúhun ní, chi ní chuvéha ná ñni ñn pañuelo. <sup>21</sup> Chi ní yūhu ná nihīn, chi tēe xeēn cúu ní. Chi cuehē gā nándacān ní vēsú jeé ni jéhe ní, te cuehē gā cuní ni vēsú jeé cúu sáha mozo ní, áchí de. <sup>22</sup> Yūcuán na te ni cahān rey: Mozo neé cúu ró núu súcuan, te jíin jñuhun ní cahān rō te sándaā rī jeé iyó cuéchi ró jéé tu ní sájniñu ró jíin xúhun rí. Chi jéni ní rō jeé tēe xeēn cúu rī, te cuehē gā nándacān rī vēsú jeé ni jéhe rī, te cuehē gā cuní rī vēsú jeé cúu sáha mozo rī. <sup>23</sup> Núu súcuan ¿te naun tu ní chúne ró xúhun rí vēsú nuū banco? Te jeé ní ndee rī te naquihin rī xúhun rí nde jíin séhe xúhun núu. Áchí de. <sup>24</sup> Te ni cahān de jíin ñáyuu cáhiñ yūcuán: Quende xúhun jíñā nuū i, te cuāha ró núu mozo jeé névāha uxī, áchí de. <sup>25</sup> Te ñayuu un ní cacahān i jíin de: Te ndese, chi je névāha de uxī, áchí i. <sup>26</sup> Te ni cahān tucu rey: Cáhān rí jíin ró jeé ñáyuu je névāha, sa quiiji ga nuū i, te conevāha cuehē i. Te ñayuu jeé tu névāha, sa cujiyo-ni vēsú jecu jeé névāha i. <sup>27</sup> Te tēe jeé cájito uhū ruhū, jeé tu ní cánujnahan ní de jeé cuu ri rey nuū de, cuáquihin de na quíjicoo de yáhá. Te cahni rō de coto ri, áchí de. Áchí Jesús.

*Jeē ni quāvi Jesús űuu Jerusalén  
(Mt. 21.1-11; Mr. 11.1-11; Jn. 12.12-19)*

28 Te nuū ní ndihi ni cahān yā jnūhun yáha, te ni jica ga yā cuahān yā űuu Jerusalén. 29 Te nuū ní cuyajni ya űuu Betfagé jíin űuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de. 30 Te áchí yá jíin de:

Cuáhán űuu lulí íne ichi núú. Te núu ni quāvi ró, te nihīn rō ĩn burro núhní tī, jeē ní ĩn tēe ná tu coso de tī. Te ndají rō tī quiji ró jíin tī. 31 Te núu ndé ĩn cajnúhún naun cándají ró tī, te cahān rō jíin: Máá Jítóho yō jíni űúhún yá tī, achí rō. Achí yá.

32 Te cuangoo tēe ni tají yá, te ni canihīn de tī nájnūhun ni cahān yā jíin de.

33 Te jeē cándají de tī, te ni cacahān jítóho tī jíin de:

¿Naun cándají ró burro ri? achí.

34 Te ni cacahān de:

Máá Jítóho yō jíni űúhún yá tī.

35 Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī. 36 Te ná-ni cuahān yā, sáá cáscáá űayuu sahma i iní ichi. 37 Te nuū ní cuyajni ya nuū cúun ichi yucu Olivos, te ndihi űayuu cácdíje jeē cándiquīn i ya, ni caquejéé i cácusī ní i, te cácana jee i jeē yóhoyo vāha Yaā cúu Yaā Dios siquī tācá jniñu jéhnú ni sáha ya ni cajito i. 38 Te áchí i:

Yóhoyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo maní yō jíin Yaā Dios andiví. Te yóhoyo cújéhnú Yaā Dios, achí i jíjnáhan i.

39 Yūcuán na te jecu tēe fariseo cáhiin mēhñu űáyuu cuehē ún, ní cacahān de jíin yá:

Maestro, cahān ni núú űáyuu cándiquīn nihín jéē na cási i yuhu i, áchí de.

40 Te ni cahān Jesús:

Cáhán rī jíin ró jeē núu űayuu yáha na cási i yuhu i, te tāca yūú chi cana jee, achí yá.

41 Te nuū ní cuyajni ya Jerusalén, te ni jito ya űuu ún, te ni ndahyū yā siquī.

42 Te ni cahān yā:

Róhó űáyuu Jerusalén, yóhoyo ni cuu ni rī jeē na jécūhun ni rō jeē cuu ndumaní rō jíin Yaā Dios sáha ri. Te siquī jeē tu cácdíje ró, te vijna chí ma cúu ga jecūhun ni rō. 43 Chí quee quiví jeē coo jnūndóho, te űayuu cájito uhū rohó, cuicó ndūú i űuu rō, te casi cutú i jíin yūú, te tāca lado ndonda i siquī rō.

44 Te ndihi vehe scótúú i, te cahni i róhó jíjnáhan ró. Te ma stóo i ni ĩn vehe jeē cóso jnáhan ga yuū. Chí ni quiji ri nde nuū Yaā Dios jeē jnáma ri rohó, te tu ní cácdíje ró. Achí yá.

*Jeē ní quenehen ya űayuu ini templo  
(Mt. 21.12-17; Mr. 11.15-19; Jn. 2.13-22)*

45 Te ni quāvi ya ini templo cáhnu, te ni quejéé yá quénehen ya tāca űáyuu cájeen quití te cánaxico núú űáyuu jeē socó i. 46 Te ni cahān yā jíin i:

Yósó núu tútu íi jeē cahán Yaā Dios: Vehe ri chí vehe nuū cájicān tahú cúu, áchí Yaā Dios. Te máá ró jíjnáhan ró, chí nájnūhun yaū cava űacuīhna ní canasáha ró, achí yá.

47 Te ndiquiví ni steén yā jnūhun ini templo. Te sutū cácujehnú jíin tēe cástéén tutu ley Yaā Dios jíin tēe cácujehnú nuū űáyuu űuu ún, cánducú de modo

ndese cahni de ya. <sup>48</sup> Te tu cániĥin de modo sáha de, chi ndivii ñayuu yōhyo cájetáhú i cájini nahín i jñūhun cáhán yā.

*Siquī jeē ndíso jñiñu Jesús  
(Mt. 21.23-27; Mr. 11.27-33)*

## 20

<sup>1</sup> Te ĩn quivī steén yā jñūhun nuū ñayuu ĩni templo, te nácani ya jñūhun jeē jnáma Yāā Dios ñayuu. Te ni quecoo sutū cácujeĥnu jíin téē cástéén tutu ley Yāā Dios jíin táca téē jéĥnu cándacu jñiñu. <sup>2</sup> Te ni cacahán de:

Castūhún, ¿ndé ní nihin jñiñu ró jeē sáha ró jñiñu yáha? ¿Te ndé ĩn ni tee jñiñu siquī ró jeē sáha ró súcuan? Achí de.

<sup>3</sup> Te ni cahán Jesús jíin de:

Suni ruhū cajñūhun rí rohó ĩn jñūhun jíjnáhan ró. Castūhun núu rí: <sup>4</sup> ¿Nde ĩn ni tee jñiñu siquī Juan jeē ni scuándute de? ¿A Yāā Dios chí táca téē? Achí yá.

<sup>5</sup> Yūcuán na te ni candajnūhun máá de:

¿Nde se cahán yō? Núu cahán yō jeē Yāā Dios ni tee ya jñiñu un siquī Juan, te cahán de jíin yó: ¿Najehē tu ní cácañdije ró de núu súcuan? <sup>6</sup> Te núu cahán yō jeē ñayuu ni catee jñiñu un siquī de, te ndivii ñayuu cahni i yóhó jíin yūu, chí cácañdije i jeē téē ní nacani jñūhun Yāā Dios ní cuu ndije Juan, achí de cácahán máá de.

<sup>7</sup> Te ni cacahán de jeē tu cájini de ndé ĩn ni tee jñiñu siquī Juan jeē ní scuándute de. <sup>8</sup> Yūcuán na te ni cahán Jesús:

Ni ruhū, suni ma cáchi rí nuū rō ndé ĩn ni tee jñiñu siquī rí sáha ri jñiñu yáha, achí yá.

*Jñūhun yátá siquī téē néé cáśájñiñu nuū uva  
(Mt. 21.33-44; Mr. 12.1-11)*

<sup>9</sup> Te ni quejeé Jesús cahán yā jñūhun yátá yáha jíin ñayuu ún:

ĩn téē ni nachuhun de cuehē uva nuū ñūhun de. Te ní stóo de nuū sava téē sájñiñu nuū, te cuu sava de ndehē jíin. Te ní tee de ichi jeē cuahán nahán de inga űuu. <sup>10</sup> Te máá tiempo ndutútú uva, te ní tají de ĩn mozo cuahán nuū téē cáśájñiñu ún, návāha naquihin de sava ndehē uva un. Te téē un ní cacani de mozo, te ní canatají de i cuanuhun i súcuan-ni. <sup>11</sup> Te téē chíí uva ní tají tucu de inga mozo cuahán. Te téē cáśájñiñu ún, suni ní cacahán ndevāha de nuū i, te ní cacani de i, te ní canatají de i cuanuhun i súcuan-ni. <sup>12</sup> Te téē chíí uva ní tají tucu de inga mozo cuahán. Te téē cáśájñiñu ún, suni ní castújí de mozo un, te ní cascúnu de i.

<sup>13</sup> Yūcuán na te ní cahán téē chíí uva: ¿Nde se sáha ri? Na tájí rí sēhe ri jeē maní rí jíin, chí sanaa te núu ní cajito de i te coo yíñuhún de nuū i. Achí de. <sup>14</sup> Te téē cáśájñiñu ún, ná ní cajito de jeē véji i, te ní cacahán de: Téē chíí táhū cúu jeē véji ún. Na cáhni yō de, te ndōo tahū de cuu máá yó, achí. <sup>15</sup> Te ní caquenehen de i inga lado, te ní cajehni de i, achí yá.

Te ní cajñūhun yá de:

Núu súcuan ¿te ndese sáha téē chíí uva jíin téē cáśájñiñu ún? <sup>16</sup> Ndiji de te cahni de téē un jíjnáhan, te cuāha de ñūhun cáá uva un núu inga sava téē sájñiñu nuū, achí yá.

Te jeē ní cajini ñayuu jñūhun yáha, te ní cacahán i:

Aí, núu ma cóo cuiti súcuan víi, achí i.

<sup>17</sup> Te ndéhé yá nuū i jíjnáhan i, te ní cahán yā:

Núu súcuan ¿te á cájecūhun ni rō jñūhun yáha jéē yosó núu tútu īi jeē cúu ri nájñūhun ĩn yuū? Chí áchí tutu:

Yuū jeē ní casquéhichí tēe cájeni vehe,  
yuū yáha nduu jeē quítuu vehe.

Achí. <sup>18</sup> Te ñayuu tu cácanđíje, ndoho i nájñūhun ndóho ñayuu jeē cotúú siquī yuū te jnánhú i. Te quivī sándaā Yaā Dios cuēchi, te ñayuu tu cácanđíje, ndoho i nájñūhun ndóho ñayuu jeē ñinga yuū siquī i te cundihī i sáha. Achí yá.

### *Siquī xūhun renta*

*(Mt. 21.45-46; 22.15-22; Mr. 12.12-17)*

<sup>19</sup> Yūcuán na te sutū cácujeñhu jíin tēe cástéén tutu ley Yaā Dios, ni cacuni de jñi de ya maá hora un. Chí ni cajecūhun ni de jeē siquī maá de cúu jñūhun yátá ní cahān yā siquī tēe cásjniñu nuū uva jíin tēe cájeni vehe. Te tu ní cúu, chí cáyūh de jeē quítū ni ñayuu. <sup>20</sup> Yūcuán na te ni catají de jecu tēe cuacoto yuhu de ya, te tēe un cásaħa-ni de jeē tēe ndaa cácuu de. Te cánducú de sáha de jeē cahān yā ĩn jñūhun jeē nihín de cuēchi siquī yā, te quindeca de ya nuū tēe cúu gobernador. <sup>21</sup> Te ni cacahān de:

Maestro, cájini na jéē cahān vāha ní, te stéén ndaā ní. Te tu sáha ní cuenta ndese cúu ĩn ĩn ñayuu, chí ĩnuú-ni sáha ní jíin i. Te stéén ndaā ní ndese squicu ñayuu nuū Yaā Dios. <sup>22</sup> Núu súcuan te cachí ní: ¿A íyo vāha jeē chúnaa yō renta nuū rey nación Roma jeē jñi nación yō, chí tuú? áchí de.

<sup>23</sup> Te ni jini yā jeē cácuu de stáhú de ya, te ni cahān yā jíin de:

¿Najehē cájito ndee rō ruhū? <sup>24</sup> Stéén ĩn xūhún na cōto ri. ¿Ndeé ĩn nuū cúu jeē ndeé nuū xūhun yáha, te ndé síhví cúu jeē ndeé yáhá? áchí yá.

Te ni cacahān de jíin yá:

Nuū jíin síhví rey un cúu, áchí de.

<sup>25</sup> Yūcuán na te ni cahān yā jíin de:

Núu súcuan te nacuaħa ró núu rey un jéē yħi cuenta nuū de, te nacuaħa ró nuū Yaā Dios taca jéē yħi cuenta nuū maá yá, achí yá.

<sup>26</sup> Te taca tēe ún tu ní cúu nihín de cuēchi siquī yā jíin ni ĩn jñūhun cahān yā, cájito jíinú ñayuu. Chí sa ní canaa ni de jeē ndichí ní stió cuñí yā jñūhun nuū de, te tuá na vé ni cácaħān de.

### *Jeē ní cacajñūhún de siquī jeē nátecu ndīyi*

*(Mt. 22.23-33; Mr. 12.18-27)*

<sup>27</sup> Yūcuán na te jecu tēe grupo saduceo ni quecoo de nuū yā. Te tēe un cácaħān jeē tu nátecu cuítū ndīyi. Te ni cacahān de jíin yá:

<sup>28</sup> Maestro, Moisés ni tee de nuū tútu jeē cánevāha yó: Núu ĩn tēe cuu de, te ndóo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihín ñasihí de, te sēhe de jeē cácu jíin ña nucuiñi i nuū ndīyi ñani de, áchí tutu. <sup>29</sup> Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihí de, te tú sēhe de ní íyo. <sup>30</sup> Te tēe uū ni naquihín de ña, te suni ni jihí de, te tú na sēhe de ní íyo. <sup>31</sup> Te tēe uní ni naquihín de ña. Te suni súcuan ndihúxá de ni condeca de ña, te ni cajihí ndihí de, te ni ĩn de tú sēhe de ní íyo. <sup>32</sup> Te jeē sándihí te suni ni jihí ñahan ún. <sup>33</sup> Núu súcuan te núu na nátecu de jíjnāhan de quivī nátecu ndīyi, ¿te ndé ĩn de cuu ña ñasihí de? Chí ndihúxá de ni condeca de ña. Achí de jíjnāhan de.

<sup>34</sup> Yūcuán na te ni cahān yā jíin de:

Ñayiví yáha chí cáquijnāhan tēe jíin ñahan. <sup>35</sup> Te ñayuu vāha jeē natecu i quivicoo i andiví, ma quijnāhan ga i yūcuán, chí tuá na jñūhun quijnāhan tēe

jiín ñahan coo. <sup>36</sup> Ni ma cúu cuiti gā i, chi coo i nájñuhun ndajéhé Yaā Dios. Te sēhe Yaā Dios cuu i, chi je ni canatecu i. <sup>37</sup> Te suni máá Moisés cáhán de jeē nátecu ndíyi, chi ni tee de nuū tútu ndese ni cahān yā jiín de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jiín Isaac jiín Jacob. <sup>38</sup> Te jeē ni cáhán de súcuan cúu jeē ní cachi de jeē cátecu táca ndíyi. Chi vésú je ni cajihī i, te cátecu i nuū iyó máá yá, chi cúu ya Yaā sáha jeē técu ñayuu níí caní. Achí yá jiín de.

<sup>39</sup> Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

<sup>40</sup> Te tuá ni cáchundeyí ni de cajñuhún de ya.

*Siquí jeē cúu Cristo sēhe yucūn David*  
(Mt. 22.41-46; Mr. 12.35-37)

<sup>41</sup> Te ni cahān yā jiín de jijnáhan de:

¿Ndece cúu jeē cácahān ñayuu jeē Cristo cúu sēhe yucūn David? <sup>42</sup> Chi máá David suhva ni cahān de jñuhun ya nuū tútu Salmo:

Máá Jítoho yō Yaā Dios suhva ni cahān yā jiín Jítoho rī, Yaā quiiji:

Cucōo ró lado váha rī nuū cujéhnu ró,

<sup>43</sup> te na sáha rī jeē quende rō poder táca jéē cájito uhū rohó.

Achí Yaā Dios. Achí David. <sup>44</sup> Te núu sēhe yucūn David cúu Cristo, ¿te ndese cúu jeē ni cáhán de jeē Jítoho de cúu ya? áchí yá.

*Jeē ni cáhán yā jeē iyó cuéchi de jijnáhan de*  
(Mt. 23.1-36; Mr. 12.38-40; Lc. 11.37-54)

<sup>45</sup> Te ni cahān yā jiín tēe cáscuáha jiín yá, te suni ni cajini sóho ndihī ñayuu:

<sup>46</sup> Coto má cándíje ró táca tēe cástéén tutu ley. Chi cácusī ni de cáñuhun de sahna caní jeē steén jeē cujéhnu de, cájica cuu de jiín. Te cánujñahan ni de jeē cáhán yíñuhún ñayuu jiín de nuū yáhu. Te cánujñahan ni de cucōo de nuū silla yíñuhún gá ini vehe īi sinagoga, jiín silla yíñuhún gá nuū víco cáyeji ñayuu. <sup>47</sup> Te cáquende de vehe ñahan ní caquendōo ndáhú. Te nahán cájicān tahú de návāha caní ni ñayuu jeē tú na cuéchi de. Tēe yáha jijnáhan de chi xeēn gā ndoho de castigo. Achí yá.

*Jeē ni sócō ñahan viuda xūhún*  
(Mr. 12.41-44)

## 21

<sup>1</sup> Te ná ni iyo ya ini templo, te jito ya nuū ñayuu cucá jéē cáchuhun i cuehē xūhún ini táca yéjnū nuū casocō i. <sup>2</sup> Te suni ni jito ya nuū ññ ñahan viuda jeē ndóho ndáhú, te ni chuhun ña uū centavo lulí ini yejnū ún. <sup>3</sup> Te ni cahān yā:

Jendaá cahān rī jiín ró jeē cuehē gā cúu jeē ní sócō ñahan viuda ndahú yáha, vésú jeē ní casocō táca gá ñayuu. <sup>4</sup> Chi táca i ni casocō i jeē ni ndóo siquí xuhun cuehē i. Te ñahan yáha, vésú ndahú ndóho ña, te ni chuhun ndihī ña jeē cótecu ña. Achí yá jiín de.

*Jeē ní cachi yā jeē nāa templo*  
(Mt. 24.1-2; Mr. 13.1-2)

<sup>5</sup> Te sava de ní cacahān de jeē luu cáa templo cáhnu, chi ni cuvāha jiín táca yúu luu jiín táca jéē ní casocō ñayuu. Yūcuán na te ni cahān yā:

<sup>6</sup> Ndihi jeē cájito ró yáha, quee quiivī jeē ma cóso jñáhan ga ni ññ yuū, chi ndihī jñanū, achí yá.

*Na seña coo nuū cuácuyajni ndihi ñayiví  
(Mt. 24.3-28; Mr. 13.3-23)*

<sup>7</sup> Te ni cacajñuhún de ya:

Maestro, ¿ndé quiví coo tāca jéé ní cachi ní jéé coo? ¿Te na seña coo nuū cuácuyajni squícu tāca jéé ní cahān ní? áchí de.

<sup>8</sup> Te ni cahān yā:

Coto ró jéé ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suní cahān de: Je ní quee quiví ndihi ñayiví, achi de. Te ma cóndiquín rō de. <sup>9</sup> Te núu nihīn rō jñuhun jeē tāca lado iyó guerra te cándonda ñayuu squí tohō, te ma yūhu ró, chi cánuú jéé xíhna gā coo súcuan, te ni ma jinú yachí quiví ndihi ñayiví. Achí yá.

<sup>10</sup> Te ni cahān gā yā:

Ndonda nación squí inga nación, te ndonda ñuu squí inga ñuu jeē cuañáhan. <sup>11</sup> Te cháha chúcuan jñāa téyí, te coo jnamā jíin cuéhyí xeēn. Te coo seña jéhu ichi ándiví jéé yūhú ndasí ñayuu coto i.

<sup>12</sup> Te nde ná tu coo tācá jniñu yáha, te coto xeēn i róhó, te jñi i róhó. Te quindecia i sava ró tāca vehe ñi sinagoga jeē cahán i cuéchi squí rō. Te chune i sava ró vecāa. Te quindecia i sava ró núu tāca rey jíin núu tācá gobernador, te cahán i cuéchi squí rō jeē squí jeē cáandije ró rúhū. <sup>13</sup> Te jeē súcuan coo, te cuitē núu ga jñuhun rí, chi nacani ndaā rō nuū de jíjñáhan de. <sup>14</sup> Núu súcuan te cundaā ni rō jeē ma nácani ni rō xíhna gā ndese stíó cuiñí rō nuū de te cácu ró. <sup>15</sup> Chi ruhū cuāha rí jñuhun ndichí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i squí rō. <sup>16</sup> Te nde tatá rō, naná rō, ñani rō, jñáhan ró, jíin amigo rō, nastúu i róhó núu ñayuu xeēn. Te cahni i sava ró. <sup>17</sup> Te tāca ñayuu chí quití ni i nuū rō jeē squí ruhū. <sup>18</sup> Te ni ñiñi xíní rō jíjñáhan ró ma náā, chí coto ya rohó. <sup>19</sup> Te núu cuiñí nihin ró jíin jñuhun rí, te cotechu rō ñí cáni.

<sup>20</sup> Te núu ni cajito ró jéé ní cajicó ndúu soldado ñuu Jerusalén, te na jécūhun ni rō jeé jé yajni naa ñuu ún. <sup>21</sup> Yūcuán na te ñayuu cáyūcú región Judea, na cūnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún. <sup>22</sup> Chí tāca quiví un cuáha Yaā Dios castigo nuū ñayuu jeē squí cuéchi i, návāha squícu tāca jñuhun jeē yosó núu tútu. <sup>23</sup> Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihīn ña cunu yachí ña. Chi yōhoyo xeēn coo jñúndóho ini ñayiví, te quiji castigo xeēn squí ñayuu yáha. <sup>24</sup> Te sava i cuu nuū guerra, te sava i quingoo preso nde tācá inga nación. Te ñayuu tāca gā nación ndacu ñihin i jniñu nuū ñayuu ñuu Jerusalén, nde jíinu tiempo jeé jéhe Yaā Dios jñuhun ndacu i jniñu.

*Ndese coo quiví ndiji Yaā ní nduu tēe  
(Mt. 24.29-35, 42-44; Mr. 13.24-37)*

<sup>25</sup> Yūcuán na te coo seña nuū níandii jíin núu yoó jíin núu quími. Te ini ñayiví te quiji jñúndóho xeēn squí ñayuu tācá nación. Te cunéé ni i, te yūhú i jeē nihin xeēn mar te ndóna xeēn ndute mar vēji nuū ñúhun. <sup>26</sup> Te cuu sōó sava ñayuu jeé cáyūhú i cándetu i tāca jñúndóho quiji squí ñayiví. Te tāca jéé ñiñi ándiví chí quisi í. <sup>27</sup> Yūcuán na te coto ñayuu nuū maá rí, Yaā ní nduu tēe, ndiji rí jíin vícō, te condiso rí cuehē poder, te yōhoyo luu cujéhu rí. <sup>28</sup> Te núu ni quejéé tāca jniñu yáha, te ndeyí coo ni rō, te cocunuū rō ándiví, chí je yajni jnama ya rohó. Achí yá jíin de jíjñáhan de.

<sup>29</sup> Te suni ni cahān yā jnūhun yátá yáha:

Condēhe jijnáhan ró ndese sáha nundēhe higo jín táca gá yujnu. <sup>30</sup> Núu cájito ró jēe ní quejéé náne numa yújnu ún, te cájini rō jeē jé yajni coo tiempo jihní.

<sup>31</sup> Te suni súcuau núu ni cajito ró jēe ní quejéé cúu táca jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayiví.

<sup>32</sup> Jendaá cahán rī jín ró jeē ma cúu ndihi ñayuu tiempo un, chi nde squícu ndihi jniñu ún. <sup>33</sup> Andiví jín ñáyiví chi naa, te táca jnūhun cáhān rī chi ma náa, chi ndihi squícu.

<sup>34</sup> Te coto ma stívi ró maá ró jijnáhan ró jēe sáha ró táca cuéchi, jín jēe najini ró, jín jēe cunjneñu ró jín táca ndajnñu cotecu rō, návaha tú sanaa ni rō te quee quiví un síqui rō. <sup>35</sup> Chi nájnūhun jeē núu ñn trampa, súcuau quee jnúndóho síqui ñayuu cáyūcu ní cáhnu ñayiví. <sup>36</sup> Núu súcuau te ndito coo ni rō, te níni cácan tahú rō, návaha cuu cácu ró núu táca jnúndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

<sup>37</sup> Te ndiquiví steén yā jnūhun ini templo, te ndijnahan jecuáa jéndōo ya nde yucu jeē naní Olivos. <sup>38</sup> Te táca jénéhen quécoo ñayuu nuū yā ini templo jeē cúni sōho i jnūhun stéén yā.

*Jeē ní casquijnáhan de jnūhun jñ de Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

## 22

<sup>1</sup> Yūcuán na te ni cuyajni vico pascua jeē cáyeji ñayuu hebreo pan jeē tú na levadura yñi. <sup>2</sup> Te sutū cácujeñnu jín tēe cástéén tutu ley, ni canducú yuhu de modo cahni de Jesús, chi cáyūhú de jeē quití ni ñayuu.

<sup>3</sup> Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol. <sup>4</sup> Te ni jehēn de ni candajnñhún de jín táca sūtū cácujeñnu jín tēe cándiso jniñu ini templo, núu ndese nastúu de ya nuū tēe un jijnáhan. <sup>5</sup> Te tēe un ní cacusiñi de, te ni cajejnūhun de jeē cuáha de xūhun núu Judas. <sup>6</sup> Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

*Jeē ní jequin yā Cena yā*

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Te ni quee maá quiví vico jeē cáyeji ñayuu pan jeē tú na levadura yñi, te suni quiví un cájehni i londe nájnūhun ni ndacu Yaā Dios jniñu jeē sáha i vico pascua un. <sup>8</sup> Te Jesús ni tají yá Pedro jín Juan quingoo de, te áchí yá jín de:

Cuángoo te sátūhva ró jeē cuxíni yó vico pascua, achí yá.

<sup>9</sup> Te ni cacajnñhún de ya:

¿Ndé nuū cuní ni jēe quisátūhva ná? áchí de.

<sup>10</sup> Te ni cahān yā jín de:

Cuángoo ñuu yūcuán, te núu ni quivícoo ró te najnáhan ró jín ñn tēe ndiso quiyi ndute. Te condiquín rō de quihñ rō jín de nde vehe nuū ndiví de.

<sup>11</sup> Te cahān rō jín tēe chíí vehe ún: Achí máa Maestro: ¿Ndé ñn cúu cuarto vehe ní cuáha núu ní núu cuxíni ya vico pascua jín tēe cáscuáha jín yá, achí rō. <sup>12</sup> Yūcuán na te stéén de ñn cuarto cáhnu nde xiní véhe jeē je iyó túhva, te yūcuau sátūhva ró jēe cuxíni yó, áchí yá.

<sup>13</sup> Te cuangoo de, te ni canihñ de nájnūhun ni cahān yā. Te ni casátūhva de jeē cuxíni ya vico pascua.



14 Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tée cácuu apóstol. 15 Te ni cahān yā jíin de:

Yōhō ni cuu ni rī cuxíni ri jíin ró jíjnāhan ró vico pascua yáha, vijna nde ná tu cuu rī. 16 Chi cáhān rī jíin ró jeē ma caji cuiti gā rī vico pascua, chi nde quiji quivī ndacu Yaā Dios jniñu nñ ñayiví, te sáa te caji tucu rī, achí yá.

17 Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnāhan ró. 18 Chi cáhān rī jíin ró jeē ndé vijna te ma cóho ga rī ndūxi uva, chi nde quiji quivī ndacu Yaā Dios jniñu nñ ñayiví, te sáa te coho tucu rī. Achí yá.

19 Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū de jíjnāhan de. Te ni cahān yā:

Yāha cúu yiqui cúnu rī jeē socō rī jeē chunaa rī cuéchi ró jíjnāhan ró. Te níni caji rō súcuan jeē cáñuhun ni rō ruhū jeē ni jíhi rī jehē rō. Achí yá.

20 Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuéchi ró jíjnāhan ró.

21 Te vijna chi tée nastúu ruhū, néne de jíin rī nuū mesa yáha. 22 Chi ruhū, Yaā ní nduu tée, jendaá cúu jeē quihin rī cuu rī nájnūhun je ni sándaā Yaā Dios jeē súcuan coo. Te nacá xeñ ndóho tée jeē nastúu ruhū, achí yá.

23 Yūcuán na te ni caquejeé de cácajnūhun jnāhan de ndé ñn de cúu jeē nastúu de ya.

### *Jeē ní cacahān de siquī ndé ñn de cújéhu ga*

24 Yūcuán na te yōhō ni cacahān de siquī ndé ñn de cújéhu ga nuū jnāhan de. 25 Te ni cahān Jesús jíin de:

Rey tācá nación chi cándacu niñin de jniñu nuū ñayuu cajnī de, te cácahān i jeē tée cásáha vāha cúu jeē cácujeñhu nuū i. 26 Te róhó jíjnāhan ró, ma cóo ró súcuan. Chi núu ndé ñn ró cújéhu ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró maá ró tée jéjníñu nuū jnāhan. 27 ¿Te ndé ñn cúu jeē cújéhu ga, á tée yéji nuū mesa, chí tée jéni cohō? ¿A násūu tée jeē yéji nuū mesa cúu jeē cújéhu ga? Te ruhū nasūu súcuan cúu rī, chí ni nasáha rī maá rī nájnūhun tée jéjníñu nuū rō, chí vēji ri sáha ri jeē nihín tahú rō.

28 Te maá ró cácuu tée jeē níni cáhiin jíin rī tāca quivī jeē ndóho rī jñundóho.

29 Núu súcuan te nájnūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jíjnāhan ró. 30 Te caji rō coho ró jíin rī ini ñuu nuū ndacu rī jniñu. Te cucōo ró ñn ñn mesa jeē sándaā rō jniñu ndihúxi uū yucūn Israel. Achí yá.

### *Jeē ní cachi yā jeē yūhu Pedro cahān de jeē jini de ya* (Mt. 26.31-35; Mr. 14.27-31; Jn. 13.36-38)

31 Te suni ni cahān maá Jítoho yō jíin Simón Pedro:

Simón, cuni sōho ró, chí ni jicān Satanás rohó jíjnāhan ró jéē coto ndee rohó nájnūhun jeē síjin trigo, te stúu ndé ñn ró cácuu nájnūhun paja jeē nayūhu ró, te ndé ñn ró cácuu nájnūhun trigo jeē candíje niñin ró. 32 Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnāhan ró jíin jñūhun rī. Achí yá.

33 Te ni cahān de jíin yá:

Je íyó túhva ná quihin na jíin ní vecāa te vēsú na cuu na jíin ní, achí de.

34 Te ni cahān yā:



Pedro, cáhán rī jín ró jeē nde ná tu cana líhli vijna, te yūhu ró jeē jnñ ñayuu rohó, te unī jínu cahān rō jeē tu jíní rō ruhū, achí yá.

*Jeē ní cuyajni coto ya jñúndóho*

<sup>35</sup> Yūcuán na te ni cajñūhun yá de jínáhan de:

Ná ni tají rí rohó ní jengoo ró jéé tu ní cóndiso ró ñunu ni yijni xūhún ni ndijēn, ¿te á ní iyo ñn jeē ní cumanī nuū rō? Achí yá.

Te ni cacahān de:

Tú ni ñn ní cúmanī.

<sup>36</sup> Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuāan de. <sup>37</sup> Chi cáhán rī jín ró jeē quee quivī ndoho yó jñúndóho, chi cánuú squícu jñūhun yáha jéé cahān nuū tútu siquī rī: Sáha ñayuu jín yá nájnūhun cásáha i jín tée sáha cuēchi xeēn, achí tutu. Chi tāca jñūhun un jéé yosó cáhán siquī rī, chi squícu nahín, achí yá.

<sup>38</sup> Yūcuán na te ni cacahān de:

Yāha íyó úū espada, achí de.

Te ni cahān yā jín de:

Jín jéé yāha-ni, achí yá.

*Jeē ni jicān tahú yā nuū huerto Getsemani*

(Mt. 26.36-46; Mr. 14.32-42)

<sup>39</sup> Te ni quenda ya cuahān yā yucu Olivos nájnūhun sáha sáha ya. Te tēe cáscuáha jín yá ni candiqūn de ya cuangoo de jín yá. <sup>40</sup> Te nuū ni jínū yā yūcuán, te ni cahān yā jín de:

Cacān tahú rō jijnáhan ró jéé chindéé ñáhán yá rohó jéé ma sáha ró cuéchi núu coto ndee jeneé rōhó, achí yá.

<sup>41</sup> Te ni jica ya jecu, cūhva jeē jicá jínú yuū jeē squíin. Te ni jecuiñi yití yá, te suhva ni jicān tahú yā:

<sup>42</sup> Tátā, núu cúní ni te tejiyo ní jñúndóho yáha jéé ma quíji siquī ná. Te nasūu jéé cuní maá ná, chi jeé cuní maá ní na cóo, achí yá.

<sup>43</sup> Te ni cane ñn ndajéhé andiví núu yā, te ni jēhe fuerza nuū yā. <sup>44</sup> Te cúcuíhyá ndasí ni yā jeē quíji jñúndóho siquī yā, te ni nducú ndéyí gá yā ni jicān tahú yā. Te ni cane jnañū yā, te tóo nuū ñūhun nájnūhun yúyú náhnu niñi.

<sup>45</sup> Te ná ni ndocuiñi yā jeē ni jicān tahú yā, te ni ndee yā nuū tēe cáscuáha jín yá. Te ni jito ya jeé cáquixí de, chi tuá cáhiyo ndeyí ni de cacān tahú de jeé cácuíhyá ndasí ni de. <sup>46</sup> Te ni cahān yā jín de:

¿Naun cáquixí rō? Ndonda te cacān tahú rō jeē chindéé ñáhán yá rohó jéé ma sáha ró cuéchi jeé cóto ndee jeneé rōhó. Achí yá.

*Jeē ní cajññ de Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Te sá cáhán gā yā súcuan, te ni quecoo cuehē ñayuu. Te tēe nání Judas, ñn jñáhan jeē uxí uū tēe scuáha jín yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. <sup>48</sup> Te ni cahān Jesús jín de:

Judas, ¿á jín jéé téchūhu ró ruhū cúu jeē nastúu ró rúhū, Yaā ní nduu tēe? Achí yá.

<sup>49</sup> Te tēe cáhñn jín yá, ni cajito de jeē ní quejéé cúu, te ni cacajñūhún de ya:

¿A ndonda ná jíjnáhan ná síquī de jíin espada? áchí de.

<sup>50</sup> Te ñin de ni stují de mozo sutū cujéhnū ga, chí ni jehnde de sōho lado váha.

<sup>51</sup> Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasāvaha ya de. <sup>52</sup> Te ni cahān yā jíin sūtū cácujehnū jíin tēe cándiso jniñū ini templo jíin táca tēe jéhnū jeē ní quecoo de jeē jniñ de ya:

¿Te va tēe cuihná cúu ri jeē véjicoo ró jíin espada jíin yujnu jeē jniñ ró rúhū jeē súcuan? <sup>53</sup> Táca quívī ni ine ri jíin ró jíjnáhan ró ini templo cáhnū, te tu ní cájniñ ró rúhū. Te vijna te ni quee hora jeē jniñ ró rúhū jíin jéē sáha ró táca jniñū jeē ndácu jeneé jéē ndeé núū nēē. Achí yá.

*Jeē ní cachi Pedro jeē tu jíin de ya*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Te ni cajniñ de ya cuangoo de jíin yá vehe sutū cujéhnū ga. Te Pedro chí jíicá-ni ndíquin de ya. <sup>55</sup> Te táca policia ni cascáyū de ñuhūn ini patio, te ni condúu de yuñúhún un cáyucú de. Te suni ni cucōo Pedro jíin de. <sup>56</sup> Te ñin ñahan jéjñiñū ini vehe un, ní jito ña nuū de jeē néne de yuñúhún. Te ní jito váha ña nuū de, te ni cahān ña:

Tēe yáha suni ní jica de jíin tēe ún, áchí ña.

<sup>57</sup> Te máá de tu ní cáchi de, chí ni cahān de:

Tu jíin rī tēe ún, áchí de.

<sup>58</sup> Te ní cunúu jecu gā, te ní jito tucu inga ñayuu nuū Pedro, te ní cahān:

Róhó, suni jnáhan táca tēe un cúu ró, áchí.

Te ní cahān Pedro:

Nasūu cúu ri, hombre, achí de.

<sup>59</sup> Te ní cuu nájnūhun ñin hora gā, te ní cahān ñihin inga de:

Jendaá ndije jeē tēe yáha ní jica de jíin tēe ún, chí suni tēe región Galilea cúu de, áchí de.

<sup>60</sup> Te ní cahān Pedro:

Hombre, tu jíin rī na jnūhun cáhán rō.

Te sá súcuan cáhán gā de, te ní cana-ní líhli. <sup>61</sup> Yūcuán na te ní ndió cóto máá Jítoho yō, te ní jito ya nuū Pedro. Te ní nucūhun ni de jnūhun ni cahān yā jíin de: Nde ná tu cana líhli, te yūhu ró te cahān rō unī jínu jeē tu jíin rō ruhū. <sup>62</sup> Te ní quenda de cuahān de, te yōho ni ndahyū de jeē ní cachi de jeē tu jíin de ya.

*Jeē ní casácatā de nuū yā*

(Mt. 26.67-68; Mr. 14.65)

<sup>63</sup> Te táca tēe cándito Jesús, ní casácatā de nuū yā, te ní cacani de ya. <sup>64</sup> Te ní cajesī de sahma nuū yā, te ní cacani de nuū yā, te ní cacahān de:

Cachi ndé ñin cúu jeē ní cani róhó, áchí de.

<sup>65</sup> Te cuehē gā jnūhun súcuan ní cacahān neé de jíin yá.

*Jeē ní indichi Jesús nuū junta tēe cácujehnū ga*

(Mt. 26.59-66; Mr. 14.55-64; Jn. 18.19-24)

<sup>66</sup> Te jeē ní cundijin, te ní candutútú táca tēe jéhnū cándacu jniñū nuū ñayuu hebreo, jíin sūtū cácujehnū, jíin tēe cástéén tutu ley Yaā Dios. Te cuangoo de jíin yá nuū junta tēe cácujehnū ga, te yūcuan ní cacajnūhún de ya:

<sup>67</sup> Cachi, ¿á máá ró cúu Cristo jeē ní tají Yaā Dios? Achí de.

Te ní cahān yā jíin de:

Vēsú na cáhán rī jeē suu ri cúu, te ni ma candíje cuiti rō. <sup>68</sup> Te suni núu cajñūhun máá rí rohó jíjnáhan ró, te suni ma stió cuíñi rō nuū rī, ni ma siaá rō ruhū. <sup>69</sup> Te ruhū, Yaā ní nduu tēe, tāca quívi jeē quíji conene ri lado váha máá Yaā iyó poder, achí yá.

<sup>70</sup> Yūcuán na te ndihi de ni cacajñūhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájñūhun cácahān rō, achí yá.

<sup>71</sup> Yūcuán na te ni cacahān de:

¿Na testigo gā jíni ñūhún yó núu súcuan? Chi ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíjnáhan de.

*Jeē ní indichi Jesús nuū Pilato*

(Mt. 27.1-2, 11-14; Mr. 15.1-5; Jn. 18.28-38)

## 23

<sup>1</sup> Yūcuán na te ni candocuíñi ndihi de, te cuango de jíin yá nuū Pilato. <sup>2</sup> Te yūcuan ní caquejé de cácahān de cuēchi siquī yā:

Ni canihīn na tēe yáha jēe stóna de ñayuu siquī tohō. Te cáhán de jeē tú váha jeē cuāha ná xūhun renta nuū rey nación Roma jeē ndácu jñiñu nuū nación na. Te suni cáhán de jeē maá de cúu Cristo, Rey jeē ní tají Yaā Dios. Achí de jíjnáhan de.

<sup>3</sup> Yūcuán na te Pilato ni cajñūhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájñūhun cáhán rō, achí yá.

<sup>4</sup> Te ni cahān Pilato jíin sūtū cácujeñu jíin ñayuu cuehē ún:

Tú ni ñin jñūhun stívi cáhán tēe yáha jēe nihín rī cuēchi siquī de, achí de.

<sup>5</sup> Te máá de víhyá gā ni cacahān de:

Tēe yáha stóna ndasí de ñayuu siquī tohō jíin jñūhun stéén de ní Judea. Chi ni quejé de stéén de nde Galilea, te vijna te nde yáha, achí de.

*Jeē ní indichi Jesús nuū Herodes*

<sup>6</sup> Te nuū ní jini sōho Pilato jeē Galilea cácahān, te ni cajñūhún de ñayuu núu tēe región Galilea cúu ya. <sup>7</sup> Te nuū ní cacahān ñayuu jeē cúu ya tēe Galilea, te ni ndacu de jñiñu jeē na quígoo de jíin yá nuū Herodes, tēe cúu gobernador Galilea. Chi quívi ún suni íne Herodes ñuu Jerusalén. <sup>8</sup> Te nuū ní jito de nuū Jesús, te yōho ni cusí ni de, chi je ni cuu cuehē tiempo jeē cuní de coto de nuū yá. Chi ni nihín de jñūhun ya, te ñūhun ni de jeē sáha ya ñin jñiñu jéñu coto de. <sup>9</sup> Te ni cajñūhún de ya cuehē jñūhun, te tu ní stió cuíñi yā ni ñin jñūhun nuū de. <sup>10</sup> Te suni cáhiin tāca sūtū cácujeñu jíin tēe cástéén tutu ley, te nihín ni cacahān de cuēchi siquī yá. <sup>11</sup> Yūcuán na te Herodes jíin tāca soldado de ni cacahān neé de jíin yá, te ni casacatá de nuū yá, chi ni cachuhun de ya sahma váha luu jeē cúu sahma rey. Te Herodes ni ndacu de jñiñu jeē na quíndeca de ya nuū Pilato. <sup>12</sup> Te máá quívi un ní candumaní jñáhan Pilato jíin Herodes, chi ichi yátá ni caquití jñáhan ni de.

*Jeē ní cundaā jeē cúu yā*

(Mt. 27.15-26; Mr. 15.6-15; Jn. 18.39-19.16)

<sup>13</sup> Yūcuán na te ni cana Pilato tāca sūtū cácujeñu jíin tāca tēe cándiso jñiñu jíin tāca gá ñayuu, ni candutútú. <sup>14</sup> Te ni cahān de:

Ni caquindeca ró tée yáha núu rī, jeē cácahān rō jeē stónnda de ñayuu siquī tohō. Te je ni stichī rī de, ni cajito jínúu rō. Te tu ní níhín rī ni ñin cuēchi siquī de nájñuhun jeē cácahān rō. <sup>15</sup> Te ni Herodes, tu ní níhín de, chí ni natajī tucu de tée yáha núu rī. Te tú cuiti ni ñin cuēchi ní sáha de jeē cúu de. <sup>16</sup> Núu súcuan te na cuáha ri castigo de, te siáá rī de quihñ de, áchí Pilato.

<sup>17</sup> Te iyó costumbre jeē táca vico pascua siaá Pilato ñin preso jeē cuní ñayuu.

<sup>18</sup> Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

<sup>19</sup> Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyi. <sup>20</sup> Te Pilato cuní de siáá de Jesús, te ni cahān tucu de jíñ ñayuu. <sup>21</sup> Te máá í víhyá gā ni cacana jee i:

Cata caa ní de jicā cruz, na cúu de, áchí i.

<sup>22</sup> Te ni cahān tucu de jíñ i vuelta unī:

¿Na cuēchi ni sáha de núu súcuan? Tu ní níhín cuiti rī ni ñin cuēchi siquī de jeē cúu de. Núu súcuan te na cuáha ri castigo de, te siáá rī de quihñ de, áchí Pilato.

<sup>23</sup> Te víhyá gā ni cacana jee ñayuu un, ní cacahān ñihin i jeē na cúu yā jicā cruz. Te máá í jíñ táca sūtú cácujeñhu, ni cacana jee ndasí i. Te ni cacundeyí i ni cascáhān i Pilato jeē na cúu yā. <sup>24</sup> Yūcuán na te ni ndacu Pilato jniñu jeē na cóo nájñuhun cáconi i. <sup>25</sup> Te ni siaá de tēe jeē ní cajicān i, tēe jeē íne vecāa jeē ni stónnda de ñayuu siquī tohō te ni jehni de ndīyi. Te ni jēhe de jñuhun jeē na cúu Jesús nájñuhun cáconi i.

### *Jeē ní cacata caa de ya jicā cruz*

*(Mt. 27.32-44; Mr. 15.21-32; Jn. 19.17-27)*

<sup>26</sup> Te cuangoo táca soldado jíñ yá jeē cahni de ya jicā cruz. Te ni canihñ de ñin tēe ñuu Cirene, nání de Simón, vendiji de jeē ní jéhēn de rancho. Te ni catejniñu de tēe un jēé cóndiso de cruz yā quihñ de yatā yā.

<sup>27</sup> Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuuñhá ní ña jehē yā. <sup>28</sup> Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chí sa suhva ndahyú rō jehē máá ró jíñ jéhē sēhe ró jijnáhan i. <sup>29</sup> Chí quee quivī jeē coo jññúndóho xeēn siquī rō, te cahān rō: Yōhyo ndetū táca ñahan númá, jíñ jēé tu ní scácu sēhe, jíñ jēé tu ní cóndeca yiquín, chí tú sēhe ña jeē jnahuhñ ni ña jeē ndóho i, achí rō jijnáhan ró. <sup>30</sup> Quivī ún te quejéé ñayuu cahān i jíñ táca yucu: Cotúú siquī rī jijnáhan ri návāha cuu rī. Te suni jíñ táca loma: Casi siquī rī jijnáhan ri, achí i. <sup>31</sup> Chí núu casáha xeēn i jíñ rúhú jeē tú na cuēchi ri, te nagā ni cuu jeē ma cóo xeēn siquī ndihí ñayuu chí iyó cuēchi i. Achí yá.

<sup>32</sup> Te suni cuangoo de jíñ úu tēe ni casáha cuēchi xeēn, jeē suni cuu de jíñ yá. <sup>33</sup> Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ní cacata caa de ndindúú tēe ni casáha cuēchi xeēn un núu uū gā cruz, ñin de lado váha ya, te inga de lado jecó yá. <sup>34</sup> Te níñí jēé súcuan cúu, te ni cahān Jesús:

Tátá, cone cáhnu ni ní núu de jijnáhan de, chí tu cájini de na vé casáha de, áchí yá.

Te soldado un ní casáha de sorteo jeē siquī ndese nihñ ñin ñin de sahma ya.

<sup>35</sup> Te cáhñin ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máa de vijna, te núu ndaā jeē Cristo jeē ní nacāji Yaā Dios cúu de, áchí.

<sup>36</sup> Te táca soldado suni ni casácatā de nuū yā, chi ni quecoo de nde nuū yā, te ni cajēhe de vinagre iyá coho ya. <sup>37</sup> Te cácahān de jíin yá:

Núu máa ró cúu Rey ñayuu hebreo, te na jnáma ró máa ró, achí de.

<sup>38</sup> Te suni ni ĩyo jnūhun jeē ndeē xinī cruz yā jeē cahán na siquī ni jíihī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup> Te ĩin jeē ndindúú téē ni casáha cuēchi xeēn, jeē cándita caa, ni cahān neē de nuū yā:

Núu máa ró cúu Cristo, te na jnáma ró máa ró te suni jnama ró ndindúú rí, achí de.

<sup>40</sup> Te inga de ni cahān de nuū jnáhan de:

¿A tu yúhú ró Yaā Dios naún? Chi ĩnuú cándoho yó jíin Yaā yáha. <sup>41</sup> Te máa yó chi vetū-ni cándoho yó, chi yāha cánihīn yō castigo siquī jniñu neé ní casáha yó. Te Yaā yáha chí tú ni ĩin cuēchi ní sáha ya, achí de.

<sup>42</sup> Te ni cahān de jíin yá:

Jesús, nucūhun ni ní sáña jéē quéjéé ní ndacu ní jniñu, áchí de.

<sup>43</sup> Yūcuán na te ni cahān Jesús jíin de:

Jendaá cahán rī jíin ró jeē vijna te condee rō jíin rí nuū jardín andiví, áchí yá.

### *Jeē ni jíihī Jesús*

*(Mt. 27.45-56; Mr. 15.33-41; Jn. 19.28-30)*

<sup>44</sup> Te nuū ní cuu nájnūhun cahuxī uū, te ni cunee ní cáhnu nde cahunī. <sup>45</sup> Te ni cunjnúú níandii. Te sahna ndíta caa jeē ndihyú cuarto ĩi ĩni templo cáhnu, ni ndatā-ni sava sava. <sup>46</sup> Yūcuán na te ni cana jee Jesús:

Tátā, naquihīn ní ánuá na, áchí yá.

Te súcuan ni cahān yā, te ni jíihī-ni ya.

<sup>47</sup> Te téē nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnū Yaā Dios, te áchí de:

Jendaá ndije jeē téē tú na cuēchi cúu téē yáha, áchí de.

<sup>48</sup> Te ndivī ñayuu cáhīn yūcuan ní cajito i táca jéé ní cuu, te cácani i yīqui jíicā i jeē cájnahuhū ní i, te ní nandió cóo i cuanungoo i. <sup>49</sup> Te táca ñayuu cájini jnáhan jíin yá, jíin táca ñahan Galilea jeē ní cajica ña jíin yá, cáhīn jíicā ña cájito ña táca jéé ní cuu.

### *Jeē ní quindūji Jesús*

*(Mt. 27.57-61; Mr. 15.42-47; Jn. 19.38-42)*

<sup>50</sup> Te ni ĩyo ĩin téē vāha téē ndaā, nání de José. Te téē ñuu Arimatea ndañúú Judea cúu de. Te cúu de jnáhan táca téē hebreo cácujeñu ga jeē casáha junta.

<sup>51</sup> Te ñūhun ni de jeē quiji quivī jeē ndacu Yaā Dios jniñu, te suni tu ní nújnahan ni de jeē ní casándaā junta un jéē cúu Jesús. <sup>52</sup> Te téē un ní jehēn de nuū Pilato, ni jíicān de yīqui cúñu Jesús. <sup>53</sup> Te ni snúu de ya jíicā cruz, te ni chusúcún de ya ĩin sahma cuitá. Te ni chindūji de ya ĩni ĩin yaū jeē ní caan jíicā ĩin cava, nuū ná tu quindūji ndiyi. <sup>54</sup> Te quivī un cúu quivī casátūhva ñayuu, chí jehīni un quéjéé quivī ndétátú.

<sup>55</sup> Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. <sup>56</sup> Te cuanungoo ña vehe ña,

te ni casátŭhva ña tãcã perfume jíin aceite yucŭ jeén asĭn. Te ni candetãtŭ ña quivĭ ndetãtŭ, nãjnŭhun ndãcu ley Yaã Dios jniñu.

*Jeë ní natecu Jesús  
(Mt. 28.1-10; Mr. 16.1-8; Jn. 20.1-10)*

## 24

<sup>1</sup> Te jenéhen ndasí quivĭ domingo, te ni jinŭcoo tucu ñahan un nuŭ ní yindŭji Jesús, te cándahã ña tãcã perfume jíin aceite ni casátŭhva ña. Te suni cuangoo sava ga ñahan jíin ña. <sup>2</sup> Te nuŭ ni jínŭcoo ña, te ni cajito ña jeë ní cujiyo yuŭ ndihyú yuyáú ndiŷi. <sup>3</sup> Te ni quĭvicoo ña yaŭ ún, te tuá yiqui cúñu Jitoho yō Jesús ni cájito ña. <sup>4</sup> Te ni cacunéé ni ña cájito ña jeë tuá ndiŷi. Sáa te ni cajito ña uŭ ndajéhé Yaã Dios jeë cáa nãjnŭhun tēe, cáhĭn ya xiin ña, te cáñuhun ya sahma ndíndēé. <sup>5</sup> Te yōhŷo ni cayŭhŭ ña, te ni cajexin ña nuŭ ña nde nuŭ ñahun. Te ni cacahã ndajéhé un jíin ña:

¿Naun sa nuŭ cáyindŭji ndiŷi cánanducú ró Yaã técu? <sup>6</sup> Tuá yã yãhá, chi je ni natecu yã. Te nucŭhun ni ró ndese ni cahãn yã jíin ró ná ĩne ga yã región Galilea. <sup>7</sup> Chi ni cachi ya jeë maá yá, Yaã ní nduu tēe, cánuú natŭu ya nuŭ tãca tēe cáhĭyo cuēchi, jeë jniŷ de ya cahni de ya jicã cruz, te nuŭ unĭ quivĭ te natecu yã. Achí ndajéhé un.

<sup>8</sup> Yŭcuán na te ni canucŭhun ni ña tãca jnŭhun ni cahãn Jesús. <sup>9</sup> Te ni quendacoo ña nuŭ ní yindŭji ya, te cuanungoo ña. Te ni canacani ña tãca jnŭhun yãha nuŭ ndihúxĭ ĩn apóstol jíin nuŭ tãca gá de. <sup>10</sup> Te ñahan ní canacani jnŭhun yãha nuŭ tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. <sup>11</sup> Te tãcã apóstol chi cájeni ni de jeë jnŭhun cánéé cáñúú cácahã ña, te tu ní cácanđje de.

<sup>12</sup> Te vēsú súcuan, te Pedro ni quenda de, te jínu de cuacondéhé de nuŭ ní yindŭji ya. Te ni jito nihni de ini yaŭ, te ni jito de jeë sahma cuitá un cáyŭcu máa na. Te cuanuhun de vehe de, te nahãn náa ni de jeë ní jito de jeë tuá yã.

*Jeë ní ndajnuhun ya jíin úu de ichi cuáhãn Emaús  
(Mr. 16.12-13)*

<sup>13</sup> Te suu quivĭ un cuángoo uŭ jnãhan de ĩn ñuu nanĭ Emaús, jeë jicã nãjnŭhun uxĭ ĩn kilómetro jíin ñuu Jerusalén. <sup>14</sup> Te cándajnuhún de siquĭ tãcã jniñu jeë ní cuu ún. <sup>15</sup> Te níni cándajnuhún de te cácajnŭhun jnãhan de, te máa Jesús ni cuyajni ya yatã de, te jica ya cuahãn yã jíin de. <sup>16</sup> Te ní sãha jíin de jeë tu ní cánacuni de ya, vēsú cájito de nuŭ yã. <sup>17</sup> Te ni cajnuhun yã de:

¿Na jnŭhun cándajnuhun ró cájica ró? ¿Te najehē cácuuĭhyã ni ró? Achí yá.

<sup>18</sup> Te ĩn de jeë nanĭ Cleofas ní cahãn de jíin yã:

Ndihĭ cuiti ñayuu cájini ĩ tãcã jniñu ní cuu ini ñuu Jerusalén tãca quivĭ yãha. ¿Te á máñuhún-ni níhĭn cúu jeë ní quee ní ñuu un jéé tu jíni ní na vé ní cuu? Achí de.

<sup>19</sup> Te ni cajnuhun yã de:

¿Te na vé ní cuu? Achí yá.

Te ni cacahãn de jíin yã:

Jeë ní ndoho Jesús ñuu Nazaret, Yaã ní nacani jnŭhun Yaã Dios. Te jíin poder Yaã Dios ní sãha ya tãcã jniñu jéhnu te ni nacani ya jnŭhun, jito jíinúu Yaã Dios jíin tãca ñáyuu. <sup>20</sup> Te sutŭ cácujeñu jíin tēe cándiso jniñu nuŭ ná, ní canastúu de ya nuŭ tãca tēe Roma, te tēe un ní casãndaã de jeë cúu yã jicã cruz. <sup>21</sup> Te máa ná ní cañuhun ni na jéé maá yã jnama ya nación na Israel nuŭ ñáyuu Roma

nuú. Te siquī tācá jniñu yáha, te ni cane inga jnūhun. Chi vijna je iyó únī quivī jeē ní cuu ún. <sup>22</sup> Te sava ñahan cájini jnánhan ná jíin, ni canacani ña ñin jnūhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndiyi ún. <sup>23</sup> Te tuá ni cájito ña yiqui cúnu yā. Te ni ndecoo ña nuū na jíjnánhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup> Te ni jengoo sava jnánhan ná ndé yaū ndiyi ún, te ni cajito de jeē súcuan iyó, nájnūhun ni cacahān ñahan ún, te tu ní cájito cuiiti de nuū yā.

<sup>25</sup> Yūcuán na te ni cahān maá yá jíin de:

Tēe tu cájécūhun cuiiti ni cácuu ró. Yóhoyo uhū cácañdije ró táca jnūhun Cristo ni cacahān tēe ni canacani jnūhun Yaā Dios nde jenahán. <sup>26</sup> ¿Te á tu súcuan ní jíni ñúhún ndoho Cristo táca jnúndóho yáha, te sáa te quinuuhun yā nuū lúu cujēhu ya? Achí yá.

<sup>27</sup> Te ni nacani cáji yá táca jnūhun jeē yosó núu tútu ñi jeē cahán siquī maá yá. Te ni quejéé yá jíin jnūhun ni tee Moisés, te ni cahān gā yā táca jnūhun jeē ní catee tēe ni canacani jnūhun ya nde jenahán.

<sup>28</sup> Te nuū ni jíinūcoo de ñuu nuū cuángoo de ún, te Jesús ni sáha ya jeē cáca ga yā quihñ yā. <sup>29</sup> Te máa de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de. <sup>30</sup> Te nuū ní cucōo ya mesa jeē cáji yá jíin de jíjnánhan de, te ni quihñ ya staā, te ni jicān tahú yā, te ni tahú cuéchí yá, te ni jēhe ya nuū de. <sup>31</sup> Te jeē sáha ya súcuan, te nájnūhun ni cananuni tinúu de, te ni canacuni de ya. Te ni ndoñúhún-ni ya nuū de cuahān yā. <sup>32</sup> Te ni cacahān maá de:

Jendaá jeē yóhoyo ni cacusñ ni yō ná ni nacani ya jnūhun nuū yō ichi ún te ni castūhun cáji yá jnūhun cáhán tutu ñi. Achí de.

<sup>33</sup> Yūcuán na te yachí ni canaquihñ de ichi, ni canandicó de cuanungoo de ñuu Jerusalén. Te ni canajnánhan de jíin ndihúxi ñin ga apóstol, cáyūcu tútu de jíin sava ga jnánhan de. <sup>34</sup> Te ni cacahān tēe cáyūcu tútu un:

Jendaá ndije jeē ní natecu maá Jítóho yō, te ni nane ndijin yā nuū Simón, achí de jíjnánhan de.

<sup>35</sup> Yūcuán na te ndindúu tēe un ní canacani de jnūhun ndese ni najnánhan ya jíin de ichi, jíin ndese ni canacuni de ya ná ni tahú cuéchí yá staā.

*Jeē ní nane ya nuū tée cáscuáha jíin yá  
(Mt. 28.16-20; Mr. 16.14-18; Jn. 20.19-23)*

<sup>36</sup> Te sá cácahān gā de táca jnūhun yáha, te ni jecuññi-ni Jesús mēhñú de jíjnánhan de. Te ni cahān yā jíin de:

Ndeyí sñ coo ni rō jíjnánhan ró, áchí yá.

<sup>37</sup> Te ni candacoto iyo de, ni cayūhú ndasí de, chi ni cajeni ni de jeē ñin ánuá cúu ya. <sup>38</sup> Te ni cahān yā jíin de:

¿Naun cáyūhu ró, te naun cájini siquī ní rō súcuan? <sup>39</sup> Condēhé ndaha ri jíin jēhé rī, te cuni rō jeē maá rí cúu. Jñi ruhū te cuni rō, chi ñin ánuá tu névāha cúnu ni yiqui nájnūhun cájito ró jéé névāha máa rí, achí yá.

<sup>40</sup> Te jeē ní cáhān yā súcuan, te ni steén yā ndaha ya jēhé yā nuū ni yíhi ndūyu cāa. <sup>41</sup> Te yóhoyo ni cacusñ ni de, te cánaa ni de. Te vēsú súcuan te ná tu candije vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

<sup>42</sup> Yūcuán na te ni cajēhe de ñn pedazo chācá ní tau nuū yā, jiín ñn pedazo ñahmā ndūxi yocó. <sup>43</sup> Te ni quihin ya, te ni yeji yā nuū de jíjnáhan de. <sup>44</sup> Te ni cahān yā jiín de:

Tāca jée ní cuu jiín rí cúu jeē ni cáhān rī ná ni ine ri jiín ró jíjnáhan ró ndé saá, jeē cánuú squícu tāca jnūhun ri jeē yosó núu tútu ley Moisés, jiín núu tācá tutu tēe ni canacani jnūhun Yaā Dios, jiín núu tútu salmo, achí yá.

<sup>45</sup> Te ni nune ya jeē níjnūnī de, návaha cuu jecūhun ni de tāca jée cahán tutu ñ. <sup>46</sup> Te ni cahān yā:

Súcuán cáhān nuū tútu jeē ruhū Cristo, cánuú cuu rī, te nuū uní quivī natecu rī. <sup>47</sup> Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejée cuitē núu jnūhun yáha, te quihīn nuū ñáyuu tācá nación. <sup>48</sup> Te máá ró cácuu tēe nacani jnūhun tācá jniñu ní cajito ró. <sup>49</sup> Te tají rí Espíritu Santo quiji ya nuū rō jíjnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quiji nde andiví. Achí yá.

*Jeē ní ndaa ya cuanuhun yā andiví*  
(Mr. 16.19-20)

<sup>50</sup> Yūcuán na te ni quenda ya ñuu Jerusalén, cuahān yā nde ñuu Betania jiín de jíjnáhan de. Te ni ndonehen ya ndíndúu ndaha ya, te ni jicān tahú yā jehē de. <sup>51</sup> Te níni jicān tahú yā jehē de, te ni cujiyo-ni ya nuū de, ni ndaa ya cuanuhun yā andiví. <sup>52</sup> Te máá de ni cachiñúhún de ya. Te saá te cuanungoo de ñuu Jerusalén, te yōhyo cácusī ni de. <sup>53</sup> Te níni cáhīn de ini templo cáhnu, cánacuatáhu de nuū Yaā Dios. Te ni cuu. Amén.



## JNUHUN VAHA NI TEE SAN JUAN

### *Yaā naní Jnúhun Yaā Dios ni nduu ya tēe*

<sup>1</sup> Nde xihna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chí steén yá ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. <sup>2</sup> Máá yá ndeé yá nde jeē xihna ñúhún jíin Yaā Dios. <sup>3</sup> Te ni sáha Yaā Dios jeē jíin máá yá ni jecōo ndihi táca jeē iyó. Te ma jécōo ni ñin jeē iyó núu tu ní sáha máá yá. <sup>4</sup> Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécúhun ni i síquī Yaā Dios. <sup>5</sup> Te Yaā cúu luz ún ndíndēe núu ñayuu tu cájica ndaā, jeē nájnúhun cáhíyo i nuū néé. Te ñayuu cáhíyo nuū néé tu cúu ndahva i luz yā.

<sup>6</sup> Te ni iyo ñin tēe jeē ní taji Yaā Dios, naní de Juan. <sup>7</sup> Tēe un ní quiji de jeē nácani cájī de jnúhun máá Yaā cúu luz, návāha candíje táca ñayuu jeē jíin jnúhun cáhān de. <sup>8</sup> Nasūu máá Juan cúu luz ún, chí cúu de ñin jeē ní nacani cájī jnúhun máá luz un. <sup>9</sup> Te máá Yaā cúu luz ndije jeē steén ini anuá táca ñayuu, nde saá ní quiji ya ini ñayiví.

<sup>10</sup> Te Yaā cúu Jnúhun Yaā Dios ni condee yā ini ñayiví, te vésú jeē jíin máá yá ni sáha Yaā Dios ñayiví, te ñayuu ñayiví tu ní cáncuni i cuatáhú i jeē máá yá cúu.

<sup>11</sup> Ní quiji ya nuū ñayuu máá yá nación hebreo, te ñayuu ún tu ní cajetáhú i ya.

<sup>12</sup> Te vésú súcuan te sava ñayuu chí ni cajetáhú i ya, te ni cacandíje i jeē sáha ya jehé i. Te nuū máá i ni jēhe ya jnúhun jeē ndúu i sēhe Yaā Dios. <sup>13</sup> Te jeē ndúu i sēhe Yaā Dios, nasūu jíin modo jeē cácacu ñayuu ini ñayiví, ni nasūu síquī jeē cáncuni tēe, chí máá Yaā Dios sáha ya jeē ndúu i sēhe ya.

<sup>14</sup> Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhoyo luu cújéhnu ya, chí máñúhún-ni ya cúu Sēhe Tátá yā, Yaā cújéhnu súcuan. Te máni máá jéé sáha ya jeē váha yóhó, te máni máá jnúhun ndaā cahán yā. <sup>15</sup> Te Juan ni nacani de jnúhun ya, te ni cahán de:

Yaā yáha cúu jeē ní cahán rī náa áchí rí jeē Yaā quiji chí cújéhnu ga yā vésú ruhū, chí je iyó yá nde ná tu cacu rí, achí de.

<sup>16</sup> Te ndihi yó ní canihín yō cuehē ndasí jeē váha iyó núu yā, chí máni jeē váha sáha sáha ya jíin yó. <sup>17</sup> Moisés ni steén de ley Yaā Dios nuū ñayuu jenahán, te Jesucristo chí sáha ya jeé váha yóhó te steén yā táca jnúhun ndaā Yaā Dios nuū yó. <sup>18</sup> Tú ni ñin ñayuu ní jito cuiti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yó ndese Yaā cúu Yaā Dios.

### *Jnúhun Jesús jeē ní cahán Juan tēe scuándute*

*(Mt. 3.11-12; Mr. 1.7-8; Lc. 3.15-17)*

<sup>19</sup> Te ñayuu hebreo ñuu Jerusalén, ni catajī i jecu sutū jíin tēe grupo levita jeē cájeñíñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de. <sup>20</sup> Te Juan cájī ní cachi de:

Nasūu rúhū cúu Cristo, achí de.

<sup>21</sup> Te ní cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ní cahán Juan:

Nasūu de cúu rí.

Te ní cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quiji?

Tuú, áchí tucu Juan.

<sup>22</sup> Te ni cacahān tucu jíin de:

¿Te ndé iin cúu ró núu súcuan? Cachi nuū rī jijnáhan rī, chí jíni ñúhún castúhun rí nuū taca tée ni catajǎ rúhū vējicoo rī. Cachi na jniñu ndíso ró ví.

<sup>23</sup> Te ni cahān Juan:

Máa rí cúu tēe jeē ní cahān Isaías, tēe ni nacani jnūhun Yaā Dios nde jenahán, jeē quíji rí cana jee rí nde nuū ñúhun téhé. Te cáhán rí jíin ñáyuu jeē na sátúhva i máa i, chí quíji máa Jítóho yō. Achí Juan.

<sup>24</sup> Te tēe grupo fariseo cácuu jeē ní catajǎ tée ni quíjicoo ún. <sup>25</sup> Te ni cacajnūhún de Juan:

Núu súcuan ¿te naun scuándute ró te núu nasūu Cristo ni Elías ni máa tée quíji nacani jnūhun Yaā Dios cúu ró?

<sup>26</sup> Te ni cahān Juan:

Ruhū chí jíin ndute scuándute rī. Te mēhñu ró jijnáhan ró íne iin Yaā jeē tu cájini rō. <sup>27</sup> Te Yaā un cúu jeē ní cahān rī jeē quíji ya te cújéhnú ga yā vēsú ruhū. Chí tú na vé jéhnú cuítí cúu rí nuū yā, ni jeē cuajniñu rí nuū yā vēsú iin jniñu lúli gá nájñūhun jeē ndajǎ rí correa ndijēn yā. Achí de.

<sup>28</sup> Súcuan ni cuu jeē ní candajnūhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

### *Siquí jeē cúu ya Londe Yaā Dios*

<sup>29</sup> Te inga quiví un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jíjnáhan ró, chí yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayiví. <sup>30</sup> Yaā yāha cúu jeē ní cahān rī jeē quíji iin Yaā cujéhnú ndasí, chí je íyó yá nde ná tu cacu rí. <sup>31</sup> Te nde saá te tu ní jíni rī jeē yāha cúu Yaā ní tajǎ Yaā Dios. Te ni quíji rí jeē scuándute rí ñayuu ñuu yō Israel jíin ndute, návāha stéén rí nuū i jeē suu ya cúu, áchí Juan.

<sup>32</sup> Te suni ni cahān gā de jnūhun ya:

Ní jito rí Espírítu Santo, ni cuun ya ichi ándiví, cáa ya nájñūhun paloma, te ni quee ya xini Jesús. <sup>33</sup> Te nde saá te ná tu cuni rí jeē Jesús cúu. Te máa Yaā Dios jeē ní tajǎ yá ruhū jeē scuándute rí jíin ndute, ni cahān yā jíin rí: Núu ni jito ró jéé cúun Espírítu Santo te quendōo xiní iin tēe, yūcuan cúu Yaā jeē cuáha Espírítu Santo condee ini anuá ñayuu, achí Yaā Dios. <sup>34</sup> Te je ni jito rí ún, te nácani cájǎ rí jnūhun jeē máa yá cúu Sēhe Yaā Dios. Achí Juan.

### *Uū tēe jeē ní cana ya xīhna gā*

<sup>35</sup> Te inga quiví ún te Juan íne tucu de yūcuan jíin uū tēe cájica jíin de. <sup>36</sup> Te ni jito de nuū Jesús jeē jíca ya yūcuán. Te ni cahān de:

Condēhe jíjnáhan ró, chí yūcuan cúu Yaā cúu Londe jeē ní tajǎ Yaā Dios.

<sup>37</sup> Te ndíndúú tēe cájica jíin Juan ní cajini sóho de jnūhun yāha, te ni candiquín de Jesús. <sup>38</sup> Te ni ndió cóto Jesús, te ni jito ya jeē cándiquín de yata yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

<sup>39</sup> Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quiví ún, chí nájñūhun cacuñ jehíni cúu.

<sup>40</sup> Te Andrés, ñani Simón Pedro, cúu ñin jeē ndindúú tée un jéē ní cajini sōho jñuhun ni cahān Juan, te ni candiquīn Jesús. <sup>41</sup> Te Andrés, yachī ni jenanducú de ñani de Simón, te ni cahān de jíin:

Ni caquijnáhan ri jíin Mesías, achí de. Te jñuhun un cúní cahān Cristo, Yaā ní tají Yaā Dios.

<sup>42</sup> Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Maá ró cúu Simón sēhe Jonás. Te nde vijna te conaní ró Cefas, achí yá. Te jñuhun un cúní cahān Pedro, jeē cuní cahān yuū.

### *Jeē ní cana ya Felipe jíin Natanael*

<sup>43</sup> Te inga quivī un cúní Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquīn ruhū na quihīn yō.

<sup>44</sup> Te Felipe cúu tée ñuu Betsaida, jeē cúu ñuu Andrés jíin Pedro. <sup>45</sup> Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jñuhun ya nuū tútu ley jeē ní tee Moisés, jíin núu tútu ni catee tée ni canacani jñuhun Yaā Dios nde jenahán. Te Jesús sēhe José ñuu Nazaret cúu ya. Achí de.

<sup>46</sup> Te ni cahān Natanael jíin de:

¿Te ndese cúu kujéhnū ñin tée jeē ní cacu ñuu ndahú Nazaret?

Te ni cahān Felipe:

Quihīn yō de cuní rō, achí de.

<sup>47</sup> Te ni jito Jesús jeē véji Natanael, te ni cahān yā:

Yāha véji ñin tée ndaā jeē cúu ndije yucūn Israel, chí tu stáhú cuiti de, achí yá.

<sup>48</sup> Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

<sup>49</sup> Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

<sup>50</sup> Te ni cahān Jesús:

¿A máá jéē ni cahān rī jeē ní jito ri rohó ná íne ró jéhē nundéhe higo, te jeē yūcuan cándíje ró rúhū naún? Tuú chí coo jniñu jéhnū ga coto ró vésú jeē yāha, achí yá jíin de.

<sup>51</sup> Te ni cahān gā yā:

Jendaá cahān rī jíin ró jijnáhan ró jéē nde vijna te coto ró jéē núne andiví, te táca ndajéhé Yaā Dios cándaa cánuu nuū ruhū, Yaā ní nduu tée, achí yá.

### *Jeē ní jéhēn yā ñin vico nándāha ñuu Caná*

## 2

<sup>1</sup> Te ni yāha unī quivī, te ni Iyo ñin vico nándāha ñuu Caná ndañū Galilea. Te yūcuan íne náná Jesús. <sup>2</sup> Te suni ni cacana i Jesús jíin tée cáscuaha jíin yá, ni jéhēn yā vico un jíin de. <sup>3</sup> Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

<sup>4</sup> Te ni cahān Jesús jíin ña:

¿Naun cáhán ni súcuan jíin ná nánā? Chi ná tu quee quivī jeē sáha ná jniñu jéhu, áchí yá.

<sup>5</sup> Te náná yā chi ni cahān ña jíin ñáyuu cájeni cohō:

Sáha ró jíináhan ró táca jeē cahān yā jíin ró. Achí ña.

<sup>6</sup> Te yūcuan íyó íñu tenéjā yuū jeē ñūhun ndute cájichi ñayuu hebreo jeē ndúndoo i nuū Yaā Dios. Te ñn ñn tenéjā un cánda cuhun cuñn xico chí ciento litro ndute. <sup>7</sup> Te ni cahān Jesús jíin ñáyuu cájeni cohō:

Scútú ndī rō táca tenéjā yáha.

Te ni cascútú ndī i. <sup>8</sup> Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, áchí yá.

Te ni cajendeca i nuū de. <sup>9</sup> Te ni séyūhú de ndute jeē ní nduu vino, te tu jíin de ndé ní canihīn i. Chi máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha. <sup>10</sup> Te ni cahān de jíin:

Tāca ñáyuu chí xīhna gā vino váha cájehe i, te núu je ni cajihí váha ñayuu cáhīn vico, yūcuán na te jehe de vino ndahú na. Te máá ró tucu ni sáha ró, chí nde jeē sándīhí te jehe ró vino jeē yóhoyo váha ga jíhi, áchí de.

<sup>11</sup> Jniñu yáha jeē ni sáha Jesús ini ñuu Caná ndañūū Galilea cúu jniñu jéhu xīhna ñūhūn jeē ni sáha ya jeē steén yā poder yā. Te súcuan ni steén yā jeē yóhoyo cújéhu ya. Te tēe cáscuáha jíin yá ni cacandíje de ya.

<sup>12</sup> Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quivī.

### *Jeē ní quenehen ya ñayuu ini templo*

*(Mt. 21.12-13; Mr. 11.15-18; Lc. 19.45-46)*

<sup>13</sup> Te jeē cuácuayajni vico pascua casáha jnāhan ñuu yā hebreo, te cuahān yā ñuu Jerusalén. <sup>14</sup> Te ini templo cáhnu ni jito ya ñayuu cáxícó stiquī jíin lanchi jíin paloma, jíin ñáyuu castáyí xūhun, cáyūcú i nuū mesa i. <sup>15</sup> Te jeē súcuan ni jito ya, te ni sáha ya ñn cuarta ññ. Te ni scúnu ya táca i ini templo, nde jíin lanchi jíin stiquī i. Te ni jete yā xūhun ñáyuu castáyí. Te ni scotúú yá táca mesa i. <sup>16</sup> Te ni cahān yā jíin ñáyuu cáxícó paloma:

Tava táca quití yáha. Te ma sáha ró yáhu ini vehe Tátá rī. Achí yá.

<sup>17</sup> Yūcuán na te tēe cáscuáha jíin yá, ni canucūhun ni de jnūhun yósó núu tútu i: Je yajni cuu na jeē yóhoyo ndīhvī ni na síquī vehe ní, áchí yá jíin Tátá yā, achí tutu.

<sup>18</sup> Te tēe ñuu yā hebreo ni cacajñūhūn de ya:

¿Na jniñu jéhu sáha ró jeē steén rō poder rō, te cucáhnu ni rī jeē ndíso jniñu ró sáha ró súcuan? áchí de jíin yá.

<sup>19</sup> Te ni cahān yatá Jesús:

Canu rō templo yáha, te nuū uní quivī te nucondichi sáha ri, achí yá.

<sup>20</sup> Yūcuán na te ni cacahān tēe hebreo un:

Uū xico íñu cuiyā te ni jinu ni cuvāha templo yáha. Te róhó, ¿á núu uní-ni quivī te nucondichi sáha ró naún? Achí de.

<sup>21</sup> Te templo jeē cahán Jesús cúu máá yiquí cúñu yā, chí cahni ñayuu yā te natecu yā nuū uní quivī. <sup>22</sup> Jeē yūcuan cúu jeē ná ni natecu yā jeē ni jíhí yā, te tēe cáscuáha jíin yá ni canucūhun ni de jeē ni cahān yā jnūhun yáha. Te ni cacandíje de jnūhun jeē yosó núu tútu i, jíin jnūhun yáha jeē ni cahān Jesús.

*Jeē jini Jesús ndese cáa ini anuā ñayuu*

<sup>23</sup> Te ná íne Jesús ñuu Jerusalén máá vico pascua, te cuehē ñayuu ni cacandíje i jeē cúu ya Cristo, chí ni cajito i táca jniñu jéhu sáha ya jeē steén yā poder yā. <sup>24</sup> Te máá Jesús chí tu ní jétáhú yá i, chí je jíni yā ndese cáa ini anuá i jíjnáhan i. <sup>25</sup> Te tu jíni ñúhún yá jeē cáchi ní ñin ñayuu nuū yā ndese íyó táca ñáyuu, chí máá yá je jíni yā ndese cáa ini anuá i.

*Jeē ní candajñuhún Jesús jíni Nicodemo*

### 3

<sup>1</sup> Te ni Iyo ñin tēe grupo fariseo, nani de Nicodemo, te cújéhu de nuū ñáyuu ñuu de hebreo. <sup>2</sup> Tēe yáha ní quiji de nuū Jesús ñin jecuáá, te ni cahān de jíin yá:

Maestro, je cájini na jēe máá Yaā Dios ni tají yá nihín jēe steén ni jñuhun ya nuū na jíjnáhan ná. Chí núu tu íyó Yaā Dios jíin ní, te ma cúu sáha ní ni ñin jniñu jéhu nájnūhun sáha máá ní jeē steén ni poder ní, áchí de.

<sup>3</sup> Te ni cahān Jesús:

Jendaá cahān rí jíin ró jeē núu tu nacacu jeē ñin ñayuu, te ma cúu quívi i ndaha Yaā Dios jeē ndacu ya jniñu nuū i, áchí yá jíin de.

<sup>4</sup> Te ni cahān Nicodemo jíin yá:

¿Te ndese cuu nacacu ñin tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

<sup>5</sup> Te ni cahān Jesús:

Jendaá cahān rí jíin ró jeē núu tú nacacu ñin ñayuu, te ma cúu quívi i ndaha Yaā Dios jeē ndacu ya jniñu nuū i. Te jeē náacu i cúu jeē ndúndoo cuechi i nájnūhun jíin ndute, te condee Espíritu Santo ini anuá i. <sup>6</sup> Jeē cácu sáha ñayuu, chí sēhe ñayuu cúu. Te jeē cácu sáha Espíritu yā, chí sēhe ya cúu. <sup>7</sup> Ma náa ni rō cani ní rō ndese cúu jñuhun ni cahān rí jíin ró jeē cánuú jēe nacacu jeē ró jíjnáhan ró. <sup>8</sup> Te tachí chí quée cuahān ndé-ni cúu nuū cuní máá, te jíni sōho ró jēe cáyu, te tu jíni rō ndé nuū véji ni ndé nuū quihín. Te suni súcuan cúu táca ñáyuu jeē náacu sáha Espíritu, chí tu jíni rō ndese sáha ya jniñu ún, áchí yá.

<sup>9</sup> Te ni cahān tucu Nicodemo:

¿Ndese ga cúu núu súcuan?

<sup>10</sup> Te ni cahān Jesús:

Máá ró cúu ñin maestro jeē cújéhu nuū ñáyuu ñuu yō Israel, te ¿á tu jécūhun ni rō jñuhun yáha naún? <sup>11</sup> Jendaá cahān rí jíin ró jeē jñuhun cájécūhun ni rí cúu jeē cácahān rí jíin ró. Te cáncani cájí rí jñuhun jniñu ní cajito rí. Te tu cacandíje ró jñuhun cácahān rí. <sup>12</sup> Chí ni cahān rí jñuhun ndese sáha Yaā Dios ini ñayívi, te tu cacandíje ró. Núu súcuan ¿te ndese candíje ró núu cahān rí jñuhun táca ndese sáha ya nde andívi?

<sup>13</sup> Chí ni ñin tu ní cáa andívi jeē cúni ndese íyó yúcuan, chí máñúhún-ni ruhū, Yaā ní nduu tēe. Chí andívi ndéé rí, te ni cuun rí vēji rí. <sup>14</sup> Te nájnūhun ni cata caa Moisés ñin coō cāa nuū ñin yujnu, ná ni cajica ñayuu nuū ñuhun téhé, suni súcuan máá rí, Yaā ní nduu tēe, cánuú jēe cóndita caa rí jicā cruz. <sup>15</sup> Te súcuan cánuú návāha táca ñáyuu jeē candíje i jeē jnáma rí i, ma jnahnú ndetū i, chí sa suhva cotecu i ní cáni andívi.

*Yōhyo ní cundáhú ní yā ñayuu ñayívi*

<sup>16</sup> Chí Yaā Dios yōhyo ní cundáhú ní yā ñayuu ñayívi. Jeē yúcuan ní tají yá Sēhe ya ni quiji, vēsú mañúhún-ni ya iyó, návāha táca ñáyuu jeē candíje i jeē jnáma ya i, ma jnahnú ndetū, chí sa suhva cotecu i ní cáni andívi. <sup>17</sup> Chí tu

ní tǎjí Yaā Dios Sēhe ya ini ñayívi jéē snahnú ndetū yā ñayuu, chí sa suhva jeē jnáma ya ñayuu.

<sup>18</sup> Ñayuu jeē candíje i jeē jnáma ya i, ma jnahnú ndetū i. Te ñayuu tu cándíje, je ni jnahnú ndetū i, chí tu ní cándíje i máá Séhe Yaā Dios, te máá ñin-ni ya iyó.

<sup>19</sup> Máá Yaā jeē stíndéē ini anuá ñayuu, je ni quee ya ini ñayívi. Te cánujnahán gā ni ñayuu caca i nájnūhun nuū néé vēsú nuū luz yā, chí jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cáncandíje ún. <sup>20</sup> Chí tǎca ñayuu casáha jniñu néé, tu núnjahan cuítí ni i luz yā. Te tu jéhe i jnūhun jeē stíndéē yá ini anuá i, chí tu cúni i jeē natūu jniñu néé cásáha i. <sup>21</sup> Te ñayuu jeē cájica jíin jniñu ndaā, jéhe i jnūhun jeē stíndéē yá ini anuá i, návāha natūu ndijin jeē tǎca jniñu cásáha i cúu jniñu cúni Yaā Dios. Achí yá jíin de.

### *Jeē ni cáhān tucu Juan jnūhun Jesús*

<sup>22</sup> Yūcuán na te Jesús jíin téē cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. <sup>23</sup> Te suni scuándute Juan, íne de lugar jeē naní Enón yajni ñuu Salim, chí yūcuán íyó cuéhē ndute. Te ni quijicoo ñayuu nuū de, te ni scuándute de i. <sup>24</sup> Súcuan ni sáha Juan nde ná tu quívi de vecāa.

<sup>25</sup> Yūcuán na te sava téē cáscuáha jíin Juan yōhoyo ni cacahān de jíin sava jnáhan de hebreo siquí núu ndé ñin cúu modo vāha ga jeē cúchi ñayuu ndundoo i nuū Yaā Dios. <sup>26</sup> Te ni quecoo de nuū Juan, te ni cacahān de:

Maestro, téē ní ine jíin ní yūte Jordán ichi núu cáne niāndii, jeē ní nacani ní jnūhun de nuū ná, vijna te scuándute máá de, te ndivii ñayuu cuango i nuū de.

<sup>27</sup> Te ni cahān Juan:

Ni ñin téē ma cúu sáha de jniñu Yaā Dios te núu ma tejníñu ya de. <sup>28</sup> Máá ró jíin náhan ró chí ni cajini sōho ró jéē ni cáhān cají rí jeē násūu máá rí cúu Cristo, chí cúu rí ñin jeē ní tǎjí Yaā Dios jeē cósnuū nacani jnūhun jeē quíji ya. <sup>29</sup> Te núu cásáha vico quíjnáhan, te máá yíi cúu jeē ndéca ñasihí. Te amigo yíi un íne jíin de, te jíni sōho jnūhun cáhān de. Te yōhoyo cúsi ni jíni sōho jnūhun cáhān yíi ún. Te suni súcuan ruhū, chí cúu rí nájnūhun amigo yíi, chí ni quee máá Cristo, te yōhoyo cúsi ni rí jíni sōho rí jnūhun cáhān yā. <sup>30</sup> Te jíni ñúhún jéē ndujéhnu ga maá yá te ndululí gá máá rí, achí Juan.

### *Jeē ní quiji ya nde nuū sucún*

<sup>31</sup> Te Yaā jeē véji nde andívi, cújéhnu ya nuū ndíhi. Chí tǎca jéē ní cacu ini ñayívi yáha, sēhe ñayívi cúu, te máni jnūhun ñayívi cáhān. Te Yaā jeē véji ichi andívi, chí cújéhnu ya nuū ndíhi ñayuu. <sup>32</sup> Te nácan ya jnūhun jeē ní jito ya jíin jéē ní jíni sōho ya. Te ñayuu chí tu cáncandíje i jnūhun cáhān yā. <sup>33</sup> Te núu ñin ñayuu candíje i jnūhun cáhān yā, suu cúu jeē jejnúhún i jeē Yaā ndaā cúu Yaā Dios. <sup>34</sup> Chí Yaā ní tǎjí Yaā Dios véji, máni máá jnúhun Yaā Dios cáhān yā. Chí Yaā Dios tu yícuáha jéhe ya Espíritu yā nuū Yaā ní tǎjí yá. <sup>35</sup> Máá yá jeē cúu ya Tatá, yōhoyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū. <sup>36</sup> Ñayuu jeē candíje máá Séhe ya jeē jnáma ya i, cotecu i ní cáni andívi. Te ñayuu tu cúni candíje Séhe ya, ma cotecu i ní cáni andívi, chí sa suhva cuáha Yaā Dios castigo jeē ndoho i ní cáni.

### *Jeē ni cáhān Jesús jíin ñahan ñúu Samaria*

## 4

1 Te tēe grupo fariseo, ni canihin de jnūhun jeē iyó cuéhē gā tēe cáscuáha jíin Jesús vésú jíin Juan, jíin jéē cuéhē gā ñayuu scuándute ya vésú Juan. 2 Te nasūu jéē scuándute máá yá, chi tēe cáscuáha jíin yá cúu jeē cascuándute. 3 Te ná ni jini Jesús jeē súcuan ni canihin de jnūhun, te ni quenda ya región Judea, te cuanuhun yā región Galilea.

4 Te ichi jeē nuhūn yā chi yáha región Samaria. 5 Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. 6 Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájnūhun cahuxí uū cúu. 7 Te ni quee ñn ñahan Samaria, vēji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

8 Te tēe cáscuáha jíin yá, chi je cuangoo de nde ñuu, cuacuaan de jeē cáji de jíin yá. 9 Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñáyuu Samaria. 10 Te ni cahān Jesús:

Núu jeē jiní ni ndese cúni Yaā Dios sáha ya jeē váha níhín, jíin ndé ñn cúu sãña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ñí cáni sáha, áchí yá.

11 Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha? 12 ¿Te á cújēhnu ga maá ní vésú jíi yō Jacob, chí naún? Chi máá de ni stóo de pozo yáha nuū yō. Te yáha ní cajihí máá de ndute, jíin táca séhe de, jíin quiti ndéca de. Achí ña.

13 Te ni cahān Jesús:

Tāca ñáyuu jeē jihí ndute yáha, chi jichí tucu i. 14 Te ñayuu coho ndute jeē cuáha na núu i, chí ma jichí cuiti gā i. Chi ndute jeē cuáha ná un, cane ini i nájnūhun ndute jeē cáne ñuhún, te sáha jeē cotecu i ñí cáni, áchí yá jíin ña.

15 Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ñūhun quiquihin ná ndute pozo yáha, áchí ña.

16 Te ni cahān Jesús jíin ña:

Cuácana ní yí ní te quiji ní jíin de, áchí yá.

17 Te ni cahān ña:

Tú yí ná íyó.

Te ni cahān Jesús:

Ndaā cahán ni jéē tú yí ní íyó. 18 Chi je ni cuu uhūn yí ní, te tēe ndéca ní vijna chi nasūu yí ní cúu de. Yáha cúu jeē ni cáhān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ni ná. 20 Tāca jíi na ñáyuu Samaria, yucu yáha ní cachíñuhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuu chiñuhún yó yā, achí ña.

21 Te ni cahān Jesús jíin ña:

Nánā, candíje ní jnūhun cáhán na, chí quee quiñí jeē ni nasūu yucu yáha ni nasūu ñuu Jerusalén cúu nuū chiñuhún ní máá Yaā cúu Tátá, chí ndíhi-ni lugar te cuu chiñuhún ní yá. 22 Máá ní ñáyuu Samaria tu cájini ni ndé ñn cúu jeē cáchiñuhún ní. Te máá ná jijnáhan ná chí cájini na ndé ñn cúu jeē cáchiñuhún

ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. <sup>23</sup> Te je ni quee quivī jeē ñáyuu cáchiñúhún ndáá, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúní yā jeē súcuan chiñúhún ñáyuu yā. <sup>24</sup> Yaā Dios cúu Espiritu, te ñayuu jeē cuní i chiñúhún i ya, cánúú jéē chiñúhún ndije i ya jíin ini jíin ánuá i, áchí yá.

<sup>25</sup> Te ni cahān ñahan ún:

Jíní na jéē quíji Meslas jeē cúu Cristo, Yaā jeē tají Yaā Dios. Te núu ni quee maá yá, te stéén cají yá táca jnúhun nuū yō.

<sup>26</sup> Te ni cahān Jesús:

Máá ná jeē cahán jíin ní, suu ná cúu Yaā ún.

<sup>27</sup> Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña. <sup>28</sup> Yūcuán na te ñahan un ní stóo ña quíyī ña, te cuahān ña nde ñuu. Te ni cahān ña jíin ñáyuu ún:

<sup>29</sup> Nehen na quíngoo yó te coto ró ñin tēe jeē ní cachi ndihi táca jéē ní sáha ri. Sanaa te máá yá cúu Cristo, jeē cándetu yó quíji, áchí ña.

<sup>30</sup> Yūcuán na te ni quendacoo i ñuu ún, te cuangoo i nuū íne Jesús. <sup>31</sup> Te nde ná tu jinúcoo i, te tēe cáscuáha jíin yá ni cacahān ndahú de jíin yá:

Maestro, caji ní stáá víí, achí de.

<sup>32</sup> Te ni cahān yā jíin de:

Iyó stáá caji rī jeē tu cájini rō ndese cúu.

<sup>33</sup> Yūcuán na te tēe cáscuáha jíin yá, ni cacajnūhun jnáhan de:

¿A ní quindeca ñin ñayuu jeē ní yeji yā, chí naún? áchí de.

<sup>34</sup> Te ni cahān Jesús:

Jeē ní cachi rī jeē iyó jéē cáji rī cúu jeē cúsiī ni rī sáha ri jniñu cúní Yaā ní tají ruhū véji ri, jíin jéē sínu ri jniñu ún. <sup>35</sup> Te cacahān rō jeē cúmaní cuñn gā yoō te tahndé trigo. Te ruhū chí cáhán rī jíin ró: Condēhe jijnáhan ró, chí ñayuu cuehē cácuu i nájñūhun trigo jeē jé ni cuaan jeē tahndé, chí je cáhíyo tūhva i cándje i ruhū. <sup>36</sup> Te tēe scándije ñayuu cácuu de nájñūhun tēe cájehnde trigo, te nihñ de yāhu de. Te jeē cánastútú de ñayuu cúu jeē cótecu i níí cáni andiví. Te tēe cáscuíté núu jnúhun rī, inuú-ni cusī ni de jíin tēe cástéén gā jnúhun rī. <sup>37</sup> Chí ndaá cúu jnúhun jeē cahán: ñin tēe jéte, te inga tēe nástútú, áchí. <sup>38</sup> Te suu cúu jeē ní tají rī rohó jijnáhan ró jéē scándije ró ñayuu jeē jé ni canihñ jnúhun ya ni casáha inga tēe. Chí inga tēe je ni canacani de jnúhun nuū ñáyuu, te máá ró chí nájñūhun cánastútú ró i cúu jeē scándije ró i.

<sup>39</sup> Te cuehē ñayuu Samaria jeē cáyucú ñuu ún, ni cacandije i Jesús jeē ní jini sōho i jnúhun ní cahān ñahan ún. Chí ni cahān ña: Ní cachi ya ndihi táca jéē ní sáha ri. <sup>40</sup> Te jeē yúcuan cúu jeē ñayuu Samaria un ní jinúcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yūcuan úú quivī. <sup>41</sup> Te cuehē gā i ni cacandije i ya jíin jnúhun cáhán maá yá. <sup>42</sup> Te ni cacahān i jíin ñahan ún:

Tuá niní jéē cahán maá ró te candije ri yā, chí je ni cajini sōho ri jnúhun cáhán maá yá. Te cájini yō jeē maá yá cúu ndije Cristo, Yaā jnama ñayuu ñayiví. Achí i.

*Jeē ní nasávāha ya sēhe tēe ndíso jniñu nuū rey*

<sup>43</sup> Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. <sup>44</sup> Chí je ni cahān maá yá jeē tēe



cánacani jñūhun Yaā Dios, tu cáhīyo yíñúhún ñáyuu ñuu de jíin de, te suni súcuan ni cuu jíin máá yá. <sup>45</sup> Te ná ni najinū yā Galilea, te ñayuu un ní cajetáhú i ya, chí suni máá i ní jengoo i vico pascua ñuu Jerusalén, te ní cajito i táca jniñu ní sáha ya quivī ní íyo vico ún.

<sup>46</sup> Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndute ni nduu vino. Te ini ñuu Capernaum ni íyo ñn tēe cújēhnu jeē ndíso jniñu nuū rey. Te cúhú sēhe de. <sup>47</sup> Tēe un ní jini jñūhun de jeē ní najinū Jesús región Galilea jeē ní jēhēn yā región Judea. Te ni jecondéhé de ya, te ni cahān ndahú de jíin yá jeē na quihín yā jíin de vehe de, te nasávaha ya sēhe de, chí je yajni cuu i. <sup>48</sup> Te ní cahān Jesús jíin de:

Núu tú coto ró jniñu jēhnu jeē nāa ní rō sáha, te ma candíje cuiñi rō jijnáhan ró, áhí yá.

<sup>49</sup> Te tēe ndíso jniñu nuū rey, ní cahān de:

Cava vāha ní ní na quihín yō, chí núu cucuéeé ní te cuu sēhe ná, áhí de.

<sup>50</sup> Yūcuán na te ní cahān Jesús:

Cuānuhun vehe ró, chí cotecu sēhe ró.

Te tēe un ní candíje de jñūhun ní cahān Jesús, te cuanuhun-ni de. <sup>51</sup> Te níni jíca de cuanuhun de vehe de, te ní quijicoo mozo de ní caquijnahan i de, te ní cacahān i:

Je ní nduvāha sēhe ní, áhí i.

<sup>52</sup> Te ní cajñūhún de na hora ní quejéé ndúvaha i. Te ní cacahān i jíin de:

Cahīn jeē ícu ní quenda quiji i.

<sup>53</sup> Yūcuán na te máá tátá i ní sáha de cuenta jeē hora un cúu jeē ní cahān Jesús jíin de jeē cotecu sēhe de. Te ní candíje de jíin ní vehe de jeē cúu ya Yaā ní tají Yaā Dios.

<sup>54</sup> Yāha cúu vuelta uū jeē ní sáha Jesús jniñu jēhnu jeē ní stéén yā poder yā región Galilea, jeē ní najinū yā jeē ní jēhēn yā región Judea.

*Jeē ní nasávaha ya ñn tēe catú yuhu pila Betesda*

## 5

<sup>1</sup> Yūcuán na te cuahān tucu Jesús ñuu Jerusalén, chí íyó tucu vico cásaha jnáhan ñuu yā hebreo. <sup>2</sup> Te Jerusalén íyó ñn pila ndute yajni yéhyí jéē naní yéhyí lanchi. Te yuhu hebreo naní Betesda. Te nuū ine pila un íyó úhūn corredor. <sup>3</sup> Te ini táca corredor un cácaā cuehē ñayuu cácuñu, jeē cuaá, jeē chacuá, jeē ní íjin. Te cándetu i jeē canda ndute ún. <sup>4</sup> Chí íyó quivī jeē cúun ñn ndajéhé yā ini pila un, te scánda ya ndute. Te ñayuu quivī xīhna gā ini pila un ná scánda ya ndute, te ndúvaha i na-ni cuehyī ndóho i. <sup>5</sup> Te yūcuán íyó ñn tēe jeē ní cuu ocó xahūn uní cuiyā cuhú de. <sup>6</sup> Te ní jito Jesús jeē catú de, te ní jini yá jeē ní cuu cuehē cuiyā cuhú de. Te ní cahān yā jíin de:

¿A cúni rō nduvāha ró? áhí yá.

<sup>7</sup> Te ní cahān tēe cúhú un jíin yá:

Tu níhín na ní ñn tēe squiví sáñá ini pila hora jeē cánda ndute. Chí táca jínu jeē cuní na quiví ná, te quiví-ni inga ñayuu xīhna gā. Achí de.

<sup>8</sup> Te ní cahān Jesús:

Ndocuiñi te naquihin ró camilla ró te caca ró, áhí yá.

<sup>9</sup> Te tēe un ní nduvāha-ni de. Te ní naquihin de camilla de, te ní quejéé de jíca de. Te quiví ndétātu cúu quiví ún. <sup>10</sup> Yūcuán na te jnáhan de tēe hebreo un ní cacahān jíin de:

Quiví ndétātu cúu vijna. Te áhí ley jeē ma cúu condiso ró camilla ró.

11 Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin ri camilla rī te caca ri, achí de.

12 Yūcuán na te ni cacajñuhún un de:

¿Ndé tēe ni cahān jíin ró jeē náquihin ró camilla rō te caca ró?

13 Te tēe ni nduvāha ún, tu jíin de ndé ñin cúu jeē ní nasávāha de. Chi cáhñin cuehē ñayuu yūcuán, te Jesús je cuahān yā. 14 Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chí je ni nduvāha ró. Ma sáha ga rō cuēchi, chí núu tuú, te quiji ñin jñundóho xeēn gā siquī rō, achí yá.

15 Yūcuán na te cuahān tēe ún, te ni castühún de nuū jnáhan de hebreo un jée Jesús cúu jeē ní nasávāha ya de. 16 Te siquī jeē ní sáha Jesús jñiñu yáha quiví ndétátú, jeē yúcuán cúu jeē tēe hebreo un cájito xeēn de ya, te cácuni de cahni de ya. 17 Te ni cahān Jesús jíin de:

Máa Tátá rī chí ní cáni te nde vijna sáha ya jñiñu váha, te suni súcuan ruhū sáha ri jñiñu váha.

18 Te siquī jeē ni cáhān yā súcuan, te tēe hebreo un víhyá gā cácuni de cahni de ya. Chí nasūu máa ñn-ni jeē tu squícu ya jeē cahán ley siquī quiví ndétátú, chí suni jeē ni cáhān yā jeē Tátá yā cúu Yaa Dios, te súcuan sáha ñnuú yá máa yá jíin Yaa Dios.

### *Siquī jeē ndiso jñiñu Sēhe Yaa Dios*

19 Te ni cahān Jesús:

Jendaá cahán rī jíin ró jíijnáhan ró: Ruhū jeē cúu Sēhe Yaa Dios, tú na vé cúu sáha ri jeē máa rí, chí máni sáha ri jeē jíto rí sáha Tátá rī. Chí táca jēe sáha Tátá rī, suni sáha ruhū jeē cúu rí Sēhe ya. 20 Chí máa Tátá rī, maní yā jíin ruhū jeē cúu rí Sēhe ya, te stéén yā nuū rí ndihi jeē sáha ya. Te jéhu ga jñiñu stéén yā vésú jeē ní cuu vijna, jeē naa ni rō coto ró jíijnáhan ró. 21 Te nájnūhun jeē nastécu máa Tátá rī ndíyi te cotecu tucu i, suni súcuan ruhū jeē cúu rí Sēhe ya, nastécu rī ndé-ni cúu jeē cuni máa rí. 22 Te máa Tátá rī, tu sándaá yā siquī ni ñin ñayuu, chí ni jēhe ya jñūhun jeē sándaá máa rí siquī táca ñayuu, chí Sēhe ya cúu rí. 23 Te súcuan te coo yíñuhún ndihi ñayuu nuū rī, nájnūhun yíñuhún i nuū Tátá rī. Te ñayuu tu íyó yíñuhún núu rī, núu súcuan te suni tu yíñuhún i nuū máa Tátá rī jeē ní tají yá ruhū vēji rí.

24 Jendaá cahán rī jíin ró: Núu ñin ñayuu chuhun ni i jñūhun cáhán rī, te candíje i jeē Yaa ndaa cúu Yaa ní tají rúhū vēji rí, ñayuu ún cotecu i ní cáni andiví, te ma jñahnú ndetū i. Chí ma cúu ga i nájnūhun ndíyi, chí sa suhva cotecu i ní cáni. 25 Jendaá cahán rī jíin ró jeē quiji quiví, te vijna je ni quejéé, jeē táca ñayuu cácuu nájnūhun ndíyi, cuni nahín i jñūhun cáhán ruhū, Sēhe Yaa Dios. Te ñayuu cuatáhú, chí cotecu i ní cáni. 26 Chí nájnūhun íyó poder máa Tátá rī jeē sáha ya jeē técu ndihi-ni, suni súcuan ni jēhe ya poder nuū ruhū jeē sáha ri jeē cotecu ndihi-ni. 27 Te suni ni sáha ya jeē ndiso jñiñu rí sándaá rí siquī ñayuu, chí cúu rí Yaa ní nduu tēe. 28 Ma náa ni rō cani ní rō siquī jñūhun cáhán rí. Chí quee quiví jeē táca ndíyi cuni sōho i jñūhun cahán rí, 29 te quendacoo i nuū yíndūji i. Te ndíyi jeē ní casáha jñiñu váha, natecu i jeē cótecu i ní cáni. Te ndíyi jeē ní casáha jñiñu néé, natecu i te quívicoo i nuū jñahnú ndetū i.

### *Ndé vé cúu jeē steén jeē ní tají Yaa Dios yā*

30 Tú na vé cúu sáha ri jeē máa rí. Chí nájnūhun ndácu Yaa Dios jñiñu nuū rí, súcuan sándaá rí jñiñu. Te ndaa sándaá rí, chí tu sáha ri jeē cuni máa rí, chí sáha

ri jeē cuní maá Tátá rī, Yaā ní tají rúhū vēji ri. <sup>31</sup> Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjníñu jñūhun cáhān rī. <sup>32</sup> Te iyó inga jeē cahān jeē cúu ri Sēhe ya. Te jíní rī jeē jñūhun un jéē cahān yā, chi níñin jñíñu. <sup>33</sup> Máá ró ni catají ró tēe ni cacajñūhún de Juan. Te Juan chi ndaā ni cahān de jñūhun ri. <sup>34</sup> Te vēsú súcuan te nasūu rúhū cúu jeē jíní ñūhún jeē steén ñin tēe jeē Sēhe Yaā Dios cúu ri. Chi máá ró cúu jeē jíní ñūhún návāha candíje ró te cácu ró jijnáhan ró. Jeē yúcuan ní cahān rī jeē iyó ndāā jñūhun ri jeē ní nacani Juan. <sup>35</sup> Máá Juan ni cuu de nájñūhun ñin lámpara jeē cayú te cúndijin, cúu jeē ní nacani de jñūhun ri. Te máá ró, jecu-ni quiví ni canujnahan ni ró jeē ni steén de nuū ró. <sup>36</sup> Te iyó jéē steén cají gá jeē cujéñnu ri vēsú jeē ní cahān Juan. Suu jñíñu sáha ri, jñíñu jeē ní tejníñu Tátá rī ruhū jeē sáha ri, jñíñu un steén ndije jeē maá yá ni tají rúhū vēji ri. <sup>37</sup> Te Tátá rī jeē ní tají yá ruhū vēji ri, suni máá yá cahān nuū tútu ñi jeē cujéñnu ri, vēsú tu ní cájini sōho cuiti ró jeē cahān yā, ni tu ní cájito ró yá. <sup>38</sup> Te tu ní cáchuhun ni ró jñūhun un jéē ni cahān Tátá rī, chi tu cácandíje ró rúhū, Yaā ní tají yá vēji. <sup>39</sup> Cánanducú vii ró tāca jñūhun cáhān tutu ñi, chí cájeni ni ró jeē yúcuan níñin ró jñūhun jeē cótecu ró ñi cáni sáha. Te jñūhun siquī maá rí cúu jeē cahān tutu ún. <sup>40</sup> Te vēsú súcuan te tu cácuni ró cuatáhú ró ruhū quivícoo ró ndaha ri návāha cotecu ró ñi cáni.

<sup>41</sup> Tu chíhi ri cuenta jñūhun jeē cácahān ñayuu jeē cujéñnu ri. <sup>42</sup> Chi je jíní rī ndese cándāa ánuá ró jeē tu cáhíyo maní ró jíní Yaā Dios. <sup>43</sup> Ruhū vēji ri jíní jñíñu cúní Tátá rī, te tu cájetáhú ró ruhū. Te núu inga tēe quee de jíní jñíñu cúní maá de, sa tēe un yáchí cuatáhú ró de. <sup>44</sup> ¿Ndese cuu candíje ró jijnáhan ró? Chi máni cácuni ró jeē cujéñnu ró sáha jnáhan ró, te tu cánducú ró jeē cujéñnu ró sáha Yaā Dios, jeē maá ñin-ni ya iyó. <sup>45</sup> Ma cáni ni ró jeē cáquin rí cuēchi siquī ró nuū Tátá rī. Chi iyó ñin jeē cáquin cuēchi siquī ró, suu Moisés, tēe jeē cáñuhun ni ró jeē quendōo ndaā ró jíní ley jeē ní tee de. <sup>46</sup> Chi núu ní cácandíje ró jéē ní tee Moisés, te suni candíje ró rúhū nuū, chi jñūhun maá rí ni tee de. <sup>47</sup> Te núu tu cácandíje ró jñūhun rí jeē ní tee de, ¿te ndese candíje ró jñūhun cáhān maá rí núu súcuan? Achí yá jíní de.

*Jeē ni scáji yā uhūn mīl tēe*

*(Mt. 14.13-21; Mr. 6.30-44; Lc. 9.10-17)*

## 6

<sup>1</sup> Yūcuán na te cuahān Jesús inga lado mar Galilea, jeē cúu mar Tiberias. <sup>2</sup> Te yōhō cuehē ñayuu ni candiquín i ya, chi ni cajito i táca jñíñu jéñnu jeē steén yā poder yá jeē ní nasávāha ya ñayuu cácuñu. <sup>3</sup> Te ni caa ya ñin yucu, te ni cucōo ya yúcuan jíní tēe cácuáha jíní yá. <sup>4</sup> Te je ni cuyajni vico pascua jeē cáncucūhun ni jnáhan ñuu yā hebreo jeē ní cacācu i nuū ñayuu nación Egipto. <sup>5</sup> Te ni ndacoto ya, te ni jito ya jeē véjicoo cuehē ndasí ñayuu. Te ni cahān yā jíní Felipe:

¿Ndé nuū cuaan yó jéē cáji ñayuu yáha jijnáhan i?

<sup>6</sup> Te súcuan ni cahān yā jeē jító ndee yā de núu ndese cahān de. Chi je jíní maá yá ndese sáha ya. <sup>7</sup> Te ni cahān Felipe jíní yá:

Te ni ma cánda uū ciento denario staā, ni vēsú jeē cáji i jecu jecu jijnáhan i, achí de.

<sup>8</sup> Yūcuán na te ni cahān Andrés, ñani Simón Pedro, inga tēe scuáha jíní yá un:

<sup>9</sup> Yáha íne ñin sūchi yí jéē ndiso i uhūn staā cebada jíní uū chācá. ¿Te ndé canda cuiti ún, chí ñayuu cuehē ndasí cúu?

10 Yūcuán na te ni cahān Jesús:

Cahān jīn ñāyuu na cūcōo i, áchí yá.

Te yūcuan cáa cuehē ite, te ni cacucōo i, te nájñuhun uhūn mil tēe cúu. 11 Te ni quihin Jesús staā ún, te ni nacuatáhu yá nuū Yaā Dios. Te ni jēhe ya nuū tēe cáscuáha jīn yá, te máá de ni casaja de nuū ñāyuu ní cacucōo ún. Te suni sūcuan ni sáha ya jīn cháca, te ni cayeji i nasaa cácuni máá i. 12 Te nuū ní candutú chíji i, te ni cahān yá jīn tēe cáscuáha ún:

Nastútú ró táca pedazo jeē ni ndóo, návāha tu stívi cuiti yō.

13 Te ni canastútú de, te ni chítú úxī uū jīca pedazo jeē ni ndóo síquī ndihúhún staā cebada un jeē tuá ni ndáhi caji ñayuu. 14 Te ñayuu un ní cajito i jniñu jéhu ni sáha Jesús jeē ní steén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ini ñayívi jēe nácani jñuhun Yaā Dios. Achí i.

15 Te ni jini Jesús jeē cácuni i sáfuerza i ya jeē cuu ya rey i núu. Te ni cujiyo tucu máá ñn-ni ya, ni caa ya cuahān yā nuū sucún gá yucu.

*Jeē ní jica jéhé yá nuū mar*  
(Mt. 14.22-27; Mr. 6.45-52)

16 Te nuū cuácuaa, te tēe cáscuáha jīn yá ni nanuu de cuango de nde mar.

17 Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. 18 Yūcuán na te ni jequihē ñn tachí níhin, te sáha jeē ndóna ndute mar un. 19 Te jeē ní cuu nájñuhun uhūn chí íñū kilómetro cájica de jīn barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. 20 Te máá yá ni cahān yá jīn de:

Máá rí cúu. Ma yūhu ró jijnáhan ró.

21 Te ni cacusñ ni de jeē na quívi ya ini barco. Te ni sáha ya jeē yachī-ni ni jinūcōo-ni de ñuhun íchi núu cuango de ún.

*Jeē cánanducú ñayuu Jesús*

22 Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jīn yá cuango de jīn máñuhún-ni barco ni ñe yūcuán, jīn jēe tu ní quívi Jesús quihīn yā jīn de jíjnáhan de. 23 Te sava ga barco jeē véjicoo ichi ñūū Tiberias, ni quecoo yajni lugar nuū ní cayeji i staā jeē ní nacuatáhu máá Jítoho yō jehē. 24 Te jeē ní cajito ñayuu un jēe tuá Jesús ñe ya yūcuán, ni tēe cáscuáha jīn yá, te ni quívicoo i táca barco un, te cuango i ñuu Capernaum cuananducú i ya.

*Jesús cúu staā jeē cótecu yō ní cáni*

25 Te nuū ní jinūcōo i nde inga lado mar, te ni nanihīn jnáhan i jīn Jesús. Te ni cacajnūhún i ya:

Maestro, ¿na hora ni quee ni yáha?

26 Te ni cahān Jesús:

Jendaá cahān rī jīn ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró táca jniñu jéhu jeē steén rī poder rī. 27 Ma cóndihvī ni rō máá síquī jeē caji rō jeē yachī nataxīn, chí sa suhva condihvī ni rō síquī jeē níhin rō jeē cótecu rō ní cáni sáha. Te máá rí, Yaā ní nduu tēe, cuáha rī nájñuhun staā jeē cótecu rō ní cáni sáha. Chí Tátá rī Yaā Dios ni jeni ya ruhū jeē sáha rī sūcuan. Achí yá jīn i.

28 Yūcuán na te ni cacajnūhún i ya:

¿Ndesé sáha ná návāha squícu ná jniñu cúní Yaā Dios?

29 Te ni cahān Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

30 Yūcuán na te ni cacahān i:

Núu súcuan ¿te na jniñu jéhnū sáha ní coto ná jijnáhan ná te candíje ná jéē ní tají yá nihín? ¿Na jniñu cúu jeē sáha ní? 31 Chi tāca jíi yō jengahán ni cayejí de maná jeē ní cuun ichi ándiví ndé nuū ñúhun téhé, nájñuhun yósó núu tútu: Yaā Dios ní jéhe ya staā ni cuun ichi ándiví, ni cayejí i, áchí tutu. Achí i jíin yá.

32 Te ni cahān Jesús:

Jendaá cahán rī jíin ró: Nasūú Moisés ní jéhe staā un núu de jijnáhan de jeē ní cuun ichi ándiví, chí máá Tátá rī ní jéhe. Te máá yá jéhe staā andiví jéē cótecu rō níí cáni sáha. 33 Chi staā jéhe Yaā Dios cúu máá Yaā ní quiji ichi ándiví, te sáha ya jeē ñayuu ñayiví cotecu i níí cáni andiví. Achí yá.

34 Te ni cacahān i jíin yá:

Níní cuáha ní stáā ún caji na núu súcuan.

35 Te ni cahān Jesús:

Máá rí cúu máá stáā jeē cótecu rō níí cáni sáha. Ndé vé quívi ndaha rí, ma cúu cuiti gā sōco. Te ndé vé candíje ruhū, ma jíhí cuiti gā. 36 Te nájñuhun je ní cahán rī jíin ró, tu cáandíje ró rúhū, vēsú ní cajito ró núu rī. 37 Tāca ñayuu jeē sáha Tátá rī jeē candíje i ruhū, máá i quívicoo ndaha rí. Te jétáhú rí tāca jéē cuní quívi ndaha rí, chí ma squéhichí cuiti rí quihín. 38 Chi ní quiji rí ichi ándiví návāha sáha rí jniñu jeē cuní Yaā ní tají rúhū, te nasūu jéē sáha rí jeē cuní máá rí. 39 Te jniñu jeē cuní Tátá rí, Yaā ní tají rúhū, cúu jeē ma scuíta rí ní iin ñayuu ní jéhe ya nuū rí, chí condito rí i te nastécu rí i quívi jínu ñayiví. 40 Te Yaā ní tají rúhū, cuní yā jeē tāca ñayuu jeē nihín i jñuhun ruhū, Sēhe Yaā Dios, te candíje i ruhū, cotecu i níí cáni andiví. Chi nastécu rí i quívi jínu ñayiví. Achí yá.

41 Yūcuán na te ni caquejéé jnāhan ñuu yā hebreo cácahān de siquī yā, chí ni cahán yā jeē máá yá cúu staā ní quiji ichi ándiví. 42 Te ni cacahān de:

¿A násūu téé yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ní quiji de ichi ándiví núu súcuan?

43 Te ni cahān Jesús jíin de:

Ma cahán rō siquī rī jijnáhan ró. 44 Ni iin ñayuu ma cúu quívi i ndaha rí núu ma sáha Tátá rí jeē cúu ní i quívi i, chí máá yá ní tají rúhū vēji rí. Te nastécu rí i quívi jínu ñayiví. 45 Te suhva yósó núu tútu ní cateé tēe ní canacani jñuhun Yaā Dios: Tācá i chí steén Yaā Dios nuū i, áchí. Núu súcuan te tāca ñayuu jíni sōho jñuhun cáhán Tátá rí, te jétáhú i jeē steén yā nuū i, ñayuu ún chí quívicoo i ndaha rí.

46 Te tu ní jíto ní iin ñayuu nuū máá Tátá rí. Chi máñúhún-ni ruhū ní jito rí nuū yá, chí nde nuū máá yá vēji rí. 47 Jendaá cahán rī jíin ró jijnáhan ró jéē ñayuu jeē candíje i jeē jnáma rí i, máá i cotecu i níí cáni. 48 Máá rí cúu staā jeē cótecu rō níí cáni sáha. 49 Tāca jíi ró jengahán, ni cayejí de staā maná jeē ní cuun ichi ándiví ndé nuū ñúhun téhé, te tu ní sáha jeē cótecu de níí cáni andiví. 50 Te staā jeē cahán rī jeē vēji ichi ándiví, chí na-ní ñayuu caji, te cotecu i níí cáni andiví. 51 Te suu máá rí cúu staā un jéē ní quiji ichi ándiví jéē sáha jeē cótecu rō níí cáni. Te ñayuu jeē caji staā yáha, cotecu i níí cáni andiví. Te staā jeē cuáha rí un cúu yiqui cúñu rí, te cuáha rí návāha ñayuu ñayiví cotecu i níí cáni andiví. Achí yá.

52 Yūcuán na te jnāhan ñuu yā hebreo ní cacahān de jíin tāca jnāhan de:

¿Ndese cuu cuáha tēe yáha yiqui cúñu de caji yō? achí de.

<sup>53</sup> Te ni cahān Jesús jín de:

Jendaá cahán rī jín ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñī rī cúu nájnūhun ndute, núu súcuan te ma cótecu rō ní cāni andiví. <sup>54</sup> Chi ñayuu cá candíje jeē yiqui cúñu rī cúu nájnūhun staā te niñī rī cúu nájnūhun ndute, máá i cotecu i ní cāni. Te nastécu rī i quivī jínu ñayiví. <sup>55</sup> Chi yiqui cúñu rī jín níñī rī cúu ndíje jeē sáha jeē cótecu i ní cāni. <sup>56</sup> Te ñayuu cá candíje jeē yiqui cúñu rī jín níñī rī cúu nájnūhun staā jín ndute jeē cótecu i ní cāni sáha, máá i ní ní ndúú i jín rí, te ndúú rí jín i. <sup>57</sup> Máá Tátá rī, Yaā técu, ni tají yá ruhū vēji rī, te técu rī sáha máá yá. Te suni súcuan, ñayuu cá candíje jeē cúu rī nájnūhun staā i ndute i, suni súcuan cotecu i ní cāni sáha rī. <sup>58</sup> Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayejí taca jí rō jenahán, chí tu ní sáha jeē cótecu de ní cāni. Te staā jeē cahán rī, chí ñayuu caji, cotecu i ní cāni sáha, áchí yá.

<sup>59</sup> Taca jnūhun yáha ni steén Jesús nuū ñayuu ní candutútú ini vehe ñi sinagoga ñuu Capernaum.

### *Jnūhun cotecu yō ní cāni*

<sup>60</sup> Te cuehē ñayuu cascuáha jín yá, ni cajini sōho i jnūhun yáha jéē ni stéén yā. Te ni cacahān maá i:

Yōhyo yí jnūhun cáhán yā yāhá. ¿Ndese cuu cuatáhú yó?

<sup>61</sup> Te ni jini Jesús jeē cáhān i jeē yí cúu jnūhun yāhá, te ni cahān yā jín i:

¿A yí sáha jnūhun yáha jín ró jijnáhan ró? <sup>62</sup> ¿Te ndese sáha ró núu coto ró jéē ruhū, Yaā ní nduu tēe, ndaa rī nuhun rī nuū ní cóndee rī xīhna ñúhún? <sup>63</sup> Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuítí súcuan. Te taca jnūhun ni cahán rī jín ró cúu jeē quéndō vāha ánuá rō, te cotecu rō ní cāni sáha. <sup>64</sup> Te sava rō chí tu cá candíje ró. Achí yá.

Chi nde xīhna ñúhún je jíní Jesús ndé-ni cúu ñayuu jeē ma cándíje, jín ndé ñn de cúu jeē nastúu de ya. <sup>65</sup> Te ni cahān gā yā:

Jeē yúcuan ní cahān rī jín ró jeē ma cúu quiví ni ñn ñayuu ndaha rī, te núu tu sáha Tátá rī jeē cúu ni i quiví i, áchí yá.

<sup>66</sup> Te nde quiví ún te cuehē ñayuu cascuáha jín yá, ni castóo i ya, te tuá ní cájica i jín yá. <sup>67</sup> Yūcuán na te ni cahān yā jín máá ndihúxí uū tēe cascuáha jín yá:

¿A suni cá cuni máá ró quingoo ró, chí naún?

<sup>68</sup> Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jnūhun jeē cótecu na ní cāni sáha. <sup>69</sup> Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

<sup>70</sup> Te ni cahān Jesús:

Te vēsū ní nacāji rī ndihúxí uū rō, te íyó ñn ró jeē ní quiví jexeén ini. Achí yá.

<sup>71</sup> Te súcuan ni cahān yā siquī Judas Iscariote, sēhe Simón. Chi máá de nastúu de ya, vēsū ñn jnáhan jeē uxí uū tēe cascuáha jín yá cúu de.

### *Jeē tu ní cá candíje ñani Jesús*

## 7

<sup>1</sup> Yūcuán na te jica cuu Jesús región Galilea. Chi tu cúní yā caca cuu ya región Judea, chí jnáhan ñuu yá hebreo jeē cáyūcu yúcuan, cá cuni de cahni de ya. <sup>2</sup> Te

cuacuyajni vico jeē casáha ñayuu yā hebreo vehe ramadá, cáyūcú i chíji. <sup>3</sup> Te ñani yā ni cacahān de jíin yá:

¿Naun máá yáha-ni ine ró? ¿Naun tú quihín rō región Judea, návaha tēe yūcuan jeē cācandíje de róhó, suni coto de jniñu jéhu sáha ró. <sup>4</sup> Chi núu cúní ñn tēe jeē cuité núu jñuhun de, te tu sáha yuhu de jniñu. Te núu sáha nde ró táca jniñu jéhu, vāha ga na sáha ró jeē cúní ndivii ñayuu.

<sup>5</sup> Súcuan ni cacahān ñani yā jíin yá, chí ni máá de tu cācandíje de ya. <sup>6</sup> Yūcuán na te ni cahān Jesús:

Ná tu quee máá quiví jeē quihín rī. Te máá ró jijnáhan ró chí na-ni quiví-ni te cuu quingoo ró. <sup>7</sup> Chí ma quití ni ñayuu ñayiví núu rō, te máá rí chí quití ni i jíto i ruhū, chí cāhán rī jeē jíin rī jeē máni jniñu néé casáha i. <sup>8</sup> Cuángoo máá ró vico ún. Te máá rí chí ma quihín rī vijna, chí ná tu quee máá quiví cánuú quihín rī. Achí yá.

<sup>9</sup> Súcuan ni cahān yā jñuhun yáha jíin de, te ni quendōo ya Galilea.

### *Jeē ni jéhēn Jesús vico vehe ramadá*

<sup>10</sup> Te nuū ní yáha ñani yā cuangoo de vico ún, te sáá te suni cuahān máá yá. Te tú cuahān ndijin yá, chí tu ní stéén yá máá yá. <sup>11</sup> Te jnáhan ñuu yā hebreo cānanducú i ya nuū vico ún, te cācāhān i:

¿Nde nuū ine tēe ún? áchí i.

<sup>12</sup> Te yōhyo ni cacahān ñayuu jeē siquí yá, chí sava i cacahān: Tēe vāha cúu de. Te sava ga i cacahān: Tuú chí stáhú de ñayuu.

<sup>13</sup> Te yuhu-ni ni cacahān i jñuhun ya, chí cáyūhú i jeē quití ni jnáhan i tēe hebreo.

<sup>14</sup> Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jñuhun. <sup>15</sup> Te ni canaa ni jnáhan ñuu yā hebreo cájini sōho i, te ni cacahān i:

¿Ndesé jíin tēe yáha cuéhē jñuhun ndíchí, chí tu ní jíca de escuela? áchí i.

<sup>16</sup> Yūcuán na te ni cahān Jesús:

Jñuhun stéén rī chí nasūu jñuhun máá rí cúu, chí jñuhun jeē ni jéhe máá Yaā ní tají rúhū cúu. <sup>17</sup> Núu ñn ñayuu cúní i sáha i jniñu cúní Yaā Díos, ñayuu ún chí jecūhun ni i núu nde nuū Yaā Díos vēji jñuhun stéén rī, chí jñuhun jeē jéni ni máá-ni rí cúu. <sup>18</sup> Tēe cāhán jñuhun jéni ni máá de, tēe un ndúcú de jeē na sājéhu ñayuu de. Te núu ñn tēe ndúcú de jeē sajéhu de Yaā ní tají de, tēe un cúu tēe ndaā, te tú na jñuhun stáhú iyó jíin de.

<sup>19</sup> ¿A násūu jéé ní jéhe Moisés ley yá nuū rō jeē squícu ró? Te ni ñn ró tu cásquicu. Chí sa jeē cācuni rō cahni rō ruhū, ¿te najehē cúu? Achí yá.

<sup>20</sup> Te ni cacahān ñayuu cuehē ún:

Tachī ndóho ró. ¿Nde ñn cúní cahni rohó?

<sup>21</sup> Te ni cahān Jesús:

Ni nasávāha rī ñn tēe quiví ndétátú, te ndivii rō ni canaa ni rō ni cajito ró jéé quiví ndétátú ní sáha rí jniñu ún. <sup>22</sup> Te Moisés ni jéhe de ley jeē cúu circuncidar nuū rō. Te casáha ró circuncidar sūchi yí núu uná quiví jeē ní cacu i, vēsú quiví ndétátu cúu. (Te nasūu máá Moisés ní jéquin ley un, chí je ni iyo nuū táca jíi de.) <sup>23</sup> Núu súcuan te núu casáha ró circuncidar vēsú quiví ndétátu cúu, návaha squícu ró ley Moisés, ¿te najehē cáquití ni rō jeē ní nasávāha ndihi rí ñn tēe quiví ndétátú? <sup>24</sup> Ma yachí cani ni rō jeē cuéchi cúu jeē sáha rí. Chí sa cani vāha ni rō siquí táca jniñu vāha. Achí yá.

### *Jeē ní cachi Jesús ndé nuū véji ya*



25 Yūcuán na te sava ñayuu ñuu Jerusalén ni cacajñūhun jñáhan i:

¿A násūu tée yáha cúu jeē cánanducú tée cácujeñhu jeē cáhni de, chí naún?  
26 Te yáha cáhán ndijin de nuū chitú, te tú na jñūhun cácahán jín de. ¿A sanaa te ni cacundaá ni tée cácujeñhu jeē tée yáha cúu Cristo jeē achí tutu jeē quiji, chí naún? 27 Te tuú chi je cájini yō nuū véji tée yáha. Te jeē quiji Cristo, chí ni ñn yó má cúni ndé chí quiji ya. Achí i.

28 Yūcuán na te ni cahān jee Jesús jeē steén yā jñūhun ini templo:

Cájini rō ruhū, te cájini rō ndé ñuu véji ri. Te vēsú súcuan te máa Yāā ndaa cúu jeē ní tají rúhū véji ri, te tú véji ri jeē cuní máa rí. Te tu cájini rō ndese Yāā cúu ya. 29 Te máa rí chí jíní rī yā, chí nde nuū máa yá véji ri, te máa yá ní tají rúhū, achí yá.

30 Yūcuán na te ni canducú de jññ de ya. Te ni ñn de tu ní cúu jññ de ya, chí ná tu quee máa quiví jeē jññ de ya. 31 Te cuehē ñayuu chí ni cacandíje i ya, te ni cacahān i:

¿A násūu tée yáha cúu Cristo, Yāā ndétu yó jéē quiji? Chi cuehē ndasí jññu jéñhu sáha ya jeē steén yā poder yā. Achí i.

### *Jeē ní catajǎ de policia jeē jññ de Jesús*

32 Te ni cajini tée fariseo jeē súcuan cácahān ñayuu jñūhun ya. Te máa de jín sūtū cácujeñhu, ni catajǎ de policia cándito templo jeē jññ de ya. 33 Te ni cahān Jesús:

Jecu na quiví condee rī jín ró jijnáhan ró. Yūcuán na te nuhun rī nuū Yāā ní tají rúhū véji ri. 34 Te nanducú rō ruhū, te ma nánihñ rō ruhū. Chi ma cúu jinūcoo rō núū cóndee rī. Achí yá.

35 Yūcuán na te máa tée un ní cacajñūhun jñáhan de:

¿Te ndé nuū quihín tée yáha jeē ma nánihñ yō de? ¿A quihín de nuū jñáhan yó hebreo jeē ní cajitē núu cáyūcu ndé nación Grecia? ¿Te á stéén de jñūhun nuū ñayuu Grecia, chí naún? 36 ¿Te na jñūhun cúu jeē ní cáhān de jín yó jeē nanducú yó de te ma nánihñ yō de, chí ma cúu jinūcoo yó núū cóndee de? Achí tée un jijnáhan de.

### *Siquí ndute jeē cótecu yō ní cáni sáha*

37 Te quiví sándñí vico ún te cúu vico cáhnu ga. Te quiví un ní ndocuiñí Jesús, te ni cahān jee ya:

Núu ndé ñayuu jnáa ndasí i táca jéē váha jeē sáha ri jehé i, nájñūhun jeē jichí i ndute, núu súcuan te na quiví i ndaha ri te coho i ndute, cúu jeē nihín i jeē váha ún. 38 Te ñayuu jeē candíje jeē jnáma ri i, chí ini anuá i condee Espiritu Santo, te cuu ya nájñūhun yūte cáne ñuhún jeē sáha ya jeē cótecu i ní cáni, nájñūhun cáhán tutu ñ. Achí yá.

39 Te súcuan ni cahān yā jeē ñayuu candíje jeē jnáma ya i, nihín i Espiritu Santo. Chí ná tu quee Espiritu ún, chí ná tu ndaa Jesús quinhun yā nuū ndujéñhu ya.

### *Jeē ní cacusññ ñayuu siquí yā*

40 Te sava ñayuu cuehē ún, ná ni cajini sōho i jñūhun yáha, te ni cacahān i: Jendaá jeē tée yáha cúu jeē achí tutu jeē quiji de nacani de jñūhun Yāā Dios, achí i.

41 Te sava ga i ni cacahān:

Tēe yáha cúu Cristo, Yāā ní tají Yāā Dios.

Te sava ga i chí ni cacahān i:



Tuú chi nasūú Galilea quiji Cristo. <sup>42</sup> Chi cáhán tutu ii jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

<sup>43</sup> Te súcuan te ni cacusñn ñayuu jeē siquí yá. <sup>44</sup> Te sava i cácuni i jñi i ya, te ni ñn i tu ní jñá i ya.

### *Jeē tu ní cácandije tēe cácujeñhu*

<sup>45</sup> Yūcuán na te policia cándito templo tu ní cájni de Jesús, te cuanungoo de nuū táca tēe fariseo jíin nuū sutú cácujeñhu. Te tēe ún ni cacajñuhún de policia: ¿Najehē tu ní quecoo ró jíin de? áchí.

<sup>46</sup> Te ni cacahán policia un:

Tú cuiti ni ñn tēe cáhán váha ndasí nájñuhun cáhán tēe yúcuán, áchí.

<sup>47</sup> Te ni cacahán tēe fariseo:

¿Te á suni nde máá ró jíin náhan ró ní stáhú de naún? <sup>48</sup> Ni ñn jñáhan ruhū tēe cácujeñhu jíin tēe fariseo, tu cácandije ri jñuhun cáhán tēe ún, ¿te naun cácandije máá ró? <sup>49</sup> Te ñayuu cuehē yáhá jēe tu cájecūhun ni i ley Moisés, chi jnahñū ndetū i jeē cácandije i tēe ún, áchí de jíin náhan de.

<sup>50</sup> Te ni cahán Nicodemo, tēe ni jéhēn nuū yá ñn jecuáá, te suni ñn tēe fariseo cúu de:

<sup>51</sup> Cáhán ley yō jeē ma cúu tee yó cuēchi siquí ñn tēe, te núu tú xīhna gā cuni sōho yó ndese cáhán de, náváha cucáñhu ni yō na cuēchi ni sáha de. Achí de.

<sup>52</sup> Te ni cacahán jíin de:

Te róhó, ¿á suni nde Galilea vēji ró jēe cahán rō jehē tēe ún? Nanducú váha ró nuū tútu ii te cuni rō jeē ndé Galilea tu quénda cuiti ni ñn tēe nácani jñuhun Yaá Dios. Achí jíin de. <sup>53</sup> Te cuanungoo de ná vehe ná vehe de.

### *Jñuhun ñahan ní casíquí ndéē jñáhan*

## 8

<sup>1</sup> Te ni caa Jesús cuahán yá yucu Olivos. <sup>2</sup> Te jeē cuácundijin inga quiví, te ni ndee tucu ya templo. Te ndihi ñayuu ni quecoo i nuū yá. Te ni cucōo ya, te ni steén yá jñuhun nuū i. <sup>3</sup> Yūcuán na te tēe cástéén tutu ley Yaá Dios jíin tēe grupo fariseo, ni quecoo de jíin ñn ñahan jeē ní canihñ de ña jeē casíquí ndéē ña. Te ni cajeni de ña mēhñú. <sup>4</sup> Te ni cacahán de jíin yá:

Maestro, ni canihñ ná ñahan yáhá jēe casíquí ndéē ña. <sup>5</sup> Te ley Moisés ndácu jñiñu nuū yō jeē cuáha yó yúu xīnī ñahan cásáha súcuan náváha cuu ña. Te máá ní, ¿ndese cáhán ni?

<sup>6</sup> Te súcuan ni cacahán de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquí yá. Te Jesús ni jíta ndeyi ya, te ni tee ya nuū ñuhun jíin xīnī ndáha ya. <sup>7</sup> Te jeē cácajnñuhun cácajnñuhún de ya, te ni ndonehen ya maá yá, te ni cahán yá jíin de:

Núu ndé ñn máá ró tú na cuēchi ró, te xīhna gā maá ró cuáha yuū xīnī ña núu súcuan, áchí yá.

<sup>8</sup> Te ni jíta ndeyi tucu ya, te ni tee tucu ya nuū ñuhun. <sup>9</sup> Te nuū ní cajini de jeē súcuan ni cahán yá, te ni cajecūhun ni de jeē suni cáhīyo cuēchi de. Te ná ñn ná ñn de ni quendacoo de cuahán de, xīhna gā tēe jéñhu ga te nde nuū ní ndihi na. Te ni ndōo máá ñn na Jesús jíin ñahan índichi mēhñú un. <sup>10</sup> Te ni ndonehen tucu ya maá yá, te tuá ni ñn tēe un ní jíto ya, chi máá na ñahan ún. Te ni cahán yá jíin ña:

¿Ndé chi cuángoo tēe cájequin cuēchi siquí rō? ¿A tú ni ñn de ní ndóna cahán gā cuēchi siquí rō?

11 Te ni cahān ña:

Tú ni ñin de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

*Jesús cúu máa luz jeē steén ini anuá ñayuu*

12 Te inga jínu ni cahān Jesús jíin ñayuu:

Máa rí cúu nájñuhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájñuhun nuū nées, chi sa suhva coneváha i luz ini anuá i jeē sáha jeē cótecu i ní cáni.

13 Yūcuán na te ni cacahān tēe fariseo jíin yá:

Róhó chi cáhán rō jñuhun jehē máa rō, te tu jéjñíñu jñuhun cáhán rō.

14 Te ni cahān Jesús jíin de jíjnáhan de:

Vēsú cáhán rī jehē máa rí, te iyó ndáa jñuhun cáhán rī. Chi jíiní rī ndé nuū véji rí jíin ndé nuū quihín rī. Te róhó tu cájini rō ndé nuū véji rí ni ndé nuū quihín rī. 15 Máa ró chi cuenta ñayuu ñayiví cáśandaā rō siquī jñuhun cáhán rī. Te ruhū chi tu śandaā mañúhún rí siquī ni ñin ñayuu. 16 Te núu śandaā rī siquī i, te ndáa sáha rí, chi tu sáha mañúhún rí, chi śandaā rī nde jíin máa Tátá rī, Yaā ní tají rúhú véji rí. 17 Te yósó núu tútu ley cáneváha ró jéé núu inuú cacahān uū testigo, te jíni ñúhún cuatáhú ró jeē cácahān, chi iyó ndáa jñuhun ún. 18 Núu súcuan te ruhū cúu ñin jeē cahán ndaā rī jehē rī. Te inga jeē cahán ndaā jehē rī cúu máa Tátá rī, Yaā ní tají rúhú. Achí yá.

19 Te ni cacahān de jíin yá:

¿Nde nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuū.

20 Tāca jñuhun yáha ní cahān Jesús jeē steén yā ini templo nuū cáyūcu yéjñú jeē cáśocō i xúhún. Te tú ni ñin de ní jñí de ya, chi ná tu quee máa quiví jeē jñí de ya.

*Jeē ni cáhán yā jeē ma cúu jinūcoo de nuū cóndee yā*

21 Te ni cahān tucu Jesús jíin de:

Ruhū chi quihín rī, te nanducú ró rúhú, te ma nánihín rō ruhū, chi quendōo cuēchi ró siquī rō quiví cúu rō. Te jeē yúcuán máa cúu jinūcoo ró núu quihín rī, achí yá.

22 Yūcuán na te tēe hebreo un ní cacahān máa de:

¿A cahní tēe yáha máa de, te jeē yúcuán cáhán de jeē ma cúu jinūcoo yó núu quihín de, chí naún? Achí de.

23 Te ni cahān yā:

Máa ró jíjnáhan ró chi ñayiví yáha véjicoo ró, te ruhū chi nde andiví véji rí. Máa ró cácuu ñayuu ñayiví yáha, te ruhū chi nasūu tēe ñayiví yáha cúu rí. 24 Jeē yúcuán ní cahān rī jeē quendōo cuēchi ró siquī rō quiví cúu rō. Chi núu ma candíje ró jéé máa rí cúu Cristo, te quendōo nahín cuēchi ró siquī rō quiví cúu rō. Achí yá.

25 Te ni cacajñuhún de ya:

Núu súcuan ¿te ndé ñin cúu ró?

Te ni cahān yā:

Je ni cachi ri nuū rō nde xīhna ñúhún ndé ñn cúu ri. <sup>26</sup> Te íyó cuéhē gā jñūhun cuu cahān rī jīn rō te sándaā rī siquī rō. Te ma cahān rī, chi ini ñayīvi yáha cáhán rī maá-ni jñūhun jeē ní jini rī ni cahān Yaā ní tají rúhū vēji ri. Te máni jñūhun ndaā cahān yā. Achí yá.

<sup>27</sup> Te tu ní cájecūhun ni de jeē cahān yā jñūhun Tátá yā andīvi jīn de. <sup>28</sup> Jeē yúcuán ní cahān gā yā:

Nde na yáha jeē cáta caa rō rúhū, Yaā ní nduu tēe, jicā cruz, yūcuán na te cuni rō ndé ñn cúu ri. Te cuni rō jeē tú na vé sáha ri jeē maá rí, chi cáhán rī maá-ni jñūhun ni steén Tátá rī nuū rī. <sup>29</sup> Chi máá Tátá rī, Yaā ní tají rúhū, ndéé yá jīn rī. Te tu stóo máñúhún yá ruhū, chi níni sáha ri jniñu jeē nújnahan ni maá yá. Achí yá.

<sup>30</sup> Te jeē ni cáhān yā jñūhun yáha, te cuehē ñayuu ni cacandíje i ya.

*Siquī ndé-ni cúu sēhe Yaā Dios jīn sēhe jexeén*

<sup>31</sup> Yūcuán na te ni cahān Jesús jīn jnáhan ñuu yā hebreo jeē ní cacandíje i ya:

Te núu cuiñi nīhin rō jīn jñūhun steén rī nuū rō, te cuu ndije rō ñáyuu scuáha jīn rī. <sup>32</sup> Te jecūhun ni rō jñūhun ndaā, te jñūhun ndaā un sáha jeē nduu libre rō nuū jeē yñi rō ndaha.

<sup>33</sup> Te ni cacahān i jīn yá:

Sēhe yucūn Abraham cácuu ri, te tu cáyihí cuiñi rī ndaha ni ñn. ¿Te ndese cúu jeē cahān rō jeē nduu libre rī núu súcuán?

<sup>34</sup> Te ni cahān Jesús:

Jendaá cahān rī jīn rō jeē táca ñáyuu casáha cuéchi, tu íyó libre i, chi yñi i chíji cuéchi jeē jejniñu cáhá i nuū. <sup>35</sup> Te ñayuu jejniñu cáhá, chi tu cúu i ñn jnáhan ñayuu vehe nuū jejniñu i. Te ñn sēhe chí sa suhva cúu ndije i jnáhan ñayuu vehe ún. <sup>36</sup> Núu súcuán te máá rí jeē cúu Sēhe Yaā Dios, núu sáha ri jeē tuá cuajniñu cáhá rō nuū cuéchi, núu súcuán te nduu libre ndije rō jijnáhan rō, te cuu rō sēhe ya. <sup>37</sup> Te jini rī jeē sēhe yucūn Abraham cácuu rō, te vēsú súcuán te cácuni rō cahni rō ruhū, chi tu cájetáhú rō jñūhun cáhán rī. <sup>38</sup> Ruhū chí cáhán rī jñūhun jeē ni steén Tátá rī nuū rī. Te máá rō chí casáha rō jniñu jeē ni cáhān tátá máá rō jijnáhan rō. Achí yá.

<sup>39</sup> Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje rō nájñūhun ni candíje Abraham návāha cuu ndije rō yúcūn de, yūcuán na te jniñu váha ni sáha de suni sáha máá rō nuū. <sup>40</sup> Te vijna chí cácuni rō cahni rō ruhū, vēsú ni cahān rī jīn rō táca jñūhun ndaā ni steén Tátá rī nuū rī. Te Abraham chí tu ní sáha cuiñi de súcuán. <sup>41</sup> Máá rō chí inuú casáha rō jīn tátá máá rō. Achí yá jīn i.

Yūcuán na te ni cacahān i:

Máá rí chí tu cácuu ri sēhe ndáhú jēe tu tátá. Chí íyó ñn-ni tátá rī, te Yaā Dios cúu ya.

<sup>42</sup> Te ni cahān Jesús:

Núu Yaā Dios cúu ndije tátá rō, te coo manī rō jīn rí nuú. Chí nde nuū Yaā Dios ni quenda ri vēji ri. Te tú vēji ri jeē cuni máá rí, chí máá yá ni tají rúhū. <sup>43</sup> ¿Te najehē tu cájecūhun ni rō jñūhun cáhán rī núu súcuán? Suu siquī jeē tu cácuni rō chusóhó rō jñūhun nácani rī. <sup>44</sup> Máá rō jijnáhan rō chí tátá rō cúu jexeén. Te cácuni rō sáha rō máá jēe cuni tátá rō ún. Máá jexeén ni jehni ndīyi nde jeē xīhna ñúhún. Te tu ní ín cuiñi jīn jñūhun ndaā, te tú cuiñi na jñūhun

ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní squéjéé ndihi jnūhun stáhú. <sup>45</sup> Te ruhū chí cáhán rī jnūhun ndaā, te jeē yúcuan cúu jeē tu cácandíje ró rúhū. <sup>46</sup> Te ni ñin ró ma nihín rō cuēchi siquī rī, chí tú cuiti na cuēchi ri. Te máni jnūhun ndaā cahán rī, ¿te naun tu cácandíje ró rúhū? <sup>47</sup> Ñayuu cácuu séhe Yaā Dios, chí cáchusóhó i jnūhun Yaā Dios. Te nasūu séhe Yaā Dios cácuu ró, te jeē yúcuan tu cácuni rō chusóhó ró. Achí yá jíin de.

### *Iyó Jesús nde ná tu coo Abraham*

<sup>48</sup> Yūcuán na te ni cacahán jnāhan ñuu yā hebreo un:

Ndaā cacahán rī jeē canéé ró nájñūhun ñayuu Samaria, te ñūhun tachī ini rō.

<sup>49</sup> Te ni cahán Jesús:

Tu ñūhun tachī ini rī, chí yíñúhún rí jíin Tátá rī. Te máá ró jijnáhan ró chí tu cáhīyo yíñúhún ró jíin rí. <sup>50</sup> Máá rí tu ndúcu rí jeē cujéhnu rī. Iyó ñin jeē sáha jeē cujéhnu rī, te máá yá sándaā siquī jnūhun cacahán rō. <sup>51</sup> Jendaá cahán rī jíin ró, núu ndé ñayuu squícu jnūhun cáhán rī, ma cúu cuiti i. Achí yá.

<sup>52</sup> Te tēe hebreo un tu ní cájecūhun ni de, te ni cacahán de:

Vijna te ni cacacáhnū ni rī jeē ñūhun ndije tachī ini rō. Chí Abraham jíin táca tēe ni canacani jnūhun Yaā Dios nde jenahán, ni cajihī de. Te róhó cáhán rō, núu ndé vé squícu jnūhun cáhán rō, te ma cúu cuiti i, achí ró. <sup>53</sup> ¿Te chí jéhnū ga ró vēsú jíi yō Abraham naún? Chí ni jihī de, te suni ni cajihī táca tēe ni canacani jnūhun ya. ¿Te ndé ñin ga sáha ró máá ró núu súcuan? Achí de.

<sup>54</sup> Te ni cahán Jesús:

Núu ruhū sajuhnu rī maá rí, te tu níhín jniñū. Máá Tátá rī cúu jeē sajuhnu ruhū. Te cacahán rō jeē maá yá cúu Yaā Dios maá ró. <sup>55</sup> Te vēsú súcuan te tu cájini rō ndese Yaā cúu ya. Te ruhū chí jíin rī yā. Te núu cahán rī jeē tu jíin rī yā, te cuu rí tēe stáhú nájñūhun máá ró jijnáhan ró. Te tuú chí jíin ndije rí yā, te squícu rí jnūhun cáhán yā. <sup>56</sup> Te jíi ró Abraham ni cusī ni de jeē coto de quivī quéē rī. Te je ni jito de, te ni jito rí jeē ní cusī ndasí ni de. Achí yá.

<sup>57</sup> Yūcuán na te ni cacahán tēe hebreo un jíin yá:

Ni ná tu coo ró uū xico uxí cuiyā, ¿te ndese cúu jeē cahán rō jeē ní jito ró núu Abraham? achí de.

<sup>58</sup> Te ni cahán Jesús:

Jendaá cahán rī jíin ró jeē nde ná tu cacu Abraham te je iyó rí, achí yá.

<sup>59</sup> Yūcuán na te ni caquihin de yūu jeē cuáha de xinī yā. Te Jesús chí ni quenda sāhi yá ni yāha ya mēhñú de, ni quenda ya ini templo cuahán yā.

### *Jeē ní nasávāha ya ñin tēe ni cacu cuáá*

## 9

<sup>1</sup> Te jeē jíca Jesús cuahán yā, te ni jito ya nuū ñin tēe ni cacu cuáá. <sup>2</sup> Te tēe cáscuáha jíin yá ni cacajñūhún de ya:

Maestro, ¿naun ni cacu cuáá tēe yáha? ¿A cuēchi tátá de náná de cúu, chí cuēchi máá de cúu, chí naún?

<sup>3</sup> Te ni cahán Jesús:

Nasūu cuēchi máá de, ni nasūu cuēchi tátá de náná de cúu jeē ní cacu de súcuan, chí sa suhva návāha cuni ñayuu jniñū jéhnū sáha Yaā Dios jíin de. <sup>4</sup> Níní jéé cúu nájñūhun nduú ini ñayiví, te cánuú sáha rí jniñū Yaā ní tají ruhū. Chí quee tiempo jeē coo nájñūhun jecuáá, jeē tuá cuu sájniñū ni ñin. <sup>5</sup> Níní jéé iyó

rí ini ñayĩví te cúu ri luz jeē cúndijin ini anuá ñayuu ñayĩví, návaha jecūhun ni i siquĩ Yaā Dios. Achí yá.

<sup>6</sup> Te ná ni cahān yā súcuan, te ni tesĩhi yá nuū ñúhun, te ni sáha ya ndehyū jíin tesĩhi yá un, te ni tee ya siquĩ tĩnuu tēe cuáá un. <sup>7</sup> Te ni cahān yā jíin de:

Cuahān núu pila Siloé te nacate ró tĩnuu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tĩnuu de, te ni ndundijin-ni, te ni nandicó de vēji de. <sup>8</sup> Yūcuán na te ñayuu yúcu yajni jíin de, jíin ñáyuu jeē ní cajito jeē cúu de tēe cuáá, ni cacajñūhun jñáhan i:

¿A násūu tēe yáha cúu jeē ndeé-ni yáhá te jíicán caridad?

<sup>9</sup> Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

<sup>10</sup> Yūcuán na te ni cacajñūhún i de:

¿Te ndese cúu jeē ní nanune tĩnuu ró núu súcuan?

<sup>11</sup> Te ni cahān de:

Tēe nání Jesús ni sáha de ndehyū, te ni tee de tĩnuu rí, te ni cahān de jíin rí: Cuahān núu pila Siloé te nacate ró tĩnuu ró. Te ni jehēn rĩ, te ni nacate ri, te ni nanune-ni tĩnuu rí, achí de.

<sup>12</sup> Yūcuán na te ni cacajñūhún i de:

¿Ndé nuū íne tēe ún? áchí i.

Tu jíiní rĩ, achí de.

### *Jeē ní castíchí tēe fariseo tēe ni cacu cuáá*

<sup>13</sup> Yūcuán na te ni cajendeca i tēe ni Iyo cuáá un núu tēe grupo fariseo. <sup>14</sup> Te quivĩ ndétātu cúu jeē ní sáha Jesús ndehyū jeē ní nanune ya tĩnuu de. <sup>15</sup> Te tēe fariseo un ní cacajñūhún tucu de tēe ún ndese ni nanune tĩnuu de. Te ni cahān de:

Ni tee de ndehyū siquĩ tĩnuu ná, te ni nacate ná, te ni ndundijin-ni tĩnuu ná, achí de.

<sup>16</sup> Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu nēe íi de quivĩ ndétātu.

Te sava ga de chi ni cacahān:

¿Ndese cuu sáha tēe un táca jniñu jéhnú yáha te núu tēe íyo cuéchi cúu de?

Te ni cacusñin de siquĩ yā. <sup>17</sup> Te ni cacajñūhún tucu de tēe ni Iyo cuáá un:

Róhó, ¿ndese cáhán rō siquĩ tēe ni nanune tĩnuu ró núu súcuan?

Te máá de ni cahān de:

Íin tēe nácani jñūhun Yaā Dios cúu de, áchí de.

<sup>18</sup> Te tēe hebreo un chi tu ní cácanđije de jeē ní Iyo cuáá tēe ún te ni ndundijin tĩnuu de. Te ni cacana xinĩ tatá de náná de. <sup>19</sup> Te ni cacajñūhún de:

¿A yáha cúu sēhe ro jēe ní cacu cuáá cácahān rō? Núu súcuan ¿te ndese ni ndundijin tĩnuu de vijna? áchí.

<sup>20</sup> Te ni cacahān tatá de náná de:

Suu sēhe ri cúu tēe yáha jēe ní cacu cuáá. <sup>21</sup> Te tu cájini rĩ ndese ni ndundijin tĩnuu de vijna, ni tu cájini rĩ ndé tēe ni nanune tĩnuu de. Cajñūhun ró máá de, chi je jéhnú de, te na cáchi máá de.

<sup>22</sup> Súcuan ni cacahān tatá de náná de, chi cáyūhú de cájito de jñáhan de tēe hebreo. Chi je ni casándaā tēe un jēe núu ndé ñáyuu cachi í jeē Jesús cúu Cristo,

Yaā ní tají Yaā Dios, te quenehen de i jeē ma cúu ga quiv̄i i ini vehe ñi sinagoga.  
<sup>23</sup> Jeē yúcuán ní cacahān tatá de náná de: Cajnūhun ró maá de, chí je jéhn̄u de.

<sup>24</sup> Yūcuán na te tēe hebreo un ní cacana tucu de tēe ni ñyo cuáá un. Te ni cacahān de jíin:

Cachi cají ró nuū rī, jito jíinū Yaā Dios. Chí cājini rī jeē tēe íyó cuéchi cúu tēe ni nanune tinūu ró.

<sup>25</sup> Yūcuán na te ni cahān de:

Tu jíni na núu íyó cuéchi de, chí naún. Te íyó ñn jeē jíni ná, cúu jeē tēe cuáá ní cuu ná, te vijna chí ni ndundijin tinūu ná. Achí de.

<sup>26</sup> Te ni cacajnūhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuán?

<sup>27</sup> Te ni cahān de:

Je ni cuu ni castūhun ná nuū ní, te tu ní cáconi ní cuatáhú ní. ¿Te najehē cáconi ni jéē cáchi tucu ná nuū ní? ¿Te chí suni cáconi ni jíināhan ní candíje ní yá naún?

<sup>28</sup> Yūcuán na te ni cacahān neé jíin de, te áchí:

Máá ró chí candíje ró tēe ún, te máá rí chí cácondíje ri Moisés. <sup>29</sup> Te cājini rī jeē ni cahān Yaā Dios jíin Moisés. Te tēe yúcuán, ni tu cājini rī ndé nuū véji de.

<sup>30</sup> Te ni cahān tēe ni ñyo cuáá:

Náa ni na jéē cácahān ni jéē tu cājini ní jeē véji de nuū Yaā Dios, vēsú ni nanune de tinūu ná. <sup>31</sup> Te cājini yō jeē Yaā Dios tu jíni nahín yá jeē cájicān ñayuu íyó cuéchi. Chí jíni nahín yá nuū maá-ni ñayuu jeē cáchiñúhún i ya te cása ha i jeē cuní yá. <sup>32</sup> Te ní véji yó te tu ní jíni sōho cuiti yō jeē ñn tēe nanune de tinūu inga tēe ni cacu cuáá. <sup>33</sup> Te núu nasūu ndé nuū Yaā Dios véji tēe ún, te ma cúu cuiti sáha de ñn jniñu súcuán. Achí de.

<sup>34</sup> Te ni cacahān tēe hebreo un:

Róhó chí íyó ndasí cuéchi ró ndé quiv̄i ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe ñi sinagoga.

### *Siqūi ñayuu cáh̄yo cuáá ánuá*

<sup>35</sup> Te ni jini jnūhun Jesús jeē ní caquenehen de tēe ún. Te ni nihīn jnāhan ya jíin de, te ni cahān yá jíin de:

¿A candíje ró Séhe Yaā Dios?

<sup>36</sup> Te ni cahān de:

¿Ndé ñn cúu ya návāha candíje ná yá?

<sup>37</sup> Te ni cahān Jesús:

Je ni jito ró núu yá, te suu cúu ruhū jeē cahán jíin ró, achí yá.

<sup>38</sup> Yūcuán na te ni jecuiñ̄i yit̄i de nuū yá, te ni cahān de:

Candíje ná jéē nihín cúu Jítoho ná.

<sup>39</sup> Te ni cahān Jesús:

Véji ri ini ñayiv̄i yáha jéē sándaā rī siqūi ñáyuu. Chí ñayuu jeē nájnūhun cácuáá ánuá, ndundijin ini ánuá i jeē jécūhun ni i siqūi rī. Te ñayuu jeē jéni ni i jeē cájecūhun ni i, nájnūhun nducuáá ánuá i. Achí yá.

<sup>40</sup> Te sava tēe fariseo jeē cáh̄in jíin yá, ná ni cajini de jnūhun yáha, te ni cacahān de jíin yá:

¿Te chí jéni ni ró jeē suni tēe tu cájecūhun ni cácuu máá rí naún?

<sup>41</sup> Te ni cahān Jesús:

Núu jeē cácuu ró tée tu jécūhun ni nuú, te ma cóo cuēchi ró. Te siquī jeē ni cacahān rō jeē cájecūhun ni rō, te tu cájetáhú ró, jeē yúcuau condee cuēchi siquī rō.

### *Jnūhun yátá siquī lanchi*

## 10

<sup>1</sup> Jendaá cahán rī jīn ró, núu yīhi lanchi ini corral cánevāha cáhnu ñayuu, te núu ndé tée tu quívi de ichi yéhyí corral un, chí sa suhva inga lado cáa de quívi de, tēe un cúu ñacuīhná, chí vēji jeē sacuíhná. <sup>2</sup> Te tēe quívi ichi yéhyí, chí tēe un cúu pastor ndíto lanchi. <sup>3</sup> Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhvi lanchi máá de, te táva de tī. <sup>4</sup> Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquīn tī de, chí nácuni tī tachī de. <sup>5</sup> Te ma cóndiquīn tī yatá inga tēe, chí sa suhva cunu tī coto tī de, chí nácuni tī jeē nasūu jítoho tī cúu.

<sup>6</sup> Jnūhun yátá yáha ní cahān Jesús jīn ñayuu, te tu ní cájecūhun ni i na jnūhun cúu jeē ni cáhān yā.

### *Jesús cúu máá pastor vāha*

<sup>7</sup> Yūcuán na te ní cahān gā Jesús jīn i:

Jendaá cahán rī jīn ró: Máá rī cúu nájñūhun yéhyí corral nuū quívicoo ñayuu cácuu nájñūhun lanchi rī. <sup>8</sup> Tāca tēe jeē tu ní táji Yaā Dios, jeē ní quijicoo de nde ná tu quee rī, cácuu de nájñūhun ñacuīhná, chí tu ní cástéen de jnūhun ndaā. Te ñayuu cácuu nájñūhun lanchi rī, tu ní cájetáhú i de. <sup>9</sup> Máá rī cúu nájñūhun yéhyí. Te ñayuu jeē jīn máá rī quívicoo, jnama rī i. Te cuu i nájñūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

<sup>10</sup> Tēe cuīhná chí máni vēji de jeē sacuíhná de lanchi, te cahni de, te snáá de. Te ruhū chí vēji rī návāha cotecu ñayuu cácuu lanchi rī, te nde yōhvo vāha ndetū coo i. <sup>11</sup> Máá rī cúu máá pastor vāha. Te pastor vāha chí ndíto vāha de lanchi de, vēsú nde cuu de jeē siquī tī. <sup>12</sup> Te ñin tēe yíyāhu, nasūú pastor tī cúu de, chí nasūú lanchi máá de cúu tī. Te núu jíto de jeē vēji yīhī, te stóo de lanchi, te jīnu de cuahān de. Te yīhī chí jnā tī lanchi, te sáha tī jeē jité núu lanchi. <sup>13</sup> Te tēe yíyāhu ún chí jīnu de cuahān de siquī jeē lanchi tátú cúu jeē ndíto de, te jeē yúcuau tu cúndáhú ni de tī.

<sup>14</sup> Máá rī cúu máá pastor vāha. Te jíní rī tāca ñayuu cácuu nájñūhun lanchi rī, te máá i cájini i ruhū. <sup>15</sup> Te yāha cúu nájñūhun jeē Tatá rī jíní yā ruhū, te máá rī jíní rī Tatá rī. Te cuu rī jeē siquī ñayuu cácuu lanchi rī. <sup>16</sup> Te suni iyó gā ñayuu jeē cácuu lanchi rī, te sán sán ñayuu cácuu i. Te cánuú jēe suni condeca rī ñayuu ún. Te cuatáhú i jnūhun cáhān rī. Te coyūcu cáhnu-ni ndíhi ñayuu candíje, te coo ñin-ni pastor i.

<sup>17</sup> Te Tatá rī manī ndasí yá jīn rī siquī jeē jéhe rī máá rī jeē cúu rī jehē ñayuu, te natecu tucu rī. <sup>18</sup> Ni ñin ma cúu cahni ruhū, chí máá rī cúu jeē jéhe jnūhun cuu rī. Jeē cachí máá rī te cuu rī, te jeē cachí máá rī te natecu rī, chí súcuau iyó poder rī. Súcuau ni cahān Tatá rī jeē sáha rī. Achí yá.

<sup>19</sup> Te jeē ní cajini jnāhan ñuu yā hebreo jnūhun yáha, te ni cacusān tucu i. <sup>20</sup> Te cuehē i ni cacahān:

¿Naun cáchusóhó ró jeē cahán de? Chí ñúhun tachī ini de, te ni tīvi xíní de.

<sup>21</sup> Te sava ga i ni cacahān:

Tu súcuau cáhān tēe ñúhun tachī ini, nájñūhun cáhān tēe yáha. Te tēe ñúhun tachī ini, ¿á cuu nanune de tīnūu tēe cuáá naún? Achí.

*Jeē ní casquéhichī i Jesús*

<sup>22</sup> Te tiempo mǐjin cúu, te ñuu Jerusalén cánasáha ñayuu vico jeē cánucūhun ni i quivī ní cuhī templo cáhnu. <sup>23</sup> Te jíca cuu Jesús ini templo, ini corredor jeē naní Salomón. <sup>24</sup> Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachi cají núu rī jijnáhan ri núu máá ró cúu Cristo.

<sup>25</sup> Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejniñu Tátá rī ruhū sáha ri, yūcuan stéén cají jéē máá yá ni tají rúhū. <sup>26</sup> Te tu cá candíje ró, chi nasūú lanchi ri cácuu ró, nájnūhun je ni cahān rī jíin ró. <sup>27</sup> Ñayuu cácuu lanchi ri, chi nácu ni jeē máá rí cúu jeē cahán jíin i. Te jíni rī i, te cándiquin i ruhū. <sup>28</sup> Te cotecu i ní cáni sáha ri, te ma jnahnú ndetú cuiti i. Te ni ñn ma cúu quende i ndaha ri. <sup>29</sup> Máá Tátá ri ni squíví ya i ndaha ri. Te cújéhnu ga máá yá vésú táca gá. Te ni ñn ma cúu quende i ndaha ya. <sup>30</sup> Máá rí jíin Tátá rī, chi ñn-ni cúu ri, achí yá.

<sup>31</sup> Yūcuán na te jnáhan ñuu yā hebreo ni caquihin tucu de yuū jeē cuáha de xinī yā. <sup>32</sup> Te ni cahān yā jíin de:

Ni stéén rī cuehē jniñu váha nuū rō jeē ni sáha ri jíin poder Tátá rī. ¿Te á síquī jeē ni sáha ri jniñu váha cúu jeē cuáha ró yúu xinī rī núu súcuan? Achí yá.

<sup>33</sup> Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xinī rō, chi síquī jeē cahán ndeváha ró jéē achí ró jeē inuū cúu ró jíin Yaā Dios. Chi tēe-ni cúu ró, te sáha ró jéē inuū cúu ró jíin Yaā Dios. Achí de jíin yá.

<sup>34</sup> Te ni cahān Jesús:

Yósó núu tútu ley cáneváha ró jéē ni cahān Yaā Dios: Nájnūhun yaā cácuu ró, achí Yaā Dios, achí tutu. <sup>35</sup> Chi ñayuu jeē ní cajetáhú jnūhun ya, ni cahān yā jeē cácuu i nájnūhun yaā. Te cájini yō jeē ma cúu cahān yō jeē tú ndaā jnūhun cáhán tutu i. <sup>36</sup> Núu súcuan ¿te naun cácahān rō jeē jnūhun ndeváha cúu jeē ni cahān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu i, te ni tají yá ruhū vėjí ri ini ñayíví. <sup>37</sup> Núu tu sáha ri jniñu sáha Tátá rī, núu súcuan te ma cándíje ró rúhū. <sup>38</sup> Te núu sáha ri, te vésú tu cá candíje ró rúhū, te na cándíje ró síquī jniñu sáha ri ún. Te súcuan te cucáhnu ni rō jeē ñn-ni cúu Tátá rí jíin rí, te ñn-ni cúu ri jíin Tátá rí. Achí yá.

<sup>39</sup> Yūcuán na te cánducú tucu de jni de ya. Te ni ndoñúhún-ni ya cuahān yā.

<sup>40</sup> Te cuanuhun yā yūte Jordán ichi núu cáne niándii, nuū ni íne Juan ni scuándute de. Te ni condee yā yūcuán. <sup>41</sup> Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vésú tu ní sáha Juan ni ñn jniñu jéhnu, te ni cundaā ndihi jnūhun ni cahān de síquī ndese sáha tēe yáha. Achí i.

<sup>42</sup> Te cuehē ñayuu jeē ni jéngoo nuū yā yūcuán, ni cacandíje i ya.

*Jeē ni jhī Lázaro***11**

<sup>1</sup> Te ni íyo ñn tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. <sup>2</sup> Te María un jéē cúu cuáha Lázaro, suu ña cúu jeē ní chíhi aceite perfume jehē Jitoho yō, te ni nasíchí ña jíin ixí xíní ña.

<sup>3</sup> Te ndíndúú cuáha de un ní catají ña jnūhun cuahān nuū Jesús:



Tēe jeē maní ni jíin, cúhú de, áchí ña, áchí mozo.

<sup>4</sup> Te ná ni jini Jesús jnūhun, te ni cahān yā:

Cuehyī yáha chí nasūu cuehyī jeē ví cuu de cúu. Chí sa suhva sáha Yaā Dios jeē cuní ñayuu ndese cújéhnū ya. Chí ruhū, Sehe Yaā Dios, jíin cuehyī yáha te stéén rī jeē suni cújéhnū máá rí. Achí yá.

<sup>5</sup> Te maní Jesús jíin Marta jíin cúhū ña jíin Lázaro. <sup>6</sup> Te vēsú súcuan te nuū ni níhīn yā jnūhun jeē cúhú de, te ni quendōo ya uū gā quivī nuū ndeé yá un.

<sup>7</sup> Yūcuán na te ni cahān yā jíin tēe cáscuáha jíin yá:

Na quihín tucu yó región Judea.

<sup>8</sup> Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnāhan yó hebreo cuāha de yuū xinī ní. ¿Te cúní ní quihín tucu ní yúcuan naún? Achí de.

<sup>9</sup> Te ni cahān Jesús:

Ma cúu cahni ñayuu ruhū núu ná tu quee máá quivī cuu rī. Chí jeē iyó rí ñayivī yáha cúu nájñūhun jeē iyó úxī uū hora iin nduú. Te jeē sáha rí jeē cuní Yaā Dios, cúu rí nájñūhun tēe jeē jíca nduú, te tu cáchihi de jehē de, chí cúndijin nuū de ñayivī yáha. <sup>10</sup> Te tēe jeē tu sáha jeē cuní Yaā Dios, chí nájñūhun jíca de jecuāa, te nájñūhun cáchihi de jehē de, chí tu cúndijin ini anuá de. Achí yá.

<sup>11</sup> Yūcuán na te ni cahān tucu ya:

Amigo yō Lázaro quixí de, te quihín rī sáha rí jeē nátahū ni de. Achí yá.

<sup>12</sup> Yūcuán na te tēe cáscuáha un ní cacahān de:

Núu quixí de te jíní yō jeē nduvāha de.

<sup>13</sup> Te Jesús chí súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de. <sup>14</sup> Yūcuán na te ni cahān cají yá:

Je ni jihī Lázaro. <sup>15</sup> Te cúsi ní rí jeē tu ní cóyūcu yó yūcuán, návāha vāha ga candije ró jéé coto ró jniñū jéhnū sáha rí. Núu súcuan te na quíngoo yó núu ndíyī ún. Achí yá.

<sup>16</sup> Yūcuán na te Tomás, tēe cúu cuatí, ni cahān de jíin jnāhan de jeē cascuáha jíin yá:

Suni na quíngoo yó návāha cuu yō jíin yá, achí de.

### *Jesús cúu jeē sáha jeē nátecu te cotecu ní cáni*

<sup>17</sup> Te nuū ní quee Jesús, te jíní yā jeē ní cuu cuūn quivī yíndūji Lázaro. <sup>18</sup> Te yajni-ni íne ñuu Betania jíin ñuu Jerusalén, nájñūhun uū kilómetro yosáva. <sup>19</sup> Te Marta jíin María, ní quecoo cuehē jnāhan ña hebreo jeē cahán i jnūhun ndeyí ní jíin ña jeē siquí jeē ní jíhī cuāha ña. <sup>20</sup> Te nuū ní jini Marta jeē véji Jesús, te ni quenda ña cuajnahān ña ya. Te María chí ni ndōo ña vehe. <sup>21</sup> Te ni cahān Marta jíin Jesús:

Núu ní iyo ní yáha, te ma cúu cuāha ná núu. <sup>22</sup> Te vēsú súcuan te jíní na jéé tāca jéé cacán ní núu Yaā Dios, te sáha ya, achí ña.

<sup>23</sup> Te ni cahān Jesús jíin ña:

Natecu cuāha ró.

<sup>24</sup> Te ni cahān Marta:

Jíní na jéé nátecu de quivī nátecu tāca ndíyī nde quivī jínu ñayivī.

<sup>25</sup> Te ni cahān Jesús:

Máá rí cúu Yaā sáha jeē nátecu jíin jéé cótecu ní cáni. Ñayuu candije jeē jnāma rí i, vēsú na cúu i, te natecu i. <sup>26</sup> Te ñayuu cátecu te cándije i ruhū, cotecu i ní cáni andiví. ¿A cándije ró jnūhun yáha? Achí yá.

<sup>27</sup> Te ni cahān ña:

Cándije ná jéē maá ní cúu Cristo, Sêhe Yaā Dios, jeē achí tutu jeē quíji ini ñayīvi, áchí ña.

*Jeē ni ndáhyū Jesús nuū yíndūji Lázaro*

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, áchí ña.

29 Te jeē ní jini María jñūhun yáha, te yachí ni ndocuñī ña, cuahān ña nuū yā. 30 Te ná tu quīvi Jesús ñuu, chí ni ndōo-ni ya nuū ni jéjnahan Marta yā. 31 Te ñayuu hebreo un jéē cáyūcú ini vehe jíin María, jeē cácahān i jñūhun ndeyi ni jíin ña, ni cajito i jeē yachí ni ndocuñī ña cuahān ña. Te ni candiquin i ña cuangoo i, chí cájeni ni i jeē cuándahyū ña nde nuū yíndūji ndīyi.

32 Yūcuán na te ni jinū María nuū íne Jesús, te ni jecuiñī yitī ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

33 Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhū ni yā i. 34 Te ni cajñūhun yā ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

35 Te ni ndahyū Jesús. 36 Yūcuán na te ni cacahān ñayuu hebreo un:

Condēhe náa yōhyo manī de jíin ndíyi ún.

37 Te sava i chí ni cacahān i:

Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? áchí i.

*Jeē ní natecu Lázaro*

38 Te yōhyo ni jnahuhū ni tucu Jesús, te ni quee yā nde nuū yíndūji ndīyi. Te ñin yaū cava cúu, te yuyáú un ndíhyú ñin yuū. 39 Te ni cahān yā:

Tejiyo yuū un jíjnahan ró, áchí yá.

Te Marta, cuāha ndīyi un, ní cahān ña:

Je jéén xicō de, chí je ni cuu cuñn quivī yíndūji de.

40 Te ni cahān Jesús jíin ña:

¿A násúú je ni cahān rī jíin ró jeē núu candije ró te coto ró jéē yōhyo cújéhu Yaā Dios jíin poder yā? áchí yá.

41 Yūcuán na te ni catejiyo i yuū jeē ndési yuyáú ndīyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. 42 Te jíin na jéē niní sáha ní jéē jicán na. Te jeē váha ñayuu cáhīn yáha cúu jeē súcuan cáhān na, návāha na cándije i jeē maá ní ni tají sáña.

43 Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

44 Te ní quenda-ni tēe ní jihī ún, te ñúsúcún ndaha de sīhīn de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

*Jeē ní casquijnáhan de jñūhun jeē cáhni de Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. <sup>46</sup> Te sava i chi cuangoo i nuū tée grupo fariseo, te ni cacastühún i ndese ni sáha Jesús. <sup>47</sup> Yūcuán na te tēe fariseo un jín sūtū cácujuhnu ni candutútú de junta jín táca gá tēe cácujuhnu. Te ni cacahān de:

¿Ndese sáha yó? Chi tēe ún yōhyo cuehē jniñu jénu sáha de. <sup>48</sup> Te núu condēhé-ni yó, te ndivii ñayuu candíje i de. Te quijicoo táca tée nación Roma jeē cácujuhnu, te canu de templo cáhnu yó, te scuíté núu de ñayuu nación yō, achí de jijnáhan de.

<sup>49</sup> Te ñin jnáhan de jeē naní Caifás, jeē cúu máa sūtū cujuhnu ga cuiyā ún, ni cahān de:

Róhó chi tu cájini cuiti rō, <sup>50</sup> ni tu cájecūhun ni rō jeē váha ga jeē cúu ñin tēe jehē ñayuu nación yō vēsú jeē náa ndivii i, áchí de.

<sup>51</sup> Te tu ní cáhán de jñūhun yáha jéē jéni ni maá de. Chi siquī jeē cúu de sutū cujuhnu ga cuiyā ún, te ni sáha Yaā Dios jín de jeē ní nacani de jñūhun jeē cúu Jesús jehē ñayuu nación hebreo. <sup>52</sup> Te nasūu máa ñin-ni jehē nación hebreo, chi suni jehē ndivii ñayuu cácu sēhe Yaā Dios jeē ní cajitē núu táca nación, návāha ñin na cuu i jijnáhan i. <sup>53</sup> Yūcuán na te nde quivī ún te táca tée hebreo cácujuhnu un, ní casquijnáhan de jñūhun jeē cáhni de Jesús.

<sup>54</sup> Jeē yúcuan tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā ñin ñuu naní Efraín, nuū iyó yajni ñuhun téhé. Te ni condee yā yúcuan jín tée cáscuáha jín yá.

<sup>55</sup> Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundo i nuū Yaā Dios, te sáa te quejéé vico pascua. <sup>56</sup> Te cánanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiji de vico, chí tuú? Achí i.

<sup>57</sup> Te sutū cácujuhnu jín tée fariseo ni candacu de jniñu jeē núu ndé ñin ñayuu jiní ndé nuū íne ya, te na cástühún i, návāha jñi de ya.

*Jeē ní chuhun María perfume jehē Jesús  
(Mt. 26.6-13; Mr. 14.3-9)*

## 12

<sup>1</sup> Te cúmanī iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. <sup>2</sup> Te ni casáha i ñin vico xíni jeē yiñúhún i jín yá. Te Marta ni jeni ña cohō. Te Lázaro yeji de staā jín yá nuū mesa jín táca gá ñayuu. <sup>3</sup> Yūcuán na te María ni quee ña jín nájñūhun sava litro aceite perfume jeē máni ita nardo cúu, te yōhyo yahu ndéé. Te ni chuhun ña jehē Jesús, te ni nasíchí ña jín xí ña. Te ní ñi vehe un ní chitú xicō perfume un. <sup>4</sup> Yūcuán na te ni cahān Judas Iscariote sēhe Simón, ñin tēe scuáha jín yá un, te suu de cúu jeē nastúu de ya:

<sup>5</sup> ¿Najehē tu ní cúyāhu perfume yáha jéē uní ciento denario, te cuāha yó núu ñayuu ndahú núu. Achí de.

<sup>6</sup> Súcuan ni cahān de, nasūu jéē cundáhú ndije ni de ñayuu ndahú, chi sa suhva jeē cúu de tēe cuíhna. Chi máa de ndíso yijni xūhún, te quíhin cuíhna de jeē cájequin táca tée ún. <sup>7</sup> Yūcuán na te ni cahān Jesús:

Ma stáhān rō ña. Chi jeē ní sáha ña yāhá cúu jeē ní sātūhva ña ruhū nde quivī jeē quíndūji ri. <sup>8</sup> Chi níní cáyūcu ñayuu ndahú jín ró, te ruhū chí tuá condee rí jín ró. Achí yá.

*Jeē ní casquínáhan de jnūhun jeē cahni de Lázaro*

<sup>9</sup> Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā. <sup>10</sup> Yūcuán na te sutū cácujeñnu ni casquínáhan de jnūhun jeē suni cahni de Lázaro. <sup>11</sup> Chi jeē siquí Lázaro te ni cujiyo cuehē jnáhan ñuu de hebreo nuū de, te cácanđe i Jesús.

*Jeē ni quívi Jesús Jerusalén*

*(Mt. 21.1-11; Mr. 11.1-11; Lc. 19.28-40)*

<sup>12</sup> Te inga quívi ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. <sup>13</sup> Te ni cajehnde i ndaha ñúú, te ni quendacoo i cuajnáhan i ya. Te cácana jee i:

Yōhyo cújéñnu Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

<sup>14</sup> Te ni nihin Jesús ñn burro, te ni jecosó yā tī, nájnūhun cáhán tutu ñ:

<sup>15</sup> Ñayuu ñuu Jerusalén jeē nani ñuu Sion, ma yūhu ró jijnáhan ró. Yāhá condēhe ró jeē véji Rey rō, te yósó yá ñn burro.

Achí tutu.

<sup>16</sup> Te quívi ún te tēe cáscuáha jíin yá, tu ní cájecūhun ni de jeē súcuan squícu táca jée yosó núu tútu ñ. Te nde ná ni ndujéñnu Jesús jeē cuánuhun yā andívi, te sáa te ni canucūhun ni de táca jnūhun yósó síquí yā, jíin jēe ní casáha de súcuan jíin yá.

<sup>17</sup> Te ñayuu ní cahñin jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jnūhun ndese ni sáha ya. <sup>18</sup> Jeē yúcuan ní quendacoo ñayuu cuehē un, ní jejnahan i ya, chi ni cajini jnūhun i jeē ni sáha ya jniñu jéñnu un jēe ni steén yā poder yā. <sup>19</sup> Yūcuán na te ni cacahān máá tēe fariseo:

Vijna te je ni cajito yó jēe ma cúu cuiiti gā casi yō. Chi jító yó jēe ndíviui cuiiti ñayuu cuangoo i jíin de. Achí de jijnáhan de.

*Ñayuu nación Grecia nánducú i Jesús*

<sup>20</sup> Te sava ñayuu nación Grecia, suni ni quijicoo i ñuu Jerusalén vico pascua un jēe chiñúhún i Yaā Dios. <sup>21</sup> Te ni quecoo i nuū Felipe, tēe ñuu Betsaida ndañúu Galilea. Te ni cacahān i jíin de:

Tátā, cácuni ná cahān na jíin Jesús, achí i.

<sup>22</sup> Te ni jehēn Felipe, ni castúhún de nuū Andrés. Te ndíndúú de cuacastúhún de nuū Jesús. <sup>23</sup> Te ni cahān Jesús jíin de:

Je ni quee quívi jeē ndujéñnu Yaā ní nduu tēe. <sup>24</sup> Te jendaá cahán rī jíin ró, ñn nunī trigo núu tú ñngava nuū ñúhun te quindūji, núu súcuan te quendōo máá ñn-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. <sup>25</sup> Te na-ni ñayuu núu tu jéhe i jnūhun ndoho i jeē síquí ruhū, te jnahnū ndetū i. Te ñayuu jeē jéhe i jnūhun ndoho i jeē síquí ruhū ini ñayívi yáha, cotecu i ní cáni andívi. <sup>26</sup> Núu ndé ñayuu cuní i cuajniñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejniñu nuū rī. Te ñayuu jejniñu nuū rī, chi sáha Tátā rī jeē cujéñnu i.

*Jeē ni cáhān Jesús jeē cuu yā*

<sup>27</sup> Te vijna te cúcuíhyá ndasí ni rī sáha jnūndóho quiji síquí rī. ¿Te ndese cahān rī? ¿A cahān rī jíin Tátā rī: Jnama ní sáña núu jnūndóho jeē quíji síquí

ná, achi rī? Ma cúu, chi jeē siquí yúcuau cúu jeē véji ri. <sup>28</sup> Tátā, stéén ni jéé cujéhnú ndasí ní jín poder ni, áchí yá.

Yúcuán na te ichi ándiví ní cahān ĩn jnūhun:

Je ni steén rī jeē cujéhnú rī, te sáha tucu ri inga jínu, áchí yá.

<sup>29</sup> Te ni cajini ñayuu cáhĭin yúcuán, te ni cacahān i jeē taja cáhān. Te sava ga i ni cacahān:

ĭn ndajéhé Yaā Dios ni cahān jín yá.

<sup>30</sup> Te ni cahān Jesús jín i:

Tu ní cáhān jnūhun yáha jéé siquí ruhū, chi sa suhva návāha cuni rō siquí jnūhun jeē ní cáhān yā jín rī. <sup>31</sup> Vijna cúu jeē sándaā Yaā Dios siquí cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha. <sup>32</sup> Te ruhū, núu na jínu condita caa ri cuu rī ini ñayiví, te sáha ri jeē jnáā tāca ñayuu quivicoo i ndaha ri, áchí yá.

<sup>33</sup> Súcuau ni cahān yā jeē steén yā ndese modo cuu yā. <sup>34</sup> Te ni cacahān ñayuu jín yá:

Ni cajini sōho ná jéé cahān tutu ley Yaā Dios cánevāha yó, jeē Cristo cotecu yā ní cáni. ¿Te naun cáhān ni jéé Yaā ní nduu tēe, cánuú condita caa ya cuu yā? ¿Ndé ĩn cúu máá Yáá ní nduu tēe núu súcuau? Achí i.

<sup>35</sup> Yúcuán na te ni cahān Jesús:

Máá jecu na quiví condee rī jín ró jeē cúu ri luz cundijin ini anuá rō. Núu súcuau te vijna jeē iyó gá luz rī jín ró, te caca ró jín, chi sanaa ni rō te cuahān rī, te nájnūhun quendōo ró núu néé. Chi ñayuu cájica nájnūhun nuū néé, tu cájini i ndé nuū cuángoo i. <sup>36</sup> Núu súcuau te níni ndéé gá rī jín ró, te candije ró ruhū jeē cúu ri luz, návāha nduu ró ñayuu cájica jín luz, áchí yá.

Súcuau ni cahān Jesús tāca jnūhun yáha, te cuahān-ni ya, te tuá ni steén yā máá yá nuū i.

### *Jeē tu ní cá candije ñayuu hebreo jeē cúu ya Cristo*

<sup>37</sup> Te vésú cuéhē jniñu jéhnú ni sáha Jesús jeē steén yā poder yā nuū i, te tu ní cá candije i ya. <sup>38</sup> Chí squicu nahín jnūhun ni cahān Isaías, tēe ni nacani jnūhun Yaā Dios nde jenahán:

Tátā Yaā Dios, tu ní cá candije ñayuu jnūhun ni canacani ná, te tu ní cá candije i jniñu jéhnú jeē ní steén ni poder ni núu i.

Achí Isaías. <sup>39</sup> Jeē yúcuau tu ní cúu candije i, chi ni cahān tucu Isaías:

<sup>40</sup> Ni sáha ya jeē nájnūhun cáhĭyo cuáá ánuá i,

jín jéé cácuñĭni ni i,

návāha coo nájnūhun jeē tu cájito i,

te ni ma jécūhun ni i,

ni ma násāma ini i quivicoo i nuū rī,

jeē nasávāha ri anuá i nuū cuéchi i.

Achí Cristo, achí tutu. <sup>41</sup> Jnūhun yáha ní cahān Isaías, chi je ni jito de ndese yōhōyó cujéhnú Jesús, te ni cahān de ndese coo quiví jeē quíji ya.

<sup>42</sup> Te vésú súcuau te cuéhē ñayuu hebreo chí ni cacandije i ya, te suni nde jín sava tēe cándacu jniñu. Te tu ní cá cachi de jeē cá candije de ya, chí siquí jeē cáyūhú de tāca tēe fariseo. Chí núu súcuau te quenehen ún de ini vehe ĩ sinagoga jeē ma cuáha ga jnūhun quivicoo de. <sup>43</sup> Chí cácusĭ gā ni de jeē cujéhnú de sáha ñayuu, vésú jeē cujéhnú de sáha Yaā Dios.

### *Jnūhun cáhān Jesús cúu jeē sándaā siquí ñayuu*

<sup>44</sup> Te ni cahān jee Jesús:

Ñayuu cá candíje ruhū, nasūu máñúhún-ni ruhū cá candíje i, chi suni cá candíje i nde maá Tátá rī, Yaā ní tají ruhū. <sup>45</sup> Te ñayuu cájito nuū rī, suni cájito i nuū Yaā ní tají ruhū. <sup>46</sup> Máá rí jeē cúu ri luz cundíjin ini anuá ñayuu, ni quiji ri ini ñayiví návaha táca ñayuu cá candíje ruhū, ma cáca i nájnūhun nuū néē. <sup>47</sup> Te núu ñin ñayuu jíni sōho i jnūhun cáhān rī, te núu tu jétáhú i, te nasūu ruhū sándaā siquī i. Chi tú véji ri jeē ndénehen ri cuēchi siquī ñayuu ñayiví, chi sa suhva jeē jnáma ri i. <sup>48</sup> Te ñayuu jeē casquéhichí i ruhū te tu cájetáhú i jnūhun cáhān rī, iyó ñin jeē sándaā siquī i. Suu táca jnūhun jeē ni cáhān rī, jnūhun un cúu jeē ndenehen cuēchi siquī i quiiví jínu ñayiví. <sup>49</sup> Chi tu cáhān rī jeē cúu ni maá rí, chi Tátá rī, Yaā ní tají ruhū, máá yá ni ndacu jniñu nuū rī ndese cahān rí jíin ndese stéén rī. <sup>50</sup> Te jíni rí jeē jniñu ndácu Tátá rí sáha jeē cótecu ñayuu níí cáni. Núu súcuan te jnūhun cáhān rī, chi máni jnūhun jeē ní cachí Tátá rí cúu, áchí yá.

*Jeē ní nacate ya jehē tēe cáscuáha*

## 13

<sup>1</sup> Te jehíni inga quiiví te quejéé vico pascua. Te je jíni Jesús jeē ní quee quiiví jeē quénda ya ñayiví yáha quínuhun yā nuū Tátá yā. Te níni cundáhú ni yā ñayuu maá yá jeē cáyúcú ini ñayiví. Te vijna jeē jínu jeē íne ya ñayiví, te sáha ya ñin jniñu jeē stéén cají yá jeē cundáhú ni yā i.

<sup>2</sup> Te jexeén je ni squívi ini anuá Judas Iscariote sēhe Simón, jeē vijna nastúu de ya. <sup>3</sup> Te jíni Jesús jeē véji ya nuū Yaā Dios, te nuhūn yā nuū Yaā Dios, jíin jéé ni sáha Tátá yā jeē cujéhnu ya siquī ndíhi-ni. <sup>4</sup> Te cúxíni ya jíin tēe cáscuáha jíin yá, te ni ndocuñí yā. Te ni stáa ya sahma ndíi ya, te ni jihni yā ñin toalla chíji ya. <sup>5</sup> Te ni chuhun ya ndute ini ñin tijehēn. Te ni quejéé yá nacate ya jehē tēe cáscuáha. Te násíchí yā jíin toalla jeē nuhní chíji ya.

<sup>6</sup> Te ni jinū yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

<sup>7</sup> Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

<sup>8</sup> Te ni cahān Pedro jíin yá:

Ma nacate cuiti ni jéhē ná.

Te ni cahān Jesús:

Núu tú nacate ri jehē rō, te ma cúu cundúú ró jíin rí.

<sup>9</sup> Te ni cahān Simón Pedro:

Núu súcuan cúu te nasūu máá jéhē-ni ná, chi suni nacate ní ndaha ná jíin xhí ní ná, áchí de.

<sup>10</sup> Te ni cahān Jesús jíin de:

Tēe jeē sa ní jichí, tu jíni ñúhún ndundoo níí cáhnu de, chi máá jéhē-ni de, chi je iyó ndoo níí cáhnu de. Te máá ró chi je ni candundoo ró. Te tú ndíhi ró cáhíyo ndoo.

<sup>11</sup> Chi je jíni yā ndé ñin de cúu jeē nastúu de ya, te jeē yúcuan ní cahān yā: Tú ndíhi ró cáhíyo ndoo.

<sup>12</sup> Te nuū ni jínu ni nacate ya jehē de jíjnāhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájécūhun ni rō na vé cuní cahān jeē ni sáha ri jíin ró? <sup>13</sup> Cácahān rō jeē Maestro jíin Jítoho rō cúu ri, te ndaā cácahān rō, chí suu ndije cúu ri. <sup>14</sup> Núu súcuan te vésú Maestro rō jíin Jítoho rō cúu ri, te ni nacate ri jehē rō jíjnāhan ró, te suni súcuan cánuú jéé nacate máá ró jehē jnāhan ró. <sup>15</sup> Chi jniñu yáha ni sáha

ri jeē steén rī nuū rō jeē suni súcuan sa cuajniñu ró núū jnáhan ró, nájnūhun sa máá rí ni jejniñu ri nuū rō. <sup>16</sup> Jendaá cahán rī jiín ró jeē ñn mozo tu cújéhu de nuū patrón de, te tēe jica jniñu táhú nuū de, te cújéhu de nuū tēe ni tají de. Te máá ró cácuu mozo rī, te na cuajniñu ró núū jnáhan ró nájnūhun ni steén rī nuū rō. <sup>17</sup> Te núu ni cajecūhun ni rō jnūhun yáha, te yōhyo ndetū rō te núu squícu ró.

<sup>18</sup> Te nasūu jeē cahán rī jeē ndihi ró ndetū, chi je jíni rī táca róhó jēe ní nacāji ri. Te cánuu squícu jnūhun yáha jeē cahán tutu íi: Tēe yéji staā jíin rí, ni ndió cuiñí de siguí rī, achí tutu. <sup>19</sup> Te vijna te je cástūhun rí táca jēe yáha núu rō nde ná tu coo, návaha núu na cóo, te candíje ró jēe máá rí cúu Yaā ní tají Yaā Dios.

<sup>20</sup> Jendaá cahán rī jíin ró jeē na-ni ñayuu jeē cuatáhú i táca jēe tají rí, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri, achí yá.

*Jeē ní cachi yā jeē nastúu Judas yā*

(Mt. 26.20-25; Mr. 14.17-21; Lc. 22.21-23)

<sup>21</sup> Te ná ni cahán Jesús táca jnūhun yáha, te ni cucuíhyá ndasí ni yā. Te ni cahán cají yá:

Jendaá cahán rī jíin ró jijnáhan ró jēe ñn máá ró nastúu ruhū, achí yá.

<sup>22</sup> Yūcuán na te tēe cáscuáha jíin yá, ni candacoto de nuū jnáhan de, cájeni ni de ndé ñn de cúu jeē ni cáhān yā. <sup>23</sup> Te ñn máá tēe scuáha jeē maní gā yā jíin, néne de xiin ya mesa jeē cácuixíni de jíin yá. <sup>24</sup> Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhān yā. <sup>25</sup> Yūcuán na te tēe un ní scáyi de máá de nuū Jesús, te ni cajnūhún de ya:

¿Ndé ñn de cúu? áchí de jíin yá.

<sup>26</sup> Te ni cahán Jesús:

Na chūndaji ri staā te cuáha ri nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sēhe Simón. <sup>27</sup> Te jeē ní quihin de staā ún, te ni quívi-ni Satanás ini anuá de. Yūcuán na te ni cahán Jesús jíin de:

Jniñu jeē sáha ró, na sáha yachí rō.

<sup>28</sup> Te ni ñn tēe cáyeji staā jíin yá, tu ní cájecūhun ni de naun ni cahán yā súcuan jíin de. <sup>29</sup> Chi sava de cájeni ni de jeē ni cáhān Jesús jíin Judas jeē cuán de jeē jíni ñūhún yá vico ún, chí jēe cuáha de jecu xūhun núu ñayuu ndahú. Chí máá de ndíso yijni xūhún. <sup>30</sup> Te jeē ní yeji de staā ún, te ni quenda-ni de cuahán de. Te je ni cuaa.

*Jeē ní ndacu ya jniñu jéé*

<sup>31</sup> Yūcuán na te jeē cuahán Judas te ni cahán Jesús:

Vijna te ruhū, Yaā ní nduu tēe, steén rī ndese cújéhu ri, te suni jíin rúhū te cuni ñayuu ndese cújéhu Yaā Dios. <sup>32</sup> Te núu jíin rúhū cuni ñayuu ndese cújéhu Yaā Dios, núu súcuan te suni stéén Yaā Dios ndese cújéhu ruhū jeē cúu rí Sēhe ya. Te yachí-ni stéén yā. <sup>33</sup> Séhē, tuá nahán condee rī jíin ró jijnáhan ró. Te nanducú ró ruhū, te nájnūhun ni cahán rī jíin táca jnáhan yó hebreo, suni súcuan cáhān rī jíin ró vijna, jeē ma cúu jinūcoo ró núu quihín rí. <sup>34</sup> Te vijna te ndácu rí ñn jniñu jéé núu rō, jeē na cúndáhú ni rō jnáhan ró. Nájnūhun cúndáhú ni rí rohó, suni súcuan na cúndáhú ni rō jnáhan ró. <sup>35</sup> Te núu cúndáhú ni rō jnáhan ró, súcuan te cuni táca ñayuu jeē cácuu ró tēe cáscuáha jíin rí, achí yá.

*Jeē ní cachi yā jeē yūhu Pedro cahán de jeē jíni de ya*

(Mt. 26.31-35; Mr. 14.27-31; Lc. 22.31-34)

<sup>36</sup> Te ni cahān Simón Pedro jín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquīn rō ruhū vijna, te cúcuéé gá te jinū rō.

<sup>37</sup> Te ni cahān Pedro:

¿Najehé ma cúu condiquīn na níhín vijna? Tu yúhú ná cuu na jéé siquí ni.

<sup>38</sup> Te ni cahān Jesús:

¿A jéni ni rō jeé tu yúhú ró cuu rō jeé siquí rī? Jendaá cahán rī jín ró jeé nde ná tu cana líhli, te unī jínu yūhu ró te cahān rō jeé tu jíní rō ruhū. Achí yá.

*Jesús cúu ichi jeé jinú yō nuū Tatá yā*

## 14

<sup>1</sup> Te ni cahān gā yā:

Ma cucuíhyá ni rō siquí tāca jnúndóho. Na cándije ró jéé sáha Yaā Dios jehé rō, te suni na cándije ró jéé sáha rī jehé rō. <sup>2</sup> Chi nuū ndeé Tátá rī, íyó cuéhé vehe condee rō jijnáhan ró. Te núu jeé tu súcuan íyó, te je ni castühun rí nuū rō nuú. Núu súcuan te quihín rī quisátühva rí nuū cóyūcu ró. <sup>3</sup> Te jeé quihín rī sátühva rí nuū cóyūcu ró, te ndiji rí quinaquihin rí rohó quihín yō, návāha suni cóyūcu ró nuū cóndee máá rí. <sup>4</sup> Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup> Te ni cahān Tomás jín yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

<sup>6</sup> Te ni cahān Jesús jín de:

Máá rí cúu ichi jinū rō andiví, te máá rí cúu jnúhun ndaá jín jnúhun cotecu rō ñí cáni. Te ni ñn ma jinú nuū Tatá rī te núu tú ruhū. <sup>7</sup> Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chí je ni cajito ró núu rī, achí yá.

<sup>8</sup> Te ni cahān Felipe jín yá:

Stéén ni Tátá ni núu ná, te na cúvāha ni na jijnáhan ná, achí de.

<sup>9</sup> Te ni cahān Jesús:

Felipe, je ni cuu cuehé quiví jica rí jín ró jijnáhan ró, ¿te á ná tu cuni rō ndé ñn cúu rí naún? Tēe jeé jito ruhū, suu Tátá rī jito de. Núu súcuan ¿te najehé cahán rō jeé steén rí Tatá rī nuū rō? <sup>10</sup> ¿A tu cándije ró jéé ñn-ni cúu rí jín Tátá rī, te Tátá rī ñn-ni cúu ya jín rí? Tāca jnúhun cáhan rí jín ró, nasūu jnúhun máá rí cúu. Chí Tátá rí jeé ñn-ni cúu ya jín rí, máá yá sáha tācá jniñu jeé sáha rí. <sup>11</sup> Candije ró jijnáhan ró jéé ñn-ni cúu rí jín máá Tátá rī, te Tátá rī ñn-ni cúu ya jín rí. Te núu tu cájecūhun ni rō, te candije ró rúhū siquí tācá jniñu sáha rí. <sup>12</sup> Jendaá cahán rí jín ró, núu ndé ñayuu candije ruhū, jniñu jéhu jeé sáha rí yāhá, suni sáha i. Te jéhu ga jniñu sáha i vēsū yāhá, chí quinhun rí nuū ndeé Tátá rí. <sup>13</sup> Te tācá na-ni vé cacán rō nuū Tatá rí siquí jeé cáncandije ró jéé cúu rí Sēhe ya, te sáha rí jeé cacán rō, te súcuan steén rí jeé yóhyo cújéhu Tátá rí. <sup>14</sup> Chí tācá na-ni vé cacán rō siquí jeé cáncandije ró rúhū, te sáha nahín rí.

*Jeé ni jéjnhun ya jeé tají yá Espiritu Santo*

<sup>15</sup> Te núu maní rō jín rí jijnáhan ró, te na squícu ró jniñu ndácu rí nuū rō.

<sup>16</sup> Te cacán tahú rí nuū Tatá rí, te tají yá inga Yaā chindéé ñáhán rōhó, te sáha ya jeé cóo sī ni rō jijnáhan ró. Te Yaā un cúu máá Espiritu jeé steén jnúhun ndaá, te condee yā jín ró ñí cáni. <sup>17</sup> Te ñayuu ñayiví má cúu cuatáhú i ya, chí



tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndeé yá jíin ró, te condee yā ini anuá rō ní cáni. <sup>18</sup> Ma stóo uun ri rohó, chí ndiji ri nuū rō. <sup>19</sup> Jecu na quivī te ma cóto ga ñayuu ñayivi nuū rī. Te máá ró jijnáhan ró chi coto ró núu rī, chí cotecu rī ní cáni, te jeé yúcuau suni cotecu máá ró. <sup>20</sup> Te quivī ún te cuni rō jeé ñn-ni cúu ri jíin Tátá rī, te máá ró ñn-ni cúu ró jíin rī jeé ndeé rī ini anuá rō jijnáhan ró. <sup>21</sup> Te na-ni ñayuu núu ñúhun ni i jniñu ní ndacu rī, te squicu i, ñayuu un cúu jeé maní ndije jíin rī. Te ñayuu jeé maní jíin rī, suni coo maní Tátá rī jíin i. Te suni ruhū coo maní rī jíin i, te steén rī nuū i jeé nduú rī jíin i. Achí yá.

<sup>22</sup> Te ni cahān Judas jíin yá (te nasūu tée cúu Iscariote):

Najehē cúu jeé steén ni máá ní nuū ná, te nuū ñayuu ñayivi chí tuú?

<sup>23</sup> Te ni cahān Jesús:

Ñayuu jeé maní jíin rī, chí cásquicu i jeé cahān rī. Te coo maní Tátá rī jíin i. Te Tátá rī jíin máá rī quijicoo ri cundúu rī jíin i. <sup>24</sup> Te ñayuu jeé tú maní jíin rī, tu cásquicu i jeé cahān rī. Te jnūhun cájini sóho ró cahān rī, nasūu jnūhun máá rī cúu, chí jnūhun máá Tátá rī jeé ní tají rúhū chí.

<sup>25</sup> Tāca jnūhun yáha cáhān rī jíin ró níni íne ga rī jíin ró. <sup>26</sup> Te Tátá rī chí tají yá Espíritu Santo, quiji nucuiñi nuū rī. Te máá yá chindéé ñáhān yá rohó, te sáha ya jeé cóo sñ ni rō. Te steén yā tāca jnūhun nuū rō, te nacachi tucu ya tāca jéé ni cahān rī jíin rō.

<sup>27</sup> Te jeé quihín rī, te sáha ri jeé cóo ndeyí coo sñ ni rō. Nájñūhun íyo ndeyí sñ ni máá rī, suni súcuau coo ndeyí sñ ni rō sáha ri. Te jeé sáha ri jeé cóo ndeyí sñ ni rō, tu quijnáhan jíin jnūhun ndeyí cácahān ñayuu ñayivi. Ma cucuihyá ni rō siquī tāca jnūdóho, te ni ma yūhu ró. <sup>28</sup> Je ni cajini sóho ró jéé ni cáhān rī jeé quihín rī, te ndiji ri cundúu rī jíin ró. Te núu cáhīyo maní váha ró jíin rī, te cusñ ni rō jeé ni cáhān rī jeé nuhún rī nuū Tátá rī. Chí cújéhu ga Tátá rī vijna vésu ruhū. <sup>29</sup> Je ni castūhun rī nuū rō tāca jnūhun yáha nde ná tu coo, návāha núu je ni cuu, te candíje ró rúhū jijnáhan ró.

<sup>30</sup> Ma cahān rī cuehē gā jnūhun jíin ró, chí je vēji jexeén jeé ndácu jniñu ini ñayivi yáha. Te tú na vé cúu sáha siquī rī nuú. <sup>31</sup> Te na cóo nájñūhun ni ndacu Tátá rī jniñu nuū rī, návāha cuni ñayuu ñayivi jéé maní rī jíin Tátá rī, te sáha ri jniñu ní ndacu ya. Ndocuiñi jijnáhan ró na quíngoo yó. Achí yá.

*Jesús cúu nájñūhun yoyúcu uva*

## 15

<sup>1</sup> Máá rí cúu nájñūhun yoyúcu uva váha ndaā, te Tátá rí cúu nájñūhun tēe ndító yoyúcu uva un. <sup>2</sup> Te máá ró chí cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeé jéhe ndehē, te nasándoo ya nacañde yā rohó nájñūhun jeé cúu ró ndaha ún, návāha cuāha ró cuehē gā ndehē. <sup>3</sup> Te máá ró chí je ni candundoo ánuá ró jíin jnūhun ni steén rī nuū rō, nájñūhun ndúndoo ndaha uva. <sup>4</sup> Na cundúu ró jíin rī, te suni máá rí cundúu rí jíin ró. ñn ndaha uva ma cúu cuāha ndehē jeé máá, te núu tu yjññi jica yóho. Te suni súcuau máá ró, ma cúu sáha ró jniñu váha te núu tu cundúu ró jíin rī.

<sup>5</sup> Máá rí cúu yoyúcu un, te máá ró cácuu ndaha ri. Ñayuu jeé nduú jíin rí, te ruhū ndúu rí jíin i, máá i cúu nájñūhun ndaha jeé jéhe cuehē ndehē. Chí núu tú cundúu ró jíin rí, te tú cuiñi na jniñu váha cuu sáha ró. <sup>6</sup> Ñayuu jeé tu cundúu

jiín rí, quende yā i nájñuhun ñn ndaha uva, te ichī. Te ndoho i nájñuhun ndaha uva un jéē ndutútú te cayū nuū ñuhún.

<sup>7</sup> Núu ndúú ró jiín rí, te cáñuhun ni rō jñuhun cáhán rī, yūcuán na te cacān rō na-ni vé cācuni rō, te sáha rī jeē cācāhān rō. <sup>8</sup> Te núu cāsáha ró cuéhē jñiñu váha, súcuan cástéén rō jeē cúu ndije ró ñáyuu cascuáha jiín rí, te súcuan cācuni ñayuu jeē yóhyo cújēhu Tátá rī. <sup>9</sup> Nájñuhun manī Tátá rī jiín rí, suni súcuan manī rī jiín ró jijnáhan ró. Núu súcuan te ma siaá rō jñuhun manī rī jiín ró. <sup>10</sup> Núu squícu ró jñiñu ní ndacu ri nuū rō, te níni coo manī rī jiín ró, nájñuhun máá rí squícu ri jñiñu ní ndacu Tátá rī nuū rī, te níni iyó máni yā jiín rí.

<sup>11</sup> Súcuan ni cahān rī jiín ró návāha coo sñ ni rō nájñuhun iyó sñ ni rī, chi nde cusñ teyí ni rō. <sup>12</sup> Te yāha cúu jñiñu ndacu ri nuū rō jijnáhan ró: jeē na cundáhú ni rō jnáhan ró nájñuhun cundáhú ni rī rohó. <sup>13</sup> Núu ñn tēe cuu de jehē amigo de, te tuá na vé cúmani gā sáha de jeē cundáhú ni de amigo de. <sup>14</sup> Te máá ró cácuu amigo rī núu squícu ró jñiñu ndacu ri nuū rō. <sup>15</sup> Ma cahān gā rī mozo jiín ró, chi ñn mozo tu cástühún patrón nuū i ndese jéni ni de sáha de. Chi sa suhva amigo cahān rī jiín ró, chi je ni castühun rí nuū rō táca jñuhun ni cahān Tátá rī jiín rí. <sup>16</sup> Máá rí ni nacāji rohó jéē jnáma ri rohó, te nasūu máá ró ni cānacani ni xīhna gā jeē cóndiquñ rō ruhū. Te ni jeni ri rohó jéē caca ndaā rō te scándije ró cuéhē ñayuu jeē cuu i sēhe ri ní cáni. Te súcuan te ndihī jeē cacán rō nuū Tátá rī siquī jeē cācandije ró ruhū, sáha ya jeē jicán rō. <sup>17</sup> Te yāha cúu jñiñu ndacu ri nuū rō: jeē na cundáhú ni rō jnáhan ró.

### *Jeē cáquitī ni ñayuu ñayivī núu Jesús jiín núu ñáyuu cācandije*

<sup>18</sup> Te núu cáquitī ni ñayuu ñayivī núu rō jijnáhan ró, te je cájini rō jeē xīhna gā nuū máá rí ni caquitī ni i. <sup>19</sup> Te núu jeē iyó gá rō jiín modo ñayuu ñayivī, te coo manī ñayuu ñayivī jiín ró nuū, nájñuhun manī i jiín jnáhan i. Te ni nacāji ri rohó jéē tuá coo ró jiín modo ñayuu ñayivī. Te jeē yúcuan cáquitī ni i nuū rō, chi tuá cácuu ró cuenta ñayivī. <sup>20</sup> Nucūhun ni rō jñuhun ni cahān rī jiín ró: Núu tu iyó yñíhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rohó jéē cácuu ró mozo rī. Te núu jeē ní cājetáhú i jñuhun ni steén rī, te suni cuatáhú i jñuhun cástéén rō. <sup>21</sup> Te táca jñiñu yāha sáha i jiín ró jeē siquī ruhū, chi tu cájini i Yaā ní tají ruhū vēji ri.

<sup>22</sup> Núu jeē tu ní quíji ri nacani ri jñuhun nuū i, te ma cóo cuēchi i núu. Te vijna chi ma cúu ga cahān i jeē tu jíní i jeē iyó cuēchi i. <sup>23</sup> Ñayuu jeē cáquitī ni nuū rī, suni nuū Tátá rī cáquitī ni i. <sup>24</sup> Núu jeē tu ní sáha ri jñiñu jéhu nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jñiñu ún, te vēsú súcuan te cáquitī ni i nuū rī jiín núu Tátá rī. <sup>25</sup> Te súcuan cāsáha i návāha squícu jñuhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

<sup>26</sup> Te tají rí máá Yaā chindéé ñáhán rohó te sáha ya jeē cóo sñ ni rō. Te Yaā un cúu máá Espíritu jeē steén jñuhun ndaā, te quíji ya nde nuū Tátá rī, te nacani cáji yá jñuhun rī. <sup>27</sup> Te suni máá ró nacani ró jñuhun ri, chi je cáhñ ro jín rí nde ná ni quejéé rí nacani ri jñuhun.

## 16

<sup>1</sup> Táca jñuhun yāha ní cahān rī jiín ró návāha ma náyūhu ró jeē quíji jñundóho. <sup>2</sup> Chi quenehen i rohó jéē ma cuáha ga i jñuhun cone ró táca vehe ñi sinagoga. Te quee quivī jeē cahni i rohó, te cani ni i jeē ñn jñiñu váha ni sáha i nuū Yaā Dios. <sup>3</sup> Te súcuan sáha i jiín ró, chi tu cájini cuiñi i máá Tátá rī ni máá

rí. <sup>4</sup> Te ni cahān rī jnūhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

### *Jniñu sáha Espíritu Santo*

"Te tu ní cáhān rī jnūhun yáha jíin ró nde xihna ñúhún, chi íne máá rí jíin ró jijnáhan ró. <sup>5</sup> Te vijna chi nuhūn rī condee rī jíin Yaā ní tají rúhū vēji rí. Te ni íin ró tu cájnūhun ró nde nuū quihín rī. <sup>6</sup> Chi máá jeē cácuuíhyá ndasí ni rō jeē ni cáhān rī súcuan jíin ró. <sup>7</sup> Jendaá cahān rī jíin ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yaā chindéé ñáhán róhó te sáha ya jeē cóo sī ni rō. Te núu cuahān rī, te tají rí yā quíji ya nuū rō. <sup>8</sup> Te jeē quee yā, te stéén yā nuū ñáyuu ñayiví jeē iyó cuéchi i, jíin ndese quivicoo i ichi ndaā, jíin jeē sándaā Yaā Díos siquī cuéchi i. <sup>9</sup> Stéén yā jeē iyó cuéchi i, chi tu cácandíje i ruhū. <sup>10</sup> Te stéén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī. <sup>11</sup> Te stéén yā siquī jeē sándaā Yaā Díos cuéchi ñayuu, chi je ni cundaā jeē jnahnú ndetū máá jéxeén jeē kujéhu ini ñayiví yáha.

<sup>12</sup> Te iyó cuéhē gā jnūhun cúni rī cahān rī jíin ró, te ma cúu jecūhun ni rō vijna. <sup>13</sup> Te jeē quee máá Espíritu jeē steén jnūhun ndaā, te máá yā steén táca jnūhun ndaā un nuū rō. Chi ma cahān yā jeē máá yā, chi cahān yā táca jeē jini sōho ya cahān Yaā Díos. Te stéén yā siquī táca jniñu jeē coo. <sup>14</sup> Te stéén yā jeē kujéhu rí, chi nacastūhun yā nuū rō táca jnūhun jeē jé ni cahān rī, te sáha ya jeē jécūhun ni rō. <sup>15</sup> Ndihi ndese cújéhu Tatá rī, suni súcuan cújéhu máá rí. Jeē yúcuan ní cahān rī jeē Espíritu Santo nacastūhun yā nuū rō táca jnūhun jeē jé ni cahān rī, te sáha ya jeē jécūhun ni rō jijnáhan ró.

### *Vēsú cácuuíhyá ni rō, te ndusī ni rō*

<sup>16</sup> Jecu na te ma cóto ga rō nuū rī. Te jecu tucu quivī te coto tucu ró núu rī, chi quinuhan rī nuū ndeé Tatá rī. Achí yá.

<sup>17</sup> Yūcuan na te sava tēe cácuáha jíin yá, ni cacajnūhun jnáhan de:

¿Na jnūhun cúu jeē yáha jeē cahān yā jíin yó? Chi achí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chi siquī jeē quínuhun yā nuū ndeé Tatá yā. <sup>18</sup> ¿Na jnūhun cúu jeē yáha jeē cahān yā, jecu na? Tu cájecūhun ni yō na vé cúu jeē cahān yā. Achí de.

<sup>19</sup> Te ni jini Jesús jeē cácuni de cajnūhún de ya. Te ni cahān yā jíin de:

¿A cácajnūhun jnáhan ró na vé cúu jeē ni cáhān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rí? <sup>20</sup> Jendaá cahān rī jíin ró jeē ndahyū rō jijnáhan ró te cucuíhyá ní rō, te ñayuu ñayiví chi sa cusī ni i. Te vēsú cucuíhyá ní rō, te sa ndusī ni rō jeē cóto tucu ró núu rī. <sup>21</sup> In ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cúsī ni ña jeē ní cacu sēhe ña. <sup>22</sup> Te suni súcuan cúu jeē cándoho ró vijna, chi cácuuíhyá ní rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni in ma cúu casi jeē cúsī ni rō.

<sup>23</sup> Te quiví ún chi tú na vé cacān gā rō nuū rī. Chi jendaá cahān rī jíin ró jeē nuū máá Tatá rī cacān rō, te sáha ya ndihi jeē cájicān rō, siquī jeē cácandíje ró rúhū. <sup>24</sup> Nde vijna te ná tu cacān rō nuū Tatá rī jeē jíin síhví rí. Te vijna te na quejéé ró cacān rō jíin síhví rí, te nihín rō, návāha cusī ndasí ni rō.

### *Je ni quende yā poder ndihi jeneé cáh̄yo ini ñayiví*

<sup>25</sup> Táca jnūhun yáha ní cahān yatá rí jíin ró. Te quee quivī jeē ma cahān yatá gá rí jíin ró, chi sa suhva castūhun cáji rí nuū rō siquī Tatá rī. <sup>26</sup> Te quiví ún

chi cacān rō nuū Tatá rī siquī jeē cácanđije ró rúhū. Te tu cáhán rī jíin ró jeē cacán tahu rī jehē rō nuū Tatá rī. <sup>27</sup> Chi máa Tátá rī je cundáhu ní yā roho siquī jeē cáhīyo manī rō jíin rī, te ni cacandije ró jeē ndé nuū maá yá vēji ri. <sup>28</sup> Ni quenda ri nde nuū Tatá rī, te ni quee rī ini ñayiví. Te vijna te quenda ri ini ñayiví, te nuhūn tucu ri nuū Tatá rī. Achí yá.

<sup>29</sup> Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní. <sup>30</sup> Vijna te cájini na jéē jiní ni ndivii cuiti, te tuá jíni ñúhún jéē cájnúhún ní ñin ná níhín. Jeē yúcuān cácanđije ná jéē véji ní ndé nuū Yaā Dios. Achí de.

<sup>31</sup> Te ni cahān Jesús jíin de:

¿A ndé vijna te cácanđije ró naún? <sup>32</sup> Te quiji quiví, te je ni quee, jeē cuité núu ró quíningoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rī, chi Tátá rī íne ya jíin rī. <sup>33</sup> Tāca jnúhun yáha ní cahān rī jíin ró návāha coo ndeyí coo sīi ní rō siquī jeē cácanđije ró rúhū. Ini ñayiví chi cánuu coto ró jnúndóho. Te vēsú súcuān te na cóo sīi ní rō, chi je ni quende rī poder tāca jéneé cáhīyo ini ñayiví. Achí yá.

*Jeē ni jíicān tahu Jesús jehē ñayuu cácanđije*

## 17

<sup>1</sup> Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátá, je ni quee quiví jeē ndóho ná. Vijna te stéén ni jéē kujéhnū máa ná jeē cúu ná Séhe ní, návāha suni máa ná steén na jéē kujéhnū máa ní. <sup>2</sup> Chi ní sáha ní jéē ndiso jníñu ná siquī tāca ñayuu, návāha tāca ñayuu jeē ni jéhe ní núū ná, cotecu i níí cáni sáha ná. <sup>3</sup> Te suhva cúu jnúhun cotecu i níí cáni: suu jeē na cúni i níhín jéē mañúhún-ni ní cúu Yaā ndaa, jíin jéē cúni i sáñá jeē cúu ná Jesucristo, Yaā ní tají ní.

<sup>4</sup> Je ni steén na núū ñayuu ñayiví jéē kujéhnū ní, te je sínu ná jniñu ní ndacu ní núū ná. <sup>5</sup> Te vijna, Tátá, sáha ní jéē ndujéhnū tucu ná ndé nuū néne ní, nájnúhun cújéhnū ná jíin ní nde ná tu jecōo ñayiví.

<sup>6</sup> Ñayuu jeē ní nacāji ní ini ñayiví, ni jéhe ní i nuū ná, te ni steén na núū i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhu i jnúhun ní, te ni casquicu i. <sup>7</sup> Te vijna te cájini i jeē ndé nuū maá ní vēji tāca jéē iyó jíin ná. <sup>8</sup> Chi tāca jnúhun ni cahān ni jíin ná, ní castúhun ná núū i, te ni cajetáhu i. Te ni cajini i jeē ní quenda ndije ná ndé nuū maá ní, te ni cacandije i jeē maá ní ni tají sáña.

<sup>9</sup> Te jíicān tahu na jéhe maá i jíināhan i. Tu jíicān tahu na jéhe ñayuu ñayiví jéē tu cácanđije, chi sa jehē maá ñayuu ni jéhe ní núū ná, chi cuenta maá ní cácuu i. <sup>10</sup> Te tācá i jeē yíhi i ndaha máa ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnū ná.

<sup>11</sup> Te tuá condee ná ini ñayiví. Te maá i chi quendōo i ini ñayiví, te maá ná chi najeē ná condee na jíin ní. Yaā i Yaā ndoo cúu ní, Tátá. Te jíin poder ní condito ní tāca ñayuu ni jéhe ní núū ná, návāha inuú na cóo ní i jíināhan i, nájnúhun cúu maá yó. <sup>12</sup> Te jeē ní condee na jíin i ini ñayiví, te jíin poder ní ní condito ná i. Tāca ñayuu ni jéhe ní núū ná, ní condito yúcuān ná i. Te tu ní jéhe na jnúhun naa i jíināhan i, chi máa ñin-ni tēe jeē je cúu de tēe jnahnū ndetū, návāha squicu jnúhun yósó núū tútu i.

13 "Te vijna te najeē na núū ní, te cáhán na táca jnúhun yáha jíin i níni jēē íne ga ná ini ñayiví, návāha na cóo sñ ndasí ni i nájñuhun cúsñ ni maá ná. 14 Ni castúhun ná jnúhun ní núū i. Te ni caquití ni ñayuu ñayiví núū i, chí tuá cácuu i cuenta ñayiví, nájñuhun maá ná tu cúu ná cuenta ñayiví. 15 Te tu jícan tahú na jēé quénehen ní i ini ñayiví, chí sa suhva jeē cóndito ní i nuū jexeén. 16 Nasūu cuenta ñayiví cácuu i, nájñuhun maá ná jēé nasūu cuenta ñayiví cúu ná. 17 Jíin jnúhun ndaā ní te sáha ní jēé coo ndoo coo ñi i nuū ní. Táca jnúhun cáhán maá ní cúu jnúhun ndaā. 18 Te nájñuhun ni tají ní sãña ní quiji ná ini ñayiví, suni súcuan tají ná i nacani i jnúhun ní núū ñayuu ñayiví. 19 Te jehē maá i cúu jeē jēhe ná maá ná cuu ná, návāha suni maá i coo ndoo coo ñi i nuū ní jēé jíin jnúhun ndaā.

20 "Te nasūu maá ñin-ni jehē ñayuu yáha jícan tahú na, chí suni jehē táca gá ñayuu jeē candíje i sãña núu na cúní sōho i jnúhun jeē nácani maá i jíjnáhan i. 21 Te jícan tahú na jēé inuú na cóo ní i jíjnáhan i. Nájñuhun ñin-ni cúu ní jíin ná, Tátā, te ñin-ni cúu ná jíin maá ní, suni súcuan na cóo inuú i jíin yó. Te cúní na jēé inuú na cóo ní i, návāha na cándíje ñayuu ñayiví jēé maá ní ni tají ní sãña. 22 Ni sajhēnu ná i nájñuhun ni sajhēnu ní sãña, návāha inuú na cóo ní i, nájñuhun inuú-ni cúu yó. 23 Te ndúú ná jíin i, te ndúú ní jíin ná, te súcuan te inuú cuiti coo ní i jíjnáhan i. Yūcuán na te cuní ñayuu ñayiví jēé maá ní ni tají ní sãña, jíin jēé maní ndasí ní jíin i nájñuhun maní ní jíin ná.

24 "Tátā, maá ní ni jēhe ní i nuū ná. Te cúní na jēé cóyūcú i jíin ná nuū cóndee ná, návāha coto i ndese luu cújēhnu ná ni sáha ní. Chí íyó mání ndasí ní jíin ná nde ná tu jecōo ñayiví te nde vijna. 25 Yaā ndaā cúu ní, Tátā, te ñayuu ñayiví tu jíin i níhín, te maá ná chí jíin na níhín. Te ñayuu yáha chí cájini i jēé maá ní ni tají sãña. 26 Ni steén na núū i jíjnáhan i ndese Yaā cúu ní. Te steén gā na súcuan nuū i, návāha na cóo maní ndasí i jíin jnáhan i, nájñuhun íyó mání ndasí ní jíin ná, te návāha condee ná ini anuá i. Achí yá.

*Jeē ní cajñ de Jesús*

*(Mt. 26.47-56; Mr. 14.43-50; Lc. 22.47-53)*

## 18

1 Te nuū ní cuu ni cahān Jesús táca jnúhun yáha, te ni quenda ya jíin téé cácuáha jíin yá, cuahān yā inga lado yuu Cedrón. Te yūcuan íyó ñin huerto núu ní quiví ya jíin téé cácuáha jíin yá. 2 Te Judas, tēe jeē nastúu de ya, suni jíin de lugar un, chí cuehē jíin ni nataca Jesús yūcuan jíin téé cácuáha jíin yá. 3 Te ni jinū de yūcuan jíin ñin grupo soldado jíin jecu policía cándito templo, jeē ní catají sutū cácuajēhnu jíin téé grupo fariseo. Te cándiso de machete, te cájñ de linterna jíin yiti. 4 Te Jesús je jíin yā táca jnúndóho jeē véji siquí yā. Te ni quenda ya ichi núu de, te ni cahān yā:

¿Ndé ñin cánanducú ró?

5 Te ni cacahān de jíin yá:

Jesús tēe ñuu Nazaret cánanducú rí.

Te ni cahān yā:

Maá rí cúu.

Te Judas, tēe jeē nastúu de ya, suni íne de jíin téé ún. 6 Te jeē súcuan ni cahān yā, maá rí cúu, te ni cajica yátá de, te ni cacotúu-ni de. 7 Yūcuán na te ni cajñuhún tucu ya de:

¿Ndé ñin cánanducú ró?

Te ni cacahān de:

Jesús tēe ñuu Nazaret.

<sup>8</sup> Te ni cahān Jesús:

Je ni cachi rī jeē maá rí cúu. Te núu ruhū cānanducú ró, te máa-ni ri jñi ró, te tēe yáha na quíngoo de. Achí yá.

<sup>9</sup> Súcuān ni cuu návāha na squícu jñūhun jeē ni cāhān yā jíin Tátá yā: Tu ní jehe na jñūhun naa ni ñin tēe jeē ni jehe ni núu na, áchí yá. <sup>10</sup> Te Simón Pedro ndíso de ñin espada. Te ni tava de, te ni jehnde de sōho lado váha ñin tēe nání Malco. Te tēe un cúu de mozo maá sūtū cujéhnu. <sup>11</sup> Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēe ndóho ri jñūndóho yáha jeē ni sándaā Tátá rī jeē ndóho ri? Achí yá.

*Jeē ní indichi Jesús nuū sutū cujéhnu*

(Mt. 26.57-58; Mr. 14.53-54; Lc. 22.54)

<sup>12</sup> Yūcuān na te tācá soldado un, jíin capitán de, jíin táca policía tēe hebreo un, ni cajñi de Jesús, te ni cajihni de ya. <sup>13</sup> Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máa sūtū cujéhnu ga cuiyā ún. <sup>14</sup> Te suu de ni cachi nuū jñāhan de hebreo jeē cánuú jēe cúu ñin tēe jehē nación de.

*Jeē ní cachi Pedro jeē tu jíin de ya*

(Mt. 26.69-70; Mr. 14.66-68; Lc. 22.55-57)

<sup>15</sup> Te Simón Pedro jíin inga tēe scuáha, cándiquñ de Jesús cuangoo de yatā yā. Te inga tēe scuáha ún chí jíin jñāhan de jíin sūtū cujéhnu. Jeē yúcuān ní quñvi de jíin Jesús ini patio vehe sutū cujéhnu ún. <sup>16</sup> Te Pedro ni quendōo de yatā yehyí. Te máa tēe scuáha jēe jíin jñāhan jíin sūtū cujéhnu ún, ni quenda de ni cahān de jíin ñāhan ndíto yéhyí, te ni squívi de Pedro ini patio. <sup>17</sup> Yūcuān na te ñāhan ndíto yéhyí un ní cajñūhún ña Pedro:

¿A násúú ñin tēe scuáha jíin tēe indichi nuū sutū un cúu ró?

Te ni cahān de:

Nasūu cúu rī, achí de.

<sup>18</sup> Te tāca mozo jíin policía un ní cascáyú de ñuhūn jíin tícāyi, chí mījin sáha. Te cáhñin de cānasaā de. Te suni indichi Pedro, násaā de jíin táca tēe ún.

*Jeē ní stíchí sutū cujéhnu ún Jesús*

(Mt. 26.59-66; Mr. 14.55-64; Lc. 22.66-71)

<sup>19</sup> Te sutū cujéhnu un ní stíchí de Jesús ndé-ni cúu tēe cáscuáha jíin yá, jíin na jñūhun cúu jeē steén yā. <sup>20</sup> Te ni cahān Jesús:

Níni ní cahān rī nuū chitú ñáyuu, ni cajini sōho ndíhi ñayuu. Te níni ní steén rī jñūhun ini tācá vehe ñi sinagoga jíin ini templo cáhnu nuū ndutútú ndívii jñāhan yó hebreo. Te tú ni ñin jñūhun ní cáhān sáhi rí. <sup>21</sup> ¿Te naun cájnūhun ró ruhū? Cajñūhun ñáyuu ní cajini sōho jñūhun ni cahān rī, te máa i cachi ndese ni cahān rī. Chí cájini i ndese ni cahān rī.

<sup>22</sup> Te jeē ni cāhān Jesús súcuān, te ñin policía ndíto templo jeē indichi de yūcuān, ní caní-ni de nuū yā. Te ni cahān de jíin yá:

¿A súcuān cáhān rō jíin sūtū cujéhnu naún?

<sup>23</sup> Te ni cahān Jesús:

Núu ni cahān rī ñin jñūhun néé, cachi na jñūhun néé ní cahān rī. Te núu tu ní cáhān rī ñin jñūhun néé, ¿te naun cáni ró rúhū? achí yá.

<sup>24</sup> Yūcuān na te Anás, sutū cujéhnu un, ní tají de ya, núhni yā cuahān yā nuū Caifás, tēe cúu máa sūtū cujéhnu ga.

*Jeē ní cachi tucu Pedro jeē tu jíní de ya*  
(Mt. 26.71-75; Mr. 14.69-72; Lc. 22.58-62)

<sup>25</sup> Te niní jée súcuan cúu, te índichi-ni Pedro, násaā de yuñhún. Te ni cacahān jín de:

¿A násūu ñin tēe scuáha jín tēe un cúu ró, chí naún?

Te máa de tu ní cáchi de:

Nasūu cúu ri, achí de.

<sup>26</sup> Yūcuán na te ñin mozo sutū cujéhu, jnáhan tēe jeē ní jehnde Pedro sóho, ni cahān jín de:

¿A násūu máa ró cúu jeē ní jito ri jín de ini huerto?

<sup>27</sup> Te Pedro tu ní cáchi tucu de. Te ni cana-ni líhli.

*Jeē ní índichi Jesús nuū Pilato*  
(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Yūcuán na te ni quendacoo de jín Jesús vehe Caifás, cuango de jín yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu ství i ley i jeē cahán jeē ma quívi i ini vehe ñin ñayuu jeē násūu hebreo cúu. Chi núu súcuan te ma cúu cuxíni i vico pascua jeē cóo inga quívi ún. <sup>29</sup> Yūcuán na te ni quenda Pilato, tēe cúu gobernador, ni cahān de jín i jínáhan i:

¿Na cuēchi cájicān rō siquī tēe yáha?

<sup>30</sup> Te ni cacahān i:

Núu jeē násūu tēe cúnée cúu tēe yáha, te ma jn# ná de jeē quíndeca ná de nuū ni núu, achí i.

<sup>31</sup> Te ni cahān Pilato:

Cuángoo jínáhan ró, te sándaā rō siquī de jín ley cánevāha máa ró.

Te ni cacahān ñayuu hebreo un:

Máa ná jeē cácuu ná ñáyuu hebreo, tú na permiso cánevāha ná jée cáhni ná ni ñin ñayuu.

<sup>32</sup> Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. <sup>33</sup> Te ni ndívi Pilato ini palacio, te ni cana de jeē na quíji Jesús. Te ni cajñhún de ya:

¿A máa ró cúu Rey ñayuu hebreo naún?

<sup>34</sup> Te ni cahān Jesús jín de:

¿A cájnūhun ró ruhū jeē súcuan jéni ni maá ró, chí jée ní cacastūhun ñáyuu hebreo nuū rō?

<sup>35</sup> Te ni cahān Pilato:

¿Chí tēe hebreo cúu ri jeē cúni rí? Ñayuu nación maá ró jín sūtū cácujuhnu ni cachihi róhó ndaha ri. ¿Na vé ni sáha ró núu súcuan? Achí de.

<sup>36</sup> Te ni cahān Jesús:

Nasūu jée ndácu ri jniñu nájnūhun cándacu tāca rey ñayívi yáha. Chi núu jeē ñáyuu ñayívi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayívi yáha cúu jeē ndácu ri jniñu vijna. Achí yá.

<sup>37</sup> Yūcuán na te ni cahān Pilato jín yá:

¿Te á ñin rey cúu ró jée súcuan?

Te ni cahān Jesús:

Rey cúu ri, nájnūhun cáhán rō. Ni quiji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhú jnūhun ndaā, cájini nahín i jnūhun cáhán rí. Achí yá.

<sup>38</sup> Te ni cahān Pilato:

¿Ndese cuni yō ndé ñin cúu máá jnúhun ndaā?

*Jeē ní cundaā jeē cúu yā  
(Mt. 27.15-31; Mr. 15.6-20; Lc. 23.13-25)*

Te jeē ní cahān de jnúhun yáha, te ní quenda tucu de nuū ñáyuu hebreo. Te ní cahān de jíin í:

Tú cuiti na cuēchi níhín rī siquī de. <sup>39</sup> Te íyó costumbre máá ró jíináhan ró jeē vico pascua te siaá rī ñin tēe íne vecāa nuū rō. ¿Te á tu cáconi rō jeē siaá rī Rey rō nuū rō? Achí de.

<sup>40</sup> Yūcuán na te ndivii í ní cacana jee tucu í:

Ma siaá ní tēe jíinā, chí Barrabás siaá ní, achí í.

Te tēe cuíhná cúu Barrabás.

## 19

<sup>1</sup> Yūcuán na te ní cahān Pilato jeē na jnái soldado Jesús, te caní de ya jíin cuarta ñii. <sup>2</sup> Te ní casáha de ñin corona íñu, ní cachuhun de xinī yā. Te ní cachuhun de ya ñin sahma cuehé ndíhí jeē cúu sahma rey. <sup>3</sup> Te ní jecondichi de nuū yā, te ní cacahān catá de:

Nacā jeē váha rey cúu Rey ñáyuu hebreo.

Te ní cacani de nuū yā.

<sup>4</sup> Yūcuán na te ní quenda Pilato inga jíinu, te ní cahān de jíin ñáyuu:

Yáhá condēhe ró tava rī de, návāha na cúni rō jeē tú na cuēchi níhín rī siquī de.

<sup>5</sup> Te ní quenda Jesús, ñúhun ya corona íñu jíin sahma cuehé ndíhí un. Te ní cahān Pilato jíin í:

Yáhá condēhe ró de jíináhan ró.

<sup>6</sup> Te nuū ní cajito sutū cácujeñnu jíin táca policía nuū yā, te ní cacana jee de:

Cata caa ní de jíicā cruz, na cúu de.

Te ní cahān Pilato:

Núu súcuan te najñii máá ró de te cahni rō de. Chí ruhū, tú na cuēchi níhín rī siquī de.

<sup>7</sup> Te ní cacahān ñáyuu hebreo un:

Cáneváha ná ñin ley, te jeē siquí ley un cánuú jeē cúu de, chí sáha de máá de jeē Séhe Yaā Dios cúu de.

<sup>8</sup> Te jeē ní jini sōho Pilato jnúhun yáha, te víhyá gā ní yūhú de. <sup>9</sup> Te ní ndivicoo tucu de ini palacio, te ní cajñuhún de Jesús:

¿Ndé nuū véji ró?

Te tu ní cáhan cuiti Jesús jíin de. <sup>10</sup> Yūcuán na te ní cahān de jíin yá:

¿Naun tu cáhan rō jeē cáhan rī? ¿A tu jíin rō jeē ndíso jñíñu rī jeē cáhni rī rohó jíicā cruz, te suni ndíso jñíñu rī jeē siaá rī rohó quíhín rō?

<sup>11</sup> Te ní cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró siquī rī. Jeē yúcuán tēe jeē ní nacuaña ruhū ndaha ró, cuēchi xeēn gā condee siquī de vésú máá ró. Achí yá.

<sup>12</sup> Yūcuán na te nde hora un ndúcú ndéyí Pilato ndese siaá de ya. Te ñáyuu hebreo chí cácana jee í:

Núu siaá ní tēe jíinā, te tu cúu ní amigo rey Roma jeē cujeñnu ndácu jñíñu núu súcuan. Chí táca tēe jeē sáha de rey máá de, núu súcuan te cúu de enemigo siquī rey un. Achí í.



<sup>13</sup> Te jeē ní jini sōho Pilato jnūhun yáha, te ni ndacu de jniñu jeē na quenda Jesús ini vehe quiyi ya. Te ni cucōo de silla nuū cúndaā jniñu, nuū máni máa yúu ni jecáva, te lugar un nání Gabata nuū yúhu hebreo. <sup>14</sup> Te cuacuu cahuxí uū, te jehíni quiví ún quejéé vico pascua. Te ni cahān Pilato jíin ñáyuu hebreo: Yáha índichi máa rey rō.

<sup>15</sup> Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéé cata caa rí rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnāhan ná, chi máa-ni rey Roma jeē cujéhu ndacu jniñu nuū ná.

<sup>16</sup> Yūcuán na te Pilato ni nacuāha de ya nuū i jeē na cúu yā jicā cruz. Te ni cajñi i ya cuango o jíin yá.

*Jeē ní cacata caa de ya jicā cruz*

*(Mt. 27.32-44; Mr. 15.21-32; Lc. 23.26-43)*

<sup>17</sup> Te ni quenda Jesús, ndíso ya cruz yā, cuango o de jíin yá ñn lugar nuū naní Yiquí Xíní, te nuū yúhu hebreo naní Gólgota. <sup>18</sup> Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn de ñn lado yā, te máa Jesús mēhñú. <sup>19</sup> Te suni ni ndacu Pilato jniñu jeē na cóndee jnūhun xíní cruz yā, jeē cahān: Tēe yáha cúu Jesús ñuu Nazaret, Rey ñayuu hebreo, achí. <sup>20</sup> Te cuehē ñayuu hebreo ni cacahu i jnūhun yáha, chi máa yajni yuñúú cúu nuū ní cacata caa de ya. Te jnūhun un yósó jíin yuhu hebreo jíin griego jíin latín. <sup>21</sup> Te táca sūtū cácujuhnu nuū ñáyuu hebreo, ni cacahān de jíin Pilato: Ma tēe ní jéé cúu de Rey ñayuu hebreo, chí sa suhva tee ní jéé máa de ni cahān jeē cúu de Rey ñayuu hebreo.

<sup>22</sup> Te ni cahān Pilato:

Ma násama rí jeē jé ni ndacu rí jniñu ni jecondee.

<sup>23</sup> Te soldado un, nuū ní cuu ni cacata caa de Jesús jicā cruz, te ni caquihin de sahna ya, te ni cajehnde de ni nduu cuñ parte, te ñn ñn parte ni cuu ñn ñn soldado un. Te suni ni caquihin de camisa yā. Te camisa un tu ní quícu, chí ni cunu nñí. <sup>24</sup> Te ni cacahān máa de:

Ma cáhnde yō, chí vāha ga na sáha yó sorteo, te na cóndēhe yó ndé ñn yó níhñ, achí de.

Te súcuan ni squícu jnūhun yósó núú tútu ñi nde jenahán jéē cahān Jesús: Ni caquihin de sahna rí cuu máa de. Te ni casáha de sorteo siquí camisa rí. Achí. Súcuan ni casáha soldado un.

<sup>25</sup> Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. <sup>26</sup> Te ni jito Jesús nuū naná yā jíin núú tēe scuáha jeē maní gā yā jíin, suni índichi de yūcuán. Te ni cahān yā jíin náná yā: Náná, nde vijna te máa de nucuíñi de cuu de sēhe ní.

<sup>27</sup> Yūcuán na te ni cahān yā jíin tēe scuáha ún:

Nde vijna te cuu ña nájñūhun náná rō, achí yá.

Te nde hora un ní cana de ña cuacondee ña vehe de condito de ña.

*Jeē ni jíihí Jesús*

*(Mt. 27.45-56; Mr. 15.33-41; Lc. 23.44-49)*

<sup>28</sup> Yūcuán na te ní jini Jesús jeē jé ní jinu táca jniñu jeē cánuú ndoho ya. Te návāha squícu jnūhun cáhán tutu ñi, te ni cahān yā:

Jíchí rí ndute, achí yá.

<sup>29</sup> Te yūcuan ín ñn tindhō ñūhun chitú vinagre iyá. Te ni cachundaji de ñn cachī nuū vinagre un, te ni catee de xinī ñn ndaha yūjnu hisopo, te ni catee de yuhu ya jeē cóho ya. <sup>30</sup> Te ná ni jihī ya vinagre un, te ni cahān yā:

Je ni jīnu, áchí yá.

Te ni cāyí-ni xinī yā, te ni jihī-ni ya.

### *Jeē ní cují soldado lanza xiin ya*

<sup>31</sup> Te inga quivī ún coo vico pascua. Te tēe hebreo tu cácu ni de jeē cóndita caa ndīyī ún jicā cruz quivī ndétátú un. Chi quivī ndétátú jeē cúu vico pascua, ñ ndasí gá vēsú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhīn tēe cándita caa, te na cújiyo de jicā cruz. <sup>32</sup> Te ni quecoo soldado, te ni cajehnū de sīhīn ñn tēe jeē ndíta caa jíin yá, te suni súcuan inga de. <sup>33</sup> Te nuū ní quecoo de nuū Jesús, te ni cajito de jeē jé ni jihī yā. Jeē yúcu ni ní cájehnū de sīhīn ya.

<sup>34</sup> Te ñn soldado chi ní cují de lanza xiin ya, te ni cane-ni niñī jíin ndute. <sup>35</sup> Te máá rí jeē tēe tutu yáha, ni jito rí jeē súcuan ni cuu, te nácani ndaā rí jñūhun ndese ni cuu. Te jíní rí jeē iyó ndáá jñūhun cáhán rí, návāha suni candíje máá ró jíināhan ró. <sup>36</sup> Chi súcuan ni cuu návāha squícu jñūhun cáhán tutu ñ: Ma cahnú de ni ñn yiqui ya, achí. <sup>37</sup> Te suni inga jñūhun cáhán tutu ñ: ñn quivī te coto i nuū Yā jeē ní cují i lanza, achí.

### *Jeē ní quindūji Jesús*

*(Mt. 27.57-61; Mr. 15.42-47; Lc. 23.50-56)*

<sup>38</sup> Te ni cuu tāca jēe yáha. Te iyó ñn tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnāhan de hebreo. Te ni cahān ndahú de jíin Pilato jeē na cuáha jñūhun quihīn de yiqui cúñu Jesús. Te ni jēhe Pilato jñūhun. Yūcuán na te cuahān José, ni snúu de yiqui cúñu Jesús. <sup>39</sup> Te suni ni jinū Nicodemo, tēe ni quiji nuū Jesús ñn jecuáa. Te ndíso de nájñūhun ocō uxí kilo sūje uvuā jeē ní saca jnāhan jíin yúcū áloe. <sup>40</sup> Te ndíndúú de ní caquihīn de yiqui cúñu Jesús, te ní cachusúcūn de jíin tira sahma jeē ní quivī yucū jeē jeén asīn ún, nájñūhun iyó costumbre máá ñāyuu hebreo jeē cáchindūji i ndīyī. <sup>41</sup> Te yajni nuū ní jihī Jesús iyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyī. <sup>42</sup> Te yūcuan ní cachindūji de Jesús, chí íne yajni yaū ndīyī ún. Chí je yajni quejéé quivī ndétátú de jeē cácu de ñāyuu hebreo, te tú na ley chindūji de ndīyī núu je ní quejéé quivī ún.

### *Jeē ní natecu Jesús*

*(Mt. 28.1-10; Mr. 16.1-8; Lc. 24.1-12)*

## 20

<sup>1</sup> Te jenéhen quivī domingo ni jinū María ñuu Magdala nuū ní yindūji Jesús, te yínee gá cúu. Te ni jito ña jeē ní cujiyo yuū ndihyú yuyáú ndīyī. <sup>2</sup> Yūcuán na te jínu ña cuahān ña nuū Simón Pedro jíin núu inga tēe scuáha ún jeē maní gá Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup> Te ní quendacoo Pedro jíin inga tēe scuáha ún, cuácondēhé de yaū ndīyī.

<sup>4</sup> Te cájini tayí ndíndúú de. Te inga tēe scuáha ún, ñihīn ga ni jinu de vēsú Pedro. Te xīhna gá de ni jinū yaū ndīyī. <sup>5</sup> Te ní scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quivī de. <sup>6</sup> Te

sáa te ni jinū Simón Pedro jeē ndiquín jnāhan de vēji de jín inga tēe ún. Te ni quiví de nuū ní yindūji Jesús. Te suni ni jito de jeē tira sahma cáyūcu máa na. <sup>7</sup>Te ni jito de sahma jeē ni ñūsúcūn xíní Jesús, tu catú jín tira sahma, chi ni natuu te catú sín. <sup>8</sup>Yūcuán na te suni ni quiví inga tēe scuáha jeē ni jínū xīhna gā nuū ní yindūji ya. Te ni jito de ndese íyó, te ni candíje de jeē ní natecu yā. <sup>9</sup>Chi nde ná tu jinūcoo de yaū ndiyí, te tu ní jécūhun ni de jnūhun cáhán tutu íi, jeē jini ñūhūn natecu yā núu je ni jihí yā. <sup>10</sup>Yūcuán na te ndíndúú tēe cáscuáha ún cuanungoo de vehe de.

*Jeē ní nane ya nuū María ñuu Magdala  
(Mr. 16.9-11)*

<sup>11</sup>Te María índichi ña ndáhyú ña nuū ní yindūji ya. Te níní ndáhyú ña, te ni scáyí ña máa ña, ni jito nihní ña ini yaū ún. <sup>12</sup>Te ni jito ña uū ndajéhé andiví, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ní catu yiquí cuñu Jesús. <sup>13</sup>Te ni cacahān yā jín ña:

¿Najehē ndahyú rō?

Te ni cahān ña:

Ni catava de Jítoho ná, te tu jíní na ndé nuū ní cachune de ya.

<sup>14</sup>Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nacuni ña jeē máa yá cúu. <sup>15</sup>Te ni cahān yā jín ña:

¿Najehē ndahyú rō? ¿Nde ñn nánducú rō? achí yá.

Te máa ña jéni ni ña jeē tēe ndío huerto cúu ya. Te ni cahān ña jín yá:

Núu máa ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

<sup>16</sup>Te ni cahān Jesús jín ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jín yuhu hebreo:

Raboni, achí ña. Te jnūhun un cúni cahān, Maestro.

<sup>17</sup>Te ni cahān Jesús jín ña:

Ma quehé ró rúhū, chí ná tu ndaa ri quínuhun rī nuū Tatá rī. Te cuáhān núu tēcá hermano rī, tēe ni cascuáha jín rí, te cachi rō nuū de jeē ndaa ri quínuhun rī nuū Tatá rī, jeē suni Tátá máa ró jijnáhan ró cúu. Te cúu ya Yaā Dios máa rí jín Yaā Dios máa ró jijnáhan ró. Achí yá.

<sup>18</sup>Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jéé ní jito ña nuū máa Jítoho yō jín jéé ni cáhān yā jnūhun yáha jín ña.

*Jeē ní nane ya nuū tēe cáscuáha jín yá  
(Mt. 28.16-20; Mr. 16.14-18; Lc. 24.36-49)*

<sup>19</sup>Te jeē ní cuaa máa quiví domingo un, te cahīn tútú tēe cáscuáha ún ini ñn vehe. Te cándihyū yehyí, chí cáyūhú de jnāhan de hebreo jeē coto xeēn i de. Te ni quee-ni Jesús, ni jecuññí yā mēhñū de vēsū ndihyú yehyí, te ni cahān yā jín de:

Ndeyí sñ coo ni rō jijnáhan ró, achí yá.

<sup>20</sup>Te ná ni cahān yā súcuan, te ni steén yā ndaha ya jín xiin ya nuū de. Te ni cacusñ ni tēe cáscuáha un jéé ní cajito de nuū máa Jítoho yō. <sup>21</sup>Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájnūhun ni tají Tátá rī ruhū ini ñayiví, suni súcuan táj rí rohó nacani ró jnūhun ri nuū ñáyu. Achí yá.

<sup>22</sup>Yūcuán na te ni tiví tachí yā nuū de jijnáhan de. Te ni cahān yā:

Vijna te ni canihīn rō Espírītu Santo. <sup>23</sup> Te tāca ñáyyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

### *Jeē ní nane ya nuū Tomás*

<sup>24</sup> Te Tomás, tēe ni cacu cuatí, ñn jnáhan jeē uxí uū tēe cáscuáha jíin yá, tu ní íne de quivī jeē ní nane Jesús nuū tāca gá tēe cáscuáha. <sup>25</sup> Yūcuán na te sava ga tēe cáscuáha un, ní cacahān de jíin Tomás:

Ni cajito ri nuū maá Jítoho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiṭi rī, achí de.

<sup>26</sup> Te nuū uná quivī, te tēe cáscuáha un cáhīin tútú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñū de, vēsū cándihyū yehyí. Te ni cahān yā jíin de:

Ndeyí sñ coo ni rō jijnáhan rō.

<sup>27</sup> Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje rō.

<sup>28</sup> Yūcuán na te ni cahān Tomás jíin yá:

Aī, Jítoho maá ná jíin Yaā Dios maá ná cúu ní, achí de.

<sup>29</sup> Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyyuu jeē candíje ruhū vēsú tu ní jíto i nuū rī, achí yá.

### *Najehē ni tee Juan libro yáha*

<sup>30</sup> Te suni ni sáha Jesús cuehē gā jniñu jéhu jeē ni steén yā poder yā nuū tēe cáscuáha jíin yá, jeē tu yósó núu tútu yáha. <sup>31</sup> Te tāca jniñu yáha ní tee ri návaha candíje ró jijnáhan rō jéé Jesús cúu Cristo, maá Séhe Yaā Dios. Chí jeē candíje ró yá, te cotecu rō ññ cáni sáha ya.

### *Jeē ní nane ya nuū uxá tēe cáscuáha jíin yá*

## 21

<sup>1</sup> Te ni cuu jecu quivī, te inga jínu ni nane Jesús nuū tēe cáscuáha jíin yá, jeē cáhīin de yumar Tiberias. Te suhva ni steén yā maá yá nuū de: <sup>2</sup> Cáhīin tútú Simón Pedro, jíin Tomás, tēe ni cacu cuatí, jíin Natanael, tēe ñnu Caná ndañūū Galilea, jíin ndindúú séhe Zebedeo, jíin úu gá tēe cáscuáha. <sup>3</sup> Te ni cahān Simón Pedro jíin de jijnáhan de:

Quíjnñ ri chācá.

Te ni cacahān de:

Suni quingoo ri jíin rō.

Te cuangoo de, te ni quāvícoo de ñn barco. Te tu ní cánihīn cuiṭi de ti jecuáá yúcuan. <sup>4</sup> Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. <sup>5</sup> Yūcuán na te ni cahān yā jíin de:

Aá rō jijnáhan rō, ¿á ní canihīn rō chācá caji yō?

Te ni cacahān de:

Tú cuiṭi, achí de.

<sup>6</sup> Yūcuán na te ni cahān yā jíin de:

Síngava ñnuu ró ichi lado váha barco, te nihīn rō tñ.

Te ni casíngava de ñunu, te tuá ní cúu cuiṭi natava de, jeē ni quívicoo cuehē ndasí cháca. <sup>7</sup> Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítoho yō cúu, áchí de.

Te jeē ní jíiní sōho Simón Pedro jeē maá Jítoho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. <sup>8</sup> Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chítú cháca. Chi tu jícá cáhiin de jíin ñuhun íchi, chi nájnūhun ciento-ni metro cúu. <sup>9</sup> Te nuū ní quendacoo de ini barco, te ni cajito de jeē nduhvá t̄cua ñuhūn, te íne staā jíin ñin chācá chíhyó. <sup>10</sup> Te ni cahān Jesús jíin de:

Cuáquihin jecu chācá jēe sa ní cajni ró, na táu yó, áchí yá.

<sup>11</sup> Te ni quívi Simón Pedro ini barco, te ni staa de ñunu, ni quee de jíin ndé nuū ñuhun íchi. Te ñúhun chítú cháca náhnu, ñin ciento uū xico uxí uní t̄i cúu. Te vesú ñin súcuan ti ñúhun, te tu ní táhndé ñunu. <sup>12</sup> Te ni cahān Jesús jíin de:

Nehen jijnáhan ró na cási ni yō.

Te ni ñin tēe cáscuáha ún tu ní cúndeyí ni de cajnūhún de ya núu ndé ñin cúu ya. Chi je cájini de jeē maá Jítoho yō cúu ya. <sup>13</sup> Te ni quindēhe Jesús yuñúhún, te ni quihin ya staā ún, te ni jēhe ya nuū de, te suni súcuan chācá un.

<sup>14</sup> Yāha cúu vuelta uní jeē ní nane Jesús nuū tée cáscuáha jíin yá, ná ni natecu yā.

### *Jeē ní ndajnūhún Jesús jíin Simón Pedro*

<sup>15</sup> Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á mánī gā rō jíin rí vesú tāca gá tēe yáha?

Te ni cahān de:

Je jíiní ni jēe maní na jíin ní, achí de.

Te ni cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

<sup>16</sup> Te ni cajnūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ni jēe maní na jíin ní, achí de.

Te ni cahān yā:

Condito rō ñáyuu cácuu nájnūhun lanchi ri núu súcuan.

<sup>17</sup> Te ni cajnūhún tucu ya de vuelta uní:

Simón sēhe Jonás, ¿á mánī rō jíin rí?

Te ni cucuihyá ni Pedro jeē ní cajnūhun yá de vuelta uní núu maní de jíin yá. Te ni cahān de:

Máá ní jíiní ni ndihi, te jíiní ni jēe maní na jíin ní.

Te ni cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. <sup>18</sup> Te jendaá cahán rí jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yá ró, te nasūu jēe cuní maá ró, chí inga ñáyuu quindēca i róhó nuū tu cuní ró quihīn rō. Te scáá rō ndindúu ndaha ró jēe cuu rō.

<sup>19</sup> Jnūhun yáha ni cahān yā jeē ní stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhyo cújéhnu Yāā Dios. Yūcuán na te ni cahān gā yā:

Condiquín rō ruhū jeē sáha ró jniñu ní ndacu ri nuū rō, achí yá.

*Jnūhun tēe scuáha jeē maní gā yā jíin*

<sup>20</sup> Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé iin de cúu jeē nastúu níhín? <sup>21</sup> Te jeē ní jito Pedro nuū téé ún, te ni cajnūhún de Jesús:

Te tēe yáha, ¿ndese coo jíin de?

<sup>22</sup> Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró chi condiquín rō ruhū jeē sáha ró jniñu ní ndacu ri nuū rō, achí yá.

<sup>23</sup> Yūcuán na te jnūhun yáha ní jité núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chi sa suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

<sup>24</sup> Te tēe scuáha un jēe maní gā Jesús jíin, suu cúu ruhū jeē nácani jnūhun tācá jniñu yáha, te suu ri téé tāca jnúhun yáha. Te cájini rō jijnáhan ró jéé iyó ndáá jnūhun nácani ri.

<sup>25</sup> Te suni iyó cuéhē ndasí gá jniñu ní sáha Jesús. Te núu tee yó ná iin ná iin, te ma cánda ní íñáyiví cuhun tutu jeē cóso jnūhun ún, jéni ni rī. Te ni cuu. Amén.

## JNIÑU JEHNU JEE NI CASAHA TEE APOSTOL

### *Jeē ni jéjnūhun ya quiji Espíritu Santo*

<sup>1</sup> Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnūhun ni steén yā nde quiṽí ní quejéé yá ni sáha ya <sup>2</sup> te nde quiṽí ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. <sup>3</sup> Te nuū ni jínu ni ndoho ya jeē ní jíhī yā, te uū xico quiṽí te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndāā jeē ní natecu yā. Te ni cahān yā jíin de siquī ndese ndácu Yáa Dios jniñu.

<sup>4</sup> Te ná cáhīn tútu de jíin yá, te ni cahān yā jíin ndihi de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun maá Tátá rī Yáa Dios. Chí je ni cachi rī nuū rō jeē ni jéjnūhun ya quiji Espíritu Santo. <sup>5</sup> Chí Juan, jendaá jeē maá ndute-ni ni scuándute de ñayuu. Te rōhó jíjnáhan ró, jecu na quiṽí te nájnūhun cuandute ró jíin Espíritu Santo, cúu jeē condee yā ini anuá rō, áchí yá.

### *Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhīn tútu jíin yá, ni cacajnúhún de ya:

¿A vijna te nasáha ní jéē ñayuu ñuu yō Israel ndujéhnu i ndacu i jniñu nuū nación yō chí naún? áchí de.

<sup>7</sup> Te ni cahān yā:

Ma cúu cuni rō quiṽí chí cuiyā jeē cóo jeē ni sándaā maá Tátá rī, chí maá ñn-ni maá yá jiní yā na quiṽí sáha ya. <sup>8</sup> Te jeē cúni rō cúu jeē quee Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnūhun rī ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

<sup>9</sup> Te ni ndihi ni cahān yā táca jnūhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahān yā, te tuá ni cájito de ya. <sup>10</sup> Te níni cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuiñi yā xiin de jíjnáhan de, te cájito ya nájnūhun tēe. <sup>11</sup> Te ni cacahān yā jíin de:

Rōhó tēe Galilea, ¿najehē cájito ndaa ró ichi ándiví? Chí maá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

### *Jeē ní canacāji de Matías jeē nucuiñi de nuū Judas*

<sup>12</sup> Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñn kilómetro-ni, cūha jeē ni jéhe ley permiso caca ñayuu quiṽí ndétátú. <sup>13</sup> Te ni ndivícoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. <sup>14</sup> Táca tēe yáha, níni cándutútú inuú de cájicān tahu de jíin táca ñani Jesús jíin náná yā María jíin sava ga ñahan.

<sup>15</sup> Te ñn quiv̄i te ni jecondichi Pedro nuū tācá hermano cācandíje. Te cáhīn nájñuhun ciento ocō ñayuu. Te ni cahān de:

<sup>16</sup> Hermano jijnáhan ní, ñi squicu nahin jñuhun cáhán tutu ñi jeē ni cáhān David nde jenahán ní sáha Espiritu Santo. Te jñuhun un ní cuu siquī Judas jeē ní yosnúu nuū téē ni cajñi Jitoho yō Jesús. <sup>17</sup> Te suu téē un ní jica de jíin yó, te ni chindéé ñáhán jñáhan de jíin yó siquī jñiñu ní jeni ya yohó. <sup>18</sup> Te ni cajeen ñn ñuhun jíin xuhun ní ñihñ téē un siquī jñiñu neē ní sáha de. Te ni ñinga ndeyi de, te ni ndatā sáva chíji de, te ndih̄i yiti de ni jité. <sup>19</sup> Te ni jité jñuhun yáha nuū tāca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta ñiñ. <sup>20</sup> Chi súcuan je yósó nuū tútu Salmo siquī Judas:

Vehe de na quéndō iyú,

te ma cōndee ñi ñn ga ñayuu ini vehe ún.

Te suni cáhán:

Jñiñu ní condiso de na cóndiso inga téē.

Achí.

<sup>21</sup> Núu súcuan te jíni ñuhún jeē núcuñi ñn téē lugar maá de jíin yó. Te téē nucuiñi jíin yó un, nacāji yó de mēhñu tāca téē ni cajica jíin yó tāca quiv̄i jeē ní jica máá Jitoho yō Jesús jíin yó. <sup>22</sup> Te téē nacāji yó un cúu téē jeē ní ñyo de jíin yó nde quiv̄i ní jendute ya ni sáha Juan, te nde quiv̄i ní ndaa ya cuanuhun yā andiv̄i. Te téē nucuiñi jíin yó na cúu de testigo jíin yó jeē jé ni natecu yā, achí de.

<sup>23</sup> Te ni catee nuū de uñ jñáhan téē: Matías jíin José jeē naní de Barsabás te suni naní de Justo. <sup>24</sup> Te ni cajicān tahú de:

Tátá Yāā Dios, máá ní chí jíni ñi ndese cáa ánuá tāca ñáyuu. Núu súcuan te jeē ndindúú téē yáha, stéén ñi ndé ñn de cúu jeē ní nacāji ní. <sup>25</sup> Te condiso jñiñu de cuu de apóstol. Te naquihñ de jñiñu ní stóo Judas, chí ni sáha de cuēchi te cuahān de lugar xeēn nuū cánuú quihñ de, áchí de.

<sup>26</sup> Yūcuán na te ni casáha de ñn sorteo te ni jinū Matías, te ni nucuiñi de ni nduu de jñáhan ndihúxi ñn apóstol.

### *Jeē ní quee Espiritu Santo*

## 2

<sup>1</sup> Te máá quiv̄i víco Pentecostés ni cahīn tútú ñáyuu cācandíje ñuu Jerusalén.

<sup>2</sup> Te sanaa-ñi te ni quejéé ñihñ vēji nde andiv̄i nájñuhun tachī ñihñ quée, te tāca ñáyuu jeē cáyūcú ini vehe un ní cajini sōho i jeē ñihñ ún. <sup>3</sup> Te ni cajito i nájñuhun yáñuhñ jeē ní cajitē núu te ni cacucōo xiní ná ñn ná ñn i. <sup>4</sup> Te ndih̄i i, ni cunuú Espiritu Santo jíin i, te ni quejéé i cáhān i sññ sññ yuhu, ndese ni stéén maá Espiritu nuū ná ñn ná ñn i cahān i.

<sup>5</sup> Te ñuu Jerusalén, suni cáhīn ñayuu hebreo, yñíuhún núu Yāā Dios, jeē ní quijicoo i nde tācá nación ññ cáhnu ñayiv̄i. <sup>6</sup> Te jeē ni ñihñ súcuan te ni cacutútú cuéhē ñayuu ún. Te ni cunéé íi ni i jíjnáhan i, chí ná ñn ná ñn i ni cajini sōho i jeē téē ni canihñ Espiritu Santo cáhān de jñuhun yuhu ñuū jicá nuū vēji i. <sup>7</sup> Te ni canaa ni i cájito i te ni cacahān i:

¿A násūu téē Galilea cácuu tāca téē yáha jéē cáhān de tācá yuhu ñuū nuū vējicoo yó? <sup>8</sup> ¿Na vé ni cuu yáha núu súcuan? Chí ná ñn ná ñn yó cájini sōho yó cáhān de jñuhun yuhu ñuū nuū ní cacacu yó. <sup>9</sup> Chí vējicoo yó ndé tācá ñuu jicá. Sava yó vēji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. <sup>10</sup> Suni nde Frigia



jiín Panfilia jiín Egipto jiín tijni ñuu jeē ine nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē vējicoo ñuu Roma, sava yó cácuu máá ñáyuu hebreo te sava ga yō cácuu ñayuu síin ñuu, ni cacandije yó ndíquín yō ley ñayuu hebreo. <sup>11</sup> Suni nde Creta jiín Arabia vējicoo sava yó. Te cájini sōho yó jēē jiín jnūhun yuhu ñúu ná ñin ná ñin máá yó cácahān de tācá jniñu jéhu ní sáha Yaa Dios, achí i.

<sup>12</sup> Te ndihi i chi ni canaa ñi ni i cájini nahín i. Te ni candajnuhún i jiín jnāhan i:

¿Na vé cúu jeē ní cuu núu súcuan jeē cácahān de yuhu ñúu yō? achí i.

<sup>13</sup> Te sava i ni cacahān catá i:

Tuú chi jeē cánajini de, achí i.

### *Jeē ní nacani Pedro jnūhun nuū ñáyuu*

<sup>14</sup> Yūcuán na te ni candocuiñi Pedro jiín ndihúxi ñin ga apóstol, te ni cahān jee Pedro jiín ñáyuu ún:

Ñihín jnāhan ñuu yō hebreo, jiín ndihi níhín jēē cáyūcu ní Jerusalén, jnūhun yáha na chúhun ni ni jijnāhan ní, chi cuni nahín ní cahān na jiín ní. <sup>15</sup> Chi máá ná jijnāhan ná, nasūu jēē cájini ná nájnuhun cájeni ni ní, chi sáá cahān jenéhen cúu, te nasūu hora cánajini ñayuu cúu. <sup>16</sup> Chi sa suhva squícu jniñu yáha nájnuhun ni cahān Joel, tēe ni nacani jnūhun Yaa Dios nde jenahán, chi súcuan ni cahān de:

<sup>17</sup> Achí Yaa Dios: Quiví sándihí na

te tají rí Espiritu rí cunuú yá jiín táca ñáyuu,

te sēhe yíí ró jiín séhe síhí ró, nacani i jnūhun ri,

te tāca tée lulí chi coto ndijin de jeē steén rí nuū de,

te tāca tée jéhu chi sáha ri jeē scóto jēni de.

<sup>18</sup> Te quiví ún chi tají rí Espiritu rí cunuú yá jiín táca mozo rí, cúu tēe cúu ñahan, te nacani i jnūhun rí.

<sup>19</sup> Te ichi ándiví sáha ri jniñu jéhu jeē náá ni ñayuu coto i,

te sáha ri jniñu jéhu ñi ñayiví jēē steén jeē cujéhu rí,

chi coo ñiñi jiín ñúhūn jiín ñúhmā nájnuhun vicó.

Yūcuán cúu jeē sáha ri jeē cóo jnūndóho xeēn.

<sup>20</sup> Te nduu jnúú níandii te ma cūndijin gā,

te yoó coto cuéhé nájnuhun niñi.

Yūcuán na te quee quiví jeē ndíji máá Jítóho rō Jesús.

Quiví ún coo cuéhé jniñu jéhu, te cuni ndihi ñayuu jeē quiví máá Jítóho rō cúu.

<sup>21</sup> Te tāca ñáyuu jeē cahān ndahú i jiín yá te jnama ya i, achí Yaa Dios.

Achí Joel ni nacani de jnūhun ya.

<sup>22</sup> Jeē yúcuán níhín tée ñuu yō Israel, cuni nahín gá ni jnūhun yáha jijnāhan ní. Ni steén Yaa Dios jeē ní tají yá máá Jesús, Yaa ní jehnu ñuu Nazaret, chi máá Yaa Dios ni jēhe ya jeē ni sáha Jesús jniñu jéhu mēhñu máá ní, jiín jniñu jeē steén jeē cujéhu ya, te jniñu un ní canaa ni ni ní cajito ní. Te je cájini váha ní jēē súcuan ni cuu. <sup>23</sup> Te máá ní ni cajniñi ní yá, te ni cajendeca ní yá nuū tée xeēn ni cajehni de ya jicā cruz ni casáha ní. Te nde jiín tiempo je ni jini Yaa Dios jeē súcuan sáha ní jijnāhan ní, chi súcuan je ni sándaā yá. <sup>24</sup> Te ni nastécu Yaa Dios Jesús te tuá ni cúu ya ndíyi, chi jnūhun xeēn jeē jihí ñayuu, tuá na vé cúu ga sáha jíin yá. <sup>25</sup> Chi nde jenahán suhva ni tee David jnūhun ndese ni cahān Jesús jiín Yaa Dios:

Jini na núu máá ní jeē cúu ní Jítóho ná, chi níí cáni ndéé ní jiín ná,

chi ndéé ní ichi ndáváha ná, cúu jeē chindéé ñáhán ní sãña náváha coo ndeyí ní ná.

<sup>26</sup> Jeē yúcuán cúsií ní ná te cáhán na jnúhun sií ní.

Jeē yúcuán ma nácani uhū ní na síquī jnúhun cuu ná.

<sup>27</sup> Chi ma cuáha ní jnúhun quendōo ánuá na lugar nuū cáyūcu ánuá ndīyí, ní ma cuáha ní jnúhun tehyū ná, chi jéjníñu ná núu ní te maní ní jíin ná.

<sup>28</sup> Te ní steén ní núu na jéē nátecu ná,

te sáha ní jéē cusíí teyí ní ná condee na jíin ní ní cáni.

Achí Jesús, ní achí David.

<sup>29</sup> Tãca níhín jíjnáhan ní, na cástūhun cájí ná nuū ní jnúhun jíi yō David, chi tu ní cáhán de jnúhun yáha síquī maá de. Chi ní jihī de te ní quindūji de, te jíiní yō nuū yindūji de nde vijna. <sup>30</sup> Chi ní cuu de tēe ní nacani jnúhun Yaā Dios nde jenahán. Te ní jini de jeē váha ní jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ní ndacu de jniñu jeē ní cuu de rey. <sup>31</sup> Te nde jíin tiempo ní jini de jeē nátecu Cristo, te ní cahán de jeē anuá yā, ma ndóo lugar nuū cáyūcu ánuá ndīyí, ní yiqui cúñu yā ma tehyú. <sup>32</sup> Chi Yaā Dios ní nastécu yā Jesús, te maá ná cácuu ná testigo jeē ní natecu yā. <sup>33</sup> Te ní ndujéñu tucu ya ní sáha Yaā Dios jíin poder yā. Te nde nuū maá Yáā Dios, Yaā cúu Tátá yā, ní nihīn Jesús Espíritu Santo, chí súcuán ní jejnūhun ya. Te ní tají Jesús Espíritu Santo, te suu ya sáha jniñu jeē cájito ní te cájini sōho ní vijna. <sup>34</sup> Te David, nasūu síquī maá de ní cáhán de tãca jnúhun yáha, chí tu ní ndáa yiqui cúñu de andiví. Chí síquī Cristo cúu jeē ní cahán de suhva:

Maá Yáā Dios ní cahán yā jíin Jítoho rī Cristo:

Cucōo ró ichi ndáváha ri jeē steén jeē kujéñu ró.

<sup>35</sup> Te na sáha ri jeē quende rō poder tãca jéē cájito uhū rohó, áchí yá.

Achí David.

<sup>36</sup> Núu súcuán te ndihi ní jéē cácuu yó ñayuu Israel, na cúni vāha ní jéē vēsú ní cajehni ní yá jicā cruz, te Yaā Dios ní jeni ya maá Jesús jeē cúu ya Jítoho yō te suni cúu ya Cristo, Yaā jnáma yóhó, áchí Pedro jíin í.

<sup>37</sup> Te jeē súcuán ní cajini sōho i jnúhun yáha, te ní cajnahuhū ní anuá i. Te ní cacajñuhún i Pedro jíin tãca gá apóstol:

¿Te ndese sáha ná jíjnáhan ná núu súcuán? áchí i.

<sup>38</sup> Te ní cahán Pedro jíin í:

Nacani ní ní jéē stóo ní cuéchi ní jíjnáhan ní, te cuandute ní jéē ní cacandíje ní Jesucristo, náváha cone cáhnu ní Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ní. <sup>39</sup> Chí súcuán ní jejnūhun maá Tátá yō Yaā Dios nuū yō jíin núu séhe yó, te suni súcuán ní jejnūhun ya nuū ñayuu tãca gá nación, tãcá i jeē cána ya i candíje i.

<sup>40</sup> Te jíin cuéhē gā jnúhun súcuán ní cahán cají Pedro, te ní stihví ní de i:

Nducú ndéyí ní jeē na cácu ní, chí jñahnū ndetū ñayuu casáha jniñu néé, áchí de.

<sup>41</sup> Yūcuán na te tãcá i jeē ní cajetáhú jnúhun ní cahán de, ní cajendute i. Te quiví un ní nducuehē gā ñayuu cácuandíje, nájñūhun unī mīl gā ñayuu. <sup>42</sup> Te ní cahīn níhín i síquī jnúhun cástéén apóstol. Te inuú-ni cándajñūhun mání i te cájicān tahuí i, te ñin cáhnu-ni cáyeji i pan, nájñūhun ní steén maá Jítoho yō jee núcūhun ní yō síquī yā.

*Ndese ní coyūcu ñáyuu jeē ní cacandíje jeē xíhna ññuhún*

<sup>43</sup> Te ndihi ñayuu ni cayūhú i ni cajito i, chi cuehē jniñu jénu jeē steén jeē kujéhu ya ni casáha tēe apóstol. <sup>44</sup> Te inuú ní cahīyo ni ñayuu cácandíje, te ni cacuu inuú i táca jēe cánevāha i. <sup>45</sup> Te ni caxícó i na-ni na vé cánevāha i, te ni casaja i xūhun un núu táca jnāhan i, núu ndese jíni ñūhún in in i. <sup>46</sup> Te ndijnahan quivī ni candutútú i ini templo. Te maní ni cayeji cáhu i pan táca vehe jnāhan i nájnūhun ni steén yā, te ni cahīyo sīñ ni i. <sup>47</sup> Te ni cacahān i jeē yóhyo cújéhu Yaa Dios. Te ndihi ñayuu ñuu un ní cajejnūhún i ñayuu cácandíje. Te ndijnahan quivī ni jnama Jitoho yō sava ga ñayuu, te ni nduu inuú i jíin ñayuu cácandíje.

### *Jeē ní nduvāha tēe ríngo*

## 3

<sup>1</sup> Te in quivī te máa cáhunī jehini ni caa Pedro jíin Juan cuango de templo, chi hora un cájicān tahu jnāhan de hebreo. <sup>2</sup> Te cájendēca ñayuu in tēe cáringo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícan de caridad nuū táca ñayuu quivīcoo ini templo. <sup>3</sup> Te tēe un ní jito de nuū Pedro jíin Juan jeē véji de quivīcoo de ini templo, te ni jícan de caridad nuū Pedro jíin Juan. <sup>4</sup> Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu rī jijnāhan ri, achí de.

<sup>5</sup> Te máa tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. <sup>6</sup> Te ni cahān Pedro:

Tú na xūhun plata ni xūhun oro cánevāha ri. Te iyó in jeē vāha ga sáha ri jíin ró: jíin poder maá Jesucristo, Yaa ní jehnu ñuu Nazaret, cáhān rī jíin ró, ndocuiñi te cata ró, achí de.

<sup>7</sup> Te ní jñi de ndavāha tēe ún, te ni ndonehen de. Te jehē de jíin súcūn jehé de ni nduvāha-ni. <sup>8</sup> Te in ni scānda de máa de ni ndocuiñi de, te ni quejéé de jíca de. Te ni quivī de jíin Pedro jíin Juan ini templo, jíca de, cánda de, te nácuatáhu de nuū Yaa Dios. <sup>9</sup> Te ni cajini táca ñayuu jeē jíca de te nácuatáhu de nuū yā. <sup>10</sup> Te ni canacuni i de jeē maá de cúu tēe ni condee yehyí templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

### *Jeē ní nacani Pedro jñuhun ini corredor jeē naní Salomón*

<sup>11</sup> Te tēe ni nduvāha ún, tu siaá de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. <sup>12</sup> Te ni jito Pedro jeē ní cutútú ñayuu ún, te ni cahān de jíin i:

Nihín tēe ñuu yō Israel jijnāhan ní, ¿najehe cánaa ni ni cájito ní jniñu yáha? ¿Najehe cájito ní núu ná te cájeni ni ní jéé maá ná jijnāhan ná iyó poder na jéé sáha ná jéé nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? <sup>13</sup> Tuú chi máa Yaa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha návāha cuni ñayuu jeē kujéhu Sēhe ya Jesús, Yaa jeē ní cajeñdēca ní núu tēe cácujeñhu. Te ná ni cuni Pilato jeē siaá de ya, te tu ní cájēhe ni jñuhun. <sup>14</sup> Te ni casquéhichí ni yá vesú cúu ya Yaa ndaā, Yaa ñi. Te sa suhva in tēe jéni ndiyi ni cacahān ni jíin Pilato jeē na siaá de. <sup>15</sup> Te ni cacahān ní jéé na cúu Yaa jeē sáha jeē técu ndihi-ni. Te Yaa Dios ni nastécu yā Jesús jeē ní cuu ya ndiyi, te máa ná cácuu testigo jeē ní natecu yā. <sup>16</sup> Te tēe yáha jéé cájito ní te cáncuni ní de, ni candíje de jíin ná jeē iyó poder Jesús

nasávāha ya de, te jeē yúcuan ní nasávāha ya de. Te jeē súcuan ní cacandíje ná ní sáha ya, jeē yúcuan ní nduvāha vāha de nájñūhun cájito ndíhi ní.

<sup>17</sup> Te na cástūhun ná nuū ní jínáhan ní, je jíní na jeē maá ní jínáhan ní jíní tée cácujeñnu nuū yō, tu ní cájecūhun ní ní, te jeē yúcuan ní cajehni ní yá. <sup>18</sup> Te súcuan ní squícu jñūhun ní cahān Yaā Dios nde jenahán jeē cánuú ndoho Cristo síquī cuéchi ñayuu, chí ní sáha ya jeē súcuan ní cacahān tēe ní canacani jñūhun ya nde jenahán. <sup>19</sup> Te na nácani ní ní jéé stóo ní cuéchi ní, te nasāma ini ní, te quivícoo ní ndaha Yaā Dios návāha ndahva yā cuéchi ní. Te quee quiví jeē ndúsñi ní ní sáha máá Jítoho yō. <sup>20</sup> Te natají yá Jesús ndiji ya, chí cúu ya Cristo, Yaā ní jeni Yaā Dios jeē jnáma ya yohó. <sup>21</sup> Te jíní ñúhún jeé cóo ya andiví ndé nasájeé yá táca jeé iyó, nájñūhun ní cacahān tēe ndoo ní canacani jñūhun nde jenahán ní sáha Yaā Dios. <sup>22</sup> Chí suhva ní nacani jíí yō Moisés jñūhun nuū táca jíí yō: Máá Jítoho yō Yaā Dios cani ya Yaā nacani jñūhun nuū rō jijnáhan rō, nájñūhun ní jeni ya ruhū. Te cuu ya ñin jnáhan ñuu yō. Te na chúhun ní rō táca jñūhun jeē nácani ya ún. <sup>23</sup> Te núu ndé tée tú chuhun ní de jñūhun cahān yā, jñahnū ndetū de, te ma cúu ga de jnáhan ñayuu yā Israel, áchí Moisés.

<sup>24</sup> Te táca tēe ní canacani jñūhun nde jenahán, nde tiempo ní quiiji Samuel te ní gá nde vijna, suni ní canacani de jñūhun síquī táca jñiñu cúu quiví yáha. <sup>25</sup> Yucūn maá tēe ní canacani jñūhun ya nde jenahán cácuu yó, te suni síquī maá yō jijnáhan yó cúu jeē ní sáha Yaā Dios contrato jíí jíí yō. Chí ní cahān yā jíí Abraham: Yucūn maá rō cane Yaā sáha jeé quéndōo ndetū táca ñayuu ní cáhnu ñayiví, áchí yá. <sup>26</sup> Te jeē ní nastécu Yaā Dios Sēhe ya, te ní quiiji ya nuū maá yó xíhna gā, návāha quéndōo ndetū yō sáha ya, chí sama ya anuá yō jeē ma sáha ga yō jñiñu neé, áchí Pedro.

### *Jeé ní cajendēca de Pedro jíí Juan nuū tēe cácujeñnu*

## 4

<sup>1</sup> Te Pedro jíí Juan ní ní cácahān gā de jíí ñayuu ún te ní quecoo táca sūtū jíí tēe grupo saduceo, jíí tēe cácujeñnu nuū tēe cándito templo. <sup>2</sup> Te yōhyo ní caquiti ní de síquī jeé castéén Pedro jíí Juan nuū ñayuu, jíí jeé cácani de jñūhun jeē nátecu ndíyi chí je ní natecu Jesús. <sup>3</sup> Te ní cajñi ún de, te ní cachuhun ún de vecāa cone de nde cundijin inga quiví, chí je ní ini. <sup>4</sup> Te cuehē ñayuu jeé ní cajini sōho jñūhun ní cacahān Pedro jíí Juan ní cacandíje i. Te ní nduu nájñūhun uhūn mil jeē maá nene tēe jeé ní cacandíje.

<sup>5</sup> Te jeé ní cundijin inga quiví ún, te tēe cácujeñnu nuū ñayuu hebreo jíí tēe jéhu cándiso jñiñu jíí tēe cástéén jñūhun tutu ley yā, ní candutútú de ini ñuu Jerusalén. <sup>6</sup> Te suni ní candutútú de jíí Anás jeé cúu sutú cujéñnu ga, jíí Caifás jíí Juan jíí Alejandro jíí táca gá jeé cácuu jnáhan sutú cujéñnu ga ún. <sup>7</sup> Te ní candacu jñiñu jeé na quíjicoo Pedro jíí Juan condichi de mēhñú, te ní cacajnūhún de:

¿Ndé ñin ní tejniñu rōhó te ndese ní nihín jñiñu ró ní sáha ró jeé ndúvāha tēe yáha? áchí.

<sup>8</sup> Yūcuán na te Pedro chí ní cunuú maá Espírítu Santo jíí de, te jíí poder yá ní cahān de jíí táca tēe ún:

Tāca nihín tēe cácujeñnu nuū ñúu yō Israel jíí táca nihín tēe jéhu cándiso jñiñu, <sup>9</sup> vijna te cástíchí ní sáña síquī ñin jñiñu váha ní casáha ná jeé ní nduvāha tēe chúhú yáha. <sup>10</sup> Te na cástūhun ná nuū nihín jeé cácujeñnu ní, návāha suni cuni ndíhi jnáhan ñuu yō Israel jeé jíí poder maá Jesucristo, Yaā ní jéhu ñuu

Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ní jicā cruz, te ni sáha Yaā Dios jeē ní natecu yā. <sup>11</sup> Jesús cúu nájñuhun yuū cimientu jeē quítuu vehe. Te máá ní jijnáhan ní cácuu nájñuhun tēe casáha vehe, te ni casquéhichí ní yá nájñuhun jeē cátejiyo ní yúū, chi tu ní cácanđje ní yá. Te ni sáha Yaā Dios jeē cúu ya nájñuhun yuū cánuu gá jeē quítuu vehe. <sup>12</sup> Te tú cuiti inga jeē cúu jnama yóhó, chi tuá na inga jeē cujéhnu ní jéni Yaā Dios ini ñayivi yáha jéé cúu jnama yóhó, áchí Pedro.

<sup>13</sup> Yūcuán na te ni cajini un jéé Pedro jiín Juan jéhnu-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jiín Jesús. <sup>14</sup> Te cándēhe nuū tēe ni nduvāha un, índichi de jiín Pedro jiín Juan, te tu ní cánihīn gā modo ndese ga cahān. <sup>15</sup> Yūcuán na te ni candacu jñiñu jeē na quéndacoo sīn de yatā véhe juzgado te ndaññuhun máá jijnáhan. <sup>16</sup> Te ni cacahān:

¿Ndese sáha yó jiín tēe yáha núu súcuan? Chi ni jitē jñuhun yáha núu táca ñayuu ñuu Jerusalén jeē súcuan ni casáha de ññ jñiñu jéhnu, te ma cúu cahān yō jeē tu iyó ndáa. <sup>17</sup> Te návāha ma cuité ga jñuhun yáha, na cúxeēn yō nuū de jeē ma cahān cuiti gā de jñuhun Jesús nuū ní ññ ñayuu, áchí.

<sup>18</sup> Te ni cacana ún de, te ni cacahān ñihin jiín de jeē ma cahān cuiti gā de jñuhun Jesús ni ma steén gā de jñuhun un núu ní ññ ñayuu. <sup>19</sup> Yūcuán na te ni cacahān Pedro jiín Juan:

Cani vāha ní te núu nájñahan ni Yaā Dios jeē stóo ná jñiñu ní ndacu ya jeē sáha ná te cuandije ná máá na jñiñu nándacu ní. <sup>20</sup> Chi ma cúu stóo ná jñiñu jeē nácani ná jñuhun ní cajini sōho ná jiín jñiñu ní cajito ná, áchí de.

<sup>21</sup> Yūcuán na te tēe ni cacutútú un ní cacuxeēn tucu de nuū Pedro jiín Juan. Te ni casiáa de cuango de, chi tú cuiti na modo stóho de chi cáyūhu cájito ñayuu, chi siquī jñiñu jéhnu ni cuu ún te ndihi i cácahān i jeē yóhoyo cújéhnu Yaā Dios. <sup>22</sup> Chi tēe jeē ní sáha ya jñiñu jéhnu jiín de jeē ní nduvāha de, víhyá gā uū xico cuiyá de.

### *Jeē ní cajicān tahú ñayuu cácanđje*

<sup>23</sup> Te ná ni casiáa un Pedro jiín Juan cuango de, te ni najinūcoo de nuū táca gá jñáhan de, te ni cacachi de ndese ni cacahān sutú cácujeñnu jiín tēe jéhnu cándiso jñiñu. <sup>24</sup> Te jeē ní cajini sōho de jñuhun yúcuan, te inuú-ni ni cajicān tahú de nuū Yaā Dios:

Tátā Yaā Dios jeē cujéhnu ní núu ndihi, máá ní cúu Yaā Dios ni sáha andivi jiín ñayivi jiín mar jiín táca ndihi jeē iyó. <sup>25</sup> Te jeē jiín Espíritu Santo te ni sáha ní jéé ni cáhān mozo ní David nde jenahán:

¿Najehē cáquiti ndevāha ni ñayuu sīn nación?  
 ¿Te najehē cájeni sáa ni i jeē ndónđa i siquī ní?

<sup>26</sup> Ni cacutútú jéé cácuu rey ñayivi jijnáhan, te tēe cácujeñnu ni cacutútú de, te inuú-ni ni candonda de siquī máá ní jeē cúu ní Jitoho ná, jiín siquī Cristo, Yaā jeē ní jeni ní. Achí David.

<sup>27</sup> Te jendaá chi Herodes jiín Poncio Pilato jiín táca tēe ñuu yō Israel jiín tēe táca gá nación, ni cacutútú de ini ñuu yáha ní candonda de siquī Séhe ññ ní Jesús, Yaā ní jeni ní. <sup>28</sup> Te súcuan ni cuu návāha squícu táca jñiñu jeē jiín poder ni ní cundaā ni ni ndé jenahán jéé súcuan coo. <sup>29</sup> Te vijna, Tátā, coto ní ndese cácahān xeēn de nuū na jijnáhan ná, te cuāha ni fuerza ni núu na jéé

cácuu ná mozo ni, návāha jéhnū-ni nacani ná jnúhun máá ní. <sup>30</sup> Te jín poder ní nasávāha ni ñāyuu cácuuhū, te sáha ní jniñu jéhnū jeē steén jeē cujéhnū ní. Te táca jéē yáha sáha ní jín poder Sēhe ñi ní Jesús, áhí i jínáhan í.

<sup>31</sup> Te nuū ní ndíhi ní cajicān tahú i, te nuū cáyūcu tútú i un ní sáha ya jeē ní jnáa. Te ndíhi i ní cunuú Espírítu Santo jín i, te ni jēhe ya fuerza te jéhnū-ni ní canacani i jnúhun Yaā Dios.

### *Jeē ní canevāha cáhnu i ndajníñu*

<sup>32</sup> Te ñayuu cuehē jeē ní cacandíje chí inuú cáhīyo ni i jínáhan i. Te tú ni ñi ní cáhán jeē ndajníñu jeē névāha máá i cuu máá-ni i, chí táca ndajníñu ní canevāha cáhnu i. <sup>33</sup> Te ñihin cánacani apóstol jnúhun jeē ní cajito de jeē ní natecu Jitoho yō Jesús. Te yōhō ni chindéé ñáhán yá ñayuu cácandíje. <sup>34</sup> Chí tú cuítí ní ñi ní ndóho jeē cumaní nuū i, chí táca ñayuu cánevāha cuehē ñuhun chí vehe, ní caxícó i sava te ni caquindeca i xūhún un. <sup>35</sup> Te ni cajēhe i xūhún un núú téē apóstol, te ni casaja téē apóstol nuū ñayuu cácandíje núu ndese jini ñúhún ñi ñi. <sup>36</sup> Te íyó ñi téē nání José jeē cúu yucún Leví, ní cacu de Chipre, ñuhun jeē íne sún nuū ndúte. Te téē apóstol ní casnání de téē ún Bernabé, jeē cuní cahān: téē cáhán jnúhun ndeyí ní. <sup>37</sup> Te ni xícó de ñi ñuhun de, te ndáhá de xūhún un ní jēhe de nuū téē apóstol.

### *Siquí cuēchi jeē ní casáha Ananías jín Safira*

## 5

<sup>1</sup> Te suni inga téē nání Ananías jín ñasihí de Safira, ní caxícó de ñi ñuhun de. <sup>2</sup> Te ni chuvāha de sava xūhún un cuu máá de jín ña, chí súcuan ní candajnúhún de jín ña, te ndáhá de inga sava nájnūhun jeē ndíhi cúu, te ni jēhe de nuū téē cácuu apóstol. <sup>3</sup> Te ni cahān Pedro:

Ananías, ¿naun ní jēhe ro jnúhun jeē quívi jexeén, jeē cúu Satanás, ini anuá rō te stáhú ró Espírítu Santo cuní rō? Chí jeē ní caxícó ró ñuhun ró te cuēchi ró cúu jeē tu ní cáchi ndaā rō jeē ní squéndōo ró jecu xūhún un cuajníñu máá ró, chí ní sáha ró nájnūhun jeē ndíhi xūhun ní jēhe ró. <sup>4</sup> ¿Te á násūu cuenta máá ró cúu ñuhun un ndé ná tu xico ró? Te ná ní xico ró ¿te á násūu cuenta máá ró cúu xūhun jéē cuajníñu ró ndé nuū cuní máá ró? ¿Te naun ní jeni ní rō jeē stáhú ró súcuan? Te nasūu máni máá téē cúu jeē jícū ró stáhú ró, chí suni Yaā Dios, áhí Pedro.

<sup>5</sup> Te ná ní jini sōho Ananías táca jnúhun yáha, te ni cotúú-ni de ni jihí de. Te táca ñayuu ní canihín jnúhun ún, yōhō ni cayūhú i. <sup>6</sup> Te ni candocuiñi téē suchí, te ní cachusúcún de ndíyi un cuáchindūji de.

<sup>7</sup> Te ni cunúu nájnūhun uní hora. Te ni jinū ñasihí ndíyi un ní quívi ña ini vehe ún, te tú na vé jini cuítí ña. <sup>8</sup> Te Pedro ní cajnúhún de ña:

Cachí nuū rí, ¿á ñi súcuan-ni ní caxícó ró ñuhun ró chí tuú? áhí de.

Te ní cachí ña:

Suu súcuan-ni ní caxícó ná, áhí ña.

<sup>9</sup> Te ní cahān Pedro jín ña:

¿Naun ní casquínáhan jnúhun ró jéē cóto ndee rō Espírítu Santo maá Jitoho yō? Chí ní nducú ró stáhú ró yā. Cuni nahín jéē cáhna nanecoo téē cuachindūji yí ró, te suni súcuan quichindūji de róhó, áhí de.

<sup>10</sup> Te ní cotúú-ni ña nuū jehé Pedro te ní jihí-ni ña. Te ní ndívicoo téē suchí un te ní cajito de jeē jé ní jihí ña, te ni caquenehen de ña, te ní jechindūji de ña xiin yí ña. <sup>11</sup> Te yōhō ni cayūhú ndívii ñayuu cácandíje jín táca gá ñayuu jeē ní cajini jnúhun jeē súcuan ní cuu.

### *Cuehē jniñu jéhnū nī casáha apóstol*

<sup>12</sup> Te cuehē jniñu jéhnū jeē steén jeē cujéhnū Yaā Dios nī casáha tēe apóstol nuū ñayuu. Te tāca ñayuu cácadíje, inuú-nī cándutútú i inī corredor jeē naní Salomón. <sup>13</sup> Te tu nī cáchundeyí nī inga ñayuu quijnáhan jíin i. Te cájejnúhún i ñayuu cácadíje. <sup>14</sup> Te nī nducuehē gā i, chí cúu tēe cúu ñahan nī cacandíje i máá Jítoho yō. <sup>15</sup> Te cáquindeca ñayuu jnánhan i jeē cácuñū, te cájequin i inī calle cácaa i nuū camilla jíin nuū yúu, chí cácuni i vésú ste cuándahū Pedro na yáha siquī i te nduváha i. <sup>16</sup> Te suni cuehē ñayuu tācá ñuu cáhīyo yajni yūcuan nī quijicoo i ñuu Jerusalén nī caquindeca i jnánhan i jeē cácuñū jíin jéé cándoho tachī, te ndihī i nī canduváha i.

### *Jeē ní cajito xeēn i tēe cácuu apóstol*

<sup>17</sup> Yūcuán na te sutū cujéhnū ga jíin tāca gá jnánhan jeē cácadíje sahan saduceo, nī cacucúesún nī jeē siquī tēe cácuu apóstol. <sup>18</sup> Te nī cajni de tēe cácuu apóstol nī cachuhun de vecāa. <sup>19</sup> Te ñin ndajéhé máá Jítoho yō nī nune ya yehyí vecāa ún jecuáa, te nī quenehen ya de jíjnánhan de. Te nī cahān yā jíin de:

<sup>20</sup> Cuáhán te cuiñi ró inī templo, te yūcuán nacani cájī ró jnūhun nuū ñayuu siquī ndese nihīn tahú i cotecu i ñí cáni, áchí ndajéhé yā.

<sup>21</sup> Te nī cajini sōho de jnūhun yáha. Te nuū nī cundijin te nehen nī quivicoo de inī templo, te cástéén de jnūhun ya nuū ñayuu.

Te níní cástéén de te sutū cujéhnū ga jíin tāca jnánhan de nī canastútú de tēe junta cujéhnū ga, jeē cúu ndihī tēe jéhnū cándiso jniñu nuū ñayuu naciún Israel. Te nī catajī de policía cuaquenehen tēe apóstol inī vecāa. <sup>22</sup> Te nuū nī jínūcoo te tuá gā tēe apóstol. Te nī canandió cóo te nī cacachi:

<sup>23</sup> Jendaá cúu jeē ní cajito ná ndési váha vecāa, te cáhīn tēe cándito yéhyí un. Te nuū ní canune ná, te tú cuiñi gā tēe un cáhīn inī vecāa ún, áchí de.

<sup>24</sup> Te sutū cujéhnū ga jíin tēe cújéhnū nuū tēe cándito templo jíin sūtū cácujeñū, nuū ní cajini sōho de jnūhun yáha, te nī cajeni nī de ndese ga cúu un núu súcuan. <sup>25</sup> Te nī quee-nī ñin tēe te nī cachi:

Tēe jeē ní cachuhun ní vecāa, cáhīn de inī templo, te cástéén de jnūhun nuū ñayuu, áchí de.

<sup>26</sup> Yūcuán na te tēe cácujeñū nuū tēe cándito templo, jíin tēe cácuu policía de, nī jengoo de, te yúcún ní nacueca de tāca tēe apóstol vendicoo de jíin, chí cáyuhú de jeē sanaa te cuáha ñayuu yuū xinī de núu sáha xeēn de jíin tāca tēe apóstol. <sup>27</sup> Te nuū ní najinūcoo de jíin tēe apóstol, te nī cajecuiñi de nuū tēe casáha junta. Te sutū cujéhnū ga nī cahān:

<sup>28</sup> Nī cacahān nihīn ri jíin ró jeē ma steén cuiñi gā ró jnūhun tēe nání Jesús. ¿Te naun nī casáha ró jéé ní ndecáva jnūhun un ñí ñuu Jerusalén yáhá? Te cácuni ró stau yáhu ró rúhū jijnánhan ri siquī jeē nī jíñi tēe ún, áchí.

<sup>29</sup> Te Pedro jíin tāca gá apóstol nī cacahān de:

Cánuú jéé squicu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáā Dios jíi yō nī nastécu yā Jesús, Yaā nī cajehni máá ní jeē ní cata caa ní yá jicā cruz. <sup>31</sup> Te nī sáha Yaā Dios jeē ní ndujéhnū tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan nī sáha Yaā Dios náváha yóhó, jéé cácuu yó ñayuu Israel, na nácani nī yō jeē stóo yó cuéchi yó, te cone cáhnu nī yā nuū tāca cuéchi yó. <sup>32</sup> Te máá ná ní cajito ná tāca jniñu yáha, te suni máá Espírítu Santo steén cají yá jeē súcuan cúu, chí jéhe Yaā Dios Espírítu Santo yā condee inī anuá tāca ñayuu jeē cájendetū nuū yā, achí de.



<sup>33</sup> Te ná ni cajini sōho un jnúhun yáha, te yōhyo ni caquitī ni, te cahni de cáculi nuú. <sup>34</sup> Te mēhñū un jijnáhan néne in tē grupo fariseo nání de Gamaliel, te cúu de maestro jeē steén ley yā, te tāca ñáyu cuájehñuhún i de. Te ni ndocuiñi de, te ni ndacu de jniñu jeē na cújiyo núu tēe apóstol. <sup>35</sup> Te ni cahñ de:

Róhó jnánhan ñuu yō Israel, cani vāha ni rō núu na vé cáculi rō sáha ró jín táca tēe yáha. <sup>36</sup> Chi nucūhun ni rō jeē in cuiyā ni ndonda Teudas siquī gobierno, te ni cahñ de jeē tēe téyí cúu de, te ni cacutútú nájnūhun cuñ ciento tēe jín de. Yūcuán na te ni cajehni ñayuu Teudas, te tāca jēe ní caquijnáhan jín de ni cajitē núu cuangoo sáa-ni, te ni jecuiñi-ni jniñu ún. <sup>37</sup> Yūcuán na te quivī ni íyo censo te Judas, in tēe Galilea, ni ndonda de siquī gobierno, te ni cacutútú cuéhē tēe jín de. Te suni ni cajehni ñayuu Judas, te tāca tēe jeē ní caquijnáhan jín de ni cajitē núu cuangoo. <sup>38</sup> Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñi i. <sup>39</sup> Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

<sup>40</sup> Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jín cuarta ñi te ni cacahān xeēn jín de jeē ma cahān gā de jnúhun Jesús, te ni casiáá de cuangoo de. <sup>41</sup> Te máá apóstol ni quendacoo de nuú junta cuangoo de, cáculi ni de jeē ni jēhe ya jnúhun ndoho de jeē cuáha ñayuu jnúhun canu de siquī jeē cáculi de ya. <sup>42</sup> Te ndiquivī castéén de jnúhun vāha Jesucristo, te cácanani de jnúhun ún ini templo jín táca-ni vehe.

*Jeē ní cajeni de uxā tēe cuajniñu mēhñu ñáyu cáculi*

## 6

<sup>1</sup> Te ni cucuehē ñayuu cáculi. Te tiempo un te tēe hebreo jeē cáculi yuhu griego, ni quejéé de cáculi de nuú jnánhan hebreo de, áchí de jeē ñahan viuda jeē cáculi yuhu griego tu cániñ vāha ña staā jeē cáculi de táca quivī cuu ña. <sup>2</sup> Yūcuán na te máá ndihúxí u apóstol ni canastútú de táca ñáyu cáculi, te ni cacahān de:

Tú vāha jeē jecuiñi jniñu jeē cácanani ri jnúhun Yaā Dios siquī jeē cáculi ri staā. <sup>3</sup> Núu súcuu te róhó, hermano, nacāji ró uxā jnánhan máá yó, te na cóndiso jniñu de saja de staā. Te nacāji ró tēe jeē cáculi ñayuu de, tēe ndíchí jēe ní cuuú Espíritu Santo jín de. <sup>4</sup> Te ruhū jijnáhan ri, máni cacān tahú rī jín jēe cácani ri jnúhun ya, áchí de.

<sup>5</sup> Te ndihí ñayuu ni canujnahan ni i jnúhun ni cacahān de. Te ni canacāji i Esteban, tēe cáculi vāha jeē ní cuuú Espíritu Santo jín de. Te suni ni canacāji i Felipe jín Prócoro jín Nicanor jín Timón jín Parmenas jín Nicolás. Te Nicolás cúu tēe ñuu Antioquía, te ni nduu de tēe cáculi sahān ñayuu hebreo nde ná tu cáculi de jnúhun Cristo. <sup>6</sup> Te ni cajeni i táca tēe yáha núu tēe cácuu apóstol, te tēe apóstol un ní caso de ndaha de xinī táca tēe un ní cajicān tahú de nuú Yaā Dios siquī jniñu condiso de.

<sup>7</sup> Te jnúhun Yaā Dios ni jitē gā cuahān, te ni nducuehē teyí ñáyu cáculi i jnúhun ya ini ñuu Jerusalén. Te suni cuehē sutū ni cacandije de jnúhun ya.

*Jeē ní cajni de Esteban*

<sup>8</sup> Te ni chindéé ñahán yá Esteban ni jēhe ya poder nuú de, te ni sáha de táca jniñu jēhnu nuú ñáyu, jniñu jeē steén jeē cujēhnu Yaā Dios. <sup>9</sup> Te ñayuu hebreo jeē ní cacuyāhu i te ni canduu libre i, íyó vehe i sinagoga i. Te tēe un



cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnāhan de jíin Esteban. <sup>10</sup> Te tu ní cácuñdeyí jíin de, chí ndíchí ní cahān de ní sáha máá Espiritu Santo. <sup>11</sup> Yūcuán na te ní cascáhān sava tēe jeē na cáhān jnūhun stáhú síquī Esteban. Te ní cacahān jeē ní cajini sōho cáhān ndevāha Esteban síquī Moisés jíin síquī Yāā Dios. <sup>12</sup> Te jeē súcuan ní cacahān te ní caquiti ní táca ñāyuu jíin tēe jēhnu cándiso jniñu jíin tēe cástéén jnūhun tutu ley yā. Te ndihi de ní candonda síquī Esteban, te ní cajini de cuangoo jíin de nde nuū junta cujéhnu ga. <sup>13</sup> Te ní cajeni de tēe cahān jnūhun yāá síquī Esteban, te suhva ní cacahān:

Tēe yáha tu ndé jécuiñí de jeē cahān ndevāha de síquī templo ī yáha jíin síquī ley yā. <sup>14</sup> Chí ní cajini sōho ná cáhān de jeē Jesús, tēe ní jehnu ñuu Nazaret, canu de templo yáha te nasama de jeē tajnúni ley yā jeē ní jéhe Moisés nuū yō, áchí.

<sup>15</sup> Yūcuán na te ndihi tēe cáyūcu nuū junta un ní candacoto vāha nuū Esteban, te ní cajini jeē jito nuū de ná jito nuū ñin ndajéhé Yāā Dios.

### *Jnūhun ní nacani Esteban*

## 7

<sup>1</sup> Te máá sūtū cujéhnu ga ní cajnūhún Esteban:

¿A ndáa jeē súcuan ní sáha ró nájñūhun cácahān de yāhá? áchí.

<sup>2</sup> Te ní cahān Esteban:

Ndihí níhín jéé cácuu ní jnāhan ñuu yō, jíin ndihí níhín jéé cácuñdeyí ní nuū ñūu yō, cuni nahín ní jnūhun cahān ná: Máá Yāā Dios jeē yóhoyo cújéhnu ya, ní steén yā máá yā nuū jíi yō Abraham nde na néne ga de región Mesopotamia, nde ná tu quihín de condee de ñuu Harán. <sup>3</sup> Te ní cahān yā jíin de: Stóo ñuu rō jíin táca jnāhan ró te quihín rō nuū cuāha ri condee rō, chí máá rí steén ichi nuū quihín rō, áchí yā. <sup>4</sup> Yūcuán na te ní quenda de región Caldea, te ní jinū de ní condee de ñuu Harán. Te yūcuan ní jihí tatá de. Yūcuán na te ní sáha Yāā Dios jeē ní quee de ñuu yáha nuū cáyūcu yó vijna. <sup>5</sup> Te tu ní jéhe ya ní ñin tíhli ñuhun yáha cuu tahū de. Te vēsú súcuan te ní jejnūhun ya jeē cuāha ya ñuhun un núu de nde jíin núu táca sēhe de, vēsú ná tu coo sēhe de sáa. <sup>6</sup> Te súcuan ní cahān Yāā Dios jíin de: Sēhe ró coyūcu jícá i inga ñuu, te cuñ ciento cuiyā sájniñu sáa-ní i te stóho ñayuu yūcuan i. <sup>7</sup> Te síquī jeē súcuan sáha i jíin sēhe ró, te máá rí chí stóho ri ñayuu ñuu ún. Te sáa te quendacoo sēhe ró yūcuan, te nucoyūcú i yāhá chíñúhún i ruhū, áchí yā. <sup>8</sup> Te ní cahān yā jíin Abraham jeē na cúu de circuncidar, jeē cúu ñin jnuní jeē ní sáha ya contrato jíin de. Te ná ní cacu sēhe de Isaac te ní sáha de circuncidar i nuū uná quiví. Te suni súcuan ní sáha Isaac jíin sēhe de Jacob, te Jacob jíin sēhe yí de jeē cácuu ndihúxi uū yucún ñayuu Israel.

<sup>9</sup> Te táca sēhe Jacob ní cacucuésun ní de jíin ñani máá de José, te ní caxícō de i nuū tēe jeē ní cajendēca i nde nación Egipto. Te Yāā Dios chí ní ndito ya José. <sup>10</sup> Te ní jnama ya i nuū táca jnūndóho ní jito i, te ní cundíchí i ní sáha ya. Te Faraón, tēe cúu rey nación Egipto, ní cusí ní de jíin i ní sáha ya, te ní tejniñu de José jeē cúu de gobernador te ndacu de jniñu nación Egipto jíin núu ñayuu cáyūcu vehe Faraón.

<sup>11</sup> Te ní quiji quiví jeē ní íyo ñin jnamā xeēn, te ní ndoho ñayuu ní cáhnu nación Egipto jíin ndé ñuu Canaán. Te táca jíi yō ún, tuá ní cánihín de jeē cáji de. <sup>12</sup> Te ní nihín Jacob jnūhun jeē iyó trigo nde nación Egipto, te ní tají de sēhe de ní jengoo de ní cajeen de trigo vuelta ñin. <sup>13</sup> Te jeē cuángoo de vuelta

uū te ni nastúu José jeē maá de cúu ñani de jíjnáhan de. Yūcuán na te ni jini rey Faraón ndé ñn jnáhan cúu José. <sup>14</sup> Te ni cahān José jíin táca ñani de jeē na cóndeca de tátá de Jacob jíin ndíhi jnáhan vehe de. Te ni iyo unī xico xahūn i. <sup>15</sup> Te súcuan ni cuu jeē ni jíinū Jacob ni condee de nación Egipto nde ni jihí de. Te suni yūcuan ni coyūcu sēhe de jeē cácuu jíi yō un ndé ni cajihī maá de. <sup>16</sup> Te ná ni quee quivī jeē ndénehen ya táca yūcūn de jeē cáyūcu tátú de nación Egipto, te ni cacondiso de yiqui ndihúxí uū ndiyi jíi un jeē ndíji ñuu Siquem, te ni cachindūji de ini yaū ndiyi ndeé jíicá cáva jeē ní jeen jíi yō Abraham nuū táca sēhe Hamor ñuu Siquem.

<sup>17</sup> Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíin Abraham jeē quéndacoo sēhe de nucoyūcú i ñuu ní jejnūhun ya nuū i, te ñayuu un ní tahū cuehē i ini nación Egipto. <sup>18</sup> Yūcuán na te ni nucuñī inga rey ñuu Egipto jeē tu ní jíin de jeē váha ni sáha ndiyi José. <sup>19</sup> Te rey un ní stahú de táca jíi yō te ni sáha ndevāha de jíin i, chí ni sáha fuerza de i jeē ma cóto ga i sēhe yiquín i te na cúu. <sup>20</sup> Te tiempo un ní cacu Moisés, te ni cusñi ni Yaā Dios jíin i. Te unī yoō ni condito sáhi náná i tátá i. <sup>21</sup> Te tuá ni cúu condito sáhi de i, te ni cachune de i nuū nanihñ sēhe sñí Faraón i, te ni naquihñ sēhe ña i ní scuéhnū ña i nájnūhun sēhe máá ña. <sup>22</sup> Te ni cutūhva Moisés táca jnūhun ndichí ñuu Egipto, te ni cujéhnū de jíin jnūhun cáhān de jíin jniñu sáha de.

<sup>23</sup> Te nuū uú xico cuiyā de te ni jecondéhé de jnáhan de jeē cácuu ñayuu Israel. <sup>24</sup> Te ni jito de nuū ñn tēe nación Egipto jeē sáha ndevāha jíin ñn tēe Israel. Te Moisés ni jnama de jnáhan de Israel ún, chí ni jehni de tēe Egipto un. Te súcuan ni ndutahū jeē ní sáha ndevāha jíin jnáhan de ún. <sup>25</sup> Te máá Moisés jéni ní de jeē jécūhun ni táca jnáhan de jeē Yaā Dios ní tají yá de jeē jnáma de jnáhan de ún ini nación Egipto nuū, te tu ní cájecūhun cuiñi ni jnáhan de ún. <sup>26</sup> Te inga quivī suni ní jito de nuū uú tēe Israel jeē cájejnáhan, te cúní de jeē na jécuiñi. Te jeē yūcuan ní cahān de jíin: ¿Najehē casáha ndevāha ró jíin jnáhan ró? Chí nájnūhun ñn ñani-ni cácuu ró, áchí de. <sup>27</sup> Te máá tēe cáni tahū jnáhan un ní chundahá de Moisés te ni cahān de: ¿Nde ñn ní jeni róhó jeē cujéhnū ró nuū rī te sándaā rō jniñu ri jijnáhan ri? <sup>28</sup> ¿Chí suni cúní rō cahni rō ruhū nájnūhun ní jehni rō tēe Egipto icu chí naún? áchí de jíin Moisés. <sup>29</sup> Te nuū ní jíin sōho Moisés jnūhun yáha, te ni yuhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasihí de uū sēhe yí de.

<sup>30</sup> Te ni jíin uū xico cuiyā jeē néne de yūcuán. Yūcuán na te ñn ndajéhé Yaā Dios ní quenda ya nuū de nde nuū ñūhun téhé nuū ín yucu súcún Sinaí. Te ní quenda ya nuū de xinī ñn yucú cuií cáhnu cándahá yáñuhñ, te tu ní cáyú yucú ún. <sup>31</sup> Yūcuán na te Moisés ní naa ní de jito de ún, te ní jehēn de nde nuū, návāha coto vāha de. Te ní jini sōho de jeē cáhān máá Jítoho yō jíin de: <sup>32</sup> Máá rí cúu Yaā Dios táca jíi rō jenahán, Abraham jíin Isaac jíin Jacob, áchí yá. Te Moisés, quísi i de jeē yūhú de, te jeē yūcuan tuá ní cūndeyí ní de coto de nuū. <sup>33</sup> Te máá Jítoho yō ní cahān yā jíin de: Quenehen ndíjēn rō chí nuū ín ró, ñuhun íí cúu. <sup>34</sup> Je ní jini rī ñayuu máá rí jeē yóhoyo cándoho i nación Egipto, te suni jíin sōho ri jeē cájnana uhū i, te ní cuun ri vēji ri jeē jnáma ri i jíjnáhan i. Núu súcuan te vijna chí tají rí rohó ndicó ró quihñ rō nde nación Egipto, áchí yá jíin de.

<sup>35</sup> Te nde ná tu quenda Moisés Egipto, te táca jnáhan de ní casquéhichí i de jeē ní cacahān i jíin de: ¿Nde ñn ní jeni róhó jeē cujéhnū ró nuū rī te sándaā

rō jniñu ri? ni cacahān i jín de. Te vēsú súcuan te máá ndajéhé Yaā Dios ni quenda nuū Moisés un jéé cándahá cáyú yucū cuií ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i.  
<sup>36</sup> Te máá Moisés ni sáha de jeē ní quendacoo jnāhan ñuu de ini naciōn yúcuān, te ni cayāha de Mar Rojo, te ni cajica cuu de ñuhun téhé úú xico cuiyā. Te ní tiempo un ní sáha de cuehē jniñu jéhnū jeē steēn jeē cujéhnū Yaā Dios. <sup>37</sup> Te máá Moisés cuu jeē suhva ni cahān de jnūhun yáha jín jnāhan ñuu yō Israel: Máá Yáa Dios cani ya Yaā nacani jnūhun nuū rō jijnāhan ró nájñūhun ni jeni ya ruhū. Te cuu ya ññ jnāhan ñuu yō. Te na chūhun ni rō jnūhun cahān Yaā ún, áchí. <sup>38</sup> Te suni nde ná ni cajica cuu jí yō nde nuū ñūhun téhé, te ni cahān ndajéhé yā jín Moisés xinī yúcu súcún Sinaí, te ni nihīn de jnūhun jeē cahān ndese nihīn tahú yō cotecu yō, te ni nacani de jnūhun un núu tāca jí yō, te ni quendōo jnūhun un núu yō.

<sup>39</sup> Te tāca jí yō ún tu ní cáculi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicō de nungoo de Egipto nuū. <sup>40</sup> Te ni cacahān de jín Aarón: Sáha ní tijni yaā na cósnū nuū yō. Chi Moisés, jeē ní quenehen de yóhó Egipto vējicoo yō, tu cájini yō na vé ni ndoho de jeē tú de ndéē jeē cuahān de xinī yucu Sinaí, achí. <sup>41</sup> Yūcuān na te ni cajēhe de oro ni cuvāha ññ becerro oro, te nuū becerro ídolo un ní casocō de quití, te ni cacusi ní de jín ídolo ní casáha de ún. <sup>42</sup> Te Yaā Dios ní cujijo ya cuahān yā, te ni stóo ya de na chíñúhún de nuū tāca jéé jíto yó ññ andiví, nájñūhun yósó núu tútu tēe ni canacani jnūhun Yaā Dios nde jenahán: Ní cahān yā: Róhó ñáyuu Israel,

¿á cájeni ní rō jeē nuū ruhū ní casocō rō quití

ná ní cajica cuu ró úú xico cuiyā nde nuū ñūhun téhé?

<sup>43</sup> Tuú, chi sa suhva ni cacondiso ró nicho jeē íne ídolo jeē naní Moloc

jín figura quimi jeē naní Renfán,

ídolo jeē ní casáha máá ró ní cachíñúhún ró.

Jeē yúcuān cúu jeē siáha ri rohó quhīn jicá ró nde yatā ñū Babilonia, achí yá.

<sup>44</sup> Te ni ndacu ya jniñu nuū Moisés jeē na sáha de vehe ññ nuū chíñúhún de ya, nájñūhun cáa jeē ní steēn yā nuū de. Te tāca jí yō, nde nuū ñūhun téhé ní canevehā de vehe ññ un núu ní cachuvāha de tabla yuū jeē yósó jnūhun ley yā. <sup>45</sup> Te ní castóo de vehe un núu ndihí sēhe de jeē cúu jí yō. Te ní quiví Josué jín jí yō ini naciōn yáha, te ní sáha ya jeē ní cacundeý de jín tāca ñáyuu jeē ní cacoyūcu yáha ní cajinu i cuangoo i. Te ní quivicoo de táca ñuu i jín vehe ññ ún, te ní quendōo nde quiví ní cuu David rey. <sup>46</sup> Te ní cusí ni Yaā Dios jín rey David. Te ní jicān de nuū yā jeē sáha de ññ vehe ññ yā nuú, chi máá yá cúu Yaā Dios jí de Jacob. <sup>47</sup> Te ní cuu jeē nde sēhe yí de Salomón ní sáha vehe ññ yā.

<sup>48</sup> Te vēsú súcuan ni cuu te Yaā cujéhnū téyí, tu ndéé yá maá vehe jeē casáha ñáyuu, nájñūhun ní cahān tēe ni nacani jnūhun ya nde jenahán:

<sup>49</sup> Ní cahān yā:

Andiví cúu nájñūhun mesa nuū ndácu ri jniñu

te ñayiví cúu nájñūhun ññ nuū yítuu jehē rī.

Núu súcuan ¿te ndese cuu sáha ró vehe jeē cóndee rī,

te ndese cuu sáha ró núu ndétātu rí?

<sup>50</sup> ¿A násūu máá rí ní sáha ndihí jeē iyó?

achí máá Jítoho yō Yaā Dios.

<sup>51</sup> Te cáhán gā Esteban:

Yōhoyo cácuñihni ní ní, te tu cácuñi ní chusóhó ní, te cácuñi ní nájñūhun ñayuu táca nación jeē tu cájini i jñūhun ya ni tu cácuñi i ya. Chi ní ní cájesi ní ní nū Espiritu Santo, te nájñūhun ní casáha jíi yō jenahán, suni sūcuñ casáha ní vijna. <sup>52</sup> ¿A ní iyo tēe nácani jñūhun ya nde jenahán jeē tu ní sáha ndeváha jíi yō jíin de? Chi jíi yō ní cajehni de tēe ní canacani jñūhun jeē quíji máa Yáa ndaa. Te je ní quíji Yáa ún, te máa ní ní canastúu ní yá nuū tēe ní cajehni de ya. <sup>53</sup> Te vésú nde jíin táca ndajéhé yā ní jēhe ya ley yā nuū yō, te máa ní chi tu cácuñi ní, áchi Esteban.

### *Jeē ní cajehni de Esteban*

<sup>54</sup> Táca jñūhun yáha ní cajini sōho, te yōhoyo ni caquiti ni, te cácuñi yūhu cájito nuū Esteban. <sup>55</sup> Te máa Esteban chi ní cuñu Espiritu Santo jíin de. Te ní jito de ichi ándiví, te ní jini de jeē ndíndēe nū nēne Yáa Dios, te índichi Jesús ichi ndáváha ya. <sup>56</sup> Te ní cahān de:

Vijna te jíto ri jeē nūne ándiví, te jíto ri nuū máa Yáa ní nduu tēe, índichi yā nuū cujēhu ya lado váha Yáa Dios, áchi de.

<sup>57</sup> Yūcuñ na te ní cajesi un sóho, te ní cacana cóhó, te inuū-ni ní candonda siquí Esteban. <sup>58</sup> Te ní caquenehen Esteban cuangoo jíin de nde yatā ñū. Te tēe ní cacahān yaá un jíin ndihí jñāhan de ní cachucú de ticāchí de ndíto ñn tēe suchí nání Saulo, te ní cacani de yuū xiní Esteban. <sup>59</sup> Te ní ní jēe cácani táca tēe un yūu xiní de te ní jicān tahú de nuū yā:

Tátá Jesús jeē cúu ní Jitoho ná, naquihni ní ánuá na vijna, áchi de.

<sup>60</sup> Te ní jecuiñi yití de te ní cahān jee de:

Tátá Yáa Dios, ma quénehen ní cuéchi siquí i jeē casáha i jíin ná, áchi de. Sūcuñ ní cahān de te ní jihí-ni de.

### *Jeē ní jito xeñ Saulo ñayuu cácuñi*

## 8

<sup>1</sup> Te Saulo, ní nujnahan ní de jeē ní jihí Esteban.

Te quiví un ní caquejé de cájito xeñ ndasí de ñayuu cácuñi Jesús ini ñuu Jerusalén, te jeē yūcuñ cúu jeē ní cajitē nū ñayuu cácuñi cuangoo i ní Judea jíin ní Samaria. Te tēe apóstol chi tu ní cajitē nū de. <sup>2</sup> Te sava tēe yíñūhún nū Yáa Dios, ní cachindūji de Esteban. Te yōhoyo ní candahyū de jeē ní jihí Esteban. <sup>3</sup> Te Saulo chi jíto xeñ de ñayuu cácuñi, te quiví de ndijnahan vehe te jñí de tēe, ñahan, chūhun de i vecā.

### *Jeē ní canacani i jñūhun Yáa Dios ndañū Samaria*

<sup>4</sup> Te táca ñuu nuū cuangoo táca ñayuu ní cajitē nū un ní canacani i jñūhun ndese jnáma Yáa Dios ñayuu. <sup>5</sup> Te ní jinū Felipe ñn ñuu ndañū Samaria, te nuū ñayuu yūcuñ ní nacani de jñūhun Cristo, Yáa ní jeni Yáa Dios jeē jnáma ya yohó. <sup>6</sup> Te táca ñayuu ní cacutútu un ní cajini nahín váha i táca jñūhun ní nacani Felipe, te ní cajito i táca jñiñu jēhu ní sáha de. <sup>7</sup> Chi cuehē ñayuu cándoho tachí ní canduváha i, te cácana cóhó táchí un ní caquendacoo. Te cuehē ñayuu ní ijin jíin ñayuu ríngo ní canduváha. <sup>8</sup> Te jeē yūcuñ ní cacusiñ teyí ní ñayuu ñuu ún.

<sup>9</sup> Te ini ñuu un nēne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhoyo cánaa ní ñayuu ñuu un cájito i jeē sáha Simón, te ní stahú de i ní cahān de jeē ñn tēe cújēhu téyí cúu máa de. <sup>10</sup> Te nde tēe cácuñi jíin ndivii cuiti ñayuu, cájetáhú ndasí i jñūhun cáhān de, te ní cajeni ní máa i te ní cacahān i:

Tēe yáha ní jēhe Yaā Dios cuehē poder nuū de, áchí i.

<sup>11</sup> Te cájetáhú váha i jnūhun cáhán de, chí cuehē tiempo ni sáha de jniñu stáhú ní canaa ni i ni cajito i. <sup>12</sup> Te nuū ni jínū Felipe, ni nacani de jnūhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan. <sup>13</sup> Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jíto de táca jniñu jéhu jeē sáha Felipe jeē steén jeē cujéhu Yaā Dios.

<sup>14</sup> Te cáyūcu tēe apóstol ñuu Jerusalén, te ni canihīn de jnūhun jeē ñáyuu Samaria ni cacandíje i jnūhun Yaā Dios. Te ni catají de Pedro jíin Juan cuangoo de yūcuán. <sup>15</sup> Te ni jinūcoo de, te ni cajicān tahú de jehē ñáyuu un náváha na quívi Espíritu Santo ini anuá i jíjnáhan i. <sup>16</sup> Chí ná tu quívi ya ini anuá ni ñin i, chí máá-ni jeē ní cajendute i jeē ní cacandíje i Jitoho yō Jesús. <sup>17</sup> Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

<sup>18</sup> Te ni jito Simón jeē súcuan casoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuáha de xūhun núū tēe apóstol náváha nihīn de poder un núú. <sup>19</sup> Chí ni cahān de:

Cúní na jēe cuáha ní poder yáha núū na, náváha núu ndé ñáyuu soó ná ndaha ná xinī i te quívi Espíritu Santo ini anuá i, áchí de.

<sup>20</sup> Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. <sup>21</sup> Ma nihín tahú rō jeē sáha ró jniñu yáha, chí tu iyó ndáa anuá rō nuū Yaā Dios. <sup>22</sup> Núu súcuan te jíni ñúhún jéē stóo rō jnūhun jeē jéni néé ni rō súcuan te cahān ndahú rō jíin Yaā Dios, te máá yá sanaa te cone cáhnu ni yā siquī jeē jéni néé ni rō súcuan. <sup>23</sup> Chí jíni rī jeē cucuésún ni rō siquī jeē sáha ri jniñu yáha. Te táca jéē neé jéni ni rō ni cunuú un jíin ró, achí Pedro jíin de.

<sup>24</sup> Yūcuán na te ni cahān Simón jíin de:

Cacān tahú ni jéhē na jíjnáhan ní núū máá Jítoho yō náváha tú jnahnū ndetū na nájnūhun ni cahān ní, áchí de.

<sup>25</sup> Te Pedro jíin Juan ni cacahān cají de ndese cácandíje de jnūhun Yaā Dios. Te jeē cuánungoo de ichí ñúū Jerusalén, te tíjni ndañúū Samaria ni canacani de jnūhun jeē jnáma ya ñayuu.

### *Felipe jíin tēe nación Etiopía*

<sup>26</sup> Yūcuán na te ni cahān ndajéhé máá Jítoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde ñuu Gaza, áchí yá.

Te ichi chúcuan chí máá ñuhun téhé cúu. <sup>27</sup> Te ni quihin Felipe ichi cuahān de. Te nde nación Etiopía ni quiiji ñin tēe eunuco jeē ndíso jniñu de cúu de tesorero nuū ñahan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. <sup>28</sup> Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jengahán. <sup>29</sup> Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

<sup>30</sup> Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnúhún de tēe ún:

¿A jécūhun ni ni jnúhun jeē cáhu ní chí tuú? áchí de.

<sup>31</sup> Te ni cahān máá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

<sup>32</sup> Te jnūhun cáhu de tutu īi un cáhán suhva:

Nájñūhun lanchi jeē cuahān tī nuū cúū tī, súcuan ni casáha ñayuu jíin yá. Te nájñūhun īin londe quiti sáte jēē tu ndáhyū tī, súcuan ni sáha ya, chí tú na vé ni cáhán cuiti yā ná ni cajicān ī cuēchi síquī yā.

<sup>33</sup> Te hora jeē ní cajēhe ī jñūhun canu yā, tu ní casáha ndaā ī síquī yā jíin jñūhun ndaā,

te ni cajehni ī ya ini ñayīvi yáha.

Te coo cuehē ñayuu candíje nuū yā jeē ma cánda ni īin ñayuu cahu ī ñayuu ún. Achí.

<sup>34</sup> Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jñūhun yáha? ¿A síquī maá de chí síquī īnga tēe? áchí de jíin Felipe.

<sup>35</sup> Yūcuán na te ni nacani Felipe jñūhun vāha Jesús nuū tēe ún, chí ni quejéé de ni castūhún de jñūhun jeē ní cahu tēe ún, jíin táca gá jñūhun jeē yosó núū tútu yā. <sup>36</sup> Te níni cuángoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? áchí de.

<sup>37</sup> Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jēē ni sáha Jitoho yō Jesús jehē yō, áchí de.

Te ni cahān tēe Etiopía:

Cándíje ná jēē Jesucristo cúu máá Séhe Yaā Dios, áchí de.

<sup>38</sup> Te ni sáha de jeē na jécuiñī carreta de, te ni nuu ndindúú de cuangoo de ichi véyí núū ñūhun ndute ún, te ni scuándute Felipe tēe Etiopía. <sup>39</sup> Te nuū ní quendacoo de nuū ndute, te Espiritu maá Jítoho yō ni sáha ya jeē ní ndoñūhún-ni Felipe. Te tēe Etiopía vésu tuá ni jító de nuū Felipe, te cúsi ni de cuahān de. <sup>40</sup> Te ni nane Felipe ñuu Azoto. Te nácani de jñūhun ndese jnáma ya ñayuu, cuahān de táca ñuu nde ni jinū de Cesarea.

*Jeē ní nasāma ini Saulo ni sáha Jesucristo  
(Hch. 22.6-16; 26.12-18)*

## 9

<sup>1</sup> Te Saulo chí máni cáhán de jeē cáhni de táca ñayuu cáandíje ī máá Jítoho yō, te jeē yúcuan ní jehēn de nuū sutú cujéhu ga. <sup>2</sup> Te ni jicān de carta jeē cahán jeē quihín de táca vehe īi sinagoga ñuu Damasco te cuhni de tēe ñahan jeē cáandíje ī Jesús, quiji de jíin ī ñuu Jerusalén nuú. <sup>3</sup> Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndéé īin luz nuu de. <sup>4</sup> Te ni cotúú-ni de nuū ñūhun, te ni jini sōho de īin jñūhun cáhán jíin de:

Saulo, Saulo, ¿najehē jító xeēn rō ruhū? áchí.

<sup>5</sup> Te ni cahān maá de:

¿Na ñihín cúu jeē cahán, Tátá?

Te ni cahān yā jíin de:

Máá rí cúu Jesús, te jeē jító xeēn rō ñayuu cáandíje ī ruhū cúu jeē jító xeēn rō ruhū. Te jeē sáha ró súcuan cúu nájñūhun stiquī jeē tu jéndíje ti te jénú yatá tí xinī pulla, te súcuan stóho ti maá tí, áchí yá.

<sup>6</sup> Te máá de chí quisí ī de jeē yūhú de, te ni cahān de:

Tátā, ¿na vé cuní ni jéē sāha ná núu súcuan? áchí de.

Te ni cahān maá Jítóho yō jíin de:

Ndocuĩñi, quĩvi ró ini ñuu, te yúcuan íyó ñn tēe jeē cachi nuū rō na vé cúu jeē cánuú sāha ró, achí yá.

<sup>7</sup> Te tēe cuango jíin Saulo, ni canaa ndasí ni de cájini sōho de ndusu jeē cahán, te tu ní cájito cuĩti de nuū jeē cahán un. <sup>8</sup> Yūcuán na te ni ndocuĩñi Saulo. Te ni nducú de coto de, te tuá cúu coto de, te ni cajni tēe ún ndaha de ni jinūcoo jíin de nde ini ñuu Damasco. <sup>9</sup> Te yúcuan ní condee de uní quĩvi. Te tu ní cúu cuĩti coto de, ni tú na vé ni yéji de, ni tú na vé ni jíhi de.

<sup>10</sup> Te ñuu Damasco néne ñn tēe cándíje, nání de Ananías. Te maá Jítóho yō ni steén ndijin ya maá yá nuū de te ni cahán yá jíin de:

Ananías, achí yá.

Te maá de ni cahán de jíin yá:

Naun ní sāña, Tátā, áchí de.

<sup>11</sup> Te ni cahán maá Jítóho yō jíin de:

Quihin ichi te quihñ rō calle jeē naní Calle Derecha, te vehe Judas cajñuhun rō ñn tēe nání Saulo ñuu Tarso, chí jícán tahu de. <sup>12</sup> Te nájnñuhun ni jito ndijin de jeē maá ró, Ananías, ni jinū rō, te ni soó ró ndaha ró xíní de, te ni nanune tinūú de, achí yá.

<sup>13</sup> Yūcuán na te ni cahán Ananías:

Tátā, cuehē ñayuu cácahān jeē tēe yúcuan yōhyo jíto xeēn de ñayuu cácaandíje i níhñ ñuu Jerusalén. <sup>14</sup> Te vijna ni quee de yāhá, chí sutū cácujeñnu ni catejniñu de véji de jni de tāca ñayuu cácahān ndahú i jíin ní, achí de.

<sup>15</sup> Te ni cahán maá Jítóho yō jíin de:

Cuáhán, chí maá rí ni nacāji tēe un jéē quihñ de nacani de jñuhun ri nuū tāca ñayuu nación Israel jíin núu ñayuu tāca gá nación nde jíin núu tāca rey. <sup>16</sup> Chí steén rī nuū de jeē cánuú ndoho de cuehē jñundóho jeē siquĩ rī, achí yá.

<sup>17</sup> Yūcuán na te cuahān Ananías. Te ni quĩvi de ini vehe nuū néne Saulo, te ni soó de ndaha de xini Saulo, te ni cahán de:

Hermano Saulo, maá Jítóho yō Jesús, Yaā ní quenda ndijin nuū ní ichi jeē véji ní, ni tají yá sāña véji ná núu ni návāha na nánune tinūu ní, te návāha na cúnuú Espíritu Santo yá jíin ní, achí de.

<sup>18</sup> Te ni nanune-ni tinūu Saulo, chí ni nungoo-ni nájnñuhun soō chācá ní condihyū tinūú de ún. Te ni ndocuĩñi de ni jendute de. <sup>19</sup> Yūcuán na te ni nacaji de staā, te ni nanihñ ni de. Te ni condee de jecu quĩvi jíin tēe cácaandíje jeē cáyūcú ini ñuu Damasco.

### *Jeē ní nacani Saulo jñuhun ini ñuu Damasco*

<sup>20</sup> Te ni quejéé-ni de nācani de jñuhun Jesús ini tācá vehe ñi sinagoga, achí de jeē Jesús cúu Sēhe Yaā Dios. <sup>21</sup> Te tāca ñayuu ni cajini sōho jñuhun cahán de ni canaa ni i, te ni cacahān i:

¿A násūu tēe yāha cúu jeē yóhyo jíto xeēn de tāca ñayuu Jerusalén jeē cájicān tahu nuū Jesús? Te siquĩ yúcuan ní quee de yāha jéē cúhni de ñayuu cácaandíje, te quihñ de jíin i nuū sutú cácujeñnu núu, achí i.

<sup>22</sup> Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihñ de modo cahán de jeē tu íyó ndāá jeē cahán Saulo.

### *Jeē ní cácu Saulo nuū jñahan de hebreo*



<sup>23</sup> Te ni yāha cuehē quiṽi. Te jnāhan de hebreo ni casquiñáhan jnūhun de jeē cáhni de Saulo. <sup>24</sup> Te ni nihīn Saulo jnūhun jeē cándito de nduú ñuú táca yéhyí pared jeē ní condúu ndihyú ñuu ún. <sup>25</sup> Yūcuán na te ñn jecuáa te tēe cácandíje ni caquihin de Saulo, te ini ñn jīca cáhnu ni cascúun de Saulo jīca pared ún, te súcuan ni cācu de.

### *Jeē ní najinū Saulo ñuu Jerusalén*

<sup>26</sup> Te nuū ní najinū de ñuu Jerusalén, te cúní de najnáhan de jíin tēe cácandíje. Te ni cayūhu tēe un ní cajito de Saulo, chí tu ní cácandíje de jeē ní nduu Saulo tēe cándíje nuū Jesús. <sup>27</sup> Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū máá Jítóho yō ichi nuū cuahán de, jíin jeē ni cáhān yā jíin de, jíin jeē jéhnū-ni ni nacani de jnūhun Jesús ini ñuu Damasco. <sup>28</sup> Te ni condee Saulo ñuu Jerusalén ni jīca de jíin táca tēe apóstol. <sup>29</sup> Te jéhnū-ni ni nacani de jnūhun máá Jítóho yō. Te jnāhan ñuu de hebreo jeē cácahān yuhu griego, ni castáhān jnāhan jíin de, te máá tēe un cácuni de cahni de Saulo. <sup>30</sup> Te ni cajini táca hermano cácandíje, te ni cajendēca de Saulo nde ñuu Cesarea. Te yūcuan ní canatajī de Saulo cuanuhun de nde ñuu de Tarso.

<sup>31</sup> Te ñayuu cácandíje Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jnūhun ya, te cándiso Iyo i nuū máá Jítóho yō. Te Espírītu Santo ni chindéé ñáhān yá i te ni nducuehē gā i.

### *Jeē ní nduvāha Eneas*

<sup>32</sup> Te tāca lado jécondēhe Pedro ñayuu cácandíje, te suni ni jécondēhé de ñayuu cácandíje cáyūcú ñuu Lida. <sup>33</sup> Te yūcuan ní jini de nuū ñn tēe nání Eneas jeē ní cuu uná cuiyá cáca de chí ni Ijin de. <sup>34</sup> Te ni cahān Pedro jíin de:

Eneas, Jesucristo cúu Yaá nasávāha ya rohó. Ndocuiñī te natuu rō yuu ró, achí de.

Te ni ndocuiñī-ni tēe ún. <sup>35</sup> Te tāca ñayuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnūhun jeē tu iyó ndáa te ni cacandíje i máá Jítóho yō.

### *Jeē ní natecu Dorcas*

<sup>36</sup> Te nde ñuu Jope ni Iyo ñn ñahan cándíje, nání ña Tabita, te nuū yūhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhān ña ñayuu cúmaní nuū. <sup>37</sup> Te tiempo yūcuan ní quejéé cuéhyí jíin ña, te ni jihī ña. Te ni casúcuchi i ndāyi ún, te ni cajequin i ndāyi un ndé ini cuarto xinī véhe. <sup>38</sup> Te yajni íne ñuu Lida jíin ñuu Jope, te tēe cácandíje ñuu Jope ni cajini jnūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quihín yachī yō ñuu Jope, achí de.

<sup>39</sup> Yūcuán na te ni quihin Pedro ichi cuahān de jíin tēe ún. Te nuū ni jíin de, te ni cacoo tēe un jíin de nde xinī véhe nuū catú ndíyi ún. Te táca ñahan viuda ni candicó ndúú ña de cándahyū ña, te cástéén ña táca sahma jíin tícāchi jeē ni sáha Dorcas te ni saja ña nde na técu ña. <sup>40</sup> Yūcuán na te ni ndacu Pedro jniñu jeē na quéndacoo ndihi ñayuu ún quingoo i nde yatā véhe. Te ni jecuiñī yití de ni jicān tahú de, te ni nandió cóto de nuū catú ndíyi ún, te ni cahān de:

Tabita, ndocuiñī ní, achí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. <sup>41</sup> Te ni jni de ndaha ña, te ni ndonehen de ña. Yūcuán na te ni nacana de xinī ñayuu cácandíje nde jíin ñahan viuda ni ndāvicoo i, te ni steén de ña nuū i jeē ní



natecu ña. <sup>42</sup> Te ni jitē jñūhun jñiñu yáha ñí ñuu Jope cuahān, te cuehē ñayuu ni cacandije i jñūhun máá Jítóho yō. <sup>43</sup> Te cuehē quivī ni ndōo Pedro ini ñuu Jope, néne de vehe ñn tēe sáha curtir ñii, nání de Simón.

### *Pedro jiín Cornelio*

## 10

<sup>1</sup> Te ini ñuu Cesarea ni ñyo ñn tēe nání Cornelio, ni cuu de capitán grupo soldado jeē naní Italiano. <sup>2</sup> Te cúu de tēe ndíso ñyo nuū Yaā Dios nde jiín ndihi ñayuu vehe de, te yōhyo caridad ni tēe cúu de, chí jéhe de xūhun núū ñayuu hebreo cándoho ndáhú, vēsú nasūu tēe hebreo cúu de. Te níni jicán tahú de nuū Yaā Dios. <sup>3</sup> Te ñn quivī ni steén ndijin yā nuū tēe yáha nájñūhun cahuní jehíni, te ni jito de jeē ñn ndajéhé máá Yáa Dios ni quivī ya nuū néne de. Te ni cahān yā jiín de:

Cornelio, achí yá.

<sup>4</sup> Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jiín de:

Je chíhi Yaā Dios cuenta jeē jicán tahú rō jiín jēe sáha ró caridad. <sup>5</sup> Vijnā te tají ró jecu tēe na quíngoo de nde ñuu Jope, quicana de Simón jeē suní nání de Pedro, na quíji de. <sup>6</sup> Chí néne núu de vehe tocayo de Simón, tēe sáha curtir ñii, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, achí ndajéhé yā.

<sup>7</sup> Te ndajéhé yā jeē ni cahān jiín Cornelio, cuahān-ni ya. Te ni cana de uū mozo de jiín ñn soldado jeē yñúhún núū Yaā Dios, chí cúcáhnū ni de jeē squícu vāha tēe ún. <sup>8</sup> Te ni nacani ndihi de jñūhun nuū táca tēe ún, te ni tají de cuangoo nde ñuu Jope.

<sup>9</sup> Te inga quivī un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquī véhe chí cándaā, te yūcuan cácan tahú de. <sup>10</sup> Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijin yā nuū de. <sup>11</sup> Te ni jito de jeē núne andiví. Te ni jito de nájñūhun ñn sahman manta jitē cáhnū te núhni jnáhan ndicúún punta, te ni cuun vēji nuū de. <sup>12</sup> Te chíji un cáñūhun ndinūū quiti, táca quiti cúún ndaha jíin táca cóo jíin táca quiti cándava. <sup>13</sup> Te ni jini sōho de ñn jñūhun ni cahān:

Pedro, ndocuiñī te cahni rō táca quiti jiñā, te caji rō tī, achí.

<sup>14</sup> Te ni cahān Pedro:

Ma caji na, Tátā, chí tu yéji cuiti na táca quiti jeē cahán ley ni jēe tú vāha caji na tī, chí nájñūhun jeē tu cáhīyo ndoo tī nuū ní, achí de.

<sup>15</sup> Te ni cahān tucu jñūhun un jíin de:

Achí rí jeē iyó vāha caji rō táca quiti jiñā, chí ni sándoo ri, te ma cahán máá ró jeē tu cáhīyo ndoo tī, achí. Te súcuan ni steén caji yá nuū de jeē cúu quihīn de nuū ñayuu vēsú násūu jnáhan ñuu de hebreo cúu.

<sup>16</sup> Te uní jíinu ni cahān súcuan jíin de. Te sahman un ní ndaa cuanuhun andiví. <sup>17</sup> Te níni nacani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. <sup>18</sup> Te cácahān jee de cácajnūhún de núu yūcuan ndéé Simón jeē suní nání de Pedro. <sup>19</sup> Te níni nacani ga ni Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cānanducú róhó. <sup>20</sup> Ndocuīñī te nanuu ró, te ma cáni ni rō jeē tú vāha quihñ rō jín de, vēsú nasū jnāhan ñuu rō hebreo cácuu de, chi máá rí ni tají rí de vējicoo de, áchí yá.

<sup>21</sup> Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cānanducú ní. ¿Te na siquī vējicoo ní núu na núu súcuu? áchí de.

<sup>22</sup> Te ni cacahān mozo un:

Cornelio, tēe cúu capitán, ni tají de sañá. Te tēe ndaā, tēe ndiso iyo nuū Yaā Dios cúu de, te tāca ñáyuu hebreo suni cácahān i jeē tēe vāha cúu de. Te ni cahān ñn ndajéhé yā jín de jeē na cána de nihín jēé ní vehe de te chusóhó de jnūhun cahān ni jín de.

<sup>23</sup> Yūcuán na te ni cahān Pedro jín mozo un jēé na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jín mozo un. Te suni cuango jecu hermano cácañde ñuu Jope jín de.

<sup>24</sup> Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jín tāca amigo de jeē quijnāhan vāha ga de jín. <sup>25</sup> Te nuū ni jínū Pedro jijnāhan de, te ni quenda Cornelio ni cahān de jín Pedro, te ni jecuiñī yití de jeē chiñhún de Pedro nuū. <sup>26</sup> Te Pedro ni ndonehen de Cornelio, te ni cahān de:

Ndocuīñī ní, chi sañá suni ñn tēe-ni cúu ná, áchí de.

<sup>27</sup> Te cándajnūhún de ni quivicoo de ini vehe. Te ni jito Pedro jeē cáyūcu cuéhē ñayuu ini vehe de. <sup>28</sup> Te ni cahān Pedro jín ñáyuu ún:

Je cájini vāha ni jijnāhan ní jēé ley jeē cánevāha saña ñáyuu hebreo, cáhān jeē tú vāha jeē quijnāhan ná jín ni quivicoo ná vehe ní siquī jeē cúu ní ñáyuu sñn nación. Te Yaā Dios chi ní steen yā nuū na jēé ma cujēé ní na núu ní ñn ñayuu. <sup>29</sup> Jeē yúcuu cúu jeē vēji-ni ná, chi ni cana ní saña, te tu ní sájēé ni ná. Te na cájnūhun ná nihín, ¿na siquī ni cana ní saña? áchí Pedro.

<sup>30</sup> Yūcuán na te ni cahān Cornelio:

Vijna íyó cúun quivī nájñūhun máá hora yāha jēé cúu cahunī jehíni, te ndite ní ná chí súcuu chiñhún ná nuū yā, te jicán tahu na ini vehe ná. Te ni quiji ñn ndajéhé yā nuū ná, te ndíndēé sahma ñūhun ya. <sup>31</sup> Te ni cahān yā jín ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad. <sup>32</sup> Núu súcuu te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ññ, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jín ná. <sup>33</sup> Súcuu ni cuu te ni tají-ni ná mozo na cuajécoo de cana de nihín, te na cútahū ná, chi vāha ní sáha ní jēé véji ní. Te vijna ni candutútú ná yāha návāha tāca ná cuni sōho ná ndihí jñūhun Jítoho yō Yaā Dios jeē ni jéhe ya cahān ní, áchí de.

### *Jeé ní nacani Pedro jñūhun ya vehe Cornelio*

<sup>34</sup> Yūcuán na te ni cahān Pedro:

Vijna te ni jini vāha ná jēé Yaā Dios inuú-ni sáha ya jín tāca ñáyuu, cúu ñayuu hebreo jín ñáyuu tāca gá nación. <sup>35</sup> Chi cúsi ni yā jín ñáyuu tāca-ni nación núu cándiso iyo i nuū ya te cása ha i jniñu ndaā. <sup>36</sup> Chi ni cahān yā jín ñáyuu Israel jeē ndívicoo tāca ñáyuu nuū jñūhun maní yā jín i sáha Jesucristo. Te máá yá cúu Jítoho tāca yóhó. <sup>37</sup> Máá ní je cájini ní ndese ni cuu. Chi ná ni jinu ní nacani Juan jñūhun jín jēé ní scuándute de ñayuu, te ni quejéé Jesús nácani ya jñūhun nde Galilea, te ni jité jñūhun un ññ cáhu Judea. <sup>38</sup> Te cájini ni jēé Yaā Dios ní jéhe ya Espíritu Santo jín poder nuū Jesús, Yaā ní jehnu ñuu Nazaret. Te

cájini ni jéé ní jica cuu ya ni sáha ya jniñu váha, te ni nasávāha ya tāca ñáyuu jeé cándoho i sáha jexeén, chi Yaā Dios ni chindéé ñáhán yá Jesús. <sup>39</sup> Chi máá ná cánacani cáji ná jñuhun táca jniñu ní cajito ná ní sáha ya ni cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. <sup>40</sup> Te Yaā Dios ni nastécu yā maá Jesús nuū uní quivī, te ni ndiji ya nuū ná ní cajito ná nuū yā ni sáha Yaā Dios. <sup>41</sup> Te tu ní quíji ya nuū táca inga ñayuu, chi nuū maá-ni táca ná jeé jé ni nacāji Yaā Dios sáña jéé nácani ná jñuhun táca jniñu jeé ní cajito ná. Chi ni cayejí na stáa ni cajihí ná ndute jíin yá ná ni nane ya jeé ní natecu yā. <sup>42</sup> Te ni ndacu ya jniñu nuū na jíjnánhan ná jéé na nácani ná jñuhun ya nuū táca ñáyuu te cahān cáji ná jeé maá Yāā Dios ni jeni ya Jesús jeé sándaā yā jniñu ñayuu cátecu jíin ñáyuu ní cajihí. <sup>43</sup> Chi jñuhun Jesús cúu jeé ní cacahān táca téé ni canacani jñuhun Yaā Dios nde jenahán. Chi ni cacahān de jeé táca ñáyuu jeé candíje i Jesús, cone cáhnu ni yā nuū cuéchi i, áchí Pedro.

*Jeé ni quiví Espiritu Santo ini anuá ñayuu jeé násúu hebreo cácuu*

<sup>44</sup> Te níni cáhán gā Pedro táca jñuhun yáha te ni quiví-ni Espiritu Santo ini anuá táca ñáyuu cájini nahín jñuhun ya jeé cahān de. <sup>45</sup> Te téé hebreo jeé ni jíinūcoo jíin Pedro jeé suni cácandíje de Jesús, nahán ní canaa ni de ni cajito de jeé suni ni quiví Espiritu Santo ini anuá ñayuu jeé násúu hebreo cácuu. <sup>46</sup> Chi ní cajini sōho de cacahān ñayuu un sín yuhu, te cacahān i jeé yōhoyo cújéhnu Yaā Dios. <sup>47</sup> Yūcuán na te ni cahān Pedro:

¿Ndé ñin casi jeé ma cuándute ñayuu yáha? Chi ni quiví Espiritu Santo ini anuá maá i, nájnūhun ni quiví ya ini anuá maá yó, áchí de.

<sup>48</sup> Te ní cahān de jíin i jeé na cuándute i síquī jeé ní cacandíje i Jesucristo. Yūcuán na te ni cacahān ndahú i jíin Pedro jeé na quéndōo de jecu quiví jíin i.

*Jeé ní nacūaha Pedro cuenta nuū ñáyuu cácandíje ini ñuu Jerusalén*

## 11

<sup>1</sup> Te téé apóstol jíin táca hermano cáyúcú Judea, ni canihín de jñuhun jeé súni ñayuu sín nacióon ni cacandíje i jñuhun Yaā Dios. <sup>2</sup> Te cuanuhun Pedro ñuu Jerusalén. Te sava téé hebreo jeé cácandíje de ya ni cacahān de nuū Pedro:

<sup>3</sup> ¿Najehē ni condee ní vehe ñayuu jeé násúu ñayuu nacióon yō cúu? Te ni yeji ni jíin i, áchí.

<sup>4</sup> Yūcuán na te ni nacani cáji Pedro jñuhun nuū téé ún ndihí ndese ni cuu siquī téé sín nacióon:

<sup>5</sup> Néne ná ñuu Jope. Te níni jíicán tahu na, te ni steén ndijin yā nuū ná, te ni jito ná nájnūhun ñin sahma manta jité cáhnu jeé nuhni jnánhan ndicúún punta, te nde ichi ándiví ní cuun ni quiji nuū ná. <sup>6</sup> Te ní jito váha ná, te ní jini na jéé chíji un cáñuhun quiti cúun ndaha jíin quiti xéén jíin cóo jíin quiti cándava. <sup>7</sup> Te ní jini sōho ná ñin jñuhun ni cahān jíin ná: Pedro, ndocuiñi te cahni rō táca quiti jíinā, te caji rō tī, áchí jíini ná. <sup>8</sup> Te ni cahān ná: Ma cáji na, Tātā, chi tu yéji cuiñi na táca quiti jeé cahán ley ni jéé tu cáhīyo ndoo tī nuū ní, áchí ná. <sup>9</sup> Yūcuán na te jñuhun jeé véji nde ándiví ní cahān tucu jíin ná: Ni sándoo máá rí tī, te ma cahán gā rō jeé tu cáhīyo ndoo tī, áchí jíini ná. <sup>10</sup> Te uní jínu ni cahān súcuan. Yūcuán na te ni ndaa sahma un cuánuhun ándiví. <sup>11</sup> Te hora un ní jíinūcoo uní téé vehe nuū ni cóndee ná un, cánanducú de sáñā, te ñin jnánhan ñuu de Cesarea ní tají de vējicoo de. <sup>12</sup> Te máá Espiritu ní cahān yā jíin ná jeé ma cáni ní na jéé tú váha quihín na jíin de. Te suni iñū hermano yáha ní jengoo jíin ná, te ni quivícoo ná ini vehe téé nání Cornelio. <sup>13</sup> Te téé un ní nacani de jñuhun nuū

na jínáhan ná jéē ní jito de ñn ndajéhé Yaā Dios, índichi yā ini vehe de, te ni cahān yā jín de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. <sup>14</sup> Te tēe ún cachi de nuū rō ndese jnama Yaā Dios rohó jín ndihi ñayuu cáyūcú vehe ró, áchí yá. Achí Cornelio jín ná. <sup>15</sup> Te nuū ní quejéé ná cahān na, te ni quívi-ni Espírítu Santo ini anuá i jínáhan i, nájnūhun ní quívi ya ini anuá maá yó xihna gā. <sup>16</sup> Yūcuán na te ni nucūhun ní na jnūhun ní cahān maá Jítoho yō: Jendaá jeē maá ndute-ni ní scuándute Juan ñayuu. Te róhó jínáhan ró chí nájnūhun cuandute ró jín Espírítu Santo, cúu jeē cóndee yā ini anuá rō, achí yá. <sup>17</sup> Te suni ní jēhe Yaā Dios Espírítu yā nuū maá i nájnūhun ní jēhe ya nuū maá yó jeē cácandíje yó Jítoho yō Jesucristo. Núu súcuan ¿te ndé ñn cúu ná jéē cásí ná jniñu jeē sáha Yaā Dios? áchí Pedro.

<sup>18</sup> Súcuan ní cajini sōho de jnūhun yáha, te tuá ní cacahān de nuū Pedro, chí sa suhva ní cacahān de jeē yóhoyo cújéhnú Yaā Dios. Te ní cacahān de:

Suni ní jēhe Yaā Dios jnūhun jeē na nácani ní ñayuu táca gá nación jeē stóo i cuēchi i návaha cotecu i níf cáni núu súcuan, áchí de.

### *Ñayuu cácandíje ini ñuu Antioquía*

<sup>19</sup> Te quívi ní cajehni de Esteban ní quejéé de cájito xeēn de ñayuu cácandíje, te jeē yúcuán ní cajitē núu ñayuu un táca ñuu cuangoo i, te ní jinūcoo i Fenicia jín Chipre jín ñuu Antioquía. Te ní canacani i jnūhun vāha ya nuū máni jnáhan hebreo i jeē cáyūcu yúcuán, te tu ní cánacani i jnūhun ya nuū ínga ñayuu. <sup>20</sup> Te jecu tēe cácandíje jeē cáyūcu Chipre jín ñuu Cirene ní jinūcoo de ñuu Antioquía, te suni nuū ñayuu táca nación jeē tu cájini i jnūhun ya ní canacani de jnūhun máá Jítoho yō Jesús jeē jnáma ya i. <sup>21</sup> Te máá Jítoho yō ní chindéé ñáhán yá de, te cuehē ñayuu ní castóo i jniñu jeē tu íyó ndáá te ní cacandíje i máá Jítoho yō.

<sup>22</sup> Te ñayuu cácandíje ini ñuu Jerusalén ní cajini jnūhun i, te ní catajái i Bernabé cuahān de nde ñuu Antioquía. <sup>23</sup> Te nuū ní jínū Bernabé yūcuán, te ní jini de jeē yóhoyo vāha ní sáha Yaā Dios jín i, te ní cusí ndasí ní de. Te ní stihví ní de táca ñayuu un jéē jín ini jín ánuá i na cóndihví ní i squícu vāha i nuū maá Jítoho yō, te ma náyūhú i. <sup>24</sup> Chí tēe vāha cúu Bernabé, te ní cunuú Espírítu Santo jín de, te cándíje nihin de. Te ní cacandíje cuehē ñayuu nuū maá Jítoho yō ní sáha de.

<sup>25</sup> Yūcuán na te cuahān de nde ñuu Tarso cuananducú de Saulo. Te ní nanihín jnáhan de jín Saulo, te ndéca de tēe un ní ndee de ñuu Antioquía. <sup>26</sup> Te ní ñn cuiyā ní candutútú de jín ñayuu cácandíje yūcuán, te ní castéén de jnūhun ya nuū cuehē ñayuu. Te ñuu Antioquía cúu nuū xihna ñūhún gá ní caconaní ñayuu cristiano síquí jeē ní cacandíje i Cristo.

<sup>27</sup> Te suni tiempo un ní quendacoo tēe cánacani jnūhun Yaā Dios ñuu Jerusalén cuangoo de nde ñuu Antioquía. <sup>28</sup> Te ñn jnáhan de jeē naní Agabo ní ndocuíñi nuū hermano cácandíje. Te ní steén Espírítu Santo nuū de, te ní castūhún de jeē cóo ñn jnamā xeēn níf cáhnu. Te ní cuu jnamā ún ñn parte tiempo jeē ní ndacu Claudio jniñu jeē ní cuu de rey. <sup>29</sup> Yūcuán na te ní candajnūhun tēe cácandíje ñuu Antioquía jeē cuáha ñn ñn de nasaa canda de cuáha de te tají de quihín cotecu hermano cáyūcú Judea. <sup>30</sup> Te súcuan ní casáha de. Te ní catajái de Bernabé jín Saulo ní cajendéca de nuū tēe jéhnú cándiso jniñu nuū ñayuu cácandíje cáyūcú Judea.

*Jeē ní jehni Herodes Jacobo, te ní chune de Pedro vecā*

## 12

<sup>1</sup> Te suu tiempo un ní quejéé rey Herodes jito xeên de sava ñayuu cácadnje. <sup>2</sup> Te ni ndacu de jniñu jeê jiin espada na cáhni i Jacobo ñani Juan. <sup>3</sup> Te ni jini de jeê ní cacusiñi ni tēe hebreo jeê ni sáha de súcuan, te jeê yúcuan suni ni jniñ de Pedro. Te máa quiñi un ní cuu vico jeê yéji ñayuu pan jeê tu yñi levadura. <sup>4</sup> Te nuñ ní jniñ de Pedro, te ni chune de vecāa, te ni jeni de cuñ grupo soldado jeê cóndito Pedro, cuñ cuñ soldado cúu jeê ñn ñn grupo. Chi cúni Herodes jeê na yáha vico un jéê cúu vico pascua te quenehen de Pedro vecāa un stéén de nuñ ñayuu cuéhē. <sup>5</sup> Te súcuan ñne Pedro vecāa, te cándito soldado un de. Te ñayuu cácadnje chi ñihin ni cajicān tahú i jehē Pedro nuñ Yaā Dios jeê na cácu de.

### *Jeê ní quenehen Yaā Dios Pedro vecāa*

<sup>6</sup> Te jéni ni Herodes jeê na cúndijin inga quiñi te quenehen de Pedro vecāa, te stéén de nuñ ñayuu un núu. Te núhni Pedro jiin uñ cadena, cátu de quiñi de méhñu uñ soldado jecuāa ún, te suni cáhñ ga soldado cándito yéhyí vecāa ún. <sup>7</sup> Te suu jecuāa ún te sanaa-ni te ni jinū ñn ndajéhé máa Jítoho yō, te ni ndindéé ini vecāa. Te ni squñi ya Pedro, te ni natahū ni de. Te ni cahān yā:

Yachī ndocuiñi rō, achí yá.

Te cadena nuhni ndaha de un ní canandajī-ni. <sup>8</sup> Te ni cahān ndajéhé yā jiin de:

Nacuhni ñihin chíji ró, te nuquñi ró ndjēn rō, achí yá.

Te súcuan ni sáha de. Te ni cahān tucu ndajéhé yā jiin de:

Condii ticāchi ró, te condiquñ rō ruhū na quiñi yō, achí yá.

<sup>9</sup> Te ni quenda de ndiquñ de ya cuahān de jiin yá, te jéni ni de jeê násūu jéndaá cúu jeê sáha ndajéhé yā jiin de, chi jéni ni de jeê ñn jeê ni stéén yā jito ndijin de cúu. <sup>10</sup> Te ni yáha ya jiin de uñ nuñ cándito soldado. Te ni jinū yā jiin de yéhyí cáa nuñ quénda de caca de calle, te yéhyí un ní nune ñni-ni máa. Te ni quenda ya jiin de, te ni yáha de ñn calle cuahān de. Yūcuán na te ni cujiyo-ni ndajéhé yā nuñ de cuahān yā. <sup>11</sup> Te ni nducájí ni Pedro te ni cahān máa ní cahān ñn de:

Vijna te ni jini ndaā rī jeê ní tají máa Jítoho rī ndajéhé yā ni quiñi, te ni jnama ya ruhū nuñ Herodes jiin núu tāca ñayuu hebreo jeê cácuni i sáha xeên i jiin rí nuñ, achí de.

<sup>12</sup> Te nuñ ní jini de jeê ni cácu ndije de, te ni quihin de ichi cuahān de vehe María naná Juan jeê suni nání de Marcos. Te yúcuan cáhñi tútú cuéhē ñayuu cájicān tahú i jehē Pedro. <sup>13</sup> Te cáhñ Pedro ni jinū de yéhyí fuera, te ñn sūchi shí nání Rode cuahān i jeê cúni i núu ndé ñn cúu jeê cahān. <sup>14</sup> Te ni nacuni i tachí Pedro, te jeê ní cusñi ni i te tu ní núne i yéhyí un, chi ni nandió cóo i te jinu i ni ndivi i ini cuarto. Te ni castühún i jeê ní quee Pedro índichi de yéhyí fuera. <sup>15</sup> Te ni cacahān jiin i:

Jeê cahān neé ró, achí.

Te máa i ñihin cáhñ i jeê máa de cúu. Yūcuán na te ni cacahān:

Ndajéhé yā jeê ndíto Pedro cúu núu súcuan, achí.

<sup>16</sup> Te vihyá gā cahān Pedro. Yūcuán na te ni canune i yéhyí, te ni canacuni i nuñ de, te nahān ní canaa ni i cájito i. <sup>17</sup> Te máa de ni sáha de ndaha de jeê ma cúvaā gā i, te ni castühún de ndese ni quenehen máa Jítoho yō de vecāa. Te ni cahān de:

Castühun núu Jacobo jiin núu tāca gā hermano jeê ní quenehen ya ruhū vecāa, achí de.

Te ni quenda de cuahān de inga lugar.

<sup>18</sup> Te nuū ní cundijin, te ni cacuvaā teyí soldado jeē tuá Pedro. <sup>19</sup> Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ní stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

### *Jeē ni jñi Herodes*

<sup>20</sup> Te yōhyo ni quitī ni rey Herodes nuū ñáyyu ñuu Tiro jíin ñuu Sidón. Te ñayuu un ní candajñuhún i jeē inuú-ni quivicoo ndihi i nuū rey un. Te ni casáha i amigo i jíin Blasto, tēe cújéhu jéjñiñu nuū rey un. Te ni cacahān ndahú i jíin de jeē na cáhān ndahú de jíin rey un jeē na ndéē ni de jíin i. Chi nde ñuu maá rey un cájeen i jeē cáyeji i. <sup>21</sup> Te ni jeni Herodes ñin quiví. Te ni nucūhun de sahma yíñuhún de, te ni cucōo de mesa nuū ndácu de jniñu, te ni cahān de ñin jñuhun jehū ni cajini sōho i. <sup>22</sup> Te ñayuu un ní caquejeé i cacahān jee i jñuhun yíñuhún jíin de:

Nasūu tēe-ni cúu ní, chi ñin yaā cúu ní, áhí i jijnáhan i.

<sup>23</sup> Te maá hora un ní sáha-ni ñin ndajéhé maá Jítoho yō jeē ní jñi ñin cuehyí xeēn rey Herodes, te ni cayejí tindācú de, te ní jihī de, chi ní sandúxí-ni de maá de te tu ní cáhān de jeē Yaā Dios cúu jeē cújéhu.

<sup>24</sup> Te ni jītē gā jñuhun maá Jítoho yō, te cuehē ndasí ñáyyu ni cacandíje i taca-ni lugar.

<sup>25</sup> Te ni jinu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

### *Jeē ní caquejeé Bernabé jíin Saulo caca cuu de nacani de jñuhun ya*

## 13

<sup>1</sup> Te mēññu grupo ñayuu cácandíje ini ñuu Antioquía ni cahīyo tēe cástéén jíin tēe cácanani jñuhun Yaā Dios, te cánani de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. <sup>2</sup> Te ñin quiví jeē cáhīyo ndite ni tēe yáha cáchiñuhún de nuū maá Jítoho yō, te ni cahān maá Espíritu Santo jíin de:

Cúni rī jeē sasñin ró Bernabé jíin Saulo na quingoo de jniñu jeē ní jeni ri de, áhí yá.

<sup>3</sup> Yūcuán na te ni cajicān tahú ndite ni de, te ni caso de ndaha de xinī Bernabé jíin Saulo, te súcuan ni catajī de ndindúú tēe ún cuanacani de jñuhun nuū taca ñáyyu.

### *Jeē ní canacani Bernabé jíin Saulo jñuhun ya nde Chipre*

<sup>4</sup> Te ní sáha Espíritu Santo jeē íchi ñuū Seleucia cuangoo de. Te yūcuan ní quivicoo de ñin barco cuangoo de nde Chipre, ñuhun jeē íne sñn nuū ndúte.

<sup>5</sup> Te ní jinūcoo de ñuu Salamina nuū cájecuññi barco, te ní canacani de jñuhun Yaā Dios ini taca vehe íi sinagoga jñáhan hebreo de. Te suni cuahān Juan chindéé ñáhán jíin de. <sup>6</sup> Te ní cajica nuu de nñ-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñin tēe hebreo nání Barjesús. Te tēe tásí cúu de, te cáhān stahú de jeē ñin tēe nácani jñuhun Yaā Dios cúu de. <sup>7</sup> Te tēe tásí un jéjñiñu de nuū gobernador Sergio Paulo, te tēe ndíchí cúu gobernador ún. Te ní cana de Bernabé jíin Saulo jeē cúni nahín de jñuhun Yaā Dios. <sup>8</sup> Te tēe tásí un suni nání de Elimas. Te ndúcu ndéyí de casi

de jeē ma cándije gobernador ún. <sup>9</sup> Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū téé tási un. <sup>10</sup> Te ni cahān de:

Tēe sāha jniñu neé stáhú ñhán cúu ró, chi sēhe jexeén cúu ró te jési rō nuū tācā jniñu ndaā. Te tu jécuiñi rō jeē sāca núu ró síquī jñuhun ndaā maá Jítoho yō návāha ma candíje ñayuu nuū yā. <sup>11</sup> Te máá Jítoho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū téé tási un, te quéndāha quéhiyú de cuahān de ndúcú de ndé vé jñi ndaha de stéén ichi nuū de quinhun de. <sup>12</sup> Yūcuán na te ni jini gobernador jeē súcuan ni cuu, te ni candíje de jñuhun máá Jítoho yō, te náá ni de jini sóho de jñuhun ya.

### *Jeē ní coyūcu Pablo jíin Bernabé Antioquía ndañū Pisidia*

<sup>13</sup> Yūcuán na te ni quendacoo Pablo jíin Bernabé jíin Juan ñuu Pafos, te ni quivícoo de barco te cuangoo de ñuu Perge ndañū Panfilia. Te yūcuan ní cusñ Juan, te cuanhun de ñuu Jerusalén. <sup>14</sup> Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañū Pisidia. Te quivī ndétātu ní quivícoo de ini vehe ii sinagoga, te ni cacucōo de. <sup>15</sup> Te ni cahu tutu ley yā jíin tutu ní catee tēe ni canacani jñuhun ya nde jenahán. Yūcuán na te tēe cácujeñnu ini vehe ii sinagoga, vii-ni ni catajī de tēe cahān jíin Pablo jíin Bernabé:

Amigo, núu íyó jñuhun cahān ni jéé stihví ni ni ñayuu yáha, te cahān ní na cúni nahín i núu súcuan, achí de.

<sup>16</sup> Yūcuán na te ni ndocuiñi Pablo te ni sāha de seña jíin ndaha de jeē nahín-ni coo ñayuu ún, te ni cahān de:

Nihín jñáhan ñuu yō Israel jíin nihín téé jeē suni cáchiñúhún ní Yāā Dios, cuni nahín ní jijnáhan ní. <sup>17</sup> Máá Yāā Dios yohó ñayuu Israel, ni nacāji ya jíi yō jijnáhan de. Te níni jéé cáyūcu tátú de ñuu Egipto, te ni sāha ya jeē ní nducuehē de. Yūcuán na te jíin poder maá yá ni quenehen ya de nación Egipto. <sup>18</sup> Te uū xico cuiyā ní cajica de nuū ñuhun téhé, te ni jendeyí ni yā jíin de jeē ní caství de. <sup>19</sup> Te ni snáa yā uxā nación Canaán, te ni jēhe ya ñuhun un núu tāca jíi yō cúu tahū de. <sup>20</sup> Yūcuán na te ni jeni ya tāca téé ni candacu jniñu nuū de nájnūhun cuñ ciento uū xico uxí cuiyā, nde quivī ní cotecu Samuel, tēe ni nacani jñuhun ya. <sup>21</sup> Yūcuán na te máá ñayuu un ní cajicān i ñin rey, te ni jeni Yāā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. <sup>22</sup> Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñuhun de: Cúsñ ní rí jíin David sēhe Isai, chi sāha de tāca jéé cuní rī, achí yá.

<sup>23</sup> Te cáhán gā Pablo:

Te sēhe yucūn David ni cacu Jesús, Yāā ní jeni Yāā Dios jeē jnáma ya yohó ñayuu Israel, chi súcuan ní jejnūhun ya. <sup>24</sup> Te nde ná tu quejéé Jesús nacani ya jñuhun nuū ñayuu, te ni nacani Juan jñuhun nuū tāca jñáhan ñuu yō Israel jeē na nacani ni i jeē stóo i cuēchi i, te cuandute i. <sup>25</sup> Te nuū cuácuyajni jeē cúu Juan, te ni cahān de: Cándetu ró jéé quíji Cristo, te jeni ni rō jeē ruhū cúu, te nastū rí cúu. Chi quiji ya, te cújéñnu ndasí yá jeē ni ndijēn yā tu cújéñnu ri tava rī, achí de.

<sup>26</sup> Amigo jijnáhan ní, tāca nihín jéé cácuu yó sēhe yucūn Abraham jíin tāca nihín jéé suni cándiso íyo ní núu Yāā Dios, chi cúni Yāā Dios jeē na cúni yō jñuhun yáha jeē cáhán ndese jnáma ya yohó. <sup>27</sup> Chi tāca ñayuu ñuu Jerusalén jíin tāca téé cácujeñnu nuū i, tu ní cájecūhun ni i jeē Jesús cúu Cristo, Yāā ní jeni



Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ní i, te ni candonda i ni cacahān i jeē na cúu yā. Te súcuan ni casquicu i siquī tāca jnūhun jeē ní cacahān tēe ni canacani jnūhun ya nde jenahán. <sup>28</sup> Vēsú tu ní cánihīn i ni ñn cuēchi siquī yā jeē cúu yā, te ni cacahān nihin i jín Pilato jeē na cúu yā. <sup>29</sup> Te ná ni jīnu ní squicu siquī yā tāca jnūhun cáhán nuū tútu īi, te ni casnúu de ya jicā cruz, te ni cachindūji de ya ñn yaū ní jete jicā cáva. <sup>30</sup> Te ni sáha Yaā Dios jeē ní natecu yā. <sup>31</sup> Te ñayuu Galilea jeē ní jéngoo jín yá nde Jerusalén nde na técu yā, nuū maá i ni steén ndijin yā maá yá cuēhē quivī ná ni natecu yā, te ñayuu un cácuu jeē cánacani cáji jnūhun ya nuū tāca gá jnáhan yó hebreo vijna.

<sup>32</sup> Te maá ná jijnáhan ná cánacani ná jnūhun vāha yáha núu ni jijnáhan ní jeē súcuan ni jejnūhun ya nuū tāca jíi yō. <sup>33</sup> Te jnūhun yáha ní squicu Yaā Dios nuū maá yó jeē cácuu yó séhe yucūn de, chi ní nastécu yā Jesús. Chi suhva cáhán salmo uū jeē cahán yā jín Séhe ya Jesús: Máá ró cúu Séhe ri, te vijna ni sajhenu ri rohó jéē cúu ri Tatá rō, achí yá. <sup>34</sup> Te ni nastécu yā Séhe ya Jesús návāha ma tehyú cuiti yā, chi suhva cáhán tutu īi jeē ní cáhān Yaā Dios nde jenahán: Te nihīn maá ró tāca jéē vāha ni jejnūhun ri nuū David, achí. <sup>35</sup> Te suni súcuan cáhán inga salmo jeē ní tee David jnūhun jeē cahán Jesús jín Yáa Dios: Ma cuáha ni jnūhun tehyú ná, chi jéjníñu ná núu ní te maní ni jín ná, achí. <sup>36</sup> Te David chi jíní yō jeē ní jejníñu de nuū ñayuu ní cotecu de jín, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíi yō, te ni tehyú de. <sup>37</sup> Te Jesús, Yaā ní nastécu Yaā Dios, chi tu ní téhyú cuiti yā. <sup>38</sup> Jeē yúcuan jíní ñúhún jecūhun ní ní, amigo, jeē Jesús cúu Yaā cóne cáhnu ni nuū tāca cuēchi yó. <sup>39</sup> Chi ní canducú ní ndahva ni cuēchi ní jéē squicu ní ley jeē ní jéhe ya nuū Moisés, te tu ní cúu ndahvā cuēchi ní súcuan. Te Jesús cúu Yaā ndáhva ndihi cuēchi ñayuu jeē cácandíje i tāca jéē ní sáha ya jehē i. <sup>40</sup> Núu súcuan te coto ní jijnáhan ní jéē ma ndóho ní tāca castigo jeē ní cacahān tēe ni canacani jnūhun Yaā Dios nde jenahán, chi suhva ni cahān Yaā Dios:

<sup>41</sup> Tāca róhó ñayuu jeē casácatā, na cóto ró na castigo xeēn quiji siquī rō, te naa ni rō coto ró, te cuu rō.

Chi tiempo maá ró te sáha ri jniñu xeēn

jeē ma cándíje cuiti rō jeē súcuan sáha ri vēsú nacani ñayuu jnūhun un núu rō, achí yá.

Achí Pablo.

<sup>42</sup> Te ní quendacoo Pablo jín tāca jnáhan de vehe īi sinagoga jnáhan hebreo de. Te ñayuu sñn nación ni cacahān ndahú i jín de jeē inga quivī ndétātu nacani tucu de jnūhun yáha núu i. <sup>43</sup> Te ní jitē ñayuu un cuángoo i. Te cuēhē ñayuu hebreo jín ñayuu sñn nación jeē ní cacandíje sahan hebreo te cáchiñúhún i nuū Yaā Dios, cuángoo i jín Pablo jín Bernabé. Te ni cacahān nihin de jín i jeē na cuñi nihin i jín jnūhun jeē maní Yaā Dios jín i.

<sup>44</sup> Te quivī ndétātu inga semana te je yajni ndihi ñayuu ñuu un ní candutútú i jeē cúni nahín i jnūhun Yaā Dios. <sup>45</sup> Te nuū ní cajini tēe hebreo jeē ní candutútú cuēhē ñayuu, te ni cacucuéśun ni de, te ni cacahān de jeē násūu jnūhun vāha cúu jeē steén Pablo, te ni cacahān neé de nuū Pablo. <sup>46</sup> Yúcuán na te jénnu-ni ni cacahān Pablo jín Bernabé, achí de:

Cánuú jéē xihna gā nuū maá ní jeē cácuu ní jnáhan ñuu yō hebreo nacani ná jnūhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahú ni cotecu ni ñí cáni. Te vijna te quínacani ná jnūhun ya nuū ñayuu



tācá nación jeē tu cājini i jnūhun ya. <sup>47</sup> Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jée cúu ró nájñūhun luz jeē steén ini anuá ñayuu tācá nación, chí ní ñayūvi steén rō jñūhun ri nuū ñayuu jeē jnáma ri i, áchí yá. Achí de.

<sup>48</sup> Te ñayuu sñn nación, nuū ní cajini sōho i jñūhun yáha te ni cacusiñ teyí ni i. Te ni cacahān i jeē yōhyo vāha jñūhun cúu jñūhun máá Jítóho yō, te tāca ñayuu jeē ní nacāji Yaā Dios i jeē cótecu i ní cāni, ni cacandíje i. <sup>49</sup> Te ni jité jñūhun máá Jítóho yō cuahān ní región yūcuán. <sup>50</sup> Te ñuu Antioquía cáyūcú ñahan cácuu nuū te cáchiñūhún ña Yaā Dios. Te tēe hebreo ni cascáhán de ña, te suni ní cascáhán de tēe cácujeñu ñuu ún, te ni cajito xeēn i Pablo jíin Bernabé te nde ni cascúno i de cuango de. <sup>51</sup> Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. <sup>52</sup> Te vēsú súcuan te ñayuu cácuandíje un ní cunuú Espíritu Santo jíin i, te cácusñ teyí ni i.

*Jeē ní coyūcu Pablo jíin Bernabé ñuu Iconio*

## 14

<sup>1</sup> Te ñuu Iconio ni quivicoo Pablo jíin Bernabé ini vehe ñi sinagoga jnáhan de hebreo. Te jíin jñūhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñn nación ni cacandíje i. <sup>2</sup> Te jnáhan de hebreo jeē tu ní cácuandíje, ní cascáhán de ñayuu sñn nación, te ni cajeni ni i jeē násū ñayuu vāha cácuu ñayuu cácuandíje. <sup>3</sup> Te ni caquendōo Pablo jíin Bernabé yūcuan cuéhē gā quiví. Te jéñu-ni ní canacani de jñūhun Jítóho yō, chí cácuahnu ni de ya jeē vāha quihñ jniñu un sáha ya. Te máá yá chí ni steén yā jeē iyó ndāá jñūhun jeē yōhyo vāha ni yā jíin i jeē cánacani de, chí ni jēhe ya jeē sáha de jniñu jéñu jeē steén jeē cujéñu ya. <sup>4</sup> Te ñayuu ñuu un ní cacusiñ ni i jíjnáhan i, sava i jíin tēe hebreo jeē tu cácuandíje de Jesús, te sava ga i jíin tēe apóstol. <sup>5</sup> Te ñayuu hebreo jíin ñayuu sñn nación jíin tēe cácuu tohō ni casquínáhan jñūhun jeē sáha xeēn jíin Pablo jíin Bernabé, jíin jéē cuáha yuū xiní de núú. <sup>6</sup> Te ni cajini de jeē súcuan cácuu sáha, te ni cajinu de cuango de nde ñuu Lистра jíin ñuu Derbe ndañúú Licaonia jíin táca ñuu yajni yūcuán. <sup>7</sup> Te yūcuan ní canacani de jñūhun jeē jnáma ya yohó.

*Jeē ní cajēhe i yuū xiní Pablo ini ñuu Lистра*

<sup>8</sup> Te ñuu Lистра néne ñn tēe jeē tu cúu caca, te tu jíca cuíti de chí nde quiví ní cacu de cácójó de. <sup>9</sup> Tēe un ní jini sōho de jñūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéē ndúvāha de. <sup>10</sup> Te ni cahān jee Pablo jíin de:

Ndocuñí, condichi rō, achí de.

Te ni scānda tēe un máá de ni nucōndichi-ni de, te ni quejéé de caca de. <sup>11</sup> Te ni cajini ñayuu ún jniñu jéñu jeē ní sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ní quecoo nuū yō, te cájica nájñūhun cájica tēe, áchí i.

<sup>12</sup> Te ni cacahān i jeē Bernabé cúu yaā Júpiter, te Pablo cúu yaā Mercurio chí Pablo cúu tēe nácani jñūhun. <sup>13</sup> Te yajni yuñúu un néne veñūhun yaā Júpiter. Te máá sūtū jeniñu ini veñūhun un ní quihñ de stiquí jíjnáhan ti te ni scutú de ti ita te vēji de nde nuū quiví i yuñúú, te máá de jíin ñayuu ñuu un cácuu de cahni de stiquí un sócō de nuū Bernabé jíin Pablo nuú. <sup>14</sup> Te Bernabé jíin Pablo, tēe cácuu apóstol, ni cajito de jeē súcuan cácuu ñayuu un sáha i, te ni candatá de

sahma de jeē stéen de jeē castívi ndasí i jeē casáha i súcuan. Te ni quenendava de ni quívicoo de mēhñu ñáyyu cuehē ún, te ni cacana jee de:

<sup>15</sup> Tātá jijnáhan ní, ma sáha cuíti ni súcuan, chi sañá suni tēe-ni cácuu ná nájñuhun máá ní jijnáhan ní. Te vējicoo ná nacani ná jñuhun váha Yaā Dios nuū ní, chi cahān na jíin ní jeē ma sáha ga ni táca jniñu yáha jéē tu ndé jéjññu cuíti, chi sa suhva na chíññuhún ní maá Yaā Dios, Yaā técu, Yaā ni sáha andívi jíin ñáyívi jíin ndute mar jíin táca gá jeē iyó ní cáhnu. <sup>16</sup> Te nde jenahán ní jéhe ya jñuhun jeē na sáha táca ñáyyu modo cácuu maá i. <sup>17</sup> Te vēsú súcuan te níni stéen yā ndese Yaā cúu ya, chi máni sáha ya jniñu váha jíin yó, chi scúun ya saū, te sáha ya jeē cúu váha itu yó, te jéhe ya jeē jíni ññuhún yó návaha caji yó te coo síi ni yó, achí ndíndúú de.

<sup>18</sup> Te vēsú súcuan ni cacahān de, te yóhoyo uhū ni cajesi de nuū ñáyyu un návaha tú socó i siquí un núu de jeē chíññuhún i ndíndúú de.

<sup>19</sup> Yūcuán na te ni quecoco jecu tēe hebreo ñuu Antioquía jíin ñuu Iconio, te ni cascáhān de ñáyyu cuehē ún, te ni cajéhe i yuū xiní Pablo. Te ni caquenehen i de yatá ññu ún, chi ni cajeni ni i jeē jé ni jihí de. <sup>20</sup> Te tēe cácandíje ní cacondúú de Pablo, te ni ndonda Pablo, te ni ndívi de ini ñuu. Te inga quívi ní quihin de ichi cuahān de jíin Bernabé nde ñuu Derbe.

<sup>21</sup> Te ini ñuu un ní canacani de jñuhun jeē jnáma ya ñáyyu, te ni cacandíje cuehē ñáyyu ni casáha de. Te ni canandicó de cuanuhun de ñuu Litra jíin ñuu Iconio jíin ñuu Antioquía. <sup>22</sup> Te ni cahije ga ni ñáyyu cácandíje yūcuan ní casáha de. Te ni castíhví ni de i jeē na cuíñi níhin i jíin jñuhun ya, chi ni cacahān de jeē níni quiji cuehē jññódóho siquí yó te yūcuán na te jinū yó ñuu nuū ndácu Yaā Dios jniñu. <sup>23</sup> Te táca ñuu ni cajeni de tēe jéhnu cándiso jniñu condito de ñáyyu cácandíje. Te ni cahíyo ndite ní Pablo jíin Bernabé nuū yā, te ni cajicān tahú de, te ni cacahān de jíin máá Jitoho yó jeē na cóto ya ñáyyu ún chi cácandíje i máá yá.

### *Jeē cuánuhun tucu Pablo jíin Bernabé ñuu Antioquía ndañúú Siria*

<sup>24</sup> Te ni cayáha de cuango de región Pisidia, te ni najinūcoco de región Panfilia. <sup>25</sup> Te ni canacani de jñuhun ya ini ñuu Perge región Panfilia, te sáa te cuango de ñuu Atalia. <sup>26</sup> Te yūcuan ní quívicoo de barco, te ni najinūcoco de ñuu Antioquía. Te ñuu yūcuan cúu nuū ní cajicān tahú ñáyyu nuū Yaā Dios jehē de jeē na chíndéé ñáhān yá de jeē quíngoo de nacani de jñuhun. Te ni jinu jniñu, te ni najinūcoco de ñuu ún. <sup>27</sup> Te nuū ní najinūcoco de yūcuán, te ni casáha de junta jíin ñáyyu cácandíje, te ni canacani de jñuhun táca ndese cuehē jeē váha ní sáha Yaā Dios jíin de, chi ní jéhe ya jñuhun jeē suni candíje ñáyyu táca nación jeē tu ní cájini i jñuhun ya. <sup>28</sup> Te ni caquendóo de yūcuan cuehē quívi jíin ñáyyu cácandíje.

### *Siquí junta ñuu Jerusalén*

## 15

<sup>1</sup> Yūcuán na te jecu tēe Judea ni quijicoo de ñuu Antioquía, te ni castéén de nuū táca hermano jeē núu tu sáha i circuncidar, nájñuhun cáhān ley jeē ní jéhe ya nuū Moisés, te tú na modo cácu i. <sup>2</sup> Te Pablo jíin Bernabé ni catejñāhan de jíin tēe ún, te tu ní cúndaā. Te jeē yūcuan ní candajnñuhún de jeē quíngoo Pablo jíin Bernabé jíin jecu gā tēe cácandíje un ndé ñuu Jerusalén, te yūcuán ndajnñuhún de siquí jñuhun yáha jíin tēe cácuu apóstol jíin tēe jéhnu cándiso jniñu nuū ñáyyu cácandíje yūcuán.

<sup>3</sup> Te ñayuu cácanđije un ní canachuhun íchí i de. Te ni cayāha de ichi Fenicia jíin Samaria, te cácanani de jnūhun jeē suni ñayuu tāca gá nación jeē tu ní cájini i jnūhun ya, ni castóo i jniñu jeē tu íyó ndáa te ni cacandije i Yaā Dios. Te yōhoyo ni cacusī ni tācá hermano jeē ní canihīn de jnūhun jeē súcuan ni cacandije ñayuu ún.

<sup>4</sup> Te ni najinūcoo de ñuu Jerusalén, te ñayuu cácanđije yūcuan jíin tēe apóstol jíin tēe jéhu cándiso jniñu nuū ñayuu un, ní cacusī ni de jeē ní najinūcoo jnāhan de ún. Te Pablo jíin Bernabé ni canacani de tāca jnūhun ndese cuehē jeē váha ni sáha ya siquī jniñu jeē ní canacani de jnūhun ya. <sup>5</sup> Te sava tēe grupo fariseo jeē cácanđije ni candocuiñi te ni cacahān:

Ñayuu sūn nación jeē cácanđije i Jesús, jíni ñūhún jēe sáha i circuncidar nájñūhun cása ha máa yó, te cánuu ndacu yó jniñu nuū i jeē na squícu i ley jeē ní jéhe ya nuū Moisés, áchí.

<sup>6</sup> Te tāca tēe apóstol jíin tāca tēe jéhu cándiso jniñu nuū ñayuu cácanđije, ni candutútú de junta návāha ndajnūhún de te sándaā de siquī jnūhun yáha. <sup>7</sup> Te tācá de ni cacahān de ndese cájeni ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini váha ni jēe je íyó tiempo jeē ní nacāji Yaā Dios sáña jēe quihún na núu ñayuu sūn nación te nacani ná jnūhun nuū i jeē jnáma ya i, návāha candije i Jesucristo. <sup>8</sup> Te Yaā Dios chi jíni yā ndese cáa ánuá ndihi ñayuu, te ni steén yā jeē jetáhú yá i, chi suni ni jéhe ya Espíritu Santo nuū i jíjnáhan i, nájñūhun ni jéhe ya nuū máa yó. <sup>9</sup> Te inuū-ni sáha ya jíin yó jíin máa i, chi siquī jeē suni ni cacandije i jnūhun jeē jnáma ya i, te jeē yūcuan ní sándoo ya anuá i nuū tāca cuéchi i. <sup>10</sup> Te vijna znaun cácani ní ndacu ní jniñu jeē na squícu i ley un? Chi tu núnjahan ni Yaā Dios jeē súcuan. Chi cácani ní tee ní jniñu yí yáha siquī ñayuu cácanđije ún, te ni tāca jíi yó tu ní cácundeyí de squícu de, te ni máa yó. <sup>11</sup> Chi sa suhva cácanđije yó jēe jnáma ya yohó súcuan-ni siquī jeē yóhoyo váha ni máa Jítoho yō Jesús jíin yó, te suni súcuan-ni jnáma ya máa i, nasūu siquī jeē squícu i ley un, áchí de.

<sup>12</sup> Yūcuán na te tēe cuehē un ní cacuu nayúu de, te ni cajini nahín de jnūhun cácahān Bernabé jíin Pablo. Chi ni cacastūhún de jeē ni jéhe ya poder jeē ní casáha de tācá jniñu jéhu jeē steén jeē cujéhu ya, ni cajito ñayuu tācá nación jeē tu cájini i jnūhun ya. <sup>13</sup> Te nuū ni jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cahān na. <sup>14</sup> Ni nacani Simón Pedro jnūhun ndese ni quejéé nuū jniñu jeē jnáma Yaā Dios ñayuu tācá nación jeē tu cájini i jnūhun ya, chi suni méhñu máa i nacāji ya ñayuu jeē ndúu i ñayuu máa yá. <sup>15</sup> Te quíjnáhan jnūhun ni cahān de yāha jíin jnūhun ni catee tēe ni canacani jnūhun Yaā Dios nde jenahán jeē yosó núu tútu íi:

<sup>16</sup> Achí Yáa Dios:

Nájñūhun ni cotúú vehe David cúu jeē tuá ndácu sēhe yucūn de jniñu, nájñūhun ni ndacu máa de jniñu nde jenahán.

Te iin quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

<sup>17</sup> Súcuan sáha ri návāha tāca gá ñayuu na nánducú i ruhū

nde jíin ñayuu tācá nación jeē tu cájini jnūhun ri, tācá i jeē cána ri i candije i ruhū.

<sup>18</sup> Súcuan cahān máa Jítoho yō, te nde jenahán ní steén yā jnūhun yáha núu ñayuu.

Achí tutu iĩ.

<sup>19</sup> Jeē yúcuán jéni ni na jéē ñáyuu tāca gá nación jeē ní castóo i jniñu jeē tu iyó ndáa te ni cacandíje i máá Yáa Dios, ma stáhān yō i jeē ndácu yó jniñu jeē squícu i ley Moisés. <sup>20</sup> Chi sa suhva na téē yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quiiti jeē jihí jeē tu jéti ñiñī tī, te ni ma cáji i ñiñī. <sup>21</sup> Jñūhun yáha-ni tee yó quihín nuū i nájnūhun je cástéén nde jenahán. Chi nde jenahán je iyó téē cástéén jñūhun ley jeē ni jéhe ya nuū Moisés, te ndijnahan quiivī ndétātu cácahu de ley un ini vehe iĩ sinagoga tāca ñuu, achí Jacobo.

<sup>22</sup> Yūcuán na te téē apóstol, jíin téē jéhnū cándiso jniñu, jíin ndivii ñáyuu cacandíje, ni cacundaā ni de jeē nácāji de téē quingoo jíin Pablo jíin Bernabé nde ñuu Antioquía. Te téē ni canacāji de un cácuu Silas jíin Judas, te inga sihví de cúu Barsabás. Te cándiso jniñu de nuū táca hermano cacandíje. <sup>23</sup> Te ni cajendeca de carta jeē cahán suhva:

Máá ná cácuu téē apóstol, jíin táca téē jéhnū cándiso jniñu nuū ñáyuu cacandíje, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sín nación jeē cáyūcu ní ñuu Antioquía jíin Siria jíin Cilicia. Cuandeyí ni ní jíjnáhan ní. <sup>24</sup> Ni cajini jñūhun ná jéē ní quendacoo sava jnáhan ná yáha ní jengoo nuū ní, te jíin jñūhun jeē ní cacahān de te ni casáha jeē ní canacani ndasí ní ní, te ni cacuxí ní ní, chi cándacu de jniñu jeē sáha ní circuncidar jíin jéē squícu ní jniñu cáhān ley jenahán jéē ni jéhe ya nuū Moisés. Te nasūu sáña ní cátaji téē un jéē jeē de nuū ní. <sup>25</sup> Jeē yúcuán ní cajeni ni ná, te inuú-ni ni cacundaā ní ná, te ni nacāji ná téē cuajécoo nuū ni jíin úu hermano yō jeē maní yō jíin, cúu Bernabé jíin Pablo. <sup>26</sup> Te ndíndúu de je ni catana de máá de nuū jnúndóho vésú na cúu de jeē siquí jñūhun Jitoho yō Jesucristo. <sup>27</sup> Núu súcuán te cátaji ná Judas jíin Silas jeē nuū ní, te suni nájnūhun cáhān carta yáha suni súcuán castūhún de nuū ni jíjnáhan ní. <sup>28</sup> Chi máá Espíritu Santo ni steén yā ñn modo jeē ní cacundaā ni na jéē ma téē ná táca jniñu yí ley Moisés siquí ní, chi máá-ni jniñu yáha jéē cánuú gá: <sup>29</sup> Ma cáji ní táca jéē ní casocō nuū ídolo, ni ma cáji ní ñiñī ní quiiti jeē jihí jeē tu jéti ñiñī tī, te ma cáca jnéni ní. Te vāha squícu ní núu tuá sáha ní táca jéē yáha. Súcuán na cóo te sándeýí ní ní, achí carta.

<sup>30</sup> Yūcuán na te téē quingoo un cuángoo de nde ñuu Antioquía. Te ni cacana de xinī ñáyuu cacandíje ni candutútu de junta, te ni cajéhe de carta un núu i. <sup>31</sup> Te ni cacahu i, te ni candusí ni i jeē ní níhín i jñūhun ndeyí ni nuū carta ún. <sup>32</sup> Te suni téē cánacani jñūhun Yáa Dios cácuu Judas jíin Silas, te jíin cuéhē jñūhun ni cacahān de te ni candundeyí ní táca hermano un, te ni cahije ga ní i jíin jñūhun ya. <sup>33</sup> Te ni coyūcú de yūcuán jecu quiivī. Yūcuán na te hermano yúcuán ní canacatáhu i nuū de jeē quínuhun de nuū téē jeē ní cataji de. <sup>34</sup> Te Silas ní nujnahan ni de ni quendōo de yūcuán. <sup>35</sup> Te suni ni caquendōo Pablo jíin Bernabé ñuu Antioquía, te máá de jíin sava ga téē ni castéén de te ni canacani de jñūhun vāha máá Jitoho yō.

### *Jeē quihín Pablo inga jínu nacani de jñūhun ya*

<sup>36</sup> Te ni cuu ga quiivī, te ni cahān Pablo jíin Bernabé:

Vijna te na quícondéhe yó táca hermano yō ndijnahan ñuu nuū ní nacani yó jñūhun máá Jitoho yō, na cóndéhe yó ndese cáhīyo i, achí de.

<sup>37</sup> Te Juan jeē suni nání de Marcos, cúni Bernabé jeē quihín téē un jíin de.

<sup>38</sup> Te tu ní cúni Pablo jeē quihín téē un jíin de, chi nde Panfilia ni cusín Marcos

nuū Pablo jíin Bernabé, chi tuá ni chindéé ñáhán de ndíndúú téé un síquī jniñu ya nde saá. <sup>39</sup> Te nahán ní candajñuhun Pablo jíin Bernabé, te tu ní cácuñá ni de síquī Marcos, te ni cacusín de. Te Bernabé ni jeca de Marcos, te ni quíivicoo de barco cuangoo de nde Chipre, ñuhun jeé íne sñin nuū ndúte. <sup>40</sup> Te Pablo ni nacáji de Silas quihín jíin de. Te táca hermano cácuñá ni cajicán tahú de nuū maá Jítoho yō jeé síquī jeé váha ni yá te na chindéé ñáhán yá Pablo. Te cuahán Silas jíin Pablo. <sup>41</sup> Te ni cajica cuu de ní Siria jíin Cilicia. Te táca grupo ñayuu cácuñá ni cahije ga ni i jíin jñuhun ya ni casáha de.

### *Jeé cuahán Timoteo jíin Pablo jíin Silas*

## 16

<sup>1</sup> Yūcuán na te saá te ni jinū Pablo jíin Silas ñuu Derbe jíin ñuu Listra. Te yūcuán néne ñin tēe suchí cácuñá, nání i Timoteo. Séhe yí ñin ñahan hebrea cúu i, te ñahan cácuñá cúu ña. Te tátá i chi tēe griego cúu de. <sup>2</sup> Te táca hermano ñuu Listra jíin ñuu Iconio cácuñá de Timoteo. <sup>3</sup> Te cúni Pablo condeca de Timoteo quihín de jíin i. Te ni cahán Pablo jeé quihín i cuu i circuncidar, chi tu cúni Pablo jeé cahán ñayuu hebreo jeé tu ní síquī Timoteo costumbre un, chi ndíhi ñayuu cájini i jeé téé griego cúu tátá i. <sup>4</sup> Te táca ñuu nuū cuángoo de te ni cacastúhún de nuū ñayuu cácuñá jeé na síquī i maá jniñu jeé ní casándaá tēe apóstol jíin táca téé jéñu cáyūcú ñuu Jerusalén jeé cácuñá jniñu nuū ñayuu cácuñá. <sup>5</sup> Te ñayuu cácuñá ni cahije ga ni i. Te ndíjnahán quiví ni cacandíje cuehé gā ñayuu.

### *Jeé ní jito ndíjin Pablo ñin tēe ñuu Macedonia*

<sup>6</sup> Te tu ní jéhe Espíritu Santo yá jñuhun jeé nácani de jñuhun ya ní Asia. Jeé yūcuán ní cayáha de ichi Frigia jíin Galacia cuangoo de. <sup>7</sup> Te ni jinūcoo de nuū quijnáhan Misia jíin Bitinia. Te cácuñi de quingoo de Bitinia, te maá Espíritu Jesús tu ní jéhe ya jñuhun quingoo de. <sup>8</sup> Te ni cayáha de ñin lado Misia cuangoo de ñuu Troas jeé íne yajni yumar. <sup>9</sup> Te ñin jecuáá te nájnñuhun ñin jéni ní jito ndíjin Pablo, te ni jito de jeé índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní saña jíin ná, áchí. <sup>10</sup> Te súcuán ni jito ndíjin de. Yūcuán na te saña, Lucas, ni quijnáhan ná jíin de. Te ni casátúhva ná jíin de jíin ná de jeé quingoo ná Macedonia, chi ní cajini cají ná jeé maá Yáa Dios táji yá saña jíin ná de jeé castúhún ná nuū ñayuu yūcuán jñuhun jnama ya i.

### *Jeé ní coyūcu Pablo jíin Silas ñuu Filipos*

<sup>11</sup> Te jíin barco ni quendacoo ná ñuu Troas, te cuangoo ndaá-ni ná ndé Samotracia, ñuhun jeé íne sñin nuū ndúte. Te inga quiví ni jinūcoo ná ñuu Neápolis. <sup>12</sup> Te yūcuán ní quendacoo ná, te ni jinūcoo ná ñuu Filipos jeé cúu ñuu cujéñu ga íne Macedonia, chi maá ñayuu ñuu Roma ni casáha i ñuu i ún. Te ni coyūcu ná ñuu Filipos jecu quiví. <sup>13</sup> Te ñin quiví ndétātu ní quendacoo ná ñuu ún, te ni jengoo ná ñin yuyúte, chi yūcuán cúu ñin lugar nuū cájicán tahú ñayuu. Te ní cacucóo ná, te ni canacani ná jñuhun ya nuū táca ñahan ní canataca yūcuán. <sup>14</sup> Te ñin ña nání Lidia jeé véji ña ñuu Tiatira, xico ña sahna ndíhi jéé yáhu ga ndeé. Te maá ña níni chíñúhún ña Yáa Dios. Te ni jini sōho ña jñuhun cácanani ná, te maá Jítoho yō Jesús ni sáha ya jeé ní candíje ña jñuhun jnama ya ña jeé ni cáhán Pablo. <sup>15</sup> Te ni jendute ña nde jíin ñayuu cáyūcú vehe ña, te ni cahán ndahú ña jíin ná:

Núu cácuáhnu ni ni jēē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jijnáhan ná.

<sup>16</sup> Te ñin quiví te cuangoo tucu ná suu lugar nuū jéngoo ñayuu cájicān tahu. Te ni canajnáhan ná jíin ñin sūchi sñí jēē ñūhun tachí ini i, te máa un sáha jeē cahán i táca ndese coo te cūndaā jeē cahán i. Te sūchi un ní cajeen patrón i, návaha nihin de cuehē xūhun siquí jeē cástūhún i nuū ñin ñayuu ndese coo ichi núu. <sup>17</sup> Te sūchí un ndíquín i sãña jijnáhan ná cána jee i:

Tēe yáha cájejniñu de nuū Yaā Dios, Yaā cujéhnū téyí, te cácastūhún de ndese cácu ní núu cuéchi ní jijnáhan ní, áchí i.

<sup>18</sup> Te cuehē quiví ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder máá Jesucristo ndácu ri jniñu nuū rō jeē na quénda ró ini i quihñr rō, achí de.

Te hora un ní quenda-ni cuahān.

<sup>19</sup> Yūcuán na te ni cajini patrón i jeē ma nihín gā i xūhún cuu de, te jeē yúcuan ní cajni de Pablo jíin Silas cuangoo jíin de nde vehe juzgado nuū cáyūcu tóhō.

<sup>20</sup> Te ni cajeni ún de nuū juez, tēe casándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. <sup>21</sup> Te cájequin de inga costumbre jeē ma cúu cuatáhú cuiti yō, ni ma cúu sáha yó, chí tu jéhe ley nación yō jñuhun, chí ñayuu nación Roma cácuu yó, áchí.

<sup>22</sup> Te suni ni candona ñayuu siquí Pablo jíin Silas. Te tēe cácuu juez ni candacu de jniñu jeē na quénda sahma ndindúú de te cani yujnu siquí de.

<sup>23</sup> Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún.

<sup>24</sup> Te jeē súcuan ni tahu jniñu nuū tēe ndíto vecāa te ni squíví de Pablo jíin Silas nde ichi ini gā, te ni squíví jehē de tisin yujnu ndéé yaū te ni cajihni de.

<sup>25</sup> Te nuū ní cuu sava ñuú, te cájicān tahu Pablo jíin Silas, te cájita de yaa i nuū máá Yáā Dios. Te ñayuu cáhīin jíin de vecāa un ní cajini nahín i. <sup>26</sup> Te sanaa-ni te ni jñāa nihin téyí, te nde nuū cimientto vecāa un ní canda. Te ni canune-ni yéhyí vécāa ún, te ni canandajī-ni cadena jeē cánuhñi táca ñayuu ún.

<sup>27</sup> Te ni natahū ni tēe ndíto vecāa, te ni jito de jeē núne yéhyí vécāa ún. Te ni tava de espada jeē cáhni de máá de núú, chí ni jeni ni de jeē ndivii cuiti ñayuu cáhīin vecāa un cuángoo i. <sup>28</sup> Te ni cana jee Pablo:

Ma cáhni ni máá ní, chí cáhīin ndihí ná, áchí de.

<sup>29</sup> Yūcuán na te máá tēe ndíto vecāa ni cana de jeē na quíndeca i ñūhūn, te yachí ni quivi de ini vecāa. Te ni jecuññi yiti de nuū Pablo jíin Silas, te quisi i de jeē yūhú de. <sup>30</sup> Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jíin tēe ún:

Candíje ní táca jēē ní sáha Jítóho yō Jesucristo jehē ní te cácu ní, te suni súcuan cácu ndihí ñayuu cáyūcú vehe ní, áchí de.

<sup>32</sup> Te ni canacani de jñuhun máá Jítóho yō nuū tēe un jíin núu táca ñayuu cáyūcú vehe de. <sup>33</sup> Te suu máá jecuáá yúcuan ní nacate tēe ndíto vecāa un núu ní catují Pablo jíin Silas jeē ní cacani yujnu siquí de. Yūcuán na te ni jendute de jíin ndihí ñayuu cáyūcú vehe de. <sup>34</sup> Te ni jeca de Pablo jíin Silas cuahān de jíin vehe de, te ni jéhe de staā ni cayeji de, te cácusñi ni ndihí de vehe de jeē ní cacandíje de Yaā Dios.

<sup>35</sup> Te nuū ní cundijin, te tēe cácuu juez ni catajǎ de policíá cuangoo jíin jnūhun jeē na siáá tēe ndító vecāa un Pablo jíin Silas quingoo de. <sup>36</sup> Te tēe ndító vecāa un ní castūhún de jnūhun yáha nuū Pablo:

Teē cácuu juez ni catajǎ de jnūhun vēji jeē na siáá na níhin quíngoo ní. Núu súcuan te quendacoo ní quíhín ní, te cuandeyí ní ní, áchí de.

<sup>37</sup> Te ni cahān Pablo jíin policíá:

Cuehē ñayuu ni cajito i jeē ní cacani de sañá, te ni tu ní cásandaā de xīhna gā núu ndaa jeē iyó cuéchi ná. Te ni cachuhun de sañá vecāa, vēsú cácuu ná sēhe nación Roma, te iyó ley jeē ma cúu sáha súcuan jíin ñáyuu cácuu sēhe nación Roma. Te vijna ¿á quenehen sáhi de sañá cácuu de naún? Ma cúu cuiiti. Na quícoo máá de quenehen de sañá jíin náhan ná, áchí Pablo.

<sup>38</sup> Te ni canandió cóo policíá ni castūhún de jnūhun yáha nuū tēe cácuu juez, te ni cayūhú de jeē ní cajini sōho de jnūhun jeē sēhe nación Roma cácuu Pablo jíin Silas. <sup>39</sup> Te ni quecoo tēe cácuu juez ún, te yōhoyo ní cacahān ndahú jíin Pablo jíin Silas jeē na cóne cáhnu ní de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. <sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ní jíin táca hermano. Te ni caquihin de ichi cuangoo de.

*Jeē ní cacuvaā ñayuu Tesalónica*

## 17

<sup>1</sup> Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó ñin vehe ñi sinagoga jnāhan de hebreo. <sup>2</sup> Te ni coyūcú de yūcuan únī semana, te táca quífví ndétātu jéhén Pablo vehe ñi sinagoga, nájñuhun sáha sáha de, te ni nacani de jnūhun ya nuū tēe un. <sup>3</sup> Te jíin jnūhun cáhán tutu ñi ní steén de jeē súcuan ní jini ñūhún ndoho Cristo jeē cúu yā te natecu yā. Te ni cahān de:

Jnūhun nácani ná nuū ní cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

<sup>4</sup> Te ni cacandíje sava jnāhan de hebreo jíin cuéhē ñayuu griego jeē cáchiñūhún i Yaā Dios, jíin cuéhē ñahan cácuu nuū, te ni nduu inuú ní i jíin Pablo jíin Silas. <sup>5</sup> Yūcuán na te yōhoyo ní cacucúsún ní jnāhan de hebreo jeē tu cácandíje, te ní castútú tēe cunéé jeē cájica cúxí-ni, te ní quejéé cácana ndee cuangoo. Te súcuan ní casaca núu de xini ñáyuu ñuu ún. Te ni jengoo de vehe Jasón cánanducú de Pablo jíin Silas jeē jnǎ de tēe un quíndēca de nuū ñáyuu cuehē. <sup>6</sup> Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquǎ Pablo jíin Silas ní cacana jee de:

Tēe jeē castívi xíní ñáyuu ní ñáyíví, je ní quecoo de nde yāhá. <sup>7</sup> Te máá Jasón ní jēhe núu vehe cáyūcu tēe ún. Te tēe ún tu cájetáhú de ley máá rey yohó ñáyuu Roma, chí sa suhva cácahān de jeē cájetáhú de nuū inga rey jeē naní Jesús, achí de jíin náhan de.

<sup>8</sup> Te ñayuu jíin tēe cácuu tohó ní cajini sōho i jnūhun yáha, te ni cacuvaā i siquǎ. <sup>9</sup> Te Jasón jíin táca gá hermano ní castóo de xūhún de, chí ní cacahān tohó un jíin de jeē nde núu tajǎ de Pablo jíin Silas quingoo de inga ñuu, yūcuán na te nacuaāha tohó un xūhún de. Te súcuan te ní casiáá de Jasón jíin táca gá hermano cuangoo de.

*Jeē ní coyūcu Pablo jíin Silas ñuu Berea*



10 Yūcuán na te tǎcá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jínūcoo de yūcuán, te ni quǐvicoo de vehe ñi sinagoga jnáhan ñuu de hebreo. 11 Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chí vāha ni cacusī ni de jíin jnūhun ni cacahān Pablo jíin Silas. Te ndijnahān quǐvǐ cǎnanducú yúcun de nuū tūtu ñi núu súcuan cáhán chí tuú. 12 Jeē yúcuan ni cacandíje cuehē jnáhan ñuu de hebreo te suni nde jíin cuehé ñayuu griego, cúu tēe cúu ñahan cácuu nuū. 13 Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yúcuan ní castóna de ñayuu siquǐ Pablo. 14 Yūcuán na te tǎcá hermano ni catajǐ-ni de Pablo cuahān de nde yumar. Te ni ndōo Silas jíin Timoteo ñuu Berea. 15 Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendicoo de ñuu Berea.

### *Jeē ni íne Pablo ñuu Atenas*

16 Te níni ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñayuu ñuu ún yóhoyo cáchiñúhún i ídolo, te ni nacani cuihyá ni de. 17 Te ini vehe ñi sinagoga ni cahān de jnūhun ya jíin jnáhan ñuu de hebreo jíin táca gá tēe cáchiñúhún Yáa Dios. Te suni táca quǐvǐ ni nacani de jnūhun ya nuū táca ñayuu cáhīn nuū yáhu. 18 Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caquejéé cacahān jíin Pablo. Te sava ni cacahān:

¿Na jnūhun cáhán tēe tǐlólhé yāha? áchí.

Te sava ga de ni cacahān:

Tēe nácani jnūhun táca yáa jeē tu cánevāha yó cúu de, áchí.

Súcuan ni cacahān de, chí nácani Pablo jnūhun vāha Jesús jeē ní natecu yā mēhñu ndíyi. 19 Te ni cajeca de Pablo cuangoo de, te ni jinúcoo de nde lugar nuū naní Areópago nuū cándutútú ñayuu cándacu jniñu, te ni cacahān de:

Cácuni ná cachi ni núu na jnūhun jeē jéé steén ni. 20 Chi cáhán ni jnūhun jeē ná tu cuni cuiti na jíin náhan ná, te jeē yúcuan cácuni ná jecūhun ni na siquǐ táca jnūhun yáha, áchí jíin de.

21 Chi táca ñayuu ñuu Atenas jíin táca ñayuu inga ñuu jeē cáyūcu núu i yūcuán, tuá na inga jniñu cácusī gá ni i jíin chí máa-ni jeē cuni nahín i jnūhun jeē chí jéé cahán i jnūhun jeé.

22 Te índichi Pablo mēhñu ñayuu ní candutútú núu naní Areópago, te ni cahān de:

Tēe ñuu Atenas jijnáhan ní, jito ná jéé yóhoyo cáchiñúhún ní yaā maá ní. 23 Chi ni jica nuu ná, te ni jecondēhe ná nuū jeé cáchiñúhún ní, te ni jito ná ñi altar jeé yosó jnūhun yáha: Yáha cúu altar yaā jeé ná tu cuni yó jnūhun ya, áchí. Te máa Yáa un jéé cáchiñúhún ní, vēsú ná tu cuni ni jnūhun ya, suu jnūhun Yaā un cúu jeé nácani ná núu ní vijna.

24 Chi Yaā un cúu Yaā jeé ni sáha ñayivǐ jíin táca ndihi jeé iyó, te máa yá cúu Jitoho andivǐ jíin ñayivǐ, te tu ndéé yá ini veñūhun cása ha ñayuu. 25 Te ni tu cúmanǐ ni ñi nuū yā jeé cuáha ñayuu nuū yā, chí máa yá sáha jeé técu ñayuu, jíin jéé stáa i tachǐ i, jíin jéé nihín i ndihi jeé jini ñúhún i.

26 Te ni sáha ya jeé chíji ñi-ni yucūn ni tahū táca ñayuu jeé ní nduu táca nación, návāha coyūcú i ñí cáhnu ñayivǐ, te ni tana yā cuiyā cotecu ñayuu jíin lugar coyūcú i jíin náhan i. 27 Te súcuan ni sáha ya chí cúní yā jeé nanducú yó



yā, chi núu nanducú yó yā te cuni yō jeē iyó yá, chi yajni-ni cúu ya jíin ñin ñin yó. <sup>28</sup> Chi máá yá sáha jeē iyó yó jíin jéé cátecu yō jíin jéé cáccanda yō. Chi suni súcuan ni cacahān sava tēe ñuu ni jéé cáccava yaa: Suni nde yucūn máá yá cáccu yó, áchí. <sup>29</sup> Te núu yucūn Yāā Dios cáccu yó, te ma cáni ni yō jeē ídolo oro chí plata chí yūu cúu ya, chí cájeni ni ñayuu jeē súcuan cáa ya, te súcuan cáccávāha í ídolo. <sup>30</sup> Te ni jendeyí ni yā siquī jeē tu ní cájécūhun ni í nń ndé saá, te vijna chí ndácu ya jniñu jeē ñayuu nń cáhnu ñayiví na nácani ni í jeē stóo í cuéchi í. <sup>31</sup> Chí Yāā Dios, je ni jeni ya quiví jeē ndaā sándaā yā siquī ñayuu ñayiví, te ni jeni ya Jesús jeē máá yá sándaā. Te je ni steén cají Yāā Dios nuū tāca ñayuu jeē máá yá ni jeni Jesús, chí ni nastécu yā Jesús, achí Pablo.

<sup>32</sup> Te jeē ní cajini sōho í jñūhun jeē nátecu ndiyí te sava í ni cacahān catá í, te sava gā í ni cacahān í:

Vāha te núu cuu cuni sōho na jñūhun cáhān ni ndé inga jínu, áchí í.

<sup>33</sup> Te ni quenda Pablo mēñhu ñayuu un cuahān de. <sup>34</sup> Te cuahān jecu ñayuu jíin Pablo, te ni cacandíje. Te ñin de cúu Dionisio, tēe ndútútú jíin tēe cáccujéñhu cáccáha junta nuū naní Areópago, jíin ñin ñahan nání Dámaris, jíin jecu gā í.

### *Jeē ni íne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Atenas, te cuahān de nde ñuu Corinto.

<sup>2</sup> Te yūcuán ní jito de nuū ñin jñáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chí rey Claudio ni ndacu de jniñu jeē na quéndacoo tāca ñayuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. <sup>3</sup> Te suni jniñu sáha tēe un sáha Pablo, chí cáquicu de ñin cuu vehe. Te ni quendōo Pablo jíin tēe ún, te ni casájniñu de. <sup>4</sup> Te tāca quiví ndétātu ní jehēn Pablo vehe íi sinagoga ni nacani de jñūhun ya, te ni nducú ndéyí de jeē na cándíje ñayuu jñūhun Jesús, cúu jñáhan ñuu de hebreo jíin ñayuu táca nación jeē tu ní cájini í jñūhun ya.

<sup>5</sup> Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chí máni jñūhun ya nácani cájí de nuū ñayuu cáccu jñáhan de hebreo, jeē máá Jesús cúu ya Cristo, Yāā jeē cáñūhun ni í quiji ya. <sup>6</sup> Te ni caquejéé í ni cacahān í siquī jñūhun ún, te ni cacahān xeēn í nuū Pablo. Te máá de ní caja de sahna de jeē cúu seña jeē stóo de í jíin cuéchi í, te ní cahān de jíin í:

Cuéchi máá ní cúu jeē jñahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñayuu táca nación jeē tu cájini í jñūhun ya, te nacani ná jñūhun ya nuū í, áchí de.

<sup>7</sup> Te ni quenda de ini vehe íi sinagoga, te ni jinū de vehe ñin tēe nání Justo ni condee de. Te chíñúhún tēe un Yāā Dios, te vehe tēe un néne yajni xiin véhe íi sinagoga. <sup>8</sup> Te Crispo, tēe cújéñhu ini vehe íi sinagoga, ni cándíje de máá Jítoho yō nde jíin ndihi ñayuu vehe de. Te cuehē ñayuu ñuu Corinto ni cajini nahín í jñūhun nácani Pablo, te ni cacandíje í, te ní cajendute í. <sup>9</sup> Te ñin jecuáa ni sáha máá Jítoho yō jeē ní jito ndijin Pablo yā ni cahān yā jíin de:

Ma yūhu ró ní ma cási rō yuhu ró, chí níní nacani ró jñūhun ri. <sup>10</sup> Chí ndíto ri rohó, te ma cúu sáha xeēn ni ñin ñayuu jíin ró. Nacani ró jñūhun ri, chí coo cuehē ñayuu cándíje jñūhun ri ñuu yáha, áchí yá.

<sup>11</sup> Te ni condee Pablo yūcuán ñn cuiyā yosáva ni steén de jñuhun Yaā Dios nuū ñáyuu ún.

<sup>12</sup> Te ná cúu Galión gobernador Acaya, te ñayuu hebreo jeē cúu jñáhan ñuu Pablo, ñn cáhnu-ni ni candonda i siquī Pablo. Te ni cajeca i de cuango i jíin de nde vehe juzgado. <sup>13</sup> Te ni cacahān i jíin Galión:

Tēe yáha yōho scáhán de tāca ñáyuu jeē ñga modo chiñúhún i Yaā Dios, suu ñn modo jeē cúu contra siquī ley, achí i.

<sup>14</sup> Te quejéé Pablo cahān de núú, te ni cahān-ni Galión jíin ñáyuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín rí jñuhun cácahān rō núú. <sup>15</sup> Te tuú, chi máni siquī jñuhun-ni jíin siquī ley maá ró jíin siquī tēe cástéén cúu. Te na sándaā maá ró siquī jñífu yáha, chí tu sándaā rí siquī maá ñn jeē súcuan-ni, achí de.

<sup>16</sup> Te ni cahān de nuū i jeē na quíngoo i fuera. <sup>17</sup> Yūcuán na te ñayuu griego ni cajni i Sóstenes, tēe cújéhnu ñn vehe ñi sinagoga, te maá fuera yehyí vehe juzgado ni cacani i de, te Galión chí tu ní sáha cuñti de cuenta.

*Jeē ní najinū Pablo ñuu Antioquía, te cuahān de vuelta unī jeē nacani de jñuhun ya*

<sup>18</sup> Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jíin ñasihí de Priscila cuango de jíin Pablo, te ni jinūcoo de ñuu Cencrea. Te yúcuan ní saté lii Pablo xinī de, te súcuan stéén de jeē squicu de nuū Yaā Dios jeē ni jéjñuhun de. Te ni quivicoo de barco jíin Aquila jíin Priscila quihñ de región Siria. <sup>19</sup> Te ni jinūcoo de ñuu Efeso, te yúcuan ní caquendōo Aquila jíin Priscila. Te ni jehēn-ni Pablo vehe ñi sinagoga, te ni cahān de jñuhun ya jíin jñáhan ñuu de hebreo jeē cándututú yúcuan. <sup>20</sup> Te ni cacahān ndahú i jíin de jeē na cónēne de jecu gā quivī jíin i, te tu ní jéhe de jñuhun. <sup>21</sup> Chí ni nacuatáhú de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, achí de.

Te ni quenda de ñuu Efeso, te ni quivī de barco cuahān de. <sup>22</sup> Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jíin grupo ñayuu cácañdije yūcuán, te cuanuhun de ñuu Antioquía. <sup>23</sup> Te ni coyūcú de yūcuán jecu quivī, te sáá te ni quenda tucu de cuahān de ni jica cuu de ní Galacia jíin Frigia. Te ñayuu cácañdije ni cahije ga ni i jíin jñuhun ya ni sáha de.

*Jeē ní nacani Apolos jñuhun Jesús ñuu Efeso*

<sup>24</sup> Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jñuhun ya, chí vāha jíin de jñuhun jeē cahán tutu ñi. <sup>25</sup> Te je ni cutūhva vāha tēe un jíin jñuhun maá Jítoho yō Jesús, vēsú jíin de máni maá jñuhun ya jeē ni stéén Juan ná ni scuándute de ñayuu, te ndíhví ni de stéén cají de jñuhun ya nuū ñáyuu. <sup>26</sup> Te jéhnu-ni ni nacani de jñuhun ya ñn vehe ñi sinagoga. Te ni cajini sōho Aquila jíin Priscila jñuhun nácani de, te ni cajeca de Apolos cuango sñn de, te ni cacastūhun yúcún ndindúú de jñuhun ya jeē ná tu cuní Apolos. <sup>27</sup> Te cúní Apolos quihñ de nde región Acaya. Te je cácañdije sava ñayuu yúcuan ní sáha Yaā Dios siquī jeē vāha ni yā. Te tācá hermano ñuu Efeso ni cachindéé ñáhán i de, chí ni catei i carta quihñ de jíin nuū ñáyuu cácañdije cáyucú Acaya jeē na cuatáhú i Apolos. Te nuū ni jíin de yūcuán, te vāha ni chindéé ñáhán de tāca ñáyuu cácañdije un jíin jñuhun ya. <sup>28</sup> Te nuū tāca ñáyuu ñuu un ndé jíin jñáhan ñuu de hebreo jeē cáyucu yúcuan, ní steén cají de ndese cástívi tāca jñáhan hebreo de siquī jñuhun ya. Te tu ní cániññ jñáhan de

un jnúhun cahān siquī jeē ni steén de, chí jín jeē cahán tutu i ni steén de jeē Jesús cúu Cristo, Yaā jeē cáñuhun ni de quiji ya.

*Jeē ni íne Pablo ñuu Efeso*

## 19

<sup>1</sup> Te níni néne Apolos ñuu Corinto, te ni yāha Pablo ichi síquí ñuu Efeso, te ni nanuu de ni jinū de máá ñuu ún. Te yūcuan ní nijnáhan de jín tijní tēe cácanđje.

<sup>2</sup> Te ni cajñuhún de tēe ún:

¿A ní canihīn ní Espírítu Santo ná ni cacandíje ní, chí ná tuú? áchí de.

Te ni cacahān de jín Pablo:

Tuú, chí ni ná tu nihīn na jnúhun jeē iyó Espírítu Santo, achí de.

<sup>3</sup> Yūcuán na te ni cahān Pablo:

¿Na siquī ní cajendute ní núu súcuan? áchí de.

Te ni cacahān de:

Ni cajendute ná síquí jnúhun ni steén Juan, achí de.

<sup>4</sup> Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándíje i máá Yáā quiji jeē cúu Cristo Jesús, áchí Pablo.

<sup>5</sup> Te nuū ní cajini sōho tēe un jnúhun yáha, te ni cajendute de jeē ní cacandíje de máá Jítóho yō Jesús. <sup>6</sup> Te ni soó Pablo ndindúú ndaha de xinī tāca tēe ún, te ni quiví ni Espírítu Santo ini anuá de jínáhan de, te ni cacahān de sīn sīn yuhu te ni canacani de jnúhun ya. <sup>7</sup> Te ni iyo nájñuhun uxí uū jnahān tēe.

<sup>8</sup> Te uní yoō ni jehēn jehēn Pablo vehe i sinagoga. Te jéhu ni nacani de jnúhun ya, te ni nducú ndéyí de jeē na cándíje ñayuu jnúhun ndese ndácu Yaā Dios jniñu. <sup>9</sup> Yūcuán na te sava i ni cacunihni ni i te tu ní cácanđje i, chí sa ni cacahān neé i siquī jnúhun vāha Yaā Dios jín ñayuu cánataca. Jeē yūcuan ní cujiyo-ni Pablo nuū ñayuu ún, te ñayuu cácanđje cuangoo i jín de. Te ndijnahan quiví ni steén de nuū ñayuu ún ini escuela ñn tēe nání Tiranno. <sup>10</sup> Te súcuan ní sáha de uū cuiyā, te tāca ñayuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. <sup>11</sup> Te ni jēhe Yaā Dios poder nuū Pablo jeē sáha de cuehē jniñu jéhu téyí. <sup>12</sup> Te nde pañú jín sahma jeē ní jñi de ni cajengoo jín núu ñayuu cácuñu, te ni canduvāha-ni i cuehyí cándoho i, te ni quendacoo tachí ini i cuangoo.

<sup>13</sup> Te jecu tēe hebreo cájica cuu de jeē quénehen de tachí ini ñayuu, te ni cajeni siquí ní de jeē suni jín poder maá Jítóho yō Jesús quenehen de tachí, te suhva ni cacahān de jín táca táchi:

Jín poder Jesús jeē nacani Pablo jnúhun ya, cáhán nihīn ri jín ró jeē na quénda ró quihīn ró, achí de.

<sup>14</sup> Te súcuan ni casáha uxā sēhe yí ñn tēe hebreo nání Esceva, cúu de ñn sutú cujéhu. <sup>15</sup> Te ná ní casáha de, te ni cahān-ni tachí ún:

Je jíní ri Jesús, te suni jíní ri Pablo. Te róhó jínáhan ró ¿ndé tēe cácuu ró jéé cuatáhú ri róhó? áchí jín de.

<sup>16</sup> Te tēe ndóho tachí un ní ndonda de, te ni cundeyí de siquī ndihúxá tēe ún. Te ní sáha xeēn ndasí de jín ndé ni catuji te ni cacuvichí lí ní quendacoo vehe un ní cajinu cuangoo. <sup>17</sup> Te jnúhun yáha ní cajini tāca ñayuu cáyūcú ini ñuu Efeso, cúu ñayuu hebreo cúu ñayuu tāca gá nación, te yōhoyo ní cayūhú i, te ni cacahān i jeē yóhoyo cújéhu máá Jítóho yō Jesús.

18 Te cuehē ñayuu jeē ní cacandíje ni quijicoo i nuū Pablo ni nacani ndaā i jñūhun tāca jñiñu neé ní casáha i. 19 Te cuehē i jeē ní casáha jñiñu tásí ní jinūcoo i cándiso i tutu i, te ni cajehmu i tutu un jito nuū tāca ñayuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxí mil xūhun plata cúu. 20 Te ni jitē jñūhun máá Jítoho yō cuahān, te ndihi ñayuu ni cajini i jeē cujéhnu ndasí jñūhun ya.

21 Te nuū ní ndihi tāca jñiñu yáha, te jéni téyí ni Pablo jeē quihñ de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jini ññhún quihñ de nde ñuu Roma. 22 Te uū tēe jeē cáchindéé ñáhán jíin Pablo cúu Timoteo jíin Erasto, te ni scāndu de ndindúú tēe yáhá cuángoo de nde Macedonia, te ni quendōo máá de Asia jecu gā quiví.

### *Jeē ní cacuvaā ñayuu ñuu Efeso*

23 Te suu quiví ún yōhyo ni candonda ñayuu siquī jñūhun ya. 24 Chi ni iyo iin tēe sájniñu siquī plata, nání de Demetrio. Te máá de jíin ndihi tēe casájniñu jíin de, cániñ de cuehē xūhún, chi jíin plata casáha de vehe lulí jéé modo veñūhun ídolo i jeē cúu yaā Diana. 25 Te Demetrio ni nastútú de tēe casájniñu jíin de jíin táca gá tēe jeē suni jniñu yúcuán casáha, te ni cahān de:

Tátā, cajini ni jéé siquí jniñu casáha yó yáha vāha cániñ de yō xūhún. 26 Te cájito ní te cájini sōho ní jéé iin tēe nání Pablo chi cahān de jeē násūu yáa cácuu jeē casáha ñayuu. Te je ni scandíje de cuehē ñayuu, násūu máá iin-ni ñuu Efeso yáhá chi ñí cáhnu Asia. 27 Te quíyūhú ni na jéé cahān ñayuu jeē tu ndé jéjñiñu jeē casáha yó. Te sanaa te suni súcuán cahān i coto i máá veñūhun yaā síhí Diana jeē cujéhnu, te suni sájéé ni i nuū yaā Diana, te ma cúu ga cujéhnu ya vēsú ndivii ñayuu Asia jíin ñayuu ñí cáhnu ñayiví cáchiññhún i ya vijna, áchí de.

28 Súcuán ni cajini sōho de jñūhun yáha te yōhyo ni caquiti ni de, te ni cacana jee de:

Cujéhnu téyí Diana, yaā cúu patrona ñuu yō Efeso, achí de.

29 Te ñayuu ñuu Efeso ni cacuvaā i, te iin cáhnu-ni ni candonda i ni cajini i Gajo jíin Aristarco cuangoo i jíin de nde vehe nuū cándutútú ñayuu casáha i junta. Te ndindúú tēe un cácuu tēe Macedonia, te cájica de jíin Pablo. 30 Te cúní Pablo quiví de nuū ñayuu cuehē un cahān de jíin i, te ñayuu cacandíje tu ní cájéhe i jñūhun quihñ de. 31 Te suni sava tohō jeē cácuu amigo de cáyūcu Asia, ni catají jñūhun cuahān nuū de, cácahān ndahú jíin de jeē ma quihñ de nuū ní cacutútú ñayuu ún. 32 Te ñayuu ní cacutútú un, sava i ni cacana jee i iin jñūhun te sava ga i inga jñūhun, te súcuán ni cacuvaā téyí i, te cuehē i ni tu cájini cuiti i na siquí cúu jeē ní cacutútú i. 33 Te sava tēe hebreo ni cajeni de iin jñáhan de jeē naní Alejandro nuū ñayuu cuehē ún, te ni cacastūhún de nuū tēe ún na siquí cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayútú ñayuu, chi cúní de cahān de jíin i jeē násūu cuéchi táca ñayuu hebreo cúu. 34 Te ni canacuni ñayuu un jéé tēe hebreo cúu de, te jee yúcuán ní cacana jee téyí gá i nájnūhun uū hora:

Cujéhnu téyí Diana, yaā cúu patrona ñuu yō Efeso, achí i.

35 Yūcuán na te ni cacunahín ñayuu ni sáha tēe cúu secretario ñuu ún, te ni cahān de:

Níhín ñayuu ñuu yō Efeso, ndihi ñayuu chi je cajini i jeē cándito vāha yó veñūhun yaā Diana jíin imagen Diana jeē ní ñinga nde andiví. 36 Te ni iin chi

ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachī ní ñn jeē tu ní nácani vāha ni ni síquī. <sup>37</sup> Chi tēe yáha ní caquindeca ní de yáhá vēsú tu ní cásáha de ni ñn cuēchi síquī Diana yō, ni tu ní cácahān ndevāha de ni ñn jnūhun síquī. <sup>38</sup> Te Demetrio jíin táca gá tēe jeē ñn-ni jniñu cásáha jíin de, núu cācuni de cahān de cuēchi síquī ñn tēe, te na quíngoo de nde vehe juzgado nuū cáyūcu juez, tēe cásándaā jniñu, te yūcuán cundaā síquī de jíjnáhan de. <sup>39</sup> Te núu íyó jnūhun jeē ma cúu cundaā yūcuán, te jíni ñhūn cundaā nuū ñn junta nájnūhun tájnúni ley. <sup>40</sup> Chi yúhú ná jeē sanaa te cahān táca tóhō Roma jeē síquī gobierno de ni candonda yó, chi ma nihín yō jnūhun castūhun yó na síquī cúu jeē ní cacutútú yó ni cacuvaā yō vijna, áchi de.

<sup>41</sup> Te nuū ní ndihi ni cahān secretario jnūhun yáha, te ni cajitē ñayuu un cuángoo.

### *Jeē ni jéhēn Pablo Macedonia jíin Grecia*

## 20

<sup>1</sup> Te ná ni yáha jēē ní cacuvaā ñayuu, te ni cana Pablo ñayuu cācandíje, te ni jeni íchi de i. Te ni cañunundee jnāhan de jíin Pablo jeē ní nacuatáhú de, te cuahān de Macedonia. <sup>2</sup> Te ni jica cuu de táca ñuu yúcuán. Te jíin cuéhē jnūhun ní stihví ní de táca hermano cācandíje. Te ni jinū de Grecia. <sup>3</sup> Te ni condee de yūcuán únī yoō. Te je yajni quihín de jíin barco nde Siria nuú, te máa quiví ún te ni nihín de jnūhun jeē jnāhan ñuu de hebreo ni casquijnāhan jnūhun jeē ndonda síquī de ichi nuū quihín de, te jeē yúcuán ní nacani ni de te cuahān tucu de ichi Macedonia. <sup>4</sup> Te ni cahíyo sava tēe cájica jíin Pablo, te cánani de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. <sup>5</sup> Te ni cacandu tēe yáha, te cándētu de Pablo jíin sáña, Lucas, nde ñuu Troas. <sup>6</sup> Te nuū ní yáha vico jeē cáyeji i pan jeē tu yáhi levadura, te jíin barco ni quendacoo ná ñuu Filipos, te nde nuū uhún quiví te ni canajnáhan ná jíin de nde ñuu Troas. Te ñuu yúcuán ní coyūcu ná uxá quiví.

### *Jeē ni íne Pablo ñuu Troas*

<sup>7</sup> Te máa quiví domingo ni candutútú ñayuu cācandíje jeē cáji i pan, nájnūhun ni steén máa Jítoho yō jeē núcūhun ni yō síquī yā. Te ni steén Pablo jnūhun nuū ñayuu ún. Te síquī jeē inga quiví un jíni ñhūn quenda de quihín de, te nahán ní nacani de jnūhun nde ni cuñu. <sup>8</sup> Te vehe yósó jnāhan cúu vehe ún. Te nde cuarto xiní nuū ní candutútú ná un ní íyo cuéhē lámpara ni cundijin. <sup>9</sup> Te ñn sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíi i máhna, te ni quixí-ni i. Te nde piso uní un ní ñinga i nde nuū ñhūn. Te je ni jihí i ni candonehen de i. <sup>10</sup> Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnáhan ní, chi ni natecu i, áchi de.

<sup>11</sup> Te ní ndaa Pablo, te ni yeji de pan jíin i jíjnáhan i jeē cānucūhun ni de síquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. <sup>12</sup> Te Eutico chí íyó váha i cuanuhun i jíin de jíjnáhan de, te ndivii ñayuu ún yōhyo cācusí ni i.

### *Jeē ní quenda Pablo ñuu Troas cuahān de ñuu Mileto*

<sup>13</sup> Te ni quívicoo ná ini barco cuángoo ná. Te Pablo chí cúní de caca jéhé de, te ni cundaā jeē najnáhan ná jíin de nde ñuu Asón. <sup>14</sup> Te nuū ní canajnáhan ná

jíin de ñuu Asón, te ni quiví de barco te cuangoo ná jíin de nde ñuu Mitilene. <sup>15</sup> Te yūcuan ní quendacoo tucu ná jíin barco te inga quiví ni jinūcoo ná xiin Quío, ñuhun jeē íne sñn nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná ñuu Mileto. <sup>16</sup> Te tu ní jéngoo ná ñuu Efeso, chí jéni ni Pablo jeē yáha-ni de ñuu un quihín de, návaha ma cucuéé de Asia te naa tiempo nuú, chí núu de jinū yachí de ñuu Jerusalén cone de máá quiví Pentecostés núu na cúu.

*Jeē ní jeni ichí Pablo tēe jéhnú cándiso jniñu nuū ñáyuu cácanđje ñuu Efeso*

<sup>17</sup> Te ná íne ga Pablo ñuu Mileto, te ni tají de jñuhun cuahān nde ñuu Efeso jeē na quijicoo tēe jéhnú cándiso jniñu nuū ñáyuu cácanđje yūcuán. <sup>18</sup> Te nuū ní quecco tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. <sup>19</sup> Chí nñ tiempo jeē ni íne ná jíin ní te nde vijna, jéjniñu vāha na síquī jñuhun máá Jítoho yō, te tu ní sándúxí ná máá ná. Te íyó jínu ni ndahyū na jéhē ñáyuu. Te ni ndoho ná jñúndóho ni casáha jnáhan ñuu ná hebreo, chí ni casquijnáhan jñuhun i síquī ná. <sup>20</sup> Te cájini ni jéé tu ní táñúhún ná ni ñn, vésú ndese ga cácahān ñayuu síquī ná, chí ni nacani ná ndihí jñuhun ya jeē quéndōo vāha ní sáha. Te ni steén na jñuhun ya nuū ni jíjnáhan ní, cúu nuū chítú cúu táca vehe ní. <sup>21</sup> Te inuú-ni jñuhun ni nacani ná núu ndihí ní, cúu jnáhan ñuu ná hebreo cúu ñayuu táca gá nación, chí ni cahān na jéé na nácani ni ni jéé stóo ni cuéchi ní te na cándje ní máá Jítoho yō Jesucristo. <sup>22</sup> Te vijna chí ñuhun ichí ná quihín ná ñuu Jerusalén, chí stáhví ni Espíritu Santo sãña quihín ná. Te tu jíni ná ndese ga coo jíin ná yūcuán. <sup>23</sup> Te íyó ñn jeē jíni na, cúu jeē chune i sãña vecéa te quiji jñúndóho síquī ná, chí Espíritu Santo súcuan cáhān jíin ná ndijnahan ñuu nuū jíca ná. <sup>24</sup> Te ni tu sáha ná cuenta vésú na cáhni i sãña, chí jeē cuní na cúu jeē na sínu vāha ná jniñu jeē ní tee máá Jítoho yō Jesús síquī ná, te súcuan cusñ ní ná. Te jniñu un cúu jeē nácani ná jñuhun vāha ya nuū táca ñáyuu ndese vāha ni Yaā Dios jíin yó.

<sup>25</sup> Te je ni jica cuu ná, ní nacani ná jñuhun ya nuū ní ndese ndácu Yaā Dios jniñu. Te vijna chí jíni na jéé ni ñn ní ma najnáhan ga yō nuū ñáyvivi yáha. <sup>26</sup> Jeē yūcuan cástúhun cájí ná nuū ni jíjnáhan ní vijna jeē násūu cuéchi ná cúu núu ndé ñn ní stívi. <sup>27</sup> Chí ni nacani ná núu ní ndihí jñuhun Yaā Dios jeē ni sándaā yā ndese coo, te tu ní quéndōo ni ñn jñuhun. <sup>28</sup> Núu súcuan te coto vāha ní máá ní jíin ndihí ñayuu cácanđje, chí Espíritu Santo ni jeni ya nihín jéé cóndito ní ñáyuu máá Jítoho yō, chí ni nacuaan ya i jíin nñí yā. <sup>29</sup> Chí jeē quihín na te jíni na jéé quijicoo tēe cástáhú quívicoo méhñu ní, te nducú de snāa de jñuhun ní cajetáhú ñayuu cácanđje, te xeén sáha jñuhun stáhú de nájñuhun xeén sáha yihí jeē cájehni tñ lanchi. <sup>30</sup> Te suni nuū grupo máá ní quejéé sava de cahān de jñuhun stáhú, te stáhú de sava ñayuu cácanđje jeē na cóndiquín i jñuhun stáhú stéén de. <sup>31</sup> Jeē yūcuan condito ní jéé ma cóo súcuan. Te ma náa ni ni jéé uní cuiyā ndiquiví ndiñuu ni condihví ndasí ní na ndé ndahyú na jéhē ní, ní jeni ichí ná ñn ñn ní jíjnáhan ní.

<sup>32</sup> Te vijna, hermano, jícan tahú na núu Yaā Dios jeē coto ya nihín. Chí jñuhun jeē vāha ni yā ndíso poder sáha jeē íje ga ní jíin, te suu sáha jeē ñn quiví te cuāha ya tahú jeē ndujéhnú luu ní ndé jíin ndihí ñayuu ní nacáji ya jeé cóo ndoo coo ñi i nuū yā. <sup>33</sup> Tu ní ndúcú ná jeē nihín na xuhun chí sahna nuū ní ñn i. <sup>34</sup> Chí je cájini vāha ni jéé sa suhva ni sájniñu nñhin ná návaha nihín na jéé cótecu na ndé jíin táca tēe cájica jíin ná. <sup>35</sup> Te níni ní steén na núu ni jéé súcuan

jíni ñũhún sájniñu yó návāha nihīn yō jeē cuāha yó núū ñayuu cúmanī nuū. Te ma náa ni ni jnúhun jeē ni cáhān maá Jítóho yō Jesús, chí suhva ni cahān yā: Ndetū gā quendōo yó jéē cuāha yó vēsú jeē nihīn yō, achí yá. Achí Pablo.

<sup>36</sup> Te ni ndihi ni cahān de tāca jnúhun yáha, te ni jecuiñi yití de, te ni jicān tahu de jíin ndihi tēe ún. <sup>37</sup> Yūcuán na te ndihi de ni cajecunundee jnáhan de jíin Pablo ni catechūhú de jeē cánacuatáhú de, te ni candahyū de. <sup>38</sup> Chí cácuuíhyá ndasí ni de jíin jnúhun ni cahān Pablo jeē ma ndácoto jnáhan ga de. Te cuango-ni de jíin Pablo nde núū íin barco.

### *Jeē cuánuhun Pablo ñuu Jerusalén*

## 21

<sup>1</sup> Yūcuán na te ni caquendōo táca hermano ñuu Efeso, te ni quivicoo ná barco, te cuango ndaā-ni ná ndé Cos. Te inga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. <sup>2</sup> Te ni cane ñin barco jeē quihín Fenicia, te ni quivicoo ná cuángoo ná. <sup>3</sup> Te nuū ní cajito ná núū Chipre jeē íne sñn nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndiso barco ún. <sup>4</sup> Te ni jenanducú ná ñayuu cácadíje, te ni caquendōo ná jíin i uxā quiví. Te maá Espíritu Santo ni steén nuū i jeē quíji jnúndóho síquí Pablo ñuu Jerusalén, te jeē yūcuan ní cacahān i jíin de jeē ma quihín de. <sup>5</sup> Te ni yāha uxā quiví ún, te ni quendacoo ná. Te tāca tēe cácadíje jíin ñasihí de jíin sēhe de ni cachuhun ichí de sãña ní jengoo de jíin ná nde yatā ñuū, te ni cajecuiñi yití ná jíin de yumar te ni cajicān tahu na. <sup>6</sup> Te ni cañunundee jnáhan ná ní canacuatáhú ná yūcuán, te ni quivicoo ná barco cuango ná. Te ni canandió cóo de cuanungoo de vehe de.

<sup>7</sup> Te ni quendacoo ná ñuu Tiro cuango ná jíin barco, te ni jinūcoo ná ñuu Tolemaida ní quendacoo ná ñin barco. Te yūcuan ní jengoo ná ní cacahān na jíin táca hermano, te ni caquendōo ná jíin de ñin quiví. <sup>8</sup> Te inga quiví un ní cajica jéhé ná jíin Pablo, te ni jinūcoo ná ñuu Cesarea, te ni quivicoo ná vehe Felipe, tēe nácani jnúhun vāha ya. Tēe un cúu jnáhan jeē ndihúxá tēe jeē ní casaja staā nuū ñāhan viuda. Te ni caquendōo ná jíin de. <sup>9</sup> Te tēe un íyó cúin sēhe síhí de jeē cáhīyo maá i, te cánacani i jnúhun Yaā Dios. <sup>10</sup> Te ni coyūcu ná yūcuán tijni quiví. Te ichi Judea ni quiji ñin tēe nácani jnúhun Yaā Dios, nání de Agabo. <sup>11</sup> Te ni quee de nuū ná. Te ní quihín de sanchí Pablo, te ni jihni de ndaha de jíin jéhē de, te ni cahān de:

Suhva cáhān Espíritu Santo. Jnáhan yó hebreo súcuan cuhni i tēe chí sanchí yáha ñin ñuu Jerusalén, te nastúu i de nuū ñayuu sñn nación, áchí de.

<sup>12</sup> Te jeē ní cajini sōho na jnúhun yáha te maá ná jíin táca tēe cácadíje cáyūcú ñuu Cesarea ní cacahān ndahú ná jíin Pablo jeē ma quihín de ñuu Jerusalén.

<sup>13</sup> Yūcuán na te ni cahān Pablo:

¿Najehē cándahyū ni jíinán ní, te cásáha ní jéē cucuíhyá ni ná? Chí sãñá je íyó túhva ná jéē násuu maá jéē cónuhni ná ñin ñuu Jerusalén, chí suni jeē vēsú na cúu na jéē síquí maá Jítóho yō Jesús, áchí de.

<sup>14</sup> Te jeē tu ní cúu cuiti casicoo ná, yūcuán na te sa suhva ni cacahān ná: Na cóo ndese cúni maá Jítóho yō nuu súcuan, áchí ná.

<sup>15</sup> Yūcuan na te sáa te ni casátuhva ná, te cuango ná ñuu Jerusalén. <sup>16</sup> Te suni jecu tēe ñuu Cesarea jeē cácadíje cuango de jíin ná. Suni cuahān ñin tēe



Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

### *Jeē ni jécondēhe Pablo Jacobo*

<sup>17</sup> Te nuū ni jinūcoo ná ñuu Jerusalén, te hermano cáyūcú ñuu ún yōhyo ni cacusñi de jeē ni jinūcoo ná. <sup>18</sup> Te inga quivī un ní cajengoo ná jijnáhan ná jijn Pablo vehe Jacobo, te yūcuan ní candutútú táca tēe jéhnū cándiso jniñu nuū ñayuu cácandíje. <sup>19</sup> Te Pablo ni sáha de saludar tēe ún jijnáhan de. Yūcuán na te ni castūhún de ndihi jniñu ní sáha Yaā Dios ná ni nacani de jnūhun ya nuū ñayuu táca nación jeē tu cājini i jnūhun ya. <sup>20</sup> Te ni cajini sōho de jnūhun yáha, te ni cacahān de jeē yōhyo cújéhnū Yaā Dios. Te ni cacahān de jijn Pablo:

Hermano, vijna te jini ní náa cuehē mil jnáhan ñuu yō hebreo ni cacandíje i Jesús, te cacahān nihin i jeē cánuú squícu yó ley jeē ni jéhe ya nuū Moisés. <sup>21</sup> Te ni canihin i jnūhun cacahān jeē stívi ní steén ni nuū táca jnáhan yó ñayuu hebreo cáyūcu jíca i táca gá nación, chi ni steén ni nuū i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i táca gá jeē tajnúni jengahán. <sup>22</sup> ¿Ndesa sáha ní núu súcuan? Chi cuni ñayuu un jéē ní ndee ní te cutútú cuehē i. <sup>23</sup> Suhva sáha ní núu súcuan. Yáha íyó cūin tēe jeē ní cajejnūhun de ñin jeē squícu de nuū Yaā Dios. <sup>24</sup> Cueca ní tēe yáha quihīn ni jijn de templo, te cuchi ní nasándoo ní máá ní jijn de nuū yā, te cuan ní jeē socó de nuū Yaā Dios jijnáhan de. Yūcuán na te cuu sāté de xinī de, te suu steén jeē ní casquícu de ndihi jeē ní cajejnūhun de nuū yā. Yūcuán na te cuni ndihi ñayuu jeē tu ndaā táca jnūhun ni cajini sōho i siquī ní, chi coto i jeē suni máá ní sa squícu ní ley yā. <sup>25</sup> Te ñayuu táca nación jeē násū ñayuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma caji i cūñu jeē ní sóco nuū ídolo ni niñi ni quiti jeē jihí jeē tu jéti niñi tī, te ni ma cáca jnéni i, áchí de.

### *Jeē ní cajni de Pablo ini templo*

<sup>26</sup> Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jinu jeē nasándoo tēe un máá de nuū yā, te quindeca de quiti jeē socó de nuū yā.

<sup>27</sup> Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihi ñayuu, te ni cajni i Pablo. <sup>28</sup> Te ni cacana jee i:

Tēe ñuu yō Israel, cuāha núú ní ndaha jijnáhan ní na jni yó tēe yáha. Chi máá de cúu tēe jíca cuu ní cáhnu steén de nuū táca ñayuu, te cáhán de siquī nación yō jijn síquī ley jeē ni jéhe ya nuū Moisés jijn síquī templo yáha. Te suni je ni quivicoo de jijn jecu tēe griego ini templo i yáhá, te súcuan stívi de jnūhun i jeē cahán jeē ma cúu quivī ñayuu ini templo te núu násū ñayuu hebreo cúu i, áchí.

<sup>29</sup> Chi nde na íne Pablo ini ñuu un ní cajini tēe hebreo jeē jíca de jijn Trófimo, tēe ñuu Efeso jeē násū hebreo cúu de, te cājeni ní de jeē ní quivī tēe un jijn Pablo ini templo.

<sup>30</sup> Te ndihi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí.

<sup>31</sup> Te ni cacuni i cahni i de núú. Te general, tēe cújéhnū nuū ndihi soldado, ni nihin de jnūhun jeē ndihi ñayuu ñuu Jerusalén ni candonda i cácuvaā i. <sup>32</sup> Te ni jeca general táca soldado jijn capitán, te cājini de cuango de nde nuū cáhīn



ñayuu cuehē ún. Te ná ni cajito ñayuu jeē ni jnūcoo general jíin soldado, te ni cajecuiñi i jeē cácani i Pablo. <sup>33</sup> Yūcuán na te ni quivi general mēhñu ñayuu, te ni jni de Pablo, te ni ndacu de jniñu jeē conuhnī de jíin úu cadena. Yūcuán na te ni cajnūhún general ndé tée cúu Pablo te na cuēchi ni sáha de. <sup>34</sup> Te ni cacana ñayuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel. <sup>35</sup> Te nuū ni jínū Pablo escalera cuartel ún, te soldado ni cajni de Pablo cándiso de siquī jeē cácani ñayuu ún jni i Pablo sáha xeēn i jíin de. <sup>36</sup> Chi ndihi i vējicoo i ichi yátá soldado, te cácana jee i:

Cahni ni tée jíinā, achí i.

### *Jeē ni cáhān Pablo jehē maá de nuū ñayuu*

<sup>37</sup> Te cásquivi de Pablo ini cuartel nuū, te jíin jnūhun griego ni cahān Pablo jíin general:

¿A cuáha ni jnūhun cahān ná ñin jnūhun jíin ní? achí de.

Te ni cahān general jíin de:

Te jíin rō cahān rō yuhu griego jeē súcuan. <sup>38</sup> Núu súcuan te nasūu rōhó cúu tēe Egipto jeē jé ni cuu quivi ni ndonda siquī gobierno te ni quenehen cuūn mil tée jéhni ndiyi cuangoo jíin de nde nuū ñūhun téhé, achí.

<sup>39</sup> Yūcuán na te ni cahān Pablo:

Tuú, chi tée hebreo cúu ná, te ni cacu ná ñuu Tarso, ñin ñuu jeē cujéhnu ndañūu Cilicia. Te quiñūhun ni ni cuáha ní jnūhun na cáhān na jíin ñayuu yáha jíināhan i, achí de.

<sup>40</sup> Te general ni jéhe de jnūhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñayuu ún. Te nuū ní cuu nayúú-ni i, te jíin jnūhun yuhu ñúu de hebreo ni cahān de:

## 22

<sup>1</sup> Ndihi níhín jeē cácuu ní jnāhan ñuu yō jíin ndihi níhín jeē cácujehnu ní núu ñūu yō, cuni sōho ní jnūhun cahān na jehē maá ná, achí de.

<sup>2</sup> Te ni cajini sōho i jeē cahān Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahān Pablo:

<sup>3</sup> Máá ná cúu jnāhan ñuu yō hebreo, te ni cacu ná ini ñuu Tarso ndañūu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndihi siquī ley jeē ni jéhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájñūhun cása ha máá ní vijna. <sup>4</sup> Te ni jito xeēn na ñayuu cácadnje i jnūhun Jesús te nde cuni na jéé na cúu ndihi i núu. Chi cúu tée cúu ñahan ni jni ná ni chuhun ná vecā. <sup>5</sup> Te sutū cujéhnu ga jíin táca tée jéhnu cándiso jniñu nuū ñúu yō, cácuu de testigo jeē súcuan ni sáha ná, te suni máá de ni cajéhe de tijni carta cuahān na jíin jéé cuáha na núu táca jnāhan yó cáyucú ñuu Damasco. Chi cuahān ná ñuu un jéé jni ná ñayuu cácadnje i Jesús te quindeca ná i ñuu Jerusalén yáha, návāha ndoho i núu.

### *Jeē ní cachi Pablo ndese ni sama ya de*

*(Hch. 9.1-19; 26.12-18)*

<sup>6</sup> Te ni quihin ná ichi cuahān ná, te cuacuyajni ná ñuu Damasco, te nájñūhun caxū cúu. Te ichi ándivi ní quiji ñin nduva ní ndindéé ndaxín núu ná. <sup>7</sup> Te ni cotúú-ni ná núu ñūhun, te ni jini sōho ná ñin jnūhun cáhān jíin ná: Saulo, Saulo, ¿najehe jíto xeēn rō ruhū? achí. <sup>8</sup> Yūcuán na te ni cahān ná: ¿Na

nihín cúu jeē cahán, Tátā? achí ná. Te ni cahān yā jín ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cá candije i ruhū cúu jeē jito xeēn rō ruhū, achí yá. <sup>9</sup> Te tēe cuangoo jín ná ni cajini ndije de jeē ndíndēé, te ni cayūhū de, te tu ní cájini sōho de ndese ni cahān yā jín ná. <sup>10</sup> Yūcuán na te ni cahān ná: Tátā, ¿na vé cuní ni jēé sáha ná? achí ná. Te ni cahān maá Jítoho yō jín ná: Ndocuñí te quihín rō ñuu Damasco, te yūcuan iyó ñin tēe jeē cachi nuū rō na vé cúu jeē cánuú sáha ró, achí yá jín ná. <sup>11</sup> Te jeē ní ndíndēé un ní sacuaá núu ná, te tēe cuangoo jín ná un ní cajni de ndaha ná cuángoo de jín ná ní jinūcoo ná ndé ñuu Damasco.

<sup>12</sup> Te yūcuan ní condee ñin tēe nání Ananías, te táca jnāhan yó hebreo yūcuan cácahān jeē tēe vāha cúu Ananías, chí vāha squícu de ley jeē ni jéhe ya nuū Moisés. <sup>13</sup> Te ni quee tēe un núu néne ná, te ni cahān de jín ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núu de. <sup>14</sup> Te ni cahān Ananías: Máá Yāa Dios táca jí yō, je ni nacāji ya nihín návāha cuní ní na vé cuní yā jeē sáha ní, te coto ní núu maá Cristo, Yāa ndāā, te cuní sōho ni jnūhun jeē cahán yā. <sup>15</sup> Te nacani ní jnūhun ya nuū ndivii ñayuu táca jēé ní jito ní jín jēé ní jini sōho ní. <sup>16</sup> Ma cúhuun ni ní núu súcuan. Ndocuñí ní, te cuandute ní te cahān ndahú ní jín máá Jítoho yō, návāha nacate ya anuá ní núu cuéchi, achí de jín ná.

### *Jeē ní cachi Pablo ndese ni tají Yāa Dios de nuū ñayuu táca gá nación*

<sup>17</sup> Te ni nandió cóo na ní ndee ná ñuu Jerusalén. Te jícán tahú na ini templo, te ni sáha máá Jítoho yō jeē ní jito ndijin ná. <sup>18</sup> Te ni jini na núu yā ni cahān yā jín ná: Yachí quenda ró ñuu Jerusalén yāhá, chí ma cuatáhú ñayuu yáha jēé nacani ró jnūhun rí nuū i, achí yá. <sup>19</sup> Te ni cahān na jín yá: Tuú, chí cuatáhú i, Tátā, chí je cájini i jeē ni quíví ná ndijnahan vehe ñi sinagoga ni jni ná táca ñayuu cá candije i nihín, te ni cani ná i, te ni chuhun ná i vecāa. <sup>20</sup> Te je cájini i jeē quíví ní cajehni i Esteban, tēe ni nacani cáj jnūhun ní, suni ni indichí na yūcuan, te ni jejnūhún ná jeē na cúu de, chí ni condito ná sahma tēe ni cajehni Esteban, achí ná jín yá. <sup>21</sup> Te ni cahān yā jín ná: Cuáhán, chí máá rí tají rí rohó quihín jicá ró nde nuū ñayuu táca nación jeē tu cájini i jnūhun rí, achí yá jín ná. Achí Pablo.

### *Jeē ní íne Pablo nuū general*

<sup>22</sup> Te táca ñayuu ún vāha-ni ni cajini sōho i te nde jnūhun sandíhi yáha jēé ní tají yá de nuū ñayuu táca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chí tú vāha jeē cótecu gā de, achí i.

<sup>23</sup> Te súcuan cácana jee i, te ni cascádoó i ticāchí i, te ni cascánda i ticachā. Te súcuan cástéén i jeē cáquiti xeēn ni i. <sup>24</sup> Te ni ndacu general jniñu jeē na quíví Pablo ini cuartel, te ni cahān de jeē na stíchí soldado Pablo nde jín cuarta ñi, návāha cujnúní ni general na siquí cúu jeē ní candonda ñayuu un síquí de. <sup>25</sup> Te ni cajihni de Pablo návāha súcuan te cani de. Te ni cahān Pablo jín capitán jeē indichí tūhva:

¿A jéhe ley jnūhun jeē cani ní cuarta tēe cúu sēhe nación Roma núu ná tu sándaā ní núu iyó cuéchi de? achí de.

<sup>26</sup> Te ni jini sōho capitán jnūhun yáha, te ni jecahán jín general:

Coto vāha ní jēé ma stívi ní sáha ní jín tēe yáha, chí cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajnūhún de:

Cachi núu jendaá cúu jeē séhe nación Roma cúu ró, áchí.

Te ni cahān Pablo:

Suu cúu ndije ná, áchí de.

<sup>28</sup> Te ni cahān general:

Ruhū chi nde jeē ni jéhe ri cuehē xūhún te ni nduu ri séhe nación Roma, áchí.

Te ni cahān Pablo:

Te sañá chi nde quiví ní cacu ná cúu ná séhe nación yō Roma, áchí de.

<sup>29</sup> Yūcuán na te tāca tée jeē cáculi cani Pablo nuú, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu íyó váha sáha súcuan jíin séhe nación Roma.

### *Jeē ni índichi Pablo nuú junta cujéhu ga jnáhan ñuu de hebreo*

<sup>30</sup> Te inga quiví un cúní general cundaā vāha ni de na siquí cúu jeē ní candonda tée hebreo siquí Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cáculjéhu jíin táca tée cásáha junta cujéhu ga, te ni quenehen de Pablo, te ni jeni de nuú tée ni candutútú un.

## 23

<sup>1</sup> Yūcuán na te ni ndacoto Pablo nuú tée ni candutútú junta un, te ni cahān de:

Tātā jijnáhan ní, ní ndé vijna vāha íyó ni anuá na jéé tú na cuēchi ná, jito jínū Yaā Dios, áchí de.

<sup>2</sup> Yūcuán na te Ananías, sutū cujéhu ga, ni cahān jíin tée cáhīn yajni nuú de jeē na cátu maá yuhu de. <sup>3</sup> Te ni cahān Pablo jíin sūtū cujéhu ga ún:

Yaā Dios stóho ya nihín chi tée stáhú-ni cúu ní, chi néne ní jéé sándaā ni núu ni stívi ná ley yā, ζte naun stívi máá ní ley jeē ndácu ní jniñu jeē cáni de sañá? áchí de.

<sup>4</sup> Te ni cacahān tée cáhīn nuú de ún:

¿Naun cáhān rō súcuan jíin sūtū cujéhu ga? Chi nuú Yaā Dios jejniñu de, áchí jíin de.

<sup>5</sup> Te ni cahān Pablo:

Tātā jijnáhan ní, tu ní jíin na jéé sutū cujéhu ga cúu de, chi núu ní jíin na te ma cahán na súcuan nuú, chi yósó núu tútu lí jeē ni cáhān yā jeē ma cahán neé yó coto yó táca tée cáculjéhu nuú yō, áchí Pablo.

<sup>6</sup> Te nuú ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tātā jijnáhan ní, máá ná cúu ñn jnáhan grupo fariseo, te suni súcuan ní íyo tátá na. Chi suni máá ná ñūhun ni na jéé nastécu yā ndīyi, te siquí yúcuan cúu jeē cácahān ni cuēchi siquí ná, áchí de.

<sup>7</sup> Te jeē súcuan ni cahān de te ni cacusīn ni tée junta jeē cácuu grupo fariseo jíin grupo saduceo, te ni cacahān nīhin. <sup>8</sup> Chi cácahān tée grupo saduceo jeē ma nátecu ndīyi, ní tu cáhīyo ndajéhé yā ni ánuá, te tée grupo fariseo cájejnūhún de ndinúní jnūhun yáha. <sup>9</sup> Te yōhō ni cuvaā. Te sava tée cástéén jnūhun cáhān tutu ley yā jeē cácuu jnáhan grupo fariseo, ni candocuiñi de, te ni cacahān de:

Tú ni ñn cuēchi cánihīn na síquí tée yáha. Sanaa te ni cahān ndije ñn ánuá jíin de chí ñn ndajéhé yā. Ma sánihni ní yō nuú Yaā Dios nuu súcuan, áchí.

<sup>10</sup> Te yōhō ni catejnáhan, te yúhú general jeē quende i chiyō Pablo, te ni ndacu de jniñu jeē na quiví soldado te quenehen de Pablo sava mēhñú i, te na ndívi de ini cuartel.

11 Te jecuáa un ní quee-ni máá Jítóho yō nuū de, te ni cahān yā jín de:  
Pablo, cuandeyí ní rō, chí nájñuhun ní nacani ró jñuhun ri ini ñuu Jerusalén yáha, suni súcuan nacani nahín ró jñuhun ri ini ñuu Roma, achí yá.

*Jeē ní casquijnáhan jñuhun cahni Pablo*

12 Te nuū ní cundijin te ni cacutútú sava ñayuu hebreo, te ni casquijnáhan jñuhun, te ni cacahān teyí i jeē ma cáji cuiti i ni ñin ni ma cóho cuiti i nde núu tu cahni i Pablo. 13 Te víhyá gā uū xico tēe hebreo ni cacahān teyí jñuhun yáha. 14 Te ni jengoo nuū sutú cácujeñnu jín núu tēe jéñnu cándiso jñíñu nuū ñayuu hebreo, te ni cacahān jín tēe ún:

Ni cacahān teyí ná jeē ma cáji cuiti ná ni ñin níni nde ná tu cahni na Pablo.

15 Núu súcuan te máá ní jijnáhan ní jín táca gá tēe cásaha junta cujéñnu ga, cuacáhān ní jín general jeē quenehen de Pablo na jé de nuū junta sajnē, chí cachi ní jeē cácuñi ní stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhiñ tútú ní, achí.

16 Te sēhe yí cuáha Pablo ni nihín i jñuhun jeē súcuan ni cacahān, te ni jehēn i cuartel, te ni castühún i nuū Pablo. 17 Te ni cana Pablo xiní ñin jnáhan capitán, te ni cahān de:

Condeca ní súchi yáha quihín ní jín i nuū general, chí iyó ñin jñuhun castühún i nuū de, achí de.

18 Te capitán un ní jeca de i cuahān i jín de nuū general, te ni cahān de:

Pablo, tēe íne vecāa, ni cana de sãñá, te ni cahān de jín ná jeē quindeca ná súchi yáha núu ní, chí iyó ñin jñuhun cahān i jín ní, achí de.

19 Te ni jñ general ndaha i cuahān de jín i ñin lado, te yuhu-ni ni cajñuhún de i:

Na jñuhun cúní rō cahān rō jín rí, achí de.

20 Te ni cahān i:

Tēe hebreo ni casquijnáhan jñuhun de jeē cahān ndahú de jín ní quenehen ní Pablo sajnē quihín de nuū táca tēe cásaha junta cujéñnu ga, chí cahān-ni de jín ní jeē cácuñi de jeē stíchí vāha ga de Pablo. 21 Te ma cuáha ni jñuhun, chí víhyá gā uū xico de cándētu sáhi de ichi, te ni cacahān teyí de jeē ma cáji cuiti de ni ñin ni ma cóho cuiti de nde núu tú cahni de Pablo, te vijna je cándētu tūhva de jeē cuáha ni jñuhun quihín Pablo nuū junta, achí i.

22 Te ni cahān general jín i jeē ma cáchi i nuū ní ñin ñayuu jeē ni cahān i jñuhun yáha jín de, te ni tají de i cuanuhun i.

*Jeē ní tají general Pablo cuahān de nuū Félix, tēe cúu gobernador*

23 Yucúan na te ni cana general uū capitán de, te ni ndacu de jñíñu jeē sátūhva de uū ciento soldado cájica jéhe jín úní xico uxí jeē cáyōso caballo jín úu ciento jeē cándaha lanza, chí cahān jecuáa ún quendacoo de jín Pablo quingoo de nde ñuu Cesarea. 24 Te suni ni ndacu de jñíñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. 25 Te ni tee de ñin carta jeē cahán jñuhun yáha:

26 Máá ná cúu Claudio Lisias, te tēe ná carta yáha cuájeē nuū ní, señor Félix, gobernador cujéñnu. Ndesé tahū cúu ní. 27 Ñayuu hebreo ni cajñi i tēe yáha, te je yajni cahni i de núu, te ni jnama ná de jín soldado, chí ni jini na jé sēhe nación Roma cúu de. 28 Te ni jendeca ná de nuū junta máá i jijnáhan i jeē sándaā i núu na cuēchi ní sáha de. 29 Te ni jini na jé siquí ley máá i cúu cuēchi cácahān i siquí de, te tu nihín na ni ñin cuēchi siquí de jeē cúu de ni jeē cóne de vecāa. 30 Te ni nihín na jñuhun jeē sava tēe hebreo ni casquijnáhan jñuhun de

jeē cahni de tēe yáha, te jeē yúcuau cúu jeē yachī ni tají ná de cuajeē de nuū ní. Te suni je ni cahān na jín nāyuu cájicān cuēchi siquī de jecoo i nuū ní, te jiñā cahān i jín ní na cuēchi ni sáha de. Je ni cahān yō, achí carta.

<sup>31</sup> Te ni cajeca ñuū-ni soldado Pablo cuango jín de nde ñuu Antípatris, nájñuhun ni tahū jniñu nuū de. <sup>32</sup> Te inga quivī ni canandió cóo-ni soldado cájica jéhé cuanungoo nde cuartel, te soldado cáyósó caballo cuango de jín Pablo. <sup>33</sup> Te ni jinūcoo ñuu Cesarea, te ni cachihi carta ndaha gobernador, te suni ni cajeni Pablo nuū de. <sup>34</sup> Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē tēe ndañū Cilicia cúu Pablo. <sup>35</sup> Te ni cahān de:

Nde na quécóo tēe cájequin cuēchi siquī rō te cuni nahín rí jñuhun cahān rō, achí de.

Te ni cahān de jeē na quíndihyū Pablo ini palacio ndiyi Herodes.

### *Jeē ni cahān Pablo jehē maá de nuū Félix*

## 24

<sup>1</sup> Te nuū uhún quivī te Ananías, sutū cujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jín ñn tēe cúu abogado, nání de Tértulo. Te ni quivicoo de nuū gobernador jeē cahān de cuēchi siquī Pablo. <sup>2</sup> Te ni cana gobernador Pablo ni quee de. Te ni quejé Tértulo cahān de cuēchi siquī Pablo, chí suhva ni cahān de jín Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuau tú na jñuhun cájéjnáhan iyó, chí cáyūcu váha yó. <sup>3</sup> Te na cútahū ná, chí táca quivī váha cúu táca núu ndácu ní jniñu jeē váha sáha ní, tátā Félix. <sup>4</sup> Te tu cúní na snáa na cuéhé tiempo ni, te cahān ndahú ná jín ní cuni nahín ni jecu-ni jñuhun cahān na jín ní. <sup>5</sup> Chí ni cajini na tēe yáha jéē cúu de ñn tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni táca lado, te cúu de tēe cújéhu nuū ñáyuu cascuáha jñuhun tēe nání Jesús jeē ní jehnu ñuu Nazaret. <sup>6</sup> Te suni je ndúcú de jeē stíví de táca jniñu ini templo ñ, te ni cajni ná de. Te cácuni na sándaā na siquī de núu, nájñuhun cahān ley ñuu ná. <sup>7</sup> Te ni jinū-ni general Lisias, te ni quende fuerza de tēe yáha núu na jijnáhan ná. <sup>8</sup> Te ni ndacu de jniñu jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jín jñuhun cahān maá de te cuni ni jéē ni sáha de cuēchi jeē cácahān na jín ní, achí Tértulo.

<sup>9</sup> Te suni ni cacahān tēe hebreo jeē ni jinūcoo jín de jeē iyó ndáā jeē súcuau cúu cuēchi Pablo. <sup>10</sup> Yúcuán na te ni sáha gobernador seña nuū Pablo jeē na cáhan de, te ni cahān Pablo:

Je jini na jéē cuéhé cuiyā cúu ní gobernador ñuu yáha, te jeē yúcuau nújnahan ni na jéē sándaā ni siquī ná. <sup>11</sup> Chí máá ní cuu nanducú ní te cuni ni jéē sáá máá úxí uū quivī ni cuu jeē ni jéhēn ná ñuu Jerusalén jeē chiñuhún ná Yaā Dios. <sup>12</sup> Te tu ní stáhān jnáhan ná jín ni ñn ñáyuu, ni tu ní stónda ná ñáyuu ini templo ni ini vehe ñ sinagoga ni ini maá ñuu. <sup>13</sup> Ni tú na jín stéen de jeē iyó ndáā jñuhun cácahān de siquī ná. <sup>14</sup> Te jñuhun cáhān cají ná jín ní cúu jeē chiñuhún ná Yaā Dios táca jí na, te suu cúu jeē chiñuhún ná maá Jesucristo, te máá jñuhun yáha-ni cúu jeē cácahān de jeē stíví ná. Te cándje ná táca jñuhun yósó núu tútu ley yā jín núu tútu jeē ní catee tēe ni canacani jñuhun ya nde jenahán. <sup>15</sup> Te inuū ñuhun ni na jín de jeē sáha Yaā Dios jeē nátecu táca ndíyi, cúu ñáyuu ní casáha váha jín ñáyuu ní casáha néé. <sup>16</sup> Te jeē yúcuau máni jeē

váha ndíhví ni na sáha ná. Súcuán te vāha íyó ni anuá na jéē tú na cuēchi ndéé siquī na nuū Yaā Dios ni nuū ñayuu.

<sup>17</sup> Te ni jica cuu ná táca ñuu jicá jecu cuiyā, te sáá te ni ndee na jíin xúhun jéē ní cajhe táca ñayuu jeē chindéé ñáhán i jnāhan ñuu na cáyucú Jerusalén. Te suni ni ndee na jéē socó na quití nuū Yaā Dios. <sup>18</sup> Te íne ná ini templo siquī jeē cuchí ná ndundoo ná nuū Yaā Dios te socó ná. Te jecu jnāhan ñuu ná hebreo jeē véjicoo Asia ni cajito de sãñá ini templo, te tú na ñayuu cuehē ni cóyūcu jíin ná jeē sávaā i. <sup>19</sup> Te núu ni stíví ná ¿te naun tu ní quíjicoo tēe Asia un návāha suni cahān de ndese ni stíví ná? <sup>20</sup> Chí tēe ni quecoo yāhá na cahān maá de núu na cuēchi ni canihīn de siquī na ná ni indíchi na núu junta tēe cácujuhnu ini ñuu ná. <sup>21</sup> ¿Te chí cájequin de cuēchi siquī na jéē ni cahān jee ná suhva ná ni íyo ná nuū junta naún? Chí ni achí na jéē cándíje ná jéē nátecu táca ndíyí, te jeē yúcuán cájequin ni cuēchi siquī ná, ni achí na jíin de. Achí Pablo.

<sup>22</sup> Te Félix chí je jíiní vāha de ndese cácañdíje ñayuu Cristo. Te jeē ní jini sōho de jnūhun yáha te ni stétu de un jíjnāhan, te ni cahān de:

Nde na quée general Lisias te cajnūhun gá rī siquī jniñu yáha, áchí de.

<sup>23</sup> Te ni ndacu de jniñu nuū capitán jeē na cóne ga Pablo vecāa, te ma cásí jeē sáha de jeē cuní de, te ni ma cásí jeē quíjicoo jnāhan de jeē chindéé ñáhán i de.

<sup>24</sup> Te ni cuu jecu quiiví, te ni quiji tucu Félix jíin ñasihí de Drusila, te ñahan hebreá cúu ña. Te ni ndacu de jniñu jeē na quiji Pablo návāha nacani de jnūhun ndese cándíje yó Jesucristo. <sup>25</sup> Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stíví, chí quiiví sándihí te sándaā Yaā Dios jniñu ndívii ñayuu ndese ni casáha i. Te ni yūhu Félix te ni cahān de:

Vijna te cuahán, te inga quiiví jeē núne rí te cana rí rohó quiji ró, áchí de.

<sup>26</sup> Te ñūhun ni de jeē cuāha Pablo xūhun núu de te siáá de quenda de vecāa. Jeē yúcuán tijní jíinu ni cana de Pablo ni candajñuhún de. <sup>27</sup> Te súcuán ni cuu uū cuiyā, te sáá te ni nucuiñí Porcio Festo nuū Félix. Te cuní Félix jeē na cúsiñí ni ñayuu hebreo jíin de, te jeē yúcuán ní squéndō de Pablo vecāa.

### *Jeē ni índichi Pablo nuū Festo*

## 25

<sup>1</sup> Te sáá úní quiiví jeē ní quiiví Festo cuu de gobernador Judea, te ni quenda de ñuu Cesarea cuahān de ñuu Jerusalén. <sup>2</sup> Te táca sūtū cácujuhnu jíin tēe cácujuhnu nuū ñayuu hebreo ni jinūcoo nuū Festo, te ni cajicān cuēchi siquī Pablo. <sup>3</sup> Te ni cacahān ndahú jíin Festo jeē núu vāha ni de te na nátají de Pablo ndíji ñuu Jerusalén. Súcuán ni cacahān, chí je ni casquíjnāhan jnūhun jeē cahni Pablo ichí. <sup>4</sup> Te ni cahān Festo jeē yíndesi vāha Pablo nde ñuu Cesarea, te je jení ni de jeē jecu na quiiví te nuhūn maá de ñuu Cesarea. <sup>5</sup> Te jeē yúcuán ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yúcuán cácañ ni cuēchi siquī de te núu íyó cuéchi de, áchí de.

<sup>6</sup> Te ni ine de yúcuán unā chí úxí-ni quiiví, te ni ndee de ñuu Cesarea, te inga quiiví ni cucōo de mesa nuū sándaā de jniñu, te ni cahān de jeē na quiji Pablo. <sup>7</sup> Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūu nuū de, te ni caquejéé-ni casájnūhún téyí siquī de, te tú na jíin ní cástéén jeē iyó ndáá jnūhun cácahān. <sup>8</sup> Te ni cahān Pablo jehē maá de:

Tu ní sáha ná ni ñin cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

<sup>9</sup> Te Festo chí cúní de jeē cusī ni ñayuu hebreo jíin de, te ni cajnúhún de Pablo:

¿A tu cúní rō quínuhun rō Jerusalén te yūcuan sándaā rī siquī rō? achí de.

<sup>10</sup> Te ní cahān Pablo:

Je índichi na núū cūndaā jniñu jeē ndácu máá téē cúu rey nación Roma, te yāha cúu nuū cánuú cūndaā jniñu ná. Máá ní je jíni vāha ní jéē tú na cuēchi ní sáha ná siquī tāca jnāhan ñuu ná hebreo. <sup>11</sup> Chí núu ní sáha ná ñin cuēchi xeēn jeē jíni ññhún cuu ná, te íyó vāha jeē cúu na núu súcuan. Te núu tu íyó ndāā jnūhun jeē casájnūhún téē yāha siquī ná, te ni ñin téē ma cúu chíhi de sáñā ndaha téē yāha jíjnāhan de. Núu súcuan te cúní na quihīn na núū máá rey nación Roma sándaā de siquī na, achí de.

<sup>12</sup> Te ni cajnúhun Festo ndese cájeni ni téē cándiso jniñu jíin de. Yūcuán na te ni cahān de jíin Pablo:

Je ní cahān rō jeē cuní rō quihīn rō nuū máá rey nación Roma sándaā de siquī rō. Núu súcuan te quihīn nahín ró nuū de, achí de.

### *Jeē ní índichi Pablo nuū rey Agripa*

<sup>13</sup> Te ni cuu jecu quivī, te rey Agripa jíin Berenice ní jecondéhé de Festo nde ñuu Cesarea. <sup>14</sup> Te tíjni quivī ní coyūcú de yūcuán. Te ní nacani Festo jnūhun siquī Pablo nuū rey un. Te suhva ní cahān de:

Félix jeē ní cuu de gobernador, ni stóo de ñin téē íne vecāa yāhá. <sup>15</sup> Te ná ní jehēn ná ñuu Jerusalén, te sutū cácujeñhu jíin ñáyuu jéñhu cándiso jniñu nuū ñáyuu hebreo ní jinūcoo i nuū na cájequin i cuēchi siquī téē ún, te cácuni i jeē na cúu de. <sup>16</sup> Te ní cahān na jíin i jeē tu íyó costumbre tāca tóhō Roma jeē cahni de ñin téē súcuan-ni, chí jíni ññhún condichi de jíin ñáyuu cájequin cuēchi siquī de, návāha cahān de jeē máá de te cūndaā núu íyó cuēchi de. <sup>17</sup> Yūcuán na te ní quecoo tútú i yāhá. Te inga quivī ún tu ní cúcuéé ná, chí ní cucōo na mesa nuū sándaā na siquī cuēchi, te ní ndacu ná jniñu jeē na quíji téē ún. <sup>18</sup> Te cáhīn ñayuu cájequin cuēchi siquī de. Te ní jeni ní na jéē íyó cuēchi xeēn cahān de siquī téē un núú, te tú cuiti. <sup>19</sup> Chí jeē cácahān de cúu máni siquī jnūhun cácañje-ni máá de, jíin siquī ñin téē nání Jesús jeē jé ní jihī de, te Pablo cahán ñihin de jeē ní natecu ndije téē ún. <sup>20</sup> Te tu ní cújnúní cuiti ní ná ndese sándaā ná, te ní cajnúhun ná de núu cúní de quihīn de ñuu Jerusalén te yūcuán cūndaā siquī de. <sup>21</sup> Te máá Pablo ní cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ní achí de. Te ní cahān na jéē na cóne de vecāa nde tají ná de quihīn de nuū rey un, achí Festo.

<sup>22</sup> Yūcuán na te ní cahān Agripa jíin Festo:

Suní cúní máá ná cuni sōho ná jéē cahán téē un, achí de.

Te ní cahān Festo:

Sajnē te cuni sōho ní jéē cahán de núu súcuan, achí de.

<sup>23</sup> Te inga quivī un ní quecoo Agripa jíin Berenice. Te cañūhun de sahma cújeñhu de, ní quivīcoo de ñi vehe juzgado jíin tāca general jíin téē cácujeñhu ñi ñuu ún. Te ní ndacu Festo jniñu jeē na quíji Pablo. <sup>24</sup> Te ní cahān Festo:

Cahán na jíin ní, tátā rey Agripa, jíin ndihí ñhín jéē cáyucu jíin yó yāhá vijna. Yāha cúu téē jeē siquī de ní candonda ndivii jnāhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. <sup>25</sup> Te jéni ní máá ná jéē tú na cuēchi xeēn ní sáha de jeē cúu de. Te je ní cahān de jeē cuní de quihīn de nuū rey Augusto jeē sándaā rey un siquī de, te jeē yūcuan ní



cahān na jēē tají ná de quihīn de nuū rey un. <sup>26</sup> Te tu cúcāhnu ni ná na jnūhun tee ná núū tútu quihīn jín de nuū rey yō. Jeē yúcuan ní ndacu ná jniñu ni quee de nuū yō jijnáhan yō, te cánuú gá nuū maá ní, tátā rey Agripa. Te stíchí ní de návāha nihīn na jnūhun tee ná síquī de, te quihīn jnūhun un jín de nuū rey. <sup>27</sup> Chi tu jéjníñu cuiñi jeē tají ná ñin preso quihīn te núu tú castūhun ná nuū tútu na cuēchi ní sáha de, achí Festo.

*Jeē ní cáhān Pablo jehē maá de nuū rey Agripa*

## 26

1 Yūcuán na te ni cahān rey Agripa jín Pablo:

Vijna te jēhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhān de, te suhva ni cahān de:

<sup>2</sup> Tátā rey Agripa, cúsiñi ni ná vijna jeē cúu cahān na jín ní síquī ndihí jeē casájnuhún ñayuu ñuu yō hebreo síquī ná. <sup>3</sup> Chi je jíní vāha máá ní táca jēē ní tajnúni ñayuu ñuu yō hebreo jín táca jnūhun jeē tu cáhīn ñnuú i jín. Jeē yúcuan cáhān ndahú ná jín ní jeē coo paciencia ni cuni sōho ní jnūhun cahān na jín ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> Je cájini táca jnáhan ñuu yō hebreo ndese ni sáha ná ini ñuu nuū ní cacu ná jín ini ñuu Jerusalén nde ná lulí ná. <sup>5</sup> Te núu cácuni maá de cahān ndaā de, te je cájini de sáña jēē ndé lulí ná ni quivi ná nuū grupo fariseo, te grupo un nihin ga cánducú ndéyí de síquī de ley yā vēsú táca gá grupo tēe nación yō. <sup>6</sup> Te ñūhun ni na jnūhun ni jejnūhun Yaā Dios nuū táca jí yō jeē nastécu yā ndíyí, te máá síquī táca jnūhun yáha-ni cúu jeē cájequin de cuēchi síquī ná. <sup>7</sup> Chi máá yō jeē cácuu yō jnáhan ndihúxí uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndíyí, te jeē yúcuan nduú ñuu cáchiñūhún yō Yaā Dios te cájejníñu yō núu yā. Te suni súcuan ñūhun ni maá ná, tátā rey Agripa, te síquī jeē nácani ná jnūhun jeē natecu ndíyí cúu jeē cájican jnáhan ñuu yō hebreo cuēchi síquī ná. <sup>8</sup> ¿Te chí má nastécu Yaā Dios táca ndíyí cájeni ni ní naún?

*Jeē ní cachi Pablo ndese ni jito xeēn de ñayuu cácandíje*

<sup>9</sup> Te máá ná chí ni jeni ni na jēē jíní ñūhún ndonda ná síquī ñayuu cácandíje i Jesús. Yaā ní jehnu ñuu Nazaret. <sup>10</sup> Te súcuan ni sáha ná ini ñuu Jerusalén, chí táca sūtū cácujeñu ni cajēhe de jnūhun jeē cóndiso jniñu ná chuhun ná cuéhē ñayuu vecāa síquī jeē cácandíje i Jesús, te iyó váha ni na núu cájehni de i. <sup>11</sup> Te tijni jínu ni sáha ndevāha na jín i ini táca vehe ñi sinagoga jeē ni sáha fuerza na i jeē na stóo i jnūhun cácandíje i. Te xeēn ni quitiñi ni na núu i, chí nde ñuu jicá ní jehēn ná ni sáha xeēn na jín i.

*Jeē ní cachi tucu Pablo ndese ni sama ya ini de*  
(Hch. 9.1-19; 22.6-16)

<sup>12</sup> Te sutū cácujeñu ni cajēhe de jnūhun jeē cóndiso jniñu ná quihīn na sáha xeēn na jín ñayuu cácandíje cáyūcú ñuu Damasco nuú. <sup>13</sup> Te cuahān ná ichi ún, tátā rey, te cacxú cúu, te ichi ándiví ní quiji ñin nduva ni ndindéé ndaxín núu na jín núu tēe cuangoo jín ná, te víhyá gā ndí vēsú niándii. <sup>14</sup> Te ndihí ná ní cacotúú ná núu ñūhun. Te ni jini sōho ná ñin jnūhun ni cahān jín ná jín jnūhun yuhu yō hebreo: Saulo, Saulo, ¿najeñé jito xeēn rō ruhū? Chi jeē sáha ró súcuan cúu nájnūhun stiquí jeē tu jéndije ti, te jeñú yatá tí xiní pulla, te súcuan stóho ti



maá tí, áchí. <sup>15</sup> Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítóho na ní cahān yā jiín ná: Máá rí cúu Jesús, te jeē jító xeēn rō ñayuu cácanđije i ruhū cúu jeē jító xeēn rō ruhū. <sup>16</sup> Ndongda condichi rō, chí vĕji ri nuū rō jeē tejníñu ri rohó sáha ró jniñu cúní rī, te nacani cájí ró jñuhun táca jéē ní jito ró vijna, jiín jéē steén gā rī nuū rō táca quívi quíji. <sup>17</sup> Te jnama ri rohó núu táca jñahan ñuu rō jiín núu ñayuu táca gá nación, chí nuū ñayuu un tájí rí rohó quíhīn rō. <sup>18</sup> Te tájí rí rohó quíhīn rō nuū i, chí nájñuhun nanune ró tñūú i cúu jeē steén rō jñuhun ri nuū i te jecūhun ni i. Chí ñayuu ná tu candije i ruhū, nájñuhun cájica i nuū néē. Te jeē candije i ruhū, quívi i nuū luz rī, te tuá quíhi i chíji jniñu jeē cuní jexeén jeē cúu Satanás, chí sa suhva quíhi i chíji jniñu cúní maá rí. Te tájí rí rohó quíhīn rō nuū i, návāha candije i ruhū te cone cáhnu ni rī nuū cuéchi i. Yūcuán na te inuú níhīn tahú i jiín táca gá ñayuu jeē ní sándoo rí anuá i, áchí yá jiín ná.

### *Jeē ní cachi Pablo ndese ni jetáhú de jñuhun ni cahān yā*

<sup>19</sup> Jeē yúcuán tu ní sáníhni ni na núu jñuhun ni cahān yā ichi ándivi jiín ná, tátā rey Agripa. <sup>20</sup> Chí ni jetáhú ná, te ni nacani ná jñuhun ya xīhna gā nuū ñayuu ñuu Damasco, te sáa te ni nacani ná jñuhun ya nuū ñayuu ñuu Jerusalén jiín n# región Judea jiín núu ñayuu táca gá nación. Te jñuhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. <sup>21</sup> Te siquī jeē súcuán ni nacani ná jñuhun te ni cajni# jñahan ñuu yō hebreo sañā ini templo, te ni cacuni i cahni i sañā núu. <sup>22</sup> Te ni chindéé ñáhán Yáā Dios sañā, te jeē yúcuán índichi níhin na ndé vijna nácani cájí ná jñuhun ya nuū ñayuu cácujeñhu jiín núu táca-ni ñayuu. Chí tu chíso gá na jñuhun siquī jñuhun jeē ní nacani Moisés jiín táca gá tēe ni canacani jñuhun Yaā Dios nde jenahán. <sup>23</sup> Te ni cundaā jñuhun ni canacani de un jéē cánuú ndoho Cristo nde cuu yā, te xīhna gā maá yá natecu vēsú táca gá ndīyi, te súcuán steén cají yá nuū ñayuu jeē jnáma ya i, cúu ñayuu nación yō Israel jiín ñayuu táca gá nación, áchí Pablo.

### *Jeē ní nducú ndéyi Pablo scandije de Agripa jñuhun Jesús*

<sup>24</sup> Te súcuán ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tīvi xínī rō, áchí de.

<sup>25</sup> Te ni cahān Pablo:

Tu ní tīvi xínī na, tátā Festo, chí sa suhva íyo cájí ndáā jñuhun cáhán na. <sup>26</sup> Te máá rey Agripa je jíní vāha de táca jniñu ní íyo jeē ní nacani ná, te tu yúhú ná cahān na táca jñuhun yáha, chí je jíní vāha na jéē jíní de táca jñuhun yáha, chí tú sáhi ní cúu táca jniñu yáha. <sup>27</sup> Tátā rey Agripa, ¿á cándije ní jñuhun jeē ní cacahān tēe ni canacani jñuhun ya nde jenahán? Jéni ni na jéē candije ní, áchí Pablo.

<sup>28</sup> Yūcuán na te ni cahān Agripa jiín Pablo:

Va jéni ni rō jeē jiín jecu jñuhun ni cahān rō te sáha ró jeē candije ri Cristo, achí de.

<sup>29</sup> Te ni cahān Pablo:

Vēsú jiín jecu-ni jñuhun chí jiín cuéhē, te jícán tahú na jéē maá ní jiín táca gá tēe cájini sōho jñuhun cáhán na vijna, na cándije ní nájñuhun cándije máá ná, te tu cúní na jéē cónuhni ní nájñuhun núhni na.

<sup>30</sup> Te ni ndihí ni cahān Pablo tāca jnūhun yáha. Te ni ndocuiñí rey jín gobernador jín Berenice jín tāca gá tēe cácujeñhu cáyūcu jín de. <sup>31</sup> Te ni cacujiyo de, te ni candajñuhun sñn máá de:

Tú ni ñn cuēchi ní sáha tēe yáha jēe cúu de ni jeē cóne ga de vecāa.

<sup>32</sup> Te ni cahān Agripa jín Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

*Jeē ní catajé de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jín barco nde Italia, te suni quingoo ná jín de. Te Pablo jín sava ga tēe cáhñn vecāa ni quivícoo de ndaha ñn capitán naní Julio jeē quindēca de tēe un ndé Italia. Te Julio cúu ñn jñahan grupo soldado naní Augusto. <sup>2</sup> Te nde ñuu Adramitio nuū cájecuiñí barco ni quenda ñn barco ni quee, te ni quivícoo ná, te quihñn barco un tāca ñuu jeē yíhi chíji Asia jeē yúcu yumar. Te suni cuahān Aristarco jín ná, te máá de cúu tēe ñuu Tesalónica región Macedonia. <sup>3</sup> Te inga quiví ni jinūcoo ná ñuu Sidón nuū cájecuiñí barco. Te Julio ni cundáhú ni de Pablo, te ni jēhe de jnūhun ni jecondēhe Pablo tāca amigo de, te ni cachindēe ñáhán i de. <sup>4</sup> Te ñuu yúcuán ní quenda barco cuahān jín ná. Te siquí jeē ñihin yíhi tachí te tu ní cúu quihñn yohó barco, te ni tee xín barco cuahān jín ná xiin isla Chipre, ñuhun jeē íne sñn nuū ndúte, te lado jecó barco ni quendōo Chipre. <sup>5</sup> Te ni cayāha ná yumar Cilicia jín Panfilia cuahān ná, te ni jinūcoo ná ñuu Mira ndañúú Licia.

<sup>6</sup> Te ñuu yúcuán ní ñihñn capitán ñn barco jeē véji ñuu Alejandría te quihñn ichi Italia, te ni cahān de jín ná ni quivícoo ná barco un. <sup>7</sup> Te cuehē quiví ni cahñn na núu ndúte jín barco, chí cuéé ní jica, te fuerza-ni ni jinūcoo ná yuñúú Gnido. Te tuá ni jēhe tachí un jnūhun quihñn yohó barco, te ni cayāha ná núu jñuhma tachí xiin ñúú Salmón jeē íne nuū isla Creta. <sup>8</sup> Te yōhoyo ni canducú ndéyí tēe cáscaca barco un, ní yáha jín ná ní yumar xiin Creta. Te ni jinūcoo ná ñn lugar naní Buenos Puertos nuū cájecuiñí barco, te yajni un íne ñuu Lasea.

<sup>9</sup> Te je ni cuu cuehē quiví ni cajica ná jín barco. Te je yajni quejéé vico mójn, te yúcuán cúu tiempo jeē yí jica barco te sanaa te coo jñundóho nuū mar. Te ni cahān ñihin Pablo jín de:

<sup>10</sup> Tātá jijnáhan ní, jín na jēe yóhoyo yí coo viaje yáha, te quiji jñundóho siquí barco, te naa barco jín ndajññu, te nde maá yó sanaa te cuu yō, achí de.

<sup>11</sup> Te tu ní chúsóho capitán jeē cahān Pablo, chí sa suhva jeē cahān tēe scáca barco un jín tēe chíí barco. <sup>12</sup> Te siquí jeē tu íyó váha lugar nuū ni jécuiñí barco un jēe cóyucú de ní vico mójn, te ni cajeni ní cuehē gā de jeē váha ga núu quendacoo de yúcuán. Chí cájeni ni de jeē núu cuu te jinūcoo de ñuu Fenice te yúcuán coyucú de vico mójn. Chí Fenice suni íne yundúte isla Creta nuū cájecuiñí barco, te ndijñn ichi noroeste jín suroeste.

*Jeē ní jéquihi ñn tachí ñihin jeē stóna ndute mar*

<sup>13</sup> Te ni jéquihi víta tachí ichi sur, te ni cajeni ní de jeē jinú de Fenice nuú, te ni cáscaca ga de barco jica jín de xiin Creta. <sup>14</sup> Te ni cunúu jecu gā, te ni quejéé-ni ñn tachí ñihin ndasí jeē naní táchñn nordeste. <sup>15</sup> Te tuá ní cúu ga quihñn yohó barco, chí ni chundahá-ni tachí cuahān jín, te ni casiáá-ni de jeē cáscaca de, te cháha chúcuán cuahān barco jín ndihí ná sáha tachí. <sup>16</sup> Te

ni yāha jín ná xiin isla lulí jēē naní Clauda, nuū jnúhma tachī. Te vēsú súcuan te yōhyo uhū ni cascāa ná barco lulí jeē ndiquín yatā barco cáhnu. <sup>17</sup> Te ni casquívī ná ini barco cáhnu. Te ni casucun núu de barco cáhnu jín yoho. Te cáyuhú de jeē quihín barco nuū yaxín ndute nuū naní Sirte te jñī nuū ñíti, te jeē yúcuan ní casnúu de sahna cóquin jeē stehí te jica barco. Te ni casiáá de jeē na quhín ndé chi chúndahá táchī. <sup>18</sup> Te tu jécuiñī cuiti jeē yñi tachī níhin. Te inga quívī un ní caquejéé de cájete de ndajníñu ndíso barco, návāha nduñama gā barco te ma quée chíji ndute. <sup>19</sup> Te quívī uní ni cajēhe núu ná ndaha ni cajete ná máá ndajníñu jéjníñu barco. <sup>20</sup> Te cuehē quívī tu ní cájito ná níandii ní quñi siquī jeē ín vicó, ni tu jécuiñī cuiti tachī níhin ún, te tuá cáñuhun ni na cácu ná.

<sup>21</sup> Te ni cuu quívī jeē tuá cáyeji cuiti na stāā. Te ni jecondichi Pablo sava mēññu tée ún, te ni cahān de:

Tātā jijnáhan ní, núu ní cájetáhú ní jñuhun jeē ni cáhān ná te ma quéndacoo yó Creta nuú, te ni ma cóto yó jnúndóho yāha ni ma nāā ndajníñu núu. <sup>22</sup> Te vijna cáhān níhin na jín ní jeē cuandeyí ni ní jijnáhan ní, chi ní ñin ní má cū ní, vēsú naa barco. <sup>23</sup> Chi jeē cūni ni quiji ñin ndajéhé jeē ní tají máá Yāā Dios nuū ná. Chi máá yá cúu Jitoho ná, te jéjníñu ná núu yā. <sup>24</sup> Te ndajéhé yā ún suhva ni cahān yā jín ná: Pablo, ma yūhu ró, chí vāha-ni jín ró nuū rey naciún Roma, te jeē siquī rohó te sáha Yāā Dios jeē cácu ndihí tēe cáhīn jín ró ini barco yāhá, áchí yá jín ná. <sup>25</sup> Tātā jijnáhan ní, ma yūhu ní núu súcuan, chí máá ná cúcáhnu ni na Yāā Dios jeē coo nájnūhun ni cahān ndajéhé yā jín ná. <sup>26</sup> Te jinū nahín yó ñin isla, te ma jinú yachī yō nuū quíngoo yó, áchí de.

<sup>27</sup> Te ni cuu uxī cuñ jecuāā nde jeē ní quejéé táchī, te jica barco nuū mar Adria, te cháha chúcuan cuahān barco sáha tachī. Te máá jecuāā ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi. <sup>28</sup> Te ni casinga de ñin jeē cáchicuāhá de nasaa cúnú ndute, te ni cajini de jeē iyó ócō xahūn ñin metro. Te ni jica barco jecu gā te ni casinga tucu de, te ni cajini de jeē iyó ócō uxā na metro. <sup>29</sup> Te cáyuhú de jeē jécujnáhan barco jín toto, te ni cajihni de cuñ cāa gancho náhnu yatā barco un, te ni cascāne de nde jehē ndúte návāha chituu te jécuiñī barco. Te yōhyo jnāā de jeē na cúndijin yachī. <sup>30</sup> Te tēe cáscáca barco un ní canducú de cunu de quíngoo de jín barco lulí te cácu de nuū jnúndóho quiji siquī barco cáhnu núu. Jeē yúcuan ní casnúu de barco lulí un núu ndúte, te cásáha-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de. <sup>31</sup> Te ni cahān Pablo jín capitán jín táca soldado:

Núu tú coyūcu tēe yāha ini barco cáhnu jín yó, te ma cácu cuiti maá ní jijnáhan ní, áchí de.

<sup>32</sup> Yūcuán na te soldado ni cajehnde de yoho núhni barco lulí, te ni jneni-ni cuahān.

<sup>33</sup> Te nuū cuácundijin te ni cahān Pablo jín táca tēe un jēē na cáji de staā. Te suhva ni cahān de:

Vijna iyó uxī cuñ quívī jeē cándito ní te tu cáyeji cuiti ni stāā. <sup>34</sup> Te cáhān ndahú ná jín ní jeē na cáji ní stāā, návāha nanihīn ni ní te cácu ní, chí ní ñin yó má cū, ni ma tují cuiti yō, áchí de.

<sup>35</sup> Te ni ndihí ni cahān de jñuhun yāha, te ni quihni de ñin staā, te mēññu táca ñayuu un ní nacuatáhú de nuū Yāā Dios, te ni tahu sáva de staā ún, te ni quejéé de yéji de. <sup>36</sup> Yūcuán na te ni candusñi ni ndihí de, te suni ni cayejí de staā. <sup>37</sup> Te ndivii na jēē cáñuhun ná ini barco cúu uū ciento uní xico xahūn ñin

ná. <sup>38</sup> Te ni cayejí vāha ndihí ná. Yūcuán na te ni cajete de trigo cuahān nuū ndúte un, návāha na ndúñama gā barco.

### *Jeē ni quée barco chíjī ndute*

<sup>39</sup> Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuiñi ndute, te suni máá ñíti cúu, te cájeni ni de jinū de yūcuan jíin barco nuū na cúu nuú. <sup>40</sup> Te ni cajehnde de yoho núhni cāa gancho yūcuan, te ni caquendō cāa un núu mar. Te ni canandají de yujnu jeē scotú chíf barco, te ni nacata caa de sahma cóquin ichi núu návāha chundahá táchī barco, te ni quejéé caca quihīn jíin de ichi núu iyó ñíti. <sup>41</sup> Te ni jinū barco nuū níhin náquijnáhan ndute. Te ni quēe barco nuū ñíti ñuhun chíjī ndute, te ni jñī-ni ichi núu te tuá ni jíca cuítí, te yatā barco un ní cahya-ni jeē níhin ni caní suhmā ndute mar. <sup>42</sup> Yūcuán na te ni candajñuhún soldado jeē cáhni de táca preso návāha ma súde i te cunu i quingoo i. <sup>43</sup> Te cúni capitán un jeē cácu Pablo, te ni jesicoo de. Chí sa ni cahān de núu ndé ñáyuu jiní súde te xīhna gā i na nūngoo i súde i nuū ndúte, te na quénda-ni i quihīn i nuū ñuhun íchi. <sup>44</sup> Te suni sūcuan na quécoo ndihí i quihīn i, sava i coso candá i jíin yujnu cúnu te sava ga i jíin pedazo yujnu barco. Te sūcuan ni cacācu ndihí ná ní jinūcoo ná ñuhun íchi.

### *Jeē ni íne Pablo isla Malta*

## 28

<sup>1</sup> Te nuū ní cacācu ná te ñáyuu cáyūcu yūcuan ní cacachi i nuū na jéé isla un nání Malta. <sup>2</sup> Te ñáyuu un ní cacundáhú ni i sáña jíjnáhan ná, te ni cascáyú i ñin ñuhūn cáhnu, te ni cacahān i jíin ná jeē nasaā ná, chí mījin sáha jeē cúun saū. <sup>3</sup> Te ni stutú Pablo jecu tujnu íchi. Te jeē jnáá de tujnu un núu ñuhún te ñin coō xeén jínu ti ni quenda ti tujnu un jeē ní cujihní, te ni chiyuhú-ni ti ndaha de. <sup>4</sup> Te ñáyuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyí núu sūcuan, te vēsú je ni cācu de nuū mar, te máá yáa sándaā jñiñu ñáyuu tu jéhe ga yā jñuhun jeē cótecu de, áchí i.

<sup>5</sup> Te ni caja Pablo ndaha de, te ni ñinga coō un núu ñuhún, te tú na vé ni ndóho de. <sup>6</sup> Te cándētu táca ñáyuu jeē chúhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñin yaā cúu Pablo.

<sup>7</sup> Te yajni yūcuan íyó ñuhun tēe cújéhu ga Malta un, nání de Publio. Te ni cana tēe un sáña jíjnáhan ná, te ni jéhe núu de vehe de ni coyūcu ná jíin de uní quivī, te ni jito yúcún de sáña. <sup>8</sup> Te tátá Publio cāa de, chí ndóho de cuehyī quíjī jíin cuehyī niñi. Te ni jecondēhe Pablo tēe ún, te ni jícān tahú de te ni soó de ndaha de siquī tēe ún, te ni nduvāha-ni de. <sup>9</sup> Yūcuán na te ni quijicoo ndihí ga ñáyuu cácuñu yūcuán, te suni sūcuan ni canduvāha-ni i. <sup>10</sup> Te ñáyuu un ní cajēhe i cuehē ndajniñu ni cacutahū ná. Te nuū ni jíinū quivī jeē quíngoo tucu ná jíin barco, te ni cajēhe i táca ndajniñu cuu ná ichi.

### *Jeē ni jíinū Pablo ñuu Roma*

<sup>11</sup> Te uní yoō ni coyūcu ná Malta. Te ñin barco jeē véjī ñuu Alejandría ni ine Malta ní vico mījin, te ichi núu barco un ndéé uñ figura ídolo ñuu de nání Cástor jíin Pólux. Te ni quívicoo ná barco un cuángoo ná. <sup>12</sup> Te ni jinūcoo ná ñuu Siracusa, te yūcuan ní coyūcu ná uní quivī. <sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quivī ún vāha ni

quiji tachí ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. <sup>14</sup> Te yūcuan ní caquijnáhan ná jíin jecu hermano cácandíje, te ni cacana de sãña ní coyūcu ná jíin de ñin semana. Yūcuán na te ni quendacoo ná jēe quihīn ná ñuu Roma. <sup>15</sup> Te hermano cáyūcú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíijnahan de, te ni nacuatáhú de nuū Yaā Dios, te ni ndundayí ni de. <sup>16</sup> Te sáa te ni jinūcoo ná ini ñuu Roma, te capitán ni squívī de tãca preso ndaha tēe cújēhnu nuū tãcá soldado ñuu Roma. Te ni cajēhe de jnūhun jeē cone sãin Pablo te condito ñin soldado de.

### *Jeē ní nacani Pablo jnūhun ya ini ñuu Roma*

<sup>17</sup> Te nuū uní quivī te ni cana Pablo tãca tēe cácuájēhnu nuū jnahan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:

Tātā jíijnahan ní, tú cuiti na vé ni sãha ná síquī jnahan yó hebreo ní síquī tãcá jniñu ní catajnúni jíi yō. Te vēsú súcuan te ni cajni i sãña ndé ñuu Jerusalén ni casquívī i sãñá ndaha tēe ñuu Roma jíijnahan de. <sup>18</sup> Te tēe ñuu Roma jeē cácuájēhnu cáyūcú Cesarea ni castíchí de sãñá, te cácuni de siáá de sãña núu, chí ni cajini de jeē tú na cuēchi ná jēe cúu ná. <sup>19</sup> Te jnahan ñuu yō hebreo tu ní cájēhe de jnūhun. Jeē yūcuan ní cahān na jēe quiji ná núu maá rey cujēhnu ga nde ñuu Roma yáhá te sãndaá maá de síquī ná. Te tú vēji ná jēe cáquin na cuēchi síquī ñayuu nación yō. <sup>20</sup> Jeē yūcuan ní cana ná níhín jíijnahan ní, návãha cuni na tãca ní te ndajnuhun yó. Chí yóhó ñayuu Israel cáñūhun ní yō jeē nátecu ndīyī, te suu jnūhun un nãcani ná, te jeē yūcuan cúu jeē nuhní na jíin cadena yáha, áchí de.

<sup>21</sup> Te ni cacahān tēe un jíin Pablo:

Tú ni ñin carta ni cátají ñayuu cáyūcú Judea nuū na jēe cástūhún de jnūhun ní, te tãca jnahan yó Judea jeē ní quijicoo yáhá, tú ni ñin jnūhun néé ní cacahān de síquī ní. <sup>22</sup> Te cánujnahān ní ná cuni sōho ná ndese cúu jnūhun jeē cahān ní, chí je cájini na jēe tãcá-ni lado cacahān ñayuu contra síquī jnūhun jeē jēe steén ni, áchí de.

<sup>23</sup> Te ni cajeni de ñin quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenēhen te nde ní ini. Te súcuan ni nducú ndéyí de scándíje de tãca tēe un jnūhun Jesús, te ni steén de jeē suni súcuan cáhān ley jeē ní jēhe ya nuū Moisés jíin jnūhun jeē ní catee tēe ni canacani jnūhun Yaā Dios nde jenahān. <sup>24</sup> Te ni cacandíje sava de jnūhun ni cahān Pablo, te sava ga de tu ní cájetáhú de. <sup>25</sup> Chí tú inuú cáhīyo ni de. Te sáa cánducú de quingoo de te ni cahān Pablo:

Ndaā cahān jnūhun jeē ní cahān Isaias, tēe ni nacani jnūhun Yaā Dios nde jenahān, chí suhva ni cahān de jíin tãca jíi yō ni sãha Espírītu Santo:

<sup>26</sup> Ni cahān Yaā Dios:

Cuáhān núu jnahan ñuu rō yáhá te cahān rō jíin i:

Vēsú cuni nahín váha ró te ma jécūhun ni rō,  
te vēsú coto váha ró te ma cúni rō.

<sup>27</sup> Chí yōhyo níhni ní rō,

chí tu cácuni rō cuatáhú ró.

Te yōhyo uhū cájini sōho ró,

chí tu cánujnahān ní rō cuni sōho ró jnūhun ri.

Te nájnūhun cájesi rō tinūu ró

cúu jeē tu cácuni rō nanducú ró ndese cúu,

te tu cǎcuni rō jeē nāsāma ini rō  
nāvāha nasāvāha ri anuá rō nuū cuéchi ró, ní achi Yaā Dios.  
Achí tutu. <sup>28</sup> Nūu súcuan te na cástūhun ná nuū ní jeē jnūhun ni tají Yáa Dios jeē  
jnáma ya yohó, nde vijna te tájí yá jnūhun yáha quíhín nuū ñáyyu tǎcá nació  
jeē tu cǎjini i jnūhun ya, te máá i chí cuni sōho i, áchí de.

<sup>29</sup> Te ní jīnu ní cahān de jnūhun yáha, te cuangoo jnāhan de hebreo, te yōhyo  
ni cacahān de siquī jnūhun yáha jíjnāhan de.

<sup>30</sup> Te ní condee Pablo uū cuiyā vehe jeē ní quihín núu de ún. Te ní cusī ní de  
cahān de jíín tǎca ñáyyu ní quijicoo nuū de. <sup>31</sup> Te jéhnū-ni ní nacani de jnūhun  
ndese ndácu Yaā Dios jniñu, te ní steén de jnūhun máá Jítóho yō Jesucristo, te  
tú ní ñn ní jési jeē nácani de jnūhun.

## CARTA JEE NI TEE SAN PABLO APOSTOL NUU ÑAYUU ÑUU ROMA

<sup>1</sup> Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jñūhun jeē jnáma ya ñayuu.

<sup>2</sup> Te jñūhun un ní jejnūhun ya nde jenhán ndasí, te yósó núu tútu ìi jeē ní catee tēe ni canacani jñūhun ya. <sup>3</sup> Te jñūhun un cáhán siquī Jítoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. <sup>4</sup> Te ni natecu yā mēhñu ndíyí ni sáha Espírítu ìi, te súcuan ní steén Yaā Dios jeē cúu ya Sēhe ya jeē ndíso poder. <sup>5</sup> Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jñūhun Cristo, návāha coo ñayuu táca nación jeē candíje i jeē sáha ya jehē i, te cuatáhú i nuū yā. <sup>6</sup> Te suni máá ró jijnáhan ró, suni ní cana ya rohó ní quívicoo ró ndaha Jesucristo.

<sup>7</sup> Te tēe ri carta yáha cuajeē nuū rohó ñáyuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo ìi rō nuū yā. Te ñūhun ni rí jeē maá Tátá yō Yaā Dios jíin Jítoho yō Jesucristo sáha ga yā jeē váha rōhó, te sáha ya jeē coo ndeyí coo sīi ní rō.

### *Jeē cuní Pablo quihñ de ñuu Roma*

<sup>8</sup> Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyivi jíte núu jñūhun cuahñ ndese váha cácuandíje ró yá. <sup>9</sup> Te máá Yaā Dios jiní yā jeē níni jícan tahú rí jehē rō jijnáhan ró nuū jícan tahú rí. Chi yōhoyó ndíhví ní rí jijnáhan rí nuū yā jeē nácani rí jñūhun Sēhe ya. <sup>10</sup> Te níni jícan tahú rí nuū yā jeē núu cuní yā te nde vijna te cuu jecondēhe rí rohó. <sup>11</sup> Chi cúu ni rí coto rí nuū rō jijnáhan ró, te steén gā rí jñūhun ya nuū rō, návāha quendōo váha ga anuá rō te cuiñi nihin ga rō jíin. <sup>12</sup> Súcuan cuní rí návāha sáha yó jéē ínuú coo ndeyí ní yō jijnáhan yó siquí jeē ínuú cácuandíje yó yá.

<sup>13</sup> Hermano jijnáhan ró, cuní rí jeē na jécūhun ni rō jeē tíjni jínu ni cuu ni rí jecondēhe rí rohó, te nde vijna ná tu cuu. Chi cuní rí scuité núu ga rí jñūhun ya mēhñu ró, nájñūhun ni sáha ri mēhñu ñáyuu táca gá nación. <sup>14</sup> Chi cúu ri tēe táu siquí jñūhun ya, chi táu rí nacuāha ri jñūhun ya nuū ndíhi ñayuu, cúu ñayuu jiní gā siquí ndíhi jeē iyó ñáyivi jíin jéé tu jíni cuíti, cúu ñayuu tūhva jíin jéé tú tūhva. <sup>15</sup> Jeē yúcuan cúu jeē ndíhví ní rí jeē suni nuū rohó ñáyuu ñuu Roma nacani ri jñūhun jnáma ya yohó.

### *Jeē ndíso jñūhun váha ya poder*

<sup>16</sup> Chi tu cúcanu rí siquí jñūhun váha ya, chi yúcuan cúu poder Yaā Dios jeē jnáma ya táca ñáyuu cácuandíje, xihna gā ñayuu hebreo te suni táca gá ñayuu. <sup>17</sup> Chi jñūhun váha ya un steén nuū yō jeē ndáhva Yaā Dios cuēchi yó síquí jeē candíje yó jéé sáha ya jehē i, te máá jéé candíje yó ní cuahñ yō. Chi súcuan cáhán nuū tútu ìi: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

### *Siquí jeē iyó ndasí cuēchi ñayuu*

<sup>18</sup> Chi jíni váha yó jéé Yaā Dios andívi, cuāha ya castigo xeēn nuū táca ñáyuu tu cácuandíje te máni cuēchi casáha. Chi jíin jniñu néé casáha i te cájesi i nuū jñūhun ndaā. <sup>19</sup> Te ma cúu cahān i jeē tu jécūhun ni i siquí ndese Yaā cúu Yaā

Dios, chi máá yá ni steén nuū i. <sup>20</sup> Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñayivī jíin ndé vijna te cúu jécūhun vāha ni i jeē maá yá cúu Yaā Dios te iyó poder yā níí cáni. Te jeē yúcuan má cúu cuiti cahān i jeē tu jíin i jeē iyó yá. <sup>21</sup> Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhā ni, chi ni candunéé í i, te ni quendōo nee ini anuá i. <sup>22</sup> Cácahān i jeē ndichí i, te sa suhva cáacunéé i. <sup>23</sup> Chi ni castóo i Yaā Dios jeē yóhoyo luu cújéhnú, jeē ma cúu cuiti. Te ni cajetáhú i táca imagen jeē casáha i, jeē cáa nájnūhun tēe cájihī, te suni nde imagen saa jíin cóo jíin quití cájica ndicúun ndaha.

<sup>24</sup> Te jeē yúcuan ní siaá Yaā Dios i jeē na sáha i táca jniñu jnéhén jniñu néé jéé cuní i. Te casáha i jniñu néé jíin jnáhan i jeē cúu máá jnúhun canu. <sup>25</sup> Chi tu ní cácandíje i jnúhun ndaā Yaā Dios, chi sa ni cacandíje i jnúhun stáhú. Te cáhīyo yíñúhún i te cáchiñúhún i nuū táca jéé ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cújéhnú ya níí cáni. Amén.

<sup>26</sup> Jeē yúcuan ní siaá Yaā Dios i jeē na sáha i táca jniñu néé jéé cándiyo ni i jeē cúu máá jnúhun canu. Chi nde ñahan ni casama ña modo sihí, te ni quivī ña jíin modo neé. <sup>27</sup> Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo siquī jniñu néé ní casáha de.

<sup>28</sup> Te jeē tu ní cácani i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i táca jniñu jeē tu iyó váha. <sup>29</sup> Te máni máá na jniñu jeē tu iyó ndaā cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cácuacuésún ni, cájehni ndiyi, cájehjáhan, cástáhú, cástáhuhū jnáhan, cásjnúhún siquī jnáhan. <sup>30</sup> Cácahān jnúhun néé siquī jnáhan, cájito uhū Yaā Dios, cácujeé ni, cáсандúxí máá, cásatéyí máá, cájequin costumbre neé, tu cájendetū nuū tatá nuū naná. <sup>31</sup> Te tu cájecūhun cuiti ni, tu squicu jnúhun jéjnūhun, tu iyó máni jíin jnáhan, tu íne cáhnú ni nuū jnáhan, tu cundáhú ni jnáhan. <sup>32</sup> Te je cájini vāha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vēsú súcuan cájini i, te níni casáha i jniñu néé un, te suni cánujnahān ni i jeē casáha jnáhan i súcuan.

### *Ndaā sándaā Yaā Dios siquī cuēchi*

## 2

<sup>1</sup> Núu súcuan te róhó jéé cahān cuēchi siquī jnáhan, núu na-ni ñayuu cúu ró, ma cúu cahān rō jeē tú na cuēchi máá ró. Chi jeē cahān rō cuēchi siquī jnáhan ró cúu jeē ndénehen ró cuēchi siquī maá ró. Chi róhó jéé cahān cuēchi, suni súcuan sáha máá ró cuēchi. <sup>2</sup> Chi jíin yō jeē Yaā Dios, ndaā sáha ya jeē ndóna ya siquī cuēchi ñayuu casáha súcuan. <sup>3</sup> Te róhó jéé cahān cuēchi siquī ñayuu casáha cuēchi, te suni súcuan sáha máá ró, ¿te á jéni ni rō jeē cácu máá ró quivī ndóna Yaā Dios siquī cuēchi, chí naún? <sup>4</sup> ¿A cújéé ni rō nuū jnúhun jeē yóhoyo vāha ni Yaā Dios jíin ró, jíin jéé iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani ni rō siquī cuēchi ró? <sup>5</sup> Chi níhni ni rō te tu nácani ni rō siquī cuēchi ró. Te jeē yúcuan cáyá gā rō castigo siquī rō quivī sáha Yaā Dios juicio, máá quivī jeé cóo ndijin jeē ndaā sándaā yā siquī cuēchi. <sup>6</sup> Chi chunaa yā nuū ná ñn ná ñn ñayuu núu ndese jniñu ni casáha i. <sup>7</sup> Te ñayuu jeē tu jécuiñi i jeē sáha i jniñu vāha, cuāha ya jnúhun jeē cótecu i níí cáni. Chi ndúcu i quivī i nuū ndujéhnú yíñúhún



i, nuū ñi cáni cotecu i. <sup>8</sup> Te quitī ni yā te cuāha ya castigo nuū ñáyu cujéē ni nuū yā, te cúniñni ni nuū jnúhun ndaā, chi sa nuū jnúhun yacuá yóho jetáhú i. <sup>9</sup> Te tāca ñáyu casáha jniñu neé, chi niñiñ i jnúndóho xeēn te cucuíhyá ndasí ni i, xihna gā ñáyu hebreo te suni súcuan ñáyu tāca gá nación. <sup>10</sup> Te sa suhva tāca ñáyu casáha jniñu váha, chi quívi i nuū ndujéñu yíñúñun i, te coo ndeyí coo sī ni i, xihna gā ñáyu hebreo te suni súcuan ñáyu tāca gá nación.

<sup>11</sup> Chi Yaā Dios tu sáha ya cuenta ndese cúu ñiñ ñáyu, chi inuú sáha ya jíin i. <sup>12</sup> Chi tāca ñáyu jeē casáha cuēchi, vēsú tu cáyihí i chíji ley jeē ni jéhe ya nuū Moisés, te tu níni ley un te jnahñu ndetú i. Te tāca ñáyu cáyihí chíji ley Moisés te casáha cuēchi, jíin ley un sándaā yā cuēchi i. <sup>13</sup> Chi tu ndáhva Yaā Dios cuēchi ñáyu jeē maá jéē cúni nahín-ni i jnúhun cáhán ley yā. Chi sa suhva ñáyu squícu jeē cahán ley yā cúu jeē ndáhva yā cuēchi i. <sup>14</sup> Chi ñáyu tāca nación jeē tu cánevāha tutu ley jeē ni jéhe ya nuū ñáyu hebreo, te núu cásquícu máa i ley yā, suu cúu jeē cánevāha i ley yā ñi anuá i, vēsú tu cánevāha i tutu ley un. <sup>15</sup> Te súcuan cástéén i jeē jnúhun ndácu ley un chi ñúhun ñi anuá i. Te tāca jéē cájeni ni i jíin ánuá i, suu cúu jeē steén nuū i siquí núu ni sáha i cuēchi chí váha ni sáha i. <sup>16</sup> Te súcuan coo máa quívi jeē jíin Jesucristo sándaā Yaā Dios siquí tāca jéē tu iyó váha jeē ní cajeni sáhi ni tāca ñáyu. Súcuan cáhán jnúhun váha ya jeē nácani ri.

### *Siquí jeē tu cásquícu ñáyu hebreo ley Moisés*

<sup>17</sup> Te róho cácahān rō jeē téē hebreo cácuu rō, te cátenuū rō maá ley Moisés, te cácutéyí rō jeē siquí Yaā Dios. <sup>18</sup> Te cájeni ni rō jeē jíin rō ndese nújnahan ni yā, jíin jéē cúu nácāji váha rō ndé-ni cúu jniñu váha, chi ni cacutúhva rō ley un. <sup>19</sup> Te cájeni ni rō jeē maá rō cácuu téē stéén ichi Yaā Dios nuū ñáyu tu cájini cuiti, jíin jéē cúu sáha rō jéē cúndijin ñi anuá ñáyu cájica nájnūhun nuū neé. <sup>20</sup> Te cájeni ni rō jeē cúu stéén rō nuū ñáyu tú tūhva jnúhun ya, jíin jéē maá rō cácuu maestro nuū ñáyu tu jécūhun ní. Chi jíin tutu ley yā te cájini rō ndese cúu jnúhun ndíchi jnúhun ndaā, cájeni ni rō. <sup>21</sup> Núu súcuan te máa rō jeē cástéén nuū ñáyu, ¿te naun tu cástéén rō nuū maá rō? Te máa rō jeē cácahān jeē ma sácúíhná i, ¿te naun cásácúíhná máa rō? <sup>22</sup> Te máa rō jeē cácahān jeē ma cósiquí ndéē i, ¿te naun cósiquí ndéē maá rō? Te máa rō jeē cácahān jeē cácuquini ni rō ídolo, ¿te naun cásácúíhná rō ndajniñu jeē yúcu ñi vehe ídolo? <sup>23</sup> Te cácutéyí rō jíin ley Yaā Dios, te vēsú súcuan te casáha rō jéē cácahān ñáyu siquí yā, chi tu cásquícu máa rō jnúhun ndácu ley yā ún. <sup>24</sup> Chi súcuan yósó núu tutu ñi: Ñáyu tāca gá nación, máni cácahān ndevāha i siquí Yaā Dios, jeē siquí cuēchi róho ñáyu hebreo.

<sup>25</sup> Te núu cásquícu rō ley Moisés, yūcuán na te níñiñ jniñu ndije jeē ni canihñ rō jnuni circuncidar. Te núu tu cásquícu rō ley un, te vēsú ni cuu rō circuncidar, te nájnūhun jeē tu ní cúu rō. <sup>26</sup> Te téē tācá nación, núu cásquícu de jniñu ndácu ley un, vēsú tu ní cániñiñ de jnuni circuncidar, núu súcuan te nájnūhun ni canihñ de jnuni circuncidar. <sup>27</sup> Te téē jeē tu ní cúu circuncidar yiquí cúñu de, te cásquícu de ley yā, máa de cahán cuēchi siquí rō. Chi tu cásquícu rō, vēsú cánevāha rō tutu ley un, te ni cuu rō circuncidar. <sup>28</sup> Chi nasūu jéē cáa ichi siquí ñiñ téē sáha jeē cúu ndije de téē hebreo. Te ni nasūu jéē cúu circuncidar yiquí cúñu ñiñ téē sáha jeē cúu de téē ndaā. <sup>29</sup> Chi sa suhva téē cúu hebreo ndije, cúu jeē ñi anuá de ñúhun jnúhun ndaā. Te téē cúu circuncidar ndije, chi nde jíin ñi jíin ánuá de sáha de jniñu ndaā te nasūu jéē ndíso de jnuni

circuncidar jeē cahán ley un cúu. Tēe cándāa súcuan, nasūu ñáyuu cájejnūhún i de, chi máá Yaā Dios.

### 3

<sup>1</sup> ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé nihín jniñu jeē casáha i circuncidar? <sup>2</sup> Vāha ndasí nihín jniñu. Xihna gā nihín jniñu jeē ni jéhe Yaā Dios jnūhun ya nuū maá i. <sup>3</sup> Te vēsú sava i tu ní cácañdije, ¿te á suu sáha jeē ma squícu ga Yaā Dios jnūhun ni jejnūhun ya, chí naún? <sup>4</sup> Tú cuiti jeē súcuan, chí vēsú núu ndihí ñáyuu castáhú i, te Yaā Dios chí iyó ndāā yā. Chí suhva yósó nuū tútu iñ jeē ni cáhān iñ tēe jíin yá:

Cahān ñáyuu jeē iyó ndāā ni jíin táca jnūhun cáhán ni,

te cuni i jeē iyó ndāā ní vēsú núu cácahān i siquī ní.

Achí tutu.

<sup>5</sup> Te cácahān sava ñáyuu jeē iyó váha jeē sáha yó cuēchi, chí cuēchi yó jéjníñu stéén jeē iyó ndāā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjníñu cuēchi yó súcuan? (Va cáhān-ni nde rí nájñūhun cácahān ñáyuu ñayīví.) <sup>6</sup> Tú cuiti jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuēchi ñáyuu ñayīví?

<sup>7</sup> Te núu jnūhun stáhú cácahān ñáyuu jéjníñu stéén jeē yóhoyo cújéhu Yaā Dios siquī jeē máni cáhán ndaā yā, ¿te á cuu cahān yō jeē tú vāha jeē cahán yā jeē cuēchi cúu jeē castáhú i? <sup>8</sup> Tuú, chí núu jeē súcuan cúu, te cuu cahān yō jeē vetū-ni sáha yó jéē neé návāha quee jeē váha núú. Te sava ñáyuu cácahān ndevāha i siquī rī jeē súcuan cástéén rī, te tú ndaā. Ñáyuu ún chí iyó váha jeē ndénehen ya cuēchi siquī i.

#### *Ndávii yō iyó cuēchi*

<sup>9</sup> Núu súcuan ¿te á váha ga ñáyuu cácuu yóhó ñáyuu hebreo vēsú inga ñáyuu naún? Tú cuiti jeē súcuan. Chí je ni cacahān yō jeē vēsú ñáyuu hebreo chí ñáyuu táca gá nación, ndávii yō yíhi chíji cuēchi. <sup>10</sup> Chí suhva cáhán tutu iñ:

Tú cuiti na ñáyuu ndaā iyó, ni iñ i.

<sup>11</sup> Te tú cuiti ñáyuu jécūhun ni iyó,

te tú ni iñ i nānducú i Yaā Dios.

<sup>12</sup> Ndihi i ni cascuíta i jnūhun ya,

te inuú-ni ni castívi ndihí i máá i.

Te tú cuiti ñáyuu sáha jniñu váha iyó, ni iñ i.

<sup>13</sup> Yaū sucūn i cúu nájñūhun yaū ndīyi jeē núne,

chí máni jnūhun stáhú cácahān i.

Te nájñūhun veneno coó yíhi yuhu i,

<sup>14</sup> chí máni máá jnūhun ndevāha jnūhun uvuā cácahān i.

<sup>15</sup> Te yóhoyo ñama jehē i jeē cáhni i ndīyi.

<sup>16</sup> Te ndé-ni cúu-ni nuū cájica i te squívi i jnūndóho jeē jnahnú ndetū ñáyuu.

<sup>17</sup> Te tu cájica cuiti i jíin jnūhun coyūcu máni i,

<sup>18</sup> te ni tu cánacani ni i jeē cónso iyo i nuū Yaā Dios.

Achí tutu.

<sup>19</sup> Te jíin yō jeē táca jnūhun cáhán ley jenahán, chí cáhán nuū ñáyuu yíhi chíji ley un, návāha ndihí i ma cúu cahān i jehē i. Chí ndenehen Yaā Dios cuēchi siquī i nde jíin ñáyuu ní ñayīví. <sup>20</sup> Chí tú ni iñ ñáyuu quendōo ndaā i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē iyó cuēchi yó.

### *Jeē jnáma ya yohó síquī jeē candíje yó jéē sáha ya jehē yō*

<sup>21</sup> Te vijna te je cájini vāha yó ndese ndáhva Yaā Dios cuēchi yó. Te nasū ley un sáha jeē quéndōo ndaā yō, vēsú maá tutu ley jín tée ni canacani jnūhun ya, ni cacahān ndese ndáhva yā cuēchi ñayuu. <sup>22</sup> Chi tāca ñayuu jeē cácandíje i jeē ni jíhi Jesucristo jeē chúnaa yā cuēchi i, chi ndahva Yaā Dios cuēchi i síquī jeē súcuan cácandíje i. Chi inuú-ni cúu tācá ndihi ñayuu. <sup>23</sup> Chi ndihi yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. <sup>24</sup> Te síquī jeē yóhyo vāha ni Yaā Dios, jeē yúcuan ndáhva yā cuēchi yó súcuan-ni. Chi síquī jeē ni jíhi Cristo Jesús cúu jeē jnáma ya yohó. <sup>25</sup> Chi Yaā Dios ni jeni ya Cristo návāha socō yā maá yá chunaa yā cuēchi yó jéē ni jíhi yā. Te jnáma ya yohó núu súcuan cándíje yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni ñyo paciencia yā, te tu ní chíhi ya cuenta cuēchi ñayuu. <sup>26</sup> Te tiempo yáha stéén yā jeē Yaā ndaā cúu ya, chi ndaā sáha ya jeē squéndōo ndaā yā ñayuu candíje vēsú íyó cuéchi i, chi cácandíje i jeē ní chunaa Jesús cuēchi i ni ndahva yā.

<sup>27</sup> Núu súcuan ¿te á cuu cutéyí gá yō síquī maá yó? Ma cúu cuiti, chi ma cúu cutéyí yó cani ni yó jeē vāha squícu yó ley yā. Chi jnáma ya yohó máá síquī jeē candíje yó jéē sáha ya jehē yō. <sup>28</sup> Núu súcuan te je jíni yō jeē ndáhva Yaā Dios cuēchi yó síquī jeē súcuan cándíje yó, te nasū jéē nducú yó squícu yó jéē ndácu ley.

<sup>29</sup> ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. <sup>30</sup> Chi ñin-ni Yaā Dios iyó, te ndáhva yā cuēchi ñayuu cácandíje jeē ní sáha ya jehē i, cúu ñayuu ndíso jnūni circuncidar, cúu ñayuu jeē tuú. <sup>31</sup> Te jeē candíje yó jéē jnáma ya yohó, ¿á sáha jeē tuá jíni ñúhún squícu yó ley yā, chí naún? Tú cuiti, chi sa suhva sáha jeē váha ga cuu squícu yó ley yā.

### *Abraham cúu ñin ejemplo nuū yō*

## 4

<sup>1</sup> Núu súcuan ¿te ndese cahān yō síquī tāca jéē ní cuu jíni jíi yō Abraham? ¿Ndese ni ndahvā cuēchi de? <sup>2</sup> Nasū jéē ní sáha máá de cúu jeē ní ndahva Yaā Dios cuēchi de. Chi núu jeē súcuan cúu núú, te cuu cutéyí de jeē vāha ni sáha de. Te tu ní cutéyí de, chi nasū síquī jeē ní sáha máá de cúu jeē ní ndahva Yaā Dios cuēchi de. <sup>3</sup> ¿Chi ndese cáhán tutu íi? Cáhán jeē ní candíje Abraham jeē sáha ya jeē ní jéjnūhun ya nuū de, te jeē yúcuan ní ndahva yā cuēchi de. <sup>4</sup> Te ñin ñayuu sájniñu, te yāhu i chi nasū jéē cútahū i cúu, chi jeē chúnaa yō nuū i cúu. <sup>5</sup> Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuéchi i, yúcuan na te ndahva yā cuēchi i. <sup>6</sup> Te David suni ni cahān de ndese yóhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñin jniñu jeē quéndōo ndaā i nuū yā. <sup>7</sup> Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sáha i, te tu ndénehen ya cuēchi síquī i.

<sup>8</sup> Te nacā ndetū tēe jeē tuá chíhi máá Jítoho yō cuenta cuēchi de.

Achí tutu.

<sup>9</sup> ¿Te á máni máá ñayuu squícu ley circuncidar cúu jeē quéndōo ndetū? ¿Chi suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ní jéjnūhun ya, te jeē yúcuan ní ndahva yā cuēchi de. <sup>10</sup> Te ná ni ndahva yā cuēchi de, ¿á je

ni cuu de circuncidar, chí ndé ná tuú? Nasūu jée jé ni cuu de circuncidar, chi nde ná tuú. <sup>11</sup> Te cuéé gá te ni nihin de jnuni circuncidar. Te suu ni cuu in seña, nájñuhun in sello jeé ní ndahva yā cuēchi de siquī jeé súcuan ni candíje de. Te jeé yúcuan ní cahān yā jeé cuu de jí nuū tāca ñáyyuu jeé candíje i jeé sáha ya jehē i, suni nuū ñáyyuu tu ní cúu circuncidar, chí suni ndahva yā cuēchi máá i. <sup>12</sup> Te suni cúu de jí nuū ñáyyuu ní cuu circuncidar, te nasūu máni jeé ní cuu i circuncidar, chí suni jeé ní jñi i ejemplo de. Chi cá candíje i jeé sáha ya jehē i, nájñuhun ni candíje máá de nde ná tu cuu de circuncidar.

*Núu candíje yó te sáha Yaā Dios jeé ni jéjnūhun ya*

<sup>13</sup> Chi ni jejnūhun Yaā Dios nuū Abraham jíin nuū tāca yúcūn de jeé cuāha ya ñi ñáyyivi cuu tahū de. Te nasūu siquī jeé ní nducú de squícu de ley yā cúu jeé ní jejnūhun ya un núu de, chí sa suhva siquī jeé ní candíje de jeé ni jéjnūhun ya, te ni ndahva yā cuēchi de. <sup>14</sup> Chi núu jeé máni máá ñáyyuu nducú squícu ley cúu jeé nihín jeé ni jéjnūhun ya, núu súcuan te cándíje cāha yó nuú, te ma nihín jñiñu jeé ni jéjnūhun ya ún. <sup>15</sup> Te ley chí sáha jeé nihín ñáyyuu castigo siquī jeé tu cúu squícu i. Te núu jeé tu ley, te suni tú na jñuhun stívi ñáyyuu siquī ley coo núu.

<sup>16</sup> Núu súcuan te ni jejnūhun ya jeé sáha ya jeé váha jíin ñáyyuu siquī jeé candíje i jeé súcuan sáha ya, te jeé cútahū i súcuan-ni cúu. Te jeé ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñáyyuu jeé nducú squícu ley jenahán, chí suni nuū tāca ñáyyuu cá candíje nájñuhun ni candíje Abraham. Te súcuan cúu de jí nuū tāca yó jeé cá candíje yó. <sup>17</sup> Súcuan ni sáha Yaā Dios chí ni candíje de jeé sáha ya. Chí súcuan cáhān tutu ii: Ni jeni ri rohó cuu ró jíi nuū cuehē ndasí ñáyyuu. Súcuan ni cahān maá Yaā jeé nastécu ndīyi te cáhān yā ndese coo tāca jée ná tu coo.

<sup>18</sup> Te ni candíje de, te ni cocuhun teyí ni de jeé ni jéjnūhun ya jeé coo cuehē yucūn de, vēsú tuá na modo coo sēhe de núu. Te jeé yúcuan ní nduu de jíi nuū cuehē ndasí ñáyyuu, nájñuhun ni cahān Yaā Dios: Súcuan nducuehē yucūn rō, achí yá jíin de. <sup>19</sup> Te je yajni jíin de ciento cuiyā, te vēsú súcuan te tu ní quéndā de nuū jñuhun cándíje de, vēsú jíin de jeé maá de jíin ñasihí de Sara je jéhnū ndasí ndíndúú de jeé ma cúu ga coo sēhe de. <sup>20</sup> Te tu ní nácani siquī ni de jeé ma cándíje ga de jñuhun ní jejnūhun Yaā Dios jeé coo sēhe de. Chí sa suhva ni candíje nihin ga de, te ni nacuatáhú de nuū Yaā Dios. <sup>21</sup> Chí ni cucáhnu váha ni de jeé cúu squícu Yaā Dios ndihi jeé ni jéjnūhun ya. <sup>22</sup> Te jeé yúcuan ní ndahva yā cuēchi de siquī jeé súcuan ni candíje de.

<sup>23</sup> Te nasūu máá-ni siquī Abraham cúu jeé yosó núu tútu jeé ní ndahva yā cuēchi de jeé ní candíje de. <sup>24</sup> Chí suni yósó jée siquī yohó jíjnāhan yó. Chí suni ndáhva yā cuēchi máá yó jée candíje yó jée cúu ya Yaā ní nastécu Jitoho yō Jesús. <sup>25</sup> Chí ni jihí Jesús jeé chúnaa yā cuēchi yó, te ni natecu yā návāha ndahva Yaā Dios cuēchi yó.

*Ndese quéndōo ñáyyuu jeé ndáhva yā cuēchi*

## 5

<sup>1</sup> Núu súcuan te je ni ndahva Yaā Dios cuēchi yó siquī jeé ní candíje yó jée sáha ya jehē yō. Te jeé yúcuan ní sáha ya jeé ní ndīvi yó núu jñuhun manī yā jíin yó, siquī jeé ní jíhi Jitoho yō Jesucristo jehē yō. <sup>2</sup> Chí máá Cristo ni sáha jeé ni quívicoo yó núu Yaā Dios, chí ni sáha ya jeé váha yóhó siquī jeé súcuan cándíje yó. Te cáhīn nihin yó jíin jñuhun jeé sáha ya jeé váha yóhó. Te cúsī ni

yō chi ñūhun ni yō jeē jinū yō nuū lúu cujēhnu yó jín Yaā Dios. <sup>3</sup> Te nasūu máá yáha-ni, chí suni cúsi ni yō jeē ndóho yó jnúndóho. Chí jíní yō jeē máá jnúndóho sáha jeē jéndeyí ni yō. <sup>4</sup> Te jeē jéndeyí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñūhun ni yō tāca jéē vāha jeē cóo. <sup>5</sup> Te tāca jéē ñūhun ni yō, chí nihīn nahín yó. Chí jnūhun cúndáhú ni Yaā Dios yohó, ni cunuú ini anuá yō, sáha Yaā Dios jeē jín Espíritu Santo jeē ni jéhe ya nuū yō.

<sup>6</sup> Chí náa ndóho yó jéē ma cúu cuiti jnama yó máá yó, te ni jihī Cristo jehē yohó jéē cúu yó ñáyuu iyó cuéchi. Te ni jihī yā máá quívi jeē jé ni jeni Yaā Dios. <sup>7</sup> Te yí cúu jeē cúu ñn ñayuu jehē inga ñayuu, vésú jehē ñn ñayuu ndaā. Chí sanaa te iyó jínu jeē chúndeyí ni ñn tēe cuu de jehē ñn tēe ndaā vāha. <sup>8</sup> Te máá Cristo chí ni jihī yā jehē yó náa máni cuéchi sáha yó, te súcuan ni steén Yaā Dios jeē cundáhú ni yā yohó. <sup>9</sup> Te vijna je ni ndahva Yaā Dios cuéchi yó síquī jeē ni jihī Cristo jehē yō. Núu súcuan te suni jíní vāha yó jéē jnama Cristo yohó núu castigo quiji quívi sáha Yaā Dios juicio. <sup>10</sup> Chí náa cúu ga yō enemigo Yaā Dios, te síquī jeē ni jihī Sēhe ya jehē yō, te ni sáha ya jeē ndívi yó núu jnúhun manī yā jín yó. Te jeē súcuan ni ndívi yó nuū jnúhun manī yā jín yó, te suni jíní vāha yó jéē cācu yó síquī jeē técu Cristo, nduú yá jín yó. <sup>11</sup> Te nasūu máá yáha-ni, chí suni cúsi ndasí ni yō jín Yaā Dios síquī jeē ni sáha Jitoho yō Jesucristo jehē yō, chí máá yá ni sáha jeē ní ndívi yó núu jnúhun manī Yaā Dios jín yó.

### *Jnúhun Adán jín jnúhun Cristo*

<sup>12</sup> Núu súcuan te jíní yō jeē ni quívi cuéchi ini ñayívi ní sáha máá ñn-ni tēe Adán. Te jeē síquī cuéchi yúcuau te ni jecóo cuehyí jéhni ñayuu. Te jeē yúcuau cúu jeē jihī ndihí ñayuu, chí ndihí i yíhi cuéchi. <sup>13</sup> Te nde ná tu cuāha ya ley nuū Moisés, te je iyó cuéchi ini ñayívi. Te síquī jeē ná tu coo ley yā, te tu ní chíhi ya cuenta jeē castívi i. <sup>14</sup> Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhni i síquī jeē iyó cuéchi i. Chí ni jihī i síquī cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cunihni ni de nuū ñn jniñu ní ndacu ya. Te Adán ni cuu de ñn muestra máá Yaā ní quiji cuéé gá.

<sup>15</sup> Te jnúhun jeē ni sáha Adán cuéchi, tu quíjnáhan cuiti jín táhū jeē jnáma Yaā Dios yohó. Chí jeē ni stívi máá ñn-ni tēe ún, jeē yúcuau cúu jeē jihí ndihí yó. Te jnúhun jeē jnáma Yaā Dios yohó cújēhnu ndasí gá, chí síquī jeē ni sáha máá ñn-ni tēe Jesucristo cúu jeē súcuan-ni jnáma ya ndihí ñayuu candíje. <sup>16</sup> Te cuéchi jeē ni sáha máá ñn-ni Adán, tu quíjnáhan cuiti jín jnúhun jeē jnáma Yaā Dios yohó. Chí síquī máá ñn-ni cuéchi ún te ni quívicoo ñayuu chíhi jnúhun jnahnú ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vésú yóhyo cuehē cuéchi ni casáha i. <sup>17</sup> Chí síquī jeē ni sáha máá ñn-ni tēe Adán cuéchi, te ni nihīn poder cuehyí jéhni ñayuu. Te sa suhva síquī jeē ni jihī máá ñn-ni tēe Jesucristo, te víhyá gá ni nihīn ñayuu máá yá poder jeē cótecu i caca ndaā i jín yá. Chí ni ndahva yā cuéchi i síquī jeē yóhyo vāha ni yā.

<sup>18</sup> Núu súcuan te síquī jeē ni sáha máá ñn-ni tēe Adán cuéchi, te ni quívicoo ndihí ñayuu chíhi jnúhun jnahnú ndetū i. Te sa suhva síquī jeē ni sáha máá ñn-ni tēe Jesucristo ñn jniñu vāha ndasí, te ndáhva Yaā Dios cuéchi ndihí ñayuu te cotecu i ní cáni. <sup>19</sup> Chí síquī jeē tu ní jéndije máá ñn-ni tēe, te ni quívicoo cuehē ndasí ñayuu chíhi cuéchi. Te suni súcuan síquī jeē ní jendije máá ñn-ni tēe Jesucristo, te ndáhva Yaā Dios cuéchi cuehē ndasí ñayuu.

<sup>20</sup> Te ni jēhe ya ley yā nāvāha cuni yō jeē cuéhē cuēchi cásaha yó. Te jeē ní nducuehē cuēchi yó, te víhyá gā cuehē cúu jnūhun jeē váha ni yā jeē íne cáhnu ni yā nuū yō. <sup>21</sup> Núu súcuan te nájñūhun ni nihin poder cuehyí jéhni ñayuu siquī jeē iyó cuēchi i, suni súcuan íyó poder jnūhun jeē váha ni yā jíin yó. Chi ndáhva yā cuēchi yó te cotecu yō níí cáni siquī jeē ni jíhí Jitoho yō Jesucristo jehē yō.

*Jeē tuá yíhi yó chíji cuēchi chi yíhi yó ndaha Cristo*

## 6

<sup>1</sup> Núu súcuan ¿te ndese cahān yō? ¿A caca ga yō jíin cuēchi nāvāha víhyá gā sáha ya jeē váha yóhó jéē cóne cáhnu ni yā nuū yō? <sup>2</sup> Ma cúu cuiti. Chi nájñūhun je ni jíhí yō jeē tuá yíhi yó chíji cuēchi, te ma cúu ga caca yó jíin cuēchi núu súcuan. <sup>3</sup> ¿A tu cájecūhun ni rō jeē táca yó jeē ní jendute yó siquī jeē ni quívi yó ndaha Cristo Jesús, suni ni jendute yó siquī jeē ni quívi yó chíji jnūhun jeē ni jíhí yō jíin yá? <sup>4</sup> Chi jeē ní jendute yó cúu nájñūhun ni quindūji yó jéē ni jíhí yō jíin yá. Te vijna te cuu caca yó jíin vida jeē jeē ni jēhe ya nuū yō, chi nájñūhun suni ni natecu yō jíin yá. Chi ni natecu yā ni sáha Tátá yā jíin poder jeē cujēhnu ndasí yá.

<sup>5</sup> Chi núu ni cundúú yó jíin yá siquī jnūhun jeē ni jíhí yō jíin yá, te suni súcuan cundúú yó jíin yá siquī jnūhun jeē ní natecu yō jíin yá. <sup>6</sup> Chi jíini yō jeē ní naa modo maá yó jeē ní jíca yó jíin íchi yátá, chi ni quívi yó núu jnūhun jeē ni jíhí yō jíin Cristo jíca cruz. Te súcuan ni naa modo yō jeē cúu yó mozo nuū cuēchi, nāvāha tuá cuajníñu yó núu táca jniñu jeē máni cuēchi cúu. <sup>7</sup> Chi ñayuu jeē jé ni cajihí, je ni quendacoo i chíji táca cuēchi. <sup>8</sup> Te núu je ni jíhí yō jíin Cristo, te cándíje yó jéē suni súcuan ni natecu yō jíin yá. <sup>9</sup> Chi jíini yō jeē ní natecu Cristo, te ma cúu cuiti ga yā, chi cuehyí jéhni yóhó, tuá na vé cúu sáha jíin yá. <sup>10</sup> Chi jeē ni jíhí yā, te ñin jínu-ni ni jíhí yā jeē siquí cuēchi ñayuu. Te jeē técu yā vijna, chi sáha ya jeē cuní Yaā Dios. <sup>11</sup> Te suni súcuan róhó jíjínahan ró, sáha ró cuenta jeē nájñūhun ni cajihí rō jeē ní quendacoo ró chíji cuēchi. Te cátecu rō nāvāha sáha ró jéē cuní Yaā Dios, chi ndúú rō jíin Jitoho yō Cristo Jesús.

<sup>12</sup> Núu súcuan te ma cuáha ga rō jnūhun quíhi ró chíji cuēchi jíin yíqui cúñu rō jeē cúu. Chi cuēchi ún stíhví ni rohó jéē na sáha ró táca jéē ndíyo néé ni rō. <sup>13</sup> Te ma cuáha ró máá ró cuajníñu ró núu cuēchi jeē cócuu ró jíin jniñu néé. Chi sa suhva cuáha ró máá ró nuū Yaā Dios, te sáha ró cuenta jeē nájñūhun je ni cajihí rō te ni canatecu rō nuū yā. Te cuáha ndíhi ró máá ró nuū yā jeē cuajníñu ró núu jniñu ndaā. <sup>14</sup> Chi tuá na poder cuēchi jeē cundeyí jíin ró, chi tuá cáyihí ró chíji ley jenahán, chi sa cáyihí ró chíji jnūhun jeē váha ni yā jíin ró.

*Jnūhun mozo jeē steén ndese quéndōo ñayuu cácadíje*

<sup>15</sup> ¿Ndesé sáha yó núu súcuan? ¿A caca ga yō jíin cuēchi siquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuiti. <sup>16</sup> Chi cájini rō jeē núu cuáha ró máá ró jeē cuatáhú ró sájniñu ró núu ñin tēe, núu súcuan te cácuu ró mozo nuū tēe ún, te cánuú cuandíje ró núu de. Te suni súcuan núu cuáha ró máá ró jeē sáha ró cuēchi, te mozo cuēchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. <sup>17</sup> Te na cútahú yō nuū Yaā Dios, chi vésú ni cacuu ró mozo nuū cuēchi, te vijna chi nde jíin ñin jíin ánuá rō ni cajetáhú ró nuū jnūhun ya jeē ni quívicoo ró núu. <sup>18</sup> Te vijna te je ni nduu libre rō jeē tuá cácuu ró mozo nuū cuēchi, te cájejniñu ró núu jniñu ndaā. <sup>19</sup> (Ni cahān rí ñin jnūhun ndese cúu siquī mozo ñin ñayví

yáha, chi tu cájecūhun yachī ni rō siquī jñūhun ya.) Núu súcuan te nájñūhun ni cajēhe rō máá rō nde saá jeē ní cajejñiñu rō núu táca jñiñu jñehén jñiñu néé, suni súcuan cuáha rō máá rō vijna jeē cuajñiñu rō núu jñiñu ndaā, návāha coo ndoo coo ii rō nuū Yaā Dios.

<sup>20</sup> Chi nde náa cácuu rō mozo nuū cuéchi, te tu ní cájeyñiñu rō núu jñiñu ndaā. <sup>21</sup> ¿Te na vé ni canihīn rō siquī cuéchi ni casáha rō un jéé cácuu rō vijna sáha? Tú cuiti, chi máá jéé jñahnú ndetū rō ní cáni sáha. <sup>22</sup> Te vijna te je ni canduu libre rō jeē tuá cácuu rō mozo nuū cuéchi, te cájeyñiñu rō núu Yaā Dios. Te suu sáha jeē quéndōo váha rō, chi cáhiyo ndoo cáhiyo ii rō nuū ya, te nde sandīhi te cotecu rō ní cáni. <sup>23</sup> Chi yāhu jeē nihín ñayuu siquī cuéchi cúu jeē jñahnú ndetū i. Te sa tahū jeē jēhe Yaā Dios cúu jeē cótecu yō ní cáni andiví, siquī jeē nduu yó jíin Jítoho yō Cristo Jesús.

*Jñūhun ñasihí jíin yū jeē steén ndese quéndōo ñayuu cácuandje*

## 7

<sup>1</sup> Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayiví yáha. <sup>2</sup> Te yáha cúu nájñūhun ññ nahan jeē ní quijnáhan, chi cáhán ley jeē yíhi ña ndaha yū ña maá-ni núu técu de. Te núu ni jíhi yū ña, te je ni quenda ña chíji ley jeē ní quijnáhan ña jíin de. <sup>3</sup> Núu súcuan te núu quijnáhan ña jíin inga tēe níni técu gā yū ña, te casíquí ndéé ña de. Te núu je ni jíhi yū ña, te je ni quenda ña chíji ley un. Te cuu quijnáhan ña jíin inga tēe, chi nastū jéé casíquí ndéé ña núu súcuan.

<sup>4</sup> Te suni súcuan róhó jíjñáhan rō, ñānī mánī, chi ndúú rō jíin Cristo. Chi nájñūhun ni cajihī rō jíin Cristo, te ni quendacoo rō chíji ley jenahán. Te vijna chí nájñūhun ni quijnáhan rō jíin inga, cúu jeē ní quivicoo rō ndaha Cristo, Yaā ni natecu mēhñu ndíyí, návāha cuu sáha rō jñiñu váha jeē cuní Yaā Dios. <sup>5</sup> Chi ná ni cajica yó jíin modo maá yó nde saá, te ley un ní sáha jeē ní ndíyo néé ni yō táca jéé cuní yiqui cúñu yō jéé sáha yó. Te yūcuan ní sáha jeē jñahnú ndetū yó nuú. <sup>6</sup> Te vijna te je ni quenda yó chíji ley jenahán, chi nájñūhun je ni jíhi yō jeē ma nihín gā poder siquī yō. Te súcuan te iyó libre yō jeē cuajñiñu yó núu Yaā Dios. Te jíca yó jíin modo jeé jéé cuní maá Espíritu, chí tuá yíhi yó chíji ley jeē ní tee Moisés jenahán.

*Siquī cuéchi jeē ñūhun ini anuá yō*

<sup>7</sup> ¿Ndeese cahān yō núu súcuan? ¿A ley ndíso cuéchi? Tú cuiti jeē súcuan. Te núu jeē tú ley yā, te ma cūni cuiti rī jeē iyó cuéchi rī. Chi ma cūni rī jeē cuéchi cúu jeē ndíyo ni rī ndajñiñu jñáhan rī núu tu ní cáhán ley jeē ma ndíyo ni yō. <sup>8</sup> Te súcuan ni nihín cuéchi modo cocuu jíin rí. Chi siquī jeē ndácu ley jñiñu jeē ma sáha yó cuéchi, te ni quejéé ndíyo ni rī sáha rī táca jéé néé. Te núu jeē tu ley, te suni tú na jñūhun stíví yó siquī ley nuú. <sup>9</sup> Chi ni iyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jecūhun ni rī jñiñu jeē ndácu ley, te ni jecūhun ni rī jeē iyó cuéchi rī, te ni nduu rī nájñūhun ndíyí. <sup>10</sup> Chi ni jíni rī jeē ley jeē sáha jeē cótecu anuá rī nuú, te tuú chí sa ni sáha jeē jñahnú ndetū rī nuú. <sup>11</sup> Chi jíin jéé ndácu ley un jñiñu, te ni nihín cuéchi modo cocuu jíin rí, te ni stahū ruhū. Chi jíin jéé ndácu ley jñiñu, te cuéchi ni sáha jeē ní quenda jñūhun jeē jñahnú ndetū rī.

<sup>12</sup> Núu súcuan te iyó ndáa maá ley, te táca jñiñu ndácu chí iyó ndoo iyó ndáa váha. <sup>13</sup> Núu súcuan te ley jeē iyó váha ún, ¿a suu sáha jeē jñahnú ndetū rī naún? Tú cuiti. Chi sa suhva máá cuéchi cúu jeē sáha jeē jñahnú ndetū rī, te



súcuan stúu cuēchi ndese íyó máá. Chi jíin jniñu váha jeē ndácu ley te ni natūu jniñu neé jéé cúu cuēchi.

<sup>14</sup> Chi jíiní yō jeē nuū maá Espíritu vēji ley. Te ruhū chi sa névāha ri ñn modo neé máá rí jeē ni squívi ruhū jejniñu cāha rí nuū cuéchi. <sup>15</sup> Chi tāca jéé sáha rí, tu jécūhun ni rí najehē cúu jeē sáha rí. Chi jniñu váha jeē cuní rí sáha rí, tu ndé níhín rí fuerza sáha rí, chi sa suhva sáha rí jniñu neé jéé tu cúvāha ni rí sáha rí. <sup>16</sup> Te náa sáha rí jniñu neé jéé tu cuní rí sáha rí, núu súcuan te nácuni rí jeē iyó ndáá ley. <sup>17</sup> Núu súcuan te nasūu rúhū cúu jeē sáha jniñu neé un, chi modo neé jéé ñúhun ini anuá rí cúu jeē sáha cuēchi. <sup>18</sup> Chi jíiní rí jeē modo maá rí jeē névāha rí ini anuá rí, tú cuiti na vé jeē váha íyó. Chi cuní rí sáha rí jniñu váha, te tu ndé níhín rí fuerza sáha rí. <sup>19</sup> Chi jniñu váha jeē cuní rí sáha rí, tu sáha rí. Te jniñu neé jéé tu cuní rí, sa yūcuan sáha rí. <sup>20</sup> Te náa sáha rí jniñu jeē tu cuní rí sáha rí, te nasūu rúhū cúu jeē sáha, chi modo neé jéé ñúhun ini anuá rí cúu jeē sáha.

<sup>21</sup> Núu súcuan te ni jini rí jeē súcuan cúu jíin rí: Vēsú cuní rí sáha rí jniñu váha, te sa máni modo neé cúu jeē ñúhun ini anuá rí. <sup>22</sup> Chi cúsñi ni rí jíin ley Yaā Dios nde jíin ini anuá rí. <sup>23</sup> Te ni nacuni rí jeē iyó inga modo neé máá rí jeē jesi nuū jeē cuní rí sáha rí jeē váha. Te cúu rí nájñūhun preso nuū cuéchi jeē jícu jíin rí.

<sup>24</sup> Nacā jeē ndahú gá cúu rí núu súcuan. ¿Ndé ñn jnama ruhū nuū modo neé máá rí jeē jícu jíin rí jeē jnahnú ndetū rí? <sup>25</sup> Na cútahū ndasí rí nuū Yaā Dios, chi máá yá cúu jeē jnáma ruhū nuū modo neé rí siquī jeē ni jíhí Jitoho rí Jesucristo jehē rí. Núu súcuan te vēsú cuní yō squícu yó ley Yaā Dios, te jeē jíin fuerza maá yó ma cúu, chi modo neé máá yó sáha jeē jejniñu cāha yó nuū cuéchi.

### *Siquī jeē jíca yó jíin modo cuní Espíritu Yaā Dios*

## 8

<sup>1</sup> Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chi tuá cájica i jíin modo neé máá i, chi sa suhva cájica i nájñūhun cuní maá Espíritu yā. <sup>2</sup> Chi modo jeē sáha Espíritu cúu jeē técu yō siquī jeē yñi yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yñi yó chíji cuēchi jeē jnahnú ndetū yō nuú. <sup>3</sup> Chi ni sáha Yaā Dios jeē quéndōo váha ñayuu jeē tu ní cúu quéndōo váha jíin ley Moisés, siquī jeē tú na fuerza i jíin modo maá i jeē squícu i ley un. Chi ni tají yá Sēhe ya ni quiji, te ni nduu ya nájñūhun ñayuu cáhīyo cuēchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíin modo neé máá i. <sup>4</sup> Súcuan ni cuu návāha cuu squícu yó táca jniñu ndaá jeē ndácu ley, chi tuá jíca yó jíin modo neé máá yó, chi jíca yó nájñūhun cuní maá Espíritu.

<sup>5</sup> Chi ñayuu jeē cájica jíin modo neé máá, chi máni ndíhví ni i siquī jeē cuní maá i. Te ñayuu jeē cájica nájñūhun cuní Espíritu, chi máni ndíhví ni i siquī jniñu cuní maá Espíritu. <sup>6</sup> Te jeē ndíhví ni yō siquī modo cuní maá yó sáha jeē jnahnú ndetū yō. Te jeē ndíhví ni yō siquī jniñu cuní maá Espíritu, sa suhva sáha jeē cotecu yō ní cáni te coo ndeyí coo sñi ni yō. <sup>7</sup> Chi ñayuu jeē ndíhví ni siquī modo neé cuní maá i, chí jíto uhū i Yaā Dios, chi tu cuní i cuatáhú i ley Yaā Dios, te ni ma cúu squícu i. <sup>8</sup> Jeē yūcuan, ñayuu jíca jíin modo cuní maá, tu cúu sáha i jeē cúsñi ni Yaā Dios jíin i.



<sup>9</sup> Te máá ró jijnáhan ró, chi tuá cájica ró jíin modo cuní máá ró, chi cájica ró nájnūhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. <sup>10</sup> Te núu ndéé Cristo ini rō, te vēsū ñn quivī te cuu yiqui cúñu rō jeē siquī cuēchi, te cotecu anuá rō siquī jeē ní ndahva Yaā Dios cuēchi rō. <sup>11</sup> Te núu ini rō jijnáhan ró ndéé Espíritu máá Yaā jeē ní nastécu Cristo Jesús mēhñu ndíyí, yūcuán na te máá yá suni sáha ya jeē natecu yiqui cúñu rō jeē cúu. Te sáha ya súcuan jeē jíin máá Espíritu yá jeē ndeé ini rō.

<sup>12</sup> Núu súcuan, hermano jijnáhan ró, ndéé jñíñu yó jéē caca ndaā yō, te nasūu jéē sáha yó modo neé cúní máá yó. <sup>13</sup> Chi núu caca ró jíin modo neé máá ró, te jnahnū ndetū rō. Te núu jíin fuerza máá Espíritu snāā rō tācá jñíñu cásáha ró jíin modo neé máá ró, te cotecu rō ní cání.

<sup>14</sup> Chi tāca ñayuu jeē cándiquñ modo jeē steén Espíritu Yaā Dios, máá i cácuu sēhe Yaā Dios. <sup>15</sup> Chi Espíritu jeē ní canihñ rō, tu ní sáha ya rohó jéē cuu ró nájnūhun mozo nuū yá jeē yūhú tucu ró núu yā, chi sa ní sáha ya jeē cúu yó sēhe ya. Te jeē yúcuan cúu jeē cahán jee yó: Tátá máá ná. <sup>16</sup> Te máá Espíritu steén yá ini anuá yō jeē cúu ndije yó sēhe Yaā Dios. <sup>17</sup> Te núu sēhe ya cácuu yó, te suni nihñ yō máá táhū jeē ní jéjnūhun ya, te ñn cáhnu-ni coo tahū yō jíin Cristo. Chi núu ndóho yó jíin yá vijna, suni cujéñu yó jíin yá andiví.

<sup>18</sup> Núu súcuan te sáha ri cuenta jeē tāca jñúndóho jeē ndóho yó vijna, lúli ndasí cúu nuū jñūhun jeē cujéñu luu yó jíin yá cucuée gá. <sup>19</sup> Chi ndihí jeē ní jécō, yōhyo cándētu jeē na sáha Yaā Dios jeē nduváha, quivī quénda ndijin jeē cujéñu sēhe Yaā Dios jijnáhan i. <sup>20</sup> Chi tāca jéē ní jécō, chi ní quiví chiji jñūhun jeē tu quéndō vāha. Te nasūu jéē ní castiví máá, chi ñayuu ní casáha cuēchi, te jeē yúcuan ní squéndō Yaā Dios súcuan. Te máni cándētu jeē ndúvāha. <sup>21</sup> Chi ñn quiví te tāca jéē ní jécō, chi quenda chiji jñūhun jeē tiví jíin jéē tehyú. Te nduluu ndasí nájnūhun coo tāca sēhe Yaā Dios, chi cácu nuū jñūhun jeē tu quéndō vāha. <sup>22</sup> Chi jíin yō jeē tāca jéē ní jécō, chi nde vijna te nájnūhun ñnuū-ni cándoho te cájitū ní jeē na ndúvāha ndihí. <sup>23</sup> Te nasūu máá-ni tāca jéē ní jécō cúu jeē ndóho, chi suni nde máá yó ndóho yó, vēsú je névāha yó Espíritu jeē cúu seña jeē ñn quiví te nihñ yō ndihí tahū yō. Chi yōhyo ndóho yó jñúndóho, te ndétu yó jéē náquihñ sēhe ya yohó te jnama ya yiqui cúñu yō jeē tuá ndoho yó jíin. <sup>24</sup> Chi ní jnama ya yohó síquī jeē ñūhun ní yō jeē súcuan coo. Te núu je ní sáha ya nájnūhun ñūhun ní yō, yūcuán na te tuá ñūhun ní yō jeē sáha ya súcuan jíin yó. Chi tuá ndétu yó te núu je ní cuu súcuan. <sup>25</sup> Te núu ná tu coto yó jéē sáha ya jeē ñūhun ní yō, yūcuán na te jíin paciencia ndétu yó jéē sáha ya.

<sup>26</sup> Te suni súcuan máá Espíritu chíndéé ñáhán yá yohó jéē tú na fuerza ini yō. Chi tu jíin yō cacān tahū yō nájnūhun canuú. Te máá Espíritu cahán ndahú yá jíin Yaā Dios jehē yó síquī tāca jéē jítu ndasí ní yō te tu níhín yō jñūhun ndese cacān tahū yō. <sup>27</sup> Te máá Yaā Dios jeē jító ndee anuá yō, chi jíin yá tāca jéē cuní máá Espíritu cahán yá jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájnūhun cúní Yaā Dios.

### *Vāha-ni cúndeyí yó síquī ndihí jeneé*

<sup>28</sup> Te jíin yō jeē tācá-ni jeē quiji nuū ñayuu maní jíin Yaā Dios, jeē váha chí jéē uhú, chí quéndō vāha ga i nuū yá, sáha ya jíin tāca jéē yúcuan. Chi cácuu i ñayuu jeē ní cana ya i ní quivícoo i ndaha ya síquī jeē súcuan ní tee ní yá nde jenahán. <sup>29</sup> Chi nde ná tu coo i te je jíin yá i, te je ní jeni ya i jeē ndoo ndaā

nduu ánuá i ndacu i máá Séhe ya, návaha na cúu Séhe ya ñani jéhnú nuū cuehē ñayuu cácuu ñani cá candíje. <sup>30</sup> Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē cujéhnú i.

<sup>31</sup> ¿Te ndese ga cahān yō siquī jnúhun jéhnú yáha núu súcuan? Chi núu íne Yaā Dios jíin yō, ¿te ndé ñn cuu cahān siquī yō? Tú ni ñn. <sup>32</sup> Chi máá yá tu ní jnáma ya Séhe ya jeē ma cúu yā, chí sa suhva ni jéhe ya Séhe ya ni jíhí yā jehē ndíhi yō. Te núu súcuan ni jéhe ya Séhe ya, te nagā ni cuu jeē ma cuáha ya táca gá jeē jíni ñúhún yō. <sup>33</sup> ¿Te ndé ñn cuu cahān cuēchi siquī ñayuu jeē ní nacāji Yaā Dios? Tú ni ñn. Chi máá yá ni ndahva yā cuēchi i. <sup>34</sup> ¿Te ndé ñn cuu ndenehen cuēchi siquī yō núu súcuan? Tú ni ñn. Chi máá Cristo cúu jeē ni jíhí yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnú ya, te cáhán ndahú yá jíin Yaā Dios jehē yō. <sup>35</sup> ¿Te ndé ñn cuu quenehen yóhó núu jnúhun cundáhú ní Cristo yohó? ¿A jnúndóho, chí táca jéé yí sáha, chí jéé cájito xeēn ñayuu yohó, chí jnámā, chí jéé cúmaní sahma, chí jnúhun yúhú, chí jéé cáhni i yóhó naún? Ni ñn táca jéé yáha. <sup>36</sup> Chi súcuan yósó núu tútu ñi jeē cácahān ñayuu cá candíje jíin Yaā Dios:

Jeē siquí maá ní te ndíhi-ni hora cá cuni i cahni i sáñá.

Te cásáha i jíin ná nájnúhun cásáha i jíin lanchi, quití cúu.

Achí tutu. <sup>37</sup> Te tuú chí vésú cándoho yó táca jéé yáha, te váha-ni cúndeyí yó siquí ndíhi-ni, sáha maá Yaā jeē ní cundáhú ni yohó. <sup>38</sup> Jeé yúcuu cúcáhnú ni rí jeē tú ni ñn cuu quenehen yóhó núu jnúhun cundáhú ní Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéé neé jéé cácujehnú jñí poder, ni jeé iyó vijna, ni jeé cóo, <sup>39</sup> ni jeé iyó núu súcún, ni jeé iyó núu cúnú, ni táca gá jeē ní jecóo, ma cúu cuítí quenehen yóhó núu Yaā Dios, jeé jíin Jítoho yō Cristo Jesús ni cundáhú ni yā yohó.

### *Siquí ndese ni nacāji ya yucún Israel*

## 9

<sup>1</sup> Te cáhán ndaā rí chí cúu rí tēe cándíje Cristo, te tu stáhú rí, te jíni rí ini anuá rí jeē cahān ndaā rí sáha Espíritu Santo. <sup>2</sup> Yóhoyo cúcuíhyá ni rí, te níni jnáhuhú ni anuá rí <sup>3</sup> jeē siquí táca jnáhan rí ñayuu nación hebreo, chí ñn-ni yucún rí jijnáhan rí. Chí jeē siquí máá i te cúu ni rí jeē núu na cúu te cujiyo rí nuū Cristo te jnahnú ndetú rí, návaha jíin yúcuu te cuu cácu ánuá maá i núu.

<sup>4</sup> Chí cácuu i yucún ñayuu Israel, te nde jenahán ni sáha Yaā Dios jeē cúu i séhe ya, te mēhñu vícō jeē ndíndéé ní condee yā jíin i sáá. Te jíin máá i ni sáha ya táca contrato, te ni jéhe ya ley yā nuū Moisés jeē cúu máá i, te ni steén yā ndese chíñúhún i ya ini templo, te nuū máá i ni jejnúhun ya cuehē jnúhun. <sup>5</sup> Te máá i cácuu yucún táca jíí yō jeē ní cacujéhnú, te suni yucún maá i ni cacu Cristo jeē ní nduu ya tēe. Te máá yá cúu Yaā Dios jeē jñí ndíhi-ni, te níí cáni cahān ñayuu jeē cujéhnú ya. Amén.

<sup>6</sup> Te nasūu jéé tu ní queé ndaā táca jnúhun jeē ni jéjnúhun Yaā Dios nuū ñayuu Israel. Chí ni queue ndaā nahín núu vésú jecu-ni i, chí tú ndíhi-ni yucún Israel cúu jeē cá candíje. <sup>7</sup> Chí nasúu ndíhi yucún Abraham cácuu ndíje séhe de jeē ni jéjnúhun ya. Chí ni cahān Yaā Dios jíin de: Nuū maá-ni séhe ró Isaac cúu nuū coo yucún rō jeē ni jéjnúhun rí nuū rō. <sup>8</sup> Te jnúhun yáha cúní cahān jeē ni ñn ñayuu tu cúu i séhe Yaā Dios siquí jeē ní cacu i ñn yucún jeē jéni ni i jeé váha ga cúu. Chí sa suhva máni yucún jeē ní jéjnúhun ya cúu ndíje yucún jeé chíhi ya

cuenta. <sup>9</sup> Chi yāha cūu jñuhun jeē ni jéjnūhun ya nuū Abraham: Máá tiempo jeē ní jeni ri te quiji ri, te cacu ñn sēhe yñ ñasihí ró Sara, achí yá.

<sup>10</sup> Te nasūu máá yāha-ni, chi suni Rebeca ni cacu uū sēhe yñ ña, te ñn-ni tátá ndindúu i, jeē ní cuu jíi yō Isaac. <sup>11-13</sup> Te nde ná tu cacu ndindúu i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajñiñu i nuū sūchi sándihí, achí yá. Chi suni sūcuan cáhán tutu i: Ni jito maní rī Jacob, te Esaú chi tuú, achí Yāa Dios. Te sūcuan jíni yō jeē máá Yāa Dios cuu nacāji ya ñayuu núu ndese tée ni máá yá, te nasūu síquī jniñu jeē sáha i, chi sa suhva síquī ndese cúní máá yá nacāji ya i.

<sup>14</sup> ¿Ndese cahān yō núu sūcuan? ¿A jéē tu íyó ndāā Yāa Dios jeē sáha ya sūcuan, chí nañn? Tú cuiti. <sup>15</sup> Chi nde jenahán ní cahān yā jíin Moisés: Ndé-ni cūu jeē cuní rī cundáhú ni rī, te cundáhú ni rī. Te ndé-ni cūu jeē cuní rī sáha ri jeē váha jíin, te sáha ri jíin, achí yá. <sup>16</sup> Núu sūcuan te nasūu síquī jeē cuní máá ñayuu, ni nasūu jéē nducú ndéyí máá i cūu, chí síquī ndese cúní máá yá cundáhú ni yā i. <sup>17</sup> Chi suni sūcuan yósó núu tútu i jeē ni cáhān yā jíin rey ñuu Egipto: Ni jeni ri rohó jéē cūu ró rey, návāha jíin rohó te stéén rī poder rī, te návāha cuitē núu síhví rí ní ñáyiví, achí yá. <sup>18</sup> Núu sūcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunihni ni, te sáha ya jeē cunihni ni.

<sup>19</sup> Te sanaa te cahān ñn ró jíin rí: Núu sūcuan cūu ¿te najehē cáhán gā yā jeē cuēchi sáha yó? Chi ma cūu casi yō nuū yā jeē ndese cúní máá yá sáha ya. Achi rō. <sup>20</sup> Te sa suhva cáhán rī jíin ró: Róhó, ¿ndé ñn cūu ró jéē jéni ni rō stió cuñí rō nuū Yāa Dios? ¿A cuu cahān quísi ñuhun jíin tée ni sáha: Najehē ni sáha ró rúhū sūcuan? achí. <sup>21</sup> Chi tēe sáha quísi, cuu sáha de ndese cúní máá de, chí ñn-ni ñuhun cuu sáha de ñn quísi fino te inga quísi corriente.

<sup>22</sup> ¿Te á tu jétáhú ró jeē suni sūcuan sáha Yāa Dios jíin ñayuu? Chi cúní yā steén yā ndese sáha ya juicio síquī ñayuu, te sūcuan te cuní i poder yā. Te vésú sūcuan te ni íyo paciencia ni yā jeē tu ní ndónda yachí yā síquī ñayuu jeē jnahnú ndetū. <sup>23</sup> Te sáha ya sūcuan návāha stéén yā ndese yōhoyo luu cújehnu ya síquī jniñu sáha ya jíin yóhó ñayuu cundáhú ni yā. Chi nde jenahán je ni sātuhva ya yohó jéē luu cújehnu yó jíin yá. <sup>24</sup> Chi ni cana ya yohó jéē candíje yó, te sava yó cūu ñayuu hebreo te sava yó cūu ñayuu táca gá nación. <sup>25</sup> Chi suni sūcuan ni cahān yā, yósó núu tútu Oseas:

Ñayuu jeē tu ní cūu ñayuu máá rí, vijna te cahān rī jeē cácuu i ñayuu máá rí.  
Te ñayuu jeē tu ní íyo maní rī jíin, vijna te cahān rī jeē cácuu i ñayuu jeē maní rī jíin.

<sup>26</sup> Te máá lugar nuū ni cáhān rī jeē násūu ñayuu rī cácuu i, suu yūcuan cáhān ñayuu jeē cácuu i sēhe Yāa Dios, Yāa técu níf cáni. Achí yá. <sup>27</sup> Te Isaías sa suhva ni cahān de jñuhun ñayuu Israel: Vésú ni cayá yucūn Israel nájnūhun ññí yumar, te jecu-ni i jnama ya. <sup>28</sup> Chi Jitoho yō Yāa Dios, yachí sínu ya jniñu jeē sándaā yā cuēchi ñayuu ñayiví. Achí tutu. <sup>29</sup> Chi nájnūhun ni cahān tucu Isaías:

Máá Yāa cūu Jitoho nuū táca ndajéhé andiví, núu tu ní jnáma ya jecu yucūn yō nuú,  
te je ni ndoho yó nájnūhun ñayuu ñuu Sodoma jíin ñuu Gomorra, jeē ní naa ndihi.  
Achí tutu.

*Jeē tu cájetáhú ñayuu hebreo jñuhun jnama ya i*

<sup>30</sup> ¿Ndese cahān yō nūu sūcuan? Suu jeē ñayuu tāca gá nación, vēsú tu ní cánducú i quendōo ndaā i nuū Yaā Dios, te ní ndahva yā cuēchi i. Chi siquī jeē ní candíje i jeē ní jíhī Cristo jehē i cúu jeē ní ndahva yā cuēchi i. <sup>31</sup> Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cūndeyí i quendōo ndaā i. <sup>32</sup> ¿Te najehē? Siquī jeē tu cánducú i jeē ndahva yā cuēchi i jeē candíje i jeē ní jíhī Cristo jehē i, chi sa jéni ní i jeē squícu máa i ley te quendōo ndaā i. Te jeē stívi i sūcuan cúu nájñūhun cácotúú i siquī máa yúu jeē cácachihí jehē, te suu cúu Cristo. <sup>33</sup> Chi sūcuan cáhán nuū tútu íi: Nde ñuu rī Sion sáha ri jeē cóne máa Yaā jeē cúu nájñūhun yuū jeē cácachihí i jehē i.

Te cúu ya nájñūhun toto jeē cotúú i sáha.

Te sa suhva ñayuu cáccandíje Yaā ún, chi jnama nahín yá i.

Achí Yaā Dios.

## 10

<sup>1</sup> Hermano jijnáhan ró, cúu ndasí ní rī te jícan tahu rī nuū Yaā Dios jehē ñayuu nación rī Israel, jeē na jnama ya i jijnáhan i. <sup>2</sup> Chi cáhán rī jeē vāha cásáha i jeē ndihví ní i cáchiñúhún i Yaā Dios. Te vēsú sūcuan te cáchiñúhún cáhá i. <sup>3</sup> Chi tu cájecūhun ní i ndese ndáhva Yaā Dios cuēchi ñayuu, te ndúcú i quendōo ndaā i máa-ni jeē squícu i ley. Te tu cájetáhú i máa modo jeē ndáhva Yaā Dios cuēchi i. <sup>4</sup> Chi siquī jeē ní sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ní sáha Cristo jehē i.

<sup>5</sup> Chi sūcuan ní tee Moisés jñūhun ñayuu jeē cánducú quendōo ndaā jíin ley: Nūu ññ ñayuu cuu squícu i tācá jniñū ndácu ley, te cotecu i núú, áchí. <sup>6</sup> Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ní rō jeē jíni ñúhún caa ró andívi nasnúu ró Cristo jeē ndahva yā cuēchi ró. <sup>7</sup> Ni ma cáni ní rō jeē jíni ñúhún cuun ró ndé nuū cūnú ndonehen ró Cristo mēhñū ndíyi, nájñūhun jeē tu ní nátecu yā. <sup>8</sup> ¿Te ndese cáhán jñūhun un nūu sūcuan? Yajni íyó jñūhun ya jíin ró, chí ñūhun iní yuhu ró jíin iní anuá ró, achí tutu. Te suu cúu jñūhun jeē na cándíje yó jéé jnama ya yohó. Te jñūhun yáha cúu jeē cánacani rī. <sup>9</sup> Chi nūu cahān rō jeē Jítoho rō cúu Jesús, te nūu candíje ró jíin iní jíin ánuá ró jeē ní natecu yā mēhñū ndíyi ní sáha Yaā Dios, yūcuán na te jnama ya rohó. <sup>10</sup> Chi jíin iní jíin ánuá yō cándíje yó jéé ní jíhí yā jehē yō, te sūcuan te ndáhva Yaā Dios cuēchi yó. Te jeē cahān yō jeē Jítoho yō cúu Jesucristo, te sūcuan te jnama ya yohó.

<sup>11</sup> Chi cáhán tutu íi: Tāca ñayuu jeē candíje i ya, chí jnama nahín yá i, áchí.

<sup>12</sup> Chi inuú-ni cúu ñayuu hebreo jíin táca gá ñayuu, chí máa yá cúu Jítoho nuū ndihí yó, te cuehē jeē vāha sáha ya jíin ñayuu cácahān ndahú jíin yá. <sup>13</sup> Chi sūcuan cáhán jñūhun ya: Ndihi ñayuu cácahān ndahú jíin máa Jítoho yō, chí jnama ya i, áchí. <sup>14</sup> ¿Te ndese cahān ndahú i jíin yá te nūu tu ní cándíje i jeē jnama ya i? ¿Te ndese candíje i te nūu tu ní jíni sōho i jñūhun ya? ¿Te ndese cuni sōho i te nūu tú na ñayuu nacani jñūhun nuū i? <sup>15</sup> ¿Te ndese nacani ñayuu jñūhun ya te nūu jeē tu tájí yá i quihín i? Chi nájñūhun cáhán tutu íi: Yōhyo luu jniñū cásáha ñayuu cájica jíin jñūhun ndeyí sñ ní jeē cánacani i jñūhun vāha ya, achí.

<sup>16</sup> Te nasúú ndihí i jétáhú nuū jnúhun jnama ya i. Chi ní cahān Isaiás nde jenahán: Tátā Yaā Dios, ¿ndé ñayuu ní candíje jñūhun jeē cánacani ná víi? áchí de. <sup>17</sup> Nūu sūcuan te nūu cuni nahín ñayuu te cuu candíje i. Te jñūhun cuni nahín i cúu jñūhun Cristo.

<sup>18</sup> Te cájñuhun rí: ¿A tu ní cájini sōho i jñuhun un núu súcuan? Tuú chi ni cajini sōho i, chí cáhán tutu ií:

Níí ñáyiví ní cajini sōho ñayuu jñuhun jeé ní canacani de.

Te nde nuū jicá gá tāca lado ní jinū jñuhun ún.

Achí tutu. <sup>19</sup> Te suni cájñuhun rí: ¿A tu ní cájecūhun ní ñayuu Israel jñuhun ún? Tuú chí ni cajecūhun ní i, te tu ní cájjetáhú i. Chí xīhna gā Moisés ní cachí de jeé ní cáhān Yaā Dios:

Cucuñí ró jijnáhan ró, chí cuāha ri jñuhun ri nuū inga ñayuu jeé násūú ñn nación cúu.

Te quití ní rō coto ró jéé cuāha ri jñuhun ri nuū ñn nación jeé tu jécūhun ní.

<sup>20</sup> Te suni Isaías ní chundeyí ní de ní cachí cájí de jeé ní cáhān Yaā Dios:

Ñayuu jeé tu ní cánanducú ruhū, ní cajini i ruhū.

Te nuū ñayuu jeé tu ní cájajñuhún, ní steén rí nuū i ndese Yaā cúu rí.

<sup>21</sup> Te siquī ñayuu Israel sa ní cáhān de jeé ní cáhān yā: Ndiqúiví ní cana rí i jeé quávicoo i nuū rí, te tu ní cécuni i, chí ñayuu ñihni ní, ñayuu jéé ní cácuu i. Achí yá, achí Isaías.

*Jeé iyó jecu na ñayuu Israel jeé jnáma ya*

## 11

<sup>1</sup> Núu súcuan te cájñuhun rí: ¿A ní stóo Yaā Dios ñayuu maá yá Israel, chí naún? Tú cuiti. Chí ruhū suni tēe Israel cúu rí, te yucūn Abraham cúu rí, te Benjamín cúu jíí rí jenahán. <sup>2</sup> Tu ní stóo Yaā Dios ñayuu maá yá, chí je ní nacáji ya i nde jenahán. ¿A tu cájini rō ndese cáhán tutu ií jñuhun Elías, tēe ní nacani jñuhun ya jenahán? Chí náa jícan tahu de, te ní cáhān de siquī ñayuu Israel:

<sup>3</sup> Tātā Yaā Dios, ní cajehni i tāca tēe cánacani jñuhun ní, te ní cajenu i tācá altar ní. Te máñuhún na saña ní quendōo, te vijna suni cécuni i cahni i saña, áchí de. <sup>4</sup> Te Yaā Dios ní nastíó cuñí yā: Iyó nahín úxā mil ñayuu cécandíje ruhū jeé tu ní cájecuiñí yití i nuū ídolo naní Baal, achí yá. <sup>5</sup> Te suni súcuan vijna, chí iyó jecu na ñayuu jeé ní nacáji ya siquī jeé váha ní yā jíin i. <sup>6</sup> Te núu ní nacáji ya i siquī jeé váha ní yā jíin i, te nasūu siquī jeé ní sáha i jniñu váha cúu. Chí núu siquī jeé ní sáha i jniñu váha cúu, yūcuán na te nasūu siquī jeé váha ní yá cúu.

<sup>7</sup> ¿Te ndese cúu núu súcuan? Cúu jeé ñayuu Israel tu ní cūndeyí i quendōo ndaā i nájnūhun ní canducú i. Te sava i jeé ní nacáji ya, chí máá i ní ndahva yā cuēchi i. Te sava ga i ní ndunihni ní i, <sup>8</sup> nájnūhun cáhán tutu ií: Ní sáha Yaā Dios jeé tu jécūhun cuiti ní i siquī yā, ní tu jíin i jíin tñūú i, ní tu jíni nahín i jñuhun ya, te súcuan cúu nde vijna. Achí tutu. <sup>9</sup> Te suni ní cáhān David:

Vico jeé casáha i, na cóo nájnūhun ñn trampa chí ñn xeyū, náváha ñihni i castigo xeén siquī jeé castíví i cásáha i cuēchi.

<sup>10</sup> Te ánuá i na ndúnee, nájnūhun jeé tuá cúu coto i,

te na jécostíhí jñūndóho siquī i níí cáni.

Achí tutu.

*Siquī jeé jnáma ya ñayuu tāca gá nación*

<sup>11</sup> Núu súcuan te cájñuhun rí: ¿A tuá cúu cuiti ndívi ñayuu Israel nuū Yaā Dios jeé súcuan ní castíví i? Tú cuiti. Chí sa suhva jeé ní cacunihni ní i, te sa ñayuu tāca gá nación ní canihñ tahu máá i jñuhun jeé jnáma ya i. Te yūcuan sáha tucu jeé ñayuu Israel condihví ní i jeé suni candíje máá i. <sup>12</sup> Chí jeé ní castíví i, te sa ñayuu ñí cáhnu ñáyiví ní canihñ maá i jñuhun ya. Te jeé ní cajica yátá i, suu ní sáha jeé ní canihñ ñayuu tācá nación jñuhun ya. Núu súcuan te quíiví jeé

ndávicoo tucu ndihi ñayuu Israel ndaha ya, te ñayuu ñayīvi víhyá gā quendōo ndetū i sáha ún.

<sup>13</sup> Te vijna te cáhán rī jín róhó ñayuu táca nación jeē tu ní jín jnūhun ya. Chi ni tají Yaā Dios ruhū jeē scáca ri jnūhun nuū rohó ñayuu táca nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya. <sup>14</sup> Chi cúní ri jeē jín yúcuan te nacani ní sava jnáhan ri ñayuu Israel jeē suni candíje máá i, te jnama ya i. <sup>15</sup> Chi jeē ní stóo ya ñayuu Israel, jeē yúcuan cúu jeē sa ñayuu ñayīvi ní sáha ya jeē ndávicoo i nuū jnūhun maní yā jín i. Núu súcuan te quiví naquihin tucu ya ñayuu Israel, quiví ún suni vāha ndasí sáha ya jín ñayuu ní cáhnu ñayīvi. Chi coo nájnūhun jeē natecu i jeē cúu i nájnūhun ndiyi. <sup>16</sup> Te ñayuu Israel cásocó i nuū Yaā Dios pan jeē quénda xihna gā nuū ñujen, te súcuan stéen i jeē ndihi un cúu cuenta yā. Te ñin yujnu, núu yíhi jeē cuenta yā cúu, te suu cúu nde yoho jín ndé ndihi ndaha. Te suni súcuan ñayuu Israel, yíhi cuenta i nuū yā, siquī jeē jí i xihna ñúhún, ni quávicoo de ndaha ya.

<sup>17</sup> Chi ñayuu Israel cácuu i nájnūhun ndayújnu olivo vāha, te sava ndaha un ní quendē. Te róhó ñayuu táca nación jeē tu ní jín jnūhun ya, cácuu ró nájnūhun ndayújnu olivo yucú, te ní nachuhun ya rohó núu ní quendē ñayuu cácuu ndayújnu vāha ún. Te nájnūhun inuú-ni cástaa ró ndúxi jín cajin jeē véji nde yoho yújnu ún. <sup>18</sup> Núu súcuan te ma sáha téyí ró maá ró nuū ñayuu Israel jeē cácuu nájnūhun ndayújnu jeē ní quendē. Ma cutéyí ró, chi nucūhun ní ró jeē násūú jéē yoho stáa cajin nuū maá ró, chi sa máá ró stáa cajin jeē véji nde yoho.

<sup>19</sup> Te sanaa te cahān rō: Tú chi sava ndaha ni quendē návāha nachuhun ya ruhū nuū ní quendē ún, achi rō. <sup>20</sup> Ndaā, te ní quendē i siquī jeē tu ní cácandíje i Cristo. Te róhó chi máni siquī jeē cácandíje ró, jeē yúcuan cúu jeē ní quávicoo ró lugar i. Te ma sándúxi ró maá ró núu súcuan, chi sa suhva conso Iyo ró núu Yaā Dios. <sup>21</sup> Chi tu ní ñe cáhnu ní yā nuū maá ndaha jeē chíjniñu, te suni súcuan ma cóne cáhnu ní yā nuū rō jijnáhan ró te núu stívi ró. <sup>22</sup> Núu súcuan te sáha vāha ro cuenta ndese vāha ní Yaā Dios jín ndese xeēn ní yā. Chi ní nduxeēn ní yā jín ñayuu hebreo jeē ní castívi ún, te sa cundáhú ní yā rohó. Te cánuú cuiñi níhin ro jín jnūhun jeē vāha ní yā jín ró. Chi núu tuú, te suni quende yā rohó. <sup>23</sup> Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. <sup>24</sup> Núu súcuan te róhó ñayuu táca nación jeē tu ní jín jnūhun ya, ní quendē rō xiní yújnu olivo yucú, te ní nachuhun ya rohó xiní yujnu olivo vāha, vésú nasūú ndaha máá yujnu un cácuu ró. Te nagā ní cuu ñayuu hebreo jeē ma náchuhun ya i nuū ní quendē i, chi cácuu i máá ndayújnu vāha ún.

### *Īn quiví te jnama ya ndihi ñayuu nación Israel*

<sup>25</sup> Hermano, cúní rí jeē na jécūhun ní rō jijnáhan ró ndese íyó jnūhun yáha jéē ní yisáhi, návāha ma cutéyí ró cani ní ró jeē ndichí xiní maá ró: Chi sava ñayuu Israel ní nduníhni ní i, te súcuan coo máá-ni nde quiví jínu candíje ñayuu táca nación jeē tu ní jín jnūhun ya. <sup>26</sup> Te sáa te jnama ya ndihi ñayuu nación Israel, chí cáhán tutu ī:

Ichí ñuu rī Sión quiji Yaā jnáma ñayuu,  
te sáha ya jeē tuá coo cuēchi nuū tāca yúcūn Jacob.

<sup>27</sup> Te yāha cúu contrato jeē sándaā rī jín i,  
quiví jeē quénde ri cuēchi i jijnáhan i, áchí Yaā Dios.  
Achí tutu.

<sup>28</sup> Chi ñayuu hebreo un ní nduu i nájñuhun enemigo Yaā Dios siquī jeē tu ní cácañdije i jñuhun jnáma ya i. Te jeē yúcuau te cuu cuitē núu jñuhun un núu táca róhó. Te vésú súcuau te siquī jeē ní nacāji ya táca jíi i jenhán, te cúndáhú gá ni yā i jeē ma stóo ya i nñ cáni. <sup>29</sup> Chi tu nácani yátá ni yā jeē cána ya ñayuu jíin jéē jéhe ya tahū i. <sup>30</sup> Te róhó jíjnáhan ró, suni ní cahīyo nihni ní rō nuū Yaā Dios nde saā. Te vijna jeē ní cacunihni ní maā ñayuu hebreo, te cúndáhú ní yā rohó. <sup>31</sup> Te suni súcuau maā i, chí vésú cácuñihni ní i vijna, te cundáhú tucu ni yā i, nájñuhun cúndáhú ní yā maā ró jíjnáhan ró. <sup>32</sup> Chí Yaā Dios ni sáha ya jeē ní quendōo ndivii ñayuu chíji jñuhun cúñihni ní i, návaha suni cuu cundáhú ní yā ndivii i.

<sup>33</sup> Núu súcuau te nánhán náā ni yō jeē yóhoyo cuehē jñuhun ndíchí iyó jíin Yaā Dios, te ndihí cuiti jini yā. Te ni ma cúu cuiti castūhun yó ndese téē ni yā sáha ya táca-ni, te ma cánda cuiti yō jecūhun ni yō ndese cúu táca jéē sáha maā yá. <sup>34</sup> Chí cáhán tutu iñ: ¿Ndé iñ ni jecūhun ni ndese jéni ní maā Jítoho yō? ¿Chí ndé iñ ni steén nuū yā? <sup>35</sup> ¿Ndé iñ ni jéhe xīhna gā nuū maā yá, návaha nachunaa yā nuū i? <sup>36</sup> Chí nde nuū maā yá vēji táca jéē iyó, te maā yá ni sáha ndihí, te jeē cúu maā yá cúu. Te na cáhán yō jeē yóhoyo luu cújéñnu Yaā Dios nñ cáni. Amén.

*Jeē na cóo ndoo ánuá yō cuajñiñu yó núu Yaā Dios*

## 12

<sup>1</sup> Núu súcuau te cáhán ndahú rí jíin ró jíjnáhan ró, hermano, jeē siquī jeē cúndáhú ní Yaā Dios yohó. Na sócō rō maā ró núu yā, coo ndoo coo iñ rō cuajñiñu ró núu yā, nájñuhun cúñiñu ní yā. Chí yāha cúu jeē chíñúhún ró yā nde jíin ini jíin ánuá ró. <sup>2</sup> Te ma cáca ró jíin táca modo casáha ñayuu ñayiví yáha, chí sa na sáma ró modo cani ní rō, te ndujeé jéē níjnūni rō. Te súcuau te cuu nacāji ró ndé-ni cúu jeē váha jeē núnjahan ní Yaā Dios, jeē cúñiñu ní yā, jíin jéē íje ni ró jíin jñuhun ya.

<sup>3</sup> Te siquī jeē váha ni yā ni jéhe ya jniñu nácani ri jñuhun ya, jeē yúcuau cáhán rí jíin ndihí ró jéē ma cáni ní rō jeē váha ga ñayuu cúu ró núu cūhva jeē iyó ró. Chí ná iñ ná iñ ró na cáni ndaā ní rō siquī maā ró, te ma scáa ga rō cani ní rō jeē váha ga ñayuu cúu ró vésú nuū cūhva jeē ni jéhe Yaā Dios fuerza ini rō cándije ró. <sup>4</sup> Chí cácuu yó nájñuhun iñ yiqui cúñu jeē iyó cuehē parte, te sñ sñ jéjñiñu iñ iñ. <sup>5</sup> Chí vésú iyó cuehē yō, te nájñuhun iñ-ni yiqui cúñu cúu yó jéē yíhi yó ndaha Cristo, chí iñ-ni ní nduu yó jíjnáhan yó.

<sup>6</sup> Te sñ sñ tahū ni jéhe Yaā Dios nuū yō jeē cuajñiñu yó núu yā, núu ndese ní núnjahan ni yā ni jéhe ya nuū iñ iñ yó. Núu súcuau te na cuajñiñu váha yó jíin táhū ún. Núu ní nihñ yō tahū jeē nácani yó jñuhun ya, te cánuú sáha yó ndé maā cūhva ni jéhe ya cándije yó. <sup>7</sup> Te núu ní nihñ yō tahū jeē chindéé ñáhán yó jñáhan yó, te na sáha yúcuñ yó. Te núu ní nihñ yō tahū jeē steén yō, te na cóndihvī ní yō steén yō. <sup>8</sup> Te ñayuu jeē stihví ní inga ñayuu, suni na sáha yúcuñ i. Te ñayuu jéhe nuū jñáhan, na cuáha i súcuau-ni. Te ñayuu ndíso jniñu, na ndácu váha i jniñu. Te ñayuu jíto ndáhú ñayuu ndahú, na cúñiñu ní i sáha i.

*Ndese cánuú squícu ñayuu cácañdije*

<sup>9</sup> Te na cúndáhú ndije ní rō jñáhan ró, nasūu maā jéē cahán-ni ró. Te coto uhū ró jniñu néé, te condiquín rō jniñu váha. <sup>10</sup> Te cánuú coo maní rō jíin jñáhan ró nájñuhun jéē maní rō jíin ñani rō. Te nducú ró jeē quendōo yíñúhún gá jñáhan ró vésú maā ró.



11 Te ma cucúxi ró jíin jniñu cásáha ró. Chi jíin ini jíin ánuá rō condihvī ni rō cuajniñu ró núu maá Jítoho yō.

12 Te na cúsī ni rō jeē cáñuhun ni rō táca jēē váha jeē cóo. Te na cuándeýi ni rō núu ndóho ró jnūndóho. Te níni na cácan tahú rō.

13 Te coto ndáhú ró ñayuu cácanđje núu cúmanī nuū i. Te cuāha núu ró vehe nuū ñáyuu cájica.

14 Te cacān tahú rō jehē ñayuu cájito xeēn rohó. Ma cahán ndevāha ró síquī i, chí sa cacān tahú rō jehē i.

15 Te núu cúsī ni ñayuu, te suni na cúsī ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

16 Na cóo inuú ni rō jíin táca jnáhan ró. Te ma cundúxi ró, chí sa quijnáhan ró jíin ñáyuu núu ga. Ma cáni ni rō jeē ndichí xínī rō.

17 Te ma nasáha ndevāha ró jíin ni ñin ñayuu, núu ni sáha ndevāha i jíin ró. Na cóndihvī ni rō sáha ró jniñu váha, jito jínúu táca ñayuu. 18 Te na cóndihvī ni rō coyūcu mánī rō jíin táca ñayuu, vésú ndese cándāa máa i. 19 Ñāni mánī jijnáhan ró, ma nácuāha ró jēē ndútahū ñayuu casáha ndevāha jíin ró, chí sa cuāha ró jnūhun jeē maá Yaā Dios cuāha ya castigo i. Chí cáhan tutu īi: Máa rí cuāha castigo i, máa rí nacuāha yāhu i, áchí Jítoho yō. 20 Te suni cáhan tutu: Tee jito uhū rohó, núu jí de sóco, te cuāha ró jēē cáji de. Te núu jíchí de, te cuāha ró jēē cóho de. Chí núu sáha ró súcuan, te cucanu de te nacani uhū ni de jeē ni jito uhū de rohó. 21 Ma cuāha ró jnūhun jeē cúndeýi jniñu néé jíin ró, chí sa jniñu váha na sáha ró návāha ndahvā jniñu néé.

## 13

1 Táca ñayuu na cuátáhú i nuū tohō cándiso jniñu ñuu. Chí ma cóo tēe cándiso jniñu te núu tu ní sáha máa Yaā Dios. Te tēe cándiso jniñu chí Yaā Dios ni tee jniñu síquī de. 2 Te ñayuu jeē tu jétáhú núu tēe cándiso jniñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chí cuēchi sáha i, te nihni i castigo. 3 Chí táca tēe ndiso jniñu, nasūu jēē ndiso jniñu de jeē yūhú ñayuu casáha jniñu váha, chí sa jeē yūhú ñayuu casáha jniñu néé. Te núu cúní rō jeē ma cúxeēn tēe cándiso jniñu nuū rō, na sáha ró jniñu váha núu súcuan. Yūcuān na te cuajnúhún de rohó. 4 Chí jéjniñu Yaā Dios de jíjnáhan de, návāha coyūcu váha ró jíjnáhan ró. Te núu sáha ró jniñu néé, te sa yūhu ró, chí nasūu cáha-ni cúu jeē cándiso jniñu de stóho de ñayuu. Chí jéjniñu Yaā Dios de, návāha cuāha de castigo ñayuu casáha jniñu néé. 5 Jeē yūcuan cánuú jēē cuátáhú ró núu tēe cándiso jniñu, te nasūu mánī jeē ma níhín rō castigo, chí suni jeē tú na cuēchi coo ánuá rō. 6 Te jeē yūcuan cúu jeē suni cájēhe ró xúhun núu tēe cándiso jniñu cuu jniñu ñuu. Chí jéjniñu Yaā Dios de, te mánī jniñu yūcuan casáha de.

7 Te chunaa rō ndihi jeē cátaū rō nuū táca ñayuu. Cuāha ró xúhun ñuu nuū tēe stútú xúhun ñuu, te cuāha ró xúhun renta núu tēe stútú renta. Te na cóo respeto rō nuū ñayuu cánuú coo respeto rō. Te na cóo yíñúhún ró nuū ñayuu cánuú coo yíñúhún ró. 8 Ma cótaū rō nuū ní ñin. Te iyó ñin jeē taū rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chí ñayuu cundáhú ni jnáhan, je ni síquī i ndihi jeē ndácu ley yā. 9 Chí súcuan ndácu ley jniñu: Ma cosíquí ndéé rō jnáhan ró, ma cáhni rō ndiyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te táca jnūhun yáha jíin táca gá jniñu ndácu ley, ndihi-ni yíhi chíji jnūhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. 10 Te núu cundáhú ni yō jnáhan



yó, te tu sáha yó ni ñin jeē tu íyó váha nuū i. Núu súcuan te jeē cundáhú ni yó jnáhan yó, yūcuan cúu jeē squícu yó ní ley yā.

<sup>11</sup> Súcuan sáha ró jínáhan ró, chí sáha ró cuenta jeē cuácuyajni quiví ndíji ya. Te ma cóo ga rō nájñuhun ñayuu quixí, jeē cúhuun ni rō. Chí vijná je ni cuyajni ga quiví jnáma ya yohó vésú quiví ní candíje yó jnúhun ya. <sup>12</sup> Chí nájñuhun je yajni yáha jecuáa, te cuacundíjin quiví jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jín táca jniñu ndaa jeē caca yó jín luz yā. <sup>13</sup> Na cáca yíñuhún yó nájñuhun cánuú caca yó jín luz yā. Ma nájñi ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. <sup>14</sup> Chí sa suhva cuiñi cutú ró jín fuerza maá Jítoho yó Jesucristo, jeē ma cuáha ga rō jnúhun sáha ró jniñu cúní modo neé máa ró.

*Ma cahán neé yó coto yó jnáhan yó*

## 14

<sup>1</sup> Cuatáhú ró ñayuu jeē ná tu ije jín jnúhun ya, te ma tejnáhan ró jín i siquí táca jnúhun jeē sñin jéni ni i jín máa ró. <sup>2</sup> Chí íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jín jnúhun ya, te cájeni ni i jeē tú váha caji i cūñu, chí jeē ní casocó ñayuu nuū ídolo cúu. <sup>3</sup> Te róhó téé jeē yéji ndinuū-ni, ma cahán ró coto ró téé jeē tu yéji ndinuū. Te róhó téé jeē tu yéji ndinuū, ma cahán ró coto ró téé jeē yéji ndinuū. Chí Yaā Dios ni jetáhú yá téé ún. <sup>4</sup> Te róhó, ¿ndé ñin cúu ró jéé cahán neé ró jito ró mozo Yaā Dios? Chí núu váha chí neé sáha de, te máa yá cúu jeē sándaá jín de, nasūu máa ró. Te tuú chí cuiñi váha de, chí mozo maá Jítoho yó cúu de, te cuu sáha ya jeē ma stívi de.

<sup>5</sup> Te suni íyó ñayuu jeē jéni ni jeē íi gā ñin quiví vésú inga quiví. Te inga ñayuu chí jéni ni i jeē ñinuū-ni cúu táca quiví. Te táca i na cúndaá váha ni maá i siquí jeē jéni ni i. <sup>6</sup> Chí téé jeē néé íi quiví, chíñuhún de máa Jítoho yó jeē sáha de súcuan. Te téé jeē tu néé íi quiví, suni chíñuhún de Jítoho yó jeē sáha de súcuan. Te téé jeē yéji ndinuū-ni, chíñuhún de máa Jítoho yó jeē sáha de súcuan, chí nácuatáhú de nuū Yaā Dios. Te téé jeē tu yéji ndinuū, suni chíñuhún de Jítoho yó jeē sáha de súcuan, te suni nácuatáhú de nuū yā.

<sup>7</sup> Chí ni ñin yó tu técu yó jeē váha máa-ni yó, te ni ñin yó tu jíhi yó jeē cuní máa yó. <sup>8</sup> Chí núu técu yó, te técu yó jeē cuajniñu yó núu maá Jítoho yó. Te núu cuu yó, te suni cuu yó siquí jeē cuní máa Jítoho yó. Núu súcuan te núu jeē cótecu yó chí jéé cuu yó, te yñi yó ndaha Jítoho yó. <sup>9</sup> Chí ni jíhi Cristo te ni natecu yā, návaha cuu ya Jítoho nuū ñayuu ni jíhi jín ñayuu técu.

<sup>10</sup> Te róhó, ¿naun jéni néé ni rō jito ró jnáhan ró núu súcuan? ¿Te naun cújéé ni rō jito ró de? Chí táca yó cuiñi yó yuhu mesa Cristo jeē sándaá yā jniñu yó.

<sup>11</sup> Chí suhva yósó núu tútu íi:

Jendaá ndíje chí nuū maá rí cuiñi yítí táca ñayuu,

te ndíhi i cahán jeē maá rí cúu Yaā Dios, áchí máa Jítoho yó.

<sup>12</sup> Núu súcuan te ná ñin ná ñin yó nacúaha yo cuenta nuū Yaā Dios ndese jniñu ni casáha yó.

*Ma sáha yó jéé quiví jnáhan yó cuéchi*

<sup>13</sup> Te jeē yúcuan ma cahán neé gá yó coto yó jnáhan yó. Chí sa tee ni rō jeē ma sáha ró ni ñin jniñu jeē sáha jeē stívi jnáhan ró te quiví i cuéchi. <sup>14</sup> Te jíní rí jeē ni ñin jeē ni sáha Yaā Dios, tu stívi ánuá yó. Chí súcuan ni cucáhnu váha ni rí siquí jeē candíje rí Jítoho yó Jesús. Te núu ñin ñayuu jéni ni i jeē íyó jéé stívi

ánuá i, yūcuán na te súcuan sáha un jíin máá i. <sup>15</sup> Te núu jnáhan ró tu cúvaha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snáá rō anuá jnáhan rō síquī jeē yéji rō ñin jeē jéni ni de jeē cuēchi cúu. Chi suni jehē maá de ni jihī Cristo. <sup>16</sup> Ma sáha ró jniñu jeē cahan i síquī, vēsú jíni máá ró jeē iyó váha. <sup>17</sup> Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva síquī jeē na sáha yó jniñu ndaa, te coyūcu máni yō jíin jnáhan yó, te cusī ni yō sáha Espíritu Santo. <sup>18</sup> Te ñayuu jeē súcuan jéjñiñu nuū Cristo, chi cúsī ni Yaā Dios jíin i, te suni cájejnúhún ñayuu i.

<sup>19</sup> Núu súcuan te na cóndihvi ni yō coyūcu máni yō, návaha jíin yúcuan chindéé ñájñahan yó ije yó jíin jnúhun ya. <sup>20</sup> Te ma cuáha ró jnúhun jeē ndeyu yéji rō snáá jniñu ni sáha Yaā Dios jíin jnáhan ró. Chi iyó ndoo ndije ndihī jeē yéji yō, te vēsú súcuan te tú váha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuēchi cúu. <sup>21</sup> Vaha ga ma cáji rō cūñu, ni ma cóho ró vino, te ni ñin ma sáha ró jéē stívi ánuá jnáhan ró, te quīvi de cuēchi, te caca yátá de nuū jnúhun cándije de. <sup>22</sup> Te núu cándije ró jéē tú na vé sáha jeē yéji rō, te súcuan na cándije máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. <sup>23</sup> Te tēe yéji ñin jeē jéni ni de sanaa te stívi ánuá de, núu súcuan te sáha de cuēchi, chi tu cándije de jeē iyó váha jeē yéji de. Chi táca jéē sáha yó, núu tu cándije yó jéē iyó váha, te cuēchi cúu.

### *Jeē na sáha yó jéē cúsī ni jnáhan yó*

## 15

<sup>1</sup> Te yóhó jéē ni ije yó jíin jnúhun ya, cánuú condito yó ñayuu jeē ná tu ije jíin jnúhun ya, návaha cándije váha i. Te ma sáha yó jéē maá-ni yó cusī ni. <sup>2</sup> Chi ná ñin ná ñin yó na sáha yó jéē cúsī ni jnáhan yó, návaha quendōo váha i te ije i jíin jnúhun cándije i. <sup>3</sup> Chi ni Cristo, tu ní sáha ya jeē cúsī ni maá yá, chi sa suhva jeē cúsī ni Tatá yā. Chi suhva cahan tutu iī: Táca jnúhun ndeváha jeē cácahān ndeváha ñayuu síquī ní, ni ndīvi síquī maá ná, áchí Cristo jíin Tatá yā. <sup>4</sup> Chi táca jnúhun jeē ni jecosō nuū tútu iī nde jenahán, chi ni jecosō návaha stéén nuū yō, te nihīn yō jnúhun jeē sáha jeē cuandeyí ni yō te ndusī ni yō. Te súcuan te cocuhun ni yō táca jéē váha jeē cóo. <sup>5</sup> Te máá Yaā Dios jeē jéhe jnúhun cuandeyí ni jíin jnúhun ndúsī ni, na sáha ya jeē cóo inuú ni rō, nájñuhun cúní Cristo Jesús. <sup>6</sup> Te súcuan te ñin-ni coo ró te inuú-ni cuu cahān rō jeē yóhoyo váha Yaā cúu Yaā Dios, Tatá Jitoho yō Jesucristo.

### *Jeē ni jítē jnúhun váha ya nuū ñayuu táca nación*

<sup>7</sup> Núu súcuan te cuatáhú ró táca jnáhan ró, nájñuhun ni jetáhú Cristo yohó, návaha cuni ñayuu jeē luu cújéhu Yaā Dios. <sup>8</sup> Chi cahan rī jeē ní quiji Cristo Jesús, ni sáha ya táca jniñu jeē quendōo váha ñayuu hebreo, návaha cundaa táca jnúhun jeē ni jéjñuhun Yaā Dios nuū táca jíi i. Te súcuan ni steén Cristo jeē squícu Yaā Dios táca jéē ni jéjñuhun ya. <sup>9</sup> Te suni ni quiji ya návaha ñayuu táca nación jeē tu jíni jnúhun ya, cahan i jeē yóhoyo váha ni Yaā Dios jeē cundáhú ni yā i. Chi suhva cahan tutu iī:

Núu súcuan te cahān na jéē yóhoyo váha ni ní, cuni ñayuu táca nación, te cata ná yaa jeē chíñúhún ná nihín.

<sup>10</sup> Te cahan tucu tutu iī:

Róhó ñayuu táca nación, inuú na cúsī ni rō jíin ñayuu maá yá.

<sup>11</sup> Te cahan tucu:

Róhó ñáyyu tǎcǎ naci3n, na cǎhǎn r3 jeē y3h3y vǎha ni Jitoho y3 Yaā Dios, te róhó ñáyyu tǎcǎ-ni ñuu, suni na cǎhǎn r3 jeē y3h3y cújéhn3 ya.

<sup>12</sup> Te suni ni tee Isaías jnūhun yáha:

Nuū yúcūn Isaí quiji in jeē kujéhn3,  
te ndacu ya jniñu nuū ñáyyu tǎcǎ naci3n.

Te ñáyyu ún chi cocuhun ni i tǎca jéē sáha ya.

Achí tutu.

<sup>13</sup> Te máa Yaā Dios jeē sáha jeē cáñuhun ni y3 tǎca jéē váha jeē coo, na sáha ya jeē cóo sñ ndasí ni r3 jín jéē cóo ndeyí ni r3 siquí jeē cácan díje ñihin ró yá. Te súcuan te cocuhun teyí gǎ ni r3 tǎca jéē váha jeē coo, sáha poder maá Espíritu Santo.

<sup>14</sup> Nǎnǎ mǎnǎ, cúcǎhnu ni r3 jeē váha ndasí cándihvǎ ni r3 jín jniñu váha, te vǎha ndasí cájecūhun ni r3, te cúu stǎhvǎ jnǎhan ni r3. <sup>15</sup> Te ni jeni ni r3 jeē tee ri carta yáha cǎhǎn cají r3 jín ró jijnǎhan ró, nǎvǎha víhyǎ gǎ na cócuhun ni r3 tǎca jnūhun yáha. Chi súcuan sáha ri siquí jeē váha ni Yaā Dios te ni jeh3 ya jniñu nuū r3 <sup>16</sup> jeē jejniñu ri nuū Jesucristo, jeē nácani ri jnūhun nuū ñáyyu tǎcǎ naci3n jeē tu jín jnūhun ya. Te nácani ri jnūhun vǎha Yaā Dios nuū i jeē jnǎma ya i. Súcuan sáha ri nǎvǎha ñáyyu tǎcǎ naci3n, cuu squívi ri i ndaha ya jeē cúu i nájñuhun in jeē socó r3 nuū yá jeē cúsiñ ni yá jín. Chi ni sáha Espíritu Santo jeē iyó ndoo iyó íi i nuū yá.

<sup>17</sup> Núu súcuan te siquí jeē candíje ri Cristo Jesús, te cúsiñ ni r3 jeē jejniñu vǎha ri nuū Yaā Dios. <sup>18</sup> Chi ma cúu cǎhǎn r3 siquí jniñu cásáha inga tēe, chi máa-ni siquí ndese ni jejniñu Cristo ruhū jeē sáha ri jeē ñáyyu tǎcǎ naci3n tu ni jín jnūhun Yaā Dios, vijna jétáhú i nuū yá. Chi súcuan ni cuu jín jnūhun ni cǎhǎn r3 jín jniñu ni sáha ri. <sup>19</sup> Chi ni sáha ri jniñu jéhn3 ndíso poder jeē steén jeē kujéhn3 ya, te ni Iyo poder Espíritu Santo jín r3. Te súcuan ni nacani ndih3 ri jnūhun ndese jnǎma Cristo ñáyyu. Te ni nacani ri nde ñuu Jerusalén, jín ndih3 tǎcǎ ñuu, jín nde ní regióñ Ilírico. <sup>20</sup> Súcuan cúu jeē ní condihvǎ ni r3 ni nacani ri jnūhun jeē jnǎma ya ñáyyu. Te ni jehēn r3 nuū ñáyyu jeē ná tu cuni jnūhun Cristo, chí tu ní cúni r3 nacani ri nuū ñáyyu jeē jé ni jini i ni canacani inga tēe.

<sup>21</sup> Chi sa suhva ni sáha ri nájñuhun cǎhǎn tutu íi:

Tǎca ñáyyu jeē tu ní quíji jnūhun ya nuū i, vijna chi cuni i jnūhun ya,

te tǎca ñáyyu jeē tu ní jín cuíti jnūhun ya, vijna chí jecūhun ni i.

Achí tutu.

### *Jeē ñūhun ni Pablo jeē quihín de Roma*

<sup>22</sup> Te jeē yúcuan cúu jeē cuehē jínu ni kujnéñu ri, te tu ní cúu jecondēhe ri rohó jijnǎhan ró. <sup>23</sup> Te vijna chí ni ndih3 jniñu ri ní cǎhnu tǎcǎ regióñ ndañúu yáha. Te je ni cuu cuehē cuiyá jeē cuni r3 jeē r3 nuū r3. <sup>24</sup> Núu súcuan te ñūhun ni r3 jecondēhe ri rohó jijnǎhan ró núu na yáha ri quihín r3 España. Te ñūhun ni r3 jeē núu je ni cusíñ ni r3 jeē ní jito jnǎhan y3, yúcuán na te chindéé ñáhán ró ruhū jeē quihín gǎ r3. <sup>25</sup> Te xǎhna gǎ na quihín r3 ñuu Jerusalén quindēca ri xūhún cuu hermano cáyūcu yúcuan. <sup>26</sup> Chi ñáyyu Macedonia jín Ácaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. <sup>27</sup> Chi súcuan ni cacusiñ ni i ni casáha i. Te iyó váha jeē súcuan, chí máa i jeē cácuu i ñáyyu tǎca gǎ naci3n, táú i jeē sáha vǎha i nuū ñáyyu hebreo un. Chí ñáyyu hebreo ni casáha jeē ní quiji jnūhun Yaā Dios nuū i jeē quéndoo vǎha ánuá i sáha. Jeē yúcuan cánuú jéē chindéé ñáhán i ñáyyu hebreo cácan díje jín ndajniñu ñáyivi yáha. <sup>28</sup> Núu súcuan te jeē jínu jniñu yáha jéē quindēca ri xūhun yáha nuū i, yúcuán na te jecondēhe ri rohó jijnǎhan ró jéē yáha ri quihín

rī España. <sup>29</sup> Te jíni vāha ri jeē quivī jinū rī nuū rō, te vāha ndasí quendōo ró jée nacani ga rī jnūhun vāha Cristo nuū rō.

<sup>30</sup> Hermano jijnáhan ró, cáhán ndahú rí jíni ró jeē chindéé ñáhán ró ruhū cacān tahú ró jehé rī nuū Yaā Dios siquī jniñu ndúcú ndéyí rí. Súcuan sáha ró siquī jeē candíje yó Jítoho yō Jesucristo, jíni siquī jeē cundáhú ni yō jnáhan yó sáha máa Espírítu. <sup>31</sup> Te cacān tahú ró jeē na cácu rí nuū tée región Judea jeé tu cácandíje, jíni jée na cusíi ni táca hermano ñuu Jerusalén jeē quíndeca rí xūhun yáha cuu de. <sup>32</sup> Te súcuan te núu cúní Yaā Dios te jecondéhe rí rohó jijnáhan ró, te cusíi ni yō, te nanihín ni rí jeē condee rí jíni ró. <sup>33</sup> Te máa Yaā Dios jeē jehé jnūhun ndeyí sīi ni, na cóo ya jíni ró jijnáhan ró. Amén.

### *Jeē cahán Pablo jeē sándeýí ni i*

## 16

<sup>1</sup> Te vijna te cáhán rí jíni ró jijnáhan ró jée na chindéé ñáhán ró hermana Febe, chí cúu ña ñahan jéjníñu jeē siquī jnūhun ya nuū ñáyyu cácandíje ñuu Cencrea. <sup>2</sup> Te cuatáhú ró ña nájñūhun cúní máa Jítoho yō, chí súcuan cánuú sáha hermano cácandíje. Te chindéé ñáhán ró ña na-ni ve cúu jeé jíni ñuhún ña, chí súcuan ni chindéé ñáhán máa ña cuehē ñayuu, te suni nde ruhū.

<sup>3</sup> Cahān rō jíni Priscila jíni Aquila jeē sándeýí ni ndindúú de, áchí rí, chí cáchindéé ñájñáhan de jíni rí siquī jniñu Cristo Jesús. <sup>4</sup> Chí ná ni Iyo jnūndóho jeē cuu rí nuú, te ni cachundeyí ni de ni canducú de scácu de ruhū, vésú suni cuu maá de núu. Te nácuatáhú rí nuū ndindúú de, te nasūu máa-ni ruhū, chí suni táca grupo ñayuu cácandíje táca nación. <sup>5</sup> Te suni cahān rō jíni ñáyyu cácandíje ndútútu vehe de, sándeýí ni i, áchí rí. Te cahān rō jeē sándeýí ni Epeneto, tée maní rí jíni. Chí ñuu Acaya, máa de cúu jeē ní candíje xihna gā nuū Cristo. <sup>6</sup> Suni cahān rō jeē sándeýí ni María, ñahan jeē ní jéjníñu ndasí jeē siquī jnūhun ya mēhñu ró jijnáhan ró. <sup>7</sup> Te cahān rō jeē sándeýí ni Andrónico jíni Junias, tée cácuu jnáhan ñuu rí jeē ní cahíin jíni rí vecāa. Te táca apóstol chí cájéjnúhún de ndindúú tée jíñá, te xihna gā de ni cacandíje Cristo vésú máa rí.

<sup>8</sup> Cahān rō jeē sándeýí ni Amplias, tée maní rí jíni, chí cándíje de Jítoho yō. <sup>9</sup> Te cahān rō jeē sándeýí ni Urbano, tée chindéé ñájñáhan jíni yó siquī jniñu Cristo Jesús, te suni súcuan Estaquis, tée jeē maní rí jíni. <sup>10</sup> Suni cahān rō jeē sándeýí ni Apeles, tée jeē ni stéén jeē candíje vāha de Cristo, te suni súcuan cahān rō jíni ñáyyu vehe Aristóbulo. <sup>11</sup> Cahān rō jeē sándeýí ni Herodión, tée cúu jnáhan ñuu rí. Te suni súcuan ñayuu vehe Narciso jeē cácandíje máa Jítoho yō. <sup>12</sup> Te suni cahān rō jeē sándeýí ni Trifena jíni Trifosa, ñahan casájniñu siquī jnūhun máa Jítoho yō. Te suni sándeýí ni Pérsida, hermana jeē maní yó jíni, chí suni ni sájniñu ndasí ña siquī jnūhun Jítoho yō. <sup>13</sup> Te cahān rō jeē sándeýí ni Rufo, tée cájéjnúhún ñáyyu jeē vāha cándíje de máa Jítoho yō. Te suni súcuan cahān rō jíni náná de, te máa ña suni ni jito ña ruhū nájñūhun jeē naná rí cúu ña. <sup>14</sup> Te cahān rō jeē sándeýí ni Asíncrito jíni Flegonte jíni Hermas jíni Patrobas jíni Hermes jíni táca hermano jeē cáyūcu jíni de. <sup>15</sup> Te suni súcuan Filólogo jíni Julia jíni Nereo jíni cuáha de, jíni Olimpás jíni ndihi hermano cácandíje cáyūcu jíni de jijnáhan de.

<sup>16</sup> Te jeē cahán táca ró jíni jnáhan ró, te yíñúhún techūhu ró ndaha i. Te táca grupo ñayuu cácandíje nuū Cristo, cáhán i jeē na sándeýí ni rō.

<sup>17</sup> Te cáhán ndahú rí jíni ró, hermano jijnáhan ró, jée cóto ró máa ró nuū ñáyyu cútucu ni te ndúcú stívi jnáhan jíni jnūhun tu quíjnáhan jíni jée ni

cacutūhva ró. Te cujiyo ró núū i jijnáhan i. <sup>18</sup> Chi ñayuu súcuan, tu jéjníñu i nuū Jítoho yō Jesucristo, chi máni ndíhví ni i siquī jeē cáji i. Te yōhyo ndúxí i jíin jnúhun cácahān i, te súcuan stáhú i ñayuu jeē tu jini váha. <sup>19</sup> Te máá ró jijnáhan ró, chi je cájini ndíhi ñayuu ndese váha cájetáhú ró nuū yā, te jeē yúcuan cúsiñ ni rī. Te cúní rī jeē cóo listo váha ró sáha ró jniñu váha, te ma sáha ró jniñu néé. <sup>20</sup> Te máá Yaā Dios jeē jéhe jnúhun ndeyí sñ ni, yachí sáha ya jeē cúndeyí ró siquī jexeēn jee cúu Satanás. Te ñuhun ni rī jeē Jítoho yō Jesucristo na sáha ya jeē váha róhó jijnáhan ró.

<sup>21</sup> Sándeyí ni rō jijnáhan ró, áchí Timoteo, tēe chindéé ñáhán jíin rí siquī jnúhun ya. Te suni súcuan cácahān jnáhan ñuu rī Lucio jíin Jasón jíin Sosípater.

<sup>22</sup> Te ruhū jeē naní Tercio, jeē tée ri carta yáha jéé cahán Pablo, suni cáhán rī jeē sándeyí ni rō jeē cácahān ró Jítoho yō.

<sup>23</sup> Te Gayo, tēe ni jéhe núu vehe ndéé rúhū Pablo, cáhán de jeē sándeyí ni rō jijnáhan ró. Te suni jéhe núu de vehe nuū tāca ñáyuu cácahān. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

<sup>24</sup> Te ñuhun ni rī jeē máá Jítoho yō Jesucristo, na sáha ya jeē váha róhó jijnáhan ró. Amén.

*Jnúhun sándíhi jéé cahán jeē yóhyo cújéhnu ya*

<sup>25</sup> Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuñí niñin ga rō jijnáhan ró jíin jnúhun jnáma ya rohó jeē nácani ri, jíin jnúhun Jesucristo jeē steén rī. Chi súcuan ni steén Yaā Dios jnúhun sáhi yá, jeē ní yisáhi níí cáni nde ná tu jecōo ñayíví. <sup>26</sup> Te vijna te je ni nane cáji. Chi jíin tútu ñi jeē ní catee tēe ni canacani jnúhun ya, ni jítē núu jnúhun sáhi yáha nuū ñáyuu táca nación, náváha candíje i te cuatáhú i. Chi Yaā Dios jeē técu níí cáni, súcuan ni ndacu ya jniñu.

<sup>27</sup> Te níí cáni na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

## CARTA HN JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndindúú rí jiín hermano yō Sóstenes <sup>2</sup> cátee ri carta yáha cuájeē nuū rohó ñayuu ñuu Corinto jeē cácan dije ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jíjnáhan ró jée coo ndoo coo iī ró nuū yā. Te ni cana ya rohó ndé jiín táca gá ñayuu jeē ndácunehen i máá Jítoho yō Jesucristo, ndé-ni cúu nuū cáhíyo i. Chi Jítoho táca yó jiín i cúu ya. <sup>3</sup> Te cáñuhun ni rí jeē Tatá yō Yaā Dios jiín Jítoho yō Jesucristo na sáha ga yā jeē váha rōhó, te sáha ya jeē coo ndeyí coo sñ ni rō.

### *Cristo sáha ya táca jée váha yóhó*

<sup>4</sup> Te níni nácuatáhú rí nuū Yaā Dios jeē siquí rohó jíjnáhan ró, chi jeē jiín Cristo Jesús ni sáha ya jeē váha rōhó. <sup>5</sup> Chi cáyihí ró ndaha Cristo, te jeē yúcuani ní sáha Yaā Dios jeē cáhíyo cúcá ró jiín táca jñūhun ya, chi cájecūhun váha ni rō te cúu nácani ró. <sup>6</sup> Chi súcuan cúu jeē cáhíin nīhin ró jiín jñūhun Cristo jeē ní canacani ri nuū rō. <sup>7</sup> Te súcuan te tu cúmaní ni ñn tahū jeē jéhe ya cuu ánuá rō níni jée cándetu ró quiví jeē quénda ndijin Jítoho yō Jesucristo. <sup>8</sup> Te máá yá chi sáha ya jeē cuiñi nīhin ró nde na jínu quiví, návāha ma cóo cuēchi siquí rō quiví ndíji Jítoho yō Jesucristo. <sup>9</sup> Te squícu Yaā Dios táca jée ni jéjñūhun ya, te ni cana ya rohó jíjnáhan ró návāha cuni jnáhan ró jiín Séhe ya, Yaā cúu Jítoho yō Jesucristo.

### *Siquí jeē ma cóo sñ ni i jíin jnáhan i*

<sup>10</sup> Hermano, nde jiín sñhví Jítoho yō Jesucristo cahán ndahú rí jiín ró jeē inuú-ni na ndájñūhun ró jíjnáhan ró, te ma cóo sñ ni rō. Chi váha inuú na cóo ni rō jiín táca jée cájeni ni rō. <sup>11</sup> Súcuan cáhán rí, ñání mání, chi ni castūhun ñayuu vehe Cloé nuū rí jeē cátejnáhan ró. <sup>12</sup> Chi táca ñn ñn ró sñ sñ cácahān rō: Ruhū chi jíin Pablo índichí rí, cácahān sava ró. Te sava ga rō: Ruhū chi jíin Apolos. Ruhū chi jíin Pedro. Ruhū chi jíin Cristo. Cácahān rō. <sup>13</sup> Te jeē cácahān ró súcuan ¿te á cájeni ni rō jeē sñ sñ Cristo iyó jée cánacani ri jñūhun? ¿Te á ruhū Pablo ni jíhí jíca cruz jehé rō? ¿Chí jíin sñhví ruhū ni cajendute ró, chí naún? <sup>14</sup> Tú cuití. Te na cútahú rí nuū Yaā Dios jeē tú cuehē rō ni scuándute rí, chi máá Crispo jíin Gayo-ni, <sup>15</sup> návāha ma cahán ni ñn ró jée jíin sñhví rí ni jendute ró. <sup>16</sup> Te sá núcūhun ni rí jeē suni ni scuándute rí Estéfanos jíin ñayuu vehe de. Te sanaa te súcuan-ni cúu ñayuu ni scuándute rí, jéni ni rí. <sup>17</sup> Chi tu ní téjñíñu Cristo ruhū jeē scuándute rí, chi sa suhva jeē nácani ri jñūhun jeē jnáma ya ñayuu. Te tu ní ndúcú rí jeē steén rí nuū rō ñn modo ndíchí jée ma jécūhun ni rō, chi núu súcuan te ma cúu jecūhun váha ni rō jñūhun jeē ni jíhí Cristo jíca cruz.

### *Jíin Cristo ni steén Yaā Dios poder yā jíin jñūhun ndíchí yá*

<sup>18</sup> Te jñūhun jeē ni jíhí yá jíca cruz jeē jnáma ya ñayuu, chi jñūhun cánéé íi cúu nuū ñayuu cuango nuū jnahnú ndetū. Te máá yó jeē cuahán yō nuū cácu yó, chi jíni yō jeē jñūhun Yaā Dios jeē ndíso poder cúu. <sup>19</sup> Chi suhva yósó núu tútu iī jeē ní cáhān Yaā Dios:

Na snáá rī jnūhun ndíchí cácahān ñayuu ndíchí cuenta ñayīvi yáha, te ma cuátáhú rí jnūhun cácahān ñayuu jeē jéni ni jeē jiní vāha. Achí yá.

<sup>20</sup> Núu súcuan ¿te ndé cuajniñu tēe ndíchí cuenta ñayīvi yáha, jíin tēe cástéen tutu, jíin tēe cánanducú yúcun síquī jeē steén ñayuu ñayīvi yáha? Chi táca jnūhun ndíchí cuenta ñayīvi yáha, ni cahān Yaā Dios jeē jnūhun cánée íi cúu. <sup>21</sup> Te yōhyo ndíchí sáha Yaā Dios. Chi táca jnūhun ndíchí cájini ñayuu ñayīvi, ni cachí ya jeē tu jéniñu jeē cúni i ndese Yaā cúu ya. Yūcuán na te ni nujnahan ni yā jeē jíin jnūhun ya jeē cánacani ri te jnama ya ñayuu cácañdije, vēsú cájini ni ñayuu ñayīvi jéē jnūhun cánée íi cúu.

<sup>22</sup> Chi ñayuu hebreo, máni cáconi i jeē sáha Yaā Dios cuehē jniñu jéhu jeē steén poder yā. Te ñayuu griego chi máni síquī jnūhun ndíchí cándihvī ni i. <sup>23</sup> Te máá rí chi sa suhva cácanani ri jnūhun jeē ni jíhī Cristo jíca cruz jeē jnáma ya ñayuu. Te jnūhun yáha sáha jeē jnāníní ni ñayuu hebreo, te ñayuu táca gá naciōn chi cájini ni i jeē jnūhun cánée íi cúu. <sup>24</sup> Te ñayuu jeē ní cana ya ni quīvicoo ndaha ya, vēsú ñayuu hebreo chí ñayuu griego, chí jiní i jeē jíin Cristo ni steén Yaā Dios poder yā jíin jnūhun ndíchí yá. <sup>25</sup> Chi jnūhun Yaā Dios jeē cácahān ñayuu jeē jnūhun cánée íi cúu, yōhyo ndíchí gá vēsú jnūhun ndíchí ñayuu. Te cájini ni ñayuu jeē tú na poder yā ná ni jíhī Jesús jeē jnáma ya yohó, te tuú chi ñihin téyí gá poder yā ún vēsú poder ñayuu. <sup>26</sup> Hermano, máá ró cácuu jeē ní cana ya ni quīvicoo ró ndaha ya. Te condēhe ró jeē tú cuehē rō ndíchí jíin jnūhun ñayīvi, ni tú cuehē rō cándacu jniñu, ni tú cuehē rō cácuu sēhe ñayuu cujéhu. <sup>27</sup> Chi sa suhva ni nacāji Yaā Dios táca jéē cácahān ñayuu ñayīvi jéē tu ndíchí cuiti, návāha coo jnūhun canu nuū táca jéē ndíchí. Te ni nacāji ya ñayuu tu téyí ini ñayīvi, návāha coo jnūhun canu nuū ñayuu teyí. <sup>28</sup> Te suni ni nacāji Yaā Dios táca jéē tu cújéhu ini ñayīvi, jíin táca jéē sajéē ni i nuū, nde jíin táca jéē tú jniñu cájini ni i, návāha snúu ya táca jéē cujéhu ini ñayīvi. <sup>29</sup> Súcuan ni sáha ya návāha ni ñin ñayuu ma cúu sátéyí i máá i nuū yā. <sup>30</sup> Te máá ró jijnáhan ró chí ni sáha Yaā Dios jeē nduú ró jíin Cristo Jesús. Chi nde nuū máá yá ni canihñ yō jnūhun ndíchí, te ni ndahva yā cuēchi yó, te ni sáha ya jeē iyó ndoo iyó íi yō nuū yā, chí ni jnama ya yohó. <sup>31</sup> Te jeē yúcuan na cóo nájnuhun cáhán tutu íi: Núu ñin ñayuu cuní i cutéyí i, te na cutéyí i síquī jeē ni sáha máá Jítoho yó jehē i, áchí.

*Jeē nácani Pablo jnūhun jeē ni jíhī Cristo*

## 2

<sup>1</sup> Te ruhū, hermano, ná ni jeē rī nuū rō jijnáhan ró jéē nácani ndaā rī jnūhun Yaā Dios, te tu ní nácani ri jnūhun ndíchí jéē ma jécūhun ni rō. <sup>2</sup> Chi ná ni Iyo ri jíin ró te tú na inga jnūhun ní ndúcú rí castūhun rí nuū rō, chí máni máá jnūhun Jesucristo jeē ni jíhī yā jíca cruz jeē jnáma ya yohó. <sup>3</sup> Te ná ni jinū rī nuū rō jijnáhan ró, chí tú na fuerza rī, te yúhú rí, te quísi i ruhū. <sup>4</sup> Te ná ni nacani ri jnūhun nuū rō, chí nasūu jíin jnūhun ndíchí ñayuu ñayīvi ní scándije ri rohó, chí sa suhva jíin máá poder Espíritu yā ni steén rī nuū rō jijnáhan ró, <sup>5</sup> návāha ma cuiñí ró síquī jnūhun ndíchí cácahān ñayuu, chí cuiñí ró síquī poder Yaā Dios.

*Jíin Espíritu te steén Yaā Dios ndese Yaā cúu ya*

<sup>6</sup> Te ndaā chí ndíchí cácahān rī jíin ñayuu jeē jé ni ije jíin jnūhun cándije i ya. Te nasūu jnūhun ndíchí jéē iyó ini ñayīvi yáha, ni nasūu jnūhun ndíchí cácahān tēe cácujeñu ñayīvi yáha, chí tēe ún yáha-ni jeē cácujeñu de. <sup>7</sup> Chi jnūhun



cácahān rī cúu jnūhun ndíchí máá Yaā Dios jeē ní yisāhí. Chi jnūhun ndíchí un jēē ní yisāhí, ni jequin Yaā Dios nde ná tu jecōo ñayiví, návāha cācu yó jēē cōtecu yō nī cāni sāha jnūhun ún. <sup>8</sup> Chi ni ñn tēe cújēhnu nuū ñáyiví yāha, tu ní jécūhun ni de jnūhun ndíchí un. Chi núu ni jecūhun ni de núú, te ma cáhni cuiti de máá Jítóho yō, Yaā kujēhnu luu. <sup>9</sup> Chi cúu nájñūhun cáhán tutu:

Tāca jēē ni sātūhva Yaā Dios jeē cúu ñayuu jeē maní jíin yá, ni ñn ún tu ní jíto jínú ñayuu, ni tu ní jíni sōho i, ni tu ní quíji jeē súcuan caní ni i.

Achí tutu. <sup>10</sup> Te máá yó jijnáhan yó chi ni steén Yaā Dios tācá un núu yō jeē jíin Espíritu yā. Chi máá Espíritu jíni vāha ya te stéén yā ndíhi, chi nde ndíhi jeē ndíchí gá máá Yaā Dios.

<sup>11</sup> Chi ni ñn ñayuu ma cúu cuni i ndese jéni ni inga ñayuu, chi máá-ni i jíin ánuá i cúu jeē jíni. Te suni súcuan ni ñn ñayuu tu jíni i ndese jéni ni Yaā Dios, chi máá-ni Espíritu Yaā Dios cúu jeē jíni. <sup>12</sup> Te máá yó chi ni nihñ yō Espíritu un jēē véji nuū Yaā Dios, te tu cájeni ni yō nájñūhun cájeni ni ñayuu ñayiví. Te jeē yúcuun cúu jeē cájécūhun ni yō ndese ni sāha Yaā Dios jeē vāha yóhó síquí jeē vāha ni yā. <sup>13</sup> Te suu síquí tāca jēē yāha cúu jeē cácahān rī, te nasūu jíin jnūhun jeē castéén ñayuu ndíchí, chi jíin jnūhun jeē steén máá Espíritu. Chi cástéén rī jnūhun Espíritu nuū ñayuu cánevāha Espíritu.

<sup>14</sup> Te ñayuu ñayiví tu cájetáhú i tāca jnūhun jeē véji nuū Espíritu Yaā Dios, chi cájeni ni i jeē jnūhun cánéé íi cúu. Te ma cúu jecūhun ni i, chi tu cánevāha i máá Espíritu jeē sāha jeē jécūhun ni i. <sup>15</sup> Te ñayuu cánevāha Espíritu, chi cájécūhun ni i ndese iyó ndíhi-ni. Te ñayuu ñayiví ma cúu jecūhun ni i ndese ñayuu cácuu ñayuu ún. <sup>16</sup> Chi suhva cáhán tutu íi: ¿Ndé ñn cuu cuni ndese jéni ni máá Jítóho yó? ¿Te ndé ñn cuu stéén nuū yā? Ni ñn ma cúu. Achí tutu. Te vēsú súcuan te máá yó chi cájeni ni yō nájñūhun jéni ni Cristo.

### *Jeē cáchindéé ñájñáhan de cájéniñu de nuū Yaā Dios*

## 3

<sup>1</sup> Te ruhū, hermano, tu ní cúu cahān rī jíin ró jijnáhan ró nájñūhun cáhán rī jíin ñayuu jíca jíin Espíritu. Chi ní cahān rī jíin ró nájñūhun jíin ñayuu cájica jíin modo máá, chi cácuu ró nájñūhun sūchi lúli jēē ná tu ije ró jíin jnūhun Cristo.

<sup>2</sup> Ni steén rī nuū rō jeē tú yí, chi cácuu ró nájñūhun sūchi lúli jēē jéxin gā. Te tu ní cáhán rī jíin ró jnūhun yí jeē cúu nájñūhun jeē ndáva jeē véji ñayuu ni ije, chi ná tu canda ró jíin ndé saá. Te ni vijna ná tu canda ró jíin. <sup>3</sup> Chi cájica ga rō jíin modo neé máá ró. Chi cácuuésún ni rō, te cácajnáhan ró, te cácuśin ni rō. Núu súcuan te cácuu ró nájñūhun ñayuu ñayiví jēē cájica jíin modo neé máá.

<sup>4</sup> Chi ñn ró cáhán: Ruhū chi jíin Pablo Índichi rī. Te inga ró cáhán: Ruhū chi jíin Apolos. Te súcuan cúu jeē cájica ró jíin modo neé máá ró

<sup>5</sup> ¿Te ndé ñn cúu ruhū, te ndé ñn cúu Apolos núu súcuan? Chi máá mozo-ni Yaā Dios cácuu rī, te ni jejniñu ya ruhū návāha candíje ró máá Jítóho yō. Chi ná ñn ná ñn rī ni sāha jniñu ndese ni jēhe máá Jítóho yō nuū rī. <sup>6</sup> Ruhū, nájñūhun ni taji rī jnūhun ya iní anuá rō, te Apolos, nájñūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jnūhun iní anuá rō. <sup>7</sup> Núu súcuan te tú na vé cúu sāha tēe táji ni tēe chúhun ndute, chi sa suhva máá Yaā Dios cúu jeē scuéhnu. <sup>8</sup> Te tēe táji jíin tēe chúhun ndute, ñn-ni cácuu de. Te tācá de chi cuāha ya yāhu nuū de ndese jniñu ni casáha ñn ñn de. <sup>9</sup> Chi



ruhū jijnáhan ri chi tēe chindéé ñájnáhan cájejníñu nuū Yaā Dios cácuu ri. Te máá ró jijnáhan ró cácuu nájnūhun itu Yaā Dios jeē jícu ya jíin.

Te suni nájnūhun ñin vehe jeē sáha Yaā Dios cácuu ró. <sup>10</sup> Te ruhū chi cúu ri nájnūhun ñin maestro albañil jeē ní jequin rī cimiento vehe ún, cúu jeē ní scándíje ri rohó. Te inga de cásama de siquī, cúu jeē castéén gā de nuū rō. Núu súcuan te ná ñin ná ñin de na cóo cuidado de ndese sáma de siquī. <sup>11</sup> Te Jesucristo cúu cimiento vehe ún, te ni ñin ma cúu caquin inga cimiento, chi máá yá cúu jeē ní ndahva cuēchi ró. <sup>12</sup> Te tāca ñáyyu cácadíje, chi sáha i vehe siquī cimiento un, núu jíin ndajniñu vāha nájnūhun oro chí plata chí yūu luu, chí jíin jéé yachí naa, nájnūhun yujnu chí ite chí ndayóhō. <sup>13</sup> Te natūu jniñu un jéé ní sáha ñin ñin i, te suu cúu ndese ni condihvī ni i siquī máá yá. Chi máá quivī juicio jeē sándaā yā jniñu ñayuu, quivī ún natūu cájí jniñu i. Chi jíin ñūhūn quiji quivī ún, te nájnūhun sáha ñūhūn jeē jéhu tāca jéé cúu cayū, súcuan coto ndee ya jniñu ñin ñin i. <sup>14</sup> Te núu tú cayū jniñu ní sáha i siquī cimiento un, te nihīn i tahū i. <sup>15</sup> Te núu tu ní condihvī ni i jíin jniñu ya, te ma nihīn i tahū i, chi nájnūhun cayū jniñu i. Te máá i chi cácu ánuá i, vēsú nájnūhun je yajni cayū i nuū yáñūhūn.

<sup>16</sup> ¿A tu cájini ró jeē cácuu ró nájnūhun templo Yaā Dios, chi ndéé Espiritu Yaā Dios ini anuá ró? <sup>17</sup> Te núu ñin tēe stívī de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá ró.

<sup>18</sup> Ni ñin ró ma stahú ró máá ró jíin jéé jéni ni rō. Núu ñin ñayuu jéni ni i jeē ndichí i jíin jnúhun ñayivī yáha, vāha ga na siáā i ún, návāha coo ndichí ndije i jíin jnúhun máá yá. <sup>19</sup> Chi jnúhun ndichí jéé iyó ini ñayivī yáha, jnúhun cánéé íi cúu nuū Yaā Dios. Chi cáhán nuū tútu íi: Ñayuu ndichí cuenta ñayivī, chí nájniñi ya i siquī jnúhun ndichí i jeē jéni i jnúhun ya, achí. <sup>20</sup> Te cáhán tucu tutu: Máá Jítoho yō jini yā tāca jéé jéni ni ñayuu ndichí, chí máni jeē jéni cāhá ni i, achí. <sup>21</sup> Núu súcuan te ni ñin ró má cutéyí ró jeē siquī ní ñin tēe ndichí. Chi cuenta máá ró cúu ndihī-ni. <sup>22</sup> Cúu Pablo, cúu Apolos, cúu Pedro jeē castéén nuū rō. Cúu ndihī jeé iyó ini ñayivī, jeé iyó vjna jíin jéé quiji. Te vesú núu cotecu ró chí cuu rō, te ndihī-ni chí cuenta máá ró cúu. <sup>23</sup> Te máá ró cácuu cuenta Cristo, te Cristo cúu cuenta Yaā Dios.

### *Jeē casájniñu apóstol siquī jnúhun ya*

## 4

<sup>1</sup> Núu súcuan te na cáni ni ró jijnáhan ró jeē mozo-ni nuū Cristo cácuu ri, jeé ní tejniñu ya ruhū jeē steén rī jnúhun Yaā Dios jeé ní yisāhi ndé jenahán. <sup>2</sup> Te ndaā chi tēe jeé sájniñu siquī ún, iyó responsable ná ñin ná ñin de jeé squicu vāha de. <sup>3</sup> Te ruhū tu sáha ri cuenta núu cándanducú ró siquī rī ndese sáha ri, chí núu cándanducú ñáyyu cácujeñnu ini ñayivī. Te ni máá rí tu chíhi ri cuenta siquī máá rí. <sup>4</sup> Chi vēsú jini rī jíin ánuá rī jeé tú na cuēchi ri, te nasūu yúcuan cúu jeé quéndōo ndaā rī, chí máá Jítoho yō cúu jeé jito ndee ruhū. <sup>5</sup> Jeé yúcuan ma nánducú ró siquī jniñu jnáhan ró, chí nde na quéé máá quivī te cuni rō. Chi nde na ndíji máá Jítoho yō te nastúu ndijin yā tācá jniñu jeé yisāhi núu nēé, te steén ndijin yā tāca jéé jéni ni ñayuu jíin ánuá i. Yúcuan na te máá Yaā Dios cuajnúhūn yá ná ñin ná ñin i ndese ní casáha i.

<sup>6</sup> Hermano, tāca jnúhun yáha ní cahān rī návāha quéndōo vāha ró jíjnáhan ró. Te ni cachi rī jeé máá rí jíin Apolos cácuu ri mozo-ni nuū yā, te súcuan cácuu ri ñin ejemplo nuū rō. Te cáhán rī jeé súcuan cácuu ri, návāha cutūhva ró cani ni

rō maá-ni nájñūhun cáhán tutu iī. Chi ma sandúxí ró jeē cuajñúhún ró ñn tēe stéén, te inga de tuú. <sup>7</sup> ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájñūhun jeē nasūu jēē ní cacutahū rō cúu?

<sup>8</sup> Va je ni cacucúá ró, chi je cánevāha ró ndihi, cájeni ni rō. Te je cándacu máá ró jñiñu, te ni tuá cájini ññúhún ró ruhū, cájeni ni rō. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jñiñu núu, návāha suni cuāha ró jñúhun jeē ndacu nde ri jñiñu jíin ró jijnáhan ri. <sup>9</sup> Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájñūhun tēe núu ga nuū ñáyuu, nájñūhun tēe jeē jé ni cundaā jeē cúu. Te ní ñáyiví jíin andiví cándēhe vāha nuū rī, cúu ndajéhé Yaā Dios jíin ñáyuu. <sup>10</sup> Chi jeē siquí Cristo te cácahān i jeē tēe cáneé cácuu ri. Te tāca rōhó va ndichí ró jíin jñúhun Cristo, cájeni ni rō. Te tāca rúhū chi tu fuerza rī, te rōhó va iyó fuerza rō, cájeni ni rō. Te rōhó chi cáhīyo yññúhún ñáyuu nuū rō, te nuū rī chi casájéē ni i. <sup>11</sup> Ní vėjicoo ri cájii rī sōco te nde vijna. Te cájichī rī ndute, te cúmanī sahma ri, te tu casáha vāha ñáyuu jíin rí, te ni tu cánevāha ri vehe. <sup>12</sup> Te ñihin casájñiñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. <sup>13</sup> Cácahān neé i siquí rī, te sa cácahān manī rī jíin i. Te cácuu ri nájñūhun yācā ini ñáyiví, te casquéhichī i ruhū nde vijna.

<sup>14</sup> Te nasūu jéē tēe ri yāha jéē cúcanu rō, chi sa suhva jeē stihví ni rī rohó, chi cácuu ró nájñūhun sēhe ri chi manī rī jíin ró. <sup>15</sup> Chi vésú na cóo uxī mil tēe stéén jñūhun Cristo nuū rō, te ñn-ni tátá rō iyó. Te máá rí cúu nájñūhun tátá rō, chi ni scandije ri rohó jēē ní nacani ri jñūhun vāha Cristo Jesús jeē jnáma ya yohó. <sup>16</sup> Núu súcuan te cáhán ndahú rí jíin ró jeē na ndácu ró rúhū jijnáhan rō.

<sup>17</sup> Te jeē yúcuan cúu jeē tají rí Timoteo cuajeē de nuū rō. Chi cúu de nájñūhun sēhe ri jeē manī rī jíin de, te squícu vāha de nuū maá Jítoho yō. Te máá de nacachi tucu de nuū rō ndese jíca ri jeē candije ri Cristo, jíin ndese stéén rī nuū tāca grupo ñáyuu cácandije tāca lado. <sup>18</sup> Te sava ró chi casátéyí ró maá ró, chi cájeni ni rō jeē ma jéé cuii gā rī nuū rō. <sup>19</sup> Te tuú chi yachi jeē rī nuū rō te núu súcuan cúni máá Jítoho yō. Yūcuán na te nanducú rí siquí tēe cácutéyí, te ma sáha ri cuenta jñūhun cácahān-ni de, chi sa coto ndee rí de núu cuu squícu nde de. <sup>20</sup> Chi jeē ndácu Yaā Dios jñiñu nuū yō, nasūu máá jéē cahān ñ-ni yó cúu, chi jíni ññúhún condiso poder jñūhun cáhán yō jíin jñiñu sáha yó. <sup>21</sup> Núu súcuan ¿te ndese cácuni rō? ¿A jéē cuxeēn rī nuū rō núu na jéé rī, siquí jeē tu cánacani ni rō, chí nacani ni rō te jeē rī jíin jñūhun cúndahú ni jíin jñūhun vítá ni?

*Jeē sándaā Pablo siquí ñn cuēchi*

## 5

<sup>1</sup> Te ni ñihīn rī jñūhun jeē jíca jnéni ñn tēe jeē ñne mēhñu ró, chi ndéca de naná uū de. Te xeēn ndasí sáha tēe ún, chi ni ñáyuu jeē tu cájini jñūhun Yaā Dios, tu casáha i súcuan. <sup>2</sup> Te vésú súcuan te casátéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quénehen ró tēe sáha cuēchi ún na quénda de mēhñu ró. <sup>3</sup> Te ruhū, vésú tu iyó rí jíin ró, te nájñūhun jeē iyó rí jíin ró cúu jeē ññúhún ni rī rohó. Te je ni sándaā rí siquí tēe ni sáha cuēchi ún, chi nájñūhun jeē iyó rí jíin ró cúu. <sup>4</sup> Núu súcuan te na ndútútú ró jijnáhan ró, te máá Jítoho yō Jesucristo coo ya jíin ró. Te máá rí chi nájñūhun cone ri jíin ró, chí ññúhún ni rī rohó. Te poder máá Jítoho yō Jesús suni coo jíin ró. <sup>5</sup> Te na

chíhi yó téé ún ndaha Satanás, návāha na ndóho yiqui cúñu de, te nacani ni de te cācu ánuá de quivī ndiji Jitoho yō Jesús.

<sup>6</sup> Tuú vāha jeē casátéyí ró maá ró. ¿A tu cájini rō jñūhun cáhán suhva? Vesū jecu-ni levadura te ndāa ní ñujen sáha, áchí. <sup>7</sup> Núu súcuan te quenehen ró téé un nájñūhun scáne ró levadura jeē ni tívi. Te súcuan te cuu ró nájñūhun pan jeē cúvāha jín ñujen jéé jéé tú na levadura yáhi, jeé cáyeji i vico pascua. Te ndāa jeē súcuan cácu ró. Chi je ni jihī Cristo jeē ni sócō yā maá yá jehē yō, chí cúu ya nájñūhun londe pascua jeē ni jíhī. <sup>8</sup> Núu súcuan te na cócūhun ni yō ndese ni cuu vico pascua un, te na cóo ndije ndāa anuá yō, te suu cúu nájñūhun pan jeē tú na levadura yáhi. Te ma sáha yó jniñu néé jín jniñu jnéhén, jeē cúu nájñūhun levadura jeē ni tívi.

<sup>9</sup> Nuū inga carta jeē ní tee ri nuū rō jijnáhan ró ni cahān rī jeē ma quívi nduu rō jín ñayuu cájica jnéni. <sup>10</sup> Te tu ní cáchi rī jeē ma quíjánhān cuiṭi rō jín ñayuu tu cácdíje jeē cájica jnéni, jeē ndíyo ni, jeē sácuihná, jeē chíñúhún ídolo. Chí núu súcuan te jini ñúhún jeē quéndā ró ini ñayívi núú, chí tuá na inga modo jeē cújiyo ró núú i chí ndéé yó ñayívi jín i. <sup>11</sup> Chí sa suhva ni cachi rī jeē ma quívi nduu rō jín máá ñayuu jeē cácahān i jeē cúu i hermano, te núu jica jnéni i, chí ndíyo ni i, chí chíñúhún i ídolo, chí chísó jñūhun i siquī jnáhan i, chí nájini i, chí cuihná i. Te ni ma cáji cuiṭi rō staā jín ñayuu casáha súcuan. <sup>12-13</sup> Chí nasúu jniñu ri cúu jeē sándaā rī siquī ñayuu jeē tu cáhīn jín yó. Yaā Dios cúu jeē sándaā siquī i. Te ñayuu cáhīn jín ró chí cánúú jéé sándaā ró siquī i. Núu súcuan te cánúú jéé quenehen ró téé ni sáha cuēchi un jéé íne de mēhñu ró, na quéndā de.

*Jeē ma cáquin i cuēchi siquī jnáhan i nuū tohó tu cácdíje*

## 6

<sup>1</sup> Te núu jnáhan ró jéé candíje ni sáha cuēchi siquī rō, ¿te naun jéngoo ró jín de nuū tohó jeē tu cácdíje jín yó? ¿Te naun tu sándaā rō nuū jnáhan ró cácdíje Yaā Dios? <sup>2</sup> ¿A tu cájini rō jeē ñayuu cácdíje Yaā Dios chí ñn quivī te sándaā i jniñu ñayuu ñayívi? Te núu ñn quivī sándaā rō jniñu ñayuu ñayívi, ¿te á má cúu sándaā ró vjna siquī táca cuēchi lúli casáha jnáhan ró? <sup>3</sup> ¿A tu cájini rō jeē ñn quivī te sándaā yō nde jniñu táca ndajéhé andiví? Te nagā ni cuu jniñu ñayívi yáha jeē ma cúu sándaā yō. <sup>4</sup> Núu súcuan te núu jnáhan ró sáha de ñn cuēchi siquī rō, ¿te naun jéngoo ró sa nuū táca téé jeē tu cúu de jnáhan ñayuu cácdíje jeē sándaā de siquī cuéchi ún? <sup>5</sup> Súcuan cáhán rī návāha na cúcanu rō jijnáhan ró. ¿A tu íyó ni ñn téé jécūhun ni mēhñu ró jeē cuu sándaā de siquī rō? <sup>6</sup> Tú vāha jeē ñn hermano caquin cuēchi siquī inga hermano nuū tohó jeē tu cácdíje.

<sup>7</sup> Te jeē cájequin rō cuēchi siquī jnáhan ró, chí jeē castíví í rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? <sup>8</sup> Te tuú chí sa máá ró casáha cuēchi te cáquende ró ndajniñu, te nuū táca hermano rō cúu jeē casáha ró.

<sup>9-10</sup> ¿A tu cájini rō jeē ñayuu tu íyó ndāa, ma nihín tahú i quívi i ñuu nuū ndácu Yaā Dios jniñu? Ma stahú ró maá ró cani ni rō jeé nihín tahú rō, chí ni ñayuu jeé jica jnéni, ni ñayuu chíñúhún ídolo, ni ñayuu casíquí ndéé jnáhan, ni téé sáha ndíyí jín jnáhan yí, ni ñayuu cuihná, ni ñayuu ndíyo ni, ni ñayuu nájini, ni ñayuu chíso jñūhun siquī jnáhan, ni ñayuu stahú jnáhan siquī xūhun, ma nihín tahú i quívicoo i ñuu nuū ndácu Yaā Dios jniñu. <sup>11</sup> Te súcuan ni candāa sava ró núú,

te vijna chi je ni nacate ya rohó, te cáhīyo ndoo cáhīyo īi rō nuū yā. Chi je ni ndahva yā cuēchi ró jēē jīn máá Jítoho yō Jesús jīn Espíritu Yāā Dios.

*Jeē iyó ndoo íyó lí yiqui cúñu ñayuu cácañdije*

<sup>12</sup> Te ndaā cúu jeē cácahān jeē ndihī-ni jñiñu íyó váha sáha yó núu ndese cúní yō. Te vēsú súcuan te nasūú ndihī sáha jeē quēndōo vāha ánuá yō. Ndihi chí cuu sáha yó, te vēsú súcuan te tu íyó váha jeē quívi yó núu jñiñu jeē stívi ánuá yō.

<sup>13</sup> Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñin quívi te tuá coo súcuan, chí naa ndindúú un sáha Yāā Dios. Te nasūu síquī jeē cáca jnéni yó cúu jeē iyó yiqui cúñu yō, chí sa suhva jeē sáha yó jēē cuní máá Jítoho yō. Te Jítoho yō chí ndíto ya yiqui cúñu yō. <sup>14</sup> Te nájnūhun jeē ní nastécu Yāā Dios Jítoho yō, suni súcuan nastécu yā yohó jīn poder yā.

<sup>15</sup> ¿A tu cájini rō jeē yiqui cúñu táca ñin ñin ró cúu nájnūhun táca parte yiqui cúñu Cristo? Núu súcuan ¿te á cuu quende yó ñin parte yiqui cúñu Cristo te squijnáhan yó jīn ñin ñahan jica jnéni? Ma cúu cuiti súcuan. <sup>16</sup> ¿A tu cájini rō jeē tēe quijnáhan jīn ñahan jica jnéni, ñin na yiqui cúñu ní nduu de jīn ña? Chí cáhán tutu īi: Jeē ndindúú chí ñin na yiqui cúñu cuu, áchí. <sup>17</sup> Te ñayuu jeē quijnáhan jīn máá Jítoho yō, chí suni súcuan ñin na cúu i jīn yá síquī jeē candije i ya.

<sup>18</sup> Núu súcuan te cunu ró jēē ma quívi ró núu jñūhun jica jnéni. Chí táca gá cuēchi jeē sáha ñayuu, chí nasūú yiqui cúñu i stívi ī. Te núu jica jnéni ī, te síquī yiqui cúñu i cúu jeē sáha i cuēchi. <sup>19</sup> ¿A tu cájini rō jeē yiqui cúñu rō cúu templo Espíritu Santo jeē ní jéhe Yāā Dios nuū rō, te ndéé yá ini rō? Te nasūu cuenta máá ró cácuu ró. <sup>20</sup> Chí Yāā Dios yahu ní cuu jeē ní nacuaan ya rohó jijnáhan ró. Te jeē yúcuan cánuú jēē cáca yíñuhún ró nuū Yāā Dios jeē sáha ró jñiñu váha nde jīn yiqui cúñu rō jīn ini jīn ánuá rō, chí máni cuenta Yāā Dios cúu.

*Jñūhun cástūhun síquī tēe jīn ñasihí*

## 7

<sup>1</sup> Vijna te na cáchi rī síquī táca jñūhun jeē ní cacajnūhun ró ruhū nuū carta. Jendaá jeē váha ga quēndōo ñin tēe núu tú condeca de ñahan. <sup>2</sup> Te síquī jeē iyó jñūhun jnéni, te váha ga jeē táca tēe na cóo ñasihí máá de, te suni táca ñahan coo yīi máá ña. <sup>3</sup> Te yīi na squícu váha de nuū ñasihí de jeē cúu de yīi ña. Te suni súcuan ñasihí na squícu váha ña nuū yīi ña. <sup>4</sup> Chí ñasihí chí tu cúu sáha ña jeē cuní ña jīn yiqui cúñu ña, chí suni jeē cuní yīi ña. Te suni súcuan yīi tu cúu sáha de jeē cuní de jīn yiqui cúñu de, chí suni jeē cuní ñasihí de. <sup>5</sup> Te ma sasáhan ró máá ró nuū jñáhan ró. Te núu cácuu rō jeē vihíyá gā cacán tahu rō jecu tiempo, te núu cáhīyo conforme ndindúú rō, te cuu sasáhan ró máá ró nuū jñáhan ró. Te yūcuán na te váha ga naquijnáhan tucu ró, návāha ma cóto ndee Satanás rohó síquī jñūhun jnéni.

<sup>6</sup> Te nasūu jēē ndácu rī jñiñu jeē cánuú quijnáhan ró, chí jeē jéhe rī jñūhun cúu. <sup>7</sup> Chí nūjñahan ní rī jeē táca tēe na cóo máá ñin-ni de, nájnūhun íyó máá rī. Te sñin sñin ní sáha Yāā Dios jīn ñin ñin de ndese cúu máá de, chí sava de cuu quēndōo máá ñin-ni de, te inga de chí tuú chí sñin ní sáha ya jīn de.

<sup>8</sup> Núu súcuan te cáhan rī jīn ñayuu cáhīyo máá ñin-ni, jīn ñahan ní caquēndōo ndáhú, jeē váha ga te núu quēndōo máá ñin-ni i, nájnūhun íyó máá rī. <sup>9</sup> Te núu jīn i jeē ma cánda i quēndōo máá ñin-ni i, te na quijnáhan i núu súcuan. Chí váha ga jeē quijnáhan i vēsú jeē ndúquiji ī.

10 Te nuū ñáyuu jeē jé ni quijnáhan chi ndácu ri jniñu jeē ñahan ma ndusín ña jíin yíi ña. Te nasūu rúhū cúu jeē ndácu jniñu, chi máá Jítoho yō. 11 Te núu ñn ñahan ndusín ña jíin yíi ña, te na quéndōo máá ñn-ni ña, chí cuu naquijnáhan ña jíin yíi ña. Te yíi suni ma ndusín de jíin ñasihí de.

12 Te jíin sava ga ñayuu chi cahán rī yāha jéé jéni ni maá rí, te nasūu jéé ní cachí maá Jítoho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jíin de, te ma ndusín de jíin ña. 13 Te núu ñn ñahan ndéca ña tēe jeē tu cándije, te núu nújnahan ni de condee de jíin ña, te ma ndusín ña jíin de. 14 Chi tēe tu cándije, yíhi cuenta de nuū Yaā Dios siquī jeē ní quijnáhan de jíin ñahan cándije. Te ñahan tu cándije, yíhi cuenta ña nuū Yaā Dios siquī jeē ní quijnáhan ña jíin tēe cúu hermano candije. Chi núu tu súcuan te sēhe i ma quíhi cuenta i nuū Yaā Dios, te vijna chí yíhi cuenta i nuū yā. 15 Te yíi chí ñasihí tu cándije, núu fuerza cuní i ndusín i jíin jnáhan i, te na ndúsín i. Chi núu súcuan cuní i, te hermano chí hermana candije tu cánuú casi i jeē ndusín jnáhan i jeē tu cándije. Chi ni cana Yaā Dios yohó jéé condee manī yō jíin jnáhan yó. 16 Te róhó jéé cácuu ñasihí, tu cájini rō, sanaa te candije yíi ró sáha ró, te cācu de. Te suni súcuan róhó jéé cácuu yíi, tu cájini rō, sanaa te candije ñasihí ró sáha ró, te cācu ña.

17 Te ná ñn ná ñn ró na quéndōo ró ndese ni sáha Jítoho yō jeē cúu ró, jíin ndese íyó ró ná ni cana ya rohó ní candije ró. Te súcuan ndácu ri nuū tāca grupo ñayuu cácdandije. 18 Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu ní cúu circuncidar, te ma cúu de circuncidar. 19 Chi tú na vé sáha núu cúu yó ní circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios. 20 Ná ñn ná ñn ró na quéndōo ró ndese íyó ró ná ni cana ya rohó ní candije ró. 21 Núu mozo jeē ní jeen ñayuu cúu ró ná ni cana ya rohó, te ma cóndihví ni rō jeē quénda ró. Te núu íyó modo jeē quénda ró nduu libre rō, te íyó vāha jeē sáha ró. 22 Chi tēe cúu mozo jeē ní jeen ñayuu, te núu ni cana Jítoho yō de, te vijna chí ni nduu libre de nuū cuéchi de, jéjñíñu de nuū máá Jítoho yō. Te suni súcuan tēe sájniñu cuenta maá, te núu ni cana ya de, te vijna chí ni nduu de mozo jeñíñu nuū Cristo jeē ní nacuaan ya de. 23 Chi yahu ni cuu jeē ní nacuaan Yaā Dios rohó jijnáhan ró, cúu jeē ní jíhī Sēhe ya jehē rō. Núu súcuan te ma cuajniñu ró núu jniñu cāhá-ni jeē ndácu ñayuu ñayiví. 24 Núu súcuan hermano, ná ñn ná ñn ró na quéndōo ró núu Yaā Dios ndese íyó ró ná ni cana ya rohó.

25 Te vijna te siquī ñayuu jeē iyó máá-ni, tú na jñūhun ní ndácu Jítoho yō nuū rī. Te na cáhán rī jeē jéni ni maá rí, chí ni cundáhú ni Jítoho yō ruhū, te ní sáha ya jeē cúu cahán ndaá rī. 26 Jéni ni rī jeē vāha-ni núu quéndōo-ni tēe ndese cáhiyo de, jeē siquī jeē iyó jñúndóho tiempo yáha. 27 Núu íyó ñasihí ró, te ma ndusín ró jíin ña. Te núu tu íyó ñasihí ró, te ma nducú ró ña. 28 Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chí nihín i jñúndóho ñayiví yāha, te cuní rī jeē ma nihín rō jñúndóho.

29 Hermano jijnáhan ró, jñūhun jeē cahán rī yāha cúu jeē yachí-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihví gā ni de siquī jniñu máá yá vesú siquī ña. 30 Te ñayuu jeē ní jíhī jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūu ndajniñu i cúu. Ma cuáha i jñūhun jeē cási táca un jéé ma cúu condihví ni i jniñu máá

yá. <sup>31</sup> Te ñayuu jeē ní cacondihví ni siquī ndajniñu ñayivi yáha, ma cujnéñu ga i jíin. Chi je yajni naa táca jée iyó ñáyivi yáha.

<sup>32</sup> Cúni rī jeē ma nácani ndasí ni rō siquī táca jée iyó ini ñayivi. Chi tēe cúu soltero, ndíhví ni de jniñu máá Jítoho yō, ndese cusī ni Jítoho yō sáha de. <sup>33</sup> Te tēe iyó ñasihí chi ndíhví ni de jniñu iyó ñayivi, ndese cusī ni ñasihí de sáha de. <sup>34</sup> Te suni súcuan sīin sīin jéni ni ñahan iyó yī jíin ñahan iyó máá. Chi ñahan iyó máá, ndíhví ni ña jniñu máá Jítoho yō, chi cúni ña jeē coo ndoo coo ī anuá ña jíin yiqui cúñu ña cuajniñu ña nuū yā. Te ñahan iyó yī chi ndíhví ni ña jniñu iyó ñayivi, ndese cusī ni yī ña sáha ña.

<sup>35</sup> Jeē váha máá rō jijnáhan rō cúu jeē ni cáhān rī súcuan. Chi nasūu jée nducú rí casi rī jeē quijnáhan rō, chi sa suhva cúni rī jeē caca yīñúhún rō te nune rō cuajniñu cutú rō núu máá Jítoho yō.

<sup>36</sup> Te núu ñin tēe iyó sēhe sñí de, te núu cuayī i, te núu jéni ni de jeē váha ga jeē quijnáhan i, núu súcuan te na sáha de jeē jéni ni de, te cuáha de jnūhun quijnáhan i, chi nasūu cuéchi cúu. <sup>37</sup> Te núu ñin tēe ni cundaā ni de jeē cóndee sēhe sñí de súcuan-ni, jeē ma cuáha de i vēsú fuerza jícan ñayuu i, núu súcuan te cuu quendōo i nájñūhun cúni de, chi jeē váha sáha de. <sup>38</sup> Núu súcuan te tēe jéhe jnūhun quijnáhan i, váha sáha de. Te tēe tu jéhe jnūhun, chi váha ga sáha de.

<sup>39</sup> Te ñahan ní quijnáhan, chi yīñi ña ndaha yī ña níni jeē técu de. Te núu je ni jihí yī ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándije nuū Jítoho yō cúu de. <sup>40</sup> Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espíritu Yā Dios cúu jeē cahān rī.

### *Siquī cūñu ni sócō nuū ídolo*

## 8

<sup>1</sup> Te vijna te na cáchi rī siquī cūñu ni sócō nuū ídolo. Ndaā chi táca yó jéni ni yō jeē máá yó cúu jeē jini ndese cúu. Te táca jée jini yō ún, chi nducú sáha jeē cundúxí yó. Te sa suhva jeē cundáhú ni yō jnáhan yó, sáha un jée ije i jíin jnūhun ya. <sup>2</sup> Núu na-ni ñayuu jéni ni i jeē jini váha i, te tuú chi ná tu cuni cuiti i nájñūhun cánuú cuni i. <sup>3</sup> Te sa suhva ñayuu jeē maní i jíin Yā Dios, máá i cúu jeē jetáhú yá.

<sup>4</sup> Núu súcuan te na cástūhun rí siquī cúñu jeē ní casocō ñayuu nuū ídolo. Ndaā chi jini yō jeē táca ídolo ñayivi, tú ndaā cuiti. Te tú na inga yaā iyó, chi máá ñin-ni Yā Dios. <sup>5</sup> Te ñayuu chi cájeni ni i jeē iyó táca yāā ini andiví jíin ñayivi, chi cácahān i jeē iyó ndije cuehē yaā i jíin Jítoho i. <sup>6</sup> Te nuū máá yó chi ñin-ni Yā iyó, jeē cúu Tátá yō Yā Dios. Te máá yá ni sáha táca jée iyó, te cuenta máá yá cúu yó jijnáhan yó. Te suni iyó ñin-ni Jítoho yō Jesucristo, te nde nuū máá yá vēji táca jée iyó, te suni máá yá ni sáha yóhó.

<sup>7</sup> Te ñayuu cácañdije, chi tú ndíhi i jini jnūhun yáha. Chi sava i ni cacān i ni chiñúhún i ídolo nde ná tu cándije i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquī jeē ná tu ije i jíin jnūhun Yā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. <sup>8</sup> Te ndaā chi nasūu jée yéji yō cúu jeē sáha jeē cuatáhú Yā Dios yohó. Chi núu yéji yō, nasūu yūcuan sáha jeē quéndōo váha ga yō nuū Yā Dios. Te núu tu yéji yō, ni tu sáha jeē quéndōo ndáhú gá yō nuū yā. <sup>9</sup> Te vēsú tú ni ñin jési jeē ma cúu caji rō cūñu ún, te coto rō jnáhan rō jée ná tu ije jíin jnūhun ya, te ma sáha rō jée suni caji i jeē jéni ni i jeē cuéchi cúu. <sup>10</sup> Váha ga ma caji rō núu súcuan, chi

sanaa te hermano rō jeē ná tu ije jíin jnúhun ya, coto de róhó jée yéji rō ini vehe ídolo, chí jíiní vāha ró jée tú na vé sáha. Te súcuan te sáha ró jée cájni ni de jeē suni caji maá de cūñu jeē ní sócō nuū ídolo, vēsú jéni ni de jeē cuēchi cúu. <sup>11</sup> Te súcuan stívi ró anuá hermano rō jeē ná tu ije jíin jnúhun ya, vēsú jíiní vāha maá ró jeē tú na vé sáha jeē cáji rō. Te tú vāha sáha ró, chí suni jehē maá de ni jíihí Cristo. <sup>12</sup> Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuēchi. <sup>13</sup> Núu súcuan te núu cūñu un sáha jeē quívi hermano rī cuēchi, te ma cáji cuiti ga rī cūñu ún, návāha ma sáha rī jeē quívi de cuēchi.

### *Siquī jeē iyó derecho tēe cácuu apóstol*

## 9

<sup>1</sup> Te maá rí chí jíca libre rī, te iyó derecho rī siquī jeē cúu rī apóstol, tēe ni tají yá scáca jnúhun ya. Chí ni jito rī nuū maá Jítóho yō Jesús, te maá ró jíinánhan ró cácuu jniñu jeē ní sáha rī jeē ní squívi rī rohó ndaha Jítóho yō. <sup>2</sup> Te núu sava ga ñayuu tu jétáhú i jeē cúu rī apóstol, te nuū maá ró chí suu cúu ndije rī. Chí siquī jeē ní scandíje rī rohó jíinánhan ró, te jeē yúcuun cácuu ró prueba jeē steén jeē ndíso jniñu rī cúu rī apóstol nuū maá Jítóho yō.

<sup>3</sup> Te jnúhun yáha cáhán rī jehē maá rí nuū ñayuu cácahān siquī rī. <sup>4</sup> Achí rí: Iyó derecho rī caji rī coho rī jeē cájēhe ñayuu núu cúní rī. <sup>5</sup> Te suni iyó derecho rī núu jeē cuní rī condeca rī ñin hermana candíje cuu ñasihí rí, caca ña jíin rí, nájnūhun iyó ñasihí Pedro jíin táca gá apóstol jíin tēe cácuu ñani maá Jítóho yō. <sup>6</sup> ¿Chí cájeni ni rō jeē maá rúhū-ni jíin Bernabé tú na derecho rī jeē stóo rī jniñu cásaáha rī jeē cótecu rī, návāha nune ga rī nacani rī jnúhun vāha ya, chí naún? <sup>7</sup> ¿A iyó soldado jeē técu de xuhún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndíto lanchi te tu jíhi de leche tí? Tú cuiti. ¿Te á suni tu iyó derecho rī cótecu rī siquī jnúhun ya naún? <sup>8</sup> Te ma cáni ni rō jeē táca jée cahán rī yáhá, máni maá jée cácahān ñayuu ñayívi cúu. Chí nde maá ley yā jeē ní jēhe ya nuū Moisés, cáhán súcuan. <sup>9</sup> Chí cáhán nuū tútu ley yā: Ma chúhun rō ñunu yuhu stíquī, quiti jéxín trigo, achí. Te ndaá chí nasūu máni siquī stíquī cúu jeē ní cáhān yā súcuan. <sup>10</sup> Chí suni siquī maá yó ní cahān yā. Chí ley un ní jēhe ya jeē vāha maá yó, chí stéén jeē tēe jítu jíin tēe jéxín trigo cánuú jeē nihín de sava un quívi ndutútú. <sup>11</sup> Te suni súcuan ruhū jíinánhan rī jeē ní cataji rī jnúhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō? <sup>12</sup> Te núu sava ga tēe cástéén nuū rō, iyó derecho de cacān de nuū rō, te nagā ní cuu ruhū jíinánhan rī jeē ma cóo derecho rī cacān rī.

Te tu ní cájicān rī derecho un, chí sa suhva ní jendeyí ni rī coto maá rí jeē cáji rī, návāha ma cási rī jeē cáca jnúhun vāha Cristo. <sup>13</sup> Te cájni rō jeē sutú ni cajejniñu ini templo, ni cacotecu de siquī jeē ní casocō ñayuu ini templo. Chí sutú ni cajejniñu nuū altar nuū ní casocō i quiti, suni ni cayejí de sava quiti ún. <sup>14</sup> Te suni súcuan ní ndacu maá Jítóho yō jniñu jeē tēe cánacani jnúhun jeē jnáma ya yohó, siquī jniñu un nihín de jeē cótecu de. <sup>15</sup> Te ruhū tu ní jíicān cuiti rī derecho rī yáhá, te suni nasūu jée tēe rī jnúhun yáha návāha cuáha ró núu rī jíinánhan ró. Chí jéni ni rī jeē vāha ga núu na cúu rī nasūu jée quíhin rī jeē cuáha ró, chí casi jeē cūsī ní rī scáca rī jnúhun ya súcuan-ní.

<sup>16</sup> Te tú vāha núu sátéyí rí maá rí siquī jeē nacani rī jnúhun jeē jnáma ya yohó. Chí ñin jeē ní tejniñu ya ruhū cúu, te cánuú squícu rī. Chí nacā ndahú cúu rī te núu tú nacani rī jnúhun ya. <sup>17</sup> Te núu jeē cúu ní maá rí sáha rī nuú, yúcuán



na te cuu cacān rī yāhu ri. Te tuú chi cánuú sáha ri, chi máá Yaā Dios ni tee ya jniñu siquī rī. <sup>18</sup> Núu súcuan te yāhu ri cúu jeē cúsiñ ni rī jeē súcuan-ni nácani ri jñuhun jeē jnáma ya yohó, te tu jícán rī derecho rī jeē cotecu rī siquī jeē nácani ri jñuhun ya.

<sup>19</sup> Chi vésú tú ni ñn ñayuu ndácu jniñu nuū rī, te ni sáha ri maá rí mozo nuū tǎcá i jeē nácani ri jñuhun nuū i, návāha nihīn rī cuehē i candíje i Cristo. <sup>20</sup> Núu ñe ri jín jnáhan ri hebreo te sáha ri nájñuhun cásáha i, návāha cuu scándíje ri i. Chi násáha ri maá rí nájñuhun tēe cáyihī chīji ley Moisés, návāha cuu scándíje ri i jeē cáyihī i chīji ley un, vésú tuá yíhī ri chīji ley un. <sup>21</sup> Te suni násáha ri maá rí nájñuhun ñayuu tu cáyihī chīji ley Moisés, návāha cuu scándíje rī ñayuu ún. Te vésú súcuan te yíhī ri chīji ley Yaā Dios, chi suu cúu ley Cristo jeē squícu ri. <sup>22</sup> Te núu ñe ri jín ñayuu jeē ná tu ije jín jñuhun ya, te sáha ri maá rí nájñuhun jeē ná tu ije ri jín jñuhun ya, návāha cuu scándíje ga rī i. Núu súcuan te násáha ri maá rí núu ndese cándāa tǎca ñáyuu, návāha tǎcá-ni modo un te cuu scándíje ri sava i. <sup>23</sup> Tǎca yáha sáha ri jeē siquī jñuhun jeē jnáma ya yohó, návāha suni nihīn rī tahū jeē ndíso jñuhun ya.

<sup>24</sup> Je cájini rō jeē tēe cájину carrera, jendaá chi ndihī de cájину, te ñn-ni de cúndeyí nihīn premio. Te suni súcuan nducú ndéyí máá ró squícu ró, návāha nihīn rō premio nuū yā. <sup>25</sup> Te tǎca tēe cúní cundeyí siquī ñn deporte, chi cácuáha de te cándito de máá de. Súcuan cásáha de návāha nihīn de ñn premio jeē cúu corona ndaha yújnu jeē náa yachī. Te máá yó chi sa suhva cánducú ndéyí yó návāha nihīn yō ñn premio jeē ma náa cuiti. <sup>26</sup> Te máá rí suni nducú ndéyí rí nájñuhun tēe cájину, te tu nducú ndéyí cáha rí. Te sáha ri nájñuhun tēe cácajnáhan juego jeē tu jéhe iyú de, chi quée jniñu sáha ri. <sup>27</sup> Chi sa suhva stóho ri yiquí cúñu rī, te stíhvī ni rī maá rí squícu ri. Chi vésú ni stíhvī ni rī inga ñayuu jeē nducú ndéyí i, te núu tu nducú ndéyí máá rí te snáa rí premio rī.

*Siquī jeē ma chíñúhún i ídolo*

## 10

<sup>1</sup> Hermano jijnáhan ró, cúní rī jeē na jécūhun ni rō ndese ni cajica jíy yō jenahán. Chi ndihī de ni cajica chīji vicō jeē ni stéén ichi nuū de, te ndihī de ni cayāha mēhñū ndute Mar Rojo jeē ní cusñn, ni nune ichi. <sup>2</sup> Súcuan cúu jeē ní canduu ñnuú ndihī i jín Moisés, chi ni candiquīn i de chīji vicō jín méhñu mar. <sup>3</sup> Te ndihī i chi inuú-ni ni cayejī i alimento jeē ni jéhe máá Espiritu. <sup>4</sup> Te suni ndihī i ni cajihī ndute jeē ni jéhe Espiritu. Chi ni cajihī i ndute jeē ní cane jicá cáva nuū ní cajica cuu i. Te Cristo cúu nájñuhun cava un jeē jéhe ya ndute cotecu yō níf cáni. <sup>5</sup> Te vésú súcuan te cuehē i ni cunihni ni í, te tu ní cúsiñ ni Yaā Dios jín i, te jeē yúcan ní cajihī i nuū ñuhun téhe.

<sup>6</sup> Te tǎca jéē ní cuu ún, ñn ejemplo cúu nuū yō, návāha ma ndíyo ni yō tǎca jéē neé, nájñuhun ni candiyo ni ñayuu ún. <sup>7</sup> Te ma chíñúhún ró ídolo, nájñuhun ni casáha sava i. Chi súcuan cáhán nuū tútu ñ: Ní cacucōo ñayuu ún, ni cayejī i ni cajihī i vico ídolo, te ni ndocuññ i ni cajita jéhe í, áchí. <sup>8</sup> Te ni ma cáca jnéní ró nájñuhun ni casáha sava i, te ni cajihī ocō unī mil i jeē ñn quivī-ni. <sup>9</sup> Te ni ma sáha ró jniñu jeē squití ni rō Jitoho yō, nájñuhun ni casáha sava i, te ni cajihī i jeē ní catuu coō i, ni sáha ya. <sup>10</sup> Te ni ma cahán sōó ró siquī Yaā Dios, nájñuhun ni cacahán sōó sava i, te ni cajihī i jeē ní jehni ndajéhe yā i.

<sup>11</sup> Te tǎca jéē ní cuu ún, chi ñn ejemplo cúu nuū yō. Te súcuan yósó núu tútu návāha na chúhun vāha ni máá yó. Chi cácuu yó ñayuu cátecu quivī cuándihī



ñayiví. <sup>12</sup> Núu súcuan te róhó jéē cájeni ni rō jeē cáhīn nīhin ró jéē ma sáha ró cuēchi, coto má quiví ró cuēchi. <sup>13</sup> Chi máni íyó jéē nducú squiví róhó cuēchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jnūhun jeē vihyá gā coto ndee jexeén róhó vēsú jeē cúu cundeyí ró jíin. Chi sa suhva núu vēji jeē nducú squiví róhó cuēchi, te chindéē ñáhān yá rohó quenda ró te cundeyí ró siquī.

<sup>14</sup> Ñānī máni, ma chiñúhún cuiití rō ídolo núu súcuan. <sup>15</sup> Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jnūhun cáhán rī. <sup>16</sup> Máa copa ī jeē cájicān tahú yō jehē, suu cájihu cáhnu yó jéē steén yō jeē inuú cúu ndihí yó, chí ni jeti niñī Cristo jeē siquī yō ná ni jihí yā jicā cruz. Te pan jeē sacuéchí yó cáyeji cáhnu yó, steén jeē inuú cúu ndihí yó siquī jeē ni jéhe Cristo yiqui cúñu yā ni jihí yā jehē yō. <sup>17</sup> Te vēsú cuehē yō íyó, te ĩn-ni ñayuu cácuu yó, chí ĩn-ni pan un cáyeji cáhnu yó siquī jeē cácandje yó.

<sup>18</sup> Condēhe ró ndese cásáha ñayuu Israel. Táca tēe jeē yéji quiti jeē ni sócō nuū yā, chí inuú-ni cúu ndihí de siquī jeē cáyeji de jeē ni sócō ún. <sup>19</sup> Núu súcuan te cáhán rī jeē tu ndé jéjníñu ídolo, ni tu jéjníñu cúñu jeē ni sócō nuū ídolo, chí inuú cúu jíin táca gá cúñu. <sup>20</sup> Te suni cáhán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī. <sup>21</sup> Ma cúu coho ró copa máa Jítoho yō te núu cájihu ró jéē ni sócō nuū tachī. Te ma cúu caji rō nuū mesa Jítoho yō te núu cáyeji rō jeē ni sócō nuū tachī. <sup>22</sup> Ma quiví nduu yō súcuan jíin táchī, návāha ma cucuñí Jítoho yō jíin yó. ¿Chí téyí gá máa yó vēsú máa yá jeē ma cúu stóho ya yohó, cájeni ni rō, chí naún?

### *Ndihí chí sáha yó jíin jnūhun cúndáhú ni*

<sup>23</sup> Te ndaā cúu jeē cácahān jeē ndihí-ni jniñu íyó váha sáha yó núu ndese cúní yō. Te tuú chí nasūú ndihí sáha jeē quéndōo váha ánuá yō. Ndihí chí cuu sáha yó, te vēsú súcuan te nasūú ndihí sáha jeē ije jnāhan yó jíin jnūhun ya. <sup>24</sup> Chi cánuú sáha yó jéē váha jnāhan yó, nasūu máni máa jéē váha máa yó.

<sup>25</sup> Cuu caji rō ndihí-ni cúñu cüyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. <sup>26</sup> Chi cuenta máa Jítoho yó cúu ñayiví jíin ndivii jeē íyó ini, te cuu cuajníñu yó.

<sup>27</sup> Te núu ĩn tēe tu cándje, cana de róhó caji rō jíin de, te núu cácuni rō quihīn rō, núu súcuan te caji rō táca jéē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. <sup>28</sup> Te núu cachi ĩn i nuū rō jeē cúñu ni sócō nuū ídolo cúu, yūcuán na te ma cáji rō, chí siquī jeē jéni ni i jeē cuēchi cúu, te tu cúní rō sáha ró jéē quiví i cuēchi. <sup>29</sup> Te súcuan cáhán rī siquī jeē inga i cájeni ni i jeē cuēchi cúu, te nasūu jéē súcuan cájeni ni máa ró.

Te sanaa te cahān ĩn ró: ¿A tu íyó libre rī caji rī jeē cúní máa rí, vēsú cájeni ni inga i jeē cuēchi cúu? <sup>30</sup> ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō. <sup>31</sup> Tuú chí ndihí jeē sáha ró, vēsú jeē caji rō chí jéē coho ró, chí na-ni jniñu sáha ró, ndihí na sáha yíñúhún ró jíin Yaā Dios, návāha cuni ñayuu jeē luu cújéhu ya. <sup>32</sup> Te ma sáha ró jniñu jeē squiví ró ñayuu nuū cuēchi, cúu ñayuu hebreo, cúu ñayuu táca naciōn jeē tu jíin jnūhun ya, cúu ñayuu cácandje Yaā Dios. <sup>33</sup> Te ruhū chí ndúcú rí jeē na cúñi ni táca ñayuu jíin táca jniñu sáha rí. Tu ndúcú rí jeē váha máa-ni rí, chí sa ndúcú rí sáha rí jeē váha cuehē ñayuu, návāha cácu i.

## 11

<sup>1</sup> Te na ndácu ró rúhū jijnáhan ró, nájñuhun ndácu máá rí Cristo.

*Siquí ndese cánúú sáha ñahan cándutútú*

<sup>2</sup> Váha cásáha ró, hermano, jeé niní cánucūhun ni rō ruhū, te cándihvī ni rō jijn táca jñiñu jeé ni steén rī nuū rō. <sup>3</sup> Te cúní rī jeé na jécūhun ni rō jeé Cristo cúnúú yá nuū táca tée. Te tēe cúnúú de nuū ñasihí de. Te Yaā Dios cúnúú yá nuū Cristo. <sup>4</sup> Núu ñn tēe ññhun de lélú te jícán tahú de chí nácani de jñūhun nuū ndutútú ñayuu cácanđje, núu sūcuan te jéhe de jñūhun canu máá de. <sup>5</sup> Te sa núu ñn ñahan tu ndési xinī ña te jícán tahú ña chí nácani ña jñūhun, núu sūcuan te jéhe ña jñūhun canu máá ña, chí ñn-ni cúu un núu ní sáte xinī ña. <sup>6</sup> Chí núu tú casi ña xinī ña, vāha ga na sáte ña ixí ña núu sūcuan. Te núu cúcanu ña jeé sáte ña ixí ña chí jéé sáte līi ña, te na cási ña núu sūcuan. <sup>7</sup> Te tēe chí ma cási de xinī de, chí máá de cúu muestra jeé steén ndese cúu Yaā Dios jeé cujéhnua ya. Te ñahan chí steén ña jeé cujéhnua tēe. <sup>8</sup> Chí ná ni sáha ya tēe, te nasūu jijn yiqui ñahan chí sáha ya, chí sa suhva jijn yiqui tēe ni sáha ya ñahan. <sup>9</sup> Te ñahan chí ni cuvāha ña jeé siquí tēe, nasūu tēe jeé siquí ñahan. <sup>10</sup> Te jeé yúcanu cánúú jéé cóndesi xinī ñahan, te suu steén jeé cujéhnua tēe, chí suni cándēhé ndajéhé yá ndese sáha ña. <sup>11</sup> Te vēsú sūcuan te yóhó jéé candíje yó, chí jíní yō jeé tu iyó tēe núu jeé tu iyó ñahan, te tu iyó ñahan núu jeé tu iyó tēe. <sup>12</sup> Chí vēsú ni sáha ya ñahan jijn yiqui tēe, te vijna cácu tēe chíji ñahan, te máá Yaā Dios cúu jeé sáha táca-ni.

<sup>13</sup> Na sáha máá ró cuenta ¿á iyó váha núu tu ndési xinī ñahan te jícán tahú ña nuū Yaā Dios? <sup>14</sup> Chí sáha yó cuenta jeé ini ñayivī yáha, núu cáni ixí tēe te cúcanu de sáha. <sup>15</sup> Te ñahan chí sa vāha jito ña te núu cáni ixí ña, chí suu ni jéhe ya jeé cóndesi xinī ña. <sup>16</sup> Te núu ndé ñn ñayuu cuní i cahān i siquí jñūhun yáha, te ruhū jijn táca grupo ñayuu cácanđje nuū Yaā Dios, tú na inga costumbre jejnúhūn rí siquí jñūhun yáha.

*Jeé caství i siquí Cena Jitoho yō*

<sup>17</sup> Te iyó inga jñūhun cánúú cahān rī jijn ró, chí tu cúu cahān rī jeé vāha cásáha ró. Chí nuū cándutútú ró te tu sáha jeé quéndō vāha ga rō, chí sa jeé caství ró. <sup>18</sup> Xihna jñūhun yáha cáhān rī, jeé nihín rī jñūhun jeé nuū cándutútú ró te cácusñn ni rō. Te jéni ni rī jeé ndaā cúu. <sup>19</sup> Chí níní coo sava ró jéé cusñn ni, návāha natūu ndé-ni cúu jeé cácanđje vāha mēhñu ró. <sup>20</sup> Te jeé cácusñn ró sūcuan nuū cándutútú ró, te nasūu cena máá Jitoho yō cúu jeé cáyeji rō núu sūcuan. <sup>21</sup> Chí núu cáyeji rō, te táca ñn ñn ró cúní caji xihna gā vēsú jñāhan ró. Te sūcuan te sava ró tu cánihñn, te cájii sōco, te sava ró cáñajini jeé cájihi cuehé. <sup>22</sup> ¿A tu cánevāha ró vehe nuū cáji rō coho ró, chí naún? Chí jeé casáha ró sūcuan cúu jeé tu iyó yíñúhūn ró ini vehe nuū cándutútú ñayuu cácanđje Yaā Dios, chí cásáha ró jéé cácanu ñayuu jeé tú na vé névāha. ¿Ndesse cahān rī jijn ró núu sūcuan? ¿A cáhān rī jeé vāha cásáha ró? Tuú chí nasūu jéé vāha cúu jeé casáha ró sūcuan.

*Siquí jeé ní jequín Jitoho yō Cenayā*

(Mt. 26.26-29; Mr. 14.22-25; Lc. 22.14-20)

<sup>23</sup> Chí jñūhun yáha jéé ní nastéén rī nuū rō, chí nuū máá Jitoho yō ni nihín rī: Jeé máá jecuáá jeé ní nastúu de Jitoho yō Jesús, te ni quihin ya pan. <sup>24</sup> Te ni nacuatáhu yá, te ni tahú cuéchí yá, te ni cahān yā jijn tēe cácuáha jijn yá: Quihin te caji rō jijnáhan ró, chí yáha cúu yiqui cúñu rī jeé ni sócō rī jeé siquí rō. Te níní caji rō sūcuan jeé cáñuhun ni rō ruhū jeé ni jihī rī jehé rō. Achí yá.

<sup>25</sup> Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñūhun copa yáha cúu niñī rī jeē sácutú contrato jeē jeē jnáma rī ñayuu. Te táca jínu jeē cájihi ró, te nucūhun ni rō ruhū. Achí yá. <sup>26</sup> Chī táca jínu jeē cáyeji rō pan un te cájihi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quivī ndíji ya.

### *Ndese caji yíñúhún i Cena yā*

<sup>27</sup> Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuēchi jeē tu iyó yíñúhún i síquī yíqui cúñu maá Jitoho yō jíin síquī niñī yā. <sup>28</sup> Núu súcuan te coto ndee rō maá ró núu iyó ndoo ánuá rō jeē tú cuēchi ró. Te saá te cuu caji rō pan un te coho ró copa un. <sup>29</sup> Chī núu ññ ñayuu tu yéji tu jíhi yíñúhún i te tu núcūhun ni i jeē yiqui cúñu yā cúu, ñayuu ún chi nihīn i castigo núu na cáji i coho i. <sup>30</sup> Jeē yúcuan cúu jeē iyó cuēhē ñayuu cácuñu jíin jéé ní cacuxíi, cáhīyo mēhñu ró. Te sava i je ni cajihī. <sup>31</sup> Te núu coto ndee yō maá yó nde ná tu caji yō, te Jitoho yō ma cuáha ya castigo yohó. <sup>32</sup> Te núu Jitoho yō jéhe ya castigo yohó, te súcuan stóho ya yohó návaha ma jnahnú ndetū yō jíin ñáyuu ñayīví.

<sup>33</sup> Ñānī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró. <sup>34</sup> Te núu ññ ñayuu jíi i sōco, te xīhna gā na cáji i vehe i návaha ma stívi i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

### *Siquī táca táhū jeē jéhe Espíritu*

## 12

<sup>1</sup> Hermano, cúní rī jeē na jécūhun ni rō síquī táca táhū jeē jéhe Espíritu nuū yō, suu táca modo jejniñu ññ ññ yó núu Yaā Dios.

<sup>2</sup> Te cájini rō jeē ná ni cuu ró ñáyuu ná tu candíje, te ni cacondíhvī ni rō ni cachiñúhún ró ídolo ñihīn. <sup>3</sup> Te vijna te na jécūhun ni rō jeē núu ndé ñáyuu cahán ndeváha i síquī Jesús, te nasūu jíin poder Espíritu Yaā Dios cúu jeē cahán i súcuan. Te ni ññ i ma cúu cahán i jeē Jitoho i cúu Jesús, te núu tu ndéé poder Espíritu Santo ini i.

<sup>4</sup> Te sñn sñn tahū jéhe ya jeē cuajniñu ññ ññ yó núu yā, te ññ-ni máá Espíritu cúu jeē jéhe. <sup>5</sup> Te sñn sñn jéjniñu yó, te nuū maá ññ-ni Jitoho yō jejniñu yó. <sup>6</sup> Te sñn sñn modo sáha yó jniñu ya, te ññ-ni Yaā Dios cúu jeē sáha jniñu un jíin yó. <sup>7</sup> Te nuū ná ññ ná ññ yó ní jéhe Yaā Dios tahū jeē sáha Espíritu yā jíin yó, návaha na sáha yó jéé ije jnáhan yó jíin jnúhun ya. <sup>8</sup> Chī sava yó ní canihīn tahū jeē ndichí cáhán yō jnúhun ya, sáha máá Espíritu. Te sava ga yō ni canihīn yō jeē cúu jécūhun vāha ni yō te castūhun yó, te suni máá Espíritu sáha. <sup>9</sup> Te nuū sava ga yō ni jéhe ya tahū jeē cúu cándíje ñihīn yó jéé sáha ya jeē jícan yō, te sava ga yō cúu sáha yó jéé ndúvāha ñayuu cácuñu, te suni máá Espíritu sáha. <sup>10</sup> Te sava ga yō cúu sáha jniñu jéhnu jíin fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácani yō táca jnúhun, núu vēji nuū Espíritu yā chí tuú. Te sava ga yō ni nihīn tahū jeē cahán yō tíjni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnáhan yó jíin inga yuhu ún. <sup>11</sup> Te táca táhū yáha, chí ññ-ni máá Espíritu sája, te sñn sñn jéhe ya nuū ññ ññ yó, ndese nújnahan ni máá yá.

### *Ndihí yó cúu nájnūhun ññ na yiqui cúñu*

<sup>12</sup> Chi nájnūhun ñn yiqui cúñu iyó cuéhē parte, súcuan cúu yó jíin Cristo jeē cúu yó nájnūhun yiqui cúñu yā, chi ñn na cúu yó jíin yā. Te vēsū cuehē parte cácuu yó te ñn-ni cúu yó, nájnūhun ñn yiqui cúñu jeē iyó cuéhē parte. <sup>13</sup> Chi ñn na ni canduu yó jíin yā ni sáha ñn-ni máá Espíritu ná ni cajendute yó. Súcuan cúu vēsū cúu yó ñáyuu hebreo chí ñáyuu griego, vēsū mozo jeē ní jeen ñáyuu chí tēe sájniñu cuenta maá. Te ndihí yó chi ñn-ni Espíritu ni canihñ yó.

<sup>14</sup> Te ñn yiqui cúñu chi nasūú ñn-ni parte cúu, chí sa cuehē parte cúu. <sup>15</sup> Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín. <sup>16</sup> Te núu sōho cahān: Nasūu cuenta yiqui cúñu cúu ri, chí nasūu tññu cúu ri, te tuú chí parte yiqui cúñu cúu nahín. <sup>17</sup> Núu ñí yiqui cúñu yō cúu tinūú, ¿te ndese cuni sōho yó núu súcuan? Te núu ñí yiqui cúñu yō cúu sōho, ¿te ndese cuaan yó xicō núu súcuan? <sup>18</sup> Te Yaā Dios ni chujnáhan ya ñn ñn parte yiqui cúñu, nájnūhun cúni yā jeē coo. <sup>19</sup> Chi núu ñn-ni parte cúu ndihí, te nasūú ñn ñí yiqui cúñu cúu núu súcuan. <sup>20</sup> Te tuú chí cuehē parte iyó, te ñn-ni yiqui cúñu cúu.

<sup>21</sup> Te ni ma cúu cahān tinūu jíin ndaha: Tu jíni ññhún rí rohó. Te ni xinī ma cúu cahān jíin jéhē: Tu jíni ññhún rí rohó. <sup>22</sup> Chi sa suhva táca parte yiqui cúñu jeē jéni ni yō jeē núu ga fuerza, suu cúu jeē cánuú gá. <sup>23</sup> Te táca parte yiqui cúñu jeē jéni ni yō jeē tu cáa vāha, suu cúu jeē yucún gá chūhun yó sahma. Te parte jeē tú-ni luu cáa, sa vāha ga jési yō. <sup>24</sup> Chi parte jeē lúu cáa, tu cánuú jéē condihyū. Chí súcuan ni chujnáhan Yaā Dios yiqui cúñu, jeē yucún gá ndító yó jéē tu cáa luu. <sup>25</sup> Súcuan ni sáha ya návāha ma cusñn táca parte yiqui cúñu, chí sa chindéé ñájánhan vāha jíin jnāhan. <sup>26</sup> Te núu jétú ñn parte yiqui cúñu, te suni ñí cáhnu-ni jétú. Te núu ñn parte ndító yucún yó, te suni ndihí-ni parte quéndōo vāha.

<sup>27</sup> Te rōhó jíjánhan ró chí nájnūhun yiqui cúñu Cristo cácuu ró, chí ñn na cúu yó jíin yā. Te ná ñn ná ñn ró cúu ñn ñn parte yā. <sup>28</sup> Núu súcuan te sñn sñn jniññ ni jēhe Yaā Dios nuú táca ñáyuu cácanđje jeē cácuu i nájnūhun ñn ñn parte yā: Te suu ñn parte yā cúu táca apóstol jeē ní jeni ya xīhna gā jeē scáca de jñūhun ya. Yūcuán na te jeē uú, tēe cácanani jñūhun ya, te jeē uní, tēe cástéén. Yūcuán na te ñáyuu casáha jniññu jéñu jíin fuerza yā, jíin ñáyuu casáha jeē ndúvāha ñáyuu cácuñu, jíin ñáyuu cachíndéé ñájánhan, jíin ñáyuu cándiso jniññu, jíin ñáyuu cácahān sñn sñn yuhu jeē tu cájecūhun ni. <sup>29</sup> ¿A ndihí yó cácuu apóstol, chí naún? ¿A ndihí yó cácanani jñūhun? ¿A ndihí yó cástéén? ¿A ndihí yó cuu sáha jniññu jéñu? <sup>30</sup> ¿A ndihí yó cuu sáha jeē ndúvāha ñáyuu cácuñu? ¿A ndihí yó cuu cahān sñn sñn yuhu? ¿A ndihí yó cuu nacastūhún yuhu ún, chí naún? Tuú chí sñn sñn tahū ni canihñ yō. <sup>31</sup> Núu súcuan te na cóndihvī ni rō cacān rō jeē cuáha Yaā Dios tahū cánuú gá nuú rō. Te vijna te na stéén rī nuú rō ñn jeē váha ga nuú táca gá tahū ún, suu jñūhun cúndáhú ni jnāhan.

*Jñūhun jeē cundáhú ni jnāhan*

## 13

<sup>1</sup> Vēsú núu cuu cahān yō tijni yuhu jeē cácahān ñáyuu chí jéē cácahān ndajéhé Yaā Dios, te núu tu cúndáhú ni yō jnāhan yó, te jñūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñáyuu. <sup>2</sup> Te vēsú cuu nacani vāha yó jñūhun ya, te cuu jecūhun ni yō táca jñūhun sáhi yá jíin táca jñūhun ndíchí, te núu tu cúndáhú ni yō jnāhan yó, te tu ndé jéjñiñu cuiñi yō núu súcuan. Te vēsú cuu candíje téyí yó jeē nde cuu cahān

yō jeē cújiyo yucu, te núu tu cundáhú ni yō jnáhan yó, te tu ndé jéjníñu cuiṭi. <sup>3</sup>Te vēsú na sája yó ndihí jeē névāha yó cuu ñayuu ndahú, te vēsú núu cuāha yó jñuhun cahmu ñayuu yohó jéē siquí jñuhun ya, te núu tu cundáhú ni yō jnáhan yó, te tu ndé jéjníñu cuiṭi.

<sup>4</sup>Ñayuu cundáhú ni chí íyó paciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máá. <sup>5</sup>Tu sájéē ni, tu ndúcú jéē cúu máá-ni, tu quítí ni, tu ñúhun ni jñuhun quítí ni. <sup>6</sup>Tu cúsiñ ni jíto jñiñu néé cásáha jnáhan, chí sa cúsiñ ni jíin jñiñu váha. <sup>7</sup>Ñayuu cundáhú ni chí ndihí jéhnde ni ndoho jehē jnáhan, te tu jécuiñí jeē candíje jnáhan, jíin jéē ñúhun ni jeē squícu jnáhan, jíin jéē jéndeýí ni jíin jnáhan.

<sup>8</sup>Jñuhun cundáhú ni chí ma náā cuiṭi. Te quiji quiví jeē tuá nacani i jñuhun, ni tuá cahān i tijni yuhu, ni tuá jíni ñúhún jñuhun ndichí. <sup>9</sup>Chí tu jíni váha váha yó vijna, te jñuhun cānacani yó suni jecu-ni cúu. <sup>10</sup>Te núu na quíji quiví jeē cúni yó ndihí, yūcuán na te tuá coo jeē jíni yó jecu-ni.

<sup>11</sup>Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun súchi lúlí. Te ná ni jehnu yó te ni stóo yó modo súchi lúlí. <sup>12</sup>Te suni súcuan, jecu-ni jécūhun ni yō vijna, nájnūhun jeē jíto yó núu ñn espejo jeē tú ndijin váha. Te cúcuéé gá te jecūhun cájí ni yó ndihí. Te vijna chí jecu-ni jíni yō, te cúcuéé gá te cuni váha yó ndese Yaā cúu ya, nájnūhun jíni váha ya yohó ndese ñayuu cúu yó. <sup>13</sup>Núu súcuan te íyó únī jñuhun jeē quéndōo cutú ní cáni: Jeē candíje ñihin yó jéē squícu ya jeē ni jéjñuhun ya, jeē cócuhun ni yō táca jéē váha coo, jíin jéē cundáhú ni yō jnáhan yó. Te jñuhun cundáhú ni chí jéhnú ndasí gá cúu nuū táca jéē yáha.

### *Siquí jeē cácahān i tijni yuhu*

## 14

<sup>1</sup>Na cóndihví ni rō cundáhú ni rō jnáhan ró, te suni cóndihví ni rō cacān rō táca táhū jeē jéhe Espíritu. Te tahū jeē cánuú gá cúu jeē nácani ró jñuhun ya. <sup>2</sup>Chí tēe névāha tahū jeē cahán de tijni yuhu jeē tu jécūhun ni de, chí máá-ni Yaā Dios jíni jeē cahán de, nasūu ñayuu. Chí ni ñn i ma jécūhun ni jeē cahán de. Chí sáha Espíritu jeē cahán de táca jñuhun yísahí. <sup>3</sup>Te sa suhva tēe nácani jñuhun ya, chí jíin ñayuu cahán de návāha íje i jíin jñuhun ya, te stíhví ni de i, te cahán ndeyí ni de jíin i. <sup>4</sup>Te tēe jeē cahán tijni yuhu, chí máá-ni de íje jíin jñuhun ya. Te tēe jeē nácani jñuhun ya, chí sa suhva sáha de jeē ñayuu cácaandíje íje i jíin jñuhun ya.

<sup>5</sup>Nújnahan ni rí jeē ndihí ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jñuhun ya. Chí jéhnú ga jñiñu sáha tēe nácani jñuhun ya vēsú tēe cahán tijni yuhu. Chí núu tú tēe castūhun jñuhun cáhán de, te ma cuajníñu jeē íje ñayuu cácaandíje. <sup>6</sup>Jeē yúcuán hermano jíin náhan ró, núu na jéē rí nuū rō, te núu cahān rí tijni yuhu jeē tu jécūhun ni rō, ¿te ndé cuajníñu ún? Te núu na cahán rí ñn jeē ni stéén yā, chí ñn jeē cútūhva ró jñuhun ndaā, chí ñn jeē nácani rí jñuhun ya, chí ñn jeē stéén rí nuū rō, yūcuan cúu jeē cuajníñu.

<sup>7</sup>Sáha yó cuenta jeē nájnūhun instrumento música, vēsú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yó na yaa jíta? <sup>8</sup>Te núu corneta tu jécú cájí, te ni ñn tēe ma sátūhva de quihñ de guerra. <sup>9</sup>Te suni súcuan róhó jíjñahan ró, núu tu cahán cájí ró jñuhun jecūhun ni ñayuu, ¿te ndese cuni i na vé cahán rō? Chí jñuhun cáhán rō ndíso tachí cuahān jíin. <sup>10</sup>Te ndaā chí íyó cuéhē yuhu ini ñayíví, te táca yuhu chí íyó ñayuu jécūhun ni.

<sup>11</sup> Te núu tu jécūhun ni yō yuhu cáhán ñn tēe, te cúu yó nájñūhun tēe ñuu jicá núu tēe cáhán, te suni nájñūhun tēe ñuu jicá cúu de nuū maá yó. <sup>12</sup> Jeē yúcuan rōhó jēe cácani ndasí ró nihñn rō tahū jeē jēhe Espiritu, na cácan rō tahū jeē sáha jeē ñe ñayuu cácanđje jíin jñūhun ya.

<sup>13</sup> Núu súcuan te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. <sup>14</sup> Chí núu jícan tahú yō jíin inga yuhu, te maá ánuá-ni yó cúu jeē jícan tahú, te tu ndé jéññū nuū jeē níjñūní yō. <sup>15</sup> ¿Ndeese sáha yó núu súcuan? Na cácan tahú yō jíin ánuá yō, te suni jíin jēe níjñūní yō. Na cáta yó yaa ñi jíin ánuá yō, te suni jíin jēe níjñūní yō. <sup>16</sup> Chí núu nácuatáhú ró máni jñūhun jeē ní quiiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chí tu jíni cuiți de na jñūhun cáhán rō. <sup>17</sup> Ndaā chí vāha nácuatáhú maá ró, te inga de chí tú na vé nihñn de jeē ñe de jíin jñūhun ya. <sup>18</sup> Na cutahū rí nuū Yaā Dios jeē cahán gā rí jíin tijni yuhu vésú maá ró jijnáhan ró. <sup>19</sup> Te vésú súcuan te núu ñne rí nuū cáyūcu tútu ñayuu cácanđje, te nújñahan gā ni rí cahán rí uhñn-ni jñūhun jeē jécūhun ni i te stéén nuū i, vésú jeē cahán rí uxí mil jñūhun jíin inga yuhu jeē tu jíni cuiți i.

<sup>20</sup> Hermano jijnáhan ró, ma cáni ni rō nájñūhun sūchi lúli, chí sa suhva na ñe ró jēe jécūhun vāha ni rō. Te coo ró nájñūhun sūchi lúli jēe tu jíni i jññū neé. <sup>21</sup> Te yósó núu tútu ley yā jehán: Jíin jñūhun cácahan tēe inga yuhu, jíin jñūhun cácahan tēe ñuu jicá, sáha rí jeē cúni sōho ñayuu yáha jñūhun rí. Te ni jíin súcuan ma sáha i cuenta jñūhun cahán rí, achí maá Jítoho yō. <sup>22</sup> Núu súcuan te tahū jeē cahán yō tijni yuhu, yúcuan cúu ñn jeē steén poder Yaā Dios nuū ñayuu tu cácanđje, nasūu núu ñayuu cácanđje. Te jeē nácani yó jñūhun ya, yúcuan cúu jeē steén nuū ñayuu cácanđje, nasūu núu ñayuu tu cácanđje. <sup>23</sup> Núu súcuan te núu ndihí ró ñayuu cácanđje cáhīyo tútu, te táca ró cácahan sñn sñn yuhu, te quivícoo ñayuu tu jécūhun ni jíin ñayuu tu cácanđje, ¿te á má cahán i jeē ní canduu loco ró? <sup>24</sup> Te núu táca ró cácanani jñūhun ya, te núu quiví ñn tēe tu cácanđje chí ñn tēe tu jécūhun ni, yūcuán na te nacuni de jeē tée íyó cuéchi cúu de, te coto ndee de maá de jíin jñūhun cácanani ró. <sup>25</sup> Te nucūhun ni de táca jēe ní jeni yuhu ni de jíin ánuá de. Yūcuán na te jecuiñi yiti de te chiñūhún de Yaā Dios. Te cahán de jeē ñne ndije Yaā Dios jíin ró jijnáhan ró.

### *Siqui jeē yucún yññūhún na cóo nuū ndutútú yó*

<sup>26</sup> Núu súcuan hermano jijnáhan ró: Nuū cándutútú ró te táca ró coo ñn yaa ñi cata ró, chí ñn jñūhun stéén rō, chí ñn jñūhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jēe nácastūhun ró jñūhun inga yuhu ún. Te ndihí ún na sáha ró návāha ñe ñayuu cácanđje jíin jñūhun ya. <sup>27</sup> Te núu cáhīyo tēe cahán inga yuhu, te na cáhan uñ de chí ún-ñi de, te ná ñn ná ñn tēe na cáhán. Te suni jíni ññhún jēe nacastūhún ñn tēe jñūhun ún. <sup>28</sup> Te núu tu íyó tée jeē cúu nacastūhun jñūhun ún, te tēe cácahan inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. <sup>29</sup> Te suni súcuan tēe cácanani jñūhun, na cáhan uñ de chí ún-ñi de, te sava ga ró nacani ni rō núu íyó ndáa jeē cácahan tēe ún. <sup>30</sup> Te núu inga tēe néne ni nihñn de ñn jñūhun jeē ni stéén yā nuū de, núu súcuan te tēe cáhan na jecuiñi jeē cahán de, návāha cahán inga tēe ún. <sup>31</sup> Te súcuan te ná ñn ná ñn ró cuu nacani ró jñūhun jeē steén yā nuū rō, návāha cutūhva ró te coo ndeyí ni rō. <sup>32</sup> Te tēe cácanani jñūhun, jíni ññhún cuatáhú de jeē nácani inga tēe jñūhun te jecuiñi jeē cahán maá de. <sup>33</sup> Chí Yaā Dios cuní yā jeē coo nayúú méhñu ró, násuu jēe sacā núu cuvaā rō.

Te nájñūhun cásáha tāca grupo hermano cācandíje, <sup>34</sup> suni súcuan tācá ñahan cāndutútú jíin ñáyuu cācandíje, na cóo nayúú ña. Chi tú vāha jeē cahán ña, chi sa cuatáhú ña nájñūhun cāhán tutu ley yā. <sup>35</sup> Te núu cúní ña cucáhnū ni ña ñin jñūhun, te nde vehe na cājñūhún ña yíi ña. Chi jñūhun canu cúu jeē cahán ñin ñahan mēhñu núu cāndutútú ró.

<sup>36</sup> Te na sáha ró cuenta jeē tu ní quēnda jñūhun Yaā Dios nuū maá ró jijnáhan ró, te nasūu maá ñin maá ró ní cānihñin jñūhun ya. <sup>37</sup> Núu ñin tēe jéni ni de jeē tēe nācāni jñūhun ya jíin tēe névāha Espíritu cúu de, núu súcuan te na cuājñūhún de jeē jñiñu ní ndacu Jitoho yō cúu jeē tēe ri yāhá. <sup>38</sup> Te núu tu jétáhú de jñūhun yáha, suni ma cuatáhú yó de.

<sup>39</sup> Núu súcuan, ñānī mánī jijnáhan ró, na cóndihvī ni rō nacāni ró jñūhun ya, te ma cāsī rō nuū tēe cācāhān sñin sñin yuhu. <sup>40</sup> Te yúcún yíñhún na sáha ró táca jñiñu.

### *Jñūhun jeē ní natecu Cristo*

## 15

<sup>1</sup> Hermano jijnáhan ró, vijna te nucūhun ni rō jñūhun jnáma ya yohó jeē ní nacāni ri nuū rō. Te jñūhun ún chi je ni cajetáhú ró, te suni cāhñin ñihin ró jíin. <sup>2</sup> Te suni jíin jñūhun ún te ni jnama ya rohó, te núu cāhñin ñihin ró jíin jñūhun ni nacāni ri nuū rō, te núu tu ní cācandíje cāha ró.

<sup>3</sup> Chi jñūhun cānuú gá jeē ni ñihñin maá rí ni nastéén rī nuū rō: Jeē ní jíihī Cristo siquī cuéchi yó, nájñūhun je cāhán tutu ñi nde jenahán. <sup>4</sup> Te ni quindūji ya, te ni natecu yā nuū uní quivī, nájñūhun cāhán tutu ñi. <sup>5</sup> Te ni nane ya nuū Pedro. Te sáa te ni nane ya nuū ndihúxí gā apóstol. <sup>6</sup> Te sáa te ni nane ya nuū vihyá gā uhñin ciento hermano jeē cáyūcu tútú. Te sava i tēcu gā nde vijna, te sava i je ni jíihī. <sup>7</sup> Te sáa te ni nane ya nuū Jacobo, yūcuán na te nuū ndihī ga apóstol.

<sup>8</sup> Te jeē sándihí na te ni nane ya nuū maá rí. Te nájñūhun ñin jeē ní cacu yúte, súcuan cúu jeē ñin sanaa-ni te ni nduu ri apóstol. <sup>9</sup> Chi tēe núu ga nuū tāca gā apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cācandíje nuū Yaā Dios. <sup>10</sup> Te siquī jeē ni sáha Yaā Dios jeē vāha ruhū, jeē yúcuan cúu ri apóstol vijna. Te jeē ní sáha ya jeē vāha ruhū, chi tú cāha ní cúu, chi sa ní scāca ga rī jñūhun ya vēsú tāca gā tēe apóstol. Te nasūu maá rí ní sáha, chi Yaā Dios ní sáha ya jeē vāha un jíin rí. <sup>11</sup> Núu súcuan te vēsú ruhū chí táca gā tēe ún, súcuan cānacāni ri jñūhun, te súcuan ni cacandíje ró.

### *Jñūhun jeē natecu ndīyi*

<sup>12</sup> Te jeē cānacāni ri jñūhun Cristo jeē ní natecu yā mēhñu ndīyi, ¿te naun cācāhan sava ró jéē ma nātecu ndīyi? <sup>13</sup> Chi núu jeē tú natecu ndīyi, te suni tu ní nātecu Cristo nuú. <sup>14</sup> Te núu jeē tu ní nātecu Cristo, te cānacāni cāha rí jñūhun ya nuú, te suni cācandíje cāha ró nuú. <sup>15</sup> Chi núu jeē súcuan cúu nuú, te cácuu ri tēe jeē tu cācāhān ndaā jñūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuan te tú ndaā jeē ní nastécu Yaā Dios Cristo. <sup>16</sup> Chi núu tú natecu ndīyi, te ni Cristo suni tu ní nātecu yā nuú. <sup>17</sup> Te núu tu ní nātecu Cristo, te cācandíje cāha ró te cādiso ñi gā rō cuéchi ró nuú. <sup>18</sup> Te núu jeē súcuan cúu nuú, te suni je ni cajnahñū ndetú ñayuu ni cacandíje Cristo. <sup>19</sup> Chi núu tú natecu ndīyi, te núu maá ñin-ni siquī vida yáha ñūhun ni yō jeē sáha Cristo jeē vāha yohó, núu súcuan te ndahú ndasí gā cácuu yó vēsú tāca gā ñayuu, chi cācandíje cāha yó nuú.



<sup>20</sup> Te tuú chi iyó ndáa jeē ní natecu Cristo mēhñu ndīyi. Te máa yá cúu jeē xihna gā ni natecu nuū tāca gá ndīyi jeē natecu. <sup>21</sup> Chi siquī jeē ni stívī ñn-ni tēe Adán, te ni quejéé jíhi ñayuu. Te suni súcuan siquī jeē ní sáha ñn-ni tēe Cristo, te natecu ñayuu. <sup>22</sup> Chi nájñuhun cájihī ndihī yó siquī jeē cácuu yó yúcūn Adán, suni súcuan natecu ndihī yó siquī jeē yíhi yó ndaha Cristo. <sup>23</sup> Te ná ñn ná ñn ndese ndíquín jnāhan máa: Xihna gā Cristo ni natecu yā, te sáa te quivī ndjji ya te natecu tāca ñayuu yíhi ndaha ya. <sup>24</sup> Yūcuán na te jinu tiempo, te snáa yā poder tācá enemigo jeē kujéhnu jíin jéē ndácu jniñu jíin jéē iyó poder. Te ndihī jeē ndácu ya jniñu nuū, nacuāha ya nuū Tatá yā Yaā Dios. <sup>25</sup> Chi cánuú jéē ndácu Cristo jniñu nde quiji quivī jeē quénde Yaā Dios poder tāca jéē jito uhū nuū Cristo, te stóho ya. <sup>26</sup> Te jeē sándihī na te snáa yā cuehyi jéhni ñayuu. <sup>27</sup> Chi cáhán tutu iī jeē sáha Yaā Dios jeē kujéhnu Cristo siquī ndihī, te cuatáhú nuū yā. Te jeē cahán jeē kujéhnu ya nuū ndihī-ni, te jíni vāha yó jéē máa Yaā Dios ma quíhi ya ndaha Cristo, chi Yaā Dios cúu jeē ní chíhi tācá un ndaha Cristo. <sup>28</sup> Te ná ní quivī ndihī ún ndaha Cristo, yūcuán na te suni máa Cristo jeē cúu ya Séhe, quivī ya ndaha Tatá yā, Yaā jeē ní chíhi tācá un ndaha ya. Te súcuan te máa Yaā Dios jniñ ya ndihī-ni.

<sup>29</sup> Te iyó ñayuu cájendute jehē ndīyi. Te núu tú natecu cuiti ndīyi, ¿te najehē cájendute i jehē ndīyi núu súcuan?

<sup>30</sup> Te ruhū jijnáhan ri, ¿najehē cúu jeē ndiquivī cájendeyí ni rī jito ri jñūndóho cuu rī, te núu tú natecu ndīyi? <sup>31</sup> Hermano, nájñuhun iyó ndáa jeē cúsñ ni rī siquī jeē cácandjje ró Jítho yó Jesucristo, suni súcuan iyó ndáa jeē ndiquivī nducú ñayuu cahni ruhū siquī jniñu ya. <sup>32</sup> Te jeē ní ndoho rī ní casáha tēe xeēn ñuu Efeso, jeē cácuu de nájñuhun quiti xéén, ¿te na vé nihín rī siquī un núu súcuan? Chi núu tú natecu ndīyi, te cuu cahán yó nájñuhun áchí ñn jñuhun: Na cúsñ ni yó caji yó coho yó, chi sanaa te sajnē te cuu yó, achi yó nuú.

<sup>33</sup> Ma cuáha ró jñuhun stáhú ñayuu rohó. Chi áchí ñn jñuhun: Núu cájica ró jíin ñayuu neé, te stívī i róhó jéē tuá caca ndaā rō. <sup>34</sup> Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návaha na cúcanu rō.

### *Ndese natecu ndīyi*

<sup>35</sup> Te sanaa te cahán ñn ró: ¿Ndese natecu ndīyi? ¿Ndese coo yiqui cúñu i? achi rō. <sup>36</sup> Tu jécūhun cuiti ni rō núu súcuan. Chi cúu nájñuhun jeē cátají ró tāca tata chíji ñuhun návaha nane yucū i. <sup>37</sup> Te tata jeē quivī chíji ñuhun, núu trigo chí inga tata, chi nasūu yúcū cúu, chi máa núnñ-ni cúu. <sup>38</sup> Te cuéé gá te cane, chi Yaā Dios ni jéhe ya yucū tata ún, ndese ni nujnahan ni máa yá, te ná ñn ná ñn tata chí sñn sñn cáa yucū ni sáha ya. <sup>39</sup> Te suni súcuan táca yiqui cúñu, chí tú inuú cándāa. Chi sñn cáa ñayuu, te sñn cáa quiti, te sñn cáa saa, te sñn cáa chācá. <sup>40</sup> Te suni súcuan cúu tāca jéē ín andivī jíin táca jéē iyó ñáyivī. Te sñn luu cáa jeē ín andivī, te sñn luu cáa jeē iyó ñáyivī. <sup>41</sup> Te sñn ndíndēe níandii, te sñn ndíndēe yóō, te sñn ndíndēe táca quími. Te táca ñn ñn quími chí suni sñn sñn ndíndēé. <sup>42</sup> Te suni súcuan coo jíin ndīyi jeē natecu. Ndīyi jeē chíndūji yó chí téhyū, te jeē nastécu yā chí ma cúū gā. <sup>43</sup> Jeē chíndūji yó chí ndáhú cáa, te jeē nastécu yā chí luu kujéhnu. Jeē chíndūji yó chí tú na fuerza, te jeē nastécu yā chí coo fuerza. <sup>44</sup> Jeē chíndūji yó chí ñn yiqui cúñu cuenta ñayivī cúu, te jeē nastécu yā chí ñn yiqui cúñu cuenta Espíritu yā cúu. Chi iyó yiqui cúñu cuenta ñayivī, te suni iyó yiqui cúñu cuenta Espíritu.



<sup>45</sup> Chi súcuan yósó núū tútu iī: Adán, tēe xīhna ñúhún, ni cuvāha de jín vida cuenta ñayīví, áchí. Te Cristo cúu nájñūhun inga Adán uū, te máá yá cúu Espíritu jeē jéhe vida. <sup>46</sup> Te nasūū yīqui cúñu cuenta Espíritu cúu jeē ní cuvāha xīhna gā, chí sa suhva yīqui cúñu cuenta ñayīví, te sáá te nduu cuenta Espíritu. <sup>47</sup> Te cuenta ñayīví cúu tēe xīhna ñúhún, chí ni cuvāha de jín tícachā ñūhun. Te Adán uū jeē cúu máá Jítoho yō, chí nde andiví ní quiji ya. <sup>48</sup> Te ñayuu ñayīví yáha, chí cúu i jñāhan Adán jeē ní cuvāha jín tícachā ñūhun. Te ñayuu jeē quívicoo andiví, chí ndúu i nájñūhun máá Yaā ní quiji nde andiví. <sup>49</sup> Chi jeē cáa yó nájñūhun tēe ni cuvāha jín tícachā ñūhun, suni súcuan coo yó nájñūhun cáa máá Yaā ní quiji nde andiví.

<sup>50</sup> Jñūhun yáha cástūhun rí nuū rō jijnáhan ró, hermano, jeē yīqui cúñu yō cuenta ñayīví yáha, ma cúu quīví ñuu nuū ndácu Yaā Dios jniñu. Chí jeē jihí cúu, te ma cúu quīví nuū cótecu ñí cáni. <sup>51</sup> Te cúní rī jeē na jécūhun ní rō jñūhun yáha jeē ní yisáhí: Nasūū ndihí yó cuu, te ndihí yó chí nasáma yīqui cúñu yō. <sup>52</sup> Chi quīví jeē cuécu sandihí na trompeta, te ñin yachī-ni, nájñūhun ñin jeē nácuenī-ni yó, te nasama ya yohó. Chí cuecu trompeta un, te natecu táca ndíyí jeē ma cúu gā i. Te táca yó jeē cátecu yō quīví ún, chí nasama ya yīqui cúñu yō. <sup>53</sup> Chi jeē tehyú yáhā, cánuú nucūhun jeē ma téhyú gā. Te jeē jihí cánuú nucūhun jeē ma cúu cuīti gā. <sup>54</sup> Chi jeē jihí jeē tehyú, chí quiji quīví jeē nucūhun jeē ma cúu gā ma tehyú gā. Yūcuán na te cundaā jñūhun yósó núū tútu iī: Jín poder yā ní snáa yā cuehyí jéñi ñayuu. <sup>55</sup> Cuehyí jéñi yóhó ¿ndese ga cuu sáha xeēn jín yó? Chí natecu yō. ¿Te ndese ga cundeyí jín yó? Chí snáa yā. Achí tutu. <sup>56</sup> Chi cuēchi cúu jeē sáha jeē cundeyí cuehyí jéñi ñayuu. Te ley yā jenahán sáha jeē náne cuēchi siquī yō. <sup>57</sup> Te na cútahū yō nuū Yaā Dios, chí jín máá Jítoho yō Jesucristo sáha ya jeē cundeyí yó siquī cuēchi jín siquī jñūhun cuu yō.

<sup>58</sup> Jeē yúcuan, ñānī mánī, cuiñi ñihin ró te ma cáca yátá ró jijnáhan ró. Te níni na sáñiñu vāha ró jín jniñu máá Jítoho yō. Chí je cájini ró jeē tu cásáñiñu cāha ró jín máá Jítoho yō.

*Siquī jeē cáquin i xūhún cuu táca hermano*

## 16

<sup>1</sup> Te vijna te cahān rī siquī xūhun jéē cáquin ró cuu hermano cácandíje cándoho ndáhú. Suni na sáha máá ró jijnáhan ró nájñūhun ni ndacu ri nuū táca grupo ñayuu cácandíje ichi Galacia. <sup>2</sup> Táca domingo te ná ñin ná ñin ró chuvāha sñin ró jecu xūhún, núu ndese ni ñihñ maá ró, návāha quīví jeē jinú rī nuū ró te je íyó túhva. <sup>3</sup> Te jeē jeé rī, te cuāha ri carta nuū táca tēe jeē nácāji ró, te tají rí de quingoo de nuū táca hermano cáyūcú Jerusalén, quīsíaha de xūhun jéé ní casocō ró. <sup>4</sup> Te núu íyó vāha jeē quihín rī, te suni quihín rī jín de jijnáhan de.

*Jeē cahán Pablo siquī jeē quícondēhé de ñayuu cácandíje*

<sup>5</sup> Te jeē jeé rī nuū ró jijnáhan ró, te jini ñúhún jeē xīhna gā jeē rī región Macedonia, yūcuán na te jeé rī ñuu ró Corinto. <sup>6</sup> Te sanaa te quendōo ri jín ró jijnáhan ró jecu tiempo, chí sanaa te coyūcu yó ñí tiempo mijin. Yūcuán na te cuu chindéé ñáhán ró ruhū, núu ndé chí quihín tucu rí. <sup>7</sup> Chi tu cúní rī jeē rī nuū ró vijna te yāha yachī rī quihín rī, chí ñúhún ni rī jeē quendōo ri jín ró jecu tiempo, te núu cuāha Jítoho yō jñūhun. <sup>8</sup> Te cone ri ñuu Efeso yáhā nde na

yáha quivī Pentecostés. <sup>9</sup> Chi coo cuehē ñayuu scandíje ri, te vāha quihīn jniñu Jítoho yō. Te suni íyó cuéhē ñayuu cácuu contra.

<sup>10</sup> Te núu na jéé Timoteo, te sáha ró jéé coo sīi ni de mēhñu ró, te ni iin ma cáni ni de siquī. Chi suni jniñu máá Jítoho yō sáha de, nájñuhun máá rí. <sup>11</sup> Núu súcuan te ni iin ró má sajeé ni rō nuū de. Chi sa suhva chindéé ñájnahan ró jíin de jeé na quihín gā de, te coo ndeyí coo sīi ni de, nāvāha ndiji de coto jnahan ri jíin de. Chi ruhū jíin sava ga hermano cándetu ri de.

<sup>12</sup> Te hermano Apolos chi ni cahān ndahú rí jíin de jeé na jéé de jíin sava ga hermano, condēhé de rōhó. Te ni jeni ni de jeé ma cúu jeé de vijna. Te núu na nūne de te jeé de.

### *Saludo jeé sándihí*

<sup>13</sup> Ndito coo ni rō jijnáhan ró, te cuiñi nihin ro jíin jnúhun cácandíje ró. Te téyí na cóo ni rō, te na cóo fuerza ini rō. <sup>14</sup> Te tāca jéé casáha ró, na sáha ró jíin jnúhun cúndáhú ni jnahan.

<sup>15</sup> Hermano, cájini rō jeé xíhna gā ñayuu vehe Estéfnas ni cacandíje ichi Acaya. Te ni cajēhe i máá i nuū jniñu jeé chindéé ñáhán i tācá hermano cácandíje. <sup>16</sup> Te cúni rí jeé suni máá ró jijnáhan ró, cuatáhú vāha ró ñáyuu casáha súcuan, jíin táca ñáyuu cachindéé ñájnahan te casájniñu siquī jniñu ya.

<sup>17</sup> Cúsī ni rí jeé ní quiijcoo Estéfnas jíin Fortunato jíin Acaico, chi tēe yáha ni cajejniñu de nuū rí jehē rō jeé tu ní cáhīyo ró jíin rí. <sup>18</sup> Chi ni ndundeyí ni rí, te suni súcuan máá ró jijnáhan ró, ni casáha de. Te cánuú cuajnúhún ró tāca tēe cándāa súcuan.

<sup>19</sup> Sándeyí ni rō jijnáhan ró, áchí táca grupo ñayuu cácandíje cáyūcu Asia. Aquila jíin Priscila jíin ñáyuu cácandíje jeé cándutútú vehe de, cácahān i jeé sándeyí ndasí ni rō jíin jnúhun máá Jítoho yō. <sup>20</sup> Te tācá hermano cácahān i jeé sándeyí ni rō. Te jeé cahán rō jíin táca jnahan ró, te yíñuhún techūhu ró ndaha i.

<sup>21</sup> Ruhū Pablo, jíin ndaha máá rí tēe ri jnúhun yáha jeé na sándeyí ni rō jijnáhan ró.

<sup>22</sup> Te núu ndé iin tu íyó mání jíin Jítoho yō Jesucristo, te na jnáhnú ndetū i núu súcuan. Te na cáhán yō: Jítoho ná, cúni na jéé yachī ndiji ní.

<sup>23</sup> Te ñúhun ni rí jeé maá Jítoho yō Jesucristo na sáha ga yā jeé vāha rōhó jijnáhan ró. <sup>24</sup> Te manī rí jíin ró jijnáhan ró jéé cácandíje ró Cristo Jesús. Súcuan na cóo. Amén.

## CARTA UU JEE NI TEE SAN PABLO APOSTOL NUU ÑAYUU ÑUU CORINTO

<sup>1</sup> Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndindúú rí jíin hermano yō Timoteo cátee ri carta yáha cuájee nuū rohó hermano ñuu Corinto jeē cá candije ró Yaā Dios, jíin núu ndihí rohó jéé cáyihí ndaha Yaā Dios jeē cáyūcu ní cáhnu Acaya. <sup>2</sup> Te cáñuhun ni rí jeē Tatá yō Yaā Dios jíin Jítoho yō Jesucristo na sáha ga yā jeē váha rohó te sáha ya jeē coo ndeyí coo sñ ni rō.

### *Siquí jeē ní ndoho Pablo jñúndóho*

<sup>3</sup> Na cáhán yō jeē yóhoyo cújéhnu Yaā Dios, Yaā cúu Tátá máá Jítoho yō Jesucristo. Chi máá yá cúu Tátá yō jeē cundáhú ni yohó, te níni sáha ya jeē ndúsñ ni yō. <sup>4</sup> Chi sáha ya jeē ndúsñ ni yō siquí táca jñúndóho ndóho yó, náváha suni cuu sáha máá yó jeē ndúsñ ni jnánhan yó jéé cándoho jñúndóho. Chi nájñūhun ni sáha ya jeē ndúsñ ni máá yó, suni súcuan sáha yó jéé ndúsñ ni i. <sup>5</sup> Chi jeē ndóho yó cuehē jñúndóho nájñūhun ni ndoho Cristo, suni súcuan nihīn yō cuehē jñūhun ndusñ ni, sáha Cristo. <sup>6</sup> Jeē yúcuan núu cándoho ri jñúndóho te súcuan te cuu sáha ri jeē ndúsñ ni rō te quendōo váha ga anuá rō. Te jeē sáha Yaā Dios jeē ndúsñ ni rí, suu sáha tucu jeē ndúsñ ni máá ró, te quendōo váha ga anuá rō. Te súcuan te nihīn rō fuerza jeē cuándeyí ni rō jíin táca jñúndóho nájñūhun cándoho ri. <sup>7</sup> Te cáñuhun ndasí ni rí jeē cúu rohó, chi cájini rí jeē nájñūhun cándoho ró jñúndóho jíin rí, suni súcuan ndusñ ni rō jíin rí sáha máá Yaā Dios.

<sup>8</sup> Hermano, cá cuni rí jeē na cúni rō jijnáhan ró ndese ni candoho ri ichi Asia. Chi yóhoyo xeēn jñúndóho ni cajito ri, nde je yajni tuá canda ri, te ni jeni ni rí jeē cuu rí nuú. <sup>9</sup> Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma tēnuú rí máá rí chi tú jñiñu ri, chi sa suhva Yaā Dios jeē nastécu ndiyí tenuú rí. <sup>10</sup> Chi máá yá ni scácu ruhū jijnáhan ri nuú jñúndóho xeēn jeé jé yajni cuu rí nuú, te suni súcuan scácu ya ruhū vijna. Te ñūhun ni rí jeē suni scácu tucu ya ruhū ichi núú gā. <sup>11</sup> Te suni na chindéé ñáhán ró ruhū jijnáhan ri jeē cacán tahú ró jehē rí. Chi núu cuehē ñayuu cacán tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

### *Jeē ní cucuéé Pablo quihīn de ñuu Corinto*

<sup>12</sup> Iyó ñin jeē sáha jeē cácusñ ni rí: Chi váha iyó ni anuá rí jeē váha ndoo te ndaā ni cajica ri nuú ñayuu ñayiví, te víhyá gā nuú máá ró jijnáhan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéé ndichí máá rí cúu jeē ní cajica ri súcuan. <sup>13</sup> Te jñūhun cátee ri nuú táca carta rí, chi máni jeē cúu cahu ró te jecūhun ni rō cúu. Te ñūhun ni rí jeē jecūhun váha ga ni rō, <sup>14</sup> nájñūhun je cájecūhun ni rō jecu. Te súcuan te cuu cusñ ni rō siquí rí quiví ndiji Jítoho yō Jesús, nájñūhun cácusñ ni rí siquí máá ró.

<sup>15</sup> Te siquí jeē súcuan ni cucáhnu ni rí, te jeē yúcuan ní jeni ni rí jeē núu na quihín rí Macedonia te jeē rí nuú máá ró xihna gā, náváha cusñ ni rō jeé jécondēhe rí rohó úu jínu núu. <sup>16</sup> Chi ni jeni ni rí jeé jécondēhe rí rohó, te yáha ri quihín rí Macedonia, te jeē nándicó rí Macedonia te ndiji tucu ri nuú rō. Yūcuán na te cuu chindéé ñáhán ró ruhū jeé quihín rí ichi Judea nuú. <sup>17</sup> Te jeē súcuan ni jeni ni rí, ¿te á téte tu nacani váha ni cúu ri jeē tu ní jéé rí nuú

rō, chí naún? ¿A cájeni ni rō jeē cúu ri nájñuhun ñayuu ñayivī jéē yachī cahán jeē cuu, yūcuán na te tuú, chí naún? <sup>18</sup> Tuú chí máá Yaā Dios jíní yā jeē tu cahán rī jín rō jeē cuu, te yachī nácahān rī jeē ma cúu. <sup>19</sup> Chí ruhū jín Silvano jín Timoteo ní canacani rī jñuhun Jesucristo Sēhe Yaā Dios nuū rō jijnáhan rō. Te máá yá tu cahán yā jeē cuu te nacahān tucu ya jeē ma cúu. Chí squícu ya jeē cahán yā. <sup>20</sup> Chí ndihī jeē ní jéjnūhun Yaā Dios, squícu máá Cristo. Te jeē yúcuān cácahān yō jeē yóhoyo luu cújéhnū Yaā Dios, te cácahān yō Amén, chí ndihī squícu Cristo Jesús. <sup>21</sup> Te Yaā Dios cúu jeē sáha jeē ruhū jijnáhan rī jín rōhó jijnáhan rō, cáhīn nīhin yó jín Cristo, te ní sándoo ya yohó jéē cuajñīñu yó núu yā. <sup>22</sup> Te suni ní jēhe ya Espírītu yā jeē cóndee inī anuá yō, te cúu ya nájñuhun iin sello jeē steén jeē cúu yó sēhe Yaā Dios. Te sáha Espírītu jeē iyó ndáā ní yō jeē cuāha Yaā Dios tahū yō.

<sup>23</sup> Te jeē ná tu jeē rī nuū rō ñuu Corinto, nájñuhun ní jeni ní rī, suu cúu siquī jeē tu ní cúní rī cuxeēn rī nuū rō jeē tu cása ha váha rō. Te máá Yaā Dios cúu Yaā jíní jeē cahán ndaā rī. Te iyó váha jeē na cúu rī te núu tu cahán ndaā rī. <sup>24</sup> Te nasūu jéē cácuni rī ndacu nīhin rī jniñu nuū rō siquī jñuhun cácandjē rō yá, chí je cáhīn nīhin ro jín jñuhun ún. Chí sa suhva cácuni rī chindéé ñáhan rī rohó jéē na cúsiñ gā ní rō.

## 2

<sup>1</sup> Núu súcuān te ní jeni ní rī jeē ma jéē rī inga jínu nuū rō jín jñuhun cuxeēn rī te cucuíhyá ní rō sáha rī. <sup>2</sup> Chí núu cucuíhyá ní rō sáha rī, ¿te ndé ñáyuu sáha jeē cusī ní máá rí? Tuá na inga ñayuu, chí máni máá rōhó, te ndese cuu te núu ní sáha rī jeē cucuíhyá ní rō. <sup>3</sup> Te jeē yúcuān cúu jeē ní tee rī carta un núu rō, návāha nacani ní rō siquī cuéchi rō sáha, te ma cucuíhyá ní rī sáha cuéchi rō quívi jeē rī nuū rō. Chí sa suhva sáha rō jéē cúsi ní rī. Te jíní váha rī jeē núu cusī ní rī, te suni ndihī rō jijnáhan rō cusī ní rō. <sup>4</sup> Te jeē ní tee rī carta un núu rō, te yóhoyo ní nacani ní rī siquī rō, te ní jnahuhū ní rī, te nde ndahyú rī ní tee rī. Te tu ní téē rī jeē sáha rī jeē cucuíhyá ní rō, chí sa suhva návāha cuni rō ndese yóhoyo manī rī jín rō.

### *Jeē íne cáhnu ní Pablo nuū téē ní sáha cuéchi*

<sup>5</sup> Te jeē ní cucuíhyá ní rī ní sáha tēē jeē ní sáha cuéchi ún, te nasūu máá-ní rī, chí suni nde máá rō jijnáhan rō ní sáha de jeē ní cacucuíhyá ní rō jecu. Te cahán rī jeē jecu-ní, chí tu cúní rī cuxeēn ndasí rī. <sup>6</sup> Te jín jéē ní cacuxeēn rō nuū de ná ní candutútú rō, te jín yúcuān-ní te ní cuu-ní. <sup>7</sup> Te vijna chí jíní ñuhūn jeē cóne cáhnu ní rō nuū de, te sáha rō jéē ndúsī ní de, chí sanaa te caa ga cucuíhyá ní de, te ma ndúsī gā ní de. <sup>8</sup> Núu súcuān te cahán ndahú rī jín rō jijnáhan rō jéē steén tucu rō jéē iyó máni rō jín de. <sup>9</sup> Chí jeē siquī jniñu yáha cúu jeē ní tee rī carta un núu rō, návāha coto ndee rī rohó núu cuatáhú váha rō jniñu ndácu rī nuū rō. <sup>10</sup> Núu súcuān te núu íne cáhnu ní rō nuū ñayuu, te suni súcuān ruhū. Chí jeē íne cáhnu ní rī nuū ñayuu núu ní sáha i cuéchi, te sáha rī súcuān siquī jeē manī rī jín rō jito jínú Cristo. <sup>11</sup> Chí cánuú cone cáhnu ní yō, chí tu cúní yō jeē nīhīn Satanás cuéchi siquī yō, chí je jíní váha yó ndese ndúcú un stáhú yohó sáha yó cuéchi.

### *Jeē tu ní íyo nayúú ní Pablo inī ñuu Troas*

<sup>12</sup> Ná ní jehēn rī ñuu Troas jeē nácani rī jñuhun Jitoho yō Cristo, te váha ní sáha ya jeē ní íyo modo jeē nácani rī jñuhun ya. <sup>13</sup> Te vésú súcuān te tu ní íyo

nayúu ni anuá rī, chi tu ní nínjahan ri jín hermano yō Tito. Yūcuán na te ni nacuatáhú rí nuū ñayuu yūcuán, te cuananducú rí de ichi Macedonia.

### *Jñuhun jeē cujéhu ndúú yó jín Cristo*

<sup>14</sup> Te na cútahū yō nuū Yaā Dios, chi níni ndéca vāha ya yohó cuángoo yó jín Cristo Jesús, te ndúú yó jín yá jeē cujéhu ndasí yá snāa yā poder ndihi enemigo yā. Te jéjníñu ya yohó jéē scuité núu yó jñuhun ya tǎcá-ni lugar, nájñuhun jíté núu ñin xicó asín. <sup>15</sup> Te cúu yó nájñuhun ñin sūje jeē jeén asín nuū Yaā Dios sáha Cristo. Te nájñuhun jeē jinú xicó un núu ñayuu cācu ánuá jín núu ñayuu jnahñū ndetū. <sup>16</sup> Nuū ñayuu jnahñū ndetū chi cúu yó nájñuhun ñin xicó jeē cúu i sáha, te nuū ñayuu cācu ánuá chi cúu yó nájñuhun ñin xicó vāha jeē cótecu i sáha. Te ni ñin yó ma cánda yó sáha yó jniñu yáha, te núu ma chindéé ñáhán yá yohó. <sup>17</sup> Te ruhū jijnáhan ri, tu cásáha ri nájñuhun cásáha cuehē tēe jeē cánducú de nihín de xūhun síquī jñuhun Yaā Dios. Chi sa cánacani ndaā rī jñuhun ya, chi máa Yaā Dios ni tají rúhū, te máa yá jini jeē cánacani ndaā rī síquī jeē cáncandje ri Cristo.

### *Jñuhun síquī contrato jeé*

## 3

<sup>1</sup> Te jeē cácahān rī súcuan, ¿te á cájeni ni rō jeē cánducú tucu ri cahān rī jeē vāha ga tēe cácuu ri, chí naún? ¿Te chí jini ñúhún jéē steén rī carta recomendación nuū rō, chí jéē cacán rī cuāha ró núu rī jijnáhan ri, nájñuhun cásáha sava i? <sup>2</sup> Tuú chi máa-ni ró cácuu nájñuhun ñin carta recomendación rī. Te jeē ñúhun ni rī jeē ní cacandje vāha ró ni sáha ri, suu cúu nájñuhun jeē yosó jñuhun carta un ini anuá rī. Te ndihi ñayuu chi nájñuhun cáhu i, cúu jeē jini i ndese ni nasāma ró. <sup>3</sup> Chi máa ró cácuu nájñuhun ñin carta jeē ní tee Cristo te cáscáca ri. Te nasūu jín tinta ni tee ya, chí sa suhva jín Espíritu Yaā Dios, Yaā técu. Te nasūu núu tabla yuū nájñuhun ni tee ya ley yā, chí sa suhva nuū anuá ñayuu ni tee ya.

<sup>4</sup> Te cácahān rī súcuan, chí cácuacáhu ni rī Yaā Dios síquī jeē ni sáha Cristo. <sup>5</sup> Te nasūu jéē cájeni ni rī jeē cúu canda máa rí sáha ri jniñu ún. Chi sa suhva máa Yaā Dios sáha jeē cuu squícu ri. <sup>6</sup> Te máa yá ni sáha jeē cuu cuajniñu vāha ri síquī contrato jeé yá. Te contrato yáha tu cáhán jeē squícu yó ley jeē ní tee jín letra, chí sa suhva jeē caca yó jín vida jeé, suu jeē ní jéhe Espíritu yā. Chi contrato ley jeē yosó jín letra, jnahñū ndetū ñayuu sáha. Te jeē sáha máa Espíritu cúu jeē cótecu yō ní cáni.

<sup>7</sup> Te ley jenahán jeē ní jéhe ya nuū Moisés, ni yosó letra nuū tabla yuū. Te yōhyo ni cujéhu, te ni ndindéé ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núu de. Te núu súcuan ni cujéhu ndasí ley jeē sáha jeē cuu ñayuu te jnahñū ndetū i, <sup>8</sup> te sa víhyá gā cujéhu ndasí gá jñuhun cotecu yō jeē jéhe Espíritu nuū yō. <sup>9</sup> Chi núu yōhyo ni cujéhu ley un jéē jnahñū ndetū ñayuu sáha, te sa víhyá gā cujéhu jñuhun jeē ndáhva Yaā Dios cuéchi yó. <sup>10</sup> Chi ley un jéē ní cujéhu nde saá, tuá cujéhu cuíti, síquī jeē cujéhu ndasí gá jñuhun Espíritu jeē iyó vijna. <sup>11</sup> Te núu súcuan ni cujéhu ley jeē ní iyo jecu-ni tiempo, te sa cujéhu ndasí gá jñuhun jeē coo ní cáni.

<sup>12</sup> Te jeē súcuan cáñuhun ni rī, jeē yúcuán cáñiyo téyí ni rī nácani ri jñuhun yáha. <sup>13</sup> Chi tu cásáha ri nájñuhun ni sáha Moisés jeē ní jesi de ñin sahma nuū de, návāha tú coto ñayuu Israel ndese cuandahvā jeē ní ndindēe núu de.

14 Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jési sahma un núū jeē níjnūni í, te tu cújiyo cuiiti. Chi nde jeē candíje i Cristo, yūcuán na te cujiyo. 15 Te suni súcuan nde vijna núu cácahu i tutu ley Moisés, te nájnūhun jeē jési ñn sahma nuū jeē níjnūni í. 16 Te jeē násama ini ñn ñayuu quiví i nuū maá Jítoho yō Cristo, yūcuán na te cújiyo-ni jeē jési ún. 17 Chi Jítoho yō cúu maá Espíritu. Te nuū ñe Espíritu maá Jítoho yō, yūcuan cúu nuū iyó libre ñayuu jeē tuá yíhi i chíji ley jenahán. 18 Te jeē yúcuan maá yó jijnáhan yó, tuá jési nuū jeē níjnūni yō. Chi cácuu yó nájnūhun espejo jeē jéhe nduva, cúu jeē cájica ndaá yō te suu stéén ndese yōhyo luu cújéhu maá Jítoho yō. Te maá yó táca quiví cuanasama yó cuanduu luu ga anuá yō nájnūhun cáa maá yá. Chi maá Jítoho yō jeē cúu ya Espíritu, súcuan sáha ya jíin yó.

## 4

1 Núu súcuan te tu ndínuu ni rí cánacani ri jnūhun ya. Chi siquí jeē ní cundáhu ni yā ruhū jijnáhan ri te ni jéhe ya jniñu yáha nuū rí. 2 Te tu cásaha ri jniñu néé jeē cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rí máni jnūhun ndaā. Te súcuan te cuu cuni táca ñayuu ini anuá i jeē cácahān ndaā rí jito jínúu Yaā Dios. 3 Te núu iyó ñayuu tu jécūhun ni jnūhun jnama ya yohó jéé cáncago ri, te súcuan cúu nuū máni maá ñayuu jnahnú ndetū. 4 Te jeē tu cácandíje i, te maá jéxeén jeē ndácu jniñu ini ñayiví yáha, ní jesi nuū jeē níjnūni í, návāha ma ndíndēe jnūhun Cristo ini anuá i, te ma cūni i jeē yóhyo luu cújéhu Cristo, Yaā jeē ínuu cáa jíin Yaā Dios. 5 Te jeē cánacani ri jnūhun, te nasūu jnūhun maá rí, chi sa suhva jnūhun Jítoho yō Jesucristo cánacani ri. Te maá rí chi cácuu ri mozo-ni nuū rō jijnáhan ró jéé siquí jeē maní rí jíin Jesús. 6 Chi ná ni sáha Yaā Dios ñayiví te ni cahān yā jeē na cúndijin nuū néé. Te suni súcuan ni sáha ya jeē ní cundíjin nuū anuá yō jeē cájecūhun ni yō siquí Jesucristo, ndese ndíndēe núu yā, cúu jeē yōhyo luu cújéhu ya nájnūhun cúu Yaā Dios.

### *Jeē cándiquñ yō jnūhun cácandíje yó yá*

7 Te táca jnūhun yáha jeē yóhyo luu cújéhu, chi nájnūhun jeē ñūhun ini ñn quísi ñuhun. Chi cácuu yó nájnūhun quísi ñuhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder siquí jnūhun yáha jeē yóhyo luu cújéhu, te nasūu fuerza maá rí cúu. 8 Te jeē yúcuan, vésú táca lado cájito ri jnūndóho, te tu sáha jeē ma ndúsā gā ni rí. Te vésú cácuuñhā ni rí siquí jnūndóho, te cáñuhun ni rí jeē quee vāha jniñu ri. 9 Te vésú cájito xeēn ñayuu ruhū, te maá yá tu stóo ya ruhū jijnáhan ri. Te vésú cánducú i snāa i ruhū jíin jniñu sáha ri, te ma cúu. 10 Te ndé-ni cúu nuū cáncago ri, te nájnūhun ni ndoho Jesús jeē ni jíhi yā, suni súcuan cándoho ri jeē jé yajni cuu rí, návāha suni cuu stéén rí fuerza Jesús jeē técu yā ini yiquí cúñu rí. 11 Chi jeē niní cátecu rí, te táca quiví je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiquí cúñu rí jeē cúu. 12 Núu súcuan te ruhū jijnáhan ri, níni cúu jeē jé yajni cuu rí siquí jnūhun ya, te yūcuan sáha jeē cotecu maá ró ñí cáni jijnáhan ró.

13 Te yósó núu tútu íi: Ni candíje ri te jeē yúcuan ní cahān rí, achí. Te suni jeē cácandíje maá rí cúu jeē cánacani ri jnūhun ya. 14 Chi cájini ri jeē maá Yaā jeē ní nastécu Jítoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndihi yó núu yā. 15 Chi táca jnūndóho yáha cándoho ri návāha coo vāha

ró rójnánhan ró. Te súcuan te cayā cuehē gā ñayuu jeē sāha ya jeē váha i. Yūcuán na te suni yōhoyo cuehē i nacuatáhú i nuū Yaā Dios, te cujéhnú ga yā sāha.

<sup>16</sup> Jeē yúcuan cúu jeē tu ndínuu ni rī, te vēsú cuandihí fuerza yiqui cúñu rī, te sa suhva cuanduu fuerza gā anuá rī tāca quívi. <sup>17</sup> Chi jnündóho jeē ndóho yó ñayívi yáha, tú-ni xeēn cúu, te yachī yáha. Te sāha jeē nihín yō ñn tahū jeē cujéhnú yó ní cáni jeē cáa ndasí gā vēsú jnündóho ún. <sup>18</sup> Te tu táñúhún yó nuū tāca jnündóho jító yó nuū vijna, chí sa suhva táñúhún yó nuū tāca jéé váha jeē tu jító yó nuū vijna. Chi tāca jéé jító yó nuū vijna, chí yachī ndihí, te tāca jéé tu jító yó nuū, chí coo ní cáni.

## 5

<sup>1</sup> Chi yiqui cúñu yō jeē ndeé yó ñayívi yáha, cúu nájnūhun ñn vehe jeē náā. Te cájini yō jeē núu na náā, te cuáha Yaā Dios ñn yiqui cúñu jeé, te suu cúu nájnūhun ñn vehe jeē coo ní cáni íchí ándivi. Te nasúu ñn vehe jeē sāha ñayuu cúu, chí jeē sāha Yaā Dios cúu. <sup>2</sup> Te níni jéé ndeé yó vehe yáha jeē cúu yiqui cúñu yō, te cájitū ni yō sāha, chí yōhoyo cúní yō jeē núcūhun yó yiqui cúñu jeé yó nde ándivi. <sup>3</sup> Chi jeē núcūhun yó un, te ma cóo máá na anuá yō jeē náā yiqui cúñu yó yáha. <sup>4</sup> Chi níni jéé iyó gá yō ñni vehe yiqui cúñu yō yáha, te jítū ni yō te cúcuíhyá ni yō. Te nasúu jéé cuní yō jeē stóo yó yiqui cúñu yō te coo máá-ni ánuá yō. Chí sa suhva cúní yō núcūhun yó jéé jéé, náváha ndahvá yiqui cúñu yō jeé náā, te coo máá jéé cótecu ní cáni. <sup>5</sup> Te Yaā Dios cúu jeē ni sāha ya jeé súcuan coo yó. Te ni jéhe ya Espíritu yā jeé cóndee ñni anuá yō, te sāha Espíritu jeé iyó ndáá ni yō jeé cuáha Yaā Dios tahū yō.

<sup>6</sup> Núu súcuan te níni cúu jeé cácuacáhnú ni rī. Chí cájini rī jeē níni ndeé gá rī chíji yiqui cúñu yáha, te jíca cúu rī jíin núu ndeé máá Jítóho yō. <sup>7</sup> Chí vijna chí cácuacáhnú rī jeé iyó yá jíin rī, vēsú ná tu coto rī nuū yā. <sup>8</sup> Te cácuacáhnú ni rī, chí sāha rī cuenta jeé váha ga núu na quénda rī chíji yiqui cúñu yáha te quihín rī condee rī jíin máá Jítóho yō. <sup>9</sup> Jeē yúcuan cúu jeé cánducú ndéyí rī sāha rī jeé cusí ni yā jíin rī, vēsú núu ndeé gá rī yiqui cúñu rī chí vēsú núu condee rī jíin yá. <sup>10</sup> Chí cánuú jéé ndihí yó cuiñi yuhu mesa Cristo jeé sándaá yā jniñu yó. Te ná ñn ná ñn yó nihín yó siquí ndese ni casáha yó, á jéé váha chí jéé neé, ná ni condee yó chíji yiqui cúñu yō.

### *Siquí jeé ndávicoo yó nuū jnúhun maní Yaā Dios jíin yó*

<sup>11</sup> Núu súcuan te cándiso íyo rī nuū máá Jítóho yō, te jeé yúcuan ndúcú ndéyí rī scandíje rī ñayuu. Te jíni Yaā Dios jeé cáhíyo ndáá rī, te ñúhún ni rī jeé suni súcuan cájini máá ró. <sup>12</sup> Te nasúu jéé cánducú tucu rī cahán rī jeé váha ga tēe cácuu rī, chí sa suhva cástūhun rī jeé cuu cusí ni ró jeé siquí rī jíinánhan rī. Te súcuan te cuu stío cuñí rō nuū ñayuu jeé cutéyí i siquí ndese cáa ñayuu, te tu sāha i cuenta ndese cáa ñni anuá ñayuu. <sup>13</sup> Te va sanaa te cájeni ni ró jeé tēe loco cácuu rī jeé cácahán rī súcuan. Te siquí jeé cándihví ni rī jehé Yaā Dios cúu. Te tuú chí cáhíyo váha xiní rī, te jeé yúcuan cájejniñu rī jeé quéndóo váha ró. <sup>14</sup> Chí siquí jeé ní cundáhú ni Cristo ruhú jíinánhan rī cúu jeé cánuú nacani rī jnúhun ya. Chí cájini váha rī jeé ni jíhí mañúhún-ni ya jeé siquí ndihí yó, te jeé yúcuan nájnūhun ni jíhí ndihí yó jíin yá. <sup>15</sup> Chí ni jíhí yá jeé siquí ndihí yó náváha tāca yó jéé tēcu, ma cótecu ga yō jeé sāha yó jéé cuní máá yó, chí sa suhva jeé cuní máá yá jeé ni jíhí yá te ni natecu yá jeé siquí yó. <sup>16</sup> Jeé yúcuan tuá casáha rī cuenta ndese-ni cándáa ñayuu, nájnūhun casáha ñayuu ñayívi. Te vēsú súcuan ni casáha rī cuenta siquí Cristo nde saá, jeé ñn tēe-ni cúu ya, te vijna chí cájini



rī jeē cúu ya Sēhe Yaā Dios. <sup>17</sup> Chi núu ñn ñayuu ȳhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

<sup>18</sup> Te Yaā Dios cúu jeē sáha ndihi jeē yáha, chi jíin Cristo ni sáha ya jeē ní ndávicoo yó núu jnúhun manī yā jíin yó. Te ni tejníñu ya ruhū jeē cánacani rī jnúhun jeē ndávicoo ñayuu nuū jnúhun manī yā jíin i. <sup>19</sup> Chi jíin Cristo te ni sáha Yaā Dios jeē ñayuu ñayivi ndávicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani rī jnúhun yáha ndese ndávicoo i nuū jnúhun manī yā jíin i. <sup>20</sup> Núu súcuan te cácuu rī tēe cájica jniñu máa Cristo. Te jeē cahán rī, te nájnūhun jeē máa Yaā Dios cahán ndahú yā jíin ró. Núu súcuan te cácahán ndahú rī jíin ró jeē cahán Cristo, jeē na ndávicoo ró núu jnúhun manī Yaā Dios jíin ró. <sup>21</sup> Te Cristo, vesú tú ni ñn cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéē ȳhi ndaha Cristo, ni nucondee síquī yó jeē iyó ndáa yó nájnūhun iyó ndáa Yaā Dios.

## 6

<sup>1</sup> Núu súcuan te síquī jeē cácuu rī tēe casájniñu jíin yá, te cácahán ndahú rī jíin ró jeē ma stóo uun ró jnúhun jeē ni sáha Yaā Dios jeē váha róhó. <sup>2</sup> Chi áchí yá nuū tútu ñ:

Máa tiempo cuni maá rí te cuni sōho rí jnúhun cáhán ndahú ró jíin rí.

Te máa tiempo jnama rī ñayuu, te jnama rī rohó.

Achí yá. Te vijna-ni cúu maá tiempo jeē cuni yá, chi vijna-ni cúu tiempo ni quiji Yaā jnama yóhó.

<sup>3</sup> Te cánducú rí jeē ma sáha ri ni ñn jniñu jeē casi jeē candíje ñayuu, návāha ma cahán i síquī jniñu ndíso rī. <sup>4</sup> Chi sa suhva cánducú rí jeē ndihi jeē sáha rī, steén jeē cácuu rī tēe cájejniñu nuū Yaā Dios. Jeē yúcuan cájendeyí ni rī jíin jéē ndóho rī jnúndóho, jíin jéē cúmani nuū rī, jíin jéē yí sáha jíin rí. <sup>5</sup> Chi ni iyo tijni jínu jeē ní cacani i ruhū, jeē ní cachune i ruhū vecā, jeē ní candonda i síquī rī, jeē ní casájniñu ñhin rī, jeē ní cajehni rī mähna máa rí, jeē ní cahíyo ndite ni rī.

<sup>6</sup> Te suni cánducú rí jeē cuajnúhún i ruhū síquī jeē ndoo cájica rī, te cájecūhun váha ni rī jnúhun ndaā, te cáhíyo paciencia ni rī, te váha ni rī, te ndéé Espiritu Santo ini rī, te cákundáhú ndije ni rī jnáhan rī. <sup>7</sup> Te cánacani ndaā rī jnúhun, te poder Yaā Dios íne jíin rí. Te jíin jnúhun ndaā cándahva rī tācá jniñu neé, chi nájnūhun jeē cájejnáhan rī síquī. Chi nájnūhun jeē ndóna un síquī rī te ndóna rī síquī. <sup>8</sup> Iyó jínu yíñúhún ñayuu jíin rí, te iyó jínu tuú. Iyó jínu jéjnúhún i ruhū, te iyó jínu cácahán i síquī rī. Iyó jínu cácahán i jeē tēe stáhú cácuu rī, te iyó jínu cácahán i jeē tēe ndaā cácuu rī. <sup>9</sup> Iyó jínu casáha i nájnūhun jeē tu jíin i ruhū jijnáhan rī, te iyó jínu jeē jíin váha i ruhū. Iyó jínu jeē cuni ñayuu cahni i ruhū, te cátecu nahín rí. Te vesú cástóho i ruhū, te tu cájihí rī sáha. <sup>10</sup> Te vesú iyó jéē cácuuñhá ni rī, te níni cácusñ ni rī. Te vesú tēe ndáhú cácuu rī, te sácúca rí cuehē ñayuu jíin jnúhun ya. Te vesú tú na vé cánevāha rī, te jíin máa yá te ndihi-ni cúu jeē cánevāha rī.

<sup>11</sup> Hermano ñuu Corinto, súcuan cúu jeē cácahán cají rí jíin ró jijnáhan ró, chi síquī jeē maní rí jíin ró, jeē yúcuan cáchí ndihi rī ndese cándoho rī. <sup>12</sup> Máa rí jijnáhan rí cácahán cají rí síquī jeē maní ndasí rí jíin ró, te máa ró jijnáhan ró sanaa te tu súcuan cúu. <sup>13</sup> Nájnūhun cáhán tatá jíin sēhe, súcuan cáhán ndahú rí jíin ró jeē nájnūhun iyó mání rí jíin ró, súcuan na cóo maní tucu ró jíin rí.

*Siquí jeē cúu yó templo Yaā Dios*



<sup>14</sup> Ma quívi nduu rō jíin jniñu néé cásáha ñayuu tu cácanđje, chi ma cúu coo inuú rō jíin i. ¿Chi ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyúcú inuú ñayuu cájica jíin luz yā jíin ñáyuu cájica nájnūhun nuū néé? <sup>15</sup> ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácanđje jíin ñáyuu tu cácanđje? <sup>16</sup> ¿Te ndese cuu quijnáhan templo Yaā Dios jíin ídolo? Chi máá rō cácuu templo Yaā Dios, Yaā tēcu, chi ndéé yá ini anuá rō, nájnūhun ni cahān yā:

Condee rī ini i te caca cuu ri mēhñú i,  
te cuu ri Yaā Dios maá i,  
te cuu i ñayuu maá rí.

<sup>17</sup> Te jeē yúcuan ní cahān gā yā:  
Ma quívi nduu rō jíin jniñu néé cásáha i,  
te cusñin rō jijnáhan rō, áchí Jítóho yō.  
Te ma jnái rō táca jée tú ndaā.

Yūcuán na te naquihin ri rohó,  
<sup>18</sup> te cuu ri Tatá rō jijnáhan rō,  
te cuu rō séhe yí rí jíin séhe síhí rí,  
áchí Jítóho yō, Yaā jnái ndihi poder.  
Achí tutu.

## 7

<sup>1</sup> Núu súcuan, ñánī mánī, cánevāha yó táca jnūhun yáha jée ní jéjnūhun ya. Jeē yúcuan na sándoo yó máá yó táca jée sajnéhén yiqui cúñu yō jíin anuá yō. Te na cónso Iyo yó núu Yaā Dios, te coo ndoo coo ii yō nuū yā jíin ndihi jniñu cúní yā.

### *Jeē ní canacani ni ñayuu Corinto siquī cuéchi i*

<sup>2</sup> Coo maní rō jíin rí jijnáhan rō víi. Chi tu ní sáha ri falta nuū ní ñn rō, te tu ní stívi rí anuá ní ñn rō, te ni ñn rō tu ní stáhú rí. <sup>3</sup> Te nasūu jée nducú rí cahān rī nuū rō cúu jeē cahān rī súcuan, chi je ni cahān rī jeē yóhoyo maní rī jíin rō. Te níni ñūhun ni rī rohó, vēsú cuu yō chí cotecu yō. <sup>4</sup> Te cúcáhnu ndasí ni rī rohó jijnáhan rō, te cúsñi teyí ni rī jeē siquí rō. Te vēsú cájito rí táca jnúndóho yáha, te íyo ndeyí ni rī te cúsñi ndasí ni rī jeē siquí rō.

<sup>5</sup> Ná ni jengoo rí Macedonia te tu ní íyo nayúu ni anuá rī, chi sa suhva yí ní íyo jnúndóho jíin rí táca lado. Chi ní íyo jeē ní castáhān jnáhan jíin rí, te ni cayūhu rí sanaa te caca yátá ñáyuu cácanđje. <sup>6</sup> Te Yaā Dios jeē sáha jeē ndúndeyí ni ñayuu cácuuíhyá ni, ni sáha ya jeē ní candundeyí ni rī, chi ni quiji Tito ni sáha ya. <sup>7</sup> Te ni candusñi ni rī, nasūu máá ñn-ni siquí jeē ní quiji de, chi suni jeē ní ndundeyí ni de ni casáha rō. Chi ni castūhún de jeē cáñuhun ni rō coto tucu rō rúhū, jíin jée cácuuíhyá ni rō jeē siquí cuéchi rō, jíin jée cánacani ni rō jehē rī. Te jeē yúcuan ní cusñi gā ni rī.

<sup>8</sup> Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cuíhyá ni rī jeē ní sáha súcuan. Chi vēsú ni cucuíhyá ni rī saá, te vijna te tuá, chi jíni rī jeē jecu-ni quívi ni cacucuíhyá ni rō ni sáha. <sup>9</sup> Te vijna te cúsñi ni rī, te nasūu siquí maá jée ní cacucuíhyá ni rō. Chi cúsñi ni rī jeē ní jéjníñu jeē ní cacucuíhyá ni rō, chi ni sáha jeē ní canacani ni rō siquí cuéchi rō. Chi ni cacucuíhyá ni rō nájnūhun cúní maá Yaā Dios, te nasūu jée ní sáhuñ rī rohó. <sup>10</sup> Chi núu cúcuuíhyá ni yō nájnūhun cúní Yaā Dios, te suu sáha jeē nácani ni yō siquí cuéchi yó te jnama ya yohó, te ma cóo ga jeē nácani cuíhyá ni yō. Te jeē cácuuíhyá ni ñayuu tu cácanđje, tu jéjníñu jeē nácani ni i, chi sa jnahnū ndetū i. <sup>11</sup> Te ni cacucuíhyá ni rō nájnūhun cúní Yaā Dios, te vijna te cájito rō náa vāha

ni jejniñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū tēe ni sáha cuēchi, te ni cayūhu ró jeē ní castívi ró núu yā. Yūcuán na te yōhyo ni cacuni rō coto tucu ró núu rī, te yōhyo ni candihvī ni rō ni cacuxeēn rō nuū tēe ni sáha cuēchi ún. Te súcuan ni castéén rō jeē tú cuēchi ró, chi tu ní cajejnūhún ró cuēchi ni sáha tēe ún. <sup>12</sup> Te jeē ní tee ri carta un, nasūu máá-ni jeē cúxeēn rī nuū tēe ni sáha cuēchi ún, ni nasūu máá-ni jeē cahán rī jehē tēe ni ndoho ni sáha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jínúu Yāā Dios. <sup>13</sup> Jeē yūcuan ní candusī ni rī jeē siquí rō.

Te vihyá gā ni cacusī ni rī jeē ní jini rī jeē cúsī ni Tito, chi ni nduu nayúu ini de ni casáha ró. <sup>14</sup> Chi je ni cahán rī jín de jeē cúsī ni rī jeē váha ñayuu cácuu ró, te vijna te tu ní quéndōo rī jnūhun canu jeē siquí rō. Chi nájñūhun ni cajini ró jeē iyó ndáá táca jñūhun ni cacahán rī jín ró, suni súcuan ni cundaā jñūhun ni cacahán rī jín Tito jeē cúsī ni rī siquí rō jeē váha cásquicu ró. <sup>15</sup> Te vihyá gā manī de jín ró vijna jeē ñūhun ni de jeē váha ni cajetáhú ró jeē cahán de, te ni cahiyó yíñūhún ró ni candiso iyo ró núu de. <sup>16</sup> Núu súcuan te cúsī ni rī siquí jeē cucáhu ndasí ni rī rohó jijnáhan ró.

### *Jeē na cúsī ni i socō i cuehē*

## 8

<sup>1</sup> Hermano, vijna te suni cácuu rī castūhun rí nuū rō jijnáhan ró ndese cuehē jeē váha ni sáha Yāā Dios jín ñayuu cácandíje cáyūcū Macedonia. <sup>2</sup> Chi vēsú yōhyo ni jito ndee jñūdóho i, te suni yōhyo ni cacusī ni i jín jñūhun ya. Te vēsú ñayuu ndahú ndasí cácuu i, te yōhyo váha ni cajequin i cuehē xūhun jéē cúu ñayuu ndahú cácandíje. <sup>3</sup> Chi cúu ri testigo jeē ní cacusī ni maá i ni cajēhe i ndésaa ni canda i, te nde vihyá gā ni cajēhe i. <sup>4</sup> Chi ni cacahán ndahú ndasí i jín rí jeē na cuáha rī jñūhun chindéé ñáhán i jín yó cuáha i xūhún cuu hermano cándoho ndáhú. <sup>5</sup> Te vihyá gā ni casáha i vēsú jeē ní cajeni ni rī, chi xīhna gā ni casocō i máá i nuū Jítóho yō, te sáa te ni cajēhe i máá i sáha i táca jéē cácuu rī, ndihī ndese nūjnahan ni Yāā Dios. <sup>6</sup> Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū maá ró, sáha de jeē jīnu jniñu jeē ni squéjéé de jín ró jeē suni caquin rō cuehē xūhún cuu ñayuu ndahú. <sup>7</sup> Chi máá ró yōhyo váha casáha ró táca-ni, chi váha cácandíje ró, váha cánacani ró jñūhun, váha cájecūhun ni rō, váha cándihvī ni rō, váha manī ró jín rí jijnáhan rí. Núu súcuan te suni cánuu sáha váha ró jniñu yáha jéē cuáha ró jéē cúu ñayuu ndahú.

<sup>8</sup> Te nasūu jéē cuní rī ndacu ri jniñu nuū rō, chi sa cástūhun rí nuū rō ndese yōhyo cácusī ni sava ga ñayuu jéhe i xūhún, te súcuan te cuní rī jeē suni máá ró cákundáhú ndije ni rō ñayuu ndahú. <sup>9</sup> Chi je cájini rō ndese yōhyo váha ni Jítóho yō Jesucristo jín yó. Chi siquí jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andívi núu. Te súcuan ni sáha ya jeē cácuucá ró ndihī jeē ndíso jñūhun ya, siquí jeē ní nasáha ndáhú yá maá yá.

<sup>10</sup> Te jeē váha máá ró cúu jeē na cáchi rī ndese jéni ni rī siquí jniñu yáha. Váha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sáha ró. <sup>11</sup> Núu súcuan te vijna te sínu ró. Te nájñūhun ni cacusī ni rō ni caquejéé ró jín, suni súcuan na cúsī ni rō sínu ró, chí cuáha ró núu ndese cánevāha ró. <sup>12</sup> Chi núu cúsī ni yō cuáha yó, te jétáhú yá núu ndese névāha yó, chi tu jícán yā jeē cuáha yó jéé tu névāha yó.

<sup>13</sup> Te nasūu jēē cahán rī jeē cáhni ndahú ró máá ró jeē cáa ga nihīn i vēsū jeē ndóo nuū maá ró. <sup>14</sup> Chi sa suhva jeē ĩn cūhva-ni conevāha ró jíin i. Chi cánevāha cuehē rō vijna, te cuu cuāha ró jēē cúmanī nuū i. Yūcuán na te núu ndé ĩn quivī conevāha i, te suni cuu cuāha i te núu ni cumanī nuū rō. Te súcuan te ĩn cūhva-ni conevāha ró jíjnāhan ró, <sup>15</sup> nájnūhun cáhan tutu ĩi siquī ñáyuu jeē ní canastútú maná nde jehán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

### *Jnūhun Tito jíin ũū gā jnāhan de*

<sup>16</sup> Te na cūtahū rī nuū Yaā Dios jeē ni sáha ya jeē ndíhvī ni Tito jehē rō nájnūhun cándíhvī ni maá rí. <sup>17</sup> Chi ní jetáhú de jeē ní cacahān rī jíin de jeē jeē de nuū rō. Te siquī jeē ndíhvī ni de jehē rō, jeē yúcuan cuájeē de, chi súcuan cúu ni maá de.

<sup>18</sup> Te suni cátají rī ĩn hermano cuajeē jíin Tito nuū rō. Te tāca grupo ñayuu cácadíje cájejnūhún i tēe un jēē váha jéjníñu de siquī jnūhun jeē jnāma ya yohó. <sup>19</sup> Te tāca grupo ñayuu cácadíje suni ni catee i jniñu siquī de jeē cáca de jíin rí chindéē ñáhán de quindēca de xūhun jíin rí jeē ní cajēhe ñayuu. Te jniñu yáha cásáha rī návāha cahān ñayuu jeē yóhoyo váha Yaā cúu máá Jítóho yō, chi cuni i ndese yóhoyo cácusī ni rō cásocō rō xūhún. <sup>20</sup> Te quingoo ndindúú rí návāha ni ĩn ñayuu ma téē i cuechi siquī rī siquī xūhun cásocō ñayuu. <sup>21</sup> Chi ndúcú rí jeē squícu ndaā rī tācá jniñu, nasūu máá ĩn-ni nuū Yaā Dios, chi suni nuū ñáyuu.

<sup>22</sup> Te suni cátají rí inga hermano yō cuajeē de jíin ndindúú téē yáha. Te tjini jínu ni steén de jeē yóhoyo cúsi ni de ndíhvī ni de tācá jniñu. Te vijna chi ndíhvī gā ni de jehē rō, chi cúcáhnu ndasí ni de jeē cásquícu ró. <sup>23</sup> Te núu cácajnūhún ñayuu siquī Tito, te achi rō jeē cúu de tēe chindéē ñáhán jéjníñu jíin rí nuū rō siquī jnūhun ya. Te ũū gā hermano yō yáha, achi rō jeē cácuu de tēe jeē ní catejníñu ñayuu cácadíje, te cáhīyo yíñuhún de nuū Cristo. <sup>24</sup> Núu súcuan te steén rō nuū de jeē cáhīyo manī ndije ró jíin de, návāha na cúni tāca grupo ñayuu cácadíje. Te súcuan cuni i jeē tu ní cácusī cāhá ni rī siquī rō.

### *Siquī jeē cájequin i xūhún cuu tācá hermano*

## 9

<sup>1</sup> Te vijna te tuá jíni ñuhún tee rī nuū rō siquī xūhun jeē cájequin rō cuu tācá hermano cándoho ndáhú. <sup>2</sup> Chi je jíni rī jeē cánujnahan ni rō cuāha ró. Te jeē yúcuan máni cúsi ni rī cahán rī jíin ñáyuu Macedonia jeē rohó ñáyuu Acaya, je ni casátūhva ró xūhun ndé jendujin. Te jeē súcuan ni cacusi ni maá ró, te jeē yúcuan cuehē ñayuu Macedonia ni cacondíhvī ni i ni cajēhe máá i. <sup>3</sup> Te táji rí ndinúni hermano yáha cuajeē maá de nuū rō xīhna gā, návāha jeē jinú maá rí te ma quéndō néé rí siquī jnūhun ni cahān rī jeē squícu váha ró jíin jniñu ún. Chi coo tūhva ndije ró jíin xūhun nájnūhun ni cahān rī jíin i. <sup>4</sup> Chi sanaa te jecoo jecu tēe Macedonia jíin rí, te núu cuni de jeē tu cáhīyo tūhva ró, te coo jnūhun canu nuū rī, te suni nuū maá ró jíjnāhan ró, chi ni cahān teyí rí jeē cáhīyo tūhva ndije ró. <sup>5</sup> Jeē yúcuan ní jeni ni rī jeē canuú cahān rī jíin tāca hermano yáha jecoo de xīhna gā, te sáá te jinú rī, návāha stíhvī ni de róhó jēē yáchí na cóo tūhva xūhun jēē ní cacahān rō jeē cuāha ró. Te súcuan te coo tūhva siquī jeē váha ni rō, te nasūu jēē safuerza rí rohó.

<sup>6</sup> Cocuhun ni rō jnūhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. <sup>7</sup> Tācá ĩn ĩn ró cuāha ró ndésaa ni tee ni rō. Ma cúxi ni

rō cuāha ró, chi nasūu fuerza cúu. Chi Yaā Dios manī yā jīn ñáyuu jeē cúsi ni cuāha. <sup>8</sup> Te máa Yaā Dios cuu sáha ya jeē nducuehē ndīnuū jeē váha cuu ró jijnáhan ró, návāha nīnī coneváha ró ndihī tācá jeē jīnī ñúhún ró, te coo sobra gā jeē cuāha ró jēē cúu tācá jniñu váha. <sup>9</sup> Chi súcuan cáhán tutu īi siquī tāca ñáyuu jéhe:

Ni scáa i ni jéhe i nuū ñáyuu ndahú.

Te tācá jniñu váha sáha i, chi quendōo ní cáni.

Achí tutu. <sup>10</sup> Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndīnuū jeē váha cuu ró, te sáha ya jeē cáyā te nducuehē jniñu váha casáha ró. <sup>11</sup> Súcuan cucúcá ró jīn tāca-ni, návāha cuu cuāha cuehē rō. Te xūhun jēē cuāha ró quihīn nuū hermano cándoho ndáhú, suu sáha jeē nácuatáhú i nuū Yaā Dios. <sup>12</sup> Chi xūhun jēē cuāha ró núū i, nasūu máa ĩn-ni jeē nihīn i jeē cúmanī nuū i, chi suni sáha jeē nácuatáhú ndasí i nuū Yaā Dios. <sup>13</sup> Te cahān i jeē yóhyo váha Yaā cúu Yaā Dios, chi xūhun jēē ní cajéhe ró stēén jeē váha cácadíje ró jnūhun Cristo. Te suni sáha jeē cahān i jeē yóhyo cújéhu Yaā Dios siquī jeē ní cajéhe cuehē rō nuū i jīn núū sava ga ñayuu. <sup>14</sup> Te suni cacān tahú i jehē rō, chi coo manī ndasí i jīn ró siquī jeē yóhyo váha ni sáha Yaā Dios jīn ró. <sup>15</sup> Te na cútahū yō nuū Yaā Dios, chi ni jéhe ya Sēhe ya nuū yō, jeē cúu ĩn tahū cáhnu ndasí jēē ma cánda cuiti yō castūhún ndihī yō.

*Jeē ndíso jniñu Pablo cúu de apóstol*

## 10

<sup>1</sup> Te ruhū Pablo, cáhán ndahú rí jīn ró jijnáhan ró jīn modo maá Cristo jeē vitá ni yā te váha ni yā. Ruhū, chi cácahān rō jeē iyó suchí ni rí núu ndéé rí jīn ró, te núu ndéé jícá rí te tu yuhú cuiti rí cahān nihīn rí jīn ró, cácahān rō. <sup>2</sup> Núu súcuan te cáhán ndahú rí jīn ró jeē núu na jéé rí te ma cahān rō jnūhun jeē sáha jeē cuxeēn rí nuū rō. Chi sava ró cácahān jeē casáha rí jniñu ya siquī jeē máni jeē na nihīn rí siquī ún. Núu súcuan te iyó túhva rí cuxeēn rí nuū ñáyuu cácahān súcuan. <sup>3</sup> Chi vēsú cácuu rí ñayuu cáyúcú ĩni ñayiví, te tu cájejnáhan rí modo cájejnáhan ñayuu ñayiví. Chi nájnūhun jeē cájejnáhan rí siquī tācá jniñu neé. <sup>4</sup> Chi nasūu ndajniñu ñayiví jéjníñu rí cájejnáhan rí, chi jīn poder Yaā Dios cájejnáhan rí snáa rí tāca fuerza jeē cúu contra siquī yā. <sup>5</sup> Súcuan cásnáa rí tāca jnūhun ndúxí jīn jnūhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndihī jeē tú váha jeē cájeni ni ñayuu, návāha cuandetū i nuū Cristo. <sup>6</sup> Te jeē jīnu cuandetū váha máa ró, yūcuán na te coo túhva rí cuāha rí castigo nuū tāca gá ñayuu jeē tu cájendetū.

<sup>7</sup> Máa ró jijnáhan ró máni cájeni ni rō modo ñayuu tu cájecūhun ni. Núu na-ni tēe jēni ni de jeē Cristo ni tejniñu ya de, te na sáha de cuenta jeē suni súcuan ni tejniñu ya ruhū jijnáhan rí. <sup>8</sup> Te núu ni cahān teyí rí jīn ró jeē ndíso jniñu rí, te tu cúcanu rí sáha. Chi máa Jítóho yō ni tejniñu ya ruhū jijnáhan rí, návāha sáha rí jeē ĩje ánuá rō jīn jnūhun ya, nasūu jēē snáa rí. <sup>9</sup> Núu súcuan te tu cúni rí jeē cáni ni rō jeē nducú rí siuhú rí rohó jīn carta rí. <sup>10</sup> Chi cácahān sava ró jēē tāca carta rí yóhyo stíhví ni te nihīn ndácu jniñu, te sa suhva núu ndéé rí jīn ró te tu cúndeyí ni rí ndacu nihīn rí jniñu, te suni tu cúu cahān vāvihí rí, achí rō. <sup>11</sup> Te ñayuu cácahān súcuan na sáha i cuenta jeē nájnūhun nihīn cáhán carta rí jeē ĩne jícá rí, suni súcuan nihīn ndacu rí jniñu nuū rō jeē cóndee rí jīn ró.

<sup>12</sup> Te va ma chúndeyí cuiti ni nde rí jeē sajeñu rí maá rí, nájnūhun casáha sava tēe un jēē cájejnūhún nde de máa de. Tāca tēe ún chi cáacunéé de jeē cájeni

ni de jeē cujēhnu ga de vēsú jnáhan de, te tu cásáha de cuenta ndese cúní Yaā Dios jeē caca de. <sup>13</sup> Te ruhū jijnáhan ri, chi cutéyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cúhva yá ndésaa cúu jeē sáha ri, te máá yá ni jéhe jnūhun jeē ni jínū rī nuū rohó ñayuu ñuu Corinto. <sup>14</sup> Jeē yúcuan ná ni jinūcoo ri nuū rō jeē xíhna ñúhún te nasūu jeē ni yáha ri nuū cúhva jniñu ní jéhe ya nuū rī. Chi xíhna gā maá rī ni jinūcoo nuū rō ni canacani rī jnūhun vāha Cristo. <sup>15</sup> Te tu cácutéyí rí siquī jniñu ní casáha inga tēe, nájñūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níni máá cúhva jeē ni jéhe ya nuū rī. <sup>16</sup> Yūcuán na te cácuti rī scuité núu ga rī jnūhun jnáma ya yohó núu tāca gā ñuu yúcu ndé yúcuan gá. Te súcuan te ma quívi nduu rī cutéyí rí nuū jeē ní canacani inga tēe jnūhun.

<sup>17</sup> Te núu ndé tēe cúní de cutéyí de, na cutéyí de siquī jeē sáha máá Jítóho yō, nasūu siquī jéé sáha máá de. <sup>18</sup> Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

### *Jeē cahán Pablo siquī tēe cánacani jnūhun stáhú*

## 11

<sup>1</sup> Cone cáhnu ni rō jijnáhan ró jeē cahán rī jecu jnūhun modo nájñūhun cácahān ñayuu canéé. Núu súcuan te cáhnu coo ni rō víi. <sup>2</sup> Chi cúcuñí rí jehē rō jijnáhan ró, nájñūhun cúcuñí Yaā Dios. Chi cácuu ró nájñūhun ñn sūchi sñí íyó ndoo, te ni sáha ri jeē quijnáhan ró jíin Cristo, nájñūhun quijnáhan ñn sūchi sñí jíin máñúhún-ni yá i. <sup>3</sup> Te yúhú rí sanaa te cuāha ro jnūhun stáhú táca tēe un rohó, te siáá rō jnūhun jeē chíñúhún ndáa rō Cristo nde jíin ini jíin ánuu rō. Chi suni súcuan ni sáha Satanás jíin Eva, chi ni quívi ini ñn coō, te ni stahú un ña jíin jnūhun ndíchí stáhú. <sup>4</sup> Chi núu quíjicoo tēe nuū rō jeē tu cánacani ndaā de jnūhun Jesús nájñūhun ni canacani ri nuū rō, te va yōhoyo vāha cájetáhú nde ró de. Te suni súcuan vāha cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnūhun jeē ní cacandíje ró jéé jnáma ya rohó. <sup>5</sup> Te táca tēe cácadíje ró un jéé cácahān jeē apóstol cujēhnu ga cácuu, tú cuiti jeē cujēhnu ga nde de nuū rō. <sup>6</sup> Chi vēsú tu níhñ vāha nde rí modo cahán rī, te jécūhun vāha ni rī. Chi jíin ndíhi jniñu ni casáha ri mēhñu ró ní castéén cají rí nuū rō jeē súcuan cúu.

<sup>7</sup> Tu ní jíicán rī xūhun núu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnūhun ya. ¿Te va cuēchi ni sáha ri jeē ni sáha ri súcuan, chí naún? <sup>8</sup> Chi sava ga grupo ñayuu cácadíje ní quihin ri xūhun jéé ní cajēhe i nuū rī, návāha súcuan-ni nacani ri jnūhun ya nuū rō jijnáhan ró. <sup>9</sup> Te ná ni condee rí jíin ró te ni ndíhi xūhun rí, te tu ní jíicán cuiti rí nuū ní ñn ró. Chi hermano jeē ní quíjicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiti rī. <sup>10</sup> Te nájñūhun cúcáhnu vāha ni rī jeē jíin rí jnūhun ndaā Cristo, suni súcuan jíin rí jeē ma quihin ri xūhún nuū ni ñn ñayuu ní ndáñúu Acaya, návāha ma cási i jeē cúsiñ ni rī jeē súcuan-ni nacani ri jnūhun ya. <sup>11</sup> ¿Te á siquī jeē tú maní rí jíin ró cúu jeē cahán rí súcuan, jéni ni rō, chí naún? Tuú chi máá Yaā Dios jíin yá jeē maní rí jíin ró jijnáhan ró.

<sup>12</sup> Te sáha ri ná-ni sáha ri, chi ma quihin ri xūhun ró, návāha casi rī nuū jeē casatéyí tēe un máá de jeē cácahān de jeē inuú casáha de jniñu ya jíin rí. <sup>13</sup> Te tēe ún chi nasūu apóstol ndaā cácuu de, chí máni máá jnūhun stáhú cácahān

de, te cásáha de máá de jeē cácuu de apóstol Cristo. <sup>14</sup> Te tu nâá ni yō jító yó jéē casáha de súcuan, chí je jíni yō jeē suni Satanás násama máá te stáhú jéē sáha máá nájnūhun ñn ndajéhé Yaā Dios jeē jica jíin luz yā. <sup>15</sup> Te jeē yúcuan suni tu nâá ni yō jító yó jéē téē cájejniñu nuū Satanás, cásáha de máá de jeē téē ndaā cácuu de. Te ñn quiví te nanihñn de siquí jniñu néé cásáha de.

*Jnūndóho ni ndoho Pablo siquí jeē cúu de apóstol*

<sup>16</sup> Inga jínu cáhán rī jíin ró jeē ni ñn ró ma cáni ni rō jeē téē cánéé cúu ri. Te núu súcuan cájeni ni rō, te va cuatáhú nde ró jéē cahán rī nájnūhun tēe cánéé, náváha suni cuu cutéyí nde ri jecu nájnūhun cásáha tēe ún. <sup>17</sup> Jeē cahán rī vijna chí nasūu jéē ní ndacu máá Jítóho yō cúu, chí sa nájnūhun tēe cánéé cáhán rī jeē cutéyí nde ri. <sup>18</sup> Chí cuehē de cásatéyí de máá de modo jeē iyó ini ñayiví, te suni súcuan na satéyí nde ri maá rí núu súcuan. <sup>19</sup> Te va tēe cáhiyo cájí xini cácuu nde ró, te jeē yúcuan cúu vāha ni nde ró cuatáhú ró ñn tēe cánéé núu súcuan. <sup>20</sup> Chí va vāha-ni cájendeyí ni rō nuū téē un jéē casáfuerza de rōhó cuajniñu ró núu de, chí cásáha de jeē ndundáhú ró, chí cáquende de ndajniñu ró, chí cásájehnu de máá de nuū rō, chí ndé cácatu de nuū rō. <sup>21</sup> Te vēsú cúcanu nde ri cahán rī, te na cáhán rī jeē tu ní cūndeyí ni nde ri satéyí rí maá rí nájnūhun casáha tēe ún.

Te vijna te núu iyó sava tēe chūndeyí ni de satéyí de máá de, te va suni chundeyí ni nde máá rí núu súcuan. Te va cáhán rī nájnūhun cáhán ñn tēe cánéé. <sup>22</sup> Núu cácutéyí de jeē téē hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup> Núu tēe cájejniñu nuū jnūhun Cristo cácuu de, te víhyá gā ruhū. Te va cáhán rī nájnūhun tēe cánéé jéē cutéyí rí súcuan. Chí ni caa ga ni sájniñu ri vēsú maá de jíjnáhan de, te ni caa ga ni cacani i ruhū, te cuehē gā jínu ni ñne ri vecāa, te suni cuehē gā jínu ni cacuni ñayuu cahni i ruhū. <sup>24</sup> Te jnáhan ri hebreo, uhūn jínu ni cacani xeēn de ruhū jíin cuarta ññ, ñn cūhva jeē jé yajni cuu rī sáha. <sup>25</sup> Uní jínu ni cacani de ruhū jíin yujnu xí, te ñn jínu ni cajēhe de yuū xiní rī. Uní jínu ni queē barco jeē ní jica rí siquí jnūhun ya. Te ñn jecuáá jíin ñn ndiáca ni yosó candá rí nuū cunú ndute mar. <sup>26</sup> Cuehē jínu ni ndoho ri ni jica ri ichi, te ni cácu ri nuū táca yúte, te ni cácu ri nuū táca ñácuihná. Ni cácu ri nuū ñayuu nación rí jíin núu ñayuu ñuu jicá. Ni cácu ri cháha chúcuan ná ni iyo ri ñuu jíin rancho jíin mar. Ni cácu ri nuū táca jnáhan ri jeē tu iyó ndaā. <sup>27</sup> Ni sájniñu ñihin ri te yí ní ndoho ri. Cuehē jínu ni jehni rí maá rí máhná. Ni jíi rí sōco, ni jichí rí ndute. Cuehē jínu ni iyo ndite ni rí, ni cuijnu rí, ni cumani sahma ri

<sup>28</sup> Te siquí táca jéē yáha chí iyó gá. Chí ndiquiví ndóho ri jeē nácani ndasí ni rí jehē táca grupo ñayuu cácandíje. <sup>29</sup> Núu ñn ñayuu tu fuerza ini i, te suni ndóho ri jehé i. Te núu ñn ñayuu quiví i cuēchi sáha jnáhan i, te ndóho ri jnūhun cúcanu jíin jnūhun náxeēn ni. <sup>30</sup> Núu súcuan te núu cánuu cutéyí nde ri, te va cutéyí rí siquí táca jéē steen jéé tú na fuerza ini rí. <sup>31</sup> Te Yaā Dios, Yaā cúu Tátá máá Jítóho yō Jesucristo, jíni yā jeē cahán ndaā rí. Te ní cáni na cáhán ñayuu jeē vāha ndasí Yaā cúu ya. <sup>32</sup> Ná ni iyo ri ñuu Damasco, te gobernador jeē ndácu jniñu ndañūu jeē jniñ rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chí jniñ de ruhū quihñn rí vecāa ni cuni de núu. <sup>33</sup> Te ni quiví ri chíji ñn jica, te ñayuu cácandíje ni cascúun i ruhū ventana ñn vehe jeē néne jicá jeē ndihyú ñuu ún. Te súcuan ni cácu ri nuū téē ún.

*Jeē ní jito ndijin Pablo jeē ni stúu ya nuū de*

## 12

<sup>1</sup> Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī. <sup>2</sup> Jíní rí ñn tēe cándije Cristo, te je ni cuu uxī cuñn cuiyā jeē ní sáha ya jeē ní caa tēe un ní jehēn de nde andiví únī. Te tu jíní rī núu ni jehēn rī jín yiqui cúñu rī, chí ní jehēn anuá-ni rí. Máa Yāā Dios cúu jeē jíní. <sup>3</sup> Te jíní rí jeē ní ndonehen ya ruhū. Te á ní jehēn rí jín yiqui cúñu rī, chí ní ndōo, tu jíní rí, chí máa-ni Yāā Dios cúu jeē jíní. <sup>4</sup> Chí ní sáha ya jeē ní caa ri ni jehēn rī nde jardín andiví. Te yūcuan ní jini sōho ri táca jnūhun sáhi ndasí jēe ma cúu castūhun yóhó ñayuu. <sup>5</sup> Te siquī jeē ní sáha ya súcuan jín rí cúu jeē cutéyí rí, te ma cutéyí rí siquī ndese cúu máa rí. Chí cutéyí rí máni jeē tú na fuerza ini rí. <sup>6</sup> Te núu cúní rí cutéyí rí siquī maá rí nuú, te nasūu jēe canéé rí núu sáha ri súcuan nuú, chí ndaā cúu jeē iyó jeē cutéyí rí. Te ni ma sáha ri, chí tu cúní rí jeē cani ni ñayuu jeē cujéhu ga rí vēsú jeē ní jito i chí jēe ní jini i jnūhun rí.

<sup>7</sup> Te tu cúní yā jeē yáha ri cutéyí rí siquī jeē ní steén ndijin yā jniñu jéhu ndasí un núu rī, te jeē yūcuan ni quiiji ñn jnūndóho jeē ndiquín ruhū te stóho ruhū. Te ñn jeē ní jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí. <sup>8</sup> Te uní jínu ni cahān ndahú rí jín máa Jítoho yō jeē na téjiyo ya quihín. <sup>9</sup> Te ni cahān yā jín rí: Tuú chí tu cúmani jeē cundáhú ní rí rohó. Chí ñayuu jeē tú na fuerza ini, sáha ri jeē nducuehē gā fuerza maá rí ini i, ní achi yā. Núu súcuan te cúsī ni rí jeē tú na fuerza ini rí, chí súcuan te nducuehē gā fuerza Cristo ini rí. <sup>10</sup> Jeē yūcuan cúu jeē cúsī ni rí jeē tú na fuerza rí, jín jēe cácahān ndevāha ñayuu jín rí, jín jēe cúmani nuū rí, jín jēe cájito xeēn i ruhū, jín jēe ndóho ri jnūndóho siquī Cristo. Chí jeē tú na fuerza maá rí, yūcuan sáha jeē nihín rí fuerza maá yá.

### *Jeē nácani ni Pablo siquī ñayuu cácañdije ñuu Corinto*

<sup>11</sup> Te va tēe cánéé cúu ri jeē ní sátéyí nde ri maá rí. Te siquī jeē tu cácañdije ró ruhū, jeē yūcuan ní sátéyí rí maá rí. Chí cánuú jēe máa ró cuajnúhún ró ruhū nuú. Chí vēsú tú jniñu ri jeē maá rí, te va tu núu cuiiti nde ri nuū táca tēe un jēe cácahān rō jeē apóstol cujéhu cácuu de. <sup>12</sup> Chí mehñu ró ní sáha ri táca jniñu jeē steén jeē cúu ndije ri apóstol. Chí jín cuéhē paciencia ni sáha ri táca jniñu jéhu jeē steén poder Yāā Dios, jín táca jniñu jeē nahán ní canaa ni rō ni cajito ró. <sup>13</sup> Te tu ní sáha ri jeē núu ga cácuu ró núu táca gá grupo ñayuu cácañdije, chí máa ñn-ni jeē tu ní stáhān rí rohó jēe cuāha rō jēe jini ññhún rí. Cone cáhnu ni rō núu súcuan ni sáha nde ri falta nuū rō víi.

<sup>14</sup> Te vijna je iyó túhva ri jecondēhe rí rohó vuelta unī. Te suni tú na vé cacán rí nuū rō, chí nasūu ndajníñu ró cúu jeē cúní rí, chí sa suhva jeē quendōo vāha ró jín jnūhun ya. Chí nájnūhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuāha de jeē quéndōo vāha sēhe de. <sup>15</sup> Jeē yūcuan cúsī ni rí stáhi ri jeē névāha ri, te nde stáhi ri fuerza maá rí, návāha sáha ri jeē quéndōo vāha ánuá rō jijnáhan ró. Te maní gā coo ri jín ró, vēsú sanaa te jecu-ni cáhīyo maní rō jín rí.

<sup>16</sup> Te iyó jecu ró cácahān jeē vēsú tú na vé ní jícán rí nuū rō, te tēe stáhú cúu ri, chí ni nducú rí modo ndichí nihín rí xūhun ró, cácahān rō. <sup>17</sup> ¿A táca tēe ní tají rí nuū rō, á ñn máa de ní stahú de rohó jēe nihín de xūhun ró cuu máa rí, chí naún? Tú cuiiti. <sup>18</sup> Ni cahān ndahú rí jín Tito jeē jecondēhé de rohó, te ni tají rí ñn hermano ni jeē jín de. ¿Te chí ní stahú Tito rohó ní quihin de xūhun



núu rō jeē cuu máá de, chí naún? Tuú chi inuú-ni cásáha ndindúú rí, te ñn-ñ ánuá ndindúú rí.

<sup>19</sup> ¿Sanaa te cájeni ni rō jeē cahán rī jñūhun yáha náváha quendōo váha ri jñūn rō, chí naún? Nasūu súcuan cúu, chí Yaā Dios jiní yā jeē cahán rī maá-ni jñūhun jeē cuní Cristo. Te ndihí jeē cahán rī chí ndúcú rí jeē ije rō jñūn jñūhun ya, ññāñ mání. <sup>20</sup> Chí yúhú rí jeē núu na jéé rī, te sanaa te cuní rī jeē tu cásáha rō jñūñú njñahan ni rī. Te máá rō jijnáhan rō, suni ma nújñahan ni rō ruhū. Chí sanaa te cátejñáhan rō, cácuésūn ni rō, cáquitī ni rō, cásándúxí rō, cásájñúhún rō, cácahān rō siquī jñáhan rō, cácutéyí rō, cájica néé rō. <sup>21</sup> Te yúhú rí jeē núu na jéé tucu rí te cuāha Yaā Dios jñūhun canu nuū rī jeē súcuan cásáha rō. Te sanaa te cucuihyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo rō jñiñu jñéhén jñiñu jica jñení jñūn jñiñu néé ndasí ní casáha rō.

*Saludo jñūn jñūhun cástūhun Pablo jeē sándihí*

## 13

<sup>1</sup> Yáha cúu vuelta uní jeē jécondēhe rí rohó. Te sándaā yō jñiñu nájñūhun cáhán tutu: Jñūn jñūhun jeē cahán uū chí úní testigo te cundaā táca jñiñu, áchí. <sup>2</sup> Te vijna jeē íne jicá rí te cáhán tucu ri nájñūhun ni cahán rī ná ni ine ri jñūn rō. Cáhán rī nuū ñáyuu ni casáha cuēchi un jñūn núu ndihí rō, jeē núu na jéé tucu rí te ma cóo vítá ni rī jñūn rō. <sup>3</sup> Te yūcuán cuu prueba jeē cánducú rō, suu núu jendaá jeē cahán rī jñūn fuerza Cristo. Chí Cristo tu cúmaní fuerza yā jeē sándaā yā jñūn rō, chí stéén yā poder yā mēhñu rō. <sup>4</sup> Te vēsú tu ní stéén yā fuerza yā ná ni jihí yā jicā cruz, te vijna chí técu yā jñūn poder Yaā Dios. Te nájñūhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jñūn poder Yaā Dios cátecu rī jñūn yá jeē cuajñiñu ri nuū rō jeē siquī jñūhun ya.

<sup>5</sup> Coto ndee rō maá rō núu cáhñn ññin rō jñūn jñūhun cáandíje rō yá. Sáha váha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije rō? <sup>6</sup> Te ñūhun ni rī jeē suni cácuacáhnu ni rō jeē maá rí cacandíje ndije ri. <sup>7</sup> Te cájicān tahú rī nuū Yaā Dios jeē ma sáha rō ní ññ jñiñu néé. Te vēsú núu cuajñúhún rō jeē váha ndácu ri jñiñu nuū rō, chí vēsú núu ma cuajñúhún rō, te tú na vé sáha, chí máni jeē na sáha rō jñiñu ndaā cúu jeē cánducú rí. <sup>8</sup> Chí tu jési ri nuū jñiñu ndaā, chí sa suhva scáca ri. <sup>9</sup> Núu súcuan te cácusñ ni rī núu tú na fuerza maá rí, te núu íyó fuerza maá rō. Te níni cácan tahú rī jeē na íje ga ni rō jijnáhan rō jñūn jñūhun ya. <sup>10</sup> Te téé ri carta yáha nuū rō nde ná tu jeē rī, náváha núu na jéé rī te tuá jiní ññúhún cuxeēn rī nuū rō. Chí ni jēhe Jitoho yō jñiñu ndíso ri yáha jéé sáha ri jeē íje ánuá rō jñūn jñūhun ya, nasūu jéé snáa rī.

<sup>11</sup> Je ni cahán yō núu súcuan hermano, te na cóo jeē váha jñūn rō jijnáhan rō. Te na cóndihvī ni rō ije rō jñūn jñūhun ya, te coo ndeyí ni rō. Te na cóo inuú ni rō te coyūcu mání rō jñūn jñáhan rō. Te Yaā ndíso jñūhun ndeyí sñ ni jñūn jñūhun cúndáhú ni, coo ya jñūn rō jijnáhan rō. <sup>12</sup> Te jeē cahán rō jñūn táca jñáhan rō, te yññúhún techūhu rō ndaha i. <sup>13</sup> Sándeyí ni rō jijnáhan rō, áchí hermano cacandíje jeē cáyūcu yáha.

<sup>14</sup> Te ñūhun ni rī jeē Jitoho yō Jesucristo na sáha ga yā jeē váha rōhó jijnáhan rō, te Yaā Dios cundáhú ni yā rohó, te Espíritu Santo condee cáhnu ya jñūn rō. Súcuan na cóo. Amén.



## CARTA JEE NI TEE SAN PABLO APOSTOL NUU ÑAYUU GALACIA

<sup>1</sup> Máá rí cúu Pablo apóstol. Te nasūu ñayuu ni jéni ruhū ni nasūu ñayuu ni tájǐ ruhū jeē nácani rǐ jñūhun, chí sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyi. <sup>2</sup> Te ruhū jíin táca hermano cáyūcu jíin rǐ yāhá, cátee rǐ carta yáha cuájeē nuū rohó ñayuu cácadnje ní región Galacia. <sup>3</sup> Te cáñuhun ní rǐ jeē Tátá yō Yaā Dios jíin Jítóho yō Jesucristo, na sáha ga yā jeē váha rohó, te sáha ya jeē coo ndeyí coo sǐ ní rō. <sup>4</sup> Chí Jesús ní socō yā máá yá jeē ní jíhǐ yā jeē siquí cuéchi yó, návāha jnama ya yohó núu táca jéē neé íyó ñayívi yáha, chí súcuan ní nujnahan ní máá Tátá yō Yaā Dios. <sup>5</sup> Jeē yúcuán na cáhán yō jeē yóhyo luu cújehnu ya ní cáni. Súcuan na cóo. Amén.

### *Siquí jeē tuá na inga jñūhun cācu ñayuu*

<sup>6</sup> Te nánhán nāá ní rǐ jíto rǐ jeē yóhyo yachǐ cánducú rō stóo rō Yaā Dios, Yaā ní cana rohó jéē quívi rō ndaha ya siquí jeē cundáhú ní Cristo yohó. Chí ní candiquín rō inga jñūhun jeē sǐn cáhán. <sup>7</sup> Te tú cuitǐ na inga jñūhun jnama yohó íyó. Te cáhǐyo jecu ñayuu castáhán i rohó, te cácuni i nasama i jñūhun ndese jnáma Cristo yohó. <sup>8</sup> Te núu ñin ñayuu nacani inga jñūhun nuū rō ndese jnáma ya rohó, te núu tu quíjnáhan jíin jñūhun ní canacani rǐ nuū rō xǐhna gā, na jnáhnú ndetū ñayuu ún. Te vesú máá rǐ chí ñin ndajéhé jeē quíji nde andívi nacani inga jñūhun núu, na jnáhnú ndetū. <sup>9</sup> Je ní cahán rǐ jíin rō, te suni súcuan cáhán tucu rǐ vijna: Na-ni tēe nacani inga jñūhun nuū rō, te núu tu quíjnáhan jíin jñūhun jeē ní cajetáhú rō, na jnáhnú ndetū tēe ún.

<sup>10</sup> Te jeē cahán rǐ súcuan, ¿á ndúcú rǐ jeē cuajnúhún ñayuu ruhū, chí Yaā Dios? ¿Chí ndúcú rǐ jeē cúsi ní ñayuu jíin rǐ, cájeni ní rō? Núu ndúcú gá rǐ jeē cúsi ní ñayuu jíin rǐ, te nasūu mozo Cristo cúu rǐ núu súcuan.

### *Ndese ní jinū Pablo cúu de apóstol*

<sup>11</sup> Te cástūhun rǐ nuū rō, hermano jíináhan rō, jéē jñūhun jnáma ya yohó jéē nácani rǐ, nasūu jéē ní jeni ní máá rǐ jíin ñayuu cúu. <sup>12</sup> Chí nasūu ñayuu ní steén nuū rǐ, ní nasūu ñayuu ní sáha jeē ní cutūhva rǐ, chí sa suhva máá Jesucristo ní steén nuū rǐ.

<sup>13</sup> Chí je ní cajini jñūhun rō ndese ní sáha rǐ nde saá, ná ní chíñúhún rǐ sahán jnáhan rǐ ñayuu hebreo. Te cájini rō jeē yóhyo ní jíto xeén rǐ ñayuu cácadnje nuū Yaā Dios, te ní condihvǐ ní rǐ snáa rǐ i núu. <sup>14</sup> Te váha ga ní cutūhva rǐ sahán ún vesú cuehé gā tēe nación rǐ jeē ní cajehnu jíin rǐ, chí ní condihvǐ gā ní rǐ siquí táca jéē ní cajequin jíi rǐ. <sup>15</sup> Te vesú súcuan te Yaā Dios je ní nacáji ya ruhū nde ná tu cacu rǐ, te ñin quívi te ní cusǐ ní yā ní cana ya ruhū jeē quívi rǐ ndaha ya, siquí jeē yóhyo ní cundáhú ní yā ruhū. <sup>16</sup> Te ní steén yā Sēhe ya nuū rǐ, návāha nacani rǐ jñūhun ndese jnáma ya ñayuu táca nación jeē tu jíni jñūhun ya. Yūcuán na te tu ní cájnūhun rǐ ní ñin ñayuu, <sup>17</sup> ní tu ní jéhén rǐ ñuu Jerusalén nuū tēe cácuu apóstol xǐhna gā vesú ruhū. Chí sa suhva ní jehēn-ni rǐ nde región Arabia, te saá te ní nuhún tucu rǐ ñuu Damasco.

<sup>18</sup> Yūcuán na te nde ní yaha unǐ cuiyā, te ní jehén rǐ Jerusalén. Te ní jini jnáhan rǐ jíin Pedro, te ní condee rǐ jíin de xahún-ni quívi. <sup>19</sup> Te tu ní jíto rǐ nuū táca gá apóstol, chí máá ñin-ni nuū Jacobo ñani máá Jítóho yō. <sup>20</sup> Jñūhun yáha jéē tēe rǐ cuajeē nuū rō, chí jíni Yaā Dios jeē ndaá cúu.

<sup>21</sup> Yūcuán na te ni jehēn rī nī región Siria jín Cilicia. <sup>22</sup> Te ñayuu cá candíje jeē yñi ndaha Cristo, jeē cáyūcú región Judea, ná tu coto cuiṭi i nuū rī saá. <sup>23</sup> Chi máni jñuhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jñuhun cándíje yó jēe ní nducú de snáa de nde saá, áchí i. <sup>24</sup> Te ni cacahān i jeē yóhoyó cújehnu Yaā Dios jeē súcuan ni sáha ya jín rí.

*Jeē ní cajetáhu táca gá apóstol un Pablo*

## 2

<sup>1</sup> Yūcuán na te nde nuū uxí cuñ cuiyā, te ni jehēn tucu ri Jerusalén jín Bernabé, te suni ni jeca ri Tito ni jehēn de jín rí. <sup>2</sup> Te ni jehēn rī chi máa Yaā Dios ni steén yā jeē jini ññuhún quihīn rī. Te ni candutútú sñn nene tēe cácujeñhu nuū ñayuu cá candíje ún. Te ni castuhun rí nuū de siquī jñuhun jnáma ya yohó jēe nácani ri nuū ñayuu táca nación tu jini jñuhun ya. Te súcuan ni sáha ri návaha cuajnúhún de jniñu ri, te ma quéndōo cáha jniñu sáha ri jín jēe ni sáha ri. <sup>3</sup> Te ni tu ní casáha fuerza de Tito, tēe ni jica jín rí, jeē cōndee jñunī circuncidar de, vēsú nasūu tēe hebreo cúu de. <sup>4</sup> Te súcuan ni cundaā, vēsú ni quivicoo jecu tēe stáhu jēe sáha de jeē hermano cácuu de. Te tēe un ní quivicoo de návaha yuhu-ni coto de ndese ni ndulibre yó nuū ley circuncidar siquī jeē yñi yó ndaha Cristo Jesús. Chi cácuu de jeē siquī tucu yó ley un, nduu tucu yó mozo nuū ley un. <sup>5</sup> Te tu ní cájetáhu cuiṭi rī nuū tēe ún, chi cúni rī jeē quéndōo nihin ró jijnáhan ró jín jñuhun jnáma ya yohó.

<sup>6</sup> Te máa tēe cácujeñhu nuū ñayuu cá candíje ún, tuá na inga jniñu jēe ní cándacu de nuū rí. Te máa rí chi tu ní chíhi ri cuenta siquī jeē cácujeñhu de, chi suni Yaā Dios tu sáha ya cuenta, chi inuú-ni cúu ndivii tēe nuū yā. <sup>7</sup> Chi sa suhva ni cajini de jeē jñuhun jnáma ya yohó, ndíso jniñu ri nacani ri nuū ñayuu táca nación jeē tu casáha circuncidar, nájñuhun nácani Pedro jñuhun un núu ñayuu hebreo jeē casáha circuncidar. <sup>8</sup> Chi Yaā Dios jeē ní tají Pedro jeē nácani de jñuhun nuū ñayuu hebreo, suni máa yá ni tají rúhū jeē nácani ri jñuhun nuū ñayuu táca nación tu jini jñuhun ya.

<sup>9</sup> Jeē yúcuan, Jacobo jín Pedro jín Juan, ni cajini de jeē Yaā Dios ni jēhe ya jniñu luu yáha nuū rí. Te tēe un cácahān ñayuu cá candíje jeē maá de cácujeñhu ga. Te ni cajni de ndaha ri jín ndaha Bernabé, jeē ní castéén de jeē cáhiyo manī de jín rí, jín jēe ní cacundaā ni de jeē maá rí quingōo nacani jñuhun nuū ñayuu táca gá nación, te máa de jijnáhan de nuū ñayuu hebreo. <sup>10</sup> Te máa in-ni jeē ní cajicān de cúu jeē cónahán rí chindéé ñahán rí ñayuu cándoho ndáhu, te jniñu ún je ni condihvi ní rí ni sáha ri.

*Jeē ni cáhān Pablo nuū Pedro*

<sup>11</sup> Te ná ni quiji Pedro ñuu Antioquía, te ni cahān cají rí nuū de, chi ni stávi de jniñu. <sup>12</sup> Chi nde ná tu quecoo sava jnáhan de hebreo jeē ní tají Jacobo, te yéji de staā jín ñayuu jeē násūu hebreo cácuu. Yūcuán na te nuū ní quecoo tēe ún, te ni cusñn de jeē tuá yéji de jín i, chi yúhú de jeē cúni táca tēe un jēe tuá squicu de ley jnáhan de hebreo. Chi áchí ley jeē ma cúu cají de staā jín ñayuu jeē tu casáha circuncidar. <sup>13</sup> Te sava ga tēe hebreo jeē cá candíje, suni ni cacujiyo de nuū i, nájñuhun ni sáha Pedro, chi cáyuhú de jeē cúni tēe ún. Te nde máa Bernabé ni cascáhān de ni cujiyo. <sup>14</sup> Yūcuán na te ni jini rí jeē ní canayūhú de cají de staā jín ñayuu ún, cúu jeē tuá jica de jín modo jeē cahān jñuhun jnáma ya yohó. Te ni cahān rī nuū Pedro, jito jínúu táca de: Róhó jēe cúu tēe nación yó hebreo, tuá squicu ró ley jnáhan yó hebreo, chi yéji rō jín ñayuu

ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rī.

### *Īn-ni modo jnáma ya ñayuu hebreo jíin táca gá nación*

<sup>15</sup> Te yóhó chi cúu yó ñayuu hebreo, te cácahān yō jeē násūu ñáyuu táca gá nación casáha cuēchi cácuu yó. <sup>16</sup> Te vēsú súcuan te jíiní yō jeē ní ĩn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jēē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, násūu jíin jēē nducú yó squícu yó ley un. Chi áchí tutu ĩ: Ní ĩn ñayuu ma quéndōo ndaā i nuū Yaā Dios jíin jēē nducú i squícu i jniñu jeē ndácu ley, achi.

<sup>17</sup> Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ní jíihī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun táca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiti jeē súcuan. <sup>18</sup> Chi sa núu naquihin tucu yó ley jeē ni stóo yó un, te súcuan téē yó cuēchi síquī máá yó. <sup>19</sup> Chi ruhū, nájnūhun ni jíihī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha rī jeē cuní Yaā Dios. <sup>20</sup> Chi nájnūhun je ni jíihī rī jicā cruz jíin Cristo, te vijna chi tuá técu rī jeē máá rī, chi máá Cristo cúu jeē técu ĩni rī. Te jeē técu rī ĩni ñayiví yáha vijna cúu jeē candíje rī jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā máá yá jehē rī. <sup>21</sup> Núu súcuan te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíihī Cristo nuú.

### *Jnúhun ley jíin jnúhun cándíje*

## 3

<sup>1</sup> Róhó hermano ñuu Galacia, ¿naun tu cájecūhun ni rō? ¿Nde téē ni saca núu xiní rō jeē tuá cájetáhú ró jnúhun ndaā? Chi ná ni canacani rī jnúhun ya nuū rō, te cájí ndasí ni cájecūhun ni rō jeē ni jíihī Jesucristo jicā cruz jehē rō. <sup>2</sup> Īn-ni jnúhun yáha cájnūhun rí rohó: ¿Nde se ni canihīn rō Espíritu Santo? ¿A jēē ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jēē ní cajini sōho ró. <sup>3</sup> ¿Nde se cúu jeē tu cájecūhun cuiti ni rō? Chi xīhna gā ni cacandíje ró jēē ni jíihī Cristo jeē jnama ya rohó, te ni canihīn rō Espíritu. Te vijna ¿á cajeni ni rō jeē stóo ró jnúhun ún te fuerza máá ró squícu ró ley un, te cácu ró naún? <sup>4</sup> Núu súcuan te tu ndé ní jéjníñu cuiti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē vāha te núu jeē tu ní castóo ró, chi sa cácaandíje ndíje ró yá. <sup>5</sup> ¿Te na síquī cúu jeē jēhe Yaā Dios Espíritu yā nuū rō te sáha ya jniñu jéhnu méhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jēē ní cajini sōho ró.

<sup>6</sup> Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuēchi de. <sup>7</sup> Núu súcuan te na jécūhun ni rō jíinánhan ró jēē ñáyuu cácaandíje jeē sáha Yaā Dios jehē i, ndívi i yucūn Abraham síquī jeē súcuan cácaandíje i. <sup>8</sup> Chi nde jenahán je cáhán tutu ĩ jeē ñáyuu táca nación tu jíin jnúhun Yaā Dios, ndahva yā cuēchi i núu candíje i ún. Te nde ná tu cuu táca jēē yáha te je ni jejnūhun ya jnúhun vāha yáha nuū Abraham: Jeē rohó cúu jeē

quendōo ndetū ñayuu tǎcá nación. <sup>9</sup> Núu súcuan te ñayuu cácanđije, quendōo ndetū i jíin Abraham, tēe ni candije jeē ni jéjnūhun ya.

<sup>10</sup> Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núu tútu íi: Jnahnū ndetū tǎca ñayuu jeē tu squícu ndíhi cuiiti jnūhun yósó núu tútu ley, achí. <sup>11</sup> Núu súcuan te cájí cúu jeē ni ñn ñayuu ma quendōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yá cuēchi i, tēcu i jeē candije i jeē sáha ya jehē i, achí. <sup>12</sup> Te ley Moisés tu cáhán jeē cótecu yō ní cáni siquī jeē candije yó, chí sa suhva cáhán: Núu ndé ñayuu squícu jniñu yáha, te cotecu i sáha, achí.

<sup>13</sup> Te Cristo ni jnama ya yohó núu jnūhun cáhán ley jeē jnahnū ndetū yō siquī cuēchi yó, chí máá yá ni ndoho siquī jnūhun jeē jnahnū ndetū yō. Chi yósó núu tutu íi: Tǎca ñayuu condita caa jícǎ yújnu, jnahnū ndetū i, achí. <sup>14</sup> Te Cristo Jesús ni jíhi yā jícǎ yújnu cruz návāha quendōo ndetū ñayuu tǎcá nación sáha ya. Chi jnūhun jeē ni jéjnūhun ya quendōo ndetū Abraham, jíin nuū i. Te súcuan te núu candije yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quíji.

### *Siquī ley jíin siquī contrato jeē ni jéjnūhun ya*

<sup>15</sup> Hermano, na cáhán rī ñn jnūhun ndese cásáha ñayuu ñayiví: Núu ñn tēe sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gǎ. <sup>16</sup> Te suni súcuan ni sáha Yaā Dios ñn contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu íi siquī cuēhē yucūn de, chí sa cáhán siquī ñn-ni yucūn de, te suu cúu Cristo. <sup>17</sup> Núu súcuan te jnūhun jeē cáhán rī yáha cúu jeē xīhna gǎ ni sáha Yaā Dios ñn contrato jíin Abraham, jeē quíji Cristo jnama ya yohó, te ni sácutú yá. Yūcuán na te ni yáha cuñ ciento ocō uxī cuiyá, te sáá te ni jēhe ya ley nuū Moisés. Te ley un jéé ní quee cueé gǎ, ma cúu nacanu contrato un, ni ma cúu casi nuū jnūhun jeē ni jéjnūhun ya jeē jnama ya yohó. <sup>18</sup> Chi núu jeē jíin ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chi sa suhva siquī maá jéé ni jéjnūhun Yaā Dios nuū Abraham cúu jeē ní jnama ya de.

<sup>19</sup> Núu súcuan ¿te ndese jéjníñu ley Moisés? Jéjníñu chí ni jēhe ya un cuéé gǎ návāha nastúu cuēchi i. Te ni ndacu jniñu máá-ni nde ná tu quíji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tǎcǎ ndajéhé yā ni cacastūhun núu Moisés, te Moisés ni nacachí nuū i. <sup>20</sup> Te sñn cúu jnūhun jeē ni jéjnūhun ya nuū Abraham jeē quíji Cristo, chí máñhún-ni ya ni jéjnūhun, te tu ní jíni ñhún ni ñn jeē nacachí nuū Abraham.

### *Siquī ndese jéjníñu ley jenahán*

<sup>21</sup> Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuiiti jeē súcuan. Chi núu jeē ni jēhe Yaā Dios ñn ley jeē cótecu ñayuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. <sup>22</sup> Te tuú chí yósó núu tútu íi jeē ndíhi ñayuu ñayiví, nájnūhun yíndihyū i vehcǎ chí cáyihí i chíji cuēchi. Te súcuan cúu návāha tǎcǎ i jeē candije i jeē ni jíhi Jesucristo jehē i, nihīn i máá jéé ni jéjnūhun ya nuū i siquī jeē candije i ún.

<sup>23</sup> Chi nde ná tu quee jnūhun candije yó Cristo, te nájnūhun ni yíndihyū yō ni sáha ley jenahán, návāha condetu yó quíiví quíji Cristo, Yaā candije yó. <sup>24</sup> Núu súcuan te ley ni cuu ñn jeē ndíto yohó nájnūhun ñn mozo ndíto sūchi lúlí, te

ni jelníñu nde quiví ní quiji Cristo, návaha candíje yó jéē ní jíhī yā jehē yō, te ndahva Yaā Dios cuēchi yó. <sup>25</sup> Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

<sup>26</sup> Chi ndivíi rō cácuu sēhe Yaā Dios siquī jeē ní cacandíje rō Cristo Jesús. <sup>27</sup> Chi tāca rō jeē ní jendute rō siquī jeē ní quiví rō ndaha Cristo, ní sáha ya jeē ní nduu rō nájnūhun cúu máá ya. <sup>28</sup> Te vijna chi tuá cúu rō ní ñayuu hebreo ní ñayuu griego, ní mozo jeē ní jeen ñayuu, ní ñayuu sájniñu cuenta máá, ní tēe ní ñahan. Chi ñn na cúu rō núu yā jeē cáyihī rō ndaha Cristo Jesús. <sup>29</sup> Te núu cáyihī rō ndaha Cristo, núu súcuan te yucūn Abraham cácuu ndije rō, te nihīn rō máá táhū jeē ní jéjnūhun ya.

## 4

<sup>1</sup> Jeē cahán rī jíin rō jíjnáhan rō cúu jeē yáha: ñn sūchi chíi táhū, vēsú máá i naquihīn ndihī jeē névāha tátá i, te núu lulí i chí inuú cúu i jíin mozo. <sup>2</sup> Chi yíhi i ndaha tāca jéē ndíto i jíin jéē ndíto ndajniñu i, nde quee quiví jeē ní jeni tátá i, te sáá te nihīn i. <sup>3</sup> Te suni súcuan yóhó, chí nde ná tu jecūhun ní yō siquī Cristo te ní cuu yó nájnūhun sūchi lulí, te ní yihī yó chíi tāca costumbre jeē ní cajequin ñayuu ñayiví. <sup>4</sup> Te nde ná ní quee quiví jeē ní jeni Yaā Dios, te ní tají yá Sēhe ya, ní cacu ya chíi ñn ñahan, te ní cacu ya yucūn ñayuu naciōn hebreo jeē cáyihī chíi ley Moisés. <sup>5</sup> Súcuan ní cacu ya návaha jnama ya yohó jéē tuá quihī yó chíi ley un, te návaha naquihīn Yaā Dios yohó cuu yó sēhe ya.

<sup>6</sup> Te siquī jeē cácuu rō sēhe ya, te ní tají Yaā Dios Espíritu Sēhe ya ní quiví ini anuá rō, te sáha ya jeē cácahān jee rō: Tátá máá ná. <sup>7</sup> Núu súcuan te tuá cácuu rō nájnūhun mozo, chí sēhe ya cácuu rō. Te jeē cácuu rō sēhe Yaā Dios, te suni nihīn rō máá táhū jeē ní jéjnūhun ya jeē jíin Cristo.

### *Jeē nacani ni Pablo siquī ñayuu cácaandíje*

<sup>8</sup> Chi nde saá, nde ná tu jecūhun ní rō ndese Yaā cúu Yaā Dios, te ní cacuu rō mozo nuū tāca jéē násūu yáā ndaā cúu. <sup>9</sup> Te vijna chí je cájini rō ndese Yaā cúu ya, te vāha ga na cahán rī jeē máá yá je jíiní yā rohó. Núu súcuan ¿te najehē cácuu rō nandió cóo rō nduu tucu rō mozo nuū tāca costumbre ñayuu ñayiví jéē tu níhīn jíniñu cuiti? <sup>10</sup> Chi máni jeē cánēe ñi rō quiví jíin yóhó jíin vico jíin cuiyā. <sup>11</sup> Te yúhú rí sanaa te tu ní jéjníñu cuiti jeē ní nacani rī jñūhun nuū rō.

<sup>12</sup> Cahán ndahú rí jíin rō hermano, jeē na cáni ní rō nájnūhun jéni ní máá rí jeē tuá squícu rí costumbre ñayuu hebreo. Chí ruhū ní nasáha rí máá rí nájnūhun máá rō jeē tu ní cáyihī rō núu ley costumbre ñayuu hebreo. Te tú na vé ní casáha rō jéē cucuíhyá ní rí nde saá. <sup>13</sup> Chí cájini rō ndese ní cuu ná ní nacani núu rí jñūhun nuū rō ndese jnama ya yohó. Chí siquī jeē cuhú rí te ní jecuíñi rí ñuu rō ní nacani rí jñūhun. <sup>14</sup> Te vēsú jñúndóho ní cuu jeē ní cocuhú rí, te tu ní casájéē ní rō nuū rí, ní tu ní casquéhichī ní rō ruhū. Chí sa ní cajetáhú rō ruhū nájnūhun jeē cúu rí ñn ndajehé Yaā Dios, chí nájnūhun jeē cúu rí máá Cristo Jesús. <sup>15</sup> Núu súcuan ¿te najehē cúu jeē tuá cácusī ní rō jíin rí vijna? Chí náhán rí jeē vāha ní casáha rō jéē ní cajnahuhū ní rō núu jeē cúu te tava rō tinūu vāha máá rō, cuāha rō nduu tinūu rí nuú. <sup>16</sup> Te vijna ¿á ní nduu rí enemigo rō siquī jeē cachí rí máni jñūhun ndaā nuū rō, chí nañn?

<sup>17</sup> Te cáhīyo tēe jeē cándihvī ní siquī rō jíjnáhan rō, te nasūu jéē quéndōo vāha ánuá rō, chí sa jeē cácuu de nasásñn de rōhó jíin ruhū, návaha condihvī ní rō jeē cúu máá de. <sup>18</sup> Te íyó vāha jeē cándihvī ní de jehē rō, te núu jeē quéndōo vāha ánuá rō cúu núu. Chí níni jíni ñúhún sáha de jeē vāha rōhó, vēsú núu íne

ri jíin ró chí núu tú ri íne. <sup>19</sup> Séhē mání jijnáhan ró, jeē síquī rohó cúu jeē inga jínu jnáhuhū ni rī, chí nájñūhun ññ ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo. <sup>20</sup> Nacā jeē váha núu jeē ndeé rí jíin ró vijna ññhún, návaha cuu cahān manī rī jíin ró. Te tu cújnúní cuiti ni rī ndese ga cúu jeē cáni ni rī síquī rō.

### *Jñūhun yátá síquī Agar jíin Sara*

<sup>21</sup> Róhó jijnáhan ró jéé cáconi rō quíhi ró chíji ley Moisés, cachi nuū rī: ¿A tu ní cájini sōho ró ndese cáhan ley un? <sup>22</sup> Chí cáhan tutu íi jeē Abraham ni ĩyo uū sēhe yí de. Te ññ i cúu sēhe Agar, ññahan cúu mozo vehe de. Te inga i cúu sēhe ññahan íyó libre, suu ññasihí de Sara jeē ní cuu ññ ññahan numá. <sup>23</sup> Te sēhe ññahan cúu mozo, ni cacu i nájñūhun cácu táca gá sūchi lúlí. Te sēhe ññahan cúu libre, ni cacu i máá síquī jeē súcuan ni jejnūhun Yaā Dios. <sup>24</sup> Te yāha cúu ññ jñūhun yátá, chí ndindúú ññahan un cúu ññ nájñūhun ndindúú contrato jeē ni sáha Yaā Dios jíin ññayuu. Máá ññahan nání Agar, cúu ññ nájñūhun contrato ley jeē véji nde yucu Sinaí. Te ññayuu cáyihí chíji contrato ley, cácuu i mozo nuū ley un. <sup>25</sup> Chí Agar cúu nájñūhun ley jeē ní jéhe Yaā Dios xiní yucu Sinaí jeē íin nde Arabia. Te cúu ññ nájñūhun Jerusalén, ññuu ññayuu hebreo, jeē íyó vijna, chí táca sēhe ññuu Jerusalén, cácuu i nájñūhun mozo nuū ley un. <sup>26</sup> Te Jerusalén jeē íyó andiví, chí sa suhva íyó libre nájñūhun Sara. Te yóhó ññayuu cácandíje, nájñūhun sēhe un cácuu yó, chí íyó libre yō nuū contrato ley. <sup>27</sup> Chí suhva yósó nuū tútu íi:

Róhó jeē ní cuu ró ññahan numá jéé tú sēhe ró, na cúshí ni rō.

Róhó jéé tu ní jéhnde chíji ró jéé scácu ró, na cána jee ró jéé cúshí ni rō.

Chí coo cuehē gá sēhe róhó jéé ní cuu ró ññahan numá vésú ññahan jeē jé ni scácu sēhe.

Achí tutu.

<sup>28</sup> Hermano, sēhe Yaā Dios cácuu yó, chí súcuan ni jejnūhun ya nuū yō, nájñūhun ni jejnūhun ya nuū Abraham jeē cacu sēhe de Isaac. <sup>29</sup> Te nde saá te inga sūchi ní cacu nájñūhun cácu táca gá ññayuu, ni jíto xeēn i Isaac, sūchi ní cacu ní sáha Espíritu. Te nájñūhun ni ĩyo saá, suni súcuan cájito xeēn ññayuu táca sēhe Yaā Dios nde vijna. <sup>30</sup> ¿Te ndese cáhan tutu íi? Achí: Quenehen ró ññahan cúu mozo na quíhín ññ jíin sēhe ññ. Chí sēhe ññahan cúu mozo, ma nihín i tahū jíin sēhe ññahan libre, achí yá jíin Abraham. <sup>31</sup> Núu súcuan hermano, tu cúu yó nájñūhun sēhe ññahan cúu mozo, chí nájñūhun sēhe ññahan libre cúu yó.

### *Na cuññi ññihin yó jíin jñūhun jeē ni sáha libre yohó*

## 5

<sup>1</sup> Te Cristo ni sáha libre yā yohó jéé tuá yíhi yó chíji ley Moisés. Núu súcuan te cuññi ññihin ró jíin jñūhun jeē ni sáha libre yā yohó, te ma ndívicoo tucu ró cuu ró mozo nuū ley un.

<sup>2</sup> Sáha ró cuenta jijnáhan ró, chí ruhū Pablo cahán rī jíin ró jeē núu squícu ró ley circuncidar, yúcuán na te tu ññhín jñíñu cuiti jeē ní candíje ró jéé ní jíhi Cristo jehē rō. <sup>3</sup> Te inga jínu cáhan ññihin rī jíin táca téé cánducú cuu circuncidar, jeē núu súcuan te suni cánuú jéé squícu de ndívii cuiti gá jñūhun cáhan ley Moisés. <sup>4</sup> Róhó jéé cánducú ró quendōo ndaá ró jeē squícu ró ley un, je ní casiáá rō Cristo núu súcuan. Je ní castóo ró jñūhun jeē ndahva yā cuēchi ró síquī jeē cundáhú ni Yaā Dios rohó. <sup>5</sup> Te máá yó chí cájica yó jíin Espíritu, te cácandíje yó jéé ní ndahva yā cuēchi yó, te jeē yúcuán ññūhun ni yō jeē quendōo ndaá yō

quivī cuñi yó nū Yaā Dios. <sup>6</sup> Chi yóhó jēē cáyihī ndaha Cristo Jesús, vēsú nūu jeē cúu yó circuncidar chí tu cúu yó, tú na vé nihín jniñu. Jeē nihín jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

<sup>7</sup> Váha ni cacandíje ró nūu. ¿Te ndé ñn ni jesi jeē tuá cájetáhú ró jñuhun ndaā nūu súcuan? <sup>8</sup> Jñuhun jeē ní cascáhán de róhó, chí tú vēji nuū maá Yaā ní cana róhó ní quivicoo ró ndaha ya. <sup>9</sup> Te ma nāa ni rō jeē téē cástáhú róhó, jñuhun cástéén de cúu nájñuhun levadura, chí vēsú jecu-ni levadura, te ndāa ndihī ñujen sáha. <sup>10</sup> Te cúcáhu ni rī jeē maá Jítoho yō sáha ya jeē ma cándíje ró jñánhan ró inga jñuhun jeē sñn cáhán. Te maá Yaā Dios cuáha ya castigo téē jeē sáca nūu xinī rō, nūu na-ni téē cúu de.

<sup>11</sup> Te ruhū, hermano, nūu jeē nácani ga rī jñuhun ley circuncidar nde vijna, te jnáhan rī ñayuu hebreo ma cóto xeēn i ruhū nuū. Chí ma quítí ni i jeē nácani rī jñuhun jeē ní jíhī Cristo jicā cruz, nūu jeē súni nácani rī jñuhun circuncidar nuū. <sup>12</sup> Te táca téē jeē sáca nūu xinī rō siquī jñuhun ún, váha ga na cáhnde gā de máá de nūu súcuan.

<sup>13</sup> Chí máá ró jijnáhan ró hermano, ni cana ya rohó návāha coo libre ró nuū ley un. Te vēsú iyó libre ró, te ma cáni ni rō jeē cúu quivicoo ró táca cuéchi jeē cúu modo neé cúní maá ró, chí sa suhva na sáha ró máá ró mozo jeē chindéē ñáhán ró jnáhan ró siquī jeē cundáhú ni rō i. <sup>14</sup> Chí je ni squícu ró ndihī ley nūu squícu ró ñn-ni jñuhun ndácu jniñu yáha: Cundáhú ni rō jnáhan ró nájñuhun cundáhú ni rō maá ró, achí. <sup>15</sup> Te nūu máni jeē ndóna xeēn rō siquī jnáhan ró jéē cuajnáhan ró, te coto ma snāá ró jniñu jeē ni sáha ya mehñu ró jijnáhan ró.

### *Modo cuní ñayuu tu cándíje jíin modo sáha Espiritu*

<sup>16</sup> Súcuan cáhán rī jíin ró jijnáhan ró: Caca ró nájñuhun cúní maá Espiritu, te yūcuán na te ma sáha ga ró modo jeē cuní maá ró. <sup>17</sup> Chí táca jéē cuní maá yó, yūcuan jési nuū jeē cuní maá Espiritu. Te jeē cuní Espiritu, jési nuū modo neé jéē cuní maá yó. Te jeē ndindúú yáha chí cájesi nuū jnáhan, te jeē yúcuán tu cúu sáha ró jniñu váha jeē cuní rō sáha ró. <sup>18</sup> Te nūu máá Espiritu steén nuū rō, nūu súcuan te tuá cáyihī ró chíji ley jenahán.

<sup>19</sup> Te iyó ndijin táca jniñu casáha ñayuu cájica jíin modo neé máá, te yāha cúu: Cásiqui ndéē jnáhan i, casáha i jniñu jnéhén, casáha neé ndasí i. <sup>20</sup> Cáchiñúhún i ídolo, casáha tásí i, cájito uhū jnáhan i, cájejnáhan i, cácuquíñí ni i. Te yachí cáquítí ni i, te cándihví ni i jeē cúu máá-ni i, te cátejnáhan i casásñn i máá i. <sup>21</sup> Te cácuquésún ni i, cájehni i ndíyí, cánajñi i, casáha i vico neé, jíin táca gá jeē súcuan. Te cáhán ñihin rī jíin ró, nájñuhun je ni cahán rī jíin ró saá, jeē ñayuu casáha súcuan, ma nihín tahú i quivicoo i ñuu nuū ndácu Yaā Dios jniñu.

<sup>22</sup> Te ñayuu jeē nduú i jíin Espiritu, táca jniñu yáha sáha ya jíin i: Jeē cundáhú ni jnáhan, jeē cúsiñí ni, jeē iyó ndeyí sñ ni, jeē iyó paciencia, jeē maní ni, jeē váha ni, jeē squícu vāha, <sup>23</sup> jeē tu sáha jeē cujéhu, jíin jéē jési modo jeē cuní maá. Te tú na ley cacán cuéchi siquī ró nūu sáha ró táca jniñu yáha. <sup>24</sup> Te ñayuu cáyihī ndaha Cristo, nájñuhun je ni cajehni i modo neé máá i jicā cruz, nde jíin táca jéē ndíyo neé ni i te cutíndí i. <sup>25</sup> Te jeē súcuan ni jēhe máá Espiritu ñn vida jeē nūu yō, te suni na cáca yó jíin modo steén Espiritu.

<sup>26</sup> Te ma sandúxí yó jéē squítí ni yō jnáhan yó, te ni ma cucuésún ni yō siquī jnáhan yó.

*Jñuhun jeē chindéē ñáhán yó jnáhan yó*



## 6

<sup>1</sup> Hermano, núu ñn jnáhan ró ni sáha cuéchi, te róhó jéé cájica jíin Espíritu, na náchuhun ichi ró i. Te jíin jnúhun vítá cahān rō jíin i, te suni condito ró máá ró jeē ma cacān inī rō sáha ró táca cuéchi. <sup>2</sup> Te chindéé ñhán rō jnáhan ró núu na vé cúu jeē ndóho i, chí súcuan cúu jeē squícu ró ley Cristo.

<sup>3</sup> Chí núu ñn ñayuu jéni ni i jeē ñayuu teyí cúu i, vésu nasūu súcuan cúu, te stáhú i máá i núu súcuan. <sup>4</sup> Te táca ñn ñn ró na cóto ndee rō ndese cáa jniñu sáha ró. Te núu vāha sáha ró, yūcuān na te cuu cusñ ni rō jíin jéé sáha máá ró, te tu níni jéé scāni jnáhan ró máá ró jíin jnáhan ró. <sup>5</sup> Chí táca ñn ñn yó cánuú squícu yó jíin jniñu ní jéhe ya nuū máá yó.

<sup>6</sup> Te róhó jéé cascuáha jnúhun vāha ya, na chindéé ñhán rō tēe cástéén nuū rō jíin táca jéé vāha cánevāha ró.

<sup>7</sup> Ma stívi ró cani ni rō jeē cuu sáha ró cuéchi. Chí ma cúu sácata rō nuū Yaā Dios cani ni rō jeē tu sáha ya cuenta. Chí táca núu ndese sáha ñayuu, suu yūcuān nanihīn i. <sup>8</sup> Chí ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chí nihīn i jeē cótecu i nñ cáni andívi sáha Espíritu. <sup>9</sup> Te ma cuíta yó jeē sáha yó jniñu vāha núu súcuan, chí jeē quée máá quívi te nanihīn yō, te núu ma cuíta yó. <sup>10</sup> Núu súcuan te táca jínu jeē cúu sáha yó, te na sáha vāha yó jíin táca ñáyuu, te hermano yō jeē cácandíje cúu jeē cánuú gá.

*Saludo jíin jnúhun cástūhun Pablo jeē sándihí*

<sup>11</sup> Condéhe ró jeē náhnu letra tée ri cuajeé nuū rō jíinánhan ró, chí ndaha máá rí tée ri yāhá. <sup>12</sup> Te tēe jeē casáfuerza de róhó cuu ró circuncidar, casáha de síquí jeē cácuni de cuajnúhún ñáyuu de. Te casáha de návāha ma cóto xeēn ñayuu de jeē cánacani de jnúhun jeē ni jíhī Cristo jehé yō. <sup>13</sup> Te ni máá de jeē casáha de circuncidar, suni tu squícu vāha de ndíhi ga ley jenahán. Te cácuni de jeē cuu ró circuncidar, návāha cuu sátéyí de máá de núu quihīn ró jnūnī circuncidar sáha de. <sup>14</sup> Te ruhū tu cúní rī satéyí rī máá rī síquí ní ñn jeē yúcuān, chí máá ñn-ni síquí jeē ni jíhī Jitoho yō Jesucristo jíca cruz. Chí síquí yūcuan cúu nájnúhun ni jíhī rī, chí ni siaá rī táca jéé iyó ini ñayívi, te suni nájnúhun ñn ndíyí cúu rī nuū ñayívi. <sup>15</sup> Chí núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chí jeē níhín jniñu cúu jeē ni nasájeé yá anuá yō. <sup>16</sup> Te ñúhun ni rī jeē táca ró jeē jíca ró jíin modo yáha, na sáha ga yā jeē coo ndeyí coo sñ ni rō, te cundáhú ni yā rohó. Te suni ñúhun ni rī jeē súcuan sáha ya jíin táca gá i jeē cúu ndije i ñayuu cácandíje Yaā Dios.

<sup>17</sup> Te vijna jíin nñ gá cuahān yō, cúní rī jeē ma stáhān gā ni ñn ñayuu ruhū. Chí yiquí cúnu rī ndíso seña jeē ni tújī rī ni ndoho ri jeē cúu ri mozo máá Jitoho yō Jesús.

<sup>18</sup> Hermano, ñúhun ni rī jeē na sáha ga Jitoho yō Jesucristo jeē vāha róhó jíinánhan ró. Súcuan na cóo. Amén.



## CARTA JEE NI TEE APOSTOL SAN PABLO NUU ÑAYUU ÑUU EFESO

<sup>1</sup> Máá rí cúu Pablo, apóstol Jesucristo, chí súcuan ni nujnahan ni Yaā Dios ni tají yá ruhū. Te téé ri carta yáha cuájeē nuū rohó ñáyyuu ñuu Efeso, jeē cácuu ró ñáyyuu maá yá jeē cácandíje ró Cristo Jesús. <sup>2</sup> Te ñúhun ni rí jeē Tatá yō Yaā Dios jíin Jítoho yō Jesucristo, na sáha ga yā jeē váha róhó, te sáha ya jeē coo ndeyí coo síh ni rō.

### *Jeē sáha Cristo jeē quéndōo vāha ánuá yō*

<sup>3</sup> Na cáhán yō jeē yóhoyo cújéhnú Yaā Dios, Yaā cúu Tatá Jítoho yō Jesucristo. Chí ni jéhe ya táca jéé váha iyó andiví jéé quéndōo vāha ánuá yō, chí yáhi yó ndaha Cristo. <sup>4</sup> Chí nde ná tu jecōo ñayiví te ni nacáji ya yohó jéé quívi yó ndaha Cristo, návāha coo ndoo ánuá yō te caca ndaā yō nuū yā. <sup>5</sup> Je ni cundáhú ni yā yohó nde saá, te ni tana ya yohó jéé náquihin séhe ya yohó. Te jíin Jesucristo ni sáha ya súcuan, chí ni nujnahan ni yā sáha ya. <sup>6</sup> Te jeē yúcuan níni na cáhán yō jeē yóhoyo cújéhnú ya, chí yóhoyo vāha ni sáha ya yohó jíin táca jéé váha ni yā, siquí jeē yáhi yó ndaha Cristo, Séhe ya jeē maní yā jíin. <sup>7</sup> Te siquí jeē yóhoyo vāha ni yā jíin yó, te Séhe ya un ní jnama ya yohó jéé ni jíhi yā jehē yō, te ni ine cáhnu ni yā nuū cuéchi yó. <sup>8</sup> Te ni steén yā jeē cundáhú ndasí ni yā yohó, te ni sáha ya jeē jécúhun ni yō te cundíchi yó jíin jnúhun ya. <sup>9</sup> Te ni sáha ya jeē cuní yō in jnúhun ya jeē ní yisáhi, jeē tu ní sáha ya jeē cuní ñayuu jenahán. Chí súcuan ni tee ni yā nde saá, te nujnahan ni yā sáha ya. <sup>10</sup> Te yāha cúu jnúhun ún: Nde na quéé tiempo te sáha ya jeē ndihi jeē yúcu andiví jíin jéé yúcu ñayiví, inuú-ni nduu, quíhi ndaha Cristo.

<sup>11</sup> Te siquí jeē yáhi yó ndaha Cristo, te nihín yō tahú yō, chí je ni nacáji Yaā Dios yohó nde saá. Chí súcuan ni tee ni maá yá, chí sáha ya táca-ni jeé jé ni cundaā ni yā jeē nujnahan ni yā sáha ya. <sup>12</sup> Súcuan ni sáha ya návāha máá rí jeé xíhna gā ni cacandíje ri Cristo, caca ndaā ri te súcuan sájéhnú ri yā jeē yóhoyo luu cújéhnú ya. <sup>13</sup> Te suni máá ró jíjnáhan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihín rō Espíritu Santo jeē ni jéjnúhun ya jeē cuáha ya. Te ndéé Espíritu yā ún iní anuá yō, te cúu ya nájnúhun sello jeē steén jeē cúu yó séhe Yaā Dios. <sup>14</sup> Te sáha ya jeē jíni ndije yó jéé cucuée gá te cuáha Yaā Dios tahú yō, nde na sínu ya jniñu jeē jnáma ya ñayuu ya. Te quívi ún cáhán yō jeē cújéhnú ya, chí yóhoyo luu cújéhnú ya.

### *Jeé jícan tahú Pablo jehē ñáyyuu cácandíje*

<sup>15</sup> Te ruhú ni jini jnúhun ri ndese cácandíje ró jéé ni sáha Jítoho yō Jesús jehē rō, jíin ndese cácundáhú ni rō ndihi ñayuu cáyíhi ndaha Yaā Dios. <sup>16</sup> Te jeé yúcuan tu jécuiñí rí jeé nácuatáhú rí jehē rō, te jeé jícan tahú rí te tu náa ni rí cacán tahú rí jehē rō. <sup>17</sup> Chí jícan tahú rí jeé na sáha Yaā Dios jeé jécúhun vāha ni rō te ndundíchi ró jíin jnúhun ya, te cuní gā rō ndese Yaā cúu ya. Chí máá yá cúu Yaā Dios Jítoho yō Jesucristo, te cúu ya Tatá yō jeé líuu ndasí cújéhnú. <sup>18</sup> Te jícan tahú rí jeé na sándijin gā yā nuū jeé níjnūní rō, návāha jécúhun ni rō ndese cáa ndihi jeé cáñuhun ni rō nihín rō siquí jeé ní cana ya rohó. Te jécúhun ni rō ndese cúcá cácuu ró jíin táca jnúhun jéhnú luu ndíso jnúhun ya jeé cúu ñayuu maá yá. <sup>19</sup> Te jícan tahú rí jeé na jécúhun ni rō ndese yóhoyo jéhnú poder yā jeé sájniñu ya iní anuá yohó jéé cúu yó ñayuu cácandíje. Chí tu ndíhi cuíti poder

yā. <sup>20</sup> Te suu poder un cūu jeē ni stéén yā ná ni sáha ya ñn jniñu jéhu ga jeē ní nastécu yā Cristo mēhñu ndíyí te ni scúcōo ya lado váha ya nde andiví. <sup>21</sup> Te ni jeni ya Cristo siquī táca jéē cujéhu, jíin jéē ndiso jniñu, jíin jéē jnñi poder, jíin jéē ndácu jniñu, jíin siquī táca jeē cácahān ñayuu jeē cujéhu, cūu tiempo yáha, cūu tiempo quiji. <sup>22</sup> Te ni jēhe ya jeē cujéhu Cristo siquī ndivii. Te ni sáha ya jeē cūnuú yá cujéhu ya nuū ñayuu cácañdije. <sup>23</sup> Te ñayuu cácañdije un cácuu i nájnūhun yiqui cūñu ya, chi ñn na cūu i jíin yá te ñūhun chitú yá ñi anuá i, chi Yāa jeē ñūhun chitú ññ cáhnu-ni cūu ya.

### *Ni cácu yó siquī jeē ní cundáhú ni yā yohó*

## 2

<sup>1</sup> Te ni sáha ya jeē cotecu rō ññ cáni jíin Cristo. Chi je ni cacuu ró nájnūhun ndíyí nuū yā, ni sáha cuēchi ró jíin jniñu néé ní casáha ró. <sup>2</sup> Chi ni cajica ró jíin jniñu yúcuan nde saá, ná ni cacondiquīn rō jniñu ñayuu ñayiví, ná ni cajetáhú ró núu jexeén jeē ndácu jniñu nuū táca táchi xeén, te jica nuū táchi. Te suu cūu jeē scánda ñi ñayuu ññni ní nuū Yāa Dios. <sup>3</sup> Te máa rí jijnáhan rí, suni súcuan ní cajica rí, chí ní casáha rí jniñu néé jéē cuní máa rí, jíin táca jéē jicán yiqui cūñu rí, jíin jéē cájeni néé ní rí nde saá. Jeē yúcuan suni ní cacuu rí ñayuu jeē ñññ castigo xeén jeē cuáha ya nuú, chí inuú-ni ní casáha rí nájnūhun casáha máa i. <sup>4</sup> Te Yāa Dios chí yóhoyo cuehē ní cundáhú ní yā yohó, te váha ndasí ní yā jíin yó. <sup>5</sup> Te náa cūu yó nájnūhun ndíyí nuū yā ní sáha cuēchi yó, te ní nastécu yā yohó jéē cótecu yó ññ cáni jíin Cristo. Chí siquī jeē yóhoyo váha ní yā cūu jeē ní jnama ya yohó. <sup>6</sup> Te ní nastécu yā yohó jéē cótecu inuú yó jíin Cristo Jesús, te scúcōo ya yohó jíin yá nde andiví. <sup>7</sup> Súcuan ní sáha ya návāha ññ gá tiempo jeē quiji, te stéén yā ndese yóhoyo maní yā jíin yó, jíin ndese váha ní yā jíin yó jeē siquī Cristo Jesús. <sup>8</sup> Chí siquī jeē yóhoyo maní yā jíin ró cūu jeē ní jnama ya rohó, chí ní cacandije ró jéē sáha ya jehē rō. Te nasūu siquī jeē ní casáha máa ró cūu, chí tahú jeē ní jēhe ya nuū rō cūu. <sup>9</sup> Chí tú na jniñu váha ní casáha yó jéē jnáma ya yohó, te jeē yúcuan ní ññ yó ma cūu sátéyí yó máa yó. <sup>10</sup> Chí cūu yó ñn jniñu luu jeē ní nasáha máa yá, chí ní nasáha ya yohó jéē cundúú yó jíin Cristo Jesús, návāha sáha yó táca jniñu váha jeē jé ní sátūhva Yāa Dios jeē sáha yó.

### *Jeē sáha Cristo jeē ndíyí yó núu jñūhun maní Yāa Dios jíin yó*

<sup>11</sup> Núu súcuan te na núcūhun ní rō ndese ñayuu ní cacuu ró ndé saá. Chí tu ní cácuu ró ñayuu hebreo, chí sa suhva ní cacuu ró ñayuu táca nación jeē tu jíin jñūhun ya. Te ñayuu hebreo jeē casáha circuncidar yiqui cūñu, ní cacahān i jeē cácuu ró ñayuu tu sáha circuncidar. <sup>12</sup> Na núcūhun ní rō jeē ndé saá tu ní cáhñi ró jíin Cristo, te ní cacuu ró ñayuu ñnuu jicá núu nación Israel. Te tu ní cájini ró táca jñūhun contrato jeē ní jéjnūhun Yāa Dios. Te tu ní ñne Yāa Dios jíin ró ñayiví yáha, te tú na vé jeē váha ní cáñūhun ní rō jeē cóo. <sup>13</sup> Te vijna chí ní ndívicoo ró núu Yāa Dios jeē tu ní cájini ró jñūhun ya nde saá, chí ní quívicoo ró ndaha Cristo siquī jeē ní jíhi yá jehē rō. <sup>14</sup> Chí Cristo cūu Yāa sáha jeē ndúmaní jnáhan yó. Chí ní sáha ya jeē ñayuu hebreo jíin ñayuu táca gá nación, ní nduu yó ñn na nuū yá. Chí ní sáha ya jeē tuá jíto uhú jnáhan yó, te suu cūu nájnūhun jeē ní jenu ya ñn jeē ndihyú sava mēhñu yó jeē sásñn yohó. <sup>15</sup> Chí ní socó yá máa yá ní jíhi yá, te súcuan ní ndahva yá ley jenahán jíin jñūhun ndácu jniñu jíin jéē tajnúni ndiso máa. Chí ley un ní sásñn ñayuu hebreo jíin táca nación jeē tu ní jíin i ley un. Te ní nasquíjnáhan ya ndíhi yó jéē ní nduu yó ñn na nación

jeé, yŕhi yó ndaha ya. Te súcuan ni sáha ya jeé ní ndumanī jnáhan yó. <sup>16</sup> Te jíin jeé ni jíhī yā jicá cruz, te ni snáā yā jnūhun cájito uhū jnáhan ñayuu hebreo jíin táca gá nación. Te ni sáha ya jeé ndívicoo yó núu jnūhun manī Yaā Dios jíin yó, te ni nduu yó ñn na ñayuu maá yá.

<sup>17</sup> Chi ni quiji Cristo ni nacani ya jnūhun vāha nuū tāca ñáyuu jeé na ndívi i nuū jnūhun manī yā jíin i, cúu róhó ñáyuu tu ní cájini jnūhun ya, te suni ñayuu jnáhan ri hebreo jeé cájini jnūhun ya. <sup>18</sup> Te vijna te siquī jeé ni jíhī Cristo, te ndíhi yó, cúu ñayuu hebreo chí ñáyuu táca gá nación, cuu quívicoo yó núu Tatá yō Yaā Dios, te ñn-ni Espíritu yā sáha. <sup>19</sup> Núu súcuan te tuá cúu ró nájñūhun ñayuu ñuu jicá ní ñayuu tatú, chí ñn na ní nduu ró jíin ñáyuu ñuu maá yá. Te jnáhan ñayuu vehe Yaā Dios cácuu ró. <sup>20</sup> Te cácuu ró nájñūhun ñn ñn parte ñn vehe cáhnu jeé cúvāha siquī cimientu, te cimientu un cúu jnūhun Cristo jeé ní canacani táca apóstol jíin téé ní canacani jnūhun ya jenahán. Te máá Jesucristo cúu nájñūhun yuū cánuú gá jeé yítuu vehe. <sup>21</sup> Te níí vehe cúvāha vāha siquī maá yá, cúúsúcun cuáhān, cúu ñn templo ñi jeé ndeé maá Jítóho yō. <sup>22</sup> Te suu cúu máá ró jijnáhan ró, chí ndúú ró jíin Cristo, te inuú-ni sáma ya rohó jíin táca ñáyuu cácandíje, cácuu ró nájñūhun ñn ñn yuū templo. Te suu cúu jeé ndeé Espíritu Yaā Dios ini rō nájñūhun ini ñn templo.

*Jeé ndíso jniñu Pablo nácani de jnūhun nuū ñáyuu tu jíin jnūhun Yaā Dios*

### 3

<sup>1</sup> Te jeé yúcuan ruhū Pablo, jícán tahū rī nuū yā. Te íne ri vecāa siquī jeé ní nacani ri jnūhun Cristo Jesús nuū rohó ñáyuu táca nación jeé tu ní jíin jnūhun ya nuū. <sup>2</sup> Te jíin rī jeé ní cájini ró jnūhun ndese yōhoyo vāha ni sáha Yaā Dios jíin rī, chí ni jēhe ya jniñu nuū rī jeé nácani ri jnūhun vāha ya nuū rō. <sup>3</sup> Te jnūhun ya jeé ní yisáhí, ni nastúu ya nuū rī, nájñūhun je ni tee ri jecu siquī un núu rō. <sup>4</sup> Te núu na cáhu ró te cuu jecūhun ni rō jeé ní jíin vāha ri jnūhun Cristo jeé ní yisáhí un. <sup>5</sup> Te tu ní stéén yā jnūhun sáhí un núu ní ñn ñayuu táca cuiyā ní quiji ichi yátá. Te vijna cúu jeé steén ndijin yā jíin Espíritu yā nuū táca apóstol jeé ní jeni ndoo ya, jíin núu téé canacani jnūhun ya. <sup>6</sup> Te súcuan cáhán jnūhun ní yisáhí un: Ñayuu táca gá nación, ñn cáhnu-ni nihīn i tahū i jíin ñáyuu hebreo, chí ni cacandíje i jnūhun jeé jnáma ya i. Te inuú-ni ní nduu ndíhi i, te ñn cáhnu-ni quéndōo ndetū anuá i sáha Cristo, nájñūhun ni jejñūhun Yaā Dios. <sup>7</sup> Te jeé siquī jnūhun yáha cúu jeé ní jeni ya ruhū jeé nácani ri jnūhun nuū rō. Chí ni cutahū rī jniñu luu yáha jeé ní jēhe ya nuū rī. Te jíin poder yā ni sáha ya un jíin rī. <sup>8</sup> Te ruhū chí cúu ri tēe núu ga nuū táca ñáyuu núu ga jeé yŕhi ndaha ya. Te vesú súcuan te nuū maá rī ni jēhe ya jniñu luu yáha jēé nácani ri jnūhun vāha ya nuū ñáyuu táca nación jeé tu jíin, ndese yōhoyo cúcá yó ndíhi jeé ndíso jnūhun Cristo, jeé ma cánda cuítu yō jecūhun ni yō. <sup>9</sup> Chí ni jeni ya ruhū jeé steén cají rī jeé suni máá i jnama ya i. Te yúcuan cúu jnūhun Yaā Dios jeé ní yisáhí ndé jenahán ndasí, chí máá yá ni sáha ndíhi-ni. <sup>10</sup> Te súcuan ni sáha ya jíin ñáyuu, návāha vijna te táca jéé cácujeñu jíin jéé ndíso jniñu nuū sucún, na cúni ndese ndíchí ndasí Yaā Dios. Chí ndíchí ndasí ni sáha ya jíin ñáyuu cácandíje. <sup>11</sup> Chí súcuan ni tee ni yā nde níí cáni, te ni sáha ya jeé Jítóho yō Cristo Jesús ní squícu ya ún. <sup>12</sup> Te siquī jeé ní sáha Cristo, te vijna te jíin ndíje yó jéé cúu quívi yó cáhān yō jíin Yaā Dios siquī jeé candíje yó Cristo. <sup>13</sup> Núu súcuan te cáhán ndahú rī jíin ró jeé ma cucuíhyá ní rō siquī jñūndóho jeé ndóho ri jehē rō. Chí suu sáha jeé quéndōo ndetū anuá rō jijnáhan ró.

*Cristo yōhoyo cundáhú ni yā yohó*

<sup>14</sup> Te jeē yúcuan cúu jeē jécuiñi yití rí nuū maá Yaā cúu Tátá Jitoho yō Jesucristo. <sup>15</sup> Te maá yá cúu Tátá nuū ndihi ñayuu yā jeē yúcu andiví jín ñayiví. <sup>16</sup> Te jícán tahú rí jeē jín poder yā jeē kujéhnú ndasí yá, na sáha ya jeē ije vāha ni rō jín jnúhun ya, te coo fuerza ini anuá rō, sáha Espiritu yā. <sup>17</sup> Te jícán rí jeē candíje ñihin ró Cristo, návāha condee yā ini anuá rō, te jñi vāha ró jnúhun jeē cundáhú ni yā rohó, te cuiñi ñihin ró jín. <sup>18</sup> Te súcuan te cuu jecúhun vāha ni rō jín táca ñáyuu candíje, ndese cáa jnúhun cundáhú ni Cristo yohó. Chi yōhoyo jíté, cáni, cúnú, súcún jnúhun ún, chi yōhoyo cuehē sáha. <sup>19</sup> Te jícán rí jeē na cúní vāha ró ndese cundáhú ni yā yohó, vésú tu cúu cuiñi jecúhun ni yō ndihi ndihi. Te súcuan te cundúú ró jín Yaā Dios jeē cunuú yá ini anuá rō.

<sup>20</sup> Núu súcuan te na cáhán yō jeē yōhoyo luu cújéhnú ya, chi maá yá cúu Yaā iyó poder jeē sáha ya jeē vāha ndasí gá vésú ndihi jeē jícán yō chí jée jeni ni yō. Te sáha ya un jín poder yā jeē sájniñu ini anuá yō. <sup>21</sup> Te na cáhán yō jeē yōhoyo luu cújéhnú ya jeē siquí jeē ni sáha ya jehē ñayuu cácandíje jín jée siquí Cristo Jesús. Te súcuan na cóo nde ñi cáni cuiñi tiempo jeē quíji. Amén.

*Inuú-ni cácuu ñayuu cácandíje sáha Espiritu*

**4**

<sup>1</sup> Te ruhū jeē íne ri vecāa siquí jnúhun maá Jitoho yō, cáhán ndahú rí jín ró jeē na cáca ndaā rō nájnūhun cánuú caca ró jée cácuu ró ñáyuu ni cana ya. <sup>2</sup> Te níni na cóo suchí ni rō, te coo vitá ni rō. Te na cóo paciencia rō, te cuandeyí ni rō jín jñahan ró jée cundáhú ni rō i. <sup>3</sup> Te na cóndihví ni rō coyúcu mání inuú ró, sáha maá Espiritu nuū véji jnúhun maní ni. <sup>4</sup> Chi ñn-ni cácuu ñayuu maá yá, te iyó ñn-ni Espiritu, te inuú cáñūhun ni yō jeē cóo jeē vāha siquí jeē ní cana ya yohó. <sup>5</sup> Te iyó ñn-ni Jitoho yō, jín ñn-ni jnúhun cándíje yó, jín ñn-ni jnúhun jéndute yó. <sup>6</sup> Te iyó ñn-ni Yaā Dios jeē cúu Tátá yō jijnáhan yó. Te maá yá kujéhnú siquí ndihi yó, te sájniñu ya jín ndihi yó, te ndée yá ini ndihi yó.

<sup>7</sup> Te táca ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō. <sup>8</sup> Jeē yúcuan cáhán tutu íi: Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jín.

Te ni saja ya tahū nuū táca ñáyuu.

<sup>9</sup> Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yáha. <sup>10</sup> Te Yaā ní cuun, suni maá yá cúu jeē ní ndaa nde nuū sucún gá andiví, návāha cuhun chitú yá ñi cáhnu-ni. <sup>11</sup> Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava ga coo pastor condito ñayuu cácandíje, te sava ga steén. <sup>12</sup> Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jín jnúhun ya. <sup>13</sup> Te súcuan coo nde nduu inuú-ni ndihi yó jín jnúhun cándíje yó, te cuni vāha yó ndese Yaā cúu Sehe Yaā Dios. Te súcuan ije vāha yó ndé na cúchitú yó jín ndihi jnúhun jeē ñúhun chitú ini Cristo. <sup>14</sup> Te súcuan te ma cóo ga yō nájnūhun sūchi lúlí jée yachí jeni yāha jeni yúcuán ni i, ni ma quíví nduu yó cháha chúcuán jín sñn sñn jnúhun jeé cástéén tēe stáhú jée yōhoyo ndito de squíví de yohó nuū jnúhun stáhú. <sup>15</sup> Chi sa suhva na cóndiquín yō jnúhun ndaā jín jnúhun cundáhú ni. Te súcuan cuehnu yó jín táca jniñu cúní Cristo, Yaā kujéhnú nuū ñáyuu cácuu nájnūhun yiquí cúñu yā, chi ñn na cúu i jín yá. <sup>16</sup> Te

sáha ya jeē nduu inuú ni tãcá i jeē cáhije i cuahān i, chi cácuu i nájñuhun ñn na yiqui cúñu jín yá. Te jéññu váha tãcá ñn ñn i ndese ni nihñ jññu i, návāha scuéñu jñāhan te ije jññāhan jín jñuhun cundáhú ni.

### *Jeē ndújeé yó sáha Cristo*

<sup>17</sup> Nú súcuan te yāha cúu jñuhun cáhán rī jín ró, te jeē achí Jítóho yó cúu jeē cahán nihñ rī jín ró: jeē ma cáca ga ró nájñuhun cájica sava ga ñayuu jeē tu jín i ndese Yaa cúu Yaa Dios, chi cájica i jín jñuhun jeē jéni sáa-ni máá i. <sup>18</sup> Te íyo nee nuú jeē nájñuñi i, te tu névāha i Espiritu jeē véji nuú Yaa Dios, chi tu jín i jñuhun ya, siquí jeē nihñi ni i. <sup>19</sup> Te tuá cúcanu i, chi ni quívicoo i jín jññu neé ndasí, te ndíhví ni i sáha i tãcá jññu jnéhén. <sup>20</sup> Te róhó jññāhan ró, nastuu súcuan ní cáscuáha ró jñuhun Cristo, <sup>21</sup> te núu ndaā jeē ní cajini ró jñuhun ya jín jéé ní cacutúhva ró jín jñuhun ndaā Jesús. <sup>22</sup> Nú súcuan te na stóo ró táca jññu ní casáha ró ichi yátá, ná ni casáha ró modo cuni máá ró jeē ní cujnéhén ánuá ró ni sáha jññu neé stáhú jéé ní ndiyo ni ró. <sup>23</sup> Te na ndújeé ánuá ró jín jéé nájñuñi ró. <sup>24</sup> Te na cuáha ró jñuhun ndujeé ró, chi nasáha Yaa Dios rohó nájñuhun cúní máá yá jeē cáca ndaā ró jín jññu váha jññu ndoo.

<sup>25</sup> Nú súcuan te ma cahán gā ró jñuhun stáhú, te na cáhán ndaā ró jín táca jñāhan ró, chi ñn-ni cácuu ndíhi yó.

<sup>26</sup> Nú véji ñn jeē squití ni rohó, te ma quití neé ni ró. Te ma quití ni ró nde quēe niāndii. <sup>27</sup> Ma cuáha ró jñuhun jeē sáha jexeén jeē quíví ró cuéchi.

<sup>28</sup> Ñayuu ní sacuíhná, ma sacuíhná gá i, chi sa suhva na sájññu i, te na cócuu i jín jññu váha, návāha nihñ i jeē cuáha i nuú ñayuu cúmaní nuú.

<sup>29</sup> Ni ñn jñuhun neé ma cahán ró, chi sa suhva na cáhán ró jñuhun váha jeē scuéñu jñāhan jín jñuhun ya, te sáha jeē quéndōo váha ñayuu jíní sōho. <sup>30</sup> Ma sáha ró cuéchi návāha ma cucuíhyá ni Espiritu Santo Yaa Dios. Chi Espiritu yá cúu nájñuhun sello jeē steén jeē cúu yó séhe Yaa Dios, nde quiji quíví jññu jññu jeē jñāma ya rohó.

<sup>31</sup> Te na siáá ró táca jñuhun cútucu ni, jín jñuhun xeēn ni, jín jñuhun quití ni, jín jñuhun cáhán ndevāha, jín táca jñuhun neé. <sup>32</sup> Chi sa suhva na cóo váha ni ró jín jñāhan ró, te cundáhú ni ró i. Na cóne cáñu ni ró nuú jñāhan ró, nájñuhun ni ine cáñu ni Yaa Dios nuú ró siquí Cristo.

### *Ndese cánuú caca ndaā séhe Yaa Dios*

## 5

<sup>1</sup> Nú súcuan te na ndácu ró Yaa Dios, chi cácuu ró séhe ya jeē maní yá jín.

<sup>2</sup> Te níni cundáhú ni ró jñāhan ró, nájñuhun ni cundáhú ni Cristo yohó, te ni socó yá máá yá jehé yó, ni cuu ya nájñuhun ñn londe jeē jeén asñ nuú Yaa Dios jeē ni sócō yá máá yá.

<sup>3</sup> Te vijna jeē cácuu ró séhe Yaa Dios, te ni ma sáha ró ni ma ndájñuhun ró síquí jñuhun jíca jnéni, ni tãcá jññu jnéhén, ni jñuhun ndíyo ni ndajññu. <sup>4</sup> Te ni ma cahán ró táca jñuhun sáha jeē cúcanu jñāhan, ni jñuhun cánéé íi, ni jñuhun jeē tu ndé jéññu cuití. Chi tãcá un tu nihñ jññu. Chi sa suhva na nácuatáhú ró nuú Yaa Dios. <sup>5</sup> Chi je cajini ró jeē ní ñn ñayuu cájica jnéni, ni jeē sáha jññu jnéhén, ni jeē ndíyo ni tãcá ndajññu, ma nihñ tahú i quíví i ndaha Cristo jín Yaa Dios jeē ndacu ya jññu nuú i. Chi táca jéé ndíyo ni i cúu nájñuhun ídolo i jeē cáchiñúhún i. <sup>6</sup> Te coto ró jéé ma stáhú ni ñn i róhó jín táca jñuhun cáhán saá ni i, chi siquí táca jñuhun neé yáha cúu jeē quiji castigo xeēn Yaa Dios nuú táca ñayuu nihñi ni. <sup>7</sup> Ma quíví nduu ró jín i núu súcuan.

<sup>8</sup> Chi táca quívi saá ni coyūcu ró nájñūhun nuū néē, te vijna chi cáyūcu ró jíin luz maá Jítoho yō, cúu jeē cájecūhun ni rō síquī yā. Te na cáca ró nájñūhun cájica ñayuu jeē steén luz yā ini anuá i. <sup>9</sup> Chi jniñu sáha luz yā jíin yó cúu táca jniñu manī ni, jniñu ndaā, jíin jniñu váha. <sup>10</sup> Scuáha ró sáha ró táca jniñu jeē núnjahan ni maá Jítoho yō. <sup>11</sup> Te ma quívi nduu rō jíin táca jeē tu níhín jniñu jeē casáha ñayuu cáyūcu nájñūhun nuū néē. Chi sa suhva steén rō nuū i jeē tú váha casáha i. <sup>12</sup> Chi cúcanu yō cahān yō síquī jniñu casáha yuhu maá i. <sup>13</sup> Te luz yā sáha jeē nátūu táca jniñu néé casáha i. Te núu cuatáhú i luz yā te caca i jíin luz ún. <sup>14</sup> Jeē yúcuan cáhán tutu:

Róhó jeē cúhuun ni, jeē nájñūhun quíxí, natahū ni,  
te quenda ró méhñu ñáyuu jeē cácuu nájñūhun ndāyí.  
Te Cristo steén yā luz yā ini anuá rō.  
Achí tutu.

<sup>15</sup> Núu súcuan te coto vāha ró ndese caca yúcún ró. Te ma cáca ró nájñūhun cájica ñayuu canéé, chi caca ró nájñūhun cájica tēe ndíchí. <sup>16</sup> Ma snāā rō tiempo, chi condihví ni rō jíin jniñu ya, chi íyó cuéhé cuēchi quívi yáha. <sup>17</sup> Núu súcuan te ma cóo néé xíní rō, chi sa suhva na jécūhun vāha ni rō na jniñu núnjahan ni maá Jítoho yō. <sup>18</sup> Te ma nájini rō, chi tíví ró sáha. Chi sa suhva na ndúcú ró jeē cúnuú Espírítu Santo ini anuá rō. <sup>19</sup> Te cahān rō jíin jnāhan ró jíin salmo jíin himno, yaa íi jeē cahán jñūhun ya. Te ini anuá rō cahān rō jíin yá jíin táca yaa, chi yúcuan cúu jeē jíta ánuá rō nuū yā chíñúhún ró yā. <sup>20</sup> Te níni nacuatáhú ró síquī táca-ni nuū Tatá yō Yaa Dios te ndacunehen ró síhví máá Jítoho yō Jesucristo.

### *Ndese squícu vāha ñayuu cá candíje nuū jnāhan i*

<sup>21</sup> Te cuatáhú ró nuū jnāhan ró síquī jeē cáhíyo yíñúhún ró nuū Cristo.

<sup>22</sup> Róhó ñahan cácuu ñasihí, cuatáhú ró nuū yíi ró, nájñūhun jétáhú ró nuū Jítoho yō. <sup>23</sup> Chi yíi cújéhnú nuū ñasihí, nájñūhun cújéhnú Cristo nuū yohó ñáyuu cá candíje, jeē cácuu yó nájñūhun yíqui cúñu yā, chi ñn na cúu yó jíin yá. Te máá yá jnāma ya yohó. <sup>24</sup> Chi nájñūhun ñayuu cá candíje cájetáhú i nuū Cristo, suni súcuan ñasihí cuatáhú ña ndíhi jeē cahán yíi ña.

<sup>25</sup> Te róhó tée cácuu yíi, cundáhú ni rō ñasihí ró, nájñūhun ni cundáhú ni Cristo yohó ñáyuu cá candíje, te ni socō yā maá yá jehé yō. <sup>26</sup> Súcuan ni sáha ya jeē cóo ndoo cóo íi yō nuū yā, te ni nacate ya anuá yō jíin jñūhun ya jíin jéē ní jendute yó. <sup>27</sup> Te yohó ñáyuu cá candíje chi cuíni yó núu yā, te luu cújéhnú yó. Te ma cóndee cuēchi ánuá yō, ni jeē tú luu, ni ñn jeē súcuan, chi sa suhva coo ndoo coo íi yō nuū yā, te tú na vé cumaní gā. <sup>28</sup> Te nájñūhun Cristo ni cundáhú ni yā ñayuu cá candíje, suni súcuan cánuú jéē cundáhú ni yíi ñasihí de, nájñūhun cundáhú ni de máá de. Chi tée cundáhú ni de ñasihí de, máá de cundáhú ni de. <sup>29</sup> Chi ni ñn tée tu jíto uhú de máá de, chi sa suhva yéji de te ndíto yúcún de máá de. Te suni súcuan sáha Cristo jíin yohó ñáyuu cá candíje nuū yā. <sup>30</sup> Chi cácuu yó nájñūhun yíqui cúñu yā, te ñn ñn yó cácuu nájñūhun ñn ñn parte yíqui cúñu yā. <sup>31</sup> Te suu cúu nájñūhun tée jeē stóo de tátá de náná de, te quijnāhan de jíin ñasihí de, te ñn na cúu ndindúu de. <sup>32</sup> Yóhoyo jéhnú jñūhun sáhi yáha, te cáhán rí jeē ñáyuu cá candíje suni súcuan quíjnāhan i jíin Cristo. <sup>33</sup> Te suni súcuan ná ñn ná ñn ró cundáhú ni rō ñasihí ró, nájñūhun cundáhú ni rō maá ró. Te ñasihí na cúu yíñúhún ña jíin yíi ña.

## 6

<sup>1</sup> Te röhó séhe jijnáhan ró, cuandije ró núu tatá rō nuū naná rō, chi yūcuan cúu jeē váha sáha ró jeē candíje ró Jítoho yō. <sup>2</sup> Chi yáha cúu ñn jnáhan jeē uxí jnūhun ndácu jniñu jeē ni jéhe ya, te xīhna gā jnūhun yáha ndíso tahū: Cooyiñuhún ró nuū tatá rō nuū naná rō, <sup>3</sup> návāha quendōo ndetū rō, te nánán cotecu ró ñni ñayivi yáha. Achí.

<sup>4</sup> Te röhó tatá jijnáhan ró, ma squití ni rō séhe ró, chi sa suhva scuéhnu ró i jín jnūhun cuandije i, te stéén rō nuū i jeē candíje i máá Jítoho yō.

<sup>5</sup> Te röhó mozo jijnáhan ró, cuandije ró núu patrón rō ñayivi yáha, te cooyiñuhún ró te conso iyo ró núu de. Te na sájniñu ndaā sájniñu ndije ró, cani ni rō jeē nuū Cristo cájejniñu ró. <sup>6</sup> Ma sájniñu ndúxí ró jeē máá jéē coto de te cuajnúhún de röhó. Chi sa suhva sáha ró cuenta jeē mozo Cristo cácuu ró. Te sáha ró jeē nújnahan ni Yaā Dios nde jín ñni jín ánuá rō. <sup>7</sup> Te na cúsi ni rō sájniñu ró, te na cáni ni rō jeē nuū máá Jítoho yō cájejniñu ró, nasūu núu ñayuu. <sup>8</sup> Chi je cájini rō jeē jniñu váha sáha ñn ñn ró, te nihñ rō yáhu jniñu yūcuan núu máá Jítoho yō, vēsú cúu ró mozo chí téé sájniñu máá.

<sup>9</sup> Te röhó patrón jijnáhan ró, suni súcuan sáha ró jín mozo rō, te ma cahán xeēn rō jín i. Chi na cócuhun ni rō jeē suni máá ró jín máá i yíhi ró ndaha Jítoho yō, Yaā ndeé andiví. Te tu sáha ya cuenta ndese cúu ñn ñn ñayuu, chi inuú sáha ya jín i.

### *Na cúcutú yó jín táca fuerza Yaā Dios*

<sup>10</sup> Te iyó inga jnūhun, hermano jijnáhan ró. Nducú ró jeē na cóo fuerza ñni rō jín fuerza máá Jítoho yō jeē nduú yá jín ró, chi iyó téyí poder yá. <sup>11</sup> Na cúcutú ró jín táca fuerza Yaā Dios, návāha cuu cuiñi ñhin ró jeē ma stahú jexeén röhó. <sup>12</sup> Chi nájnūhun jeē cájejnáhan yó jín táca jéē neé. Te nasūu ñayuu cúu jeē cájejnáhan yó jín, chi sa suhva jín táca táchí cájica nuū sucún. Te yūcuan cúu jeē cácujeñnu, jín jéé cándiso jniñu, jín jéé cándacu jniñu nuū ñayuu ñayivi yáha jeē nájnūhun cájica i nuū neé. <sup>13</sup> Núu súcuan te na cúcutú ró jín ndihi fuerza Yaā Dios, návāha cuu cuiñi ñhin ró quívi jito ndee jexeén rohó. Te súcuan coo túhva ró jín táca ndihi jeē cuiñi ñhin ró jín. <sup>14</sup> Núu súcuan te cuiñi ñhin ró jín jnūhun ndaā jeē cúu nájnūhun jeē yíhi ñhin sanchí chiji ró. Te sácutú ró máá ró jín jnūhun caca ndaā rō, te suu cúu nájnūhun jeē cúcutú soldado jín sahma cáa jeē ndihyú de. <sup>15</sup> Te níni cotūhva ró nacani ró jnūhun ndeyí jnūhun siñi jeē véji nuū Yaā Dios. Te suu cúu nájnūhun jeē chíhi soldado ndijēn jehē de. <sup>16</sup> Te jeē cánuú gá cúu jeē candíje ró jeē iyó yá jín ró. Te yūcuan cúu nájnūhun jeē túhva ró máá ró yata ñn escudo. Chi jín jnūhun cándíje ró un te cuu ndaha rō ndihi jeē tají máá jéxeén, jeē cúu nájnūhun nduva jeē cayú yáñuhún punta. <sup>17</sup> Te cuiñi ró jín jnūhun ni jnama ya rohó, jeē cúu nájnūhun ñn lélú cāa. Te cuajniñu ró jnūhun jeē yosó núu tútu Yaā Dios jeē ni jéhe Espíritu Santo nuū rō. Chi yūcuan cúu nájnūhun jéjniñu soldado espada de. <sup>18</sup> Te níni cácan tahú ró nuū Yaā Dios siquí ndihi-ni, te cahán ndahú ró jín yá jín fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñayuu máá yá. <sup>19</sup> Te suni cahán rō jehē rí, návāha nihñ rí jnūhun cahán rí, te coo téyí ni rí nacani cájí rí jnūhun jeē jnáma ya yohó, suu jnūhun jeē ní yisáhi un. <sup>20</sup> Chi ni tají yá ruhū jeē jíca rí nacani rí jnūhun ya ún, te jeē siquí un cúu jeē ñne rí vecāa. Te na cácan tahú rō jeē coo téyí ni rí cahán rí jnūhun ya, nájnūhun cánuú cahán rí.

*Saludo jeē sándihí*

<sup>21</sup> Tíquico cúu ñn hermano jeē maní yō jíín, te cúu de tēe squícu vāha chíndéé ñájnáhan jíín rí nuū jníñu máá Jítóho yō. Te máá de castūhún ndihí ndese cuahān jniñu ri te ndese íyó rí. <sup>22</sup> Jeē yúcuan ní taji rí de cuajeē de nuū rō, návāha cachi de ndese cáhīyo ri, te coo ndeyí ni rō jijnáhan ró sáha de.

<sup>23</sup> Te ñúhun ni rí jeē Tatá yō Yaā Dios jíín Jítóho yō Jesucristo, na sáha ya jeē coo ndeyí coo sīi ni tāca róhó jéē cácuu hermano, te coo maní gā rō jíín yá, te candíje vāha ró. <sup>24</sup> Te ñúhun ni rí jeē na sáha ga yā jeē vāha róhó jijnáhan ró jéē maní ndije ró jíín Jítóho yō Jesucristo. Súcuan na cóo. Amén.



## CARTA JEE NI TEE APOSTOL SAN PABLO NUU ÑAYUU ÑUU FILIPOS

1 Máá rí cúu Pablo jiín Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñáyyuu maá yá jeē cáyihí ró ndaha Cristo Jesús. Te suni cátee ri nuū téē cándiso jñíñu cándito róhó, jíin núu tēe cájejniñu mēñhu ró. 2 Te cáñuhun ni rí jeē Tatá yō Yaā Dios jíin Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sī ni ró.

### *Jeē jicán tahú Pablo jehē ñáyyuu cácañdije*

3 Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios. 4 Te náa jicán tahú rí, te níni cúsi ni rí jicán tahú rí jehē ró. 5 Chi ni chindéē ñájnáhan ró jíin rí jeē scáca yó jñuhun váha ya, nde quiví ní cacandije ró te nde vijna. 6 Te jíni ndije rí jeē maá Yaā ní squéjéé jñíñu váha jíin ró, cocu ya jíin ndé quiví ndíji Jesucristo, te sínu ndihí ya. 7 Te íyó váha jeē súcuu jéni ni rí siquí tāca róhó, chí yóhyo maní rí jíin ró, te inuú-ni ni sáha ya jeē váha yóhó. Te súcuu cúu vesú íne rí vecāa chí vesú cuiñi rí nuū tāca téē cújéñhu, cahān rí jehē jñuhun jeē jnáma ya yohó jéē jñuhun ndaā cúu. 8 Chi Yaā Dios jíni yā ndese yóhyo maní rí jíin ró jíjnáhan ró, nájnūhun yóhyo maní Jesucristo jíin yó. 9 Te jicán tahú rí jeē na cáa ga jeē cundáhú ni ró jnáhan ró, jíin jéē na jécūhun ga ni ró te cundichí ró jíin tāca jñuhun ya. 10 Te súcuu te cuu nacāji ró tāca jéē váha condiquín ró, te caca ndaā ró, te ma cóo ni ñin cuéchi siquí ró quiví ndíji Cristo. 11 Te súcuu te cayā cuehē jñíñu váha jeē sáha Jesucristo jíin ró. Te sáha jeē coo yñíñuhún ñáyyuu jíin Yaā Dios te cahān i jeē yóhyo luu cújéñhu ya.

### *Jñuhun jeē técu nduú yó jíin Cristo*

12 Hermano, cúní rí jeē na cúcáñhu ni ró jíjnáhan ró ndese ni sáha jñundóho ni ndoho rí. Chí ni sáha jeē ni jíte núu ga jñuhun jeē jnáma ya yohó. 13 Chí tāca soldado cáyucú ini palacio, jíin tāca gā ñáyyuu, cájini i jeē íne rí vecāa jeē siquí Cristo. 14 Te siquí jeē íne rí vecāa, jeē yúcuu cúu jeē vihyá gā nihín ndeyí ni cuehē tāca hermano cácañdije nuū Jítoho yō. Te cáñho téyí gā ni de nácani de jñuhun ya, te tu ndé ndíñuu ni de.

15 Te ndaā chí sava téē cánacani de jñuhun Cristo siquí jeē cuesún ni de jíin jéē nduxí de. Te sava ga de chí sa suhva cánacani de jñuhun ya siquí jeē váha ni de. 16 Sava de cánacani jñuhun Cristo siquí jeē nducú de jeē váha máa-ni de, te tú ndije de, chí cáncu de jeē nihín gā rí jñundóho jeē íne rí vecāa. 17 Te sava ga de chí cánacani de jñuhun siquí jeē cundáhú ni de ruhū, chí cájini de jeē íne rí vecāa siquí jeē cahān rí jehē jñuhun jeē jnáma ya yohó. 18 Tú na vé sáha núu súcuu, chí tācá-ni modo cascuíté núu de jñuhun Cristo, vesú núu ndije de chí tuú. Te yáha cúu jeē cúsi ni rí sáha.

Te suni cusí gā ni rí, 19 chí jíni rí jeē tāca jéē yáha sáha jeē váha ga coo jíin rí, chí cájicān tahú ró jehē rí, te Espíritu Jesucristo chindéé ñáhán yá ruhū. 20 Chí ñíñuhun ni rí te cúu ndasí ni rí jeē ma sáha rí ni ñin jeē sáha jeē cucanu rí nuū yā. Chí sa suhva coo téyí ni rí cahān rí jñuhun ya, návaha ndujéñhu ga Cristo sáha máa rí vijna, nájnūhun je ni sáha rí ní véji rí, te vesú na cotecu rí chí vesú na cúu rí. 21 Chí jeē técu rí cúu jeē nduú rí jíin Cristo, te jeē cúu rí cúu jeē vihyá gā váha coo jíin rí. 22 Te núu cotecu gā rí, te cuu scáca ga rí jñíñu máa Jítoho yō.

Núu súcuan te tu cúcáhnú ni rī ndé ìn cúu jeē váha ga, núu jeē cótecu rī chí jéē cúu rī. <sup>23</sup> Chi mēhñú ndíndúú jnúhun yáha íne nihin rī. Chi ìn cúu jeē cuní rī quihín rī condee rī jín Cristo, chi yúcuan cúu jeē vihyá gā váha coo jín rī. <sup>24</sup> Te suni cánuú gá jeē cótecu gā rī jeē siquí rohó jínáhan ró. <sup>25</sup> Núu súcuan te iyó ndáa ni rī jeē quéndōo rī condee gā rī jín ró, náváha stéén gā rī nuú ró ndese caca váha ga ró jín yá, te cusí gā ni ró jín jnúhun cá candíje ró. <sup>26</sup> Núu súcuan te condee tucu rī jín ró, te cusí teyí ni ró jeē siquí ruhū, sáha máa Cristo Jesús.

<sup>27</sup> Te máa ìn-ni jeē condihví ni ró caca ndáa ró, nájñuhun cánuú caca ró siquí jeē cá candíje ró jnúhun Cristo. Yúcuan na te vésú na jín rī coto jnáhan yó, chí condee jíca rí, te nihin rī jnúhun ro jéē cáhín nihin ró jín jnúhun ya, te cáhíyo inuú ni ró, te inuú-ni cánducú ndéyí ró siquí jnúhun jeē cá candíje yó jéē jnáma ya yohó. <sup>28</sup> Te ma yúhú cuiú ró sáha jeē cájito uhū rohó. Chi jeē jito uhū i rohó, yúcuan stéén jeē jnahnú ndetū i, te suni stéén jeē cácu ánuá máa ró jijnáhan ró sáha Yaā Dios. <sup>29</sup> Chi ni jēhe Cristo uū jeē váha nuú ró: nastu máa ìn-ni jeē candíje ró yá, chi suni jeē na ndóho ró jéē siquí yā. <sup>30</sup> Chi máa rí jín rohó jijnáhan ró, nájñuhun jeē cájejnáhan yó jín táca jéē neé. Chi ni cajito ró jéē súcuan ni sáha máa rí, te cánihín ró jnúhun jeē sáha ga rī nde vijna.

*Jeē ni sáha suchí yá máa yá te ni ndujéhnú ya*

## 2

<sup>1</sup> Núu súcuan te sáha Cristo jeē cáhíyo ndeyí ni ró, jín jéē cúsi ni ró siquí jeē váha ni yá jín ró. Te ndéé Espíritu yá jín ró, te maní ró jín jnáhan ró, te cájito ndáhú ró i. <sup>2</sup> Núu súcuan te na cócu ga ró jín táca jnúhun yáha, náváha cusí teyí ni rī. Te inuú-ni na cóo ni ró, te coyūcu mání ró, te inuú na cóo ánuá ró, te inuú caní ni ró. <sup>3</sup> Te ni ìn jniñu ma sáha ró jéē nducú ró jeē váha máa-ni ró, ni jeē satéyí ró máa ró. Chi sa suhva sáha suchí ró máa ró, te sáha ró cuenta jeē váha ga jnáhan ró vésú máa ró. <sup>4</sup> Te ma cóndihví ni ró máa-ni jniñu jeē quéndōo váha máa-ni ró, chi suni na cóndihví ni ró jniñu jeē quéndōo váha jnáhan ró.

<sup>5</sup> Te na cáni ni ró jijnáhan ró nájñuhun ni jeni ni Cristo Jesús. <sup>6</sup> Chi máa yá kujéhnú inuú yá jín Yaā Dios, te vésú súcuan te tu ní jéni ni yá jeē kujéhnú inuú yá jín Yaā Dios. <sup>7</sup> Chi ni siaá yá jeē kujéhnú ya, te ni nduu ya nájñuhun índāa mozo, te ni cacu ya ni nduu ya tēe. <sup>8</sup> Te ná ni nduu inuú yá jín tée, te ni sáha suchí yá máa yá. Te ni jendíje ya nde jín jnúhun jeē cúu yá, te nde jín jnúhun canu jeē cúu yá jíca cruz. <sup>9</sup> Jeē yúcuan ní sáha Yaā Dios jeē yóhó ni ndujéhnú luu ya, te síhví yá kujéhnú ndasi gá nuú táca gá síhví. <sup>10</sup> Te táca jéē cáhín andiví jín ñáyiví jín chíjii ñáyiví, núu na cuni i síhví Jesús te jecuiñí yití i. <sup>11</sup> Te cahān ndáa ndivii i jeē Jesucristo cúu máa Jítoto. Te súcuan stéén i jeē yóhó kujéhnú máa Tátá yá Yaā Dios.

*Ñayuu cá candíje cúu i nájñuhun quāmi jeē ndíndéé*

<sup>12</sup> Núu súcuan hermano jijnáhan ró, nájñuhun níni ní cajendíje ró jnúhun ni cahān rī ná ni condee rī jín ró, suni súcuan vihyá gā cuandíje ró vijna jeē ndeé jíca rí jín ró. Te condihví ni ró jeē caca ndáa ró jín jnúhun ní jnama ya rohó, te caca yíñuhún ró conso Iyo ró nuú yá. <sup>13</sup> Chi Yaā Dios jícu ya jín ró jeē cúu ni ró sáha ró jniñu váha, te chéndéé ñáhán yá rohó jéē squícu ró jniñu nújnahan ni yá.

<sup>14</sup> Ndihí jeē sáha ró, ma cahān sōo ró, ni ma tejnáhan ró, <sup>15</sup> náváha cuu ró séhe Yaā Dios jeē tú na cuēchi coo siquí ró te coo ndáa ró. Te caca ndoo ró méhñu ñáyuu níhni ni jeē casáha neé. Chi méhñu ñáyuu un stéén ró jniñu váha

ró, te súcuan cácuu ró nájñuhun quĩmi jeē ndíndēe núū néē ñayĩví. <sup>16</sup> Te stéén rō jñuhun ya nuū i jeē cótecu i ñí cáni sáha. Te súcuan te cusĩ teyí ni rĩ quivĩ ndĩji Cristo, chí cuni rĩ jeē tu ní jĩca cāhá rí, ni tu ní sájniñu cāhá rí. <sup>17</sup> Te vēsú na cúu rĩ jeē socō rĩ maá rí nuū yā jeē siquí rohó, te yũcuan cúu jeē nducú rí scandĩje ga rĩ rohó, návāha socō rō maá ró sáha ró jñiñu váha jeē cácadĩje ró yá. Jeē yúcuu cúsĩ ni rĩ, te cúní rĩ jeē suni cusĩ ni rō jĩn rĩ jijnáhan rō. <sup>18</sup> Núu súcuan te na cúsĩ ni maá ró jĩn rí, te inuú na cúsĩ ni yō jijnáhan yō.

### *Jñuhun Timoteo jĩn Epafrodito*

<sup>19</sup> Te ñuhun ni rĩ jeē cuáha máá Jítoho yō Jesús jñuhun jeē tají yáchĩ rĩ Timoteo jeē de nuū rō, návāha ndusĩ ni rĩ núu na níhĩn rĩ jñuhun ndese cáhiyo rō. <sup>20</sup> Chi tuá na inga tēe íyó yáha jéē inuú jéni ni jĩn rí, nájñuhun máá de jeē ndihví ndije ni de jehē rō. <sup>21</sup> Chi táca de cánducú de jeē cúu máá de, te nasũu jéē cuní Cristo Jesús. <sup>22</sup> Te je cájini rō jeē tēe váha cúu Timoteo. Chí nájñuhun sēhe jĩn tátá, súcuan ni jejniñu de jeē nácani de jñuhun váha ya jĩn rí. <sup>23</sup> Núu súcuan te ñuhun ni rĩ tají rí de jeē de nuū rō, te núu je ni cucáñnu ni rĩ ndese coo jĩn rí. <sup>24</sup> Te jéni ndije ni rĩ jeē cuáha Jítoho yō jñuhun jeē suni máá rí jinũ yachĩ rĩ nuū rō jijnáhan rō.

<sup>25</sup> Te suni jéni ni rĩ jeē cánuú tají rí hermano yō Epafrodito jeē de, chí tēe sájniñu jĩn rí siquí jñuhun ya cúu de te chĩndéé ñájñáhan de jĩn rí. Chí máá ró ni catajĩ ró de jeē cuajniñu de nuū rĩ táca jéē cúmani nuū rĩ. <sup>26</sup> Chí yōhyo cúu ni de ndacoto tucu de nuū rō jijnáhan rō. Te ni cucuíhyá ndasí ni de, chí ni canihĩn rō jñuhun jeē ní cocuhú de. <sup>27</sup> Chí jendaá ní cocuhú de, te je yajni cuu de núú. Te Yaá Dios ni cundáhú ni yā de, te nasũu máñúhún-ni de, chí suni ruhũ, návāha tú caa ga cucuíhyá ni rĩ jehē de núú. <sup>28</sup> Jeē yúcuu cúu jeē ndihví gā ni rĩ tají rí de nuū rō, návāha ndusĩ ni rō jeē ndácoto tucu ró núú de. Te suni ruhũ ma cucuíhyá ndasí gá ni rĩ. <sup>29</sup> Núu súcuan te na cúsĩ ni rō jeē nájjinũ de nuū rō, chí cúu de hermano yō jeē candĩje de maá Jítoho yō. Te coo yĩñúhún ró jĩn táca tēe índāa nájñuhun cáa de. <sup>30</sup> Chí jeē siquí jñiñu Cristo cúu jeē jé yajni cuu de núú. Chí ni chundeyí ni de jeē cúu de siquí jeē chĩndéé ñáhan de ruhũ jĩn jñiñu jeē tu ní íyo modo sáha máá ró jijnáhan rō.

### *Jñuhun jeē cáca ndaā váha yó*

## 3

<sup>1</sup> Te vijna, hermano jijnáhan ró, na cúsĩ ni rō jĩn máá Jítoho yō. Ruhũ chí tu jñanini ni rĩ jeē tēe tucu rĩ jñuhun yáha núū rō, chí cuajniñu jeē quéndōo váha ga rō. <sup>2</sup> Condito ró máá ró nuū tēe casáha jñiñu néé, jeē cándāa ná cándāa ina. Chí cánducú de stújĩ de rōhó jéē casáha de circuncidar, te tu casáha de jñiñu ndaā. <sup>3</sup> Te máá yó cácuu ñayuu ni cuu circuncidar ndije, chí cáchiñúhún yó nuū Yaá Dios nde jĩn ini jĩn ánuá yō, te cácusĩ ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jĩn jñiñu jeē sáha máá-ni yó. <sup>4</sup> Núu jeē súcuan cúu te ruhũ chí suni cuu tenuū rĩ jñiñu jeē sáha máá-ni rĩ nuú. Chí núu ndé tēe jéni ni de jeē cuu tenuū de máá de, te ruhũ chí víhyá gā cuu tenuū rĩ maá rí. <sup>5</sup> Chí ni casáha circuncidar ruhũ nuū uná quivĩ ná ni cacu rí. Te yucũn Israel cúu rí, te suni jnáhan yucũn Benjamín, te ñn hebreo sēhe hebreo cúu rí. Te suni ni cuu rí tēe grupo fariseo jeē ni squĩcu rĩ táca ley jñáhan ñuu rĩ hebreo. <sup>6</sup> Te ni jito xeēn rĩ ñayuu cácadĩje, chí yōhyo ni condihví ni rĩ jeē ma sáma i modo ley jenahán. Te ni ñn tu ní cúu cahān jeē tu squĩcu rí ley un, chí ni squĩcu váha rí. <sup>7</sup> Te táca jéē ní tenuū rĩ ún, chí sáha rí cuenta jeē tu ndé níhĩn

jniñu cuiti, chi vijna te ni candíje ri Cristo. <sup>8</sup> Te suni chíhi ri cuenta jeë vāha ga na náa ndihi jeë ní tenuū rī ún, chi vāha ndasí gá cúu jeë ni quiví ri ndaha máa Jítoho rī Cristo Jesús. Te jeë siquí máa yá te ni siaá rī ndihi ún, te sáha ri cuenta jeë nájnūhun yācá-ni cúu. Chi ni quiví ri ndaha Cristo, <sup>9</sup> te ndúú yá jiín rí. Te tuá nducú rí quendōo ndaā rī jeë jiín ley un, chi sa suhva Yaā Dios ni ndahva yā cuēchi rí jeë ní candíje ri Cristo. Chi súcuan squendōo ndaā yā ñayuu cá candíje. <sup>10</sup> Te vijna te cúni rī jecūhun vāha ni rī ndese Yaā cúu ya. Te cúni rī jeë poder jeë ní natecu yā cone jiín rí. Te cúni rī ndoho ri jiín yá, te nde jinū rī ndoho ri nájnūhun ni ndoho máa yá jeë ni jīhī yā. <sup>11</sup> Chi yōhyo ñūhun ni rī natecu rī nájnūhun ni natecu yā.

### *Jeë nducú ndéyí Pablo sínu de carrera de*

<sup>12</sup> Te ná tu nihīn rī ndihi jeë ní cáhān rī ún, ni ná tu ije ri jiín. Te ndúcú ndéyí rí siquí ún, chi ñūhun ni rī jeë nihīn rī táca un, chi jeë yúcuān cúu jeë ni nihīn Cristo Jesús ruhū xihna gā. <sup>13</sup> Hermano jijnáhan ró, tu sáha ri cuenta jeë jé ni nihīn rī ndihi ún. Te iyó ñn jeë sáha ri, cúu jeë squendōo ri táca jéé ní cuu ichi yátá, te ndúcú ndéyí rí nihīn rī táca jéé iyó ichi núú. <sup>14</sup> Chi cúu un nájnūhun jeë jínu rī ñn carrera cuahān rī nde jinū rī andiví, te nihīn rī premio jeë cuáha Yaā Dios. Chi ni cana ya yohó jéé quihín yō nuū yā andiví siquí jeë yīhi yó ndaha Cristo Jesús.

<sup>15</sup> Te táca yó jeë jé ni ije vāha yó jiín jnūhun cándíje yó, súcuan na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeë násūu súcuan cúu. <sup>16</sup> Te jīni ñūhún cani ni yō te caca yó modo jeë quijnáhan jiín jéé jé ni nihīn yō.

<sup>17</sup> Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájnūhun ni castéén rī nuū rō. <sup>18</sup> Te je ni cuu tijni jínu ni cáhān rī jiín ró, te nde ndahyú rī cáhān tucu ri vijna, jeë iyó cuéhé ñayuu cájica i ñn modo jeë steén jeë jíto uhū i jnūhun jeë ni jīhī Cristo jicā cruz. <sup>19</sup> Te ñn quiví te jnahnū ndetū ñayuu ún. Chi máni jeë cáji vāha i cúu jeë cáchiñūhún i. Te sátéyí i máa i jiín jniñu néé jeë jéhe jnūhun canu. Te máni máa jéé iyó ini ñayiví cúu jeë ndihví ni i. <sup>20</sup> Te máa yó chi ñayuu coyúcú andiví cúu yó, te cándetu yó jéé nde yūcuān ndiji Jítoho yō Jesucristo, Yaā jnáma yóhó. <sup>21</sup> Te máa yá nasama ya yiqui cúñu ndahú yó, návāha nduu yó nájnūhun cáa máa yá jeë lúu cújéhnu ya. Te súcuan sáha ya jiín poder yā jeë cújéhnu ya siquí ndihi-ni.

### *Níni na cúsiñ ni yō jiín Jítoho yō*

## 4

<sup>1</sup> Núu súcuan hermano jijnáhan ró, cuiñi nihīn ró jiín jnūhun máa Jítoho yō. Chi yōhyo maní rī jiín ró, te cúni rī jeë coto jnáhan yó, te cúsiñ ni rī jiín ró, te nájnūhun premio rī cácuu rō.

<sup>2</sup> Te cáhān ndahú rí jiín róhó Evodia jiín Síntique jeë inuú na cóo ni rō, chi cácuu ró hermana jeë cá candíje ró máa Jítoho yō. <sup>3</sup> Te suni cáhān ndahú rí jiín róhó, téé jeë ní chindéé ñájánhan vāha jiín rí, jeë na chindéé ñáhān ró hermana un, chi ni casájniñu nihīn ña jiín rí siquí jnūhun jeë jnáma ya yohó. Te suni súcuan ni sáha Clemente jiín sava ga ñayuu ni sájniñu jiín rí. Te ni jecosó sihví i nuū libro jeë yosó sihví ñayuu cotecu ní cáni.

<sup>4</sup> Te níni na cúsiñ ni rō jijnáhan ró jiín máa Jítoho yō. Te inga jínu cáhān rī jeë na cúsiñ ni rō. <sup>5</sup> Sáha vāha ró jiín táca ñayuu, návāha cuni i jeë súcuan vāha ni rō. Chi máa Jítoho yō, yajni-ni cúu ya jiín ró.

<sup>6</sup> Ma nácani ndasí ni rō siquī ni ñn. Chi sa cahān rō jíin Yaā Dios siquī tāca jée nácani ni rō. Chi cacān tahú rō, te cahān ndahú ró, te suni nacuatáhú ró nuū yā. <sup>7</sup> Yūcuán na te sáha Yaā Dios jeē cóo ndeyí coo sīñ ndasí ni rō, te súcuan coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jée níjnūnī rō, coo cuehē jnūhun ndeyí jnūhun sīñ ni jíin ró, siquī jeē yáhi ró ndaha Cristo Jesús.

*Jeē na cáni ni yō siquī tāca jée váha*

<sup>8</sup> Te ñn na jnūhun íyó, hermano jijnáhan ró. Na cáni ni rō siquī tāca jée iyó ndáa, jíin jée sáha yíñúhún, jíin táca jniñu sáha vāha, jíin jniñu íyó ndoo, jíin táca jée iyó mánī ni, jíin jée lúu sáha. Te mání na núcūhun ni rō tāca jée váha jeē sáha jeē nácuatáhú ró nuū yā.

<sup>9</sup> Tāca jée ni stéen rī nuū rō, jeē ní cacutūhva ró núu rī, jíin jée ní cajini ró ní cahān rī, jíin jée ní cajito ró ní sáha rī, táca yúcuan suni na sáha máa ró. Yūcuán na te máa Yaā jeē jéhe jnūhun ndeyí sīñ ni, coo ya jíin ró.

*Jeē ní casocō ñayuu Filipos nuū Pablo*

<sup>10</sup> Te yōhoyó cúsī ni rī sáha máa Jítoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jée ní naa ni rō sáha ró súcuan, chi siquī jeē tu ní íyo modo. <sup>11</sup> Te nasūu jée cahán rī siquī jeē ndóho ndáhú rí, chi je ni cutūhva rī cúsī ni rī jíin jée névāha rī. <sup>12</sup> Jíni rī cotecu ndahú rí, te jíni rī cotecu cucá rí. Chi ni cāan rī jíin táca-ni, núu jeē ndutú chíji rī chí jée ndóho rī sóco, núu jeē cónevāha cuehē rī chí jée cúmanī nuū rī. <sup>13</sup> Ndihi-ni cúu sáha rī, chí máa Cristo jéhe ya fuerza ini rī. <sup>14</sup> Te vēsú súcuan te vāha ni casáha ró jée ní chindéé ñáhán ró ruhú jíin jnūndóho jeē ndóho rī.

<sup>15</sup> Te róhó ñayuu ñuu Filipos, je cājini rō ndese ni cuu. Chi nde quivī ní quejéé rí nácani rī jnūhun jeē jnáma ya yohó, ná ni quenda rī Macedonia vēji rī, te ni casocō rō xūhun núu rī siquī jeē ní canihīn rō jnūhun ya ni nacani rī. Te ni ñn grupo ñayuu cácanđije tu ní sáha súcuan, chí máa-ni róhó jijnáhan ró. <sup>16</sup> Te ná ñe rī ñuu Tesalónica, te ni catajī ró jecu jeē jíni ñúhún rí, ni jinū ñn uū jínu. <sup>17</sup> Te nasūu jée nducú rí jeē cuáha ró núu rī, chí sa nducú rí jeē na cáyá gā jniñu váha ró, návāha cayā tahū rō nuū Yaā Dios. <sup>18</sup> Chí je ni nihīn rī ndihī jeē jíni ñúhún rí, te ndóo ga. Te íyó cuehē nuū rī, chí ni nihīn rī jeē ní catajī ró vēji jíin Epafrodito. Te jeē ní catajī ró cúu nájñūhun ñn ofrenda jeē asín jeén, ni casocō rō nuū Yaā Dios, te cúsī ni yā jíin. <sup>19</sup> Te Yaā Dios chí cuáha ya nuū rō tāca jée cúmanī nuū rō, chí cúcá ndasí yá jíin táca jée váha jeē lúu íyó núu Cristo Jesús. <sup>20</sup> Te na cáhán yō jeē yóhoyó luu cújéhnu Tátá yō Yaā Dios níí cáni. Amén.

*Saludo jeē sándihí*

<sup>21</sup> Cachi rō nuū táca ñayuu maá yá jeē sándeyí ni i, áhí rí, chí cácanđije i Jesucristo. Te hermano yō cáyūcu jíin rí yáha, cácahān de jeē sándeyí ni rō jijnáhan ró. <sup>22</sup> Te táca ñayuu maá yá jeē cáhíyo yáha, suni cácahān i jeē sándeyí ni rō. Te ñayuu cáyūcú vehe rey cújéhnu ñuu Roma yáha, máa i cácahān gā súcuan.

<sup>23</sup> Te ñūhun ni rī jeē máa Jítoho yō Jesucristo, na sáha ga yā jeē váha róhó jijnáhan ró. Súcuan na cóo. Amén.

## CARTA JEE NI TEE APOSTOL SAN PABLO NUU ÑAYUU ÑUU COLOSAS

<sup>1</sup> Máá rí cúu Pablo, apóstol Jesucristo, chí súcuan ni nujnahan ni Yaā Dios ni taji yá ruhū. Te jíin hermano yō Timoteo <sup>2</sup> cátee rí carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rí jeē Tatá yō Yaā Dios na sáha ga yā jeē vāha róhó, te sáha ya jeē coo ndeyí coo sī ni rō.

### *Jeē jicān tahu Pablo jehē ñáyuu cácandíje*

<sup>3</sup> Te jeē cájicān tahu rí nuū Yaā Dios, Yaā cúu Tatá maá Jítoho yō Jesucristo, te níni cánacuatáhú rí nuū yā jeē síqui rohó jíjnáhan ró. <sup>4</sup> Chí ni cajini jnūhun rí ndese vāha cácandíje ró Cristo Jesús, jíin ndese cákundáhú ni rō táca ñáyuu maá yá. <sup>5</sup> Chí cáñuhun ni rō nihīn rō jeē ñūhun vāha nde andiví cuu ró. Chí ná ni cajini ró jnūhun ndaā jeē jnāma ya rohó, te ni caquejéé ró ñūhun ni rō. <sup>6</sup> Te jnūhun un jéē ní canacani nuū rō, chí ndúcuehē cuahān te níhín jniñu ní cáhnu ñayiví. Te suni súcuan ni sáha jíin róhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíin ró. <sup>7</sup> Te jnūhun un cúu jeē ní stéén Epafras nuū rō, tēe sájniñu jíin rí jeē maní rí jíin. Chí cúu de tēe jéjniñu squícu vāha nuū Cristo jeē ndíto de róhó. <sup>8</sup> Te máá de ni castūhun nuū rí síqui rohó, ndese cákundáhú ni rō jnāhan ró sáha maá yá.

<sup>9</sup> Jeē yúcuán suni tu cájecuñī rí jeē cájicān tahu rí jehē rō, nde quiví ni níhín rí jnūhun ún te nde vijna. Te cájicān rí nuū yā jeē na jécūhun vāha ni rō te coo ndichí ró jíin jnūhun ya, sáha maá Espírítu, návāha cuni rō ndihí ndese nujnahan ni maá yá. <sup>10</sup> Te cájicān rí jeē caca ndaā rō nájñūhun cánuú caca ró jéé cácuu ró ñáyuu maá Jítoho yō. Te súcuan te sáha ró ndihí jeē nujnahan ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios. <sup>11</sup> Te cájicān rí jeē cuáha ya fuerza ini rō, nájñūhun iyó fuerza maá yá jeē cujéhu luu ya. Te súcuan te cuu cuandeyí ni rō jíin táca-ni jnūndóho, te cusī teyí ni rō. <sup>12</sup> Te cuu nacuatáhú ró nuū Tatá yō, chí máá yá ni chihí fuerza yohó jéé in cáhnu-ni jíin táca ñáyuu maá yá nihīn yō tahū yō. Chí cájica yó jíin luz yā jeē yihí yó ndaha ya. <sup>13</sup> Chí ni jnama ya yohó jéé ni yihí yó ndaha maá jéé jni poder nuū néē, te ni squiví ya yohó ndaha Séhe ya jeē maní yā jíin, ndácu ya jniñu nuū yō. <sup>14</sup> Chí Séhe ya un ní jnama ya yohó jéé ni jíhí yā jehē yō, te ni ine cáhnu ni yā nuū cuéchi yó.

### *Jeē ni sáha Cristo jeē ní ndāvi yó núu jnūhun maní Yaā Dios jíin yó*

<sup>15</sup> Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je iyó yá nde ná tu jecōo táca jéé iyó. <sup>16</sup> Chí jíin Séhe ya ni sáha Yaā Dios ndihí jeē ní jécōo, ndihí jeē iyó andiví jíin jéé iyó ñayiví, jeē jini yō nuū jíin jéé tu jini yō nuū. Te suni ni sáha ya táca ndajéhé jeē cándacu jniñu, jíin jéé cándiso jniñu, jíin jéé cácujuhnu, jíin jéé cájni poder. Jíin Cristo ni sáha Yaā Dios jeē ní jécōo ndihí, te jeē cúu Cristo cúu. <sup>17</sup> Te je iyó Cristo nde ná tu coo ndihí jeé iyó. Te ndaha máá yá yihí vāha ndihí-ni. <sup>18</sup> Te máá yá cujéhu nuū ñáyuu cácandíje, nájñūhun cujéhu xini nuū yiqui cúñu, chí nájñūhun yiqui cúñu yā cácuu i, cúu jeē in na cúu i jíin yá. Te máá yá sáha jeē cotecu i ní cáni, te xīhna gā maá yá ni natecu mēhñu ndíyí, návāha cujéhu ya nuū táca-ni. <sup>19</sup> Chí ni cusī ni Yaā Dios jeē ndihí ndese cúu máá yá, suni súcuan cúu Cristo. <sup>20</sup> Te

siquī jeē ni jīhī Cristo, te ni cusī ni Yaā Dios sáha ya jeē ndávicoo tācá-ni nuū jnūhun manī yā jīn, tāca jée yúcu ñayīvi jīn jée yúcu andívi. Chi jīn jée ni jīhī Cristo jicá cruz, te ni sáha Yaā Dios jeē ndávicoo tācá-ni nuū jnūhun manī yā jīn.

<sup>21</sup> Te maá ró jijnáhan ró, chi sīn siquī ni cahīn ró ndé saá, te ni cajito uhū rō yā inī anuá rō, chi máni jniñu néé ní casáha ró. Te vijna chi je ni sáha Yaā Dios jée ní ndávicoo ró nuū jnūhun manī yā jīn ró. <sup>22</sup> Súcuan ni sáha ya siquī jeē ni sócō Cristo maá yá ni jīhī yā, návāha coo ndoo coo īi rō cuiñi ró nuū yā, te ma cóo jnéhén ró, te tú na cuēchi coo siquī rō. <sup>23</sup> Te súcuan sáha ya núu cuiñi ñihin ró jée candíje vāha ró, te núu quendōo ñihin ró jīn jnūhun vāha jeē cáñuhun ni rō jeē jnáma ya rohó, te ma siaá cuiñi rō. Chi jnūhun un ní cajini ró, te ni jite núu hí cáhnu ñayīvi. Te ruhū Pablo suni jéjniñu ri jeē nácani ri jnūhun ún.

### *Jeē jéjniñu Pablo siquī ñayuu cácandíje*

<sup>24</sup> Te vijna te cúsī ni rī jeē ndóho ri jehē rō jijnáhan ró. Chi jīn yiqui cúñu rī ndóho ri jeē cúmanī gā ndoho ri jīn Cristo jehē ñayuu cácandíje, suu ñayuu cúu nájnūhun yiqui cúñu yā. <sup>25</sup> Te cúu ri tēe jéjniñu siquī ñayuu cácandíje, chi súcuan ni tejniñu Yaā Dios ruhū, návāha nacani ndihī ri jnūhun ya nuū rō te quendōo vāha ró. <sup>26</sup> Te nácani ri jnūhun ya jeē ní yisáhí, jeē tu ní cájini ñayuu nde jenahán ndasí te nde ní cáni vēji. Te vijna te je ni steén cají yá jnūhun un núu ñayuu maá yá. <sup>27</sup> Chi ni cusī ni yā jeē steén yā nuū i ndese cúcúca ndasí i jīn ndihī jeē ndíso jnūhun sáhi yáha jée lúu cújéñnu, te cuiñi núu quihīn nuū tācá nación jeē tu jíní. Te jnūhun sáhi yáha cúu jeē ndeé Cristo inī anuá rō, ndúú yá jīn ró, te jeē yúcuan cáñuhun ni rō tāca jée lúu jéñnu jeē coo.

<sup>28</sup> Te jnūhun Cristo un cúu jeē cánacani ri, te cástíhvī ni rī tāca ñayuu, te cástéén rī jnūhun ya návāha jecūhun vāha ni i. Te súcuan te ije vāha ni ndívi i jeē yíhi i ndaha Cristo Jesús. <sup>29</sup> Te siquī yúcuan cúu jeē sájniñu ri, chi ndíhvī ni rī nácani ri jnūhun jīn táca fuerza Cristo jeē chindéé ñájnáhan ya jīn rí.

## 2

<sup>1</sup> Chi cúní rī jeē na jécūhun ni rō ndese yóhyo ndúcú ndéyí ri jehē rō, jīn jéhe ñayuu ñuu Laodicea, jīn ndé tāca ñayuu jeē tu ní cájini cuiñi nuū rī. <sup>2</sup> Chi cúní rī jeē coo ndeyí ni anuá i, te inuú-ni coyūcu mání i, te jecūhun ndihī ni i ndese yóhyo cúcá i jīn jnūhun jeē candíje ñihin i. Chi cuní i ndese Yaā cúu Cristo, chi maá yá cúu jnūhun Yaā Dios jeē ní yisáhí un. <sup>3</sup> Te iní Cristo yisáhí tāca jnūhun jeē cucúca ró jīn, suu jnūhun ndíchí jīn jnūhun jécūhun ni. <sup>4</sup> Te jnūhun yáha cáhán rī jīn ró jijnáhan ró, návāha ma stahú ni in i róhó jīn táca jnūhun stáhú jée lúu cáhán. <sup>5</sup> Chi vēsú ndeé jicá rí jīn ró, te ñūhun ni rī rohó, te cúsī ni rī jeē jíní rī ndese cájica ndaā rō te cácandíje ñihin ró Cristo.

<sup>6</sup> Núu súcuan te nájnūhun ni cajetáhú ró jeē Jítoho rō cúu Jesucristo, suni súcuan na cáca ndaā rō jīn yá. <sup>7</sup> Te na jnái vāha jnūhun ya iní rō, te na ije vāha ró jīn jnūhun cácandíje ró yá, nájnūhun je ni cajini rō. Te níni nacuatáhú ró nuū Yaā Dios.

### *Jeē ndújeé yó sáha Cristo*

<sup>8</sup> Coto má cuāha ró jnūhun jeē stahú ni in ñayuu rohó jīn jnūhun ndíchí jée tu jéjniñu, jīn jnūhun ndúxí stáhú. Chi tu cácandíje i jnūhun Cristo, chi sa cácandíje i tāca jée tajnúni ñayuu, modo jeē castéén iní ñayīvi yáha.

<sup>9</sup> Chi ndihī ndese cúu maá Yaā Dios, suni súcuan cúu Cristo. <sup>10</sup> Te ndihī ndese cúu Cristo, suni súcuan cúu ró jijnáhan ró, chi cáyihī ró ndaha ya. Te maá yá



cújéhnū nuū tāca jēē cūjéhnū jín jēē ndíso jníñu andiví. <sup>11</sup> Te siquí jeē cáyihí ró ndaha ya, suu cúu jeē nájñūhun ni cuu ró circuncidar. Te jeē súcuan ni sáha ya circuncidar rohó, chí nasūú ñn jñuní jeē yñhi yiquí cúñu ró cúu, chí sa suhva jeē ní sándoo ya tāca cuéchi ni casáha ró jín modo neé máá ró. Chí súcuan cúu jeē sáha Cristo circuncidar rohó. <sup>12</sup> Te jeē ní cajendute ró cúu nájñūhun jeē ní quindūji ró jín Cristo, te suni nájñūhun jeē ní natecu ró jín yá. Chí ni cacandíje ró jēē jín poder Yaā Dios ni nastécu yā Cristo mēñu ndíyi. <sup>13</sup> Chí ni cacuu ró nájñūhun ndīyi nuū yā siquí cuéchi ró, chí ná tu sáha ya circuncidar anuá ró nde saá. Te vijna te ni sáha Yaā Dios jeē cotecu ró ní cáni jín Cristo, chí ni ine cáñu ni yā nuū tāca cuéchi ró. <sup>14</sup> Te nájñūhun jeē iyó ñn acta jeē jicán cuéchi siquí yō jeē ni stívi yó ley yā. Te ni ndahva yā acta un, chí ni chunaa Cristo cuéchi yó jēē ni jñhi yā jicá cruz. <sup>15</sup> Chí ná ni jñhi yā jicá cruz, te ni quende yā ndihí poder tāca jéneé jēē cácujehnū jín jēē cájni poder. Te ni quende yā jeē tuá cūjéhnū, chí ni sáha ya jeē cuángoo nuū quíndihyū, te súcuan ni steén yā poder yā.

*Na ndúcú yó jeē quéndōo vāha yó ndé andiví*

<sup>16</sup> Núu súcuan te ma cuatáhú ró núu cácahān ñayuu cuéchi siquí ró, siquí ñn jeē yéji ró chí siquí ñn jeē jñhi ró, chí jēē tu nēe ñi ró quiví víco jín quiví núcosō yoō jín quiví ndétátú. <sup>17</sup> Chí tāca ley siquí un ní jéññu máá ndé ná tu quiji Cristo. Te vijna te ni quiji ya te tuá jini ññhún tāca ún. <sup>18</sup> Ma cuáha ro jñūhun jeē cási ni ñn ñayuu jeē nihín ró tahū ró. Chí cáchiññhún i tāca ndajéhe yā, te cácahān i jeē súcuan casáha suchí i máá i. Te cácahān i jeē cájni ndije i jeē iyó ndāa jñūhun cánacani i, te tuú. Te súcuan casáha téyi sáa-ni i máá i, chí cájeni néé ni i. <sup>19</sup> Te tu cáñin i jín Cristo, Yaā cūjéhnū nuū ñayuu cacuu nájñūhun yiquí cúñu yā chí ñn na cúu i jín yá. Chí máá yá scuéhnū ya i jín jñūhun ya, te nduu inuú ni tācá i jeē cáhije i cuahān i, nájñūhun ni jeni ni Yaā Dios.

<sup>20</sup> Núu súcuan te nájñūhun jeē je ni cajihí ró jín Cristo, cúu jeē ní casiáá ró tāca jēē tajnúni jeē castéén ini ñayiví. Núu súcuan ¿te naun casáha ga ró nájñūhun casáha ñayuu ñayiví jēē jéndije ró tāca jēē tajnúni i? <sup>21</sup> Chí cácahān i: Ma quehé ró ma cáji ró jeē yáha chí jēē yúcuán, ni ma jñí ró, áchí i. <sup>22</sup> Te máni jeē tajnúni ñayuu jín costumbre máá i cúu te tu nihín jñíñu jeē quéndōo ndāa ñayuu. <sup>23</sup> Te ndāa chí cájeni ni i jeē jñūhun ndíchí cúu ún, chí sáha jín i jeē chiññhún nihin i, jín jēē sáha suchí i máá i, jín jēē stóho i yiquí cúñu i. Te tu nihín jñíñu cuiti jeē casi tācá jñíñu néé jēē cuní i sáha i.

### 3

<sup>1</sup> Núu súcuan te nájñūhun ni natecu Cristo, suni súcuan ni canatecu ró jeē ní cuu ró nájñūhun ndīyi ni sáha cuéchi ró. Te na cóndihví ni ró siquí tāca jēē iyó andiví núu ndeé Cristo lado váha Yaā Dios nuū cūjéhnū ya. <sup>2</sup> Te na cáni ni ró siquí tāca jēē iyó andiví, nasūu siquí jeē iyó ini ñayiví. <sup>3</sup> Chí nájñūhun je ni cajihí ró jín Cristo, te vijna chí nájñūhun cátecu ró jín yá andiví, chí cáyihí ró ini ndaha Yaā Dios. <sup>4</sup> Te quiví ndíji Cristo, Yaā sáha jeē cótecu yō ní cáni, yūcuán na te suni quendacoo ndijin máá ró jín yá, te cūjéhnū luu ró jín yá.

*Ñayuu jíca jín modo cuní maá, jín ñayuu ní ndujeé*

<sup>5</sup> Núu súcuan te casi ró tāca modo cuní maá ró jeē cáñyo ró ini ñayiví yáha. Chí ma cáca jnéni ró, ma sáha ró jñíñu jnéhén, ma ndíyo ni ró sáha ró tāca jñíñu néé, ma cutóo ró, ma ndíyo ni ró ndajñíñu. Chí tācá ndajñíñu jeē ndíyo ni yó cúu nájñūhun ídolo yō jeē chiññhún yó. <sup>6</sup> Chí siquí tācá jñíñu yáha cúu jeē cuáha



Yaā Dios castigo xeēn nuū ñáyuu nīhni ni nuū yā. <sup>7</sup> Te suni jíin jniñu yáha ni cajica ró ndé saá, ná ni casáha ró súcuan. <sup>8</sup> Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndeváha nuū jnáhan, jíin jéē cahán táca jnúhun tú vāha. <sup>9</sup> Ma stahú ró jnáhan ró, chí yūcuan cúu modo maá ró jeē ní cajica ró jíin ndé saá, te je ní castóo ró. <sup>10</sup> Te ní canduu ró ñáyuu jeē, cuandacú ró máa Yaā ní sáha róhó, te cuajecūhun vāha ní rō ndese Yaā cúu ya. <sup>11</sup> Te ñayuu ní ndujeé tuá cúu i ñayuu griego, ní ñayuu hebreo, ní ñayuu ní sáha circuncidar, ní ñayuu tu ní sáha circuncidar, ní ñayuu ñuu jicá, ní ñayuu yucú jeē ní indāa néé, ní mozo jeē ní jeen ñayuu, ní ñayuu sájniñu cuenta maá, chí inuú cúu ndihí i nuū yā. Chí Cristo cúu Jítoho ndihí i, te ndéé yá ini anuá ndihí i, ndúú yá jíin i.

<sup>12</sup> Chí ní nacāji Yaā Dios rohó jíinájhan ró jeē cúu ró ñáyuu maá yá jeē maní yā jíin. Núu súcuan te níni cundáhú ní rō jnáhan ró, te coo vāha ní rō jíin jnáhan ró. Te coo suchí ní rō, te coo vítá ní rō, te coo paciencia ní rō. <sup>13</sup> Cuandeyí ní rō jíin jnáhan ró, te cone cáhnu ní rō nuū i te núu na vé ní sáha i nuū rō. Chí nájnūhun ní ine cáhnu ní Cristo nuū rō, suni súcuan sáha maá ró. <sup>14</sup> Te jeē cánuú gá cúu jeē cundáhú ndasí ní rō jnáhan ró. Chí yūcuan sáha jeē ndúu inuú ní rō te íje vāha ní rō jíin jniñu vāha. <sup>15</sup> Te jnúhun coyūcu mání na cúnuú ini anuá rō sáha Yaā Dios. Chí ní cana ya rohó jéē nduu ró ñin na ñayuu jéē cóyūcu mání rō. Te níni na nácuatáhú ró núu yā.

<sup>16</sup> Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ní rō i jíin táca jnúhun ndichí yā. Te jíin salmo jíin himno, yaa íi jeē cahán jnúhun ya, na cáta luu ró jéē nácuatáhú ró ini anuá rō nuū Yaā Dios. <sup>17</sup> Te táca jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnu síhví máa Jítoho yō Jesús, te nacuatáhú ró núu Tatá yō Yaā Dios sáha ya.

### *Ndese cánuú squícu ñayuu cácadíje nuū jnáhan i*

<sup>18</sup> Róhó ñahan cácuu ñasihí, cuatáhú ró nuū yá ró, chí súcuan cánuú sáha ró síquī jeē candíje ró Jítoho yō. <sup>19</sup> Te róhó téé cácuu yá, cundáhú ní rō ñasihí ró, te ma cútucu ní rō jíin ña. <sup>20</sup> Róhó séhe jíinájhan ró, táca-ni jniñu cuandíje ró núu tatá rō nuū naná rō, chí súcuan cúsiñ ní maá Jítoho yō. <sup>21</sup> Te róhó tátá jíinájhan ró, ma squití ní rō séhe ró, návāha ma cucuíhyá ní i. <sup>22</sup> Róhó mozo jíinájhan ró, táca-ni jniñu cuandíje ró núu patrón rō ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chí na sájniñu ndaa sájniñu ndíje ró, te conso iyo ró núu Yaā Dios. <sup>23</sup> Te táca jniñu sáha ró, na cúsiñ ní rō sáha ró, te na cáni ní rō jeē nuū Jítoho yō cájejniñu ró, nasūu núu ñáyuu. <sup>24</sup> Chí je cájini ró jeē maá Jítoho yō cuáha ya cuehē tahū cuu ró ní cáni. Chí nuū maá Cristo cájejniñu ró, chí maá yá cúu Jítoho ró. <sup>25</sup> Te ñayuu casáha jniñu néé, chí sa suhva ndutahú i síquī jeē ní sáha i. Chí tu sáha Yaā Dios cuenta ndese cúu ñin ñin ñayuu, chí inuú sáha ya jíin i.

## 4

<sup>1</sup> Róhó patrón jíinájhan ró, vāha ndaa na sáha ró jíin mozo rō. Te na núcūhun ní rō jeē suni íyó Jítoho maá ró, Yaā ndeé andívi.

<sup>2</sup> Te ndívií rō ma jécuiñí rō jeē jicán tahú rō, chí coo ndito ní rō jíin, te nacuatáhú ró núu Yaā Dios. <sup>3</sup> Te suni cacān tahú rō jehē rí jíinájhan rí, jeē na sáha Yaā Dios jeē cóo ga modo nacani rí jnúhun, návāha cuu cahán rí jnúhun

Cristo jeē ní yisāhí, jeē tu ní cājini ñayuu jenahán. Te siquī jnúhun un cúu jeē íne ri vecāa. <sup>4</sup> Te cacān tahu rō jeē cuu cahān cají rí ndese cánuú cáhān rī.

<sup>5</sup> Sáha yúcún váha rō jíin ñáyuu tu cácanđije. Ma cúhuun ni rō siquī i, chi condihvī ni rō scandije rō i. <sup>6</sup> Te máni cahān váha rō jíin ñáyuu, te cahān rō jnúhun cuajniñu jeē quéndōo váha i sáha. Te cani ni rō ndese váha nastíó cuíñí rō jnúhun nuū ñin ñin i.

### *Saludo jeē sándihí*

<sup>7</sup> Tiquico cúu ñin hermano jeē maní yō jíin, te tēe squícu váha chindéé ñájnáhan jíin rí cúu de, te jéniñu de jíin rí nuū maá Jítóho yō. Te máa de castúhún ndihí nuū rō ndese cuahān jniñu ri. <sup>8</sup> Jeē yúcuan ní tají rí de cuajeē de nuū rō jijnáhan rō, návaha cuni rō ndese cáhíyo ri jíin jniñu, te coo ndeyí ni rō sáha de. <sup>9</sup> Te suni cuajeē Onésimo jíin de, tēe cúu jnáhan máa rō jijnáhan rō. Te cúu de hermano jeē squícu váha jeē maní yō jíin. Te ndindúú de castúhun nuū rō ndese cuahān táca jniñu ichi cháha.

<sup>10</sup> Sándeyí ni rō jijnáhan rō, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu ni jecondéhé de rōhó te sáha váha rō jíin de. <sup>11</sup> Te suni súcuan cáhán Jesús, tēe jeē suni nání Justo, jeē sándeyí ni rō. Te máa-ni de cácuu tēe hebreo cácanđije jeē chindéé ñáhán cánacani jnúhun jíin rí siquī ndese ndácu Yaā Dios jniñu. Te yōhoyo ndeyí íyó ni rī casáha de. <sup>12</sup> Sándeyí ni rō jijnáhan rō, áchí Epafras, tēe cúu jnáhan máa rō, te mozo Cristo cúu de. Te níni jícan tahu ndasí de jehē rō, jeē na cuíñi ñihin rō, te ije váha ni rō jeē squícu váha rō ndihí jniñu cúni Yaā Dios. <sup>13</sup> Chi cáhán ndaā rī jeē yóhoyo ndíhví ni de jehē rō jijnáhan rō, jíin jéhē ñáyuu ñuu Laodicea jíin Hierápolis. <sup>14</sup> Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

<sup>15</sup> Cachi rō nuū táca hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cácanđije cándutútú vehe ña. <sup>16</sup> Te ná ni jínu ni cacahu rō carta yáha, te suni tají rō na cáhu ñayuu cácanđije ñuu Laodicea. Te suni cahu máa rō carta jeē cuahān nuū ñáyuu Laodicea te ndiji nuū rō. <sup>17</sup> Te cachi rō nuū Arquipo jeē na ndúcu ndeyí de squícu de jniñu ni tee Jítóho yō siquī de, áchí rí.

<sup>18</sup> Ruhū Pablo, yáha-ni cúu jeē tēe ri jíin ndaha máa rí, jeē sándeyí ni rō. Te nucúhun ni rō ruhū jeē íne ri vecāa. Te ñúhun ni rí jeē na sáha ga Yaā Dios jee váha rōhó jijnáhan rō. Súcuan na cóo. Amén.

## CARTA HN JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Táta yō Yaā Dios jíin Jítoho yō Jesucristo. Te cáñuhun ni ri jeē Táta yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sñ ni rō jíináhan ró.

### *Ñayuu Tesalónica cúu i ñn ejemplo vāha*

<sup>2</sup> Níní cánacuatahú rí nuū Yaā Dios jeē siquí rohó jíináhan ró, te tu náā ni rí cacān tahú rí jehē rō jeē cájicān tahú rí. <sup>3</sup> Te níní ndácunehen ri rohó núu Táta yō Yaā Dios, jeē váha cásáha ró táca jniñu chi cácanđije ró, jíin jée váha cájejniñu ró núu yā chí maní rō jíin yá, jíin jée cájendeyí ni rō chí cáñuhun ni rō jeē coo jeē váha sáha Jítoho yō Jesucristo. <sup>4</sup> Chí maní Yaā Dios jíin ró jíináhan ró hermano, te cájini rí jeē ní nacāji ya rohó. <sup>5</sup> Chí ná ni canacani ri jñuhun nuū rō jeē jnáma ya rohó, te nasūu jée ni cáhān rí súcuan-ni, chí ni nacani ri jíin poder Espiritu Santo, te ni cacucáñnu vāha ni rí jeē jñuhun ndaā cúu. Te cájini rō ndese ni casáha vāha ri ná ni coyūcu rí jíin ró, chí ni nducú rí jeē quéndōo vāha ró.

<sup>6</sup> Te rōhó jíináhan ró chí ni candacu ró rúhū, te suni ni candacu ró máá Jítoho yō. Chí ni cajetáhú ró jñuhun ya, te ni cacusñ ni rō ni sáha Espiritu Santo, vēsú ni cajito ró cuehē jñūndóho siquí ún. <sup>7</sup> Te súcuan cácuu ró ñn ejemplo nuū ndihí ñayuu cácanđije jeē cáyūcú región Macedonia jíin Acaya jíñā. <sup>8</sup> Chí jeē siquí rohó jíináhan ró cúu jeē ní jite núu jñuhun Jítoho yō, te nasūu máni Macedonia jíin Acaya, chí suni nñ cáñnu-ni ní jite núu jñuhun ndese cácanđije ró Yaā Dios. Te jeē yúcuan tuá jíni ññhún jeē nácani máá rí jñuhun nuū i. <sup>9</sup> Chí sa máá i cánacani ndese ni cajetáhú váha ró rúhū ná ni jecoo rí nuū rō, jíin ndese ni castóo ro ídolo te ni quñvicoo ró ndaha Yaā Dios, Yaā ndaā Yaā tēcu, jeē cuajniñu ró núu yā. <sup>10</sup> Te cánacani i jeē cāndetu ró jée ichi ándiví ndiji Sēhe ya Jesús jeē ní nastēcu yā. Te máá Jesús jnama ya yohó núu castigo xeēn jeē quíji.

### *Jniñu jeē ni sáha Pablo ñuu Tesalónica*

## 2

<sup>1</sup> Chí cájini rō hermano, jeē tu ní jecoo cáhā-ni ri nuū rō. <sup>2</sup> Te cájini rō jeē ní castóo i ruhū te ni cacahān ndevāha i nuū rí ini ñuu Filipos. Te vēsú súcuan te máá Yaā Dios ni chindéé ñáhán yá ruhū, ni sáha ya jeē ní iyo ndeyí ni rí, te ni jecoo rí ñuu rō ni canacani ri jñuhun jeē jnáma ya rohó. Súcuan ni casáha ri vēsú xeēn ni Iyo jñūndóho. <sup>3</sup> Te jñuhun ni canacani ri, nasūu jñuhun ni castívri rí cúu, ni nasūu jée nihín rí siquí rō, ni nasūu jée ní castáhú rí rohó. <sup>4</sup> Chí máá Yaā Dios ni jito ndee yā ruhū, te ni tejniñu ya ruhū jeē nácani ri jñuhun jeē jnáma ya rohó. Te jeē yúcuan cúu jeē cácahān rí. Te tu cácahān rí jñuhun jeē núnjahan ni ñayuu, chí sa jeē núnjahan ni Yaā Dios, chí máá yá jíto ndee anuá rí. <sup>5</sup> Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rí jeē cúsn ni rí jíin ró návāha nihín rí xūhun ró. Te jíni Yaā Dios jeē súcuan cúu. <sup>6</sup> Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núu, chí apóstol Cristo cácuu rí. <sup>7</sup> Chí sa suhva víta ní

cacahān rī jīn ró, nájñuhun sáha ñahan ndéca yiquín jéē yucún ndíto ña sēhe ña. <sup>8</sup> Te siquī jeē cácondáhú ndasí ni rī rohó, jeē yúcuan ní cacondihvī ni rī nacani rī jñuhun vāha Yaā Dios nuū rō. Te nasūu máá yúcuan-ni, chí suni nde vida rī cuāha ri jeē siquí rō nuú, chí yōhyo manī rī jīn ró. <sup>9</sup> Te cánaahan ró hermano, jeē tú ni ñn ró ní stáhān rī jeē cacān rī nuū rō ná ni canacani rī jñuhun vāha Yaā Dios nuū rō. Chí ni canducú ndéyí rí ni casájñiñu ndasí rí siquī jeē cótecu rī. Te nduú ñuú ni casájñiñu rī.

<sup>10</sup> Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó ñáyuu cácondíje. Te ni ñn tu cúu cahān cuēchi siquī rī. <sup>11</sup> Te suni cájini rō ndese ní casthví ni rī ná ñn ná ñn ró, te ni cacahān rī jñuhun ndeyí ni jīn ró, nájñuhun sáha ñn tátá jīn séhe de. <sup>12</sup> Te ni cacahān ñihin ri jīn ró jeē na cáca ndaā rō nuū Yaā Dios nájñuhun cánuú caca rō. Chí ni cana ya rohó jéē quíngoo rō núu ndácu ya jñiñu, suū luu cujéñu ró jīn yá.

<sup>13</sup> Te jeē yúcuan níni nácuatáhú rí nuū Yaā Dios, chí ni cajetáhú ró jñuhun ya jeē ní canacani ri. Chí ni cajini rō jeē násūu jñuhun ñn tēe cúu, chí jñuhun Yaā Dios cúu. Te máá jéndaá jeē jñuhun un sájñiñu ini anuá rohó ñáyuu cácondíje nde ndacu ró yá. <sup>14</sup> Hermano, ñayuu ñuu rō ni cajito xeēn i rohó, te súcuan ni candoho ró nájñuhun ni candoho ñayuu cácondíje cáyúcú región Judea jeē cáyihí ndaha Yaā Dios jīn Cristo Jesús. Chí nájñuhun ni candoho i ni sáha jñáhan i ñayuu hebreo, suū súcuan ni candoho ró. <sup>15</sup> Chí suu ñayuu hebreo ni cajehni de máá Jítoho yō Jesús, nájñuhun ni cajehni de táca tēe ñuu de jeē ní canacani jñuhun ya nde jenahán. Te suni nde ruhū jijnáhan ri ni cascúnu de. Te casáha de jñiñu jeē tu núnjahan ni Yaā Dios, te cúu de contra siquī táca ñáyuu. <sup>16</sup> Chí jésicoo de jeē ma nácani rī jñuhun nuū ñáyuu táca nación jeē tu jíní, návāha tú cácu i. Te súcuan sáha de jeē nducuehē gā cuēchi siquī de. Te vijná te yachí quiji quiví jeē cuāha Yaā Dios castigo xeēn nuū de.

### *Jeē cuní Pablo quicōndēhé tucu de ñayuu Tesalónica*

<sup>17</sup> Hermano, ni cacujiyo ri ñn núnúu-ni nuū rō jijnáhan ró. Te vēsú tu cájito jñáhan yó, te níni cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. <sup>18</sup> Te jeē yúcuan ní cajeni ni rī jecoo ri nuū rō nuú. Te ruhū Pablo, tájni jīnu ni nducú rí modo jeē rī, te Satanás ni jesí ichi ri jijnáhan ri. <sup>19</sup> Chí tuá na inga cáñuhun ni rī, te tuá na inga cácusí ni rī, chí suu máá ró jijnáhan ró. Te jeē siquí maá ró cúu jeē nihín rī premio rī te cusí teyí ni rī cuiñi yó núu maá Jítoho yō Jesucristo quiví ndíji ya. <sup>20</sup> Suu jeē siquí rohó cúu jeē cácusí teyí ni rī.

## 3

<sup>1</sup> Te jeē yúcuan tuá ni cácanda ri condetu ri nde nihín rī jñuhun ndese cáhíyo ró. Te ni casánda rī jeē quéndōo máá-ni rī ñuu Atenas. <sup>2</sup> Te ni catajī rī hermano yō Timoteo, tēe jéñiñu jīn rí nuū Yaā Dios siquí jñuhun jeē jnáma Cristo yohó. Te ni jecōndēhé de rohó návāha sáha de jeē cuiñi ñihin ró te coo ndeyí ni rō jīn jñuhun cácondíje ró. <sup>3</sup> Te ni jeē de návāha ma náyūhú ni ñn ró siquí táca jñúndóho jeē sáha ñayuu. Chí je cájini rō jeē súcuan cánuú ndoho yó. <sup>4</sup> Chí nde ná ni coyūcu rí jīn ró, te ni cacastūhun rí nuū rō jeē nihín nahín yó jñúndóho. Te je cájini rō jeē súcuan ni cuu, nájñuhun ni cacahān rī. <sup>5</sup> Te jeē yúcuan, náa tuá ni cánda ri condetu ri jeē nihín rī jñuhun ndese cáhíyo ró, te ni tají rí de ni jeē de, návāha cuni rī núu cácondíje nahín ró. Chí ni jeni ni rī á sanaa te jexeēn jeē jíto ndee yohó ní cundeyí jīn ró, te naa cáhá-ni jñiñu jeē ní casáha ri jīn ró.

<sup>6</sup> Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē cácadíje vāha rō, te cákundáhú ni rō jnáhan rō. Te ni cachi de jeē cáñuhun ni rō ruhū, chi cáhīyo manī rō jín rī. Te cáconi rō ndacoto rō nuū rī, nájnūhun cáconi rī ndacoto ri nuū rō. <sup>7</sup> Te jeē yúcuan ní candusī ni rī siquī jeē cácadíje vāha rō, hermano, vēsū xeēn iyó jnūndóho siquī rī. <sup>8</sup> Te vijna je ni cananihīn ni rī, chi cáhīn nihīn rō jín máá Jítoho yō. <sup>9</sup> Núu súcuan te tu jínu cuiṭi nacuatáhú ri nuū Yaā Dios jeē siquī rohó jijnáhan rō. Chi jító ya jeē cácusī ndasí ni rī jeē súcuan cáhīyo rō. <sup>10</sup> Te nduú ñuú cájicān tahú ndasí rī jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquī jnūhun cácadíje yō.

<sup>11</sup> Te cáconi rī jeē máá Tátá yō Yaā Dios jín Jítóho yō Jesucristo, na núne ya ichi jeē cuu jecoo tucu ri nuū rō. <sup>12</sup> Te na sáha máá Jítóho yō jeē cuehē ndasí gá cundáhú ni rō jnáhan rō jín táca gá ñayuu, nájnūhun cákundáhú ni rī rohó jijnáhan rō. <sup>13</sup> Te na sáha ya jeē íje ánuá rō jeē cuiṭi nihīn rō, návaha coo ndoo rō jéē ma cóo cuēchi rō nuū máá Tátá yō Yaā Dios, quivī ndíji Jítóho yō Jesucristo jín táca ñayuu yíhi ndaha ya.

*Siquī jeē caca ndaā yō modo jeē cúsi ni ya*

## 4

<sup>1</sup> Te vijna hermano, íyó inga jnūhun jeē cácahān ndahú rī jín rō te cáhān nihīn rī jín rō, chi súcuan cúní máá Jítóho yō Jesús. Je ni castéén rī nuū rō ndese cánuú caca ndaā rō návaha cusī ni Yaā Dios. Te cácahān ndahú rī jín rō jeē sa víhyá gā na cáca rō súcuan.

<sup>2</sup> Chi je cájini rō na jniñu ni candacu ri nuū rō jeē ní ndacu máá Jítóho yō Jesús. <sup>3</sup> Te cúní Yaā Dios jeē na cóo ndoo coo ī rō nuū yā, te ma cáca jnéni rō. <sup>4</sup> Te ná ñin ná ñin rō na cóndeca yíñuhún rō ñasihí máá rō, te súcuan caca ndoo rō. <sup>5</sup> Te ma sáha rō jniñu néé jéē ndíyo ni rō jesihi, nájnūhun cásaáha ñayuu táca nación jeē tu cájini i jnūhun Yaā Dios. <sup>6</sup> Ni ñin rō ma sáha rō cuēchi jeē quēnde rō ñasihí jnáhan rō. Chi máá Jítóho yō cuāha ya castigo xeēn nuū ñayuu casáha táca jniñu súcuan, nájnūhun je ni cacahān nihīn rī ni castūhun rī nuū rō. <sup>7</sup> Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó. <sup>8</sup> Núu súcuan te ñayuu jeē squéhichī jnūhun yáha, nasūu jnūhun ñin tēe squéhichī i, chi sa jnūhun Yaā Dios, Yaā ni jéhe Espíritu Santo nuū yō.

<sup>9</sup> Te tu jini ñuhún jéē tēe ri nuū carta yáha jéē coo manī rō jín táca hermano, chi je ni steén Yaā Dios nuū rō jeē coo manī rō jín jnáhan rō. <sup>10</sup> Te je cáhīyo manī rō súcuan jín táca hermano cáyūcu ní cáhnu Macedonia jíñā. Te cáhān ndahú rī jín rō hermano, jeē sa víhyá gā na cóo manī rō jín i. <sup>11</sup> Te na cóndihvī ni rō coyūcú nayúú rō, te ma cóndihvī ni rō siquī ndese cásaáha jnáhan rō, chi condihvī ni rō sáha rō jniñu máá rō, nájnūhun ni candacu ri nuū rō. <sup>12</sup> Súcuan na sáha rō návaha ñayuu tu cándíje, cuatáhú i róhó, te suni ma cúmanī jeē cotecu rō.

*Siquī jeē ndíji Jítóho yō*

<sup>13</sup> Suni cáconi rī, hermano, jeē na jécūhun ni rō jijnáhan rō siquī ñayuu cájihī, návaha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi. <sup>14</sup> Chi nájnūhun cácadíje yó jéē ní jíhi Jesús te ni natecu yā, suni súcuan cácadíje yó jéē nastécu Yaā Dios táca ñayuu ni cacandíje nuū Jesús te ni cajihī.

<sup>15</sup> Jeē yúcuan cácastūhun rī ñin jnūhun jeē ní castūhun máá Jítóho yō nuū rī: Jeē yohó jéē cátecu gā quivī ndíji máá Jítóho yō, nasūu máá yó cosnūu jéē ndaa

yó quihīn yō. Chi xīhna gā ñayuu je ni cajihī ndaa i quihīn i. <sup>16</sup> Chi máá Jítóho yō nuu ya quiji ya ichi ándiví, te cana jee ya jeē máá yá ndácu jniñu, te cana jee ndajéhé cujéhnu ga, te cuecu trompeta Yaā Dios. Te xīhna gā natecu táca ndáyi; jeē ní cacandíje Cristo. <sup>17</sup> Yūcuán na te yóhó jeē cátecu gā yō quiví ndíji ya, suni ndonehen ya yohó jíin i, quihīn yō mēhñu vícō. Te naquijnáhan yó jíin máá Jítóho yō sava andíví. Te súcuan condee yō ní cáni jíin máá Jítóho yō. <sup>18</sup> Núu súcuan te jíin jnúhun yáha cahān ndeyí ni rō jíin táca jnáhan rō.

## 5

<sup>1</sup> Te tu jíni ñúhún jeē tée ri nuū carta yáha síquī cuiyā chí quiví jeē coo táca un, hermano. <sup>2</sup> Chi je cájini vāha rō jeē ñn sanaa ni yō te quee quiví ndíji máá Jítóho yō, nájñuhun ñn sanaa ni yō te quíji ñacuñhá jecuáa. <sup>3</sup> Chi ná-ni cácahān ñayuu jeē nayúú-ni ñn te tú na jñúndóho coo, te ná-ni cácahān i súcuan te ñn sanaa ni i te quíji jñúndóho síquī i jeē náa i, te ma cácu cuiti i. Chi quiji quiví un nájñuhun ñn sanaa-ni te quéjéé jéhdē chíji ñn ñahan scácu sēhe. <sup>4</sup> Te róhó hermano, tu cácuu rō ñayuu cájica nájñuhun nuū néé jeē ñn sanaa-ni te quíji quiví un síquī rō nájñuhun quíji ñacuñhá. <sup>5</sup> Chi ndihí rō cácuu ñayuu jeē nájñuhun cájica rō nduú, chí stéén luz yá ñni anuá rō. Chi tu cácuu yó nájñuhun ñayuu jeē tu jécūhun ni síquī Yaā Dios, jeē nájñuhun cájica i nuū néé. <sup>6</sup> Núu súcuan te ma cúhun ni yō nájñuhun ñayuu cáquixí, chí sa ndito na cóo ni yō te coo cáj xíní yō. <sup>7</sup> Chi jecuáa cúu jeē cáquixí ñayuu, te suni jecuáa cúu jeē nájñi i. <sup>8</sup> Te máá yó chí nájñuhun jeē cájica yó nduú, te na cóo cáj xíní yō. Te na cúcutú yó jíin jnúhun cándíje ñihin yó jíin jnúhun cúndáhú ni yō jnáhan yó, nájñuhun cúcutú soldado jíin sahna cáa. Te na cúcutú yó jíin jnúhun jeē cáñuhun ni yō jeē cácu yó, nájñuhun cúcutú soldado jeē ñúhun lélu cáa xíní de. <sup>9</sup> Chi Yaā Dios tu ní jéni ya yohó jeē cuáha ya castigo yohó, chí sa suhva jeē jnama ya yohó sáha máá Jítóho yó Jesucristo. <sup>10</sup> Te máá yá ni jihí yá jehé yō, návaha cotecu inuú yó jíin yá, vēsú núu cotecu gā yō ñayiví yáha chí cúu yō. <sup>11</sup> Núu súcuan te cahān rō jnúhun ndeyí ni jíin táca jnáhan rō, te scuéhun jnáhan rō jíin jnúhun ya, nájñuhun je casáha rō.

### *Jeē jéni ichí Pablo táca hermano*

<sup>12</sup> Te cácahān ndahú rí jíin rō hermano, jeē cuatáhú rō tée cájejniñu cándito róhó, jeē cácujeénu de nuū rō jíin jniñu máá Jítóho yō, te cájeni ichí de róhó. <sup>13</sup> Te coo yíñuhún ndasí rō nuū de, te coo maní rō jíin de síquī jniñu ya jeē casáha de. Te na cóyūcu mání rō jíin táca jnáhan rō.

<sup>14</sup> Te suni cácahān ndahú rí jíin rō hermano, jeē na stíhvi ni rō ñayuu cájica cúxí. Te cahān rō jnúhun ndeyí ni jíin ñayuu jeē yachí ndínuu ni i. Te chindéé ñáhán rō ñayuu jeē tu fuerza ñni. Te cuandeyí ni rō jíin ndihí ñayuu.

<sup>15</sup> Te coto má nasáha ndeváha ro jíin ni ñn ñayuu te núu sáha ndeváha i jíin rō. Chi máni jeē vāha nducú rō sáha rō jíin táca jnáhan rō jíin ndihí-ni ñayuu.

<sup>16</sup> Níní na cóo sīñi rō jijnáhan rō. <sup>17</sup> Te níní na cácan tahu rō. <sup>18</sup> Te nacuatáhú rō jeē síquí táca-ni. Chi súcuan cúní Yaā Dios jeē sáha rō jeē cacandíje rō Cristo Jesús.

<sup>19</sup> Te ma cási rō nuū jniñu jeē sáha Espíritu Santo jíin rō. <sup>20</sup> Te ni ma cujéé ni rō nuū jnúhun cácahān tée cánacani jnúhun Yaā Dios. <sup>21</sup> Chi coto ndee rō táca jnúhun, te núu jeē vāha cúu, te cuatáhú rō. <sup>22</sup> Te ma quiví nduu rō jíin ni ñn jniñu néé.

<sup>23</sup> Te máá Yaā Dios jeē jéhe jnūhun ndeyí sī ni, ñúhun ni rī jeē sáha ndíhi ya jeē cóo ndoo coo iī rō nuū yā. Te ñúhun ni rī jeē cóndito vāha ya anuá rō jíin jeē níjnūnī rō, jíin yiqui cúñu rō, návāha tú na cuēchi coo siquī rō quivī ndíji máá Jítoho yō Jesucristo. <sup>24</sup> Chi Yaā jeē ní cana róhó, sáha ya ndíhi un jíin rō, chi squícu ya jeē ni jéjnūhun ya.

*Saludo jíin bendición jeē sándíhi*

<sup>25</sup> Hermano jíjnáhan ró, cacān tahu rō jehē rī jíjnáhan rī.

<sup>26</sup> Te núu na cáhán rō jíin táca hermano, te techūhu yíñúhún ró ndaha i.

<sup>27</sup> Te cáhán nīhin rī jíin ró, chí súcuan cúní máá Jítoho yō, jeē na cáhu ró carta yáha núu táca hermano.

<sup>28</sup> Te ñúhun ni rī jeē máá Jítoho yō Jesucristo na sáha ga yā jeē váha róhó. Súcuan na cóo. Amén.

## CARTA UU JEE NI TEE APOSTOL SAN PABLO NUU ÑAYUU ÑUU TESALONICA

<sup>1</sup> Máá rí cúu Pablo jiín Silvano jiín Timoteo, te cátee ri carta yáha cuájee nuú rohó ñayuu cácan díje ñuu Tesalónica, jeé cáyihí ró ndaha Tátá yō Yaā Dios jiín Jítóho yō Jesucristo. <sup>2</sup> Te cáñuhun ni rí jeé Tátá yō Yaā Dios jiín Jítóho yō Jesucristo, na sáha ga yā jeé váha róhó, te sáha ya jeé coo ndeyí coo sñ ni rō jijnáhan rō.

*Jeé sándaā yā cuēchi quivī ndíji Cristo*

<sup>3</sup> Cánúu jéé niní nacuatáhú rí nuú Yaā Dios jeé siquí rohó jijnáhan rō hermano. Chi súcuan iyó váha, chi yōhyo váha cuahije ró jiín jñuhun jeé cácan díje ró yá, te yōhyo cuanducuehē jeé cácan dáhú ni rō táca jnáhan rō. <sup>4</sup> Te jeé yúcuan cúu jeé cácusñ teyí ni rí cánacani rí jñuhun ró núu táca grupo ñayuu cácan díje nuú Yaā Dios. Chi váha cácan díje ró, te váha cájendeyí ni rō jeé cájito xeēn ñayuu rohó jiín jéé cándoho ró táca gá jñúndóho. <sup>5</sup> Te jiín táca jéé yáha chíhi ya cuenta jeé cácuu ró ñayuu váha jeé quívicoo ró ñuu nuú ndácu ya jniñu. Chi siquí ñuu un cúu jeé cándoho ró. Te jeé súcuan chíhi ya cuenta siquí rō, yáha stéén nuú yō jeé váha Yaā cúu ya.

<sup>6</sup> Te suni iyó váha jeé nastóho ya ñayuu castóho róhó. <sup>7</sup> Te quivī ndíji Jítóho yō Jesús, quivī un sáha Yaā Dios jeé ndétātu róhó jéé cándoho, te suni ruhú jijnáhan rí. Chi jiín yáñuhūn quiiji Jesús ichi ándiví jiín táca ndajéhé ya jeé ndíso poder. <sup>8</sup> Te cuáha ya castigo nuú ñayuu jeé tu ní cájēhe i jñuhun cuni i ndese Yaā cúu Yaā Dios, te tu ní cájetáhú i jñuhun máá Jítóho yō Jesucristo jeé jnáma ya i. <sup>9</sup> Te ñayuu ún chi ndoho i nñ cáni, chi cujiyo i nuú máá Jítóho yō, te ma cúu quívicoo i nuú lúu ndasí cújéhnu ya jiín poder yá. <sup>10</sup> Súcuan sáha ya quivī ndíji ya jeé lúu cújéhnu ya sáha ñayuu cácan díje jeé yíhi ndaha ya. Te nahán naa ni i coto i nuú yā. Te suni súcuan róhó jijnáhan rō, chi ni cacandíje ró jñuhun jeé ní canacani rí nuú rō.

<sup>11</sup> Te jeé yúcuan cúu jeé niní cájicān tahú rí jehē rō, jeé na cúu ró ñayuu váha jeé ní cana ya rohó. Te jiín fuerza yā na sáha ya jiín ró jeé squícu ró táca jniñu váha jeé ní catee ni rō sáha ró siquí jeé cácan díje ró. <sup>12</sup> Te súcuan te cújéhnu máá Jítóho yō Jesucristo sáha ró, te suni cújéhnu máá ró jijnáhan ró sáha ya. Chi Yaā Dios yō jiín Jítóho yō Jesucristo, súcuan cúu jeé sáha ya jeé váha yóhó.

*Jñuhun siquí máá téé sáha xeēn cuēchi*

## 2

<sup>1</sup> Vijna te cahān rí siquí jeé ndíji máá Jítóho yō Jesucristo jiín jéé ndutútú yó núu yā. Cácahān ndahú rí jiín ró jijnáhan ró hermano, <sup>2</sup> jeé ma cuáha ró jñuhun sacā nuu caní ni rō, ni ma cunéé ni rō núu cácahān ñayuu jeé jé ni quee quivī ndíji máá Jítóho yō. Ma candíje cuiti rō vésú núu cahān i jeé ni níhñ i ññ jñuhun siquí un núu Espíritu, chí ññ jñuhun jeé ni cáhān inga, chí núu cachi i jeé ruhú jijnáhan rí ni tají ññ carta jeé cahān súcuan. <sup>3</sup> Ma cuáha cuiti rō jñuhun jeé stahú ni ññ i róhó. Chi nde ná tu quiiji quivī ún te xihna gā ndunihni ni cuehē ñayuu nuú yā, te quenda ndijin máá téé sáha xeēn cuēchi, te tēé jnáhnū ndetū cúu máá téé ún. <sup>4</sup> Chi tēé jito uhū Yaā Dios cúu de, te ndonda de contra siquí táca jéé casnání i yaā i jiín táca jeé cáchiñúhún i. Te xeēn gá sáha de, chi nde



cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

<sup>5</sup> ¿A cánahán ró jñūhun yáha? Chi súcuan ni cahān rī jín ró ná ni Iyo ri jín ró. <sup>6</sup> Te je cájini rō ndé vé cúu jeē jési jeē ná tu quenda ndijin tēe ún, chi nde na quēe quiwí maá de. <sup>7</sup> Chi je jicu sáhi táca cuēchi xeēn ini ñayiví, te vijna chi iyó jēe jési nuū, návāha ma cáa ndasí gá cuēchi, chi nde na cújiyo máá jēe jési nuū. <sup>8</sup> Te sáá te quenda ndijin maá tēe xeēn ún. Te máá Jítoho yō Jesús cahni ya tēe un jín táchī yuhu-ni ya, te jín jēe ndíndēe yá ndiji ya te snáhnú ndetū yā de. <sup>9</sup> Te jeē quiji tēe xeēn ún chi máá Satanás sáha. Te quiji de jín cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. <sup>10</sup> Te jín táca jniñu née te stahú ndasí de ñayuu jeē jnahnú ndetū, chi tu ní cúní i cuatáhú i jñūhun ndaā jeē cácu i núú. <sup>11</sup> Te jeē yúcuan cuāha Yaā Dios jñūhun jeē cuatáhú i jñūhun jeē tú ndaā cuiti, te candíje i jñūhun stahú un. <sup>12</sup> Te súcuan te jecondee cuēchi siquí ndihí i jeē tu ní cácandíje i jñūhun ndaā, chi sa jniñu née ni cacusi ni i jín.

### *Ñayuu jeē ní nacāji ya jeē cācu i*

<sup>13</sup> Te cánuú jēe niní nacuatáhú rí jijnáhan ri nuū Yaā Dios jeē siquí rohó jēe cácuu ró hermano jeē maní Jítoho yō jín. Chi nde ná ni jecōo ñayiví, te je ni nacāji Yaā Dios rohó jēe jnáma ya rohó. Chi sáha Espiritu yā jeē cáhíyo ndoo cáhíyo i rō nuū yā te cácandíje ró jñūhun ndaā. <sup>14</sup> Chi jeē yúcuan ní cana ya rohó jín jñūhun jeē jnáma ya yohó jeē ní canacani ri, návāha quiwícoo ró núú cujéhu luu ró jín máá Jítoho yō Jesucristo.

<sup>15</sup> Núu súcuan te cuiñi nīhin ró hermano, te conahán váha ró jñūhun jeē ní cacutūhva ró núú rī, núu jeē ní cacahān rī chí jēe ní tee ri nuū carta. <sup>16</sup> Máá Jítoho yō Jesucristo jín Tátá yō Yaā Dios ni cundáhú ni yā yohó, te ni sáha ya jeē coo sī ni yō ní cáni, jín jēe ñūhun ni yō táca jēe váha jeē coo siquí jeē váha ni yā jín yó. <sup>17</sup> Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cahān rō táca jñūhun váha ya, te sáha ró táca jniñu váha.

### *Jeē na cácan tahú i jehē de*

## 3

<sup>1</sup> Te iyó inga jñūhun cánuú, hermano. Na cácan tahú rō jehē rī jijnáhan ri, návāha yachí cuitē núu jñūhun máá Jítoho yō, te cuatáhú váha ñayuu, nájnūhun ni cajetáhú máá ró. <sup>2</sup> Te suni cacān tahú rō jeē na cácu ri nuū táca tēe casáha née jēe cátejnahān jín rí. Chi tú ndihí tēe cácandíje jñūhun ya. <sup>3</sup> Te máá Jítoho yō chí váha siquí ya jēe ní jéjñūhun ya, te sáha ya jeē íje ni táca rō jín jñūhun ya, te coto ya rohó núu jeneé. <sup>4</sup> Te cáccáhnu ni rī sáha máá Jítoho yō, jeē cóccuu ró jín jniñu jeē ní candacu ri nuū rō, te suni cocuu ga rō jín. <sup>5</sup> Te ñūhun ni rī jeē maá Jítoho yō steén gā yā ndese coo maní gā rō jín Yaā Dios nde jín ini jín ánuá ró, jín jēe cuándeyí ni rō nájnūhun ni sáha Cristo.

### *Jeē cánuú sájniñu yó*

<sup>6</sup> Te cándacu ri jniñu nuū rō hermano, chi súcuan ni ndacu máá Jítoho yō Jesucristo, jeē na cújiyo ró núú táca hermano cájica cúxí te tu cájica váha de nájnūhun ni castéén rí nuū rō. <sup>7</sup> Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahíyo ri jín ró. <sup>8</sup> Ni tu ní cáyeji rí staa ni ñn ró súcuan-ni, chi ni cachunaa rī. Chi sa ni canducú ndeyí rí ní casájniñu téyí rí nduú ñuú, návāha ma stáhān rī ni ñn ró. <sup>9</sup> Te vēsú iyó derecho rī jeē cacān rī nuū rō nuú, te tu ní cájicān rī, chi súcuan ni casáha ri návāha cuu ri

in ejemplo nuū rō ndese sāha ró jijnáhan ró. <sup>10</sup> Chi ná ni coyūcu rí jiín ró, te ni candacu ri jniñu yáha nuū rō: Núu ndé in ñayuu tu cúni i sájniñu i, te suni ma cáji i núu súcuan. <sup>11</sup> Chi ni canihin rī jñuhun jeē cájica cúxí sava ró, te tu cásájniñu ró, chi yāha yúcuan-ni sāha ró. <sup>12</sup> Te cándacu ri jniñu nuū rohó jéē casáha súcuan, te cástihví ni rī rohó jeē na cóo nayúú ró te sájniñu ró, návāha nihin rō jeē cáji rō siquī jniñu sāha máá ró. Chi súcuan ndácu máá Jítoho yō Jesucristo jniñu.

<sup>13</sup> Hermano, ma ndínuu ni rō jijnáhan ró sāha ró táca jniñu váha. <sup>14</sup> Te núu ndé in i tu jétáhú i jñuhun jeē cahán rī nuū carta yáha, te condēhe váha rō ndé-ni i cúu, te ma quiijnáhan ga rō jiín i, návāha na cúcanu i te nacani ni i. <sup>15</sup> Te nasūu jéē cóto uhū rō i, chí sa cahān rō jiín i nájñuhun jiín ñani rō jeē na sájniñu váha i.

### *Bendición jeē sándihí*

<sup>16</sup> Te ñuhun ni rī jeē máá Jítoho yō, Yaā jeē jéhe jñuhun ndeyí sñ ni, níní na sāha ya jeē coo ndeyí coo sñ ni rō siquī tǎcá-ni, te coo ya jiín ró jijnáhan ró.

<sup>17</sup> Ruhū Pablo, yáhá-ni cúu jeē tée ri jiín ndaha máá rí jeē cahán rí jeē sándeyí ni rō jijnáhan ró. Te súcuan jéhe ri firma nuū táca carta rī, návāha cuni rō jeē carta máá rí cúu. Súcuan cáa letra rī. <sup>18</sup> Te ñuhun ni rī jeē máá Jítoho yō Jesucristo, na sāha ga yā jeē váha ró jijnáhan ró. Súcuan na cóo. Amén.

## CARTA HN JEE NI TEE SAN PABLO APOSTOL NUU TIMOTEO

<sup>1</sup> Máá rí cúu Pablo, apóstol Jesucristo, chí Yaā Dios jeē jnáma yóhó, jíin Jítoho yō Jesucristo jeē ñúhun ni yō coto yó, ni catají yá ruhū jeē nácani ri jnúhun ya.

<sup>2</sup> Te tée ri carta yáha cuájeē nuū rō Timoteo, chí cúu ndije ró nájnúhun sēhe ri siquī jeē ni scándíje ri rohó. Te ñúhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo sīi ni rō.

### *Jeē ma candíje i tāca jnúhun stáhú*

<sup>3</sup> Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndō ró ñuu Efeso. Te suni súcuan cahán rī jíin ró vijna, návaha cahān ñihin ró jíin sava ñayuu yúcuan jeē ma steén i inga jnúhun jeē tú ndaā. <sup>4</sup> Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chí tāca jéē yúcuan sáha jeē nahán cándajnúhún i siquī, te tu ndé jéjníñu, te tu sáha jeē íje i squícu i nuū Yaā Dios siquī jnúhun cáccandíje yó.

<sup>5</sup> Te ndácu ri jniñu yáha chí cúní rī jeē na cúndáhú ni i jnáhan i siquī jeē iyó ndoo iyó ndaā anuá i, te cáccandíje ndije i ya. <sup>6</sup> Te sava ñayuu chí ni cajica yátá i, te ni cascuíta i jnúhun ya, ni quívicoo i nuū tāca jnúhun jeē tu ndé jéjníñu. <sup>7</sup> Chí cácu ni i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén ñihin i.

<sup>8</sup> Te jíni yō jeē iyó váha ley un, te núu jecūhun ni yō ndese jéjníñu. <sup>9</sup> Chí cánuú sáha yó cuenta jeē tu ni jécōo ni ñin ley jeē siquī ñayuu ndaā, chí sa suhva siquī ñayuu jeē tu cájetáhú, jeē ñihni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáccandíje ley yā, jeē cájehni tatá jíin náná, jíin jéē cájehni ndíyi. <sup>10</sup> Te suni ni jecōo siquī ñayuu cájica jnéni, jíin téé casáha ndiyí jíin jnáhan yí, jíin ñayuu casácuíhná inga ñayuu, jíin ñayuu castáhú, jíin ñayuu cácahān ñihin jnúhun yáá. Te ni jecōo siquī tāca gá ñayuu jeē casáha jniñu tu quíjnáhan jíin jnúhun ya jeē steén ndaā váha. <sup>11</sup> Te jnúhun ya un cúu jnúhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

### *Jeē náccuatáhú Pablo siquī jeē ní cundáhú ni yā de*

<sup>12</sup> Te náccuatáhú rí nuū Jítoho yō Jesucristo, Yaā ni jēhe fuerza ini rī, chí ni quihin ya ruhū ni sáha ya jeē cuu squícu ri, te ni tejníñu ya ruhū nácani ri jnúhun ya. <sup>13</sup> Te súcuan ni sáha ya jíin rí vēsú ni cahān ndeváha ri siquī yā nde saá, te ni sáha ndeváha ri jíin ñayuu cáccandíje, te xeén ni sáha rí. Te vēsú súcuan te ni cundáhú ni yā ruhū, chí ná tu candíje ri yā nde saá, te tu ní jécūhun ni rī na vé cúu jeē sáha rí. <sup>14</sup> Súcuan ni sáha Jítoho yō jeē váha ndasí jíin rí. Te ni sáha ya jeē candíje ri jíin jéē cúndáhú ni rī jnáhan ri siquī jeē ní quívi ri ndaha Cristo Jesús.

<sup>15</sup> Te ndaā ndije cúu jnúhun yáha, te jeē cánuú candíje ndihi ñayuu cúu: jeē ní quíji Cristo Jesús ñi ñayivi návaha jnama ya ñayuu iyó cuēchi. Te ruhū cúu téé jeē vihyá gā ni sáha cuēchi. <sup>16</sup> Te ni cundáhú ni Yaā Dios ruhū, návaha jíin ruhū jeē vihyá gā ni sáha cuēchi te steén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñin ejemplo nuū tāca ñayuu candíje ní cuáhān yō,

návāha nihīn tahú i cotecu i ní cáni. <sup>17</sup> Núu súcuan te ní cáni na cáhán yíñúhún yó jeē yóhoyo luu cújéhu máá Yaā jeē cúu Rey siquī ndihi, jeē técu ní cáni, jeē tu náa cuiiti. Te tu cúu coto yó núu yā vijna, te máá ñn-ni ya iyó, te ndíchí yá. Amén.

<sup>18</sup> Nájñūhun sēhe ri cúu ró Timoteo, te jniñu yáha téjniñu ri rohó, jéē na ndúcú ndéyí ró siquī jniñu váha. Te na cándíje váha ró, te na cóo ndaā anuá rō. Chi nde saá je ni cacahān tācá hermano jíin jñūhun Yaā Dios jeē súcuan condiso jniñu ró. <sup>19</sup> Chi sava ñayuu tuá iyó ndāā anuá i nuū yā, te ni casnāā i jñūhun cácandíje i. <sup>20</sup> Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jñúndóho ún te cutúhva de jeē ma cáhán ndevāha ga de siquī Yaā Dios.

### *Siquī ndese cacān tahú yō*

## 2

<sup>1</sup> Núu súcuan te xīhna gā ndácu ri jeē cacān tahú rō jehē tāca ñayuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē siquī i. <sup>2</sup> Te cacān tahú rō jehē tāca tēe cácujeñu jíin jéē ndácu jniñu, návāha sáha de jeē cuu coyūcu váha yó te tú na jñúndóho coo siquī yō, te cuu chíñúhún váha yó Yaā Dios te sáha yíñúhún yó jíin tāca-ni. <sup>3</sup> Chi yáha cúu jeē váha jeē núnjahan ni Yaā Dios, Yaā jnáma yóhó. <sup>4</sup> Chi máá yá cuní yā jnama ya tāca ñayuu te cuní i ndese iyó jñūhun ndaā yā. <sup>5</sup> Chi íyó ñn-ni Yaā Dios, te suni íyó ñn-ni Yaā jeē cahān jíin Yaā Dios jehē ñayuu. Te Yaā un cúu máá Jesucristo jeē ní nduu tēe. <sup>6</sup> Te ni socō yā máá yá ni jihí yā jeē ní chunaa yā cuēchi ndihí yó. Te ná ni quiji máá quívī ún, te ní quejéé ní canacani jñūhun ún. <sup>7</sup> Te jeē siquí yúcuan ní jeni ya ruhū cúu ri apóstol jeē nácani ri jñūhun ya, návāha stéén rī nuū ñayuu tācá nación jeē tu jíin jñūhun ya, jeē na cándíje i jñūhun ún te sáha i jniñu ndaā. Te siquī jeē candíje ri Cristo te ndaā cúu jeē cahān rī.

<sup>8</sup> Núu súcuan te cuní rī jeē ndihí-ni lugar na cacān tahú tāca tēe. Te na cóo ndoo ánuá de jeē ma quití ni de ni ma tejnáhan de. <sup>9</sup> Te suni súcuan tācá ñahan, na cási váha ña máá ña nájñūhun cánuú, návāha ma cóo jñūhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña siquī oro chí perla chí sahma váha ga. <sup>10</sup> Chi sa suhva na quéndōo luu ánuá ña jíin jniñu váha sáha ña, nájñūhun cánuú sáha ñahan ndoo ánuá jeē cájejniñu nuū Yaā Dios. <sup>11</sup> Te núu cáhīin ña jíin ñayuu cascuáha jñūhun ya, te na cuní nahín ña te cuatáhú ña. <sup>12</sup> Chi tu jéhe ri jñūhun jeē steén ñahan nuū ñayuu ndutútú, ni jeē ndácu ña jniñu nuū tēe. Chi sa suhva na cuní nahín ña. <sup>13</sup> Chi xīhna gā Adán ni sáha ya, te saá te ni sáha ya Eva. <sup>14</sup> Te tu ní stáhú jexeén Adán, chí sa suhva ni stahú un ñasihí de, te ni sáha ña cuēchi. <sup>15</sup> Te jeē scácu tācá ña sēhe te coo váha ña, te núu na quéndōo ña jíin jñūhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

### *Ndese cánuú coo tēe cándiso jniñu nuū ñayuu cácandíje*

## 3

<sup>1</sup> Ndaā cúu jñūhun yáha: Núu ñn tēe cuní de condiso jniñu de condito de ñayuu cácandíje, te váha jniñu ndúcú de sáha de. <sup>2</sup> Núu súcuan te tēe ndíso jniñu nuū ñayuu cácandíje, cánuú jeē ma cóo ni ñn jeē nihín ñayuu cuēchi siquí de. Te na cóo ñn-ni ñasihí de, te cájí coo ni de, te ndito coo xiní de, te sáha yíñúhún de. Te cánuú jeē niní cuanúu de vehe nuū ñayuu cájica, te niní stéén váha de jñūhun

ya. <sup>3</sup> Te ma cúu de tēe nájini, te ma tejnáhan de, te ma ndiyo ni de xuhún. Chi sa suhva coo vaha ni de, te coo vitá ni de, te ma cutóo ni de siquí xuhun. <sup>4</sup> Te cánuú jéē na ndácu vaha de jniñu ini vehe de, te sáha de jeē siquícu vaha sēhe de te coo yíñuhún i nuú de. <sup>5</sup> Chi núu ñin tēe tu jíní de ndacu vaha de jniñu ini vehe de, zte ndese cuu condiso jniñu de nuú ñáyuú cácadíje nuú Yaā Dios. <sup>6</sup> Núu súcuan te tēe ndiso jniñu nuú ñáyuú cácadíje, ma cúu de tēe jeē saá ní candíje, chi núu súcuan te sanaa te sándúxí de máa de, te inuú-ni cuēchi jecondee siquí de jíní jéxeén. <sup>7</sup> Te cánuú cuu de tēe jeē suni nde ñayuu tu cácadíje, cuajnúhún i de, návaha ma nihín i cuēchi siquí de, te ma cúndeyí jéxeén jíní de.

### *Ndese cánuú coo tēe cájejniñu mēhñu ñáyuú cácadíje*

<sup>8</sup> Te suni súcuan tēe cájejniñu mēhñu ñáyuú cácadíje, cánuú jéē na cóo yíñuhún de, te na squícu de jíní jnúhun cáhán de. Te ma cúu de tēe nájini, te ni ma ndiyo ni de xuhún. <sup>9</sup> Te na cuñi nihin de jíní jnúhun cándíje yó jéē ní yisáhi ndé jenahán, te na cóo ndoo anuá de. <sup>10</sup> Te cánuú jéē xíhna gā coto ndee rō de, te núu ní jini rō jeē tú na cuēchi de, yūcuán na te cuu cuajniñu de mēhñu ñáyuú cácadíje. <sup>11</sup> Te suni súcuan ñasihí de jíníhán ña, cánuú coo yíñuhún ña, te ma sajnúhún ña, te cájí coo ni ña, te squícu vaha ña tãcá-ni jniñu. <sup>12</sup> Te tēe cájejniñu mēhñu ñáyuú cácadíje, na cóo ñin-ni ñasihí de, te na ndácu vaha de jniñu nuú séhe de jíní núu ñáyuú vehe de. <sup>13</sup> Chi tãca tēe cájejniñu vaha mēhñu ñáyuú cácadíje, chi vaha quéndoo yíñuhún de, te nihín de modo jeē cají gá nácani de jnúhun Cristo Jesús jeē cácadíje yó.

### *Jnúhun sáhi yá jeē cácadíje yó*

<sup>14</sup> Te vésú ñuhun ni rí cuajeē yachí rí coto jnáhan yó, te tēe ri jnúhun yáha cuajeē nuú rō, <sup>15</sup> návaha núu cucuéeé rí, te je jíní rō ndese cánuú sáha vaha ñayuu cácuu sēhe Yaā Dios. Chi máa i cácuu ñayuu cácadíje nuú Yaā Dios, Yaā técu. Te máa i cásáha jeē iyó cutú jnúhun ndaā, chi cáhiin nihin i jíní. <sup>16</sup> Te jendaá ndíje chi jéhnu ndasí cúu jnúhun yáha jeē cácadíje yó, jeē ní yisáhi ndé jenahán: Yaā Dios ni steén yá maá yá, chi ni nduu ya tēe, te Espíritu ni steén jeē iyó ndáa jniñu ni sáha ya, te tãcá ndajéhé andiví ní cajito jniñu ní sáha ya. Te ni jitē núu jnúhun ya nuú ñáyuú tãcá nacióon, te ni cacandíje ñayuu ní ñáyiví núu yá, te ni ndaa ya cuanuhun yá andiví.

### *Siquí ñáyuú cájica yátá nuú jnúhun cácadíje yó*

## 4

<sup>1</sup> Te cájí stéén Espíritu Yaā Dios jeē quiví cuándihí te coo sava ñayuu caca yátá i nuú jnúhun cácadíje yó. Te cuatáhú i tãca jéē cácahán jnúhun stáhú jíní jnúhun ní castéén tachí. <sup>2</sup> Chi cuni nahín i jnúhun cástéén tēe cástáhú-ni, jeē tu cácahán ndaā de. Chi tēe un ní cahíje ndasí ni de jíní jnúhun stáhú, te tuá sáha jíní ánuá de jeē nácani ni de. <sup>3</sup> Te cahán de jeē cuēchi cúu jeē coo ñasihí tēe, te suni súcuan núu cají ñayuu sava ndeyu. Te ndeyu ún chi ni sáha Yaā Dios jeē cúu ñayuu cácadíje jeē jini jnúhun ndaā, návaha cají i te nacuatáhú i nuú yá. <sup>4</sup> Chi ndihí jeē ní sáha Yaā Dios, iyó vaha, te ma squexícó yó ni ñin, chi sa nacuatáhú yó te cají yó. <sup>5</sup> Chi jíní jéē cáhu yó jnúhun Yaā Dios jíní jéē nácuatáhú yó nuú yá, te iyó ndoo ndihí-ni.

### *Tēe jéjniñu vaha nuú Jesucristo*

<sup>6</sup> Te núu stéén rō jnūhun yáha núū tācá hermano, núu súcuan te cuu ró tée jéjníñu vāha nuū Jesucristo, te ije ró jíin jnúhun vāha ya jeē candíje ró, chi ní cutūhva ró te ndíquín rō. <sup>7</sup> Te ma quívi nduu rō jíin tāca jnúhun jeē cúu cuento-ni jeē cájeni cāhá ni ñayuu. Chi níni na scuáha ró ndese chiñúhún vāha ró Yaā Dios. <sup>8</sup> Chi jeē scuáha yó ejercicio jeē cóo ndacuí yiquí cúñu yō, jecu-ni níhin jníñu. Te jeē scuáha yó chiñúhún vāha yó yá, suu yūcuan cúu jeē vāha níhin jníñu siquī tācá-ni, jeē cúu vida yáha jíin vida quiji. <sup>9</sup> Te ndaa ndije cúu jnūhun yáha, te jeē cánuú candíje ndihi ñayuu cúu. <sup>10</sup> Te jeē siquí yáha cúu jeē sájniñu níhin yó siquí jnúhun ya te ndóho yó jéé cácahān ndevāha i nuū yō. Chi ñúhún ni yō jeē coto yó núū maá Yaā Dios, Yaā técu. Te maá yá cúu Yaā jnáma tāca ñáyuu, te ñayuu cácaandíje jnūhun cúndáhú ni yā i, maá i cúu jeē jnáma ya.

<sup>11</sup> Tāca jnúhun yáha cánuú jéé ndacu ró núū i te stéén rō. <sup>12</sup> Ma cuáha ro jnúhun jeē kujéé ni ni ñin i nuū rō siquí jeē suchí rō. Chi sa coo ró ñin ejemplo nuū ñáyuu cácaandíje, jeē cúni i ndese vāha cáhān rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō. <sup>13</sup> Te níni ndé ná tu jinū rī nuū rō, te condihví ni rō jeē cáhu ró tutu i nuū hermano cándutútú, jíin jéé stihví ni rō i, jíin jéé steén rō nuū i. <sup>14</sup> Ma cúhuun ni rō jíin táhū jeē ní jéhe Yaā Dios nuū rō jeē nácani ró jnúhun ya. Chi tāca tée jéhu cándiso jníñu nuū ñáyuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeé súcuan condiso jníñu rō.

<sup>15</sup> Núu súcuan te cocuu ró jíin tāca jniñu yáha, te condihví ni rō jíin, návāha cuni tāca ñáyuu jeē vāha ije ró cuáhān rō jíin. <sup>16</sup> Coo cuidado rō jeē caca ndaa rō jíin jéé steén vāha ró jnúhun ya, te cuiñi níhin ró jíin ndihi. Chi núu súcuan sáha ró te quendōo vāha ánuá maá ró jíin ñáyuu chuhun ni jnúhun cáhān rō.

### *Ndese sáha vāha yó jíin ñáyuu cácaandíje*

## 5

<sup>1</sup> Ma cúxeēn rō nuū tāca tée jéhu, chi sa cahān vāha ró jíin de jeē ma stívi de, nájnūhun cáhān rō jíin tátá rō. Te tāca tée suchí, suni cahān vāha ró jíin de nájnūhun jíin ñani rō. <sup>2</sup> Te suni súcuan cahān rō jíin tāca ñahan jéhu, nájnūhun jíin náná rō. Te suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

<sup>3</sup> Te ñayuu cácaandíje na cuáha i jeē jíini ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. <sup>4</sup> Chi ñin ñahan ní quendōo ndáhú, núu íyó séhe ña chí séhe chání ña jeē jévāha, te na cóto maá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácolo i náná i tátá i siquí jeē ní cacondito ña i. Chi yáha cúu jniñu vāha jeē nújñahan ni Yaā Dios. <sup>5</sup> Te ñin ñahan ní quendōo ndáhú ndije jeē maá ñin na ña, ñúhún ni ña jeē maá Yaā Dios condito ya ña, te tu jécuiñi ña jeē jicán tahú ña nduú ñuú. <sup>6</sup> Te sa suhva núu máni ndihví ni ña siquí tāca jéé cúsiñi ni maá-ni ña, yūcuán na te vésú técu ña, te nájnūhun je ni jíhi ña. <sup>7</sup> Jniñu yáha ndacu ró núu ñáyuu, návāha ma cóo cuéchi siquí i. <sup>8</sup> Te núu ñin ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnāhan jíin jnúhun cándíje yó, te cúu i ñin jeē neé gá vésú ñáyuu tu cácaandíje.

<sup>9</sup> Te ñahan viuda cuu quívi shví ña nuū lista ñayuu jeé cáchindéé ñahán ró jíin xúhun, te núu je ní jīnu ña unī xico cuiyā, te núu ni íyo ñin-ni yíi ña. <sup>10</sup> Te suni cánuú jéé cuajnúhún ñáyuu ña jeē vāha jniñu ni sáha ña, núu jeē ni scuéhu vāha ña séhe ña, jíin jéé ní jéhe núu ña vehe nuū ñáyuu cájica, jíin jéé ní

jejniñu ña nuū hermano cácanđije, jín jēē ní chindéē ñáhán ña ñayuu cándoho jñũdóho, jín jēē ni sáha ña táca gá jniñu váha.

<sup>11</sup> Te táca ñahan viuda jeē iyó suchí gá, chí ma soó ró sihví ña nuū lista. Chi sanaa te nducú ña jeē cúsiñ ní maá-ni ña, te ma cóndihvī ni ña siquī Cristo, chí cuu ni ña condeca tucu ña tēe. <sup>12</sup> Te súcuan jecondee cuēchi siquī ña, chí tu ní squicu ña jeē ni jéjñuhun ña ná ni jecosō sihví ña nuū lista. <sup>13</sup> Te suni caca cuu ña táca-ni vehe te quee cúxí ña. Te nasūu máni jeē cáca cúxí ña, chí suni siquī jeē sajnúhún ña, te quīvi nduu ña cahān ña jñuhun jeē tu iyó váha jeē cahān ña. <sup>14</sup> Jeē yúcuan cúní rī jeē táca ñahan viuda jeē iyó suchí, na nándaña ña, te scuēhnu ña sēhe, te coto váha ña vehe ña, návāha ñayuu cácuu contra ma cúu cahān i siquī ña. <sup>15</sup> Chi sava ñahan viuda je ni cajica yátá ña te sáha ña jniñu jeē cuní Satanás.

<sup>16</sup> Te núu ñin tēe chí ñin ñahan cándije, núu iyó ñahan viuda vehe i, te na cóto máá i ña. Te ma cóndee gasto ña siquī grupo ñayuu cácanđije, návāha cuu cuāha váha i nuū ñahan viuda jeē tu ndé ñin coto ña.

<sup>17</sup> Te táca tēe jéhnú cándito ñayuu cácanđije, na jécunaā doble yāhu de, te núu cándihvī ni de cástéén de cánacani váha de jñuhun ya. <sup>18</sup> Chí cúu nájnuhun cáhán tutu i: Ma cánda stiquī caxīn tī trigo, núu ma cuāha ró jēē cáji tī. Te suni cáhán: Tēe jeē sájniñu tátú, jíní ñúhún quiyāhu de, áchí.

<sup>19</sup> Ma cuajnúhún ró te núu jéquin ñayuu cuēchi siquī ñin tēe jéhnú cándito ñayuu cácanđije te núu tu iyó úu chí úní testigo. <sup>20</sup> Te núu cásáha ñayuu cuēchi, te cánuú cuxeēn rō nuū i, jito jínúu ndihí ñayuu, návāha na cónso iyo sava ga i. <sup>21</sup> Te cáhán ñihin ri jín ró, jito máá Yaa Dios jín Jítoho yō Jesucristo jín táca ndajéhé yā jeē ní nacāji ya: Squicu váha ró jniñu yáha, te ma sáha ró cuenta ndese cúu ñin ñin i, chí ñnuú-ni sándaā rō siquī ndihí-ni i. <sup>22</sup> Ma cáni yachī rō ñin tēe jeē condiso jniñu de nuū ñayuu cácanđije, chí xīhna gā coto ndee rō de. Chi sanaa te stívi de, te cuēchi de suni condee siquī rō jín de. Te coto ró máá ró jeē ma quívi ró jín jniñu néé.

<sup>23</sup> Te siquī jeē núu-ni núu-ni cúhú chíji ró, te ma cóho ga rō máni ndute, chí suni coho ró jecu vino.

<sup>24</sup> Cuēchi sava ñayuu chí je iyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín. <sup>25</sup> Te suni súcuan táca jniñu váha, chí iyó ndijin. Te vesú ná tu natūu jniñu váha ún, te ma cúu quisāhi nñ cáni, chí natūu nahín.

## 6

<sup>1</sup> Táca ñayuu cácuu mozo, na cóo yíñuhún váha i nuū patrón i, návāha ma cahān neé ñayuu siquī Yaa Dios jín siquī jñuhun ya jeē cástéén yō. <sup>2</sup> Te mozo jeē yíñi nuū patrón cácanđije, ma cáni ni i jeē cūhva-ni sáha yíñuhún i nuū de siquī jeē hermano cácanđije cácuu de. Chi sa cuajniñu váha ga i nuū de, chí tēe cándije tēe maní i jín cúu táca tēe un jēē sájniñu i nuū. Jñuhun yáha stéén rō te stíhvī ni rō i.

*Siquī jeē chíñuhún váha yó yá te cusī ni yō jín cūhva jeē névāha-ni yō*

<sup>3</sup> Te núu ndé tēe stéén de jñuhun tú ndaā jeē tu quíñahan jín jñuhun váha ndaā maā Jítoho yō Jesucristo, jín jñuhun ni steén Yaa Dios jeē cácanđije yó, <sup>4</sup> núu súcuan te máni tēe ndúxí tēe tu jécūhun cuiti ni cúu de. Chí cánéé xíní de, chí máni cúní de tejnahan de siquī táca jñuhun stéén de. Te táca un sáha jeē cácuuésun ni, jín jēē cátejñahan, jín jēē cácahān ndevāha, jín jēē cájeni néé ni siquī jñahan, <sup>5</sup> jín jēē máni cástáhān jñahan. Súcuan cásáha tēe jeē ní ndunéé

xínī, jeē tu cájini jnūhun ndaā. Te cájeni ni de jeē nihín de cuehē xūhun síquī jnūhun cá candíje de stéén de. Na cújiyo ró núū ñáyuu cándāa súcuan. <sup>6</sup> Te jendaá jeē yóhyo vāha quéndōo yó te núu chíñúhún vāha yó yá, te núu cúsiñ ni yō jíin cúhva jeē névāha-ni yó. <sup>7</sup> Chi tú na vé ni cácu yó jíin ñayīvi yáha, ni tú na vé condiso yó quihīn yō jíin núu na cúu yō. <sup>8</sup> Te núu íyo jéē caji yō jeē cusúcún yó, te na cúsiñ ni yō jíin yúcuan-ni. <sup>9</sup> Chi ñayuu jeē cuní cucucá, chí yachī quívi i cuechi jeē jíto ndee jexeén i. Te quívi i jíin cuehē jniñu cánéé jniñu stívi jéé ndíyo ni i. Te taca un sáha jeē tívī ñáyuu te jnahnū ndetū i. <sup>10</sup> Chi jeē ndíyo ni yō xūhún, yúcuan sáha jeē quejéé táca jniñu néé. Te sava ñayuu jeē ndíyo ni xūhún, ni castóo i jnūhun cá candíje i, te ni canihīn i cuehē ndasi jnúndóho.

*Jeē na ndúcú ndéyí yó síquī jnūhun cándíje yó*

<sup>11</sup> Te róhó chí tēe jéjnīñu nuū Yaā Dios cúu ró, te cunu ró coto ró táca cuechi yáha. Te condiquin ró jniñu ndaā, te chíñúhún vāha ró Yaā Dios, te candíje vāha ró, te cundáhú ni ró jnáhan ró, te cuandeyí ni ró, te coo víta ní ró. <sup>12</sup> Te ndúcú ndéyí ró síquī jnūhun cándíje yó yá. Te cuiñi nīhin ró jíin jnūhun jeē ni nīhīn tahú yō cotecu yō ní cání. Chí jeē yúcuan cúu jeē ní cana ya rohó, te caji ní cahān ró jeē vāha cándíje ró yá, jíto jínúu cuehē ñayuu. <sup>13</sup> Te cáhán nīhin ri jíin ró, jíto máá Yaā Dios, Yaā jeē sáha jeē técu taca-ni, jíin Jesucristo, Yaā jeē caji ní cahān yā ni nacani ya jnūhun vāha nuū Poncio Pilato. <sup>14</sup> Squícu vāha ró jniñu ndácu ya nuū ró, te ma stívi ró sáha ró, návāha ma cahán ñayuu cuechi síquī ró. Te súcuan sáha ró ní ndé quívi ndíji Jitoho yō Jesucristo. <sup>15</sup> Chí quíji ndíjin yá máá quívi jeē ní jeni Yaā Dios. Te Yaā Dios chí máá ñn-ni ya cúu Yaā yóhyo ndetū, te jnī ya ndíhi poder. Te cúu ya Rey nuū táca rey, jíin Jítoho nuū táca jítoho. <sup>16</sup> Te máñúhún-ni ya cúu jeē íyo ní cání. Te ndéé yá ñn lugar nuū ndí ndaxín, nuū ma cúu quívi yó. Te ni ñn ñayuu ñayīvi yáha tu ní jíto cuít i nuū yá, te ni ma cúu coto i nuū yá. Te ní cání na cóo yíñúhún yó nuū yá, chí jnī máá yá poder ní cání. Amén.

<sup>17</sup> Te cahān ró jíin ñáyuu cucá ndajniñu ñayīvi yáha, jéé ma cundúxi i. Te ma ténuu i xūhún i, chí yachī naa ún. Chí sa suhva na ténuu i jeē coo vāha i sáha Yaā Dios, Yaā técu, chí máá yá jéhe cuehē yā taca-ni jeē cúsiñ ni yō jíin. <sup>18</sup> Te ndacu ró jniñu nuū i jeē na sáha vāha i, chí jeē sacúcá ndíje i máá i cúu jeē sáha i taca jniñu vāha. Te na cúu i ñayuu vāha ni jeē cuáha i jeē cúu jnáhan i. <sup>19</sup> Te súcuan caya i cuehē jniñu vāha jeē coo cucá i nuū yá ní tiempo jeē quíji. Te nihīn tahú i cotecu i ní cání.

*Jniñu sándíhi ndácu Pablo nuū Timoteo*

<sup>20</sup> Te róhó Timoteo, condito ró táca jniñu ní chihi ya ndaha ró. Te ma quívi nduu ró jíin táca jnūhun cáhā-ni, cuenta ñayīvi yáha, jíin táca jnūhun stáhú jéé cácahān i jeē jnūhun ndíchí ndaā cúu. <sup>21</sup> Chí sava ñayuu cándiquin táca jnūhun yáha, ni cajica yátá i ni castóo i jnūhun cá candíje i ya.

Te núhun ni rí jeē Yaā Dios na sáha ga yá jeē vāha róhó. Súcuan na cóo. Amén.



## CARTA UU JEE NI TEE SAN PABLO APOSTOL NUU TIMOTEO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jñūhun jeē ní jéjñūhun ya jeē cótecu yō níí cáni siquī jeē yíhi yó ndaha Cristo Jesús. 2 Te téé ri carta yáha cuájeē nuū rō Timoteo, chi cúu ro nájñūhun sēhe ri jeē maní rī jñín. Te ñūhun ni rī jeē Tatá yō Yaā Dios jñín Jítoho yō Jesucristo, na sáha ga yā jeē váha rōhó, te cundáhú ní yā rōhó, te sáha ya jeē coo ndeyí coo sīi ni rō.

### *Jeē nácani de jñūhun Cristo*

3 Níní tu náá ni rī cacān tahú rī jehē rō nuū Yaā Dios nduú ñuú, te nácuatáhú rí nuū yā jeē siquī rō. Chi nuū maá yá jejníñu rī, nájñūhun ni casáha táca jíí rī, te iyó ndoo ánuá rī nuū yā. 4 Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jñáhan yó, návāha cusī ndasí ni rī. 5 Te núcūhun ni rī jeē váha ndije cándíje rō Cristo, nájñūhun ni cándíje náná jéhuu rō Loida, jíín náná rō Eunice xihna gā. Te cúcáhu ni rī jeē suni súcuan cándíje máá rō vijna.

6 Te jeē yúcuan nástíhvī ni rī rohó jéé na cóndihvī gā ni rō jíín táhū jeē ni jéhe Yaā Dios nuū rō jeē nácani rō jñūhun ya. Te tahū un ní nihīn rō ná ni tee ri ndaha ri xinī rō. 7 Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jñūhun, chi sa sáha jeē iyó fuerza ini yō, jíín jéé cundáhú ní yō jñáhan yó, jíín jéé ndító iyó xinī yō. 8 Núu súcuan te ma cúcanu rō nacani ndaā rō jñūhun máá Jítoho yō. Te suni ma cúcanu rō jeē siquī maá rí jeē íne ri vecāa siquī jñūhun ya. Chi sa cuáha rō jñūhun ndoho rō jíín rí siquī jeē cánacani yó jñūhun jnáma ya yohó, núu ndese ni jéhe Yaā Dios fuerza ini yō. 9 Chi ni jnama ya yohó, te ni cana ya yohó jéé coo ndoo ánuá yō cuajníñu yó núu yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ní yā yohó jéé yíhi yó ndaha Cristo Jesús. Chi nde ná tu jecōo ñayiví, te je cundáhú ní yā yohó. 10 Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ní yā yohó. Chi máá Cristo ni snáā yā poder cuehyī jéhni yóhó, chi jíín jñūhun jnáma ya yohó ni steén cají yá nuū yō jeē cótecu yō níí cáni chi ma jnahnú ndetū yō.

11 Te ni jeni Yaā Dios ruhū jeē nácani ri jñūhun ún, te ni tají yá ruhū cúu ri apóstol jeē steén rī nuū ñáyuu táca nación jeē tu jíín jñūhun ya. 12 Te siquī un cúu jeé ndóho ri táca jñúndóho yáha íne ri vecāa. Te tu cúcanu rī, chi jíín rí ndese Yaā cúu Yaā cándíje rī, te cúcáhu ni rī jeé cúu coto ya jniñu jeé ní chihí ya ndaha ri nde vijna te nde quivī ndíji ya.

13 Te cuiñi nihin rō jíín táca jñūhun ya jeē steén ndaā, suu jñūhun jeē ni steén rī nuū rō. Te caca rō jíín jñūhun cándíje yó, te cundáhú ní rō jñáhan rō siquī jeē yíhi rō ndaha Cristo Jesús. 14 Te condito rō táca jniñu váha jeé ní chihí ya ndaha rō, sáha poder maá Espíritu Santo jeé ndeé ini yō.

15 Je jíín rō jeé táca ñáyuu cáyūcu Asia ni castío i ruhū. Te uū i cúu Figelo jíín Hermógenes. 16 Te jícán tahú rí jeé cundáhú ní Jítoho yō ñáyuu vehe Onesíforo, chi cuehē jínu ni nanihīn ni rī ní sáha de, te tu ní cúcanu de siquī rī jeé ní íne ri vecāa. 17 Chi sa suhva ná ni quiiji de ñuu Roma, te ni nanducú yúcún de ruhū nde ni nanihīn de ruhū. 18 Te jícán tahú rí jeé máá Jítoho yō cundáhú ní yā de

quívī ndíji ya. Te je jíní vāha máá ró ndese yōh̄yo ni chindéé ñáhán de ruhū ná ni cahīyo ri ñuu Efeso.

*Jeē cúu yó nájñuhun soldado vāha nuū Jesucristo*

**2**

<sup>1</sup> Nūu súcuan te rōhó, séhē mánī, na cóo fuerza ni rō siquī jeē yāhi ró ndaha Cristo Jesús te sáha ya jeē vāha rōhó. <sup>2</sup> Te tāca jñuhun jeē ní jini ró ní cahān rī, jító jínūū ñayuu cuehē, jñuhun ún na nástéén rō nuū tēe cásquicu vāha, návāha suni cuu stéén tucu máá de nuū sáva ga i.

<sup>3</sup> Te rōhó na cuándeyí ni rō coto ró jñúndóho, chi cúu ró nájñuhun ñin soldado vāha nuū Jesucristo. <sup>4</sup> Ni ñin soldado jeē ñin nuū guerra, tu sájnēñu de máá de jín jñiñu máá de, chi cánuú jeē sáha de mání máá jéé ndácu tēe ní tejñiñu de. <sup>5</sup> Te suni súcuan tēe cásiquí deporte, ma nihín de premio te núu tú condihvī ni de cosíquí vāha de máá modo chíjñiñu. <sup>6</sup> Te tēe sájnñiñu ñihin ñuhun, máá de cúu jeē nihín xihna gā jeē cuáha itu. <sup>7</sup> Nacani ni rō siquī jeē cahān rī, te máá Jítoho yó sáha ya jeē jécūhun ni rō siquī ndihi.

<sup>8</sup> Te cocuhun ndasí ni rō Jesucristo, Yaā ní quiñi yucūn rey David, te ni natecu yā mēhñu ndíyi, nájñuhun cáhán jñuhun jnáma ya yohó jéé nacani ri. <sup>9</sup> Te jeē siquí jñuhun un ndóho ri jñúndóho, te nde ni cajihni i ruhū íne ri vecāa nájñuhun ñin tēe ni sáha cuēchi xeēn. Te jñuhun Yaā Dios chi ma cúu cuhni i jeē ma cuité núu. <sup>10</sup> Nūu súcuan te jéndeyí ni rī jító ri tāca jñúndóho yáha siquī jeē cundáhú ni rī ñayuu jeē ní nacāji ya, návāha suni cácu máá i jeē quívī i ndaha Cristo Jesús, te quihñi i nuū cujéñu i níí cáni. <sup>11</sup> Chi ndaā cahán jñuhun yáha: Nūu vēsú na cúu yō jeē siquí yā, te suni cotecu yō jín yá, <sup>12</sup> te núu cuándeyí ni yō ndoho yó, te suni ndacu yó jñiñu jín yá. Te núu ma cuajñuhún yó yā, te suni ma cuajñuhún yá yohó. <sup>13</sup> Te vēsú tu squícu vāha yó, te máá yá chi mání squícu ya, chi tu cúu sáfalta yā, chi squícu ya jeē ni cáhān yā.

*Tēe sájnñiñu squícu vāha jín jñuhun ya*

<sup>14</sup> Jñuhun yáha na nástéñvī ni rō ñayuu, te cahān ñihin ro jín i, jító máá Jítoho yō, jeē ma téjnáhan i siquī tāca jñuhun sáa-ni. Chi tu ndé jéjñiñu cuiti, chi sa stívī ñayuu jíní sóho. <sup>15</sup> Te nducú ndéyí ró jeē cuajñuhún Yaā Dios rohó, jéé cúu ró tēe sájnñiñu squícu vāha jín jñuhun ya, návāha ma cūcanu rō nuū yā siquī ní ñin, chi vāha nacani ró jñuhun ndaā yā. <sup>16</sup> Te ma quívī nduu rō jín táca jñuhun sáa-ni ñayvī yáha, chi suu sáha jeē ndúcuehē gā jñiñu néé quívicoo ñayuu cácahān. <sup>17</sup> Te tāca jñuhun cástéén i chi cúu nájñuhun ñin ndihyi xeēn jeē sacáhú gá cuahān. Te Himeneo jín Fileto cúu uū tēe jeē casáha súcuan. <sup>18</sup> Chi tēe un ní cajica yátá de nuū jñuhun ndaā, te cácahān de jeē jé ni cuu ni canatecu ndíyi. Te súcuan cása nua de xini sava ñayuu cácañdije. <sup>19</sup> Te Yaā Dios ni jeni ya ñayuu máá yá, te íyó cutú ndaā i jeē ma cáca yátá i, nájñuhun yósó núu tútu i: Je jíní Jítoho yō Yaā Dios tāca ñayuu jeē yāhi ndaha máá yá. Te suni cáhán: Tāca ñayuu jeē ndácunehen síhvī Cristo, na cújiyo i nuū jñiñu néé, áchí.

<sup>20</sup> Te ini ñin vehe cáhnu íyó cuehē cohō, nasūu mání cohō oro cohō plata, chi suni cohō yujnu cohō ñuhun. Te íyó jéé fino te íyó jéé corriente. <sup>21</sup> Te núu ñin ñayuu sándoo i máá i jeē quéndá i nuū táca jñiñu néé, te cuu i nájñuhun ñin cohō fino. Te coo ndoo coo i i nuū Jítoho yō, te nihñ jñiñu i ndese cúní máá yá. Te coo tūhva i jeē sáha i táca jñiñu vāha.

<sup>22</sup> Nuu súcuan te cunu ró coto ró táca jéé tú vāha jeē cándiyo ni tēe suchí. Te condiquin rō jniñu ndaā, jín jnúhun cándije ró yá, jín jnúhun cundáhú ni, jín jnúhun coyūcu manī jín jnáhan. Te súcuan sáha ró ndé jín táca ñayuu ndoo ánuá jeē ndácunehen síhví máá Jítoho yō. <sup>23</sup> Te ma quívi nduu rō jín táca jnúhun cánée í jeē tu iyó cájí, chi je jíní rō jeē sáha jeē tejnáhan ñayuu. <sup>24</sup> Te mozo maá Jítoho yō, tú vāha jeē tejnáhan de, chi sa suhva cánuú jéé coo vāha ni de jín táca ñayuu. Te coo vāha ni de stéén de, te cundeyí ni de jín i. <sup>25</sup> Te jín jéé víta ni de te caní ichí de ñayuu níhni ni. Chi sanaa te nacani ni i sáha Yaā Dios, te jecūhun ni i ndese iyó jnúhun ndaā. <sup>26</sup> Te nducájí ni i te cácu i nuū jexeén jeē ní jñi ún i, chi ni cundeyí jín i jeē sáha i jeē cuní maá.

*Siquí ndese coo ñayuu sáha néé quívi cuándihi*

### 3

<sup>1</sup> Te suni na jécūhun ni rō jeē quívi cuándihi te quee quívi coo jnúndóho. <sup>2</sup> Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá í. Te cahān neé i siquí Yaā Dios, te cunihni ni i nuū tatá i nuū naná i, te ma nácuatáhú i, te ma chiñúhún i Yaā Dios. <sup>3</sup> Te ma cóo manī i jín jnáhan i ni ma cundáhú ni i. Te sájnúhún i, te ma cúu casi i táca jéé ndiyo néé ni i, te yōhyo xeēn coo i, te quití ni i coto i táca jniñu váha. <sup>4</sup> Te suni nastúu i jnáhan i, te ma yūhú i sáha i cuéchi, te coo ndúxí ndasí i, te nducú i jeē cúsi ni maá-ni i, te ma nducú i quívi i nuū Yaā Dios. <sup>5</sup> Te sáha-ni i jeē chiñúhún i ya, te casi i nuū poder yá jeē ma sáma modo i.

Ma quívi nduu rō jín ñayuu casáha súcuan. <sup>6</sup> Chi sava tēe ún quívi de vehe te stáhú de táca ñahan cánée jéé iyó ndasí cuéchi. Te yachí quívicoo ña jín táca jnúhun tú ndaā jeē cúsi ni ña jín. <sup>7</sup> Te vésú niní scuáha ña na-ni jnúhun, te tu cúu cuítí jecūhun ni ña jnúhun ndaā yā. <sup>8</sup> Te nájnūhun ni casáha tēe tásí Janes jín Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūni de, chi ma candíje ndije de jnúhun cándije yō. <sup>9</sup> Te ma queé jniñu sáha de, chi cuní táca ñayuu jeē tēe cánée xíní cácuu de, nájnūhun ni cajini ñayuu jeē ní iyo néé xíní ndindúú tēe jeē ní nducú casi nuū Moisés.

*Jniñu sándihi ndácu Pablo nuū Timoteo*

<sup>10</sup> Te róhó chi je ni cutūhva vāha ró ndese stéén rí, ndese jíca ndaā rí, ndese tēe ni rí sáha rí, ndese cándije rí yā, ndese néé rí paciencia, ndese cundáhú ni rí jnáhan rí, jín ndese jéndeyí ni rí. <sup>11</sup> Chi ni cajito xeēn ñayuu ruhū, te ni ndoho rí jnúndóho. Te jíní rō táca jéé ní ndoho rí ñuu Antioquía, ñuu Iconio, jín ñuu Litra. Te jíní rō ndese ni cajito xeēn i ruhū. Te máá Jítoho yō ni jnama ya ruhū nuū ndihi ún. <sup>12</sup> Chi ndaā cúu jeē táca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i. <sup>13</sup> Te ñayuu casáha jniñu néé jín ñayuu castáhú, chi sa víhyá gā cocuu i jín jniñu néé, chi stáhú i ñayuu, te suni cándije máá i jnúhun stáhú.

<sup>14</sup> Te róhó chi sa cuiñi níhin ró jín jéé ní cutūhva ró jín jéé ní cucáhnu vāha ni rō. Chi jíní rō ndese ñayuu cúu jeē ní castéén nuū rō. <sup>15</sup> Chi nde ná lulí ró, te je jíní rō ndese cáhan tutu í jeē steén nuū rō ndese candíje rō jeé ní jíhí Cristo Jesús jehé rō návāha cácu rō. <sup>16</sup> Te náfí tutu í cúu jnúhun jeé ní cáhān Yaā Dios, te vāha níhín jniñu jeē steén nuū yō, jeé cáhān nuū yō, jeé náchuhun íchí yóhó, jín jéé scuéhnu yóhó jín jniñu ndaā, <sup>17</sup> návāha tēe cájejniñu nuū Yaā Dios, ije ni de te coo tūhva vāha de sáha de táca jniñu vāha.

## 4

1 Te cáhán rī jín ró, jito Yaā Dios jín Jítóho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñayuu ní cajihí. 2 Cáhán niñin ri jeé na nácani ró jnúhun ya, te stáhvī ní rō i candíje i. Te níni sáha ró súcuan núu núne i chí vésu tu núne i. Te sáha ró jeé na jécūhun ni i, te cahān rō nuū i, te cani ichí váha ró i, te jín cuéhē paciencia steén rō nuū i. 3 Chí quee tiempo jeé ma cuájnúhún cuiti ñayuu jnúhun ya jeé steén ndaā váha, chí sa cuajnúhún i jnúhun cúsī ní maá i, te nducú i cuehē maestro jeé steén nuū i máni jnúhun jeé núnjahan ní i cuni nahín i. 4 Te cujiyo i nuū jnúhun ndaā, te condihvī ní i táca jnúhun jeé maá cuento-ni cúu. 5 Te róhó chí níni coo ndito ní rō, te cuandeyí ní rō jín jnúndóho, te condihvī ní rō nacani ró jnúhun jnáma ya yohó, te squícu váha ró jín jniñu ya jeé sáha ró.

6 Te ruhū chí je ní socō rī maá rí jeé cúu rī, te je cuacuyajni quivī cuu rī. 7 Te je ni cundeyí rí jeé ní nducú ndeyí rí siquī jniñu váha, te je ní jinu ni jica ri ñayiví yáha, te tu ní siáá rī jnúhun cándíje rí yā. 8 Te vijna je íyó túhva premio jeé nihín rí siquī jeé ní jica ndaā rí. Chí Jítóho yō cuāha ya un núu rī maá quiví sándaā yā jniñu, chí maá yá cúu juez ndaā. Te nasūu núu maá in ruhū cuāha ya, chí suni cuāha ya nuū táca ñayuu jeé cúu ni i jeé ndíji ya chí maní i jín yá.

*Jeé cána Pablo quiji Timoteo nuū de*

9 Nducú ndeyí ró quiji yachí rō nuū rī. 10 Chí Demas ni stóo de ruhū, chí ndíyo ni de ndajniñu ñayiví yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. 11 Te maá in na Lucas íne jín rí. Te jeé quiji ró, te condeca ró Marcos quiji ró jín de, chí váha cuajniñu de jeé chindéé ñahán de ruhū jín jniñu ya. 12 Tiquico ní tají rí de cuahān de ñuu Efeso. 13 Te jeé quíji ró, te condaha ró cotón jeé ní stóo rí vehe Carpo ñuu Troas. Te suni condaha ró táca libro, te jeé cánuú gá cúu táca tutu ní tee maá rí.

14 Alejandro, tēe cúu herrero, yōhyo xeēn ní sáha de jín rí. Te maá Jítóho yō cuāha ya yāhu de jeé súcuan ní sáha de. 15 Te condito ró maá ró nuū de, chí yōhyo ní cuu de contra siquī jnúhun cástéén yó.

16 Te ná ní ine ri jeé xíhna ñúhún núu táca tóhō, te tú ní in tēe ní índichi jín rí, chí ndihí de ní castóo de ruhū. Te ñúhun ní rí jeé Yaā Dios cone cahnu ní yā nuū de. 17 Te vésu súcuan te maá Jítóho yō ní chindéé ñahán yá ruhū, te ní jēhe ya fuerza ini rí, te súcuan ní sínu rí ní nacani ndihí rí jnúhun jnáma ya yohó, ní cajini nahín ñayuu táca nación tu jín jnúhun ya. Súcuan ní jnama Jítóho yō ruhū nuū táca tēe xeēn. 18 Te jnama ga yá ruhū nuū táca jniñu néé, te condito ya ruhū nde quiví ri andiví núu ndácu ya jniñu. Te na cáhán yō jeé yóhyo luu cújéhnu ya ní cáni. Amén.

*Saludo jín bendición jeé sándihí*

19 Te cahān rō jeé sándeyí ní Prisca jín Aquila, jín ñayuu vehe Onesíforo, achí rí. 20 Erasto ní quendō de ñuu Corinto. Te ní quendō Tróximo ñuu Mileto, te cúhú de. 21 Te condihvī ní rō quiji ró nde ná tu quejéé vico míjin. Sándeyí ní rō, achí Eubulo jín Pudente jín Lino jín Claudia jín táca gá hermano.

22 Te ñúhun ní rí jeé maá Jítóho yō Jesucristo na cóo ya jín ró, te Yaā Dios sáha ga yá jeé váha róhó jíjnahan ró. Súcuan na cóo. Amén.

## CARTA JEE NI TEE SAN PABLO APOSTOL NUU TITO

1 Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacáji ya, návāha jecūhun ni i jnūhun ndaā yā jeē candíje yó, <sup>2</sup> te cocuhun ni i jeē cótecu i nñ cáni. Chi nde ná tu jecōo ñayīví te ni jejnūhun Yaā Dios jeē cótecu yō, te íyó ndaā jnūhun ni cahān yā. <sup>3</sup> Te vjna jeē ní quee tiempo ní jeni ya, te stéén caji yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. <sup>4</sup> Te tée ri carta yáha cuájeē nuū rō Tito, chi nájñūhun sēhe ri cúu ndije rō síquī jeē ínuú-ni cándíje yó yá. Te ñūhun ni rí jeē Tatá yō Yaā Dios jíin Jitoho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīñ ni rō.

### *Jniñu ya jeē ni sáha Tito nde isla Creta*

<sup>5</sup> Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te caní rō táca tée jéhu condito ñayuu cácandíje táca ñuu, nájñūhun ni ndacu ri jniñu nuū rō. <sup>6</sup> Te tée jéhu un cánuú jeē ma cóo ni ññ jeē nihín ñayuu cuēchi síquī de. Te cánuú coo ññ-ni ñasihí de. Te sēhe de cánuú cuu i sūchi cácandíje jeē ma nihín ñayuu cuēchi síquī i jeē tu sáha váha i chí jéē nihni ni i nuū de. <sup>7</sup> Chi tée cácujeñu cándiso jniñu nuū ñayuu cácandíje, cánuú caca ndaā de chí cándiso jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tēe nájñi, ma cuajnáhan de, te ma ndíyo ni de xūhún. <sup>8</sup> Chi sa cánuú jéē níní cuáha núu de vehe nuū ñayuu cájica, te níní sáha de jniñu váha, te ndito coo xiní de, te coo de tēe ndaā, te coo ndoo ánuá de, te casi de modo jeē cuní maá de. <sup>9</sup> Te cánuú cuiñi nihin de jíin jnūhun ndaā jeē ní scuáha de, návāha cuu stíhví ni de ñayuu jíin táca jnūhun ndaā váha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup> Chi íyó cuéhē ñayuu nihni ni, te cástéén i inga modo jéni ni maá i jeē súcuan cācu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. <sup>11</sup> Te cánuú jéē casi rō yuhu táca tée ún, chí cástéén de jnūhun jeē tu íyó váha stéén de, chí cúní de nihín de xūhun síquī ún. Te súcuan sáca nuu de xiní ndihi ñayuu táca vehe.

<sup>12</sup> Te ññ tēe isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stahú cácuu i, te nájñūhun quití xéén casáha i, te máni ndíhví ni i caji cuehē i, te cúxí i, áchí de. <sup>13</sup> Te ndaā cúu jnūhun ni cahān tēe ún. Jeē yúcuan na cúxeēn rō nuū i, návāha ndaā váha na cándíje i. <sup>14</sup> Te ma sáha i cuenta táca jnūhun ni catava jnáhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnūhun ndaā.

<sup>15</sup> Te ñayuu jeē ní ndundoo jeē níjnūní, máni modo íyó ndoo íyó váha jéni ni i jíto i táca-ni. Te ñayuu tu cándíje jeē tu ní ndúndoo jeē níjnūní, máni jéni ni i ññ modo tú ndoo tú váha síquī táca jéē jíto i. Chi nde jeē níjnūní i jíin ánuá i íyó jnéhén. <sup>16</sup> Te vēsú cácahān i jeē jíin i Yaā Dios, te jíin jniñu casáha i te jíin yō jeē tú ndije i. Chi ñayuu ndeváha ñayuu nihni ni cácuu i, te tu cúu sáha i ni ññ jniñu váha.

*Jnūhun ya jeē steén ndaā váha*

## 2

<sup>1</sup> Te máá ró chi níní na cáhán rō tāca jnūhun jeē quijnáhan jíin jnūhun ya jeē steén ndaā vāha. <sup>2</sup> Te cahān rō jíin tāca tée jéhnū jeē na cóo cájí ni de, te sáha yíñúhún de, te ndito coo xiní de, te candíje nīhin de jnūhun cundáhú ni yā de, te cundáhú ni de jnāhan de, te cuandeyí ni de. <sup>3</sup> Te suni súcuan tācá ñahan jéhnū, na sáha yíñúhún ña, te ma sajnúhún ña, te ma nájini ña. Te na stéén ña tāca jée vāha. <sup>4</sup> Te na stéén ña nuū tācá ñahan súchí jée coo maní ña jíin yíi ña jíin séhe ña. <sup>5</sup> Te ndito coo xiní ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yíi ña, návāha ma cahán neé ñayuu siquī jnūhun Yaā Dios.

<sup>6</sup> Te suni súcuan stíhví ni rō tāca tée suchí jeē ndito na cóo xiní de. <sup>7</sup> Te rōhó, cuu ró ñin ejemplo nuū de jeē sáha ró tāca jniñu vāha. Te jeē steén rō nuū de te ndaā steén rō te coo ndije ni rō. <sup>8</sup> Te ndaā vāha stéén rō, návāha ma cóo cahān ñayuu siquī. Te súcuan te cucanu ñayuu cácuu contra, chí ma cóo cahān i ni ñin cuēchi siquī rō.

<sup>9</sup> Te cahān rō jíin ñayuu cácuu mozo jeē na cuatáhú i nuū patrón i, te na sáha i tācá jniñu jeē nújnahan ni de, te ma cahán maá i núu ndácu de jniñu nuū i. <sup>10</sup> Te ma sacuíhná i ndajniñu de, chí na cóo i ñayuu ndaā ndije, návāha jíin tāca jniñu jeē sáha i, te cuni tāca ñayuu jeē yóhō luu cóo jnūhun jeē steén siquī Yaā Dios, Yaā jnáma yóhō.

<sup>11</sup> Chi vijna je ni stéén Yaā Dios ndese sáha ya jeē vāha ñayuu, chí cúní yā jnama ya ndíhi ñayuu ñayívi. <sup>12</sup> Te jnūhun jeē vāha ni yā jíin yó, suu stéén nuū yó jeē na siáá yó jniñu neé jíin tāca jée ndíyo neé ni yó. Te ndito na cóo xiní yó ñini ñayívi yáha, te caca ndaā yó, te chíñúhún vāha yó Yaā Dios. <sup>13</sup> Te suni stéén nuū yó jeē cocuhun ni yó jeē quéndōo ndetū yó jeē quíji máá quívi jéhnū jeē quénda ndijin Yaā Dios, Yaā kujéhnū ndasí, suu Jesucristo, Yaā jnáma yóhō. <sup>14</sup> Chi ni socō yā maá yá jehē yó, návāha jnama ya yohó núu tāca jniñu neé, te sándoo ndíhi ya anuá yó jeē cuu yó ñayuu maá yá, te condíhví ni yó sáha yó jniñu vāha.

<sup>15</sup> Tāca jnūhun yáha cánuū stéén rō, te stíhví ni rō i, te cahān rō nuū i, chí súcuan ndíso jniñu ró. Te ma cuáha rō jnūhun jeē sajeé ni ni ñin i nuū rō.

*Ndese cánuū sáha ñayuu cácandje*

## 3

<sup>1</sup> Te na nástíhví ni rō i jeē cuatáhú vāha i nuū tēe cácujehnū jíin tēe cándiso jniñu ñuu. Te na squícu i jniñu cándacu de, te coo ñamā ni i sáha i tācá jniñu vāha. <sup>2</sup> Te ma cahán neé i siquī ni ñin ñayuu, te coyúcuo maní i jíin ñayuu, te coo vāha ni i, te coo vitá ni i jíin ndíhi ñayuu.

<sup>3</sup> Chi máá yó suni ni cuu yó ñayuu canéé jeē tu jécuhun ni nde saá, te ni cacuníhni ni yó nuū Yaā Dios. Te ni cacandíje yó tāca jnūhun tú ndaā, te ni cajejniñu sáa-ni yó núu tāca jée ní ndiyo neé ni yó jíin na-ni jniñu ni cusí ni yó. Te ni cajica yó jíin jniñu neé jíin jnūhun cuésún ni. Chi ni cajito uhú ñayuu yohó, te ni cajito uhú yó i. <sup>4</sup> Yūcuán na te Yaā Dios, Yaā jnáma yóhó, ní stéén yā jeē vāha ni yā te cundáhú ni yā ndíhi ñayuu ñayívi. <sup>5</sup> Te ni jnama ya yohó, te tú na jniñu vāha ní cásáha yó jée jéne jnáma ya yohó, chí sa siquí jeē ní cundáhú ni yā yohó. Chi ni nacate ya anuá yó, te súcuan ni nacacu jeé yó, te ni ndujeé yó ni sáha ya jíin máá Espíritu Santo. <sup>6</sup> Te yóhō ni cunuú Espíritu Santo ñini anuá yó, jeē ni sáha Yaā Dios jeē jíin Jesucristo, Yaā jnáma yóhó. <sup>7</sup> Te súcuan te

ni ndahva yā cuēchi yó síquī jeē váha ni yā, te nihīn tahú yō cotecu yō níf cáni, nájñūhun ñúhun ni yō.

<sup>8</sup> Ndaā cúu jñūhun yáha, te cúní rí jeē niní cáhān nīhin ro táca jñūhun yáha, návāha ñayuu cácanđje Yaā Dios, na cóndihvī ni i cocuu i jín jñiñu váha. Chi íyó váha táca jéē yáha, te níhín jñiñu jeē quéndōo váha ánuá ndihī ñayuu. <sup>9</sup> Te ma quívi nduu rō jín táca jñūhun cánéé íi, jín jñūhun síquī ndese vēji táca jí yō, jín táca jñūhun sáha jeē cátejnáhan i cáhān i jeē cánuú síquīcu yó ley Moisés. Chi máni jñūhun cáhá-ni jeē tu níhín jñiñu cúu.

<sup>10</sup> Te núu íyó ñayuu jeē sáha jeē ndusīn ini ñayuu cácanđje, te cahān rō nuū i ñn uū jñu, te núu ma chúhun ni i, te quenehen ró i. <sup>11</sup> Chi jíní rō jeē ñn ñayuu sáha súcuan, stívī ndasí i chi jíní i jeē tú váha sáha i, te jeē yúcuān jécondee cuēchi síquī i.

### *Jeē cána Pablo quiji Tito nuū de*

<sup>12</sup> Te jeē tají rí Artemas chí Tíquico cuajeē de, yūcuān na te nducú ndéyí ró quiji ró núu rí ñuu Nicópolis, chí je ni cundaā ni rí jeē yúcuān condee rí tiempo mījin. <sup>13</sup> Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jéē jíní ñúhún de jeē quíngoo ga de ichi nuū quihín de. Te coto ró jéē ma cúmaní ni ñn nuū de. <sup>14</sup> Te ñayuu cáhīn jín yó, cánuú cutūhva i sáha i táca jñiñu váha, te chindéé ñáhán i ñayuu cúmaní nuū, návāha ma cótecu saá-ni i.

### *Saludo jín bendición jeē sándihí*

<sup>15</sup> Tāca ñayuu cáyūcu jín rí yáha, cáhān i jeē sándeyí ni rō. Te cahān rō jeē achí rí jeē sándeyí ni ñayuu jñā jeē maní yō jín síquī jeē cácanđje yó. Te ñúhun ni rí jeē na sáha ga Yaā Dios jeē váha róhó jñnáhan ró. Súcuan na cóo. Amén.

## CARTA JEE NI TEE SAN PABLO APOSTOL NUU FILEMON

<sup>1</sup> Máá rí cúu Pablo, te íne ri vecãa jeē siquí jnúhun Cristo Jesús. Te jíin hermano yō Timoteo cátee rí carta yáha cuájeē nuū rō Filemón. Chi cúu ró tēe jeē cáhıyo manı rı jíin, chi chındéé ñájnáhan ró jíin rı siquı jnıñu Yaā Dios. <sup>2</sup> Te suni cátee rı carta yáha nuū ñáyuu cácanđıje cándutútú ini vehe ró, te suni nuū hermana yō Apia, jíin nuū Arquipo, tēe chındéé ñájnáhan jíin yó siquı jnıñu cánducú ndeyı yó jíin. <sup>3</sup> Te cáñuhun ni rı jeē Tatá yō Yaā Dios jíin Jıtoho yō Jesucristo, na sáha ga yā jeē váha róhó jíjnáhan ró, te sáha ya jeē coo ndeyı coo sıı ni rō.

### *Teē cúndáhú ni te cándıje váha cúu Filemón*

<sup>4</sup> Te jeē jicán tahú rı nuū Yaā Dios te tu náa ni rı cacán tahú rı jehē rō, te nını nácuatáhú rı nuū yā jeē siquı rō. <sup>5</sup> Chi nıhın rı jnúhun jeē váha cándıje ró jnúhun cúndáhú ni Jıtoho yō Jesús rohó, te cúndáhú ni rō táca ñáyuu yñi ndaha Yaā Dios. <sup>6</sup> Te jicán tahú rı jeē ñáyuu ni cacandıje siquı jeē cándıje máá ró, na jécúhun váha ga ni i siquı táca jéé váha jeē sáha ya yohó jeē jíin Cristo Jesús. <sup>7</sup> Chi cúı sıı ndası ni rı te íyó ndeyı ni rı, hermano, siquı jeē cundáhú ni rō ñáyuu cácanđıje. Chi máá ró ni sáha jeē ní ndusı ni i.

### *Jeē jicán Pablo ñn favor jehē Onésimo*

<sup>8</sup> Núu súcuan te cáhán ndahú rı jíin ró, vēsú cuu ndacu rı nuū rō ndese cánuú sáha ró, chi cúu rı apóstol Cristo. <sup>9</sup> Te tuú chi sa cáhán ndahú rı jíin ró siquı jeē cáhıyo manı yō. Te cundáhú ni rō ruhū sáha ró jéé cunı ruhū Pablo, chi je jéhnı rı, te íne ri vecãa jeē siquı jnúhun Cristo Jesús. <sup>10</sup> Te cáhán ndahú rı jíin ró jehē mozo rō Onésimo jeē ní jeen ró te ni jinu. Te vıjna te cúu i nájnúhun sēhe rı, chi ni scándıje rı i ini vecãa yáhá.

<sup>11</sup> Te nde saá chi tu ní cúu i mozo squıcu nuū rō, chi ni jinu i. Te nde vıjna chi váha cuajniñu i nuū rō jíin núu rı. <sup>12</sup> Te nátajı rı i najeē i nuū rō. Núu súcuan te cahán váha ró jíin i, te sáha ró cuenta jeē nájnúhun máá rı ni najinú, chi yóhyo manı rı jíin i. <sup>13</sup> Te cusı ni rı núu jeē na cúu quendōo i jíin rı yáhá, náváha cuajniñu i nuū rı lugar máá ró nını jéé íne ri vecãa jeē siquı jnúhun váha ya. <sup>14</sup> Te tu ní cunı rı sáha rı súcuan, chi nde cuáha máá ró jnúhun. Chi nasūu jéé safuerza rı rohó, chi jeē váha ni rō te sáha ró favor jíin rı, nájnúhun cúı ni máá ró. <sup>15</sup> Chi sanaa te jeē siquı yáha cúu jeē ní jinu i ni cujiyo i nuū rō jecu-nı tiempo, suu náváha ví quendōo i jíin ró sáha Yaā Dios. <sup>16</sup> Te vıjna tuá cúu i ñn mozo jeē ní jeen rō, chi ni nduu i ñn jeē váha ga, suu ñn hermano jeē manı rō jíin. Te ruhū chi yóhyo manı rı jíin i, te nagā ni cuu máá ró jeē ma cóo manı rō jíin i. Te nasūu jéé manı rō jíin ñn tēe súcuan-ni, chi siquı jeē cúu i ñn hermano jeē cándıje nuū Jıtoho yō.

<sup>17</sup> Te núu sáha ró cuenta jeē ruhū cúu jnáhan ró cándıje, núu súcuan te cahán váha ró jíin i jeē jinú i nuū rō, nájnúhun jeē ruhū cahán rō jíin. <sup>18</sup> Núu na-nı falta ni sáha i nuū rō, chí núu táú i nuū rō, te cacán rō chunaa máá rı. <sup>19</sup> Ruhú Pablo, jíin ndaha máá rı tēe rı yáha jéé máá rı nachunaa. Súcuan cáhán rı vēsú cuu cahán rı jeē sa máá ró taú nuū rı sáha ró jéé cúı ni rı siquı jeē ni scándıje rı rohó te ni cácu ánuá rō. <sup>20</sup> Núu súcuan, hermano, sáha ró favor yáha jíin rı



siquī jeē candíje ró Jítóho yō. Sáha ró jéē ndúsīī ni rī, siquī jeē cúu ró hermano candíje Cristo.

<sup>21</sup> Te tée ri yáha núu rō, chi cúcáhnū vāha ni rī jeē cuatáhú ró, te nde vihyá gā sáha ró vēsú jeē ni jícān rī. <sup>22</sup> Te suni jícān rī jeē sátūhva ró núu cóndee rī, chi ñúhun ni rī jeē quénda ri yáhá te jeē rī nuū rō sáha Yaā Dios siquī jeē cájicān tahu rō jehē rī.

*Saludo jín bendición jeē sándīhí*

<sup>23</sup> Epafra, tēe íne jín rí vecāa jeē siquī jnúhun Cristo Jesús, cáhán de jeē sándeysí ni rō. <sup>24</sup> Te suni súcuan cácahān Marcos, jín Aristarco, jín Demas, jín Lucas, tēe cáchindéé ñájnáhan jín rí siquī jníñu ya.

<sup>25</sup> Te ñúhun ni rī jeē Jítóho yō Jesucristo na sáha ga yā jeē váha róhó jínjáhan ró. Súcuan na cóo. Amén.

## CARTA JEE CUAHAN NUU ÑAYUU HEBREO

### *Jeē ní tají Yaā Dios Sēhe ya ni nacani ya jñūhun*

<sup>1</sup> Tijni jínu te tijni modo ni cahān Yaā Dios jín táca jíí yō nde jenahán, chi ní tají yá tēe ni canacani jñūhun ya. <sup>2</sup> Te vijna te tiempo cuándihi yáha ní tají yá maá Séhe ya ni nacani ya jñūhun nuū yō. Te jíín Séhe ya ní sáha ya ñayīvi jíín táca gá, te ndivii jeē iyó ní chihí ya ndaha Séhe ya. <sup>3</sup> Te Séhe ya yōhyo luu cújéhnū ya, nájnūhun luu cújéhnū máá yá. Te ndihi ndese cúu máá yá, suni súcuan cúu Séhe ya. Te jíín poder jñūhun ní cahān Séhe ya te iyó cutú ndihi-ni. Te ní sándoo ya yohó táca cuéchi yó, te sáá te ní cucōo ya lado váha mesa maá Yaā cújéhnū nde andiví.

### *Jeē cújéhnū ga Séhe Yaā Dios vēsú tācá ndajéhé yā*

<sup>4</sup> Te ní ndujéhnū ndasí gá Séhe ya vēsú tācá ndajéhé andiví, chi ní nihīn yā tahū jeē ndiso ya jniñū jéhnū ndasí gá vēsú jniñū cándiso ndajéhé. <sup>5</sup> Chi súcuan ní cahān Yaā Dios jíín Séhe ya, te nasūu jíín ndajéhé yā:

Máá ró cúu Séhe ri,

te vijna te ní sajhéhnū ri rohó jeē cúu ri Tatá rō.

Te suni ní cahān yā jñūhun Séhe ya, te nasūu jñūhun ndajéhé yā:

Máá rí cúu Tátá nuū Séhe ri,

te máá i cúu Séhe nuū rī.

<sup>6</sup> Te suni ná ní tají yá Séhe ya cújéhnū, ní quiiji ini ñayīvi yáha, te ní cahān yā:

Ndihí ndajéhé rī na chíñūhūn i Séhe rī.

<sup>7</sup> Te ní cahān tucu ya jñūhun ndajéhé yā:

Nájnūhun quée tachī, súcuan cájica ndajéhé rī sáha ri,

te tācá un jéē cájejniñū nuū rī, nájnūhun yáñuhūn cácuu.

<sup>8</sup> Te jñūhun Séhe ya chí sa suhva cáhán yā:

Máá ró cúu Yaā Dios, te ndacu ró jniñū ní cáni,

te jniñū ndácu ró, máni jniñū ndaá cúu.

<sup>9</sup> Cúsñ ní rō jíín jniñū váha, te jíto uhū rō jniñū néé.

Jeē yúcuan ruhū, Yaā Dios maá ró, ní sáha ri

jeē yóhyo ga cúsñ ní rō vēsú táca gá jeē iyó andiví.

<sup>10</sup> Te suni cáhán yā:

Máá ró cúu Jitoho, te nde xīhna ñūhūn ní sáha ró jeē ní jécōo ñayīvi.

Te andiví chí suni jeē ní sáha ró cúu.

<sup>11</sup> Te tācá un chí naa, te máá ró chí ní cáni iyó ró.

Te tācá un chí cutúhú nájnūhun cutúhú ññ sahna,

<sup>12</sup> te nacaquin jñahnū rō te nasama ró jíjnáhan.

Te máá ró chí ma sáma cuiti rō,

te quiiví cótecu rō ma ndíhi cuiti.

<sup>13</sup> Te súcuan ní cahān tucu yā jíín Séhe ya, te nasūu jíín ndajéhé yā:

Cucōo ró lado váha ri nuū cújéhnū ró,

te na sáha ri jeē quende rō poder táca jéē cájito uhū rohó.

Achí yá. <sup>14</sup> Te tācá ndajéhé yā chí mozo-ni cácuu, te tájí yá cuangoo jeē chindéé ñáhán ñayuu jeē nihín tahū jeē jnama ya.

*Jeē ma cúhuun ní yō jíín jñūhun jnáma ya yohó*

## 2

1 Núu súcuan te cánuú jéé váha ga chuhun ni yō tāca jnúhun ya jeē ní cajini yó, chí núu tuú te sanaa te scuíta yó. <sup>2</sup> Chi nde jenahán ní jejniñu ya ndajéhé yā ní cacastúhun jnúhun ya, te ní cajini ñayuu jeē iyó ndáa. Te ñayuu níhni ní jíin ñáyuu tu ní cajendetū jnúhun ún, vetū-ni ní canihīn i castigo. <sup>3</sup> Te núu súcuan ní cuu, te yóhó, ¿ndese cácu yó núu ma chúhun ni yō jnúhun cánuú gá jeē jnáma ya yohó? Chí xīhna gā maá Jítóho yō ni nacani ya jnúhun yáha, te sáá te tēe jeē ní cajini nahín ni canacani ndaá tucu máá de nuū yō. <sup>4</sup> Te Yaā Dios suni ní chindéé ñáhán yá de jeē ní canacani de jnúhun ya. Chí ní sáha ya jíin de jeē ní casáha de sīn sīn jniñu jéhu jeē nahán náa ni yō jító yó poder yā. Te suni ní jēhe ya Espíritu Santo yā nuū ñn ñn yó, ndese ní nujnahan ni maá yá sáha yó.

*Jeē ní nduu Jesús jnáhan ñayuu*

<sup>5</sup> Te Yaā Dios nasūu núu ndajéhé yā ní jēhe ya jnúhun jeē condiso jniñu siquī ñayiví jéé quíji, chí sa suhva nuū Séhe ya Cristo ní jēhe ya. Te siquī ñayiví un cúu jeē cahán rī yáha. <sup>6</sup> Chí suhva yósó núu tútu jeē ní cáhān David jíin yá:

¿Na vé cúu ñayuu jeē ñúhun ni ní i?

Te ndíhví ní ní síquī i, te máá ñáyuu cúu i.

<sup>7</sup> Chí jecu-ni tiempo ní sáha ní jeē núu i nuū tācá ndajéhé ní.

Yūcuán na te sajéhu ní i te squéndō yíñúhún ní i, te cani ní i jeē ndacu i jniñu nuū tāca jéé ní sáha ní.

<sup>8</sup> Te ndihí jeē iyó chí sáha ní jéé cujéhu i siquī.

Achí tutu. Te jeē ní sáha Yaā Dios jeē cujéhu i siquī ndihí, núu súcuan te ma quéndō ní ñn jeē ma cújéhu i siquī. Te vésú súcuan te vijna te ná tu coto yó jéé cujéhu i siquī ndihí jeē iyó. <sup>9</sup> Te jeē jini yó vijna cúu Jesús. Yaā jeē ní nduu núu jecu-ni tiempo nuū tācá ndajéhé yā. Chí ní ndoho ya jeē ní jíhí yā jēhé yō, te jeē yúcuan ní ndujéhu luu tucu ya, te ndihí cáhiyo yíñúhún núu yā. Chí jeē váha ní Yaā Dios jíin yó, jeē yúcuan ní jíhí Jesús jēhé yō.

<sup>10</sup> Te ndihí jeē iyó chí cuenta Yaā Dios cúu, chí máá yá ní sáha. Te suni ndéca ya cuehē ndasí séhe ya jeē quihín i andiví núu luu cujéhu i jíin yá. Te váha níhín jniñu jeē ní jēhe ya jnúndóho nuū Jesús, chí jeē ní ndoho ya súcuan te cuu condeca váha ya ñayuu ní jnama ya. <sup>11</sup> Chí Jesús jeē ní sándoo ya i te máá i jeē ní candundoo i, chí ñn-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vésú ndasí núu i. <sup>12</sup> Chí yósó núu tútu jeē ní cáhān yā jíin Tátá yá:

Cachí na jnúhun ní núu tācá hermano na,

te mēhñu núu cándutútú i cata ná ndese cújéhu ní.

<sup>13</sup> Te suni cáhān yā nájnúhun cácahān hermano yā:

Ruhū chí cándíje ri yā.

Te cáhān tucu yā:

Yāha íne ri jíin táca gá sēhe Yaā Dios jeē ní jēhe ya nuū rī.

Achí Jesús.

<sup>14</sup> Te nájnúhun cácacu ñayuu jeē cúu i yiquí cúñu, suni súcuan ní cacu Jesús, návāha cuu yā jēhé yō. Te súcuan ní snáa yā poder jexeén jeē squíví ñayuu nuū cuéchi te jíhí i. <sup>15</sup> Te ní cacu ya súcuan návāha cuu quenehen ya tāca ñáyuu chíji jnúhun jeé yuhú i cuu i. Chí ní vida i ndóho i sáha ún. <sup>16</sup> Te jendaá tu ní quíji ya jeē chindéé ñáhán yá tācá ndajéhé yā, chí sa suhva jeē chindéé ñáhán yá ñayuu cácañíje jeē ní nduu yucūn Abraham. <sup>17</sup> Jeē yúcuan ní jini ñúhún nduu inuú yá jíin táca hermano yā, návāha cuu ya sutū cujéhu jeē squícu váha ya

tāca jniñu jehē i nuū Yaā Dios. Chi ni cundáhú ni yā i, te ni ndahva yā cuēchi i jeē ni sócō yā maá yá jehē i. <sup>18</sup> Chi suni máá yá ni ndoho ya jeē ní jito ndee jnūndóho ya, te jeē yúcuau cuu chindéé ñáhán yá ñayuu jeē jito ndee jnūndóho i.

### *Cújéhu ga Jesús vēsú Moisés*

## 3

<sup>1</sup> Hermano, ni cana Yaā Dios rohó, te cácuu ró ñayuu ndoo máá yá. Núu súcuau te na nácani vāha ni rō siquī Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhu siquī jnūhun cácan díje yó. <sup>2</sup> Chi ni squícu vāha ya nuū Yaā Dios, Yaā ní tee jniñu un siquī yā, nájñūhun ni squícu vāha Moisés nuū ñayuu jeē ni cáhān Yaā Dios jeē cácuu i ñayuu vehe ya. <sup>3</sup> Chi cújéhu ndasí gá Jesús vēsú Moisés, nájñūhun cújéhu ndasí gá tēe sáha vehe nasūu máá vehe. <sup>4</sup> Chi tāca vehe iyó tēe ni sáha. Te máá Yaā Dios cúu jeē ni sáha tāca jēe iyó. <sup>5</sup> Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jnūhun jeē steén yā tiempo quiji. <sup>6</sup> Te Cristo chi sa cúu ya maá Séhe jeē ndácu jniñu nuū ñayuu vehe Tátá yā, te vāha squícu ya jeē ní jéjnūhun ya nuū i. Te suni máá yó cácuu ñayuu vehe ya, te núu na cuñiñi nīhin yó jíin jnūhun cándíje yó ndé quivī sándihí, te núu cúsiñi ní yō jeē ñūhun ni yō tāca jēe vāha jeē coo.

### *Jnūhun jeē ndetātu ñáyuu Yaā Dios*

<sup>7</sup> Núu súcuau te na chūhun ni yō jeē cahán Espiritu Santo nuū tútu i:

Vijna te núu cuni sōho ró jēe cahán Yaā Dios,

<sup>8</sup> te ma cūñihni ni rō nájñūhun ni cacunihni ni ñayuu jengahán.

Chi tu ní cájendetū i nuū yā ná ni cajica i nuū ñūhun téhé.

<sup>9</sup> Chi yúcuau ní casáha jíi rō jniñu jeē ni quitī ni rī, achí yá, vēsú ni cajito i tāca jniñu ni sáha ri uū xico cuiyá.

<sup>10</sup> Jeē yúcuau ní quitī ni rī jíin ñayuu tiempo un.

Te ni cahán rī jeē máni jeē castóo i ichi ndaa, chi tu cácuu i condiquīn i jnūhun rī.

<sup>11</sup> Te jeē yúcuau ní quitī ni rī, te ni cahán teyí rí

jeē ma quívicoo cuiñi i nuū ndetátú i sáha rī.

Achí yá.

<sup>12</sup> Núu súcuau hermano, coto má conéé ánuá ni ñin ró jēe cáca yátá ró jeē tuá candíje ró Yaā Dios, Yaā técu. <sup>13</sup> Chi sa suhva tāca quivī na stíhvī jnāhan ni rō, níni gá iyó tiempo, návaha ma cūñihni ni ñin ró te stáhú róho sáha ró cuēchi.

<sup>14</sup> Te núu na cuñiñi nīhin yó ndé quivī sándihí jíin jnūhun jeē ní quejéé yó jíin, yúcuán na te cuu yó jnāhan Cristo.

<sup>15</sup> Chi cáhān tutu:

Vijna te núu cuni sōhó ró jēe cahán Yaā Dios,

te ma cūñihni ni rō nájñūhun ni cunihni ni ñayuu jengahán.

Achí. <sup>16</sup> ¿Te ndé-ni cúu ñayuu jeē ní jini jnūhun ya te ni cunihni ni? Suu ndihí ñayuu jeē ni scácu Moisés jeē ní quendacoo Egipto. <sup>17</sup> ¿Te ndé-ni cúu ñayuu jeē

ni quitī ni yā nuū uū xico cuiyá? Suu ñayuu jeē ní casáha cuēchi, te ni cajihí i nuū ñūhun téhé. <sup>18</sup> ¿Te ndé-ni i cúu jeē ni cáhān teyí yá jeē ma quívicoo cuiñi

i nuū ndetátú i sáha ya? Suu máá ñayuu jeē tu ní cájendetū nuū yā. <sup>19</sup> Núu súcuau te jíni yō jeē tu ní cúu quívicoo i nuū ndetátú i, siquī jeē tu ní cácan díje

i ya.

## 4

<sup>1</sup> Te níní íyó gá jnūhun jeē ni jéjnūhun ya jeē quívicoo ñayuu nuū ndetátú i sáha ya, te na cónso Iyo yó jéē ma stíví yó, návaha tú coo jíin sava ró jéē ma nihín rō quívi rō. <sup>2</sup> Chi suni máá yó ni cajini sōho yó jnūhun jeē jnáma ya yohó, nájñūhun ñayuu jenahán un. Te nuū maá i tu ní jéjníñu jnūhun ni cajini i ún, siquí jeē tu ní cáandíje i. <sup>3</sup> Te yohó jéē cáandíje, máá yó cúu jeē quívicoo yó nuū ndetátu yó. Te siquí ñayuu tu cáandíje ni cahán yā suhva:

Jeē yúcuan ní quití ni rí, te ni cahán teyí rí  
jeē ma quívicoo cuítí i nuū ndetátú i sáha ri.

Te súcuan ni cahán yā vésú je íyó túhva nuū ndetátú i nde ná ni jecōo ñayávi.

<sup>4</sup> Chi súcuan yósó jnūhun nuū tútu íi siquí quívi uxá:

Ni sínu Yaā Dios táca jéē ni sáha ya, te ni ndetátu yá quívi uxá.

<sup>5</sup> Te suni nuū tútu un yósó tucu:

Ma quívicoo cuítí i nuū ndetátú i sáha ri.

Achí yá. <sup>6</sup> Núu súcuan te sava ñayuu chí quívicoo nahín i nuū ndetátú i. Te ñayuu jenahán jéē ní cajini jnūhun jeē jnáma ya i, tu ní quívicoo i siquí jeē tu ní cájendetú i nuū yā. <sup>7</sup> Jeē yúcuan ní jeni tucu ya inga quívi jeē quívicoo ñayuu, te quívi un cúu vijna. Chí ná ni yāha cuehē tiempo jeē ni cahán yā jíin ñayuu jenahán, te yósó nuū tútu jeē ní sáha ya jeē suni ni cahán David suhva:

Vijna te núu cuni sōho ró jéē cahán yā,

te ma cúnihni ní rō núu súcuan.

Achí tutu. <sup>8</sup> Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetátu ánuá i sáha ya. Chí núu súcuan te ma cahán gá Yaā Dios jíin táca ñayuu jeē vijna cúu quívi jeē quívicoo i nuū ndetátú i. <sup>9</sup> Núu súcuan te íyó túhva nahín ñin nuū ndetátu ñayuu Yaā Dios, nájñūhun ni ndetátu máá yá. <sup>10</sup> Chí ñayuu jeē quívicoo nuū ndetátú i jíin yá, chí ndetátú i jeē ní casáñiñu i, nájñūhun ni ndetátú Yaā Dios nuū jniñu ni sáha máá yá. <sup>11</sup> Núu súcuan te na ndúcú ndéyí yó quívi yó núu ndetátu yó un, te ma sáha ni ñin yó cuéchi jeē ma cándíje yó, nájñūhun ni casáha i nde saá.

<sup>12</sup> Chí jnūhun Yaā Dios ndíto técu te íyó poder. Chí cúu nájñūhun ñin espada jeē xeén ndíndúu lado, chí nástúu cáji ndese íyó jéē níjnūni yó jíin ánuá yō, nájñūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndíhi ndese jéni ni yō jíin ndese cúní yō sáha yó. <sup>13</sup> Te tu íyó ni ñin jeē yísáhi jeē tu jíni máá Yaā jeē náquihin cuenta, chí ndíhi-ni jíni váha ya, te ndíhi-ni túu ndijin nuū yā.

### *Jesús cúu sutū kujéñu ga*

<sup>14</sup> Te cánevaha yó ñin sutū kujéñu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi nihin yó jíin jnūhun jeē ní candíje yó. <sup>15</sup> Chí névaha yó ñin sutū kujéñu jeē jíto ndáhú yohó jeē tu fuerza yō squícu váha yó. Chí nájñūhun ndóho yó jéē jíto ndee jexeén yohó, suni súcuan ní ndoho ya jeē ní jito ndee un yá, vésú tú cuítí cuéchi ya. <sup>16</sup> Núu súcuan te ma yūhu yó, chí na quívi yó yuhu mesa yā, cúu jeē cacān tahú yō. Chí maní yā jíin yó, te cúndáhú ni yā yohó, te siquí jeē váha ni yā te chíndéé ñáhán yá yohó táca jíin jeē jíni ñúhún yó.

## 5

<sup>1</sup> Chí táca sūtú jeē ní kujéñu jenahán, ni nacāji Yaā Dios de mēhñu ñayuu, te ni jeni ya de jeē cuíñi de nuū yā jehē ñayuu, te socó de ndajniñu jíin quití nuū yā jeē siquí cuéchi i. <sup>2</sup> Te cuu cahán vítá de jíin ñayuu tu jécūhun ni jíin ñayuu

castívi, chi máa de suni tú na fuerza ini de squícu vāha de. <sup>3</sup> Jeē yúcuau cūu jeē suni cánuú sócō de quiiti nuū yā jeē siquī cuēchi máa de, nasūu máa-ni jeē siquī cuēchi ñayuu.

<sup>4</sup> Te ni ñn tēe tu cūu sājéhnū de máa de jeē cuu de sutū cujéhnū, chi sa máa Yaā Dios cūu jeē nácāji ya de, nájñūhnū ni nacāji ya Aarón nde jenahán. <sup>5</sup> Te suni sūcuau Cristo, tu ní sājéhnū ya máa yā jeē cuu ya sutū cujéhnū, chi sa Yaā Dios ni sáha, chi ni cahān yā jñūhnū yāha:

Máa ró cūu Sēhe ri,

te vijna te ni sājéhnū ri rohó jēe cūu ri Tatá rō.

<sup>6</sup> Te suni cáhán tucu ya nuū tútu ñi:

Ñí cáni cūu ró sūtū,

nájñūhnū sutū Melquisedec jenahán.

<sup>7</sup> Te Cristo, ná ni condee ya ñayiví, te ni jicān tahu yā, te nde ni ndahyū yā te ni ndahyū cohó yā. Te ni cahān ndahú yā jíin Yaā Dios, Yaā jeē cūu jnama ya jeē ma cūu yā nuú. Te siquī jeē yiñúhún ní chiñúhún yā Yaā Dios, te ni chindéé ñájñahán Yaā Dios jíin yā nuū jñūndóho ún. <sup>8</sup> Chi vēsú Sēhe Yaā Dios cūu ya, te ni jendetū yā ni ndoho ya ini ñayiví, te sūcuau ni jini yā ndese cūu jñūhnū jendetū. <sup>9</sup> Te ná ni cuu ni squícu ndíhi ya jeē ní jendetū yā, te ni cucutú jñūhnū jeē jnáma ya tāca ñayuu jendetū nuū yā, te cotecu i ñí cáni. <sup>10</sup> Chi ni jeni Yaā Dios yā jeē cūu ya sutū cujéhnū nájñūhnū sutū Melquisedec.

### *Siquī jeē ma cáca yátá i*

<sup>11</sup> Te iyó cuéhē jñūhnū jeē castūhnū rí siquī tāca jēe yāha. Te yí cūu jeē jécūhnū ní rō sáha ri, siquī jeē tu cácuini rō chuhun ní rō. <sup>12</sup> Te je ni cunahán cácan díje ró, te jíini ñúhún jēe cūu ró tée stéen nuú. Te tuú chi sa cájini ñúhún tucu máa ró tēe stéen nuū rō tāca jñūhnū Yaā Dios jeē tú yí cuíti. Chi sa ni canduu ró nájñūhnū sūchi yícuín jēe jíini ñúhún caxin i, chi ná tu ije i caji i jeē ndáva. Sūcuau cácuu ró chi ná tu ije ró jíin jñūhnū yí gá. <sup>13</sup> Chi núu máni máa nájñūhnū sūchi yícuín jéxin cácuu ró, núu sūcuau te tu cūu jecūhnū vāha ní rō jñūhnū ndaā. <sup>14</sup> Te ñayuu jeē jé ni ije, chi cáyeji i jeē ndáva, cūu jeē ní cutúhva vāha i te je cūu nácāji i jeē vāha jíin jēe neé.

## 6

<sup>1</sup> Núu sūcuau te na yāha yó núu tāca jñūhnū Cristo jeē tú-ni yí, te na quíhín yō nuū jñūhnū yí gá, návāha na íje vāha ní yō jíin jñūhnū ya. Te ma ndejéé tucu yó jíin jñūhnū jeē ni scuáha yó xíhna gā, suu jñūhnū jeē nácani ní yō stóo yo cuéchi yó jēe cūu yō sáha, jíin jēe candíje yó Yaā Dios, <sup>2</sup> jíin siquī jeē jéndute, jíin siquī jeē soó ndaha xiní ñayuu, jíin siquī jeē nátecu ndíyí, jíin siquī jeē jnahnū ndetū ñayuu ñí cáni. <sup>3</sup> Núu sūcuau te na yāha yó núu tāca jēe yāha te quiví yó núu jñūhnū yí gá, te núu cuāha Yaā Dios jñūhnū.

<sup>4</sup> Chi iyó ñayuu jeē jé ni jecūhnū ni i, te je ni jini i tāca jēe jéhe Yaā Dios, te je ni quiví i nuū jñūhnū stéen Espíritu Santo, <sup>5</sup> te suni je ni jini i jñūhnū vāha Yaā Dios jíin ndese coo poder yā tiempo quiji. <sup>6</sup> Te ñayuu un núu caca yátá i, te ma cūu ga ndejéé jeé i jeé nácani ní i. Chi jeē cáca yátá i cūu nájñūhnū jeé nácanni tucu i Sēhe Yaā Dios jicā cruz, te cájēhe i jñūhnū canu yā cájito ñayuu.

<sup>7</sup> Te ñayuu chi cácuu i nájñūhnū ñūhnū jeē cūun vāha saū nuū te ndóyo vāha. Te núu cánecoo jeē vāha caji tēe casájniñu, yūcuán na te cúsñi ní Yaā Dios jíin. <sup>8</sup> Te núu máni iñu yóquin jíin yucú sajnēñu cánecoo nuū, núu sūcuau te tu jéjñiñu cuíti, te squéndōo ñi yā, te ñn quiví te cayū. Sūcuau jnahnū ndetū ñayuu cájica yátá.

### *Jeē ñúhun ni yō tāca jéē vāha jeē coo*

<sup>9</sup> Te máá ró jijnáhan ró hermano, vēsú cácahān rī sūcuan jīn ró, te cácuáhnū ni rī jeē cácuu ró ñayuu cuiñi ñihin, chi ñayuu ni jnama ya cácuu ró. <sup>10</sup> Te Yaā ndaā cúu Yaā Dios, te tu náa ni yā jñiñu cásáha ró. Chi siquī jeē cáhiyo manī rō jīn yá te ni cacundáhú ni rō hermano rō cácañdije, te ni cachindéē ñáhán ró i, te sūcuan cásáha ró ndé vjna. <sup>11</sup> Te cácuñi rī jeē niní sūcuan sáha ga ná ñin ná ñin ró ndé quivī sándihī, chi jeē sáha ró sūcuan te nihin rō ndihī jeē cáñuhun ni rō. <sup>12</sup> Te cácuñi rī jeē ma cúhuun ni rō, chi sa ndacu rō ñayuu cácañdije jeē jīn paciencia cándetu i, te jeē yúcuñi ñihīn tahú i tāca jéē ni jéjnūhun ya.

<sup>13</sup> Chi quivī jeē ni jéjnūhun Yaā Dios nuū Abraham, te ni ndacunehen ya maá yá jeē ni jéjnūhun téyí yá, chi tuá na inga ndacunehen ya jeē cujéhnū ga vēsú maá yá jeē cuu testigo yá. <sup>14</sup> Te ni cahān yā: Jendaá ndije jeē vāha ndasí sáha ri jīn ró, te sáha ri jeē nducuehē ndasí yúcūn rō, achí yá jīn Abraham. <sup>15</sup> Te jīn paciencia ni cōndetu de, te sūcuan te ni nihin de jeē ní jejnūhun ya. <sup>16</sup> Te núu cáhán teyí ñayuu, te ndacunehen i síhvī ñin jeē cujéhnū ga vēsú maá i. Te núu íyo ñin jñūhun jeē tu cácañdije jñáhan, te núu ñin tēe cáhán teyí de jīn síhvī Yaā Dios, yūcuán na te jécuiñi jeē cátejñáhan. <sup>17</sup> Te suni sūcuan Yaā Dios, chi ni jejnūhun téyí yá nuū ñayuu jeē cuáha ya tahū i. Chi ni cuni yá jeē cucáhnū vāha ni i jeē ma nácani yátá ni yā siquī jeē ni jéjnūhun ya nuū i. <sup>18</sup> Chi ma nácani yátá cuiti ni yā siquī jñūhun jeē ni cáhān yā uū jīnu, ñin jeē ni jéjnūhun ya, te inga jeē ni cáhān teyí tucu ya siquī suni jñūhun ún. Chi tu stáhú cuiti yá. Te jeē yúcuñi máá yó jeē ní tūhva yó yá, chi yōhyo íyo ndeyí ni yō, te cáñuhun teyí ni yō jeē squícu ya jeē ni cáhān yā. <sup>19</sup> Te siquī jeē sūcuan ñúhun ni yō, te suu sáha jeē quéndōo ñihin ánuá yō jīn jñūhun ya, te quéndōo ndaā ni yō, nájnūhun quéndōo ñihin barco jeē jñí gancho yuū. Te sáha jeē cúu quivī yó andiví núu íí gā, nájnūhun cuarto íí gā jeē ni íyo ichi yátá sahma ni ndita caa ini vehe íí jenahán. <sup>20</sup> Te ini yūcuán chi xīhna gā Jesús ni quivī, návāha nune ya ichi quivīcoo yó. Te jeē yúcuñi ñí cáni cúu ya sutū cujéhnū nájnūhun sutū Melquisedec.

### *Jeē cúu Jesús sutū nájnūhun Melquisedec*

## 7

<sup>1</sup> Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnū téyí. Te ni jejnahan de Abraham ná ni nandicó Abraham jeē ní cundeyí de ni cajejnáhan de jīn tāca rey. Te ni jicān tahú de jehē Abraham. <sup>2</sup> Te tāca úxī ndajñiñu jeē ní quende Abraham nuū tāca rey un, ni jēhe de ñin ñin siquī un núu Melquisedec. Te síhvī Melquisedec cuni cahān: rey jeē sáha jñiñu ndaā. Te suni nání de rey Salem, te jñūhun Salem cuni cahān: jeē íyo ndeyí sñ ni. Te jeē yúcuñi suni nání de: rey jeē sáha jeē íyo ndeyí sñ ni ñayuu. <sup>3</sup> Te tu cáhán tutu jñūhun tátá de ni náná de ni tāca jí de. Ni tu cáhán núu ni cacu de, ni núu ni jihī de. Chi cúu de nájnūhun Jesús, Sēhe Yaā Dios, chi ñí cáni cúu de sutū.

<sup>4</sup> Te condēhe jijnáhan ró náa jéhnū ni cuu Melquisedec, chi jí jéhnū yó Abraham ni jēhe de ñin ñin siquī tāca jéē uxí nuū de siquī tāca jéē ní quende de nuū rey un. <sup>5</sup> Te jíní yō jeē tāca úxī ndajñiñu ni canihīn ñayuu, ni cajēhe i ñin ñin siquī un ní caquihīn tēe cácuu sutū yucūn Leví, nájnūhun cáhān ley Moisés. Te ni caquihīn de nuū ñayuu cácuu jñáhan de, chi ñin-ni yucūn Abraham cácuu de jīn i. <sup>6</sup> Te Melquisedec nasūu yúcūn Leví cúu de, te vēsú sūcuan te ni quihīn de

in in siquī tāca jēē uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū. <sup>7</sup> Te jíní vāha yó jēē tēe cújēhnu ga cúu jeē jicān tahu jehē tēe núu ga. <sup>8</sup> Te ñayiví yáha chí tāca sūtū cáquihin de in in siquī tāca jēē uxí nuū ñayuu, vēsú cácuu te tēe cájihí. Te Melquisedec suni ni quihin de, te máa de chí cáhán tutu ií jeē técu de. <sup>9</sup> Te suni cuu cahān yō jeē Leví, tēe jeē ní quihin in in siquī tāca jēē uxí nuū ñayuu, suni nájnūhun nuū máa de ni quihin Melquisedec in in siquī tāca jēē uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquī Leví jíin ndihi ga yucūn de jeē quíji. <sup>10</sup> Chi yucūn Abraham cúu Leví, te vēsú ná tu cacu de quiví jeē ni jéjnahan Melquisedec Abraham, te nájnūhun jeē ni jēhe máa de cúu jeē ni jēhe Abraham.

<sup>11</sup> Te yucūn Leví ni cane sūtū Aarón jíin tāca gá sūtū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaa ñayuu jíin ley un núu, te tuá cánuú jeē núcuiní inga clase sūtū lugar Aarón jíin yucūn de. Te inga clase sūtū cúu Cristo jeē cúu ya nájnūhun sūtū Melquisedec. <sup>12</sup> Te núu nucuiní inga clase sūtū, te suni cánuú sáma ley siquī yucūn de. <sup>13</sup> Núu súcuan te ní sáma ley un, chí cáhán tutu ií jeē Jítoho yō Jesús cúu inga clase sūtū ún, te ni cacu ya chíji inga yucūn. Te yucūn ní quiji ya ún, tú ni in ní cúu sūtū. <sup>14</sup> Chí jíní vāha yó jēē chíji yucūn Judá ni cacu Jítoho yō. Te yucūn ún chí tu ní cáhán cuiti Moisés jeē cáneco sūtū.

<sup>15</sup> Te cáji cúu jeē ní nucuiní Cristo jeē cúu ya inga clase sūtū nájnūhun sūtū Melquisedec. <sup>16</sup> Te tu cúu ya sūtū jeē ní cacu chíji yucūn Leví nájnūhun cáhán ley jenahán. Chí cúu ya sūtū siquī jeē ndíso ya poder cotecu yā ní cáni te ma cúu cuiti yā. <sup>17</sup> Chí súcuan ni cahān Yaā Dios jnūhun ya:

Ní cáni cúu ró sūtū,  
nájnūhun sūtū Melquisedec.

<sup>18</sup> Núu súcuan te jíníu jeē ní ndacu ley jenahán siquī sūtū, chí ni naa vijna, chí tu ní níhín jníníu quendōo ní cáni. <sup>19</sup> Chí ley Moisés tu ní sáha jeē quendōo ndaa ñayuu. Te ni nihín yō in jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

<sup>20</sup> Te jíin jēē ni cáhán teyí Yaā Dios te cúu Jesús sūtū. <sup>21</sup> Chí tāca gá tēe ún, nasūu jíin jnūhun jeē ni cáhán teyí yá ní cúu de sūtū. Te Jesús chí ni cahān teyí Yaā Dios jeē cuu ya sūtū, chí súcuan cáhán tutu:

Ni cahān teyí máa Jítoho yō Yaā Dios, te ma nácani yátá ni yā:  
Ní cáni cúu ró sūtū,  
nájnūhun sūtū Melquisedec.

Achí yá. <sup>22</sup> Núu súcuan te jíin Jesús ni cucutú in contrato vāha ga vēsú ley jenahán. <sup>23</sup> Te tāca gá sūtū ún, chí ni íyo cuehē de, chí siquī jeē cájihí de te tu ní cúu cuiní de ní cáni. <sup>24</sup> Te Jesús chí cúu ya sūtū jeē cuiní ní cáni, chí técu yā ní cáni. <sup>25</sup> Jeē yúcuan ndíso jníníu ya jnama ya ñayuu quijicoo nuū Yaā Dios, cotecu i ní cáni. Chí ní cáni técu yā te cáhán yā jehē i jíin Yaā Dios.

<sup>26</sup> Núu súcuan te vāha ndasí sūtū cújēhnu cúu Jesús, jeē nájnūhun jíin ñūhún yó. Chí sūtū ií cúu ya, te tú na cuēchi ya, te íyo ndoo ya, te tu cúu ya jnāhan ñayuu casáha cuēchi, te cújēhnu téyí yá nde nuū súcuan gá andiví. <sup>27</sup> Te máa yá tu jíin ñūhún sáha ya nájnūhun ní casáha sūtū cácujehnu jenahán, jeē ndiquiví ni casocō de quiti siquī cuēchi máa de xīhna gā, te sáa te siquī cuēchi ñayuu. Chí in jínu-ni ni socō yā máa yá jehē yō, te ni cuu-ni. <sup>28</sup> Chí ní jeni ley Moisés tāca sūtū cújēhnu jeē tú na fuerza squícu vāha. Yūcuán na te cuéé gá te ni cahān



teyí Yaā Dios. Te jíin jéē ni cáhān teyí yá, te ni jeni ya Sēhe ya jeē cúu ya sutū cujéhnū, te sutū ndaā sutū vāha cúu ya ní cání.

*Jeē ndíso jniñū Cristo siquī ñn contrato jeé*

**8**

<sup>1</sup> Núu súcuan te jñūhun cánuú gá jeē jé ni cahān rī cúu yāhá: Névāha yó ñn sutū cujéhnū nájñūhun ni cahān rī, te ndéé yá lado vāha mesa nuū ndácu jniñū máá Yaā cujéhnū nde andiví. <sup>2</sup> Te vijna te cúu ya sutū nde andiví, jeē cúu ndije lugar ñi jeē ni sáha máá Jítóho yō Yaā Dios, nasūu ñáyuu. Chi tu cáa nájñūhun vehe ñi jehán jeē ní casáha ñáyuu. <sup>3</sup> Te táca sūtū cujéhnū ni jeconaā de jeē socó de ndajñiñū jíin quiti nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. <sup>4</sup> Te núu ní íyo ga yā ini ñayiví, te ni ma quijnáhan jeē cúu ya sutū jíin táca gá sutū, chi níni cásocó gā de quiti nájñūhun cáhān ley Moisés. <sup>5</sup> Te jniñū cásáha de, tu quijnáhan jíin jéē iyó andiví. Chi cúu ñn muestra-ni jeē steén siquī andiví. Te cúu nájñūhun jeē ni cáhān Yaā Dios jíin Moisés quiví ní quejéé de sáha de vehe ñi jehán: Coto vāha ró jéē sáha ró táca ndajñiñū nájñūhun jíto jeē ní steén rī nuū rō nde xiní yúcu, áchí Yaā Dios jíin de. <sup>6</sup> Te vijna te sáha Cristo jniñū jéhnū ndasí gá vesú jeē casáha táca sūtū ún, chi ndíso jniñū ya siquī contrato jeé jéé yóhoyo vāha ga, chi ndíso jñūhun jéhnū ga jeē ní jéjñūhun Yaā Dios.

<sup>7</sup> Chi contrato ley xihna ñúhún, núu jeē ni sáha jeē quée vāha jniñū núu, te tuá cánuú jéé cóo contrato uū. <sup>8</sup> Chi ñáyuu jehán un jéé tu ní cáquendō ndaā, suhva ni cahān Yaā Dios jíin i, áchí tutu:

Quiji quiví jeē nasáha rī ñn contrato jeé jíin ñáyuu Israel jíin ñáyuu Judá, áchí Jítóho yō Yaā Dios.

<sup>9</sup> Te ma cóo nájñūhun contrato jeē ni sáha rī jíin jíi i jehán, quiví jeē ní jñi rī ndaha de jíjñáhan de, te ni quenehen rī de ini nación Egipto.

Chi tu ní cásquicu vāha de jíin contrato ley rī. Jeē yúcuan tuá ni táñúhún rí de, áchí Yaā Dios.

<sup>10</sup> Núu súcuan te suhva cóo contrato jeē nasáha rī jíin ñáyuu Israel, nde na quíji quiví yúcuan, áchí Jítóho yō Yaā Dios:

Sáha rī jeé jécūhun ley rī nuū jeé níjñúni i, te suni ini anuá i tee rī jñūhun ley rī.

Te cuu rī Yaā Dios maá i, te máá i cuu ñáyuu maá rí.

<sup>11</sup> Te tuá jíni ñúhún steén i nuū jnáhan i nuū ñáni i, návāha cuni i ndese Yaā cúu Jítóho i.

Chi ndíhi i cuni ndese Yaā cúu rī, nde ñáyuu núu ga jíin ndé ñáyuu cujéhnū ga.

<sup>12</sup> Chi cone cáhnu ní rī nuū i jeē ní casáha i jniñū néé, te ni ma núcūhun ga ní rī cuéchi ni casáha i.

Achí Yaā Dios. <sup>13</sup> Te jeē ni cáhān yā jeē cuáha ya ñn contrato jeé cúu jeē ní cachí yā jeē tuá cuajñiñū contrato xihna ñúhún. Te ñn jeē ní cutúhú jéé tuá jéjñiñū, chi jíni yō jeē je yajni naa.

*Vehe ñi ñayiví yáha ní steén ndese cáa andiví*

## 9

<sup>1</sup> Te ndaā chi contrato xihna ñúhún ní ndacu jniñu ndese chiñúhún i ya, jíin ndese coo iin vehe ií ini ñayivi yáha. <sup>2</sup> Te ni cuvaha vehe ií ún, te ni iyo uú cuarto. Te cuarto xihna ñúhún jéē naní cuarto ií, ni iin candelero oro jíin mesa oro jíin pan ií. <sup>3</sup> Te ni iyo sahma jeē ndíta caa jeē ndihyú inga cuarto jeē naní cuarto ií ndasí gá. <sup>4</sup> Te ini un ní iyo iin altar oro nuú cayú sje cútú, jíin yejnú jeē ñúhún contrato ley, te máni oro cúu ní síquī yejnú. Te ini yejnú un íne iin tijehēn oro jeē ñúhún maná jeē ní cuun andiví. Te suni íne vara Aarón jeē ní nane numa, jíin tabla yuú jeē yosó jnúhún contrato ley. <sup>5</sup> Te síquī yejnú un ní cahíin ndíndúú figura ndajéhé querubín jeē steén jeē íne Yaā Dios. Te ni sáha cuandahú síquī tapa yejnú nuú ní cosó yuyú níñi jeē ndáhva cuēchi. Te tu núne yó cáhān gá yó síquī táca yúcuān vijna.

<sup>6</sup> Te ná ni jínu táca ún, te núu-ni núu-ni quívicoo sutú ini cuarto xihna ñúhún jéē casáha de jniñu jeē cúu de sutú. <sup>7</sup> Te ini cuarto uú, chi tu cúu quívicoo na-ni sutú jíin inga ñayuu, chi máñúhún-ni sutú kujéhnú ga cúu jeē quívi, te suni iin-ni vuelta jeē cuiyá. Te suni ma cúu quívi de núu tú níñi quiti jeē socó de nuú Yaā Dios jeē síquī cuēchi máá de jíin síquī cuēchi ñayuu. <sup>8</sup> Te jíin yúcuān steén Espíritu Santo nuú yó jeē ná ni iyo ga cuarto ií xihna ñúhún ini ñayiví, te tu ní núne ichi jeē quívi ñayuu ini lugar ií ndasí jeē cúu andiví. <sup>9</sup> Chi táca yúcuān cúu jeē ní steén ndese cúu tiempo vijna. Chi jeē ní casocó i ndajniñu jíin quiti nuú Yaā Dios, chi tu ní cúu cuiti sáha jeē quéndōo ndoo ánuá ñayuu ní casocó ún. <sup>10</sup> Chi táca un ní steén máni síquī yiquí cúñu yó, ndese caji yó, ndese coho yó, ndese ndundoo yó. Te ni jejniñu máá-ni nde ni quiji Cristo jíin iin modo vāha ga.

<sup>11</sup> Chi vijna je ni quiji Cristo, te cúu ya sutú kujéhnú ga jeē ndiso jniñu ya síquī táca jéē vāha jeē ní quiji vijna. Te cúu ya sutú ini lugar ií nde andiví jéē kujéhnú ga te vāha ga vēsú cuarto ií jenahán. Te nasūu jéē ní casáha ñayuu cúu, chi nasūu cuenta ñayiví yáha cúu. <sup>12</sup> Te jeē ni quívi ya ini lugar ií ndasí gá nde andiví, te nasūu jíin níñi ndixúhú ni níñi becerro, chi jíin níñi maá yá ni quívi ya, ni socó yā iin jínu-ni jeē ní cáni. Te súcuān ni jnama ya yohó jéē cótecu yó ní cáni. <sup>13</sup> Chi nde jenahán te níñi stíquī jíin níñi ndixúhú jíin yāā becerro jeē ní cáyú nuú altar, ni cacosó yuyú de síquī ñayuu jeē tu iyo ndoo ánuá i, te súcuān ni ndundoo i nuú yā. <sup>14</sup> Te núu ni nihín jniñu níñi táca quiti ún, te nagā ní cuu níñi maá Cristo. Chi Yaā ndoo cúu ya, te ni socó yā maá yá nuú Yaā Dios, ni sáha Espíritu jeē iyó ní cáni. Te níñi yā nácate ánuá yó nuú jniñu néé jéē cúu yó sáha. Te súcuān te cuu cuajniñu yó nuú Yaā Dios, Yaā técu.

<sup>15</sup> Jeē yúcuān cúu jeē ndiso jniñu ya síquī iin contrato jeé. Chi ni jihí yā, te súcuān ni quende yā cuēchi ní casáha ñayuu ná ni iyo i chíji contrato xihna ñúhún. Te ñayuu jeē cána Yaā Dios i quívicoo i ndaha ya, nihín i tahú i jeé cóo ní cáni, nájñuhún ni jejniñuhún ya. <sup>16</sup> Chi cúu nájñuhún núu sáha iin téē acta jeé cahán síquī tahú, te nde na cúu de te nihín jniñu. <sup>17</sup> Chi núu técu gá téē ní sáha, te tu nihín jniñu. Te nde núu ni jihí de, te sáá te jéjniñu. <sup>18</sup> Te suni súcuān contrato xihna ñúhún, suni ni jini ñúhún cucutú jíin níñi quiti ní jihí. Te contrato jeé chi ni cucutú jíin níñi Cristo jeē ni jihí yā. <sup>19</sup> Chi ná ni cuu ni cachi Moisés táca jniñu ndácu contrato ley un núu ndivii ñayuu, te ní quihín de níñi becerro jíin níñi ndixúhú jíin ndute, te jíin íxi cácuéhé jíin yécú hisopo ní cosó yuyú de síquī libro ley jíin síquī ndivii ñayuu. <sup>20</sup> Te ni cahān de: Yāha cúu níñi jeé cúcutú contrato ley jeē ní sáha Yaā Dios jíin yó, achí de. <sup>21</sup> Te suni níñi un ní cosó yuyú de nde maá vehe ií jíin táca ndajniñu ni cajejniñu de jeé

cáchiñúhún de ya. <sup>22</sup> Te je yajni ndihí ndajníñu, chí cáhán ley un jeé jíní ñúhún ndundoo jíin níñi. Te núu ma cáti níñi te ma cóne cáhnu ní yā nuū cuéchi núu.

### *Jeé ní sócō Cristo maá yá jeé quénde yā cuéchi*

<sup>23</sup> Núu súcuan te tācá ndajníñu un jeé cácuu muestra tāca jéé iyó andiví, ní jíní ñúhún ndundoo jíin níñi quiti. Te tāca maá jéé iyó andiví, chí ní jíní ñúhún ndundoo jíin níñi Cristo jeé yóhoyo vāha ga. <sup>24</sup> Te Cristo chí tu ní quívi ya ini lugar ñi jeé ní casáha ñayuu, chí ñin muestra-ni ní cuu un jeé steén ndese iyó lugar ñi ndije nde andiví. Chí maá andiví ní quívi ya, te vijna íne ya nuū Yāā Dios jeé cáhán yā jehē yō. <sup>25</sup> Te maá sūtū cujéhnu ga quívi de tāca cuiyā ini cuarto ñi gā jeé sócō de níñi quiti. Te Cristo tu ní sócō yā maá yá cuehē jínu, chí ñin jínu-ni. <sup>26</sup> Chí núu jeé súcuan te cánuú jéé cuehē jínu ndoho ya nde ná ní jecōo ñayiví te nde vijna núu. Te tuú chí sa tiempo cuándihí yāhá ní quenda ndijín yā ñin jínu-ni jeé ní cáni, ní sócō yā maá yá jeé ní quende yā cuéchi. <sup>27</sup> Te nájnūhun ní cundaā jeé cúu tāca ñáyuu ñin jínu-ni, yūcuán na te sándaā Yāā Dios jniñu i, <sup>28</sup> suni súcuan Cristo ní jihí yā ñin jínu-ni jeé ní sócō yā maá yá jeé ní quende yā cuéchi cuehē ñayuu. Yūcuán na te ndiji ya inga jínu, te nasūu jéé sócō tucu ya maá yá jeé quénde yā cuéchi, chí sa suhva jeé jnáma ya ñayuu jeé cándetu i jeé ndíji ya.

## 10

<sup>1</sup> Chí ley Moisés ní cuu ñin muestra-ni tāca jéé vāha jeé ní quiji jíin Cristo, ñin jeé steén-ni ndese coo maá jéé vāha. Jeé yúcuan tu cúu cuiiti sáha ley un jéé quéndō ndaā ñayuu jeé quíjicoo i nuū Yāā Dios jeé cásocō i quiti nuū cuiyá nuū cuiyá. <sup>2</sup> Chí núu ní cúu sáha ley un jéé quéndōo ndaā i, te jecuiñi jeé cásocō i quiti núu. Chí núu ní cúu, te ñin jínu-ni te je ní quéndōo ndoo ánuá ñayuu cásocō ún, te ma yūhu gá anuá i jeé ní sáha i cuéchi núu. <sup>3</sup> Te tuú chí jeé cásocō i quiti ún tāca cuiyá, sa sáha jeé núcūhun ní i cuéchi i. <sup>4</sup> Chí níñi stíquē jíin níñi ndixúhú, ma cúu cuiiti quende cuéchi.

<sup>5</sup> Jeé yúcuan ná ní quiji Cristo ini ñayiví, te ní cahān yā jíin Yāā Dios: Jeé jéhni i quiti jíin jéé jéhe i ofrenda nuū ní, chí tu ní núnjahan ní ní. Te ní sātūhva ní yiqui cūñu maá ná jeé sócō ná.

<sup>6</sup> Te tu ní cúsñi ní ní jéé jéhmu i quiti te sócō i ti jeé ndúndoo cuéchi i núu.

<sup>7</sup> Yūcuán na te ní cahān ná: Yāha véji ná jéé squícu ná jniñu jeé núnjahan ní ní, Tātā Yāā Dios.

Chí súcuan je yósó jnūhun na nuū tútu.

Achí Jesús. <sup>8</sup> Xihna gā ní cahān yā jeé tu ní núnjahan ní Yāā Dios te tu ní cúsñi ní yā jeé jéhni i quiti te jéhe i ofrenda, jíin jéé jéhmu i ti te sócō i ti jeé ndúndoo cuéchi i núu, nájnūhun ndácu ley jengahán jniñu. <sup>9</sup> Te ní cahān gā yā: Yāha véji ná jéé squícu ná níñu jeé núnjahan ní ní, Tātā Yāā Dios. Te jeé ní cahān yā súcuan, te ní sáha ya jeé jecuiñi jeé cásocō i quiti, chí ní sócō yā maá yá. <sup>10</sup> Te ní sáha Yāā Dios jeé iyó ndoo iyó íi yō nuū yā siquí jeé ní sáha Jesucristo jeé núnjahan ní Yāā Dios, suu jeé ní sócō yā yiqui cúñu yā ñin jínu-ni jeé ní cáni.

<sup>11</sup> Te tāca sūtū ún ndiquiví ní cahān de ní cajejníñu de nuū yā, te cuehē jínu cájehni de suu quiti jeé sócō sócō de. Te tāca un chí ma cúu cuiiti quende cuéchi. <sup>12</sup> Te Cristo chí ñin jínu-ni jeé ní cáni ní sócō yā maá yá jeé siquí cuéchi yó. Te sáá te ní cucōo ya lado vāha Yāā Dios nuū cujéhnu ya. <sup>13</sup> Te yúcuan ndétu ya vijna nde quiji quiví jeé quénde yā poder tāca jéé jito uhū nuū yā. <sup>14</sup> Chí jeé ní sócō yā maá yá ñin jínu-ni, te ní sáha ya jeé ní cáni quéndōo ndaā ñayuu ní

sándoo ya. <sup>15</sup> Te máá Espíritu Santo suni cáji cáhán yā siquī jñuhun yáha, chi xīhna gā cahán yā:

<sup>16</sup> Suhva coo contrato jeē nasáha ri jín i, nde na quíji quivī yúcuan, áchi Jítoho yō Yaā Dios: Sáha ri jeē jécūhun ley rī iní anuá i, te suni nuū jeē nǎjnūni i tee ri jñuhun ley rī.

<sup>17</sup> Yūcuán na te cáhán gā yā:

Ma núcūhun cuiṭi gā ni rī tāca cuéchi jín jniñu neé ní casáha i.

Achí yá. <sup>18</sup> Núu súcuan te núu je ni ine cáhnu ni yā nuū cuéchi yó, te tuá cánuú jéé socó gā yō jeē siquí cuéchi yó.

### *Jeē ní nune ichi quívī yó núu Yaā Dios*

<sup>19</sup> Jeē yúcuan hermano, ma ñin jeē cáni ni yó, chi cuu quívī yó lugar ñ ndasí ndé nuū iyó Yaā Dios, siquī jeē ní jeti niñī Jesucristo. <sup>20</sup> Chi ní nune ya ñin ichi jéé jéé cótecu yō ní cáni sáha ya. Chi ná ni jihí yā te ni tahndé sahna ndíta caa jeē ndihyú lugar ñ ndasí gá iní vehe ñ. Te súcuan ni steén Yaā Dios jeē núne quívī yó lugar ñ ndasí gá nuū iyó yá. <sup>21</sup> Te Jesús cúu sutū cujéhu ndasí jeē ndíto yóhó ñayuu cácuu sēhe Yaā Dios. <sup>22</sup> Núu súcuan te na quívicoo yó núu Yaā Dios, te na cóo ndije ndaā anuá yō, te na cándíje niñin yó jéé iyó ndáa ndihi jñuhun ya. Chi jín niñī Cristo ni ndundoo ánuá yō nuū tāca cuéchi ní casáha yó, nájñuhun ni ndundoo yó núu yā jeē ní jendute yó jín ndute. <sup>23</sup> Te na cuiñi niñin yó jín jñuhun jeē cáhahán yō jeē ñuhun ni yō jeē sáha ya jeē váha jín yó. Te ma cáca yátá yó, chi váha squícu máá Yaā Dios jeē ní jéjñuhun ya nuū yó. <sup>24</sup> Te na nácani ni yō ndese stíhvī jñahan ni yō jeē cundáhú gá ni yō jñahan yó, jín jéé sáha yó jniñu váha. <sup>25</sup> Te níni na ndútútú yó chiñúhún yó yā, te ma cúhuun ni yō nájñuhun casáha sava i, chi sa víhyá gā na stíhvī jñahan ni yō, chi je cájini yō jeē cuácuyajni quivī ndíji ya.

<sup>26</sup> Te núu je ni jecūhun ni yō te ni jetáhú yó jñuhun ndaā, te núu máni sáha sáha-ni yó cuéchi, núu súcuan te tuá na inga iyó jéé cúu siquí cuéchi yó. <sup>27</sup> Chi sa quéndoo máni ga jñuhun xeēn siquí yō jeē quiji quiví juicio te quiji yáñuhún xeēn jeé cayú ñayuu jeē cájito uhū i ya. <sup>28</sup> Ñayuu squéhichí ley Moisés, te núu uū chí úní ñayuu cahán cuéchi siquí i, te cuu nahín i, te tuá na jñuhun cundáhú ni iyó. <sup>29</sup> Te nagā ni cuu jeē ma ndóho xeēn gā ñayuu jeē squéhichí i máá Séhe Yaā Dios, chi nájñuhun jeē jeñú níhnu i siquí yā. Te sáha i jeē tu ndé jéjñíñu niñī yā jeē ní jeti siquí contrato jeē ndúndoo i nuū yā nuú. Te súcuan sáha ndeváha i nuū máá Espíritu Yaā Dios jeē sáha jeē váha yóhó. <sup>30</sup> Chi je jín yó jeē ní cáhán máá yá: Máá rí sáha jeē ndutahū i siquí cuéchi i, máá rí cuáha castigo i, áchi Jítoho yó. Te suni cáhán: Máá Jítoho yó sándaā yā siquí cuéchi ñayuu yā. <sup>31</sup> Núu súcuan te xeēn ndasí cúu jeē quívī ñayuu iní ndaha Yaā Dios, Yaā técu, jeē ndútahū i siquí cuéchi i.

<sup>32</sup> Te na núcūhun ni rō ndese ni cuu ichi yátá, nde náa sá ní quejéé ró caca ró jín luz yā, te ni cajendeyí ni rō ni candoho ró tijni jñúndóho xeēn. <sup>33</sup> Chi sava ró ní cacahán neé i nuū rō te ni castóho i róhó ní cajito ñayuu. Te sava ga rō ni cajéhe ró jñuhun cuiñi ró jín ñayuu ni candoho súcuan. <sup>34</sup> Chi ní cacundáhú ni rō ñayuu ní cahíin vecáa jeē siquí yā, te ní cacusí ni rō vésú ní caquende ñayuu ndajniñu ró. Chi ní casáha ró cuenta jeē ndé andívī cáneváha ró ñin tahū jeē váha ndasí gá jeē coo ní cáni. <sup>35</sup> Núu súcuan te ma siaá rō jñuhun jeē ní cándíje ndije ró jéé váha ni yā, chi cuehē ndasí táhū niñin rō siquí ún. <sup>36</sup> Chi cánuú

jéé cuándeŷí ni rō návāha sáha ró jéé nújnahan ni Yaā Dios, te nihīn rō jeē ni jéjnūhun ya. <sup>37</sup> Chi cáhán tutu īi:

īn núnúu-ni te ndee Yaā ndiji, te ma cucuéé yá.

<sup>38</sup> Te ñayuu jeē ní ndahva ri cuēchi i, cotecu i jeē candíje i jeē sáha ri jehē i.

Te núu na cáca yátá i, te ma cúsi ni rī jīn i.

Achí Yaā Dios. <sup>39</sup> Te yóhó tu cácuu yó jnāhan ñayuu cájica yátá jeē jnahnú ndetū i. Chi sa cácandíje yó jéé nihín tahū yō cotecu anuá yō.

### *Siquī jnūhun cándíje*

## 11

<sup>1</sup> Te jeē candíje yó, suu cúu jeē cúndaā ndije ni yō jeē nihín yō táca jéé ñūhun ni yō, jīn jéé jīn vāha yó jéé iyó ndije táca jéé tu cájito yó núu vijna. <sup>2</sup> Te ñayuu jenahán chi ni jejnūhún yá i siquī jeē súcuan ni cacandíje nīhin i.

<sup>3</sup> Siquī jeē candíje yó cúu jeē jécūhun ni yō jeē ni sáha Yaā Dios ñayīvi jīn jnūhun ni cahān-ni ya. Te jīn poder Yaā Dios jeē tu jito yó núu, ni jecōo táca jéé jito yó núu.

<sup>4</sup> Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Cain. Te jeē yúcuan ní jejnūhún yá jeē iyó ndāā de, chi ni jetáhú yá jeē ní sócō de quiti nuū yā. Te vēsú ni jihī de, te cáhán gā ejemplo de jīn yó nde vijna, chi ni candíje ndaā de.

<sup>5</sup> Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihīn ñayuu de, chi ni ndoñūhún-ni de ni sáha ya. Te achí tutu jeē nde ná tu naquihin ya de te ni cusī ni yā jīn táca jéé ni sáha de. <sup>6</sup> Te núu tu cándíje yó jéé sáha ya jehē yō, te tú na modo cusī ni Yaā Dios jīn yó. Chi ñayuu jeē cuní quīvícoo ndaha ya, cánuu jéé candíje ndaā i jeē iyó yá jīn jéé cuáha ya tahū nuū ñayuu jeē nducú i candíje i ya.

<sup>7</sup> Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cácu de jīn ní vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

<sup>8</sup> Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jīn de jeē quihín de ĩn lugar nuū cuáha ya cuu tahū de. Te ni quenda de cuahān de, vēsú tu jīn de ndé nuū quihín de. <sup>9</sup> Ni candíje de jeē sáha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ñā, te suni súcuan Isaac jīn Jacob, chi sēhe de ún suni ĩnuu nihīn tahū i jīn de jeē ni jéjnūhun ya. <sup>10</sup> Chi ni ñūhun ni de condee de máá ĩnuu andiví jéé iyó cutú cimientu, te máá Yaā Dios ni jequin yā ni sama ya ĩnuu ún.

<sup>11</sup> Te suni ni candíje máá Sara jeē sáha ya jehē ñā, te jeē yúcuan ní nihīn ñā fuerza jeē ní jecūhun sēhe ñā. Chi nde ná ni yāha ndasí cuiyā ñā, te ni cacu ĩn sēhe yī ñā, chi ni candíje ñā jeē squícu Yaā Dios jeē ni jéjnūhun ya. <sup>12</sup> Te súcuan ni cuu jeē ni táhú cuehē ñayuu ní sáha ĩn-ni Abraham, vēsú je jéhnū ndasí de. Te yucūn de ni nducuehē ndasí, nájnūhun quīmi andiví, jīn ñiti yumar, jeē ma cúu cuiiti cahu yó.

<sup>13</sup> Te táca téé cándíje un, ní cajihī de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusī ni de jeē cóto de inga tiempo. Te súcuan ni cacahān de jeē ñayuu ĩnuu jicá ñayuu tatú cácuu de ini ñayīvi yáha. <sup>14</sup> Te táca

tée jeē cahán súcuan, chi stéén cají de jeē nducú de ñn ñuu jeē cúu andiví núū cúu ñuu maá de. <sup>15</sup> Chi núu jeē cánacani ni de siquī ñúū nuū ní quendacoo de, te iyó modo jeē nándicó cóo de te núu jeē cáculi de núú. <sup>16</sup> Te tuú chi ni cacuu ndasí ni de coyúcú de inga ñuu váha ga jeē cúu ñuu andiví. Jeē yúcuan tu cúcanu Yaā Dios jeē nani yá Yaā Dios de jíjnáhan de, chi je ni sátúhva ya ñn ñuu nuū cóyúcú de.

<sup>17</sup> Ni candíje Abraham jeē sáha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni Iyo túhva de jeē socó de sēhe de un jéē mañúhún ni i nuū de, vésú ni nihīn de jñūhun jeē ní jéjnūhun ya suhva siquī i: <sup>18</sup> Isaac cúu tēe jeē squejéé rí yucūn rō quihīn, achí jñūhun ní jejnūhun ya. <sup>19</sup> Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chí cuu cahān yō jeē nájnūhun ni jihī i te ni natecu i nuū de, chí ni jesi- ni ya jeē ma cáhni de i.

<sup>20</sup> Ni candíje Isaac jeē sáha ya jehē de, te jeē yúcuan ní cahān de jeē váha tahū nihīn sēhe de Jacob jíin Esaú tiempo quiiji. <sup>21</sup> Te suni súcuan ni candíje Jacob, te jeē yúcuan, náa je yajni cuu de te ni cahān de jeē váha tahū nihīn ndindúú sēhe yíí José. Te yítuu de vara de, ni chiñúhún de Yaā Dios. <sup>22</sup> Te suni súcuan ni candíje José, te jeē yúcuan, náa cuacuyajni cuu de, te ni cahān de jeē táca yúcūn Israel, ñn quiví quendacoo i nacióon Egipto. Te ni ndacu de jniñu jeē chíndūji i yiqui de ñuu nuū quívicoo i.

<sup>23</sup> Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i unī yoō. Chi ni cajito de jeē lúu cáa i, te tu ní cáyühú de siquī acta jeē ni sáha rey jeē na cúu táca súchi yíí. <sup>24</sup> Te suni súcuan ni candíje Moisés, te jeē yúcuan ná ni jehnu de te tuá ni jéhe de jñūhun cuu de sēhe ñahan cúu sēhe síhí rey Egipto. <sup>25</sup> Chi sa ni cuu ni de ndoho de jíin táca jnánhan de ñayuu Yaā Dios, nasūu jéé cusí ni de jecu- ni tiempo jíin cuéchi. <sup>26</sup> Chi ni sáha de cuenta jeē núu cahān neé ñayuu siquī de jeē siquī Cristo, te yúcuan sáha jeē cucá ndasí gá de ndihi jeē ndiso jñūhun Yaā Dios, vésú jeē nihīn de ndihi ndajniñu cúca iyó nacióon Egipto. Chi ni ñuhun ni de jeē cuáha ya tahū de. <sup>27</sup> Te jeē súcuan ni candíje de, jeē yúcuan ní quenda de nacióon Egipto cuahān de. Te tu ní yúhú de jeē quití ni rey nuū de. Chi ni iin nihin de siquī jniñu sáha de, chí ni sáha de cuenta jeē je jito de nuū Yaā jeē tu cúu coto yó núu vijna.

<sup>28</sup> Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñí tī yehyí i, návaha núu na quíji ndajehé jeē cáhni yā táca sēhe nuú ñayuu Egipto, te ma cáhni yā sēhe nuú ñayuu Israel. <sup>29</sup> Te siquī jeē ní cacandíje ñayuu Israel jeē sáha ya jehē i, te ni cayāha- ni i mehñu Mar Rojo, chí ni nune ya te ni natūu- ni ñuhun íchi. Te suni súcuan ni cacuni tēe Egipto yāha de núú, te ni nandihyū- ni ndute siquī de ni cajihí de.

<sup>30</sup> Ni cacandíje soldado jeē sáha ya jehē de, te jeē yúcuan ní cotúú jeē ní condúu ndihyú ñuu Jericó, ná ni cajicó ndúú de uxā quiví. <sup>31</sup> Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñahán ña tēe Israel jeē ní quijicoo ni condéhé yuhu ndese iyó ñuu ña. Te jeē yúcuan tu ní jihí ña jíin ñayuu nihni ni ñuu ña ún.

<sup>32</sup> ;Te ndé jñūhun ga cahān rī núu súcuan? Chi tuá na tiempo jeē nácani ga rī jñūhun Gedeón jíin Barac jíin Sansón jíin Jefe jíin David jíin Samuel jíin táca tēe ni canecani jñūhun ya nde jenahán. <sup>33</sup> Ni cacandíje de jeē sáha ya jehē de jíjnáhan de, te jeē yúcuan ní cacundeyí de ni canajni de táca ñuu náhnu, te váha ni candacu de jniñu nuū, te ni chindéé ñahán yá de nájnūhun ni jejnūhun ya.

Te nuū sava de ni jesi Yaā Dios yuhu ndícaha jeē tu ní cáyeji tī de. <sup>34</sup> Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihūn ni de náa tuá fuerza de núú, te ndacuí teyí ní Iyo de nuū guerra, te ni cacundeyí de siquī soldado tācā ñuu jicá jéē jíto uhū ún de. <sup>35</sup> Te sava ñahan ni natecu sēhe ña jeē ni jíhí i.

Te sava ga ñayuu chí sa suhva ni candoho xeēn i nde ni cajihí i. Te tu ní cájēhe i jnūhun jeē siaá i jnūhun ya te cācu i, chí ni catee ni i jeē natecu i coyūcu váha ga i andiví. <sup>36</sup> Te sava ga i ni casácatā ñayuu nuū i, te ni cacani ñayuu i, te nde ni caconuhñi cadena i ni cahīin i vecāa. <sup>37</sup> Te ni cajēhe yuū xinī i, te ni cajehnde i jíin sierra, te ni cajito ndee i jíin jnūndóho, te ni cajehni i jíin espada. Ní cajica cuu i cháha chúcuan, te máá ññ lánchi máá ññ ndíxuhú ní cañuhun i. Ni candoho ndáhú i, ni cajito i jnūndóho, ni castóho ñayuu i. <sup>38</sup> Váha ndasí ñayuu ni cacuu i jeē tú cuiti ñayuu ñayiví súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīin i yaū cava jíin yáú ñuhun. <sup>39</sup> Te tāca ñayuu yáha, vēsú ni jejnūhún yá i jeē ní cacandíje nihin i jeē sáha ya jehē i, te tu ní cájito i nuū jeē ni jejnūhun ya. <sup>40</sup> Chí ni sátūhva Yaā Dios ññ jniñu váha ga, te suu cúu jeē sáha Cristo jíin yó, návaha ññ cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndihí tahū i.

*Jeē na cócunuū yō nuū maá ññ-ni Jesús*

## 12

<sup>1</sup> Te íyó cuéhē ndasí ñayuu un jéē ní cacandíje nihin i jeē sáha ya jehē i, te nájñuhun ni jicó ndúú i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnēñu jíin cuéchi jeē ní cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. <sup>2</sup> Te na cócunuū váha yó Jesús, Yaā jeē ni scándíje yóhó te sáha ya jeē íje váha yó jíin jnūhun ya nde jinu íje yó. Chí máá yá ni jendeyí ni yā ni ndoho ya jicā cruz. Te vēsú jnūhun canu cúu jeē súcuan cuu yā, te tu ní sáha ya cuenta. Chí ni ñuhun ni yā jeē sa cusñ ndasí ni yā ná ni cuu ni ndoho ya. Yūcuán na te ni cucóo ya lado váha mesa nuū ndácu Yaā Dios jniñu.

<sup>3</sup> Te na nácani ni rō ndese ni jendeyí ni yā ni ndoho ya jeē ni sáha ndeváha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnūndóho. <sup>4</sup> Chí ni ná tu ndoho ró jéē ndé cuu rō jeē cánducú ndeyí ró snáā rō cuéchi. <sup>5</sup> Te sanaa te je ni canaa ni rō jnūhun cáhán tutu ññ, jeē stihví ni Yaā Dios rohó jéē cácuu ró sēhe ya:

Séhē, ma quití ni rō jeē snahnú Jitoho yō rohó,

te ni ma ndínuu ni rō núu cáhán yā nuū rō.

<sup>6</sup> Chí Jitoho yō snahnú yā ñayuu jeē maní yā jíin,

te jéhe ya castigo tāca jéē náquihin ya cuu sēhe ya.

Achí tutu. <sup>7</sup> Núu súcuan te na cuándeyí ni rō jeē snahnú Yaā Dios rohó, chí sáha ya jíin ró nájñuhun sáha tátá jíin sēhe. Chí tú na sēhe íyó jéē tu snahnú tátá i. <sup>8</sup> Te núu ma snahnú yā rohó, nájñuhun ndóho tāca sēhe, núu súcuan te nájñuhun sēhe ndáhú cácuu ró, nasūu sēhe ndije ya. <sup>9</sup> Te tátá yō ñayiví yáha, suni ni snahnú de yóhó, te ni Iyo yññuhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō níí cáni.

<sup>10</sup> Te ndaā chí máá de ni casnahnú de yóhó jecu-ni quiví, ndese ni cuu ni maá de. Te máá yá chí snahnú yā yohó ññ modo jeē quéndōo váha ga yō, návaha coo ndoo yó nájñuhun íyó ndoo máá yá. <sup>11</sup> Te ndaā chí tu cácusñ ni yō maá



hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ni quendōo ndaā yō te coo ndeyí s# ni yō jeē ni snáhnú yā yohó.

### *Siquí ñáyuu jeē casquéhichí i jnūhun cáhán Yaā Dios*

<sup>12</sup> Núu súcuan te ma cóo ró nájñūhun tēe ni cuíta lí ndaha te quísi i xiní yítí, chi sa ndacuí na sáha ró máá ró nuū jnúndóho. <sup>13</sup> Te sáha ró ichi ndóo caca ndaā ró, návaha nduváha róhó jéé tu fuerza ini, jeē cácuu ró nájñūhun tēe chácuá jeē tu cúu caca vāha.

<sup>14</sup> Te na cóndihvī ni rō jeē condee manī rō jíin táca ñáyuu, jíin jéé cóo ndoo coo iī rō nuū yā. Chi ma cúu coto ni #n ñáyuu nuū maá Jítoho yō te núu tu íyo ndoo i. <sup>15</sup> Te coto má cáca yátá ni #n ró te scuíta ró jnúhun jeē sáha Yaā Dios jeē váha róhó, návaha tú cuu ró nájñūhun #n yucū uvuá jeē stívi te sáha dañó jíin cuéhē ñáyuu. <sup>16</sup> Te ni #n ró ma cáca jnéni. Te ni ma cóo jéé ni rō nuū Yaā Dios, nájñūhun ni Iyo Esaú. Chi máá #n cohō ndeyu ni jicān de nuū ñáni de, ni sama de jíin derecho de jeē cúu de sūchi núu, te súcuan ni xicó de derecho de. <sup>17</sup> Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chi tuá ni táñúhún Yaā Dios de. Chi tu ní nihīn jniñu jeē ní nacani ni de, vésú ni nducú ndéyí de te nde ndahyú de.

<sup>18</sup> Te róhó jíináhan ró tu ní quíjicoo ró núu íyo cúu, nájñūhun íyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jíto, te quée tachī xeén. <sup>19</sup> Te ni jecu trompeta, te ni cahān Yaā Dios. Te ñáyuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. <sup>20</sup> Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vésú #n quítí-ni núu quívi ti yucu yáha, jíni ñúhún cuu tī jíin yúu chí jíin lanza, achí yá. <sup>21</sup> Te siquí jeē íyo ndasí cúu jeē cájito i ún, te ni cahān Moisés: Quísi i ruhú jeē yuhú rí, achí de.

<sup>22</sup> Te vijna róhó jéé cácandíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeé iyó andívi, nuū cáhíyo tútú cuéhē ndasí mil ndajéhe cáchiñúhún Yaā Dios. <sup>23</sup> Te ni quívicoo ró núu cáyūcu tútú ñáyuu cácandíje jeé cácuu sēhe Yaā Dios, jeé iyó lista i andívi. Te ni quívicoo ró núu Yaā Dios, Yaā sándaā jniñu ndihi ñáyuu, jíin núu cáhíyo ánuá ñáyuu vāha jeé jé ni squéndōo ndaā yā i. <sup>24</sup> Te suni nuū maá Jesús, Yaā ndíso jniñu siquí contrato jeé ní quívicoo ró. Te yahu ndasí gá jniñu sáha niñi yā jeé ni jéti jeé ndáhva cuēchi yó, nasūu níñi Abel jeé ní jicān cuēchi.

<sup>25</sup> Núu súcuan te coto má squéhichí rō jnūhun jeē cahán yā jíin ró jíináhan ró. Chi ñáyuu jeē tu ní cájetáhú ná ni cahān yā jíin i ñayívi yáha, tu ní cáca cu i. Te xeén gā ndoho yóhó te núu ma cuatáhú yó nuū yā jeé cahán yā nde ichi andívi núu súcuan. <sup>26</sup> Te nde saá ní quísi i ñayívi jéé ni cahān yā. Te vijna chi cáhán yā: #n na jínu quísi ri ñayívi, te nasūu máá-ni ñayívi, chi suni táca jéé íin andívi, achí yá. <sup>27</sup> Te jnūhun yáha jéé cahán, #n na jínu, chi cúní cahān jeé téjiyo ya táca jéé tu íyo cutú, suu jeé ní cuvāha, návaha na quéndōo jeé cóo cutú ní cáni. <sup>28</sup> Núu súcuan te cuāha Yaā Dios #n ñuu nuū yō jeé cóo cutú ní cáni. Te jeé yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návaha cusí ni yā jíin yó. <sup>29</sup> Chi Yaā Dios maá yó cúu nájñūhun #n ñuhūn jeé snáā ndihi jeé neé.

*Ndese sáha yó te cusí ni Yaā Dios*



## 13

<sup>1</sup> Ma jécuiñi rō jijnáhan ró jéē cundáhú ni rō hermano rō cácanđije. <sup>2</sup> Conahán ró jeē cánú cuáha núu ró vehe nuū ñayuu cájica. Chi iyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andiví ni cajēhe núu i vehe.

<sup>3</sup> Te conahán ró chindéé ñáhán ró ñayuu cáhīin vecāa, chi sáha ró cuenta jeē nájñuhun cáhīin cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñayuu, chi núu súcuan coo jíin máá ró te suni ndoho ró.

<sup>4</sup> Coo yíñúhún ró síquí jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñayuu casíquí ndéē jnáhan.

<sup>5</sup> Te ma ndíyo ni rō xúhún, chi na cóo sīi ni rō jíin jéē cánevāha ró. Chi máá yá ni cahān: Ma siaá cuíti rī rohó, ni ma stóo cuíti rī rohó, áchi yá. <sup>6</sup> Núu súcuan te ma ĩn jeē cáni ni yō, chi cuu cahān yō:

Máá Jítóho rī chindéé ñáhán yá ruhū,

te ma yūhu rí núu na vé cuní ñayuu sáha i jíin rí.

Achi yō.

<sup>7</sup> Te na núcūhun ni rō táca pastor rō, jeē ní castéén de jnúhun Yaā Dios nuū rō. Te sáha vāha ro cuenta ndese ni nihīn jniñu jeē ní casáha de, te na ndácu ró de jeē ní cacandije de jeē sáha ya jehē de.

<sup>8</sup> Te Jesucristo chi ĩn-ni cáa ya ichi yátá jíin vijna jíin ní cáni. <sup>9</sup> Núu súcuan te ma cuáha ró jnúhun candije ró táca jnúhun jeē sín cáhán jeē tu quíjnáhan jíin jnúhun máá yá. Chi iyó vāha jeē na ĩje ánuá yō sáha jnúhun jeē vāha ni yā jíin yó. Te tu jíni ñúhún yó jnúhun jeē tajnúni síquí jeē yéji yō, chi tu nihīn jniñu cuíti jíin ñayuu cáhīin jíin.

<sup>10</sup> Te máá yó chi cánevāha yó ĩn jeē ní sócō máá jéhē yō, cúu Cristo. Te táca sūtú jeē cásocō gā de modo jeē cahán ley jenahán, tú na vé nihīn de nuū yā jeē ní sócō yā máá yá. <sup>11</sup> Te sutú cujéhnú ga, ná ni sócō de ñiñi táca quiti ini cuarto ĩ gā jeē síquí cuēchi, te yiqui cúñu tī ni cajehmu de ichi yátá ĩnu. <sup>12</sup> Te suni súcuan ni ndoho máá Jesús ichi yátá ĩnu, návāha jíin níñi máá yá te sándoo ya ñayuu. <sup>13</sup> Núu súcuan te ma cóo inuú gá ni yō jíin ñayuu tu cacandije, chi nájñuhun quihīn yō jíin yá ichi yátá ĩnu, te na ndóho yó jíin yá jeē sácatā i. <sup>14</sup> Chi ñayiví yáha tu iyó ĩnu nuū coo yó ní cáni, chi sa cánducú yó máá ĩnu nuū cóyūcu yó quiví quíji. <sup>15</sup> Núu súcuan te jeē jíin Jesucristo te níni na cáhán yō jeē yóhoyo cújéhnú Yaā Dios, chi suu cúu nájñuhun ĩn jeē sócō yō nuū yā, suu jeē nácuatáhú yó nuū yā. <sup>16</sup> Te ma náā ni rō sáha vāha ró núu jnáhan ró, te cuáha ró jéē cúmanī nuū i. Chi nájñuhun ĩn jeē cásocō rō nuū Yaā Dios cúu táca jéē yáha, te cúsi ni yā jíin.

<sup>17</sup> Te cuandije rō núu tēe cácuu pastor rō, te cuandetū rō nuū de. Chi cándito de róho jéē quéndoo vāha ánuá rō, chi cájini de jeē cánú nacuāha de cuenta nuū yā. Te condihvī ni rō sáha vāha ró, návāha cusīi ni de síquí rō te ma cucuíhyá ni de síquí rō. Chi núu tu súcuan te ma cóo jeē vāha jíin ró.

<sup>18</sup> Te cacán tahú rō jehē rī jijnáhan rī. Chi vāha iyó ni anuá rī jeē tú na cuēchi rī. Chi cácuni rī caca yíñúhún rī jíin táca jniñu. <sup>19</sup> Te suni cáhán ndahú rī jíin ró jeē cacán tahū ndasí ró jehē máá rí, návāha cuáha ya jnúhun jeē yachí gā cuajeē tucu rī nuū rō.

*Bendición jíin saludo jeē sándihí*

<sup>20</sup> Te máa Yaā jeē jéhe jnūhun ndeyí sī ni nuū yō, ni nastécu yā Jitoho yō Jesucristo mēhñu ndíyí. Te Jesús cúu pastor kujéhu jeē ndíto ñayuu cácuu nájñūhun lanchi ya. Chì jíín níñī yā ní sácutú yá contrato jeé yá jeē coo níí cáni. <sup>21</sup> Te ñúhun ni rī jeē Yaā Dios na sáha ya jeē ije ni rō jijnáhan ró, návaha cuu sáha ró táca jniñu váha ndese nújnahan ni yā. Te ñúhun ni rī jeē jíín fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúshī ni yā jíín. Te na cáhán yō jeē yóhyo luu cújéhu ya níí cáni. Amén.

<sup>22</sup> Hermano jijnáhan ró, cáhán ndahú rí jíín ró jeē cone cáhnu ni rō jeē stihví ni rī rohó jíín jecu-ni jnūhun ni tee ri nuū carta yáha. <sup>23</sup> Te cástūhun rí jeē hermano yō Timoteo, je ni quenda de vecāa. Te núu yachí quiji de yáhá, te cuajecoo ndíndúú rí nuū rō coto jnáhan yó.

<sup>24</sup> Te cahān rō jíín táca téé cácuu pastor rō jíín táca hermano cácanđe jeē sándeýí ni de, áchí rí. Te ñayuu Italia suni cácahān i jeē sándeýí ni rō.

<sup>25</sup> Te ñúhun ni rī jeē na sáha ga Yaā Dios jeē váha róhó jíijnáhan ró. Súcuan na cóo. Amén.

## CARTA JEE NI TEE SANTIAGO NUU ÑAYUU CACANDIJE

<sup>1</sup> Máá rí cúu Santiago, mozo Yaā Dios jiin Jítoho yō Jesucristo. Te tée ri carta yáha cujájeē nuū rohó ñáyuu cacandíje jeē cácuu ró ndihúxí uū yucūn Israel, te ni cajitē núu ró ní ñáyiví. Sándeýí ni rō jijnáhan rō.

### *Yaā Dios sáha jeē jécūhun ni yō*

<sup>2</sup> Ñánī mánī, na cúsiñ ndasí ni rō jijnáhan rō núu quiji tijni táca jnūdóho siquī rō. <sup>3</sup> Chi cájini rō jeē núu jito ndee jnūdóho róhó núu cacandíje váha rō, te yūcuan sáha jeē cútūhva ró cuándeyí ni rō. <sup>4</sup> Te na cuándeyí ni rō nde ije váha ró jíin, náváha cuu sáha ró ndihi jniñu váha, te ma cúmanī jeē squícu váha ró núu yā.

<sup>5</sup> Te núu ndé ñin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i. <sup>6</sup> Te jeē jicán rō, te cánuu candíje ró jée sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jíso cóyo cuahān cháha chúcuan sáha tachí. <sup>7</sup> Ñayuu ún ma cáni ni i jeē sáha Jítoho yō jeē jicán i. <sup>8</sup> Chi ñayuu jeē jéni ñin jéni uū ni, chi mánī násāma ni i jíin táca jniñu cásáha i.

<sup>9</sup> Tācá hermano ndahú, na cúsiñ ni de jeē sáha Yaā Dios jeē cujéhu de. <sup>10</sup> Te hermano cucá, na cúsiñ ni de núu ni ndundáhú de. Chi táca tée cucá, yachi naa jeē cucá de, nájnūhun náā ita yucū. <sup>11</sup> Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho táca tée cucá níni sá jicu de jíin jniñu de.

### *Siquí jeē jito ndee jnūdóho yóhó*

<sup>12</sup> Yóhoy ndetū tēe jeē jéndeýí ni de núu jito ndee jnūdóho de. Chi núu je ni cundeyí de jíin, te niñin de premio jeē cujéhu de cotecu de ní cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. <sup>13</sup> Núu ñin ñayuu jicán ini i jeē sáha i cuēchi, te ma cáni ni i jeē nuū Yaā Dios véji jeē jicán sáha i cuēchi. Chi ni ñin ma cúu cuiti sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuēchi. <sup>14</sup> Chi sa suhva jeē ndíyo néé ni maá i, suu sáha jeē jicán ini i sáha i cuēchi, te scānda ini i chi stáhú un i. <sup>15</sup> Te jeē ndíyo néé ni i, yūcuan quejéé cuēchi. Te cuēchi ún, núu je ni cuniñin, te sáha jeē jnahnú ndetū ñayuu. <sup>16</sup> Núu súcuan te ma stívi ró cani ni rō jijnáhan rō, ñánī mánī.

<sup>17</sup> Táca jée cútahū yō jeē váha jeē lúu íyó, chi véji nde andiví núu maá Yaā Dios, Yaā ni sáha táca jée ndíndee ín andiví. Te máá yá tu násāma cuiti ini yā nájnūhun násāma nduva jíin cuándahū. <sup>18</sup> Te ni sáha ya jeē cótecu yō ní cáni, chi ni candíje yó jnúhun ndaā yā. Te ni nduu yó nájnūhun sēhe nuú yá nuū táca gá sēhe ya jeē quiji, chi súcuan ni nujnahan ni yā sáha ya.

### *Siquí ndese chiñúhún ndāā yō yā*

<sup>19</sup> Núu súcuan te táca róhó ñánī mánī, ñama na chúsohó ró jnúhun ya, te sa suhva ma cahán yachí rō, ni ma quití yachí ni rō. <sup>20</sup> Chi ñayuu cáquití ni, tu sáha i jniñu ndaā jeē cuní Yaā Dios. <sup>21</sup> Núu súcuan te na siáá rō táca jniñu jnéhén jíin jniñu néé jée ni cáyā jíin ró. Te na cóo vítá ni rō te cuatáhú ró jnúhun ya jeē ni quívi ini anuá rō. Chi jnúhun un ndiso poder jeē cácu ánuá rō.

<sup>22</sup> Te na squícu ró jée steén jñuhun ún, te nasūu máá jée cúni sōho ró súcuan-ni, chí núu súcuan te cástáhú ró maá ró, chí tu nihín jñiñu núu tu squícu ró. <sup>23</sup> Chí tēe jeē jini sōho de jñuhun ya súcuan-ni, te tu squícu de, cúu de nájñuhun ñn tēe jeē jito de nuū espejo ndese cáa nuū de. <sup>24</sup> Te jito váha de nuū de, te cuahān-ni de, te nāá ni de ndese cáa nuū de. <sup>25</sup> Te núu ñn tēe tu nāá ni de jñuhun jini sōho de, chí sa suhva chúhun váha ni de jeē cahán maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jniñu váha jeē sáha de.

<sup>26</sup> Te núu ndé ñn ró jéni ni rō jeē chiñúhún váha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā. <sup>27</sup> Ñayuu jeē chiñúhún ndoo chiñúhún ndáa i máá Tátá yō Yaā Dios, chí jniñu yáha sáha i: Chíndée ñhán i sūchi ní caquendōo ndáhú jíin ñahan ní caquendōo ndáhú, núu na-ni jñúndóho íyó. Te tu sájnéhén i ánuá i jíin jniñu neé íyó ñáyiví.

*Ma cúhichí ni yō coto yó ñayuu ndahú*

## 2

<sup>1</sup> Ñánī mánī, cá candíje ró Jítoho yō Jesucristo jeē cujéñnu luu ya. Núu súcuan te ma sáha ró cuenta ndese cúu ñn ñn ñayuu, chí inuú sáha ró jíin ndihí i. <sup>2</sup> Chí íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñuhun de sahma váha. Te suni íyó jínu quívi ñn tēe ndáhú, te ñuhun de sahma tahndé. <sup>3</sup> Te tú váha núu sáha yíñúhún ró jíin tēe ñuhun sahma váha, te cahān rō jíin de: Cucōo ní lugar váha yāhá. Te cahān rō jíin tēe ndáhú: Yūcuán cuiñi ní, chí yáha cucōo ní nuū ñuhun, achi rō. <sup>4</sup> Chí núu cásáha ró súcuan, te tu jéni váha ni rō síquī jñahan ró, chí sñn sáha ró jíin tēe cúcá jíin tēe ndáhú.

<sup>5</sup> Ñánī mánī, chusóhó ró jñuhun cáhán rī: Yaā Dios ni nacāji ya ñayuu ndahú ini ñáyiví yáha jée cóo cúcá i jíin jñuhun cá candíje i ya, te nihín i tahū i ñuu nuū ndácu ya jniñu. Chí ni jejnñuhun ya cuāha ya un núu ñayuu jeē maní jíin yá. <sup>6</sup> Te máá ró chí sa suhva cájēhe ró jñuhun canu ñayuu ndahú. ¿Te á násūu tēe cúcá cúu jeē cástáhú róhó síquī jeē nihín de xūhun ró, te yachí jéquin de cuēchi síquī rō nuū tohó? <sup>7</sup> Te suni cácahān neé de síquī Cristo, te suu síhví máá yá cúu jeē cánaní ró cristiano.

<sup>8</sup> Váha cásáha ró te núu cásquícu ndije ró máá jñuhun jéñnu ga jeē cahán ley, nájñuhun yósó núu tútu íi: Cundáhú ni rō jñahan ró nájñuhun cundáhú ni rō maá ró, achi. <sup>9</sup> Te núu sñn sáha ró jíin ñáyuu cucá jíin ñáyuu ndahú, núu súcuan te cuēchi cásáha ró, te jécondee cuēchi síquī rō jeē stívi ró ley Yaā Dios. <sup>10</sup> Chí núu ñn ñayuu stívi i ñn-ni jniñu ndácu ley, te vésú na squícu i ndihí ga, te nájñuhun ni stívi i ndihí ley, te ndihí un jécondee cuēchi síquī i. <sup>11</sup> Chí Yaā jeē ni cáhān jeē ma cósíquī ndéē jñahan ró, suni ni cahān yā jeē ma cáhni ró ndíyi. Te vésú tu ní cásíquī ndéē jñahan ró, te núu ni jehni rō ndíyi, núu súcuan te je ni stívi ndihí ró ley. <sup>12</sup> Te táca jée cahán rō jíin jée sáha ró, chí sáha ró cuenta jeē sándaā yā ndihí un jíin máá ley Jesús jeē ni sáha libre rohó. <sup>13</sup> Chí quívi sándaā yā jniñu, te ñayuu jeē tu ní cundáhú ni jñahan, suni ma nihín i jñuhun cundáhú ni. Te ñayuu ni cundáhú ni jñahan, cusñ ni i jeē ní ndahva yā cuēchi i máá quívi sándaā yā jniñu.

*Tu jéjñiñu jeē candíje yó núu tu squícu yó*

<sup>14</sup> Ñánī mánī, núu cáhān ñn tēe jeē candíje de jeē sáha ya jehē de, te núu tu sáha de jniñu váha, ¿te ndé jéjñiñu jeē candíje de ún? ¿A cuu cácu ánuá de

jín jéē cahán-ni de jeē candíje de, te núu tu sáha de jniñu váha? <sup>15</sup> Te núu ñin hermano yō chí hermana yō, cúmanī sahma i jín jéē cáji i tāca quívi, <sup>16</sup> te núu ñin ró cáhán jín i: Cuandeyí ni rō, te cusúcún váha ró te caji váha ró, achi rō jín i, te núu tu ní jéhe ro jéē jíní ñuhún i cotecu i, ¿te ndé jéjníñu jeē cahán rō súcuan? <sup>17</sup> Te suni súcuan cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuiti jeē cahán-ni ró jeē candíje ró.

<sup>18</sup> Te sanaa te cahán ñin ñayuu: Róhó chi cándíje ró jéē sáha ya jehē rō, te ruhū chi sáha ri jniñu váha. ¿Na jín stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī. <sup>19</sup> Ndaā chi cándíje ró jeē iyó ñin-ni Yaā Dios. Te va iyó váha núu súcuan. Te tachī chi suni súcuan cácandíje, te cáquisi i jeē cáyūhú, chi tu cásáha jniñu váha. <sup>20</sup> ¿Te naun tu jécūhun ni rō? ¿A tu jíní rō jeē núu tu sáha ró jniñu váha, te tu ndé jéjníñu cuiti jeē cahán rō jeē candíje ró? <sup>21</sup> Te jíi yō Abraham, ni ndahva yā cuēchi de siquī jeē ni sáha de jniñu váha. Chi ni jetáhú de jeē ni cáhán yā jeē cahni de sēhe de Isaac socó de i nuū altar. <sup>22</sup> Te jécūhun ni rō jeē siquī jeē ní candíje de jeē sáha ya jeē ni jéjñūhun ya nuū de, jeē yúcuan ní jetáhú de jeē ni cáhán yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjñūhun ya nuū de. <sup>23</sup> Te súcuan ni cundaā jñūhun cáhán tutu ñi: Abraham ni candíje de jeē ni jéjñūhun ya nuū de, te jeē yúcuan ni ndahva yā cuēchi de, áchí tutu. Te ni conaní de amigo Yaā Dios.

<sup>24</sup> Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cácandíje i jeē sáha ya jehē i, te nasūu máá jéē cahán-ni i jeē candíje i. <sup>25</sup> Te suni súcuan Rahab, vēsú ñahan tǐjni ni ni cuu ña xīhna gā, te ni ndahva yā cuēchi ña siquī jeē ni sáha ña jniñu váha. Chi ni jéhe núu ña vehe nuū tāca mozo ni tají Josué, te ni chuhichí ña de inga ichi, návāha cácu de nuū téé cánducú cahni de. Te jeē yúcuan ní ndahva Yaā Dios cuēchi ña. <sup>26</sup> Te ñin ñayuu núu tuá anuá i nuū yiqui cúñu i, te ndíyí cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájnūhun ndíyí cúu yó.

### *Jñūhun siquī yaá yó*

## 3

<sup>1</sup> Nání mání, ma cáni ni cuehē rō cuu ró maestro steén jñūhun ya. Chi cájini rō jeē yóhó jéē steén jñūhun, cuehē gā cuēchi ndenehen ya siquī yō. <sup>2</sup> Chi ndíhi yó stívi cuehē jniñu. Te núu ñin tēe cuu condito de yáa de jeē ma stívi de jín ni ñin jeē cahán de, núu súcuan te yóhoy váha tēe cúu de, te suni cuu condito de ñin gá de jeē ma stívi de. <sup>3</sup> Chi cúu nájnūhun jeē chíhi yó freno yuhu caballo, te súcuan snáhnú yō ní tǐ jeē quihín tǐ jín yó ndé nuū cuní yō. <sup>4</sup> Te suni súcuan tāca barco, vēsú náhnu ndasí, te vēsú ñihin chūndahá táchí, te jín ñin tímón lulí-ni te cuu scuicó téé scáca, te quihín de jín ndé nuū cuní de. <sup>5</sup> Te suni súcuan cúu yáa yó, chi vēsú lulí-ni, te cuehē teyí sáha yó jín. Te suni jíní yō jeē ñin ñuhún lulí cuu jniñi jeē cayú ñin yucu cáhnu ndasí. <sup>6</sup> Te suni súcuan yáa yó, chí sáha nájnūhun ñin ñuhún, chi scuíquín cuehē teyí jniñu néé. Te yáa yó cúu ñin parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jñūhun néé jín yáa yó, te yáa yó scuíquín cuehē jniñu néé ní tiempo jeē iyó yó ini ñayívi. <sup>7</sup> Te ñayuu chi cuu snáhnú i tāca quiti jín saa jín

cóo jíin quiti ñúhun nuū mar, te je ni snahnú i cuehē tī. <sup>8</sup> Te ni ñin ñayuu ma cúu condito i yáa i. Chi ñin jeē neé jéē ma cúu condito i cúu. Te nájñuhun yuhu cóo jeē ñúhun chítu veneno jeē jéñni, súcuan cúu yáa yó. <sup>9</sup> Jíin yáa yó chíñúhún yó Tatá yō Yaā Dios, te suni jíin yáa yó cahán ndevāha yo síquī ñáyuu jeē ni sáha ya ánuá i nájñuhun íyó máa yá. <sup>10</sup> ñin-ni yuhu cáne jñuhun chíñúhún yó yá jíin jñuhun cáhán ndevāha yó. Ñānī mánī, tu íyó váha cuiti jeē súcuan. <sup>11</sup> ¿A ñin-ni tesōcō cáne ndute váha jíin ndute úvuá, chí naún? <sup>12</sup> Ñānī mánī, ¿á cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ñin tesōcō ma cúu cane ndute úhvuá jíin ndute váha.

### *Jñuhun ndíchí jéē véji nuū Yaā Dios*

<sup>13</sup> Te núu ndé ñin ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jñuhun ndíchí yá. <sup>14</sup> Te núu cácuésún teyí ni rō te ndúcú ró jéē cujéñnu máa ró, núu súcuan te ma cutéyí ró caní ni rō jeē ndíchí ró. Chi suu cúu jeē stahú ró, te cúu ró contra síquī jñuhun ndaā. <sup>15</sup> Chi ñayuu cándāa súcuan, nasūu nuū Yaā Dios véji jeē ndíchí i. Chi cuenta ñayívi, jíin cuenta anuá neé ñáyuu, jíin cuenta máa jéxeén cúu. <sup>16</sup> Chi nuū íyó ñáyuu cucuésún ni jíin ñáyuu nducú jéē cujéñnu máa, suni yūcuan íyó jñuhun sáca núu jíin táca jñiñu néé. <sup>17</sup> Te jñuhun ndíchí jeē véji nuū Yaā Dios, núu ni sáha jeē ní ndundíchí ñáyuu, yūcuán na te íyó ndoo ánuá i. Te suni yúcu manī i jíin jñáhan i, te vítá ni i, te tú ñihni ni i. Te cundáhú ni i jñáhan i, te sáha i jñiñu váha. Te suni íyó ndaā i, te tu stahú i. <sup>18</sup> Te ñayuu cáyūcu mánī jíin jñáhan, jíin jñuhun manī casáha i táca jñiñu ndaā, te nanihñ i jeē quéndō ndaā i.

### *Jeē ma cutóo ni yō jeē íyó ini ñayívi*

## 4

<sup>1</sup> ¿Te ndese quéjéé jéē cájeñáhan ró jíin jéē cáteñáhan ró? Quéjéé síquī jeē cándiyo néé ni rō, te yōhyo scánda ini anuá rō. <sup>2</sup> Chi cándiyo ni rō, te tu cánevāha ró, te suu sáha jeē cájehni rō ndiyi. Cándiyo ni rō jeē névāha jñáhan ró, te tu ñihín rō, te suu sáha jeē cáteñáhan ró te cájeñáhan ró. Te tu cánihñ rō jeē cuní rō, chi tu cájicān rō nuū Yaā Dios. <sup>3</sup> Te núu cájicān rō, te tu cánihñ rō, chi tu cájicān vāha ró, chi máni jeē cusñ ni máa ró cúu jeē cájicān rō nuū yá. <sup>4</sup> Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē íyó ini ñayívi, yūcuan cúu jeē cájito uhū rō Yaā Dios? Chi ñayuu jeē cutóo ni jeē íyó ñayívi, ndúu i ñayuu jíto uhū nuū Yaā Dios. <sup>5</sup> Te tu cáhán saá-ni jñuhun yáha jéē yosó núu tútu i: Máa Espiritu jeē ni jéhe Yaā Dios jeē ndeé ini yō, cúcuíñí ni yá jeē súcuan casáha yó, chí manī yā jíin yó, achí. <sup>6</sup> Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu i: Yaā Dios jési yá nuū ñáyuu casáha téyí máa, te váha ni yá chindéé ñáhán yá ñayuu casáha suchí máa, áchí. <sup>7</sup> Núu súcuan te cuandetū rō nuū Yaā Dios. Te cuiñi ñihni ró jéē ma cuátáhú ró jexeén, te cunu coto róhó jíjñáhan ró. <sup>8</sup> Manī gā coo ró jíin Yaā Dios, te víhyá gā steén yá jeē maní yá jíin ró. Róhó jéē casáha cuéchi, na sándoo ró máa ró, stóo ró cuéchi. Te róhó jéē cácuñi rō coo maní rō jíin Yaā Dios níni jéē cácuñi rō cutóo ni rō jeē íyó ini ñayívi, na sándoo ró ánuá rō jeē tuá coo ró súcuan. <sup>9</sup> Na jñáhuhū ni rō, te cucuíhyá ni rō, te na ndáhyú rō síquī jeē íyó cuéchi ró. Te vésú ni cajecū rō, te vijna na ndáhyú cohó ró. Te vésú ni cacusñ ni rō, te vijna na ndúcuíhyá ni rō. <sup>10</sup> Na sásuchí ró máa ró nuū Yaā Dios, te sájéñnu ya rohó.

### *Ma cóndihvī ni yō siquī cuēchi jnánhan yó*

<sup>11</sup> Hermano jijnánhan ró, ma cahán neé ró siquī jnánhan ró. Chi tēe jeé cahán neé siquī jnánhan, chí jéé ndihví ni siquī cuēchi jnánhan, nájñuhun jeé siquī ley yā cahán neé de, chí tu squicu de ley jeé cundáhú ni yó jnánhan yó, te nájñuhun cáhán de jeé tu íyó ndáá ley yā. Te núu cáhán rō jeé tu íyó ndáá ley yā, núu súcuan te nasúu jéé squicu ró, chí sa jeé cahán rō siquī. <sup>12</sup> Iyó ñn-ni Yaā jeé ni jéhe ley, te máá-ni ya cóu jeé sándaá siquī cuēchi. Te jnama ya ñayuu cácañdije te snáhnú ndetú yā ñayuu tu cácañdije. Núu súcuan ¿te na jniñu ndíso ró jéé sándaá rō siquī jnánhan ró?

### *Tú vāha jeé satéyí yó maá yó*

<sup>13</sup> Vijna te cáhán rī jín róhó jéé cácahān: Vijna chí sájnē te quihīn yō ñuu yúcuān, te coyūcu yó ñn cuiyā, te cuaan yó xíco yó, te nihīn yō siquī, achí ró. <sup>14</sup> Te tu jíní cuítī rō ndese coo sajnē. ¿Chí na vé va víhí cóu vida rō? Cóu nájñuhun ñn vicō ñuhún jéé ñn núnúu-ni núcūhun, te yūcuān na te ndéchi-ni cuahān. <sup>15</sup> Chí sa vāha ga na cáhán rō: Núu cúní maá Jítóho yō te cotecu yō te sáha yó jéé yáha chí jéé yúcuān, achí rō. <sup>16</sup> Te sa suhva máni cácutéyí ni rō cácahān rō. Te tú vāha jeé súcuan cácutéyí ni rō. <sup>17</sup> Te núu ñn ñayuu jíní i sáha i jniñu vāha, te núu tu sáha i, te cuēchi cóu núu súcuan.

### *Jñuhun cáhán nuū tēe cúca*

## 5

<sup>1</sup> Te cáhán rī jín táca róhó tēe cúca, jéé na ndáhyú rō te ndahyū cohó ró siquī jñúndóho jeé quíji nuū rō. <sup>2</sup> Chí ndajñiñu cúca cánevāha ró, je téhyú. Te sahma vāha ró, je tēe tiquixin. <sup>3</sup> Te oro jín plata cánevāha ró, chí je cáne xehyu. Te xehyu un stéén jeé ní casáha ró jniñu stáhú jín xúhun ró. Te yūcuān cóu jeé ndúnihin cuēchi siquī rō, nájñuhun ñn ñuhūn jeé snáá yiquí cúñu rō. Chí ni cacaya cuēhé rō ndajñiñu vāha quivī cuándihí yáha. <sup>4</sup> Te táca tēe ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cóu Jítóho nuū táca ndajéhé andiví, jeé súcuan ni casáha ró. Te jíní sōho ya jeé cácana jee tēe ni cajehnde ún. <sup>5</sup> Cátecu vāha ndasí ró ñni ñayiví yáha, te casáha ró táca jéé cácusí ñi maá ró. Te cájito yúcuān ró maá ró, te cóu ró nájñuhun quití neñu jeé ndétu quiví cóu. <sup>6</sup> Te ni catee ró cuēchi siquī ñayuu ndáá, te nde ni cajehni rō i. Te tu ní cóu casi i jeé casáha ró.

### *Jeé na cóo paciencia ni yō te cacān tahú yó*

<sup>7</sup> Hermano, núu súcuan te coo paciencia ni rō condetu ró ndé quiví ndíji máá Jítóho yō. Tēe sájniñu ñuhun, cánuú coo paciencia ni de condetu de nde quíji saū néhen jín saū neñu isa, te sáá te nihīn de nuní vāha jeé jéhe itu. <sup>8</sup> Te suní súcuan coo paciencia ni rō, te ndeyí coo ni rō condetu ró, chí cuacuyajni ndee maá Jítóho yō. <sup>9</sup> Te ma cahán sōo ró siquī jeé sáha jnánhan ró, hermano, návāha ma jéconde cuēchi siquī rō. Chí máá Yaā jeé sándaá cuēchi, je yajni ndíji ya. <sup>10</sup> Nání máni, conahan ró jijnánhan ró ndese ni casáha tēe ni canacani jñuhun máá Jítóho yō nde jenahán, chí ni cacuu de ñn ejemplo nuū yō. Chí vesú ni candoho de, te ni íyo paciencia ni de. <sup>11</sup> Te cáhán yó jeé ñayuu cájendeyí ni jín jñúndóho, ndetú cóu i sáha Yaā Dios. Chí ni cajini rō jñuhun ndese ni jendeyí ni Job jín jñúndóho, te suní cájini rō jeé yóhyo vāha ga ni quendōo de ni sáha máá Jítóho yó ná ni yáha jñúndóho. Chí yóhyo cundáhú ni yā yohó, te vāha ndasí ñi yá jín yó.

<sup>12</sup> Ñánĩ mánĩ, jeē cánuú gá cúu jeē ma cahán cāha ró síhvĩ Yaā Dios jíin jnúhun cácahān teyĩ ró. Ma cahán rō verdad de Dios, Yaā ndeé andivĩ, ni ma cahán rō verdad de Dios, Yaā chíĩ ñayivĩ, te ni ñin ga jnúhun súcuan ma cahán teyĩ ró. Chi núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scāa gā rō cahān rō, návāha ma ndénehen Yaā Dios cuēchi siquĩ rō.

<sup>13</sup> Te núu íyó ñin ró jéē ndóho jnūndóho, te na cácan tahu rō. Te núu íyó ñin ró jéē cúsh ni, te na cáta ró yaa jeē chíñúhún ró yá. <sup>14</sup> Te núu íyó ñin ró jéē cuhú, te na cána ró tēe jéhnú cándito ñayuu cácandíje. Te na cácan tahu de jehē ñayuu cuhú. Te jíin síhvĩ máá Jítoho yō na chíhĩ de aceite i. <sup>15</sup> Te núu cácandíje de jeē sáha Jítoho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. <sup>16</sup> Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró návāha nduvāha ró jíjnhān ró. Chi núu ñin tēe ndaā ndíhvĩ ni de jícan tahu de, te yōhoyo vāha níhĩn jníñu, chí sáha ya jeē jícan de. <sup>17</sup> Chi Elías, tēe ni nacani jnúhun Yaā Dios jenahān, suni ñin tēe jeē nájnhun íyó máá yó ni cuu de. Te ni jícan tahu ndasí de jeē ma cúun saū, te tu ní cúun saū unĩ cuiyā iñū yoō. <sup>18</sup> Yūcuán na te ni jícan tahu tucu de, te ni cuun saū, te ni canecoo tucu táca jéē jéhe ñuhun.

<sup>19</sup> Ñánĩ mánĩ, núu ñin ró ni stóo ichi ndaā, te núu inga rō nachuhichí ró jnáhan ró, <sup>20</sup> núu súcuan te cuni rō jeē núu ni nachuhichí ró tēe ni quivĩ cuēchi, te je ni jnama ró de jeē jnahnú ndetū de núú, te súcuan íyó jnúhun cáhnu ni nuū cuēhe cuēchi de.



## CARTA HN JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Pedro, apóstol jeē ní tají Jesucristo, te tée ri carta yáha cuájeē nuu rohó ñayuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia. <sup>2</sup> Te máá Tátá yō Yaā Dios ni nacāji ya rohó, chí súcuan ní tee ní yā nde ná tu jecōo ñayiví. Te jíin Espíritu Santo ní sáha ya jeē iyó ndoo iyó íi ró cájetáhú ró núu yā, te ní nacate ya anuá ró jíin níñi Jesucristo. Te ñúhun ní rí jeē na cáyá gā táca jée váha jeē sáha ya rohó, jíin jée coo ndeyí coo sī ní rō jijnáhan ró.

### *Jeē ñúhun ní yō táca jée váha jeē cóo andiví*

<sup>3</sup> Na cáhan yō jeē yóhoyo cújéhnū Yaā Dios, Yaā cúu Tátá maá Jítoho yō Jesucristo. Chí ní cundáhú ndasí ní yā yohó, te ní sáha ya jeē ní nacacu jeē yó, siquí jeē ní natecu Jesucristo méhñū ndíyi. Te jeē yúcuan níni cáñuhun ní yō táca jée váha jeē coo. <sup>4</sup> Chí níhín rō tahū jeē ñúhun váha ini andiví jeē cúu ró jíináhan ró. Te tahū un má náa cuiti, ní ma tívi cuiti, ní ma ndíhi cuiti. <sup>5</sup> Chí cácandije ró jée sáha Yaā Dios jehē rō, te jeē yúcuan ndito ya rohó jíin poder yā, náváha jnama ya rohó quíví sándihí, chí ní sándaá yā jeē súcuan coo.

<sup>6</sup> Jeē yúcuan cácusí ndasí ní rō, vésú cájito ró cuéhē ndinuú jñúndóho jecu-ni quíví. <sup>7</sup> Chí nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jñúndóho róhó núu cácandije níhín ró chí tuú. Chí jeē cácandije níhín ró, chí yahu ndasí gá cúu vésú oro, ndajniñū jeē náa. Te yúcuan cúu jeē cuajnúhún yá rohó, te sájéhnū ya rohó, te squéndōo yíñúhún yá rohó quíví quenda ndijin Jesucristo.

<sup>8</sup> Te vésú tu ní cájito ró núu yā, te cáhiyo maní ndasí ró jíin yá. Te cácandije níhín ró yá vésú tu cájito ró núu yā vijna. Te yóhoyo luu cácusí ndasí ní rō, chí nde tuá níhín cuiti yō jñúhun castúhun yó ndese cúsi ní yō. <sup>9</sup> Te níhín tahú rō jeē cácu ánuá rō, chí jeē yúcuan cúu jeē cácandije ró.

<sup>10</sup> Te tée ní canacani jñúhun Yaā Dios nde jenahán, ní cananducú yúcún de ní cacajnúhun váha de siquí jñúhun ndese jnama ya yohó. Te ní cacachi de ndese sáha Yaā Dios jeē váha róhó jíináhan ró. <sup>11</sup> Chí nde ná tu coo, te ní steén Espíritu Cristo nuú de jíináhan de ndese quíji jñúndóho siquí Cristo jíin ndese luu ndujéhnū tucu ya jeē yáha jñúndóho ún. Te ní cananducú yúcún de jeē na jécúhun ní de ndé quíví quíji Cristo te ndese coo táca jée ní cáhan maá Espíritu jeē ndeé ini de. <sup>12</sup> Te ní steén Yaā Dios nuú de jeē násūu máá de coto jniñū jeē ní canacani de ún, chí sa máá yó cúu jeē cóto. Te vijna je ní cajini sóho máá ró jñúhun ún, chí táca tée nácani jñúhun jnáma ya yohó, ní canacani de nuú rō, ní sáha poder Espíritu Santo jeē ní quíji ichi andiví. Te jñúhun ún chí nde maá ndajéhé Yaā Dios cánducú náváha na jécúhun ní.

### *Cúni yā jeē coo ndoo ánuá yō*

<sup>13</sup> Jeē yúcuan ndito na cóo xini ró jijnáhan ró, te cáji coo ní rō. Te cocuhun ndasí ní rō jeē níhín ró táca jée váha jeē sáha Yaā Dios rohó quíví quenda ndijin Jesucristo. <sup>14</sup> Te na cúu ró séhe jeē cájetáhú váha. Te ma sáha ga rō táca jniñū jeē ní cacusi ní rō sáha ró nde ná tu jecúhun ní rō jñúhun Yaā Dios. <sup>15</sup> Chí sa suhva na cóo ndoo ánuá rō jíin táca jniñū cásáha ró, chí Yaā ní cana róhó, Yaā

iyó ndoo cúu ya. <sup>16</sup> Chi súcuan cáhán tutu iī: Na cóo ndoo ró jijnáhan ró, chi ruhū iyó ndoo ri, achí yá.

<sup>17</sup> Te núu cácahān rō Tatá rō jiín Yaā Dios, núu súcuan te na cáca yíñuhún ró nuū yā tāca quivī jēē cájica ró ñayivī yáha. Chi máá yá sándaā siquī ndese ni casáha iin iin yó, te tu sáha ya cuenta ndese cúu iin iin yó, chi inuú sáha ya jiín ndihí yó. <sup>18</sup> Chi ni jnama ya rohó núu tācá costumbre jeē ní cajequin jíi rō, jeē ní cajejniñu cáha ró núu. Te cájini váha ró jēē yahu cúu jeē ní jnama ya rohó. Chi tu ní chúnaa yā jiín ndajniñu jeē náā, nájñuhun oro jiín plata, <sup>19</sup> chi sa suhva jiín níñi Cristo jeē yáhu ndasí gá cúu. Chi ní socō yā máá yā nájñuhun iin londe, quiti iyó váha iyó ndoo. <sup>20</sup> Chi jeē yúcuan ní jeni Yaā Dios máá Cristo nde ná tu jecōo ñayivī, te ni cane ndijin Cristo máá tiempo cuándihí yáha, návāha quendōo váha ánuá rō jijnáhan ró. <sup>21</sup> Te jeē jiín Cristo te cácandije ró Yaā Dios. Chi ní sáha Yaā Dios jeē ní natecu yā mēhñu ndiyí jiín jēē ní ndujéhu ya. Te jeē yúcuan cácandije ró Yaā Dios, te cáñuhun ní rō coto ró yá.

<sup>22</sup> Te vijna chi je ni candundoo ánuá rō, chi ni cajetáhú ró jñuhun ndaā ni sáha Espírítu jiín ró, návāha cundáhú ndije ni rō hermano cácandije. Núu súcuan te na cúndáhú ndasí ní rō jnáhan ró nde jiín ini jiín ánuá rō. <sup>23</sup> Chi je ni canacacu jeé ró, te nasūu chíji yucūn ñayuu jeē cúu. Chi sa jñuhun Yaā Dios jeē ndíto técu ní cáni ni sáha jeē ní nacacu ró. <sup>24</sup> Chi súcuan cáhán tutu iī:

Nájñuhun yucū cúu ndihí tāca ñayuu, chi jecu-ni quivī técu i.

Te nájñuhun ita yucū cúu jeē kujéhu i.

Chi íchí-ni yucū, te ndáhvá-ni ita.

<sup>25</sup> Te jñuhun Jitoho yō Yaā Dios, sa quéndōo ní cáni.

Achí tutu. Te jñuhun un cúu máá jñuhun jnáma ya yohó jēē ní canacani ri nuū rō.

## 2

<sup>1</sup> Núu súcuan te na siáá rō tācá jniñu néé, tāca jēē stahú, jēē tú ndije, jeē cucuésún ni, jiín jēē sajnúhún siquī jnáhan. <sup>2</sup> Te nájñuhun sūchi yíquín sá ní cacu jeē jéxin te jéhu, súcuan na cóndihvī ní rō scuáha ró jñuhun ndaā yā, návāha cuehnu ró jiín te cácu ánuá rō. <sup>3</sup> Chi je cájini rō jeē yóhoyo váha ni máá Jitoho yō.

### *Cristo cúu nájñuhun yuū yítuu vehe*

<sup>4</sup> Núu súcuan te manī gā coo ró jijnáhan ró jiín Jitoho yō Cristo. Chi cácuu ró nájñuhun templo nuū ndeé Yaā Dios, chi ndeé yá ini anuá rō. Te Cristo cúu nájñuhun iin yuū cánuú gá jeē yítuu yiquī templo, te sáha ya jeē cótecu ró ní cáni. Te ñayuu vēsú ni casquéhichí i ya, te Yaā Dios chi je ni nacáji ya Cristo chí cánuú ndasí yá, nájñuhun nacáji yó iin yuū váha jeē quítuu yiquī vehe. <sup>5</sup> Te máá ró chí cácuu ró nájñuhun iin iin yuū jeē cúvāha templo Yaā Dios, te cotecu ró ní cáni. Te na cuáha ró jñuhun jeē sama ya rohó jijnáhan ró jēē cúvāha templo yā, cúu jeē ndeé Espírítu yā ini anuá rō nájñuhun ini iin templo. Te suni cúní Yaā Dios jeē cuu ró sūtū cáhíyo ndoo cájejniñu nuū yā. Chi siquī jeē ní sáha Jesucristo jehē rō, te na sócō rō máá ró jeē cuajniñu ró núu yā sáha ró táca jniñu váha jeē nájñuhan ni Yaā Dios. <sup>6</sup> Chi súcuan cáhán tutu iī:

Vijna te nde ñuu rī Sion jéquin rī iin yuū jeē cánuú gá jeē quítuu yiquī vehe,

chí ní nacáji ri yā nájñuhun iin yuū váha jeē cánuú téyí.

Te ñayuu jeē candije i ya, jnama nahín yá i.

Achí Yaa Dios, áchí tutu. <sup>7</sup> Te máá ró jeē cá candíje ró, chí yuū váha jeē cánuú téyí cúu ya nuū rō. Te nuū ñayuu tu cá candíje chí tuú, chí sa cúndaā jeē cahán tutu ì:

Máá yūu jeē ní casquéhichī tēe cásama vehe, suu cúu yuū cánuú gá yítuu yíquī vehe.

<sup>8</sup> Te suni cúndaā jñūhun jeē cahán tutu siquī ñayuu tu cá candíje:

Cúu ya nájnūhun ìn yuū jeē cá cachihí i jehē i, nájnūhun toto jeē cotúú i sáha.

Achí. Chí jeē cá cachihí i jehē i cúu jeē casánìhni ní i nuū jñūhun ya. Te je ní cundaā jeē jñahnú ndetū i siquī jeē cá cunìhni ní i.

### *Jñūhun ñayuu maá Yaa Dios*

<sup>9</sup> Te máá ró cácuu ñayuu jeē ní nacāji Yaa Dios. Te suni cácuu ró sūtū cájejnīñu nuū maá Yaa cúu Rey, te ñayuu cáhīyo ndoo, jíin ñayuu maá yá cácuu ró. Súcuu ní sáha Yaa Dios rohó návāha nacani ró jñūhun ndese yōhō jéhu jniñu sáha ya, chí máá yá ní cana rohó ná ní coyūcu ró nájnūhun nuū nēe. Te ní squívicoo ya rohó núu luz yā jeē yōhō váha stéén yā ìni anuá rō. <sup>10</sup> Chí nde saá te nasūu ñayuu Yaa Dios cácuu ró, te vijna je ní nduu ró ñayuu maá yá. Te nde saá chí ná tu cundáhú ní yā rohó, te vijna je cúndáhú ní yā rohó jíjnāhan ró.

### *Jeē cuajniñu váha yó núu Yaa Dios*

<sup>11</sup> Nānī mánī, ìni ñayví yáha cácuu ró nájnūhun ñayuu ñuu jicá jéē cájica cuu tátú. Núu súcuu te cáhán ndahú rí jíin ró jéē ma sáha ró táca jniñu jeē ndíyo nēe ní rō jíin modo maá ró. Chí táca ún cájejnāhan jíin ró, ndúcú jéē jñahnú ndetū anuá rō. <sup>12</sup> Te ndaā na cáca ró méhñu ñayuu tu jíni jñūhun Yaa Dios. Chí vesú cácahān i siquī rō, nájnūhun cácahān i siquī ñayuu casáha jniñu nēe, te núu na cóto i jniñu váha casáha ró, te quívī sándaā Yaa Dios jniñu te cahān i jeē yóhō cújéhu ya.

<sup>13</sup> Jeē siquī maá Jítoho yō te cuatáhú ró nuū táca tóhō cándiso jniñu nuū ñayuu. Cuatáhú ró nuū maá rey, chí tēe cújéhu ga cúu de. <sup>14</sup> Te cuatáhú ró nuū táca gobernador jeē ní jeni rey návāha stóho de ñayuu casáha jniñu nēe te cuajnúhún de ñayuu casáha jniñu váha. <sup>15</sup> Chí cúní Yaa Dios jeē sáha ró jniñu váha, te jeē súcuu sáha ró te táca ñayuu canéé jéē tu cájecūhun ní, casi i yuhu i.

<sup>16</sup> Te na cáca ndaā rō jeē cácuu ró ñayuu ní nduu libre anuá, te nasūu jéē ní nduu libre ró jeē sáha ró jniñu nēe. Chí sa cácuu ró mozo Yaa Dios, te cuajniñu váha ró núu yā. <sup>17</sup> Coo respeto rō nuū táca ñayuu. Cundáhú ní rō hermano cá candíje. Conso iyo ró núu Yaa Dios. Coo yíñúhún ró nuū maá rey.

### *Jeē na ndóho yó jéhē jñahan yó nájnūhun ní ndoho Cristo*

<sup>18</sup> Rohó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū tēe váha ní jíin tēe vítá ní, chí suni nuū tēe xeēn ní. <sup>19</sup> Chí ìn jeē váha cúu núu jéndeýí ní ìn tēe jeē stóho cáha ñayuu de siquī jeē squícu de nuū Yaa Dios. <sup>20</sup> Chí núu cástóho i rohó jéē casáha ró cuéchi, te ní ìn ma cuajnúhún rohó núu jéndeýí ní rō jíin jeē ndóho ró. Te núu cástóho i rohó jéē casáha ró jniñu váha, te núu jéndeýí ní rō jíin, yáha cúu jeē váha jeē nújnahan ní Yaa Dios. <sup>21</sup> Chí jeē yúcuu cúu jeē ní cana ya rohó jíjnāhan ró. Chí suni máa Cristo ní ndoho ya jeē siquī rō, te súcuu ní cuu ya ìn ejemplo nuū rō jeē na ndóho ró jéhē jñahan ró, te súcuu condiquín rō ichi ya. <sup>22</sup> Te máá yá tú cuiti na cuéchi ní sáha ya, ní tú cuiti na jñūhun stáhú ní cáhán yā. <sup>23</sup> Ná ní cacahān

neé i nuū yā, te tu ní nácahān neé yā. Te ná ni castóho i ya, te tu ní téjnahān ya jín i, chi sa ni chihi ya maá yā ndaha Yaā Dios, Yaā sándaā vāha siquī ndihī ún. <sup>24</sup> Te ni condiso maá Cristo cuēchi yó jín yiqui cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tuji yā, te jeē yúcuan ní canduvāha ánuá rō. <sup>25</sup> Chi ni casana ró nájñuhun lanchi, te vijna je ni candicó ró ni ndívicoo ró nuū Cristo, Yaā cúu pastor rō te ndíto vāha ya anuá rō.

*Ndese cánuú coyūcu vāha yii jín ñasihí*

### 3

<sup>1</sup> Suni súcuan róhó ñasihí jijnáhan ró, cuatáhú ró nuū yii ró, návāha núu cúu de tēe tu cándíje jñuhun ya, te cuu scándíje ró de, jeē tuá niní jín jēe cahán rō, chí maá jín jēe casáha vāha ró. <sup>2</sup> Chi cuni de jeē cájica ndaā rō te cáhiyo respeto rō. <sup>3</sup> Te jeē casáha luu ró maá ró, chí nasūu máni maá ichi síquī rō sáha ró, jeē sáha luu ndasí ró xiní rō, chí jēe cúhun ró síquī oro chí sahma vāha ga. <sup>4</sup> Chí sa nducú ró jeē quéndō luu ánuá rō, te coo luu ró ñn modo jeē ma náa cuiti, suu jeē cóo vítá ni rō te coo nahín ni rō. Chi yāha cúu jeē yahu ndasí gá nuū Yaā Dios. <sup>5</sup> Chi ñahan ní cahīyo ndoo ánuá nde jenahán, suni súcuan ní casáha luu ña ánuá ña. Chi ni cañuhun ní ña Yaā Dios, te ni cajetáhú ña nuū yii ña. <sup>6</sup> Te súcuan ní sáha Sara, chí ní jetáhú ña nuū yii ña Abraham, te ní cahān yíñúhún ña jín de. Te róhó jijnáhan ró, núu sáha vāha ró te núu ma yūhu ró ní ñn, yūcuán na te coo ró nájñuhun ní Iyo Sara.

<sup>7</sup> Te suni súcuan róhó yii, na cóo vítá ni rō jín ñasihí ró. Te yíñúhún coo ró jín ña, síquī jeē núu ga fuerza ña vēsú rohó, te suni síquī jeē inuú ní canihín tahú rō cotecu rō ní cáni síquī jeē vāha ni Yaā Dios. Te súcuan sáha ró návāha tú casi nuū jñuhun jícán tahú rō.

*Jñuhun ñayuu cándoho síquī jeē cájica ndaā*

<sup>8</sup> Núu súcuan te inuú na cáni ní rō jijnáhan ró, te cucuíhyá ni rō jeē ndóho jñahan ró, te cundáhú ní rō i nájñuhun ñani rō. Te na cóo maní rō te caní suchí ní rō. <sup>9</sup> Núu casáha neé ñayuu jín ró, te ma nasáha neé ró jín i. Te núu cácahān neé i nuū rō, te ma nácahān neé ró núu i. Chi sa suhva cacān tahú rō jeē na quéndō vāha i. Chi Yaā Dios ní cana ya rohó jēe suni súcuan quéndō vāha ró.

<sup>10</sup> Chi súcuan cáhán tutu ñi:  
Ñayuu cácuni cotecu vāha te cusī ní tāca quívī,  
na cóto i yuhu i jeē ma cáhán neé i,  
te na cóto i jeē ma cáhán i jñuhun stáhú.

<sup>11</sup> Na cújiyo i nuū jniñu neé, te na sáha i jniñu vāha.  
Na ndúcú i coyūcu máni i, te na cóndihvī ní i jín.

<sup>12</sup> Chi maá Jítoho yō ndíto ya ñayuu ndaā,  
te jini nahín yá jeē cájicān tahú i.  
Te ñayuu casáha jniñu neé, chí tu jétáhú yá i.  
Achí tutu.

<sup>13</sup> Te ní ñn ma sáha neé jín ró te núu máni jniñu vāha cándihvī ní rō sáha ró.  
<sup>14</sup> Te vēsú núu ndóho ró síquī jeē cájica ndaā rō, te yóhoyo ndetū cácuu ró. Núu súcuan te ma yūhu ró coto ró i, ní ma cuné ní rō. <sup>15</sup> Chi sa jín ini jín ánuá rō chíñúhún ró maá Jítoho yō Cristo. Te níni coo tūhva ró nastió cuíñí víta ró te cahān yíñúhún ró jín ñayuu jeē castíhí rohó síquī tāca jēe cáñuhun ní rō. <sup>16</sup> Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ní stáu yáhu i rohó jēe cájica ndaā rō chí cácañíje ró Cristo.

17 Chi núu cúní Yaā Dios te vāha ga jeē ndóho ró síquī jeē casáha ró jniñu vāha vēsū síquī núu sáha ró jniñu néé.

18 Chi máá Cristo suni ni ndoho ya, te ñn jínu-ni ni jihí yā jeē síquī cuéchi ndihí yó. Yaā vāha cúu ya, te ni ndoho ya jehē yohó ñáyuū ní casáha jniñu néé, návāha quivicoo yó núu Yaā Dios sáha ya. Chi ni jihí yiqui cúñu yā, te ánuá yā chí tēcu-ni ní cáni. 19 Te ná ni jihí yā te ni jehē anuá yā ni nacani ya jñūhun nuū anuá ñayuu cáyindihyū. 20 Chi nde jehánan tu ní cájetáhū í, ná ni ñyo paciencia ni Yaā Dios te ni condetu ya níni sáha Noé barco jeē nani arca. Te jíin arca un ní cācu jecu-ni ñayuu, chi unā-ni i ni cācu nuū ndúte.

21 Te nájnūhun ni cacācu i nuū ndúte, súcuan cúu jeē jéndute yó vijna te cācu ánuá yó. Te jeē jéndute yó, nasūu jéē ndúndoo yiqui cúñu yó, chi sa jeē jicán yó nuū Yaā Dios jeē ndúndoo ánuá yó. Te súcuan te cācu yó, chi ni cundúu yó jíin Jesucristo nuū jñūhun ni natecu yā. 22 Te ni ndaa ya cuanuhun yā andiví, te ndéé yá ichi ndávāha Yaā Dios nuū cujéhnū ya. Te táca ndajéhé andiví, jíin jéé cándacu jniñu, jíin jéé cájni poder, cájendetū nuū yā.

*Jeē na cuájnñū yó jíin táhū jeē ni jéhe ya nuū yó*

## 4

1 Núu súcuan te nájnūhun ni ndoho Cristo jehē yó jíin yiqui cúñu yā, suni súcuan na táva ni máá ró ndoho ró. Chi ñayuu jeē ní ndoho jíin yiqui cúñu, tuá sáha i cuéchi. 2 Núu súcuan te ní tiempo jeē cuahán gā ró, na sáha ró jniñu jeē cuní Yaā Dios, te ma sáha ga ró jniñu jeē ndíyo néé ni ró jíin modo máá ró. 3 Chi nde ní véjí ró, te ni casáha ró cuéhē cuéchi jeē cánujnahān ni ró síquī jeē tu ní cájni ró jñūhun Yaā Dios. Te tiempo un máni máá jéé neé ni casáha ró, te ni candiyo ni ró táca jéé neé, ni canajini ró, ni casáha ró vico néé, ni cajihí ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó. 4 Te cácnéé ni i jeē tuá cájica ró jíin i jeē sáha ró táca cuéchi xeēn jíin i. Te jeē yúcuan cúu jeē cacahān neé i síquī ró. 5 Te máá i chí ñn quiví te nacuaáha i cuenta nuū maá Yaā jeē iyó túhva ya sándaā yā jniñu ñayuu tēcu jíin ñáyuū ní cajihí. 6 Chi jeē yúcuan suni ni quiji jñūhun vāha ya nuū táca ndíyí ná ni cotecu i. Te ni cundaā síquī cuéchi ni casáha i ñayiví yáha, nájnūhun cundaā síquī ndihí ñayuu, návāha nacani ni i te cotecu anuá i ní cáni nájnūhun tēcu Yaā Dios.

7 Te je cuacuyajni quiví jeē náā táca jéé iyó. Núu súcuan te ndito na cóo xiní ró jñánān ró, te condihví ni ró cacān táhū ró. 8 Te jeē cánuú gá cúu jeē cundáhú ndasí ni ró jñánān ró. Chi núu cundáhú ni yó jñánān yó, te iyó jñūhun cáhnu ni nuū cuehē cuéchi. 9 Sáha vāha ró jíin ñáyuū jeē jinú i vehe ró, te ma cúxii ni ró. 10 Táca ró cuajniñū ró núu jñánān ró, núu ndese iyó máá táhū ró jeē ni jéhe Yaā Dios jeē cuajniñū ró núu yā. Te síquīcu vāha ró jíin táhū jeē ñn sín ni jéhe ya nuū ñn ró. 11 Núu táhū jeē nācani ró jñūhun cúu, te na cáhān ró nájnūhun jeē máá Yaā Dios cáhān. Te núu táhū jeē chindéé ñáhān ró jñánān ró cúu, te na sáha ró jíin fuerza jeē ni jéhe ya nuū ró, návāha jíin ndihí jeē casáha ró te cáhān ñayuu jeē yóhūyó cújéhnū Yaā Dios síquī jeē ni sáha ya jíin Jesucristo. Te na cáhān yó jeē luu cújéhnū Cristo te jni yá poder ní cáni. Amén.

*Jeē ndóho yó síquī jeē candíje yó Cristo*

12 Ñání mání, núu vējí jñūndóho xeēn jeē coto ndee rohó, te ma cunéé ni ró cani ni ró jeē máá ró ni nihīn jñūndóho xeēn gā. 13 Chi sa cusí ni ró jeē cándoho ró jecu jñūndóho jeē ní ndoho Cristo, návāha suni cusí ndasí ni ró

quívī quenda ndijin yā jeē cujéhnū luu ya. <sup>14</sup> Te yōhō ndetū rō te núu cácahān neé i nuū rō siquī jeē cácañdije rō Cristo. Chi máá Espíritu Yaā Dios jeē cujéhnū ndasí, ndeé yá ini rō. Máá i chi cácahān neé i siquī yā, te máá rō chi cáchiñúhún rō yā. <sup>15</sup> Te núu ndoho rō, te na ndóho rō siquī jeē cácañdije rō Cristo. Te ma ndóho rō siquī táca cuéchi nájñuhun cándoho ñayuu jéñni ndīyi, ñayuu sacuíñná, ñayuu sáha jñiñu neé, jíñ ñayuu quívī nduu nuū jñiñu jnāhan jeē tu cánuu quívī nduu. <sup>16</sup> Te sa núu in rō ndóho siquī jeē candije rō Cristo, te ma cúcanu rō, chi sa nacuatáhú rō nuū Yaā Dios siquī jeē cúu rō cristiano.

<sup>17</sup> Chi je ni jinū quívī jeē quejéé sándaā Yaā Dios cuéchi, te xīhna gā ñayuu cácuu sēhe ya sándaā yā cuéchi. Te núu xīhna gā cuéchi máá yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñayuu jeē tu ní jétáhú jñuhun vāha ya. <sup>18</sup> Te núu yōhō yí cácu ñayuu vāha, núu súcuan ¿te ndese cácu ñayuu casáha jñiñu neé jíñ táca cuéchi? <sup>19</sup> Núu súcuan te rohó jéé cándoho siquī jeē súcuan cúní Yaā Dios, ma jécuiñī rō sáha rō jñiñu vāha, te na chíhi rō máá rō ndaha máá Yaā jeē ni sáha rohó, chi squícu ya jeē ni jéjñuhun ya.

*Jeē jéhe de consejo ñayuu cácañdije*

## 5

<sup>1</sup> Vijna te na cáhán rī jíñ táca rohó téé jéhnū cándito ñayuu cácañdije, chi suni téé jéhnū ndító ñayuu cácañdije cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnū rī jíñ rō sáha Cristo quívī quenda ndijin yā. <sup>2</sup> Na cóto yúcún rō ñayuu jeē ndeé jñiñu rō condito rō, jeé cácuu i nájñuhun lanchi Yaā Dios. Te na cúsi ni rō condito rō i, chi súcuan cúní Yaā Dios. Te nasūu siquī jeē sáfuerza yā rohó, ni nasūu siquī jeē nihín rō xühún, chi sa siquī jeē cuní rō cuajñiñu rō. <sup>3</sup> Te nasūu jéé ndacu nīhin rō jñiñu nuū ñayuu cándito rō, chi sa nducú rō cuu rō in ejemplo nuū i jeé cácuu i lanchi ya. <sup>4</sup> Yūcuán na te quívī quenda ndijin máá Yaā cúu Pastor cujéhnū nuū rohó téé cácuu pastor lanchi ya, te cuāha ya premio nuū rō jijnáhan rō jéé yóhō luu te ma náā cuiti.

<sup>5</sup> Te suni rohó táca téé suchí, na cuándetū rō nuū táca téé jéhnū jíñā. Te ndihi rohó ñayuu cácañdije, cuandetū rō nuū jnāhan rō, te caní suchí ni rō. Chi suhva cáhán tutu:

Yaā Dios jési yā nuū ñayuu casáha téyí máá,

te vāha ni yā chindéé ñáhan yá ñayuu casáha suchí máá.

Achí. <sup>6</sup> Núu súcuan te na cáni suchí ni rō, chí cáyihí rō ndaha Yaā Dios jeē jñí poder. Te sájéhnū ya rohó, na jínú máá quívī. <sup>7</sup> Táca jéé cánacani ndasí ni rō siquī, chíhi rō ndaha máá yá te máá yá coto, chí ndító ya rohó.

<sup>8</sup> Te cáji na cóo xinī rō te ndito coo ni rō. Chi jexeén jeé jito uhū rohó, jíca cuu nducú squívī rohó jíñáhan rō núu cuéchi. Te xeēn gā sáha vésú ndicaha jeé Iyo ndáhyú. <sup>9</sup> Te cuíñi nīhin rō jéé ma cúndeyí jexeén jíñ rō, te nīhin candije rō jñuhun cúndáhú ni yā rohó. Chi cájini rō jeé suni súcuan cándoho hermano rō jeé cáyūcu ní cáhnu ñayívī. <sup>10</sup> Te núu ni jíñu jeē ndoho rō jecu-ni tiempo, te Yaā Dios chí sáha ya jeé ije vāha ni rō jíñ jñuhun ya, jíñ jéé cuíñi nīhin rō, te cuāha ya fuerza ini rō, te quendōo cutú rō ní cáni. Chí máá yá cúu jeé sáha táca jéé vāha yóhó, te ni cana ya yohó jéé cujéhnū luu yó jíñ yá ní cáni, siquī jeé nduú yó jíñ Jesucristo. <sup>11</sup> Te na cáhán yō jeé yóhō luu cújéhnū ya te jñí ya poder ní cáni. Amén.

*Saludo jeé sándihí*

<sup>12</sup> Jíní rī jeē Silvano cúu ñn hermano jeē squícu vāha. Te máá de cuajeē nuū rō jín carta yáha jéē ní tee ri jecu jnūhun. Te jín yáha stǎhví ni rī rohó, te cǎhán rī jín ró jeē ndaá cúu jeē tāca jéē váha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuññi ñihin ró jín jnūhun yáha.

<sup>13</sup> Ñayuu cǎcandíje jeē cǎyūcú ñnu Babilonia, jeē ní nacāji ya i nájñūhun ni nacāji ya rohó, cǎcǎhān i jeē sǎndeyí ni rō. Te Marcos, tēe cúu nájñūhun sēhe ri, suni sūcuan cǎhán de. <sup>14</sup> Te núu na cǎhán rō jín jnǎhan ró, te techūhu mǎnī rō ndaha i.

Te na cóo ndeyí coo sīñ ni ndihí ró jéē cǎyihí ró ndaha Jesucristo. Sūcuan na cóo. Amén.

## CARTA UU JEE NI TEE SAN PEDRO APOSTOL NUU ÑAYUU CACANDIJE

<sup>1</sup> Máá rí cúu Simón Pedro, te cúu ri mozo Jesucristo, te cúu ri apóstol jeē ní taji yá. Te tée ri carta yáha cuájeē nuū rō jijnáhan rō, jeē ní sáha Yaa Dios jeē inuū-ni jín rí jijnáhan ri ní canihín rō jnūhun luu váha jeē cácan dije yó yá. Chi Yaa ndaa cúu Yaa Dios, suu máá Jesucristo jeē jnáma yóhó. <sup>2</sup> Te ñūhun ni rí jeē na sáha ga yá jeē váha ndasí róhó jín jéé yóhoyo coo ndeyí coo sī ní rō siquī jeē cájecūhun váha ni rō ndese Yaa cúu Yaa Dios jín Jítoho yō Jesús.

### *Siquī ndese cánuú coo ñayuu cácan dije*

<sup>3</sup> Te Yaa Dios, jín poder yá ni jēhe ya nuū yō táca jéé sáha jeē cúu caca ndaa yō nuū yá jín jéé chíñúhún váha yó yá. Chi ní steén yá maá yá nuū yō, chi cúu ya Yaa jeē ní cana yóhó, siquī jeē yóhoyo cújéhu ya jín táca jniñu jéhu sáha ya. <sup>4</sup> Jeē yúcuan ní jejnūhun ya táca jéé yóhoyo jéhu yóhoyo váha sáha ya yóhó, náváha jín táca ún te nduu ró nájñūhun iyó máá yá, te cácu ró nuū jniñu jeē cácaniyo néé ni ñayuu casáha i ini ñayivi yáha. <sup>5</sup> Núu súcuan te na ndúcú ndeyí ró jín jnūhun yáha. Te jeē cácan dije ró, te siquī ún na chísoó ró jeē caca ndaa rō. Te jeē cájica ndaa rō, te siquī ún chísoó ró jeē cóndihvi ní rō jecūhun váha ni rō. <sup>6</sup> Te siquī ún chísoó ró jeē casi rō modo jeē cuní maá ró. Te siquī ún chísoó ró jnūhun cuandeyí ní rō, te siquī ún chísoó ró jeē chíñúhún váha ró Yaa Dios. <sup>7</sup> Te siquī ún chísoó ró jeē cóo maní rō jín jnáhan ró, te siquī ún chísoó ró jeē cundáhú ní rō jnáhan ró.

<sup>8</sup> Chi núu cayā táca jniñu yáha jín ró, te suu sáha jeē ma cótecu saá-ni ró, chi sa quee váha jniñu sáha ró, siquī jeē cájecūhun ni rō ndese Yaa cúu Jítoho yō Jesucristo. <sup>9</sup> Te ñayuu jeē tú casáha jniñu yáha, nájñūhun jeē cáhoyo cuáá i, chi tú jécūhun ni i jnūhun ya, te je ni naa ni i jeē ní sándoo ya i táca cuéchi ní casáha i ichi yátá. <sup>10</sup> Jeē yúcuan na ndúcú ndeyí ró hermano, náváha coo seguro jeē ní cana ya rohó jín jéé ní nacáji ya rohó. Chi núu sáha ró táca jniñu yáha, te ma cáca yátá cuiti rō. <sup>11</sup> Yúcuan na te nune váha ichi quivi ró ini ñuu maá Jítoho yō Jesucristo, Yaa jnáma yóhó, nuū ndácu ya jniñu ní cáni.

<sup>12</sup> Jeē yúcuan ma jéchiñi rí sáha rí jeē núcūhun ní rō táca jnūhun yáha, vēsú je cájini rō te cáhīn níhīn rō jín jnūhun ndaa jeē cácan dije ró. <sup>13</sup> Chi jéni ní rí jeē iyó váha stihvi ní rí rohó vijna técu gā rī, náváha nucūhun ni rō. <sup>14</sup> Chi máá Jítoho yō Jesucristo ní castūhun yá nuū rí jeē tuá cotecu nahán rí ñayivi yáha. <sup>15</sup> Jeē yúcuan na ndúcú ndeyí gá rí stihvi ní rí rohó, náváha núu je ní jihí rí, te níni nucūhun ni rō táca jnūhun yáha.

### *Jeē ní cajito de jeē cújéhu Cristo*

<sup>16</sup> Ná ní castéén rí jnūhun máá Jítoho yō Jesucristo nuū rō, ndese ndiji ya jín poder yá, te tu ní cácahān rí in cuento-ni jeē ní catava ndichí ñayuu. Chi ná ní cahīyo rí jín yá xiní yúcu, te ní cajito jín núu rí jeē tucu ní nduu ya jeē ní nduluu jéhu ya. <sup>17</sup> Chi ní cajini rí jeē Tatá yō Yaa Dios ní cahān yíñúhún yá jín Jesús, te ní sajeñu ya Jesús. Chi ichi ándiví ní quiji jnūhun luu, ní cahān Yaa Dios: Yáha cúu Sēhe rí jeē maní ndasí rí jín, te cúsi ní rí jín, áchí yá. <sup>18</sup> Te ní cajini sōho rí jnūhun un jéé ní cáhān ichi ándiví, chi ní cahīn rí jín máá Jítoho yō xiní yúcu ií ún.



<sup>19</sup> Te súcuan cájini yō jeē iyó ndāā ndije tāca jnúhun ni catee tēe ni canacani jnúhun ya nde jenahán. Te vāha jeē na chúhun ni rō jnúhun un jínáhan ró, chí suu cúu nájnūhun iin luz jeē cayú nuū néē, nde na cúndijin quiví ndíji ya, te stéén yā ini anuá rō nájnūhun jeē ndíndēé lucero. <sup>20</sup> Te xīhna gā na jécūhun ni rō jeē ni iin jnúhun cáhán tutu iī, nasūu jēē súcuan-ni ni cajeni ni tēe cúu. <sup>21</sup> Chí tāca tēe ndoo jeē ní canacani jnúhun ya nde jenahán, tu ní cáchān cuiti de jnúhun jeē cúu ni maá de. Chí sa suhva ni canacani de jnúhun Yāā Dios jeē ni stéén Espíritu Santo nuū de.

*Siquí tēe cástéén jnúhun stáhú*  
(Judas 4-13)

## 2

<sup>1</sup> Te mēhñu ñáyuu Israel ún suni ní cahíyo tēe ni canacani jnúhun stáhú. Te suni súcuan coo tēe stéén jnúhun stáhú méhñu ró. Te squíví de jnúhun stáhú jēē tívi ñáyuu sáha. Te ni ma cuajnúhún de Jitoho yō jeē jnáma ya de, te súcuan sáha de jeē jnahnú ndetū yachí de. <sup>2</sup> Te cuehē ñáyuu condiquín i modo neé jēē castéén de. Te sáha de jeē cahán neé ñáyuu siquí jnúhun vāha ya jeē cúu ichi ndaā. <sup>3</sup> Te siquí jeē cándiyo ni de xūhún, te quende de xūhun ró siquí jnúhun stáhú stéén de nuū rō. Te tu quíxín jnúndóho jnahnú ndetū de, chí nde jenahán je ndétu jnúhun ndonda ya siquí cuéchi de.

<sup>4</sup> Chí tu ní íne cáhnu ni Yāā Dios nuū tāca ndajéhé yā jeē ní casáha cuéchi, chí sa ni jnaa yā infierno cáyindihyū nuū néē, cánuhñí jíin cadena. Te ni chindihyū yā nde quiví sándaā yā siquí. <sup>5</sup> Te suni tu ní íne cáhnu ni yā nuū ñáyuu jenahán, chí sa ni scúun ya saū xeén siquí ñáyuu ni casáha neé un. Te maá-ni Noé, tēe ni nacani jnúhun ndaā, ni scácu ya de jíin úxā gā ñáyuu. <sup>6</sup> Te suni ni ndonda ya siquí cuéchi ñáyuu ñuu Sodoma jíin ñuu Gomorra, te ni cayú ñuu i ni nduu maá yāā na. Te súcuan cúu i iin ejemplo nuū tāca gā ñáyuu sáha neé jēē quíji ga. <sup>7</sup> Te ni scácu ya Lot, chí tēe ndaā ni cuu de, te ni cucuíhyá ndasí ni de ni jito de jniñu neé ní casáha ñáyuu neé un. <sup>8</sup> Chí tēe vāha un ní condee de méhñu ñáyuu ún, te ndiquiví ni nacani cuíhyá ni de jeē ní jini sóho de ni jito de tāca jniñu neé ní casáha i. <sup>9</sup> Núu súcuan te maá Jitoho yō chí jnáma ya ñáyuu cáchiñúhún núu yā, te núu vēji jnúndóho siquí i. Te chindihyū yā ñáyuu casáha neé, návāha ndoho i castigo quiví sándaā yā cuéchi i.

<sup>10</sup> Te vihýá gā stóho ya tēe casáha jniñu jnéhén jēē ndíyo neé ni de, te cácuu jēē ni de siquí jniñu ndácu maá Jitoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahán ndevāha de siquí tāca jēē cácuujénu nuū sucún. <sup>11</sup> Te ni maá ndajéhé jeē cáhīn nuū Jitoho yō, vēsú cácuujénu ga yā jíin fuerza jíin jniñu ndíso ya, te tu cáchān ndevāha ya siquí tāca jēē cácuujénu ún.

<sup>12</sup> Te tēe ún chí cácuu de nájnūhun quiti yúcú jēē ní jéconāā tī jíin modo sáha tī, te cátahú tī návāha nihīn ñáyuu tī cahni i tī. Chí cáchān neé de siquí tāca jēē tu cájecūhun ni de. Te cuu de nájnūhun jíhí tāca quiti ún. <sup>13</sup> Te jeē ní castóho de ñáyuu, suni súcuan nanihīn de ndoho de. Te cácusī ni de jíin tāca jēē cácajini ni de, te casáha de tāca jniñu jeē cándiyo neé ni de. Te cácuu de tēe quini jeē casáha jniñu cúcanu ñáyuu. Te jeē cándutútú de jíin ró vico ró, te níni cácusī ni de jíin jniñu neé jniñu stáhú.

<sup>14</sup> Te cándiyo ni de cájito de ñahan, te tu cájecuifí de sáha de cuéchi. Te cástáhú de ñáyuu tahya ni. Chí ni cacāan de jíin jnúhun ndíyo ni de tāca ndajniñu. Te tēe jnahnú ndetū cácuu de. <sup>15</sup> Te ni casana de, chí ni castóo de jnúhun jeē cúu ichi

ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun síquī jnūhun néé jéé cahán de. <sup>16</sup> Te ĩn burro ni cahán tī nájnūhun ĩn ñayuu, vēsú quiti ñihīn cúu tī. Te ni cahán tī nuū tēe ún, te súcuan ni jesi tī jeē ma quihín de cahán de táca jnūhun néé stívi.

<sup>17</sup> Te táca tēe súcuan chi cácuu de nájnūhun tesōco íchi, nájnūhun vicō jeē stechí táchī. Te jnahnū ndetū de quīvicoo de nuū néé nuū lúchi jnúú coyūcú de ní cáni. <sup>18</sup> Chi yōhyo cásándúxí de máá de jíin jnúhun cácahān saá-ni de. Te cánducú de squívī tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeē sa ní quenda i ni cácu i nuū ñáyuu casáha jniñu néé. <sup>19</sup> Te cácahān de jeē cáhīyo libre i sáha i ndese-ni cúní máá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi táca jniñu jeē cúndeyí jíin ĩn tēe jeē sáha de, suu yūcuan ndúu de mozo nuū. <sup>20</sup> Chi núu je ni cajini de ndese Yaā cúu máá Jítoho yō Jesucristo, Yaā jnáma yóhó, te núu súcuan ni quenda de ni cácu de nuū jniñu jnéhén íyo ini ñayīvī, te yūcuán na te núu ndívicoo tucu de nuū jniñu un jéé cúndeyí tucu jíin de, núu súcuan te néé gá quendōo de jeē sándihí vēsú jeē xihna ñúhūn. <sup>21</sup> Chi vāha ga núu jeē tu ní cajini de jnūhun íchi ndaā nuū, vēsú jeē ní cajini de, te stóo tucu de jniñu ndoo jeē ní ndacu ya nuū de. <sup>22</sup> Chi cúndaā jíin de nájnūhun cáhán ĩn jnūhun jenahán: Ina ni nacaji tī jeē ní ndujen tī. Te quīnī ní ndundoo, ni nacuchi tucu tī ndehyū, achí.

### *Siquī jeē ndíji Jítoho yō*

## 3

<sup>1</sup> Ñānī mánī, yāha cúu carta uū jeē tēe ri nuū rō. Te jíin ndindúú carta yáha cúní rī jeē nacani ni rō siquī ndihī jeē váha ndaā jeē jéni íchí rí rohó. <sup>2</sup> Te na núcūhun ni rō táca jnūhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

<sup>3</sup> Te xihna gā jnūhun yáha na jécūhun ni rō: Jeē nuū cuándihī quívī te quijicoo tēe sácatā siquī jnūhun ndaā yā, chi sáha de táca jniñu néé jéé ndíyo ni máá de.

<sup>4</sup> Te cahán de jíjnáhan de: ¿Najehē cúu jeē tu ndíji Cristo nájnūhun ni jejnūhun ya? Chi nde quívī ní cajihí jíi yō te nde vijna, tu ndé sáma cuíti ndihī jeē íyo ndé ná ni jecōo ñayīvī, achí de. <sup>5</sup> Chi tu cácuu de jecūhun ni de jeé ndé jenahán ní cuvāha andíví jíin jnūhun ni cahān Yaā Dios. Te ni ndacu ya jniñu jeē na cuvāha ñayīvī jíin ndute, te mēhñū ndute ni nane ñuhun íchi. <sup>6</sup> Te suni jíin ndute ni naa ñayīvī jenahán, chi ni ndaa ndute jeē ní cuun saū xeén. <sup>7</sup> Te suni súcuan jíin jnūhun ni cahán Yaā Dios ni sātūhva ya jeē cayú andíví jíin ñáyīvī íyo vijna. Chi máá quívī juicio te cayū ndihī, te jnahnū ndetū ñayuu ni casáha néé.

<sup>8</sup> Te suni ma náā ni rō jnūhun yáha, ñānī mánī: Jeē nuū máá Jítoho yō chi ĩn quívī cúu nájnūhun mil cuiyā, te mil cuiyā cúu nájnūhun ĩn quívī-ni. <sup>9</sup> Chi nasūu jéé cucuéeé máá Jítoho yō siquī jnūhun ni jejnūhun ya, nájnūhun cájeni ni sava ñayuu. Chi sa suhva íyo paciencia ni yā nuū yō, chi tu cúní yā jeē jnahnū ndetū ni ĩn yó, chi sa cúní yā jeē ndihī yó nacani ni yō stóo yó cuéchi yó.

<sup>10</sup> Te quívī ndíji máá Jítoho yō, ĩn sanaa-ni te quee, nájnūhun ĩn sanaa-ni te quee ñacuñhá jecuáā. Te quívī ún chi nīhīn ndasí andíví, te naa-ni. Te ndihī jeē íyo andíví chi naa sáha ñuhūn. Te ñayīvī jíin táca jéé íyo ini, ndihī cayū.

<sup>11</sup> Te núu súcuan naa t̄acá un, te cánuú ndasí j̄éē coo ndoo ánuá r̄o te chiñúhún váha ro yá jijnáhan ró. <sup>12</sup> Te condetu ró te condihv̄i ni r̄o jeē na queé yach̄i quiv̄i ndíji Yaā Dios. Te quiv̄i ún cayū andiv̄i te naa-ni, te t̄aca j̄éē iyó chi ndute sáha yáñuhún. <sup>13</sup> Te máá yó chi cándetu yó andiv̄i j̄éē jíin ñáyiv̄i j̄éē, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

<sup>14</sup> Núu súcuan, ñánī mánī, níni j̄éē cándetu ró j̄éē squícu t̄acá jniñu yáha, te na ndúcú ndéyí ró návaha quiv̄i ndíji ya te nih̄in yā rohó j̄éē cáyūcu mánī r̄o, te coo ndoo ró j̄éē tú na cuēchi ró. <sup>15</sup> Te na jécūhun ni r̄o jeē siqūi jeē iyó paciencia ni máá Jítóho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū r̄o, chi súcuan ni steén Yaā Dios jnūhun ndíchi yá nuū de. <sup>16</sup> Te cáhán de siqūi jnūhun yáha núu t̄aca carta jeē ní tee de. Te nuū carta de un iyó jecu jnūhun jeē yí jécūhun ni yō. Te ñayuu tu jécūhun ni jíin ñáyuu tu íje jíin jnūhun cándíje, cánasama i modo steén jnūhun yí un, nájñūhun násama i jeē cahán sava ga tutu ñi. Te súcuan sáha i jeē jnahnú ndetū maá i.

<sup>17</sup> Te róhó ñánī mánī, vijna te je ni cajini r̄o ndese coo t̄acá jniñu yáha. Núu súcuan te coto má condiqūin r̄o jnūhun stáhú cástéén ñayuu casáha néé. Chi núu tuú te snáa r̄o jnūhun cáh̄in nih̄in ró jíin. <sup>18</sup> Chi sa na cóndihv̄i gā ni r̄o cuni r̄o ndese Yaā cúu máá Jítóho yō Jesucristo, Yaā jnáma yóhó. Te na íje ga ni r̄o jíin jnūhun cúndáhú ni yā rohó. Te na cáhán yō jeē yóhoyo luu cújéhnu ya nde vijna jíin ní cáni. Súcuan na cóo. Amén.

## CARTA HN JEE NI TEE SAN JUAN APOSTOL NUU ÑAYUU CACANDIJE

### *Jñuhun cotecu yō ni# cáni*

<sup>1</sup> Jñuhun cátee ri cuajeē nuū rō jijnáhan ró cúu jñuhun máa Yaā jeē je íyó ndé ná tu jecōo táca jée íyó. Te ni cajini sōho ri jeē ni cáhān yā, te ni cajito jínū rī yā, chí ni cajito vāha ri nuū yā, te ni cajni rī yā. Te máa yá cúu Jñuhun cotecu yō ni# cáni. <sup>2</sup> Chi Yaā yáha jée sáha ya jeē cótecu yō, ni quenda ndijin yā. Te cácahān rī jñuhun ya, chí ni cajito rī yā. Te cácastūhun rī nuū rō jijnáhan ró síqu Yaā cúu Jñuhun cotecu yō ni# cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri. <sup>3</sup> Jeē ní cajito ri jín jée ní cajini sōho ri, yūcuan cúu jeē cácastūhun rī nuū rō, návāha coo inuú ni rō jín yó jijnáhan yó. Te jendaá chí cáhiyo inuú ni yō jín máa Tátá yō Yaā Dios jín Séhe ya Jesucristo. <sup>4</sup> Te jñuhun yáha cátee ri cuajeē nuū rō, návāha cusī teyí ni rō jijnáhan ró.

### *Yaā Dios cúu luz*

<sup>5</sup> Te yāha cúu jñuhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chí yōhyo ndaā yā, te tú cuiti na jniñu néé íyó jín yá. <sup>6</sup> Núu cácahān yō jeē cáhiyo inuú ni yō jín yá, te núu cájica yó nájñuhun nuū néé jeē sáha yó jniñu néé, núu súcuan te cástáhú yó, te nasūú jniñu ndaā casáha yó. <sup>7</sup> Te núu cájica yó jín luz yā jeē casáha yó jniñu ndaā, nájñuhun íyó máa yá jín luz yā jeē sáha ya jniñu ndaā, yūcuán na te cáhiyo inuú ni yō jín táca jñáhan yó. Te niñi maá Séhe ya Jesucristo sándoo yóhó núu ndihi cuēchi yó.

<sup>8</sup> Núu cácahān yō jeē tú na cuēchi yó, te cástáhú yó maá yó jeē jeni ni yō súcuan, te tu ñuhun jñuhun ndaā ini yō. <sup>9</sup> Te núu nacani ndaā yō cuēchi yó nuū yā, te cone cáhnu ni yā nuū cuēchi yó, te sándoo ya yohó ndihi jeē neé casáha yó. Chí jín yō jeē Yaā vāha Yaā ndaā cúu ya. <sup>10</sup> Te núu cácahān yō jeē tú na cuēchi yó, te nájñuhun sáha yó jée Yaā stahú cúu ya, te tu cándije ndije yó jñuhun ya.

### *Cristo cúu Yaā cahán jehē yō*

## 2

<sup>1</sup> Táca jñuhun yáha tée ri cuajeē nuū rohó jée cácuu ró nájñuhun sēhe ri, návāha ma sáha ró cuēchi jijnáhan ró. Te núu ndé in ró ní sáha cuēchi, te íyó máa Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. <sup>2</sup> Te ni socō yā maá yá jeē ndahva yā cuēchi yó, te nasūu cuēchi máa-ni yó, chí suni cuēchi ñayuu ni# ñáyiví.

<sup>3</sup> Núu squícu yó jniñu ndácu Yaā Dios nuū yō, jín yúcuán cúcáhnu ni yō jeē jini ndije yó ndese Yaā cúu ya. <sup>4</sup> Te núu cáhán in ñayuu: Ruhū chí jín rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jñuhun ndaā. <sup>5</sup> Te sa ñayuu squícu jñuhun ya, je ni ije vāha ni i jeē maní i jín yá. Súcuan te cuni yō núu ndúú yó jín yá chí tuú. <sup>6</sup> Núu cáhán in ñayuu jeē nduú i jín yá, cánuú jée caca ndaā i nájñuhun ni jica Jesucristo.

### *Jniñu jée ndácu ya nuū yō*

<sup>7</sup> Hermano, nasūú in jniñu jée ndácu ri nuū rō jeē cahán rī jeē na cundáhu ni rō jñáhan ró. Chí jniñu jeē je cájini rō nde ná ni quejéé ró candije ró cúu. Te jniñu yáha jeē ndácu ya, vēji nde jenahán, te suu cúu jñuhun ni cajini sōho

ró ndé quivī ní quejéé ró candíje ró. <sup>8</sup> Te vēsú súcuan, te níni jniñu jéé cúu, te jniñu ndaā cúu nuū Cristo jíin nuū maá ró jijnáhan ró. Chi je cuayáha jniñu néé jéé iyó nuū néé, te je stéén maá luz ndaā ini anuá yō vijna.

<sup>9</sup> Núu ñn ñayuu cahán i jeē jíca i jíin luz yā, te núu jito uhū i jnáhan i, ñayuu ún chi jíca ga i nájnūhun nuū néé jíin cuéchi. <sup>10</sup> Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu váha. Te ni ñn ma cúu sáha jeē quívī i cuéchi. <sup>11</sup> Te ñayuu jito uhū jnáhan, chi iyó i nuū néé, te jíca i nuū néé. Te tu jíni i ndé chi quíhín i, chi nuū néé un ní jesi jeē tu jécūhun ni i.

<sup>12</sup> Róhó jéé cácuu sēhe, tée ri jnūhun yáha cuájeē nuū rō, chi jeē siquī Jesucristo te ni ine cáhnu ni Yaā Dios nuū cuéchi ró. <sup>13</sup> Róhó tátá jijnáhan ró, suni tée ri nuū rō, chi cájini rō ndese Yaā cúu Yaā iyó ndé xíhna ñúhún. Róhó tée suchí jíjnáhan ró, suni tée ri nuū rō, chi ni cacundeyí ró jeē tu ní cúu squívī jexeén rohó cuéchi.

Róhó jéé cácuu sēhe, tée ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. <sup>14</sup> Róhó tátá jijnáhan ró, suni tée ri nuū rō, chi cájini rō Yaā iyó ndé xíhna ñúhún. Róhó tée suchí jíjnáhan ró, suni tée ri nuū rō, chi cáhín nihin ró, te cácandíje ró jnúhun Yaā Dios, te ni cacundeyí ró siquī jéxeén.

<sup>15</sup> Ma cutóó ní rō siquī ñayívī, ni táca jéé iyó ini ñayívī. Chi núu ndé ñayuu cutóó ni i siquī ñayívī, ñayuu ún tu iyó máni i jíin Tátá yō Yaā Dios. <sup>16</sup> Chi táca jéé cúu cuenta ñayívī, nasūu ndé nuū Tátá yō Yaā Dios vēji, chi cuenta ñayívī cúu. Te yūcuan cúu táca jéé cájini ni yō jeē cuní modo neé máá yó, jíin jéé ndíyo ni yō jeē jito yó nuū, jíin jéé sandúxí yó maá yó siquī ndajniñu névaha yó. <sup>17</sup> Te cuandíhi ñayívī jíin táca jéé ndíyo néé ni yō. Te ñayuu casáha jeē cuní maá Yaā Dios, chi cotecu i ní cáni.

### *Jnūhun ndaā jíin jnūhun stáhú*

<sup>18</sup> Róhó jéé cácuu nájnūhun sēhe ri, cáhán rī jíin ró jeē cuandíhi quivī. Te je ni cajini jnūhun ró jéé quíji máá tée cuu contra siquī Cristo. Te nde vijna je ni caneco cuéhē tée jeē cácuu contra siquī Cristo. Te jeē yūcuan jíni yō jeē cuandíhi quivī. <sup>19</sup> Mēhñu máá yó ni quendacoo de, te nasūu jnáhan yó cácandíje cácuu de. Chi núu jeē jnáhan yó cácuu de, te quendōo de jíin yó nuū. Te ni quenda de cuango de, návaha cuni cají yó jéé násūu jnáhan yó cácuu ndíhi de.

<sup>20</sup> Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jnūhun ndaā. <sup>21</sup> Núu súcuan te tée ri yáha cuájeē nuū rō, siquī jeē cájini rō jnūhun ndaā, nasūu siquī jeē tu cájini rō. Te cájini rō jeē tú na jnūhun stáhú iyó nuū jnūhun ndaā.

<sup>22</sup> ¿Ndeé ñn cúu jeē cahán máni jnūhun stáhú? Suu tēe jeē cahán jeē Jesús, tu cúu ndíje ya Cristo, Yaā ní tají Yaā Dios. Yūcuan cúu tēe jeē cúu contra siquī Cristo, chi tu jéjnúhún de máá Tátá yō Yaā Dios jíin Sēhe ya. <sup>23</sup> Táca ñayuu jeē tu jéjnúhún i Sēhe ya, suni tu iyó máá Tátá jíin i. Te ñayuu jeē jejnúhún i Sēhe ya, suni iyó máá Tátá jíin i.

<sup>24</sup> Núu súcuan te chuhun váha ni rō maá jnúhun ni cajini sōho ró ndé jeē xíhna ñúhún. Te núu ñúhún váha ni rō jnūhun ní cajini sōho ró ndé jeē xíhna ñúhún, yūcuán na te suni ndúú ró jíin máá Tátá yō jíin Sēhe ya. <sup>25</sup> Te yáha cúu jnúhun jeē ni jéjnúhun Jesucristo nuū yō: jeē cotecu yō ní cáni sáha ya.

<sup>26</sup> Jnūhun yáha ní tee ri nuū rō jeē cástūhun rí siquī ñayuu cánducú stáhú róhó. <sup>27</sup> Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jíni ñúhún jéé stéén ni ñn ñayuu nuū rō ndé vé cúu

jendaá, chi máá Espiritu cúu jeē steén ndihi nuū rō, te steén yā jnūhun ndaā, chi tu stáhú cuiti yā. Núu súcuan te caca ndúú ró jiín Cristo, nájñūhun stéén Espiritu nuū rō.

<sup>28</sup> Séhē jijnáhan ró, vijna te na cáca ndúú ró jiín Cristo, návāha núu na quénda ndijin yā, te ma yūhu yó, ni ma cúcanu yō nuū yā quivī ndjī ya. <sup>29</sup> Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñū ndaā, séhe Yaā Dios cácuu i.

### *Jnūhun ñayuu cácuu séhe Yaā Dios*

## 3

<sup>1</sup> Nacā jeē yóhoyo ni cundáhú ni Tatá yō Yaā Dios yohó, chi ni nihīn yō jnūhun cuu yó séhe ya, te suu cúu ndije yó. Jeē yúcuan, ñáyuu ñayivī tu cájini i jeē cúu yó séhe ya, chi tu jíní i ndese Yaā cúu máá yá. <sup>2</sup> Ñānī mánī, vijna te cúu yó séhe Yaā Dios, te ná tu cuni yō ndese coo yó níí cáni. Te je jíní yō jeē quivī quénda ndijin Jesucristo, te nduu yó nájñūhun iyó máá yá, chi coto yó nuū yā ndese iyó yá. <sup>3</sup> Te tāca ñáyuu jeē súcuan ñūhun ni i, chi sándoo i ánuá i, nájñūhun iyó ndoo Jesucristo.

<sup>4</sup> Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. <sup>5</sup> Te je cájini rō jeē ní quiji Jesucristo ini ñayivī návāha quende yā cuēchi yó. Te máá yá tú na cuēchi ya. <sup>6</sup> Te tāca ñáyuu jeē nduú i jín yá, tu cájica i jín cuēchi. Te tāca ñáyuu cájica jín cuēchi, tu jíní i ya, ni tu jécūhun ni i ndese Yaā cúu ya. <sup>7</sup> Séhē jijnáhan ró, coto ró jéé ma stáhú ni ñn i róhó. Chi na jécūhun ni rō jeē ñáyuu casáha jniñū ndaā, máá i cácuu ñayuu ndaā, nájñūhun iyó ndaā máá yá. <sup>8</sup> Te ñayuu casáha cuēchi, máá i cácuu séhe jexeén. Chi jexeén cúu jeē sáha cuēchi vēji nde jeē xihna ñúhún. Jeē yúcuan ní quiji Séhe Yaā Dios, jeē snā yā táca jniñū néé sáha jexeén.

<sup>9</sup> Ni ñn ñayuu jeē cúu séhe Yaā Dios, tu jíca i jín cuēchi, chi ni sáha Yaā Dios jeē ní nduu i nájñūhun iyó máá yá. Te ma cúu ga caca i jín cuēchi, chi séhe Yaā Dios cácuu i. <sup>10</sup> Súcuan cuni yō ndé ñn cúu séhe Yaā Dios jín séhe jexeén: Tāca ñáyuu jeē tu sáha jniñū ndaā, jín jéé tu cundáhú ni jnáhan, nasūu séhe Yaā Dios cúu i.

### *Jeē na cundáhú ni yō jnáhan yó*

<sup>11</sup> Yāha cúu jnūhun jeē ní cajini sōho ró ndé jeē xihna ñúhún: jeē na cundáhú ni yō jnáhan yó. <sup>12</sup> Te ma sáha yó nájñūhun ni sáha Caín, jeē ní cuu de séhe jexeén, te ni jehni de ñani de. ¿Te najehē ni jehni de ñani de? Siqūi jeē ñani de ni sáha jniñū ndaā te mání jniñū néé ní sáha máá de.

<sup>13</sup> Hermano jijnáhan ró, ma cunéé ni rō te núu ñayuu ñayivī cáquitī ni i nuū rō. <sup>14</sup> Te máá yó chi siqūi jeē cundáhú ni yō jnáhan yó, súcuan jíní yō jeē jé ni cácu yó jéé cótecu yō níí cáni. Te ñayuu jeē tu cundáhú ni jnáhan, iyó i jín jnūhun jnahnū ndetū i. <sup>15</sup> Chi tāca ñáyuu quitī ni nuū jnáhan, nájñūhun ñayuu jéhi ndīyi cúu i. Te cájini rō jeē ñáyuu jéhi ndīyi, ma nihín tahu i cotecu i níí cáni. <sup>16</sup> Jeē ni jihí Cristo jehē yō, yúcuan cúu jeē steén cají ndese cúu jnūhun cundáhú ni. Te máá yó, chi suni súcuan jíní ñúhún cundáhú ni yō jnáhan yó vēsū na cúu yó jehē i. <sup>17</sup> Te núu névāha yó jéé cótecu yō ñayivī, te núu jíní yō jeē cúmaní nuū jnáhan yó, te núu tú cundáhú ni yó i cuāha yó jéé jini ñúhún i, núu súcuan ¿te á iyó mání yō jín Yaā Dios, chi naún? <sup>18</sup> Séhē jijnáhan ró, ma cundáhú ni yō jín máá jnūhun cáhán-ni yó, chi sa suhva na cundáhú ndije ni yō nde jín jniñū sáha yó.

### *Ndese cucáhnu ni yō jeē váha sáha yó núū Yaā Dios*

<sup>19</sup> Te súcuan cundaā ni yō jeē squícu yó jnúhun ndaā, te cucáhnu ni yō jeē váha sáha yó núū yā. <sup>20</sup> Chi núū ánuá yō tú váha sáha siquī jeē iyó cuēchi yó, te Yaā Dios chi cújehnu ga yā vēsú anuá yō, te jíní ndihi ya táca un. <sup>21</sup> Núū súcuan ñānī mánī, núū váha sáha ánuá yō siquī jeē tú na cuēchi yó, yūcuán na te cucáhnu ni yō jeē váha sáha yó núū Yaā Dios. <sup>22</sup> Te táca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. <sup>23</sup> Te yáha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájñuhun ni ndacu ya jniñu nuū yō. <sup>24</sup> Te táca ñayuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuán te jíní yō jeē ndeé Yaā Dios ini yō.

### *Jnúhun jeē véji nuū Espíritu jíin jnúhun cáhán contra Cristo*

## 4

<sup>1</sup> Ñānī mánī, ma candíje ró táca téē jéē cácahān de jeē jíin Espíritu Yaā Dios cánacani de jnúhun. Chi sa suhva coto ndee rō de, núū nde nuū Yaā Dios véji jnúhun cácahān de, chí tuú. Chi ini ñayiví je ni canecoo cuehē téē cánacani jnúhun stáhú, te cácahān de jeē ndé nuū Yaā Dios véji. <sup>2</sup> Te súcuan nacuni rō ndé-ni i cúu jeē jíin Espíritu Yaā Dios cahán: táca ñayuu jeē cácahān ndaā jeē ní quiji Jesucristo, ni nduu ya téē, máá i cúu jeē jíin Espíritu Yaā Dios cácahān. <sup>3</sup> Te táca ñayuu jeē tu cájejnúhún jeē súcuan ni nduu ya téē, máá i chi nasūu jíin Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnúhun ró jéē quíjicoo ñayuu súcuan, te vijná je cáhíyo i ini ñayiví.

<sup>4</sup> Séhé jijnáhan ró, máá ró cácuu sēhe Yaā Dios, te je ni cacundeyí ró siquī téē cástáhú un. Chi jéhnu ga cúu poder máá Yaā jeē ndeé ini rō, vēsú poder máá jéē ndeé jíin ñayuu ñayiví jéē castáhú. <sup>5</sup> Máá i cácuu cuenta ñayiví, te jeē yúcuán cácahān i jnúhun cuenta ñayiví. Te ñayuu cácuu cuenta ñayiví, cájini nahín i jnúhun ún. <sup>6</sup> Te máá yó chi sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnúhun cácahān yō. Te ñayuu jeē násūu sēhe Yaā Dios cácuu, máá i tu cájini nahín i jnúhun cácahān yō. Te súcuan nacuni yō ndé-ni cúu jeē cahán jnúhun ndaā jíin ndé-ni cúu jeē cahán jnúhun stáhú.

### *Máni jnúhun cúndáhú ni iyó jíin Yaā Dios*

<sup>7</sup> Ñānī mánī, na cúndáhú ni yō jnáhan yó, chi jnúhun cúndáhú ni, nde nuū Yaā Dios véji. Te táca ñayuu cundáhú ni jnáhan, chi sēhe Yaā Dios cúu i, te jíní i ndese Yaā cúu Yaā Dios. <sup>8</sup> Te ñayuu jeē tu cúndáhú ni jnáhan, tu jíní i ndese Yaā cúu Yaā Dios, chi máni jnúhun cúndáhú ni iyó jíin Yaā Dios. <sup>9</sup> Súcuan ni steén Yaā Dios ndese cúndáhú ni yá yohó, chi ni tají yá Sēhe ya ni quiji ini ñayiví yáha, vēsú mañúhún-ni ya iyó, návāha cotecu yō ni cáni sáha ya. <sup>10</sup> Te yáha cúu jnúhun cúndáhú ni: nasūu jéē xihna máá yó ni iyo maní yō jíin Yaā Dios, chi sa suhva máá yá cúu jeē ní cundáhú ni yá yohó. Te ni tají yá Sēhe ya ni quiji, návāha socō yá máá yá jeē quende yá cuēchi yó.

<sup>11</sup> Ñānī mánī, núū súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. <sup>12</sup> Ni ññ ñayuu tu ní jíto cuiti nuū Yaā Dios. Te núū cúndáhú ni yō jnáhan yó, te ndeé Yaā Dios ini anuá yō, te je ni ije váha ni yō jíin jnúhun cúndáhú ni. <sup>13</sup> Te máá Espíritu Santo jeē ni jéhe ya jeē ndeé ini yō, máá yá steén jeē ndúú yó jíin Yaā Dios, te ndeé Yaā Dios ini yō. <sup>14</sup> Te ni cajito ri te cácastúhun rí jeē máá Tátá yō ni tají yá Sēhe ya ni quiji návāha



jnama ya ñayuu ñayiví. <sup>15</sup> Te núu ndé ñayuu jejnúhún i jeē Séhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

<sup>16</sup> Te máá yó, je ni jini yó te ni candíje yó jeē cundáhú ni Yaā Dios yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnāhan, ndúú i jíin Yaā Dios, te ndeé yá ini anuá i. <sup>17</sup> Te súcuan cúu jeē íje vāha ni yó jíin jnūhun cundáhú ni, návāha ma yūhu yó quiví sándaā yā jniñu yó. Chi nájñūhun cundáhú ni Cristo, suni súcuan cándaā máá yó ini ñayiví yáha. <sup>18</sup> Te núu manī yó jíin yá, te tu yúhú yó nuū yā. Chi núu ni ije yó jíin jnūhun manī yó jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jnūhun manī i jíin yá.

<sup>19</sup> Te yohó chi manī ndasí yó jíin Yaā Dios, chi xihna gā máá yá ni cundáhú ni yá yohó. <sup>20</sup> Te núu ñin ñayuu cahán i jeē manī i jíin Yaā Dios, te núu quítí ni i nuū jnāhan i, núu súcuan te ñayuu stahú-ni cúu i. Chi núu ñin ñayuu tu iyó máni i jíin jnāhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yá. <sup>21</sup> Chi je ni ndacu ya jniñu yáha nuū yó: Ñayuu jeē manī i jíin Yaā Dios, suni na cóo manī i jíin jnāhan i.

*Jeē cúndeyí yó siquī jeneé íyó ini ñayiví*

## 5

<sup>1</sup> Tāca ñayuu jeē cácandíje i jeē Jesús cúu Cristo, Yaā ní tají Yaā Dios, máá i cácuu séhe Yaā Dios. Te ñayuu manī jíin Yaā cúu Tátá, suni cácundáhú ni i ñayuu cácuu séhe ya. <sup>2</sup> Súcuan jíni yó jeē cundáhú ni yó ñayuu cácuu séhe ya, núu manī yó jíin yá te squícu yó jniñu ndácu ya. <sup>3</sup> Chi jeē squícu yó jniñu ndácu Yaā Dios cúu jeē manī yó jíin yá. Te jniñu ndácu ya chi tú vēyi. <sup>4</sup> Chi tāca ñayuu cúu séhe Yaā Dios, cúndeyí i siquī jeneé íyó ini ñayiví. Te jeē candíje yó jeē cundáhú ni yá yohó, yúcuan cúu fuerza jeē sáha jeē cúndeyí yó. <sup>5</sup> Máá-ni ñayuu jeē candíje jeē Jesús cúu Séhe Yaā Dios, máá i cúu jeē cúndeyí siquī jeneé íyó ini ñayiví.

*Jnūhun cahán ndaā siquī Séhe Yaā Dios*

<sup>6</sup> Te jeē ní quiiji Jesucristo ini ñayiví, chi ni jendute ya jíin ndute, te ni jeti niñi yá jeē ni jíhi yá jehé yó. Te nasūu máá ñin-ni jeē ní jendute ya jíin ndute, chi suni ni jeti niñi yá. Te máá Espíritu Yaā Dios cahán ndaā siquī yá, chi nuū máá Espíritu vēji jnūhun ndaā. <sup>7</sup> Chi ini andiví íyó únī jeē cácahān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñin-ni cúu ya. <sup>8</sup> Te ini ñayiví suni íyó únī jeē steén ndaā: máá Espíritu, jíin jéé ní jendute Jesús, jíin jéé ní jeti niñi yá. Te ndinúni yáha, chi inuú-ni steén siquī yá. <sup>9</sup> Te cájetáhú yó jnūhun cácahān ndaā tēe, te jéhu ga cúu jnūhun cáhān máá Yaā Dios. Te jnūhun ni cahān yā cúu jnūhun siquī Séhe ya. <sup>10</sup> Ñayuu cácandíje jeē Séhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácandíje jeē ni cáhān Yaā Dios, nájñūhun cásáha i jeē Yaā stahú cúu ya, chi tu cácandíje i jnūhun ni cahān ndaā yá siquī Séhe ya. <sup>11</sup> Te jnūhun ndaā un cúu jeē ni sáha ya jeē cótecu yó ní cání, te Séhe ya ndiso jnūhun cotecu yó. <sup>12</sup> Ñayuu jeē iyó Séhe ya jíin i, je ni nihin tahú i cotecu i. Te ñayuu jeē tu iyó Séhe ya jíin i, ma nihin tahú i cotecu i.

*Jnūhun consejo jeē sándihí*

<sup>13</sup> Jnūhun yáha tée ri nuū rohó ñayuu cácandíje Séhe Yaā Dios, návāha cucáhu ni rō jeē ni nihin tahú rō cotecu rō ní cání.



<sup>14</sup> Te cúcáhnū ni yō Yaā Dios, chi jíni yō jeē núu na vé jicán yō nuū yā jeē suni cúni maá yá, te jíni nahín yá jeē jicán yō. <sup>15</sup> Te núu jíni yō jeē jíni nahín yá jeē jicán yō, núu súcuan te suni jíni yō jeē sáha ya jeē jicán yō.

<sup>16</sup> Núu ññayuu jíni i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahu i nuū Yaā Dios, te cuāha ya jnūhun cotecu jnáhan i, te núu násūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhán rī jeē cacán tahu rō jehē ñayuu sáha cuēchi súcuan.

<sup>17</sup> Tācá jniñu néé cúu cuēchi, te íyó cuēchi jeē násūu jéē jnahnú ndetū i cúu.

<sup>18</sup> Te jíni yō jeē tāca ññayuu cácuu sēhe Yaā Dios, tu jíca i jíin cuēchi. Chi Yaā cúu Sēhe Yaā Dios, ndító vāha ya i. Te tú na vé cúu sáha jexeén jíin i.

<sup>19</sup> Te jíni yō jeē sēhe Yaā Dios cácuu yó. Te ñayuu ññáyiví yíhi i ndaha jexeén.

<sup>20</sup> Te suni jíni yō jeē ní quiji Sēhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Sēhe ya Jesucristo. Máá yá cúu ndije Yaā ndaā, te máá yá sáha jeē cótecu yō ññ cáni. <sup>21</sup> Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

## CARTA UU JEE NI TEE SAN JUAN APOSTOL

### *Jnūhun ndaā jīn jnūhun cūndáhú ni*

<sup>1</sup> Máá ná cúu tēe jéhu ndíso jniñu, te tēe ná carta yáha cuájeē nuū ni jēe cúu ní hermana ni nacāji Yaā Dios, jīn núu séhe ní jijnáhan i. Te manī na jīn ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jini jnūhun ndaā. <sup>2</sup> Te manī na jīn ní jijnáhan ní siquī jeē cá candíje yó jnūhun ndaā yā jeē iyó ini anuá yō, te coo jīn yó ní cáni. <sup>3</sup> Te ñūhun ni na jēe Tatá yō Yaā Dios jīn Séhe ya Jitoho yō Jesucristo, na sáha ga yā jeē váha níhín, te cundáhú ni yā níhín, te sáha ya jeē coo ndeyí coo sī ni ní, jīn jnūhun ndaā jīn jnūhun cūndáhú ni.

<sup>4</sup> Yōhoyo ni cusī ni ná, chi ni jini na jēe sava séhe ní cájica i jīn jnūhun ndaā, nájnūhun ni ndacu máá Tatá yō Yaā Dios jniñu nuū yō. <sup>5</sup> Hermana, cáhán ndahú ná jīn ní jeē na cūndáhú ni yō jnáhan yō. Te jnūhun tēe ná yáha cuájeē nuū ní, nasúu ñn jniñu jéé sá ndácu ya cúu, chi jniñu ní ndacu ya nuū yō nde ná ni quejéé yó candíje yó cúu. <sup>6</sup> Te jeē cundáhú ni yō jnáhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jīn jnūhun cūndáhú ní, nájnūhun ni cajini sōho ní ndé ná ni quejéé ní candíje ní.

### *Siquī tēe cástáhú*

<sup>7</sup> Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra siquī Cristo. <sup>8</sup> Coto ní jēe ma snáa ni táhū siquī jniñu váha ní casáha ní, chi sa suhva jeē na níhín ni ndíhi tahū ní.

<sup>9</sup> Núu ndé ñáyuu jniñga jnūhun, te tu quéndōo i jīn jnūhun ni steén Cristo, núu súcuan te tu iyó Yaā Dios jīn i. Te ñáyuu quéndōo jīn jnūhun ni steén Cristo, chi iyó Tatá yō jīn i, te suni iyó Séhe ya jīn i. <sup>10</sup> Te núu jinū ñn ñáyuu vehe ní, te núu tu quijnáhan jnūhun steén i jīn jnūhun yáha, te ma cuáha ní jnūhun condee i vehe ní, ni ma cahán ni jnūhun ndeyí ni jīn i. <sup>11</sup> Chi ñáyuu cahán jnūhun ndeyí ni jīn i, chindéé ñájnáhan jīn i siquī jniñu néé casáha i.

### *Jnūhun sandíhi*

<sup>12</sup> Iyó cuehē gā jnūhun cahán na jīn ní jijnáhan ní, te tu cúní na tee ná núu tútu jīn tinta. Chi ñūhun ni na cuájeē ná coto jnáhan yó, te ndajnūhun yó, náváha cusī ndasí ni yō.

<sup>13</sup> Tāca séhe cuhū ní, ñahan jeē suni ni nacāji ya, cácahán i jeē sánde yí ni ní. Súcuan na cóo. Amén.

## CARTA UNI JEE NI TEE SAN JUAN APOSTOL

### *Jeē jejnūhún de tēe nání Gayo*

<sup>1</sup> Maaá rí cúu tēe jéhnū ndíso jníñu, te tēe rí carta yáha cuájeē nuū rō, amigo Gayo, chí manī rí jíin ró sáha jnūhun ndaā.

<sup>2</sup> Nánī mánī, jícan tahú rí jeē vāha na quihín tācá jniñu sáha ró, jíin jēē na cóo vāha ró, nájnūhun íyó vāha ánuá rō jíin jnūhun ya. <sup>3</sup> Yōhōyō ní cusī ní rí ná ní quecoo sava hermano te ní cacastūhún de nuū rí ndese vāha squícu ró táca jniñu ndaā, chí jíca ndaā rō. <sup>4</sup> Tuá na inga sáha jeē cúsi gā ní rí, chí mánī jeē nihín rí jnūhun jeē cájica ndaā ñayuu cácuu nájnūhun sēhe rí siquī jeē ní scándíje rí i.

<sup>5</sup> Nánī mánī, yōhōyō vāha sáha ró jēē chindéé ñáhán ró tācá hermano, te víhyá gā núu tēe ñuu jíca cácuu de. <sup>6</sup> Chí tēe un ní canacani de jnūhun nuū ñayuu cácaandíje yáha, ndese cúndáhú ní rō de. Te jícan rí jeē chindéé ñáhán gá rō de, núu na vé jíni ñúhún de jeē caca ga de ichi nuū quihín de, nájnūhun nújnahan ní Yaā Dios. <sup>7</sup> Chí tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jíni jnūhun Yaā Dios. <sup>8</sup> Jeē yúcuán cánuú coto yó de, chindéé ñáhán yó de jeē cánacani de jnūhun ndaā.

### *Siquī jeē tú vāha sáha Diótrefes*

<sup>9</sup> Je ní tee rí ñn carta nuū ñayuu cácaandíje jíñā. Te Diótrefes, tu jétáhú de jnūhun cáhán rí, siquī jeē cuní de cujéhnū máá de nuū i. <sup>10</sup> Jeē yúcuán, núu na jéé rí te cahān rí nuū de siquī jniñu sáha de, chí yōhōyō sájnūhún de te cáhán de jnūhun stáhú siquī rí jíjnahan rí. Te nasūu máá yúcuán-ni sáha de, chí suni tu jétáhú de tācá hermano jéngoo nuū de, te jési de jeē ma cuátáhú ñayuu nuū tācá hermano un. Te ñayuu cájetáhú nuū hermano un, quénehen de i nuū cándutútú ñayuu cácaandíje.

<sup>11</sup> Nánī mánī, ma ndácu ró ñayuu casáha jniñu néé, chí sa suhva ñayuu casáha jniñu vāha. Chí sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

### *Jeē cácahān i jeē vāha sáha Demetrio*

<sup>12</sup> Táca ñayuu chí cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuán cácahān máá rí, te cájini rō jeē iyó ndaā jnūhun cáhán rí.

### *Jnūhun sandihí*

<sup>13</sup> Iyó cuéhē gā jnūhun cahān rí jíin ró, te tu cuní rí tee rí jíin tinta jíin pluma. <sup>14</sup> Chí ñúhún ní rí cuajeē yachí rí coto jnahan yó, te ndajnūhun yó.

<sup>15</sup> Te ñúhún ní rí jeē na cóo ndeyí coo sī ní rō. Táca amigo yō yāha cácahān i jeē sándeýí ní rō. Te suni cahān rō jíin ñn ñn amigo jíñā jeē sándeýí ní i, áchí rí, te cocahān yō.

## CARTA JEE NI TEE SAN JUDAS APOSTOL NUU ÑAYU CACANDIJE

<sup>1</sup> Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū roho ñayuu jeē ní cana máá Tátá yō Yaā Dios, te ni sáha ya jeē iyó ndoo iyó íi rō nuū yā jeē cácuu rō ñayuu manī yā jíin. Te Jesucristo ndító vāha ya roho jée cáyihī rō ndaha ya. <sup>2</sup> Te ñuhun ni rī jeē na cūndáhú gá ni yā roho, te sáha ya jeē coo ndeyí coo sī ni rō, te coo manī ndasí yá jíin rō, te na ndúcuehe gā tāca jée yáha núu rō.

*Siquī tēe cástéén jñūhun stáhú*  
(2 Pedro 2.1-17)

<sup>3</sup> Ñānī mánī, yōhoyo ní cuu ni rī tee ri nuū rō siquī jñūhun ni jnama ya roho jíin rúhū jíjnáhan yó. Te ni jini rī jeē cánuú gá tee ri carta jeē stihví ni rī roho návāha nducú ndeyí rō jeē ma cásī ñayuu nuū jñūhun cácadnje yó. Te jñūhun ún chí je ni jēhe ya ñin jíinu-ni nuū tāca ñayuu maá yá. <sup>4</sup> Chi sava tēe ni castáhú de rōhó ní quīvicoo de mēhñu rō. Te tēe ún chí nde jengahán je cáhán tutu íi jeē jnahnú ndetū de siquī jñiñu cásáha de. Cácuu de tēe ndevāha, chí cácahān de jeē vāha ni Yaā Dios, te jeē yúcuan vetū-ni sáha de jñiñu neé, cácahān de. Te tu cájejnūhún ndije de Jitoho yō Jesucristo jíin Yaā Dios, jeē mañúhún-ni ya cujéhnu nuū yō.

<sup>5</sup> Te vijna chí vēsú je cájini vāha rō, te cúnī rī jeē na núcūhun ni rō ndese ni sáha máá Jitoho yō. Chí ni jnama ya ñayuu Israel jengahán, ni chindéé ñájñáhan ya i jeē ní jinu i ini ñuu tatú Egipto cuahān í. Te vēsú súcuan te cuéé gá te ni snáa yā sava i jeē tu ní cácadnje í. <sup>6</sup> Te suni nucūhun ni rō siquī ndajéhé yā jeē ní castóo jñiñu ndíso, te ni castóo nuū ní ndeé andiví. Te Yaā Dios ni chindihyū yā jíjnáhan, te cándetu nde quiji quīvī cáhnu jeē sándaā yā jñiñu. Te cánuhñi jíin cadena, cáyūcu ní cáni nuū cunú núu neé. <sup>7</sup> Te suni ni stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chí suni ní casáha neé i nájñūhun ni casáha tāca ndajéhé un ndé jengahán gá. Te máá i ni cajica jnéni i te ni casáha i tāca cuéchi neé ndasí. Te ni canihñi i castigo ñuhūn jeē cayú ní cáni, te súcuan cúu i ñin ejemplo nuū ndihi ñayuu.

<sup>8</sup> Te tēe cástáhú jeē ní quīvicoo mēhñu rō, vēsú cájini de jeē súcuan ni sáha ya, te cájeni cáhá ni de, te casáha jnéhén de yiqui cúñu de, te cásquéhichí ni de tēe cándacu jñiñu Jitoho yō, te cácahān ndevāha de siquī tāca jée cácujeñnu nuū sucún. <sup>9</sup> Te nasūu súcuan ní sáha ndajéhé Miguel, vēsú ndajéhé cujéhnu ga cúu ya. Chí tu ní cáhán ndevāha ya ni tu ní ndácunehen ya cuéchi siquī jexéén ná ni casásáhán jñáhan ya jíin jexéén un jeē siquī yiqui cúñu Moisés ná ni jíihī de. Chí suhva-ni ni cahān yā: Máá Yaā Dios, Yaā cúu Jitoho, cuxeén yā nuū rō, ni achi Miguel. <sup>10</sup> Te tēe cástáhú yáha chí cácahān neé de siquī tāca jée tu cájecūhun ni de. Te tāca modo cánevāha de siquī jeē sá cáa de, nájñūhun quiti yúcú jée sá cáa ti, suu yúcuan sáha jeē jnahnú ndetū de.

<sup>11</sup> Nacā xeén ndoho de núu súcuan, chí tu cájetáhú de Yaā Dios, nájñūhun jeē tu ní jétáhú Caín. Te siquī jeē cácuni de nihñ de xūhún te cástéén de jñūhun stáhú, nájñūhun ni sáha Balaam. Te jnahnú ndetū de nájñūhun Coré, tēe ni jíihī siquī jeē ní cunihni ni de. <sup>12</sup> Tēe yáha núu cándutútú de jíin rō jeē cáyeji manī rō, te casáha de jñiñu cúcanu rō. Chí cáyeji cájihī sī ni de, te tu casáha de

cuenta ndese caji inga ñayuu, chi máni máá de ndíhví ni de caji vāha de. Te cácuu de nájñūhun vicō ichi jēē stechí táchī. Te suni cácuu de nájñūhun yujnu jeē tu jēhe ndehē maá tiempo. Te cácuu de nájñūhun yujnu jeē ní quenda nde jíin yoho, te tú cuiti gā na modo nane numa. <sup>13</sup> Te nájñūhun jeē jisó cóyo ndute mar te cáne tiñū, súcuan jícu de jíin jniñū néé jēē cúu jñūhun canu. Te cácuu de nájñūhun quāmi jeē ní sana ichi. Te je iyó túhva nuū néē nuū lúchi jnúú coyúcú de níí cáni.

<sup>14</sup> Te jeē ní yāha iñū yucūn Adán, te ni cacu Enoc, te ni nacani de jñūhun jeē ni steén Yaā Dios nuū de siquī tāca téē yāha, áchí de: Máá Jítoho yō ni steén yā nuū rī jeē iin quiví te quiji ya jíin cuéhē mil ñayuu maá yá. <sup>15</sup> Te sándaā yā jniñū tāca ñayuu, te snáhnū ndetū yā tāca ñayuu casáha néé. Chi máni jniñū néé cásáha i siquī jeē canéé máá i, te cácahān i cuéhē jñūhun ndevāha siquī yā. Ni achi Enoc. <sup>16</sup> Tāca téē yāha máni cácahān sōó de, te cácahān de siquī ñayuu. Te máni jeē cúsi ni maá de cánducú de. Te cácahān de jeē téē téyí cácuu de, te cácahān yiñūhún de jíin ñayuu návāha nihin de jecu nuū i.

### *Jeē stíhví ni Judas ñayuu cácañdíje*

<sup>17</sup> Te máá ró jíināhan ró ñání máni, na núcūhun ni rō jñūhun jeē jé ni canacani téē cácuu apóstol maá Jítoho yō Jesucristo. <sup>18</sup> Chi ni cacahān de: Nde nuū cuándihí quiví te quijicoo téē sácatā siquī jñūhun ndaā yā, te sáha de tācā jniñū néé jēē ndíyo ni maá de. Súcuan ni cacastūhún apóstol. <sup>19</sup> Téē un cúu jeē casásin ñayuu. Te máni cándihví ni de tāca jēē cutíndí ni maá de, chi tu ndéé Espíritu yā jíin de.

<sup>20</sup> Te máá ró ñání máni, na íje vāha ni rō jíin jñūhun ndoo ndasí jēē cácañdíje ró. Te cacān tahu ró jíin fuerza Espíritu Santo. <sup>21</sup> Te quendōo nihin ró jíin jñūhun jeē cundáhú ni Yaā Dios rohó. Te condetu ró quiví jeē cótecu ró níí cáni sáha máá Jítoho yō Jesucristo siquī jeē cundáhú ni yā rohó.

<sup>22</sup> Te sava ñayuu jeē cájeni siquí ni, nducú ró modo scandíje ró i. <sup>23</sup> Te sava ga i chi nducú ndéyí ró jeē cácu i nuū cuéchi i, jeē nájñūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnehén jíin jniñū néé cásáha i.

### *Jñūhun cújéhnū Yaā Dios níí cáni*

<sup>24</sup> Te Yaā Dios chi máñūhún-ni máá yá cúu Yaā ndichí, Yaā jnáma yóhó. Te iyó poder yā jeē coto ya rohó jēē ma quiví ró cuéchi, jíin jēē sáha ya jeē cuíñi ró núū ndíndēe yá, te quiví ún coo ndoo ró núū yā, te cusí ndasí ni rō sáha ya. <sup>25</sup> Te na cáhán yō jeē yóhoy luu cújéhnū ya siquī jeē ni sáha ya jíin Jítoho yō Jesucristo. Te na cáhán yō jeē cújéhnū téyí yá, te ndácu ya jniñū jíin poder jeē ndiso ya nde jenahān ndasí jíin ndé vjna jíin ndé níí cáni. Súcuan na cóo. Amén.

## JNIÑU QUIJI JEE NI JITO NDIJIN SAN JUAN

### *Jeē ni stéén Jesucristo tācá jniñu quiji*

<sup>1</sup> Jñuhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñayuu cácanđje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeē cúu ri mozo yā. <sup>2</sup> Te máá rí cástūhun ndāā rī siquī tāca jéē ní jito ri ún, te nácani ndaā rī jñuhun Yaā Dios jíin jñuhun jeē ní cahān ndaā Jesucristo.

<sup>3</sup> Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jñuhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núu tútu yáha.

### *Jeē téé Juan carta nuū ndihúxá grupo ñayuu cácanđje*

<sup>4</sup> Máá rí cúu Juan, te téé ri jñuhun yáha cuájeē nuū rohó, ndihúxá grupo ñayuu cácanđje jeē cáyūcu Asia. Te ñuhun ni rī jeē maá Yaā Dios na sáha ga yā jeē váha rohó jíjnáhan ró, te sáha ya jeē coo ndeyí coo sñ ni rō. Chi máá yá cúu Yaā iyó vijna, te ni Iyo ya ní cání, te coo ya ní cání. Te ñuhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu. <sup>5</sup> Te ñuhun ni rī jeē suni súcuan sáha Jesucristo, Yaā cahán ndaā tāca jñuhun. Te xīhna gā maá yá ni natecu mēhñu ndíyi. Te cújéhu ya nuū tāca rey jeē iyó ñayīví. Te máá yá cúndáhú ni yá yohó, te ni nacate ya yohó núu cuéchi yó jíin níñi yā. <sup>6</sup> Te ni sáha ya jeē ní nduu yó rey jíin sūtū cájejnīñu nuū Tatá yā Yaā Dios. Te na cáhán yō jeē yōhyo luu cújéhu ya te jñí ya poder ní cání. Amén.

<sup>7</sup> Cuni sōho jíjnáhan ró, chi ndiji Cristo jíin vícō. Te ndivī ñayuu coto i nuū yā, te nde jíin ñayuu jeē ní castújí i ya. Te tāca raza ñayuu ní cáhnu ñayīví ndahyū i jeē tu ní cácanđje i ya. Súcuan nahín coo.

<sup>8</sup> Suhva cáhán maá Jitoho yō, Yaā jñí ndihí poder: Máá rí cúu nájñuhun letra A xīhna ñúhún jíin letra Z jeē sándihí na, chi máá rí ní squejéé ndihí te máá rí sínu, áchí máá Yaā iyó vijna, te ni Iyo ya ní cání, te coo ya ní cání.

### *Jeē ní jito Juan jeē cujéhu luu Cristo*

<sup>9</sup> Máá rí cúu hermano rō Juan jíjnáhan ró. Te inuú-ni ndóho ri jñúndóho jíin ró siquī jeē cácanđje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jñuhun Yaā Dios jíin jéē ní cachi ndaā rī jñuhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos. <sup>10</sup> Te in domingo ni jito ndijin rī jeē ní stéén maá Espíritu Santo nuū rī. Te ni jini sōho ri in jeē cána jee níhin ichi yátá rī nájñuhun jeē tívi trompeta. <sup>11</sup> Te ni cahān jíin rí:

Máá rí cúu nájñuhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cání. Te na téé ró núu in tutu tāca jéē cóto ró, te tají ró quihīn nuū ndihúxá grupo ñayuu cácanđje jeē cáyūcú i ní cáhnu Asia, suu iní ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

<sup>12</sup> Yúcuan na te ni ndicó cóto ri jeē cóto ri ndé in cúu jeē cahán jíin rí. Te ná ni ndicó cóto ri te ni jito ri uxā candelero oro. <sup>13</sup> Te mēhñū ndihúxá candelero un índichi maá Yaā ní nduu téé. Te ñuhun ya in sahna cání jeē jinú nde nuū

jehé yā. Te núnhi ñin cinturón oro jicā yā. <sup>14</sup> Te ixi xíní yā chi yaa nájnūhun ixi lánchi, nájnūhun yuhvā volcán. Te tinū ya ndíndēe nájnūhun yáñuhūn. <sup>15</sup> Te jehé yā xíñú jito nájnūhun cāa cuaán jéé ni ndúhvā nuū horno. Te nñhin ndasí cáhān yā, nájnūhun nñhin cuehē yūte náhnu. <sup>16</sup> Te ndaváha ya jnái ya uxā quími. Te yuhu ya quénda jeé cāa nájnūhun espada jeé xeén ndíndúú lado, te suu cúu jnūhun ya jeé niní sándaā yā siquī cuéchi. Te nuū yā cāa nájnūhun niándii jeé nándii ndaxín.

<sup>17</sup> Te ná ni jito ri yā te ni cotúú rí nuū jéhé yā nájnūhun jeé ni jihí rí. Te ni soó yā ndaváha ya siquī rí, te ni cahān yā:

Ma yūhu ró. Máá rí cúu Yaā iyó ndé xíhna ññhún te coo ri níí cáni. <sup>18</sup> Te Yaā técu cúu ri. Chi ni jihí rí te ni natecu rí, te vijna chi técu rí níí cáni. Te máá rí jnái poder siquī cuéhyí jéhni ñayuu jíin siquī lugar nuū cáyūcu ánuá ndíyí. <sup>19</sup> Núu súcuan te tee ró nuū tútu táca jéé ní jito ró, jeé cúu vijna jíin jéé cóo ichi núu. <sup>20</sup> Te yāha cúu jnūhun sāhi siquī ndihúxá quími ni jito ró jnái ndaváha ri, jíin siquī ndihúxá candelero oro. Ndiñúxá quími ún cúu nájnūhun ndihúxá jeé cácujeñnu nuū ndihúxá grupo ñayuu cácadíje. Te ndihúxá candelero cúu nájnūhun ndihúxá grupo ñayuu cácadíje.

*Jnūhun cuahān nuū ndihúxá grupo ñayuu cacandíje:*

*Jnūhun cuahān ñuu Efeso*

## 2

<sup>1</sup> Tee ró jnūhun yáha na quíhín nuū jeé cujéñnu nuū ñayuu cácadíje ñuu Efeso: Súcuan cáhān ruhū, Yaā jeé jnái ndihúxá quími jíin ndaváha ri, te jica cuu ri méhñú ndihúxá candelero oro. <sup>2</sup> Je jíin rí táca jniñu váha casáha ró, jeé cándihvī ni ró siquī jnūhun ri, jíin jéé cájendeyí ni ró. Te jíin rí jeé ni cájehe ró jnūhun quívicoo ñayuu casáha neé méhñu ró. Te jíin rí jeé ní cajito ndee ró tée cástáhú jeé cácahān de jeé cúu de apóstol, te ni cajini ró jeé tée stáhú cácuu de. <sup>3</sup> Te ni cajendeyí ni ró ni candoho ró jnúndóho, te tu ní ndínuu ni ró jeé cácuu ndasí ró jíin jniñu ri. <sup>4</sup> Te vésú súcuan te iyó jecu jeé cahán rí nuū ró, chi tuá cáhiyo maní váha ró jíin rí nájnūhun ni iyo maní ró jíin rí quiví jehé. <sup>5</sup> Núu súcuan te nucūhun ni ró ndese ni castóo ró jnúhun jeé ni iyo maní ró jíin rí, te nacani ni ró, te na sáha ró nájnūhun ni casáha ró ndé quiví ún. Te núu ma nácani ni ró, te yachí jeé rí te stáa ri candelero ró nuū ín, cúu jeé ma cuíñi ga ró jíin ñayuu cácadíje. <sup>6</sup> Te vésú súcuan te iyó ñin jeé váha casáha ró, chi tu cánujnahan cuíti ni ró cájito ró jniñu neé casáha ñayuu cándiquín jnūhun jeé steén Nicolás. Te suni máá rí tu nújnahan cuíti ni rí jito ri. <sup>7</sup> Ñayuu iyó sóho na chúsóho i jeé cahán maá Espíritu Santo jíin táca grupo ñayuu cácadíje. Táca ñayuu jeé cúndeyí siquī jeneé, cuáha ri jnūhun caji i ndehē jeé cúun xíní yújnu jeé sáha jeé cótecu i níí cáni. Te yujnu un ín nuū jardín Yaā Dios nde andíví, áchí yá.

*Jnūhun cuahān ñuu Esmirna*

<sup>8</sup> Te tee ró jnūhun yáha na quíhín nuū jeé cujéñnu nuū ñayuu cácadíje ñuu Esmirna: Súcuan cáhān ruhū, Yaā jeé iyó ndé xíhna ññhún te coo ri níí cáni, te ni jihí rí te ni natecu rí. <sup>9</sup> Je jíin rí táca jniñu váha casáha ró, jíin jnúndóho cándoho ró, jíin jéé cándoho ndáhú ró. Te vésú súcuan te cúca ró ndíhi jeé ndíso jnūhun ri. Te jíin rí jeé cácahān neé ñayuu siquī ró jijnáhan ró. Ñayuu un cácahān i jeé ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa

ñayuu yshi ndaha Satanás cácuu i. <sup>10</sup> Te ma yūhú cuiti rō tāca jēē ndoho ró. Chi jexeén je yajni sáha jeē quivicoo sava ró vecāa jeē cóto ndee rohó jijnáhan ró, te ndoho ró jnūndóho uxī quivī. Te na cuñi nihin ró ndé cuu rō, te cuāha ri premio jeē cótecu rō ní cáni. <sup>11</sup> Ñayuu iyó sóho na chúsóhó i jeē cahán maá Espiritu Santo jín tāca grupo ñayuu cácandíje. Tāca ñayuu jeē cūndeyí síquī jeneé, ma nihín i jnūndóho jeē jnahnú ndetū i cuu i vuelta uū, achí yá.

### *Jñuhun cuahān ñuu Pérgamo*

<sup>12</sup> Te tee ró jñuhun yáha na quihín nuū jeē kujéhu nuū ñayuu cácandíje ñuu Pérgamo: Súcuan cáhán ruhū, Yaā jeē névaha espada jeē xeén ndindúú lado, te suu cúu jñuhun ri jeē sándaā ri síquī cuéchi. <sup>13</sup> Je jíní ri tācá jniñu váha cásáha ró, te jíní ri jeē cáyūcu ró mēhñu ñayuu jeē ndácu Satanás jniñu nuū. Te vēsú súcuan te cáhín nihin ró jín jñuhun ri, te tu ní cánayūhu ró jeē cácandíje ró ruhū, ni quivī ni jíhi Antipas, tēe ni squícu váha ni nacani ndaā jñuhun ri. Chi ñuu ró cáyūcu ñayuu cájejniñu nuū Satanás, te ni cajehni i Antipas. <sup>14</sup> Te vēsú súcuan te iyó jecu jeē cahán ri nuū rō jijnáhan ró. Chi mēhñu rohó ñayuu ñuu Pérgamo iyó sava ñayuu cándiquín jñuhun ni steén Balaam. Chi tēe un ní steén de nuū Balac ndese squívī de ñayuu Israel cuéchi jeē cáji i jeē ni sócō nuū ídolo jín jēē cosíquí ndéē jnáhan i. <sup>15</sup> Te suni iyó sava ñayuu mēhñu ró jeē cácandíje ga i jñuhun ni steén Nicolás, te jñuhun ún chi tu núnjahan cuiti ni rī. <sup>16</sup> Núu súcuan te nacani ni ró síquī cuéchi ró. Chi núu tuú te yachí jeē ri jín espada jeē quénda yuhu ri, te suu cúu jñuhun ri jeē sándaā ri síquī cuéchi. Te jín yúcan te stóho ri ñayuu jeē cándíje ga jñuhun néé un. <sup>17</sup> Ñayuu iyó sóho na chúsóhó i jñuhun jeē cahán maá Espiritu Santo jín tāca grupo ñayuu cácandíje. Tāca ñayuu jeē cūndeyí síquī jeneé, scáji ri i maná jeē yísáhi ichi ándiví. Te suni cuāha ri ñn yuū cuijín nú i, te nuū ún condee ñn síhví jéé, te ni ñn ñayuu ma cúni síhví un, chi máá-ni i jeē nihín. Achí yá.

### *Jñuhun cuahān ñuu Tiatira*

<sup>18</sup> Te tee ró jñuhun yáha na quihín nuū jeē kujéhu nuū ñayuu cácandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájñuhun yáñuhūn. Te jehē rí xíñú jito nájñuhun cāa cuaán jēē ni ndúhvā. <sup>19</sup> Je jíní ri tācá jniñu váha cásáha ró, chi cákundáhú ni rō jnáhan ró, te cácandíje nihin ró ruhū, te cájejniñu ró núu rī, te cájendeyí ni rō. Te jíní ri jeē vihyá gā cásáha ró vijna vēsú nde quivī jehé. <sup>20</sup> Te vēsú súcuan te iyó jecu jeē cahán ri nuū rō. Chi iyó ñn ñahan mēhñu ró jēē naní Jezabel, te cájehe ró jñuhun steén ña nuū rō. Te achí ña jeē nácani ña jñuhun Yaā Dios. Te tuú chi jín jñuhun steén ña te stáhú ña ñayuu cácandíje jeē cácuu i mozo rī. Te sáha ña jeē casíquí ndéē jnáhan i, jín jēē cáyeji i jeē ní sócō nuū ídolo. <sup>21</sup> Te ni jēhe ri tiempo jeē na nácani ni ña, te tu cúni ña nacani ni ña stóo ña jeē casíquí ndéē ña. <sup>22</sup> Núu súcuan te na sáha ri jeē jécava ña jín cuéhyī. Te tāca ñayuu casíquí ndéē jín ña, suni cuāha ri jnūndóho xeén nuū i, te núu ma nácani ni i stóo i jniñu néé nájñuhun sáha ña. <sup>23</sup> Te sáha ri jeē cúu ñayuu jeē ni scándíje ña. Te súcuan cuni tāca grupo ñayuu cácandíje jeē maá rí cúu Yaā jíní ndíhi ndese cáa jeē níjnūnī jín ánuá ñayuu. Te cuāha ri yáhu ñn ñn ró núu ndese ni casáha ró. <sup>24</sup> Te sava ga rō jeē cáyūcú ñuu Tiatira, jeē tu ní cájetáhú jñuhun steén ñahan ún, ni tu ní cájnií ró jñuhun jeē cáhān i jeē jñuhun sáhi gā Satanás cúu, jín máá ró cahán ri jeē ma tēe ga rī inga jniñu síquī rō. <sup>25</sup> Chi máá-ni jeē na quéndōo nihin ró jín jñuhun ndaā cácandíje ró, te quéndōo nihin ró jín ndé quivī ndíji ri. <sup>26</sup> Tāca ñayuu jeē cūndeyí síquī jeneé, jín jēē squícu váha jniñu cúni rī nde vijna te nde quivī sándíhi, sáha



ri jeē kujéhnū i ndacu i jniñu nuū tācá nación,<sup>27</sup> nájñūhun ni sāha Tátá rī jeē kujéhnū ri ndácu ri jniñu. Te ndacu nīhin i jniñu nuū tācá nación. Te nájñūhun cúun yúú i quísi tahú, súcuan squéhichí i ñayuu tu cájendetū nuū rī.<sup>28</sup> Te sāha ri jeē coto i ruhū jeē luu kujéhnū ri quenda ndijin rī, nájñūhun jíto i lucero jeē cáne cúndijin.<sup>29</sup> Ñayuu iyó sóho na chúsóhó i jñūhun jeē cahán maá Espiritu Santo jíin táca grupo ñayuu cácandíje. Achí yá.

### *Jñūhun cuahān ñuu Sardis*

## 3

<sup>1</sup> Te tee ró jñūhun yáha na quíhín nuū jeē kujéhnū nuū ñayuu cácandíje ñuu Sardis: Súcuan cáhán ruhū, maá Yaā jeē névāha ndihúxá Espiritu Yaā Dios jíin ndihúxá quími. Je jíni rī tācá jniñu cásáha ró, te cácahān ñayuu jeē cátecu rō, te nuū rī chí nájñūhun ndiyi cácuu ró.<sup>2</sup> Na nátahū ni rō, te ndejéé níhin ró jíin jniñu jeē jecu na iyó te ndúcú naa. Chí je jíni rī jeē tu squícu vāha vāha ró núu Yaā Dios.<sup>3</sup> Te na núcūhun ni rō tāca jñūhun jeē ní castéén nuū rō. Te cuatáhú ró jñūhun ún te nacani ni rō siquí cuéchi ró. Chí núu tú natahū ni rō, te cuajeé rī nuū rō ñin sanaa-ni nájñūhun jeē ñin sanaa-ni te quíji ñacuñhá, te ma cúni rō na hora jinū rī nuū rō.<sup>4</sup> Te vésú súcuan te iyó nahín jecu rō ñuu Sardis jeē tu ní cásáha ró cuéchi, jeē cúu nájñūhun jeē tu ní sájnehén ró sahma ró. Jeē yúcuan cuijín yaa coo sahma ró caca ró jíin rí, chí ñayuu vāha cácuu ró.<sup>5</sup> Chí tāca ñayuu jeē cúndeyí síquí jeneé, cuāha ri sahma cuijín yaa cuhun i. Te ma ndáhva rī sihví i nuū libro jeē yosó sihví ñayuu cotecu ní cáni. Te cuajnúhún rí i nuū Tátá rī jíin núu táca ndajéhé yā.<sup>6</sup> Ñayuu iyó sóho na chúsóhó i jñūhun jeē cahán maá Espiritu Santo jíin táca grupo ñayuu cácandíje. Achí yá.

### *Jñūhun cuahān ñuu Filadelfia*

<sup>7</sup> Te tee ró jñūhun yáha na quíhín nuū jeē kujéhnū nuū ñayuu cácandíje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñin ma cúu casí, te máá rí jési, te ni ñin ma cúu nune.<sup>8</sup> Je jíni rī tācá jniñu váha cásáha ró. Te ni nune ri nájñūhun ñin yéhyí quívicoo ró, te ni ñin ma cúu casí. Chí vésú jecu-ni fuerza rō iyó, te ni cacandíje ró jñūhun ri, te tu cájesi rō yuhu ró jéé cácandíje ró rúhū.<sup>9</sup> Te iyó sava ñayuu yíhi ndaha Satanás, te cácahān i jeē ñayuu hebreo, jíin ñayuu maá Yaā Dios cácuu i, te tuú chí cástáhú-ni i. Núu súcuan te sāha ri jeē jécóo i nuū rō te jecuiñí yiti i nuū rō, te cuni i jeé maní rí jíin ró.<sup>10</sup> Te váha ni casquícu ró jñūhun ní cahān rī jeē cuándeyí ni rō. Te jeé yúcuan jnama ri rohó quívi jeé quíji ñin jñūndóho xeēn siquí ñayuu ní cáhnu ñayívi, jéé cóto ndee ún i jíjñahan i.<sup>11</sup> Te yachí ndiji ri. Núu súcuan te quendóo níhin ró jíin jñūhun cácandíje ró, návāha ni ñin ma quénde premio rō.<sup>12</sup> Táca ñayuu jeé cúndeyí síquí jeneé, sāha ri jeé cuu i nájñūhun sihñ yū luu ini templo Yaā Dios maá rí. Te ma cújiyo i nuū ndeé yá un. Te tee ri sihví Yaā Dios maá rí jneé i, jíin sihví jéé máá rí, jíin sihví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí.<sup>13</sup> Ñayuu iyó sóho na chúsóhó i jñūhun jeé cahán maá Espiritu Santo jíin táca grupo ñayuu cácandíje. Achí yá.

### *Jñūhun cuahān ñuu Laodicea*

<sup>14</sup> Te tee ró jñūhun yáha na quíhín nuū jeē kujéhnū nuū ñayuu cácandíje ñuu Laodicea: Súcuan cáhán ruhū, maá Yaā cúu jñūhun ndaā, Yaā cúu testigo vāha jeé cahán ndaā. Te máá rí ni sāha ndihi jeé ni cáhān Yaā Dios jeé na jécóo.<sup>15</sup> Je

jíní rī tācā jniñu cásáha ró. Te cácuu ró nájñuhun jeē tú mĭjin ni tú jihní, cúu jeē jecu-ni cácandĭje ró jñuhun ri, te ni tu cájito uhū rō ni tu cándihvī ni rō siquī. Te nacā jeē váha núu jeē mĭjin ró chí jēē jihní ró nuú. <sup>16</sup> Te tuú chí máá yívixī-ni ró, chí ni tu cájito uhū rō ni tu cándihvī ni rō siquī. Te jeē yúcuu squéhichī rī rohó nájñuhun ĩn jeē tésihī rī jeē séyūhu rī jeē tu nújnahan ni rī. <sup>17</sup> Te cácahān rō jeē cucá ró, te quéndōo vāha ró, te tu cúmanī ni ĩn nuū rō. Te tu cásáha ró cuenta jeē cuécá ĩ cándoho ró, te ndáhú ndasí ró, te cácuáá ró, te máá ññí lí rō. Te tāca jēē yáha cúní cahān jeē tu cácandĭje vāha ró. <sup>18</sup> Núu súcuu te cáhán rī jĭjn ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cucá ndije ró ndihī jeē ndĭso jñuhun ri. Te nuū rī cuaan ró sahma cuijĭn cuhun ró, návāha tú cucanu rō jeē máá ññí lí rō, cúu jeē quéndōo ndaā rō sáha ri. Te cuaan ró tájnā nuū rī, quīvi tinūu rō, návāha ndundĭjn tinūu ró, cúu jeē jecūhun ni rō jñuhun ri. <sup>19</sup> Tāca ñayuu jeē cundáhú ni rī, chí cáhán rī nuū i te stóho ri i, návāha na chúhun ni i. Núu súcuu te na cóndihvī ni rō jĭjnáhan ró, te nacani ni rō jeē stóo ró cuéchi ró. <sup>20</sup> Cuni sōho, chí ĩn rī yehyí ánuá rō te cáhán rī. Te núu ndé-ni róhó cuni sōho te nune ró yéhyí ánuá rō, te quīvi rī caji rī staā jĭjn ró, te suni caji máá ró jĭjn rī. Te suu cúu jeē cóndee rī anuá rō. <sup>21</sup> Tāca ñayuu jeē cūndeyí siquī jeneé, cuāha ri jñuhun conene i jĭjn rī nuū mesa nuū ndácu ri jniñu. Chí máá rī suni ni snáá ri poder jeneé, te ni cucōo ri jĭjn Tátá rī nuū mesa nuū ndácu ya jniñu. <sup>22</sup> Ñayuu iyó sóho na chúsohó i jñuhun jeē cahán máá Espĭritu Santo jĭjn táca grupo ñayuu cácandĭje. Achí yá.

*Tāca jēē cáyūcū andivī cáchiñūhún núu yā*

## 4

<sup>1</sup> Yūcuán na te ni ndacoto ri, te ni jito ri jeē nūne ĩn yéhyí andivī, te máá Yāā jeē ni cáhān jĭjn rī jeē xĭhna ñūhún, ni cahān tucu jĭjn rī nájñuhun jeē tívi trompeta. Te ni cahān:

Caa quiji ró yáha, te na stéén rī nuū rō tācá jniñu jeē cóo ichi núu gā, achí yá.

<sup>2</sup> Te máá Espĭritu Santo ni scóto-ni ya ruhū. Te ni jito ri jeē andivī ĩn ĩn mesa nuū ndácu jniñu, te néne máá yá nuū mesa un. <sup>3</sup> Te máá yá jeē néne yūcuu cáa ya nájñuhun ndĭndēē ĩn yuū quiyi ndĭí chí ĩn yuū cuehé ndĭí. Te ĩn ticō vĕhnde ní jicó ndúū yuhu mesa yā, te ndĭndēe nájñuhun ĩn yuū cuí ndĭí. <sup>4</sup> Te xiin mesa yā ni jito ri jeē ní jicó ndúū ocō cuūn gā mesa nuū ndácu jniñu. Te nuū mesa un néne ocō cuūn tēe jĕhnu cándiso jniñu. Te cáñuhun de sahma cuijĭn yaa, te xinī de cáñuhun corona oro. <sup>5</sup> Te nde nuū mesa nuū ndácu ya jniñu ndĭndēē taja te ññin te cáhán taja. Te ichi núu mesa yā ĩn ndihúxá Espĭritu Yāā Dios, jeē cáa nájñuhun uxā yiti náhnu jeē cayú ñuhūn. <sup>6</sup> Te ichi núu mesa yā ún suni iyó nájñuhun ĩn mar jeē jĭto quiyi nájñuhun vidrio.

Te xiin mesa yā un ní jicó ndúū cuūn jeē técu. Te iyó cuéhē tinūu ñí cáhnu ichi núu jĭjn ichi yátá un. <sup>7</sup> Te ĩn jeē técu un cáa nájñuhun ndicaha. Te ĩnga cáa nájñuhun stiquī. Te jeē uní chí née nuū tēe. Te jeē cuūn chí cáa nájñuhun yaha chócó jēē jicó núu tachí. <sup>8</sup> Te ndicúún jeē técu un iyó ĩñū ndĭjĕn jeē ĩn ĩn. Te máni máá tñūu cúu ñí cáhnu nde jĭjn ñí chíji ndĭjĕn. Te nduú ñuú tu jécuiñī cuiñī jeē cahān:

Yāā ĩ Yāā ndoo ndasí

cúu máá Jĭtoho yō Yāā Dios, Yāā jññ ndihī poder,

Yāā iyó vijna, te ni iyo yá ñí cáni, te coo ya ñí cáni.

Achí.

<sup>9</sup> Chi máni jeē cácahān ndicúún un jéē cujéhnu ndasí máá Yaā jeē néne nuū mesa, Yaā jeē técu ní cāni cuiti. Te yíñúhún cácahān un jíin yá, te nácuatáhu núu yā. <sup>10</sup> Te tāca jíinu jeē casáha súcuan, te ndihóco cuūn tēe jéhnu cándiso jníñu, cájecuiñi yití de nuū Yaā jeē técu ní cāni cuiti, cáchiñúhún de ya. Te cástaa de corona de, cájequin de ichi núu jehé mesa yá. Te cácahān de:

<sup>11</sup> Jitoho ná te Yaā Dios na cúu ní.

Te vāha ndasí Yaā cúu ní jéē cácahān i jeē luu cújéhnu ní,

te cáhīyo yíñúhún i nuū ní, te jnái ní ndihi poder.

Chi máá ní ní sáha ndihi jeē iyó,

te siquí jeē súcuan ni cuu ní maá ní te ni jecōo ndihi.

Achí de jíjnáhan de.

*Jeē ní nune Londe Yaā Dios tutu*

## 5

<sup>1</sup> Yūcuán na te ni jito ri jeē Yaā néne mesa jeē ndácu jniñu, ndaváha ya jnái ya ñin tutu cāni jeē ní tuu. Te yósó jnúhun ndindúú lado tutu ún, te ndihyú jíin úxā sello. <sup>2</sup> Te ni jito ri ñin ndajéhé yā jeē ndíso poder, te ni cahān jee:

¿Ndé ñin cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

<sup>3</sup> Te ni andiví ní ñayiví ni jeē iyó chíji ñayiví, tu ní íyo ni ñin jeē cóndiso jniñu nune tutu ún, ni jeē cóto nuū. <sup>4</sup> Te ni ndahyū ndasí rí, chí tu ní íyo ni ñin jeē cóndiso jniñu nune te cahu tutu ún, ni jeē cóto nuū. <sup>5</sup> Yūcuán na te ni cahān ñin tēe jéhnu un jíin rí:

Ma ndahyú rō, chí íyo ñin Yaā ndíso jniñu jeē cahnde yā ndihúxá sello ndihyú tutu, te nune ya. Te máá yá chí íyo cuéhé poder yā, nájñuhun jeē iyó cuéhé fuerza ñin ndicaha. Te ni cacu ya chíji yucūn Judá, jeē cúu yucūn rey David. Te ni snáa yā poder tāca jéneé.

<sup>6</sup> Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un ín ya nuū ín mesa Yaā Dios, mēññú ndicúún jeē técu, jíin tēe jéhnu cándiso jniñu. Te íyo úxā ndiqui jíin úxā tinúú Londe ún. Te tinúú un cúu ndihúxá Espíritu Yaā Dios jeē ní tají yá ní jengoo ní cáhnu ñayiví. <sup>7</sup> Te Londe un ní jehuihin ya tutu jeē jnái ndaváha Yaā jeē néne nuū mesa. <sup>8</sup> Te ná ní quihin ya tutu ún, te ndicúún jeē técu jíin ndihóco cuūn tēe jéhnu cándiso jniñu, ní cajecuiñi yití núu yā. Te ná ñin ná ñin tēe jéhnu un cándaha yaa jeē naní arpa, jíin cóhō cūu oro jeē ñúhun chitú súje cutú. Te súje cutú un cúu máá táca jnúhun jeē cájicān tahú ñayuu yíñi ndaha Yaā Dios. <sup>9</sup> Te ni cajita de ñin yaa jeé, te suhva cáhān:

Vāha ndasí Yaā cúu ní jéē quihin ní tutu te cahnde ni sello jeē ndihyú.

Chí ni cajehni i níhín, te jíin náiñi ní ní nacuaan ní ñayuu

mēññu táca raza, táca yuhu, táca ñuu, táca nación, návāha cuu i ñayuu Yaā Dios.

<sup>10</sup> Te ni sáha ní jéē cuu i rey jíin sūtū nuū Yaā Dios,

te ndacu i jniñu ñin ñayiví.

Achí de cájita de.

<sup>11</sup> Te ni jito ga rí, te ni jini sōho ri jeē cácahān cuéhé ndajéhé yā jeē ní cajicó ndúú xiin mesa yá, jíin xiin ndicúún jeē técu, jíin xiin tēe jéhnu cándiso jniñu. Te íyo cuéhé ndasí millón ndajéhé un. <sup>12</sup> Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jnái ya poder, te yōhyo cúcá yá,

te yōhyo ndíchí yá, te ndíso ya cuehē fuerza,  
te cáhiyo yíñúhún ndihi nuū yā, te luu cújéhnua ya,  
te cácahān i jeē váha ndasí Yaā cúu ya.

Achí.

<sup>13</sup> Te suni ni jini sōho ri jeē cácahān ndihi jeē ni sáha Yaā Dios jeē iyó ini  
andiví jín ini ñayiví jín chíji ñayiví jín ini mar. Te ndivii un ní cacahān:  
Cúsī ni yō cahán yō jeē yóhyo váha Yaā cúu máa Yaā néne mesa nuū ndácu ya  
jniñu,

jín Yaā cúu Londe Yaā Dios.

Te na cóo yíñúhún yó núu yā, chí cújéhnua luu ya,

te jní ya poder ní cáni cuiti.

Achí.

<sup>14</sup> Te ni cacahān ndicúún jeē técu:

Súcuan na cóo, áchí.

Te ndihócó cuñ tē jéhnua cándiso jniñu ni cajecuiñí yití de, te ni cachiñúhún  
de nuū Yaā jeē técu ní cáni cuiti.

*Siquí ndihúxá sello*

## 6

<sup>1</sup> Yūcuán na te ni jito ri jeē Yaā cúu Londe Yaā Dios, ni jehnde yā ñn jeē uxá  
sello un. Te ni jini sōho ri jeē cahán ñn jnáhan ndicúún jeē técu ún, nájñuhun  
cáhan taja:

Nehen te cuni rō.

<sup>2</sup> Te ni ndacoto ri, te ni jito ri ñn caballo cuijín. Te jeē yosó síquī tī un  
ndáhá ñn arco jeē stáva nduva. Te ni jecūhun ñn corona xiní. Te ni quenda  
ni jejnáhan, te ni cundeyí síquī ndihi.

<sup>3</sup> Yūcuán na te Londe un ní jehnde yā sello uū. Te ni jini sōho ri jeē cahán  
inga jnáhan ndicúún jeē técu:

Nehen te cuni rō.

<sup>4</sup> Te ni quenda ñn caballo cuehé, te jeē yosó síquī tī ndíso jniñu jeē snáá  
jnūhun cáyūcu mání ñayuu ñayiví, te quejéé i cahni jnáhan i. Te ni nihñ ún  
ñn espada cáhnu.

<sup>5</sup> Yūcuán na te Londe un ní jehnde yā sello uní. Te ni jini sōho ri jeē cahán  
inga jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñn caballo jnuú. Te jeē yosó síquī tī ndáhá ñn  
balanza jeē chícuáha, chí coo jnamá xeén. <sup>6</sup> Te mēhñú ndicúún jeē técu un ní  
jini sōho ri ñn jeē cahán:

Máa ñn kilo-ni trigo nihñ i jín yáhu i jeē sájniñu i ñn quiví. Te núu cebada,  
te uní-ni kilo nihñ i jín yáhu i jeē sájniñu i ñn quiví. Te aceite jín vino chí ma  
sáha ró jēé cúmani. Achí.

<sup>7</sup> Yūcuán na te Londe un ní jehnde yā sello cuñ. Te ni jini sōho ri jeē cahán  
tucu inga jnáhan ndicúún jeē técu:

Nehen te cuni rō.

<sup>8</sup> Te ni ndacoto ri, te ni jito ri ñn caballo cuaán yaa, te jeē yosó síquī tī cúu  
máa cuéhyí jéhni ñayuu. Te ichi yátá un ndíquín máa jnúhun jeē quiví ñayuu  
lugar nuū cáyūcu ánuá ndíyí. Te ndindúú un cándiso jniñu jeē ndóna síquī ñn  
jeē ndicúún parte ñayiví, te cuu sáha jeē cúu ñayuu jín guerra, jín jnamá, jín  
cuéhyí xeén, jín táca quití xeén jeē iyó ñayiví.

<sup>9</sup> Yūcuán na te Londe un ní jehnde yā sello uhūn. Te chíji altar cáhnu ní jito ri anuá ñayuu jeē ní cacandíje jñūhun Yaā Dios te ni canacani ndaā i jñūhun ya, te siquī yūcuan ní cajehni ñayuu i. <sup>10</sup> Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ní jéjñūhun ní. ¿Te nasaa ga tiempo coo te sándaā ní jéhē ná, te nacuaāha ní jéē ndútahū ñayuu ñayivi jéē ní cajehni sáñā? áchí.

<sup>11</sup> Yūcuán na te ní jēhe ya sahma cuijín cuhun i jijnáhan i, te ní cahān yā jíin i jeē na ndétātú i jecu gā tiempo. Chí íyó gá hermano i jeē cájejniñū nuū yā, jeē suni jíni ñūhún cuu i návāha jínu número i, áchí yá.

<sup>12</sup> Yūcuán na te Londe un ní jehnde yā sello iñū. Te ní jito ri jeē ní jnáa ndasí. Te ni cujnúú níandii nájnūhun iin sahma jnúú. Te ní yóo ní nduu nájnūhun niñí. <sup>13</sup> Te quāmi andiví ní níngoyo nuū ñūhun nájnūhun níngoyo ndehē yíhí yujnu higo sáha tachí níhin. <sup>14</sup> Te andiví ní cujiyo cuahān nájnūhun jeē nátuu iin tutu cáhnu. Te táca yucu jíin táca isla ní cujiyo cuango inga lado. <sup>15</sup> Te táca rey ñayiví, jíin jéē cácujeñhu, jíin jéē cucá, jíin táca capitán, jíin jéē cándiso poder, jíin mozo jeē ní cajeen ñayuu, jíin téē cásajniñū cuenta maá, ní cachisāhi máá ini yaū cava jíin méhñū cava chíji yucu. <sup>16</sup> Te ni cacahān i jíin yucu jíin cava:

Ndicó cáva siquī rī, na quísāhi rī návāha tú coto máá Yaā néne mesa ndácu jniñū, jíin Yaā cúu Londe jeē cuáha ya castigo xeēn ruhū. <sup>17</sup> Chí ni quee maá quíví cáhnu jeē cuáha ya castigo, ¿te ndé iin canda condichi nuū yā? áchí i jijnáhan i.

### *Ñayuu táca yúcūn Israel jeē ní jécondee sello jneē*

## 7

<sup>1</sup> Te ná ni cuu jniñū yáha, te ní jito ri cuūn ndajéhé yā jeē cáhīn ndicúún lado ñayiví. Te cájesi yā nuū ndicúún tachí, návāha ma quee nuū ñūhun ní nuū mar ní nuū ní iin yujnu. <sup>2</sup> Te suni ní jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndiso jniñū jeē sáha dañó nuū ñūhun íchi jíin núū mar:

<sup>3</sup> Ma sáha ró dañó nuū ñūhun ní nuū táca yujnu ní nuū mar, chí nde na téē yó sello jneē táca ñayuu cájejniñū nuū Yaā Dios yó.

<sup>4</sup> Te ní jini sōho ri jeē áchí jéē iyó ciento uū xico cuūn mil ñayuu jeē ní jécondee sello jneē. Te ñayuu un cácuu táca yúcūn ñayuu Israel. <sup>5</sup> Te íyó úxí uū mil ñayuu cácuu yucūn Judá jeē ní jécondee sello, jíin úxí uū mil yucūn Rubén, jíin úxí uū mil yucūn Gad, <sup>6</sup> jíin úxí uū mil yucūn Aser, jíin úxí uū mil yucūn Neftalí, jíin úxí uū mil yucūn Manasés, <sup>7</sup> jíin úxí uū mil yucūn Simeón, jíin úxí uū mil yucūn Leví, jíin úxí uū mil yucūn Isacar, <sup>8</sup> jíin úxí uū mil yucūn Zabulón, jíin úxí uū mil yucūn José, jíin úxí uū mil yucūn Benjamín. Ndiñi yucūn yáha cúu jeē ní jécondee sello.

### *Ñayuu cuehē jeē cáñuhun sahma cuijín*

<sup>9</sup> Te ná ni cuu jniñū yáha te ní ndacoto ri, te ní jito ri cuehē ndasí ñayuu. Te cúu i ñayuu táca nación jíin táca raza jíin táca yuhu jíin táca ñuu. Te cáhīn i nuū mesa nuū ndácu Yaā Dios jniñū jíin núū maá Yaā cúu Londe. Te siquī jeē cuehē ndasí i, te ní iin ma cúu cahu nasaa i cúu. Te cáñuhun i sahma cuijín, te cándahá i ñuū. <sup>10</sup> Te ni cacana jee i: Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñū,

jíin Yaā cúu Londe Yaā Dios.

Achí i jíjnáhan i. <sup>11</sup> Te ndihi ndajéhé ni cajicó ndúu yā cáhīin ya xiin mesa Yaā Dios, jíin xiin tēe jénu cándiso jníñu, jíin xiin ndicúun jeē técu. Te ni cajecuiñi yití yā ni cachiñúhún yā Yaā Dios ichi núu mesa yā. <sup>12</sup> Te ni cacahān yā:

Amén. Cúsī ni yō cahān yō jeē yóhyo vāha Yaā cúu Yaā Dios maá yó.

Te luu cújéhu ya te ndíchí yá.

Te na nácuatáhú yó nuū yā, te na cóo yíñúhún yó núu yā.

Chí jñí ya poder, te ndíso ya cuehē fuerza jeē ñi cáni cuiñi. Amén.

Achí táca ndajéhé yā.

<sup>13</sup> Yūcuán na te ni cahān ñin tēe jénu un jíin rí:

¿Ndé ñáyuu cúu yāha jéé cáñuhun sahma cuijín, te ndé chi véjicoo i?

<sup>14</sup> Te ni cahān rí jíin de:

Máá ní cúu jeé jíiní, Tātā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jñúndóho xeēn. Te ni canacate i sahma i jíin níñi maá Londe, te ni nduyaa vāha, cúu jeē ní ndundoó ánuá i ní sáha ya. <sup>15</sup> Jeē yúcuán cúu jeē cáhīin i nuū mesa nuū ndácu Yaā Dios jniñu, te cájejniñu i ini templo yā ndúu ñuú. Te Yaā jeē néne nuū mesa, coto ya i jeé quéndōo vāha i nuū yā. <sup>16</sup> Te ma cúu gā i sōco, te ma jichí gā i ndute. Te ma cayú gā i nuū niándii, ni ma ndóho ga i jeé jihní. <sup>17</sup> Chí máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeé cótecu i sáha. Te Yaā Dios nacuaa yā ndute núu i jíjnáhan i, te ma ndahyú gā i. Achí tēe jénu ún.

*Siquē sello uxā jíin cóhō cūu oro*

## 8

<sup>1</sup> Te Londe un ní jehnde yā sello uxā jeē ndihyú tutu ún, te nayúu-ni ni iyo ini andiví nájnūhun sava hora. <sup>2</sup> Te ni jito ri ndihúxá ndajéhé jeē cáhīin nuū Yaā Dios. Te ni cajéhe uxā trompeta nuū ndajéhé un. <sup>3</sup> Yūcuán na te ni quee inga ndajéhé, ndáhá yā ñin cohō cūu oro, te ni jecuiñi yā nuū altar. Te ni jéhe cuehē sūje cutú núu yā, návāha socō yā jíin jnúhun cájicān tahu ndihi ñayuu cácañdije Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. <sup>4</sup> Te nuū cohō cūu jñi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácañdije Yaā Dios. <sup>5</sup> Yūcuán na te ni quihin ndajéhé un cóhō cūu un. Te ni scutú yā tīcua ñuhūn jeé cayú nuū altar. Te ni jete yā nde ini ñayiví. Te ni sáha jeē ní cahān taja, te ni ñhīn, te ni ndindéé taja, te ni jñāa.

*Jnúhun siquē trompeta*

<sup>6</sup> Yūcuán na te ndihúxá ndajéhé jeé cándāhá ndihúxá trompeta, ni casátuhva ya jeé tiví yā.

<sup>7</sup> Te ndajéhé ñin ni tiví yā trompeta. Te ni cuun ñiñi ini ñayiví jíin ñuhūn jeē ní sácā núu jíin níñi. Te ni cayú ñin jeē uní parte ñayiví, jíin ñin jeē uní parte yujnu, jíin ñin jeē uní parte ite cuiñi.

<sup>8</sup> Te ndajéhé uū ni tiví yā trompeta. Te ñin nájnūhun ñin yucu cáhnu jeé cayú ñuhūn ni ñingava cuahān nuū mar. Te ñin jeē uní parte mar ni nduu níñi. <sup>9</sup> Te ni jihí ñin jeē uní parte quiñi ñuhūn nuū mar. Te ni naa cuehē barco, chí ñin ñin jeé táca únī ni naa.

<sup>10</sup> Te ndajéhé unī ni tivī yā trompeta. Te ni ningava ñn quīmi cáhnu ichi ándiví, te cáyú nájñuhun cáyú ñn yití cáhnu. Te ni ningava siquī ñn ñn jeē tāca únī yúte jíin núū cáne ndute. <sup>11</sup> Te quīmi un nání quīmi uvuā. Te ñn jeē uní parte ndute ni cuu uvuā. Te ni cajihí cuehé ñayuu ni sáha jeē ní cuu uvuā ndute ún.

<sup>12</sup> Te ndajéhé cuñn ni tivī yā trompeta. Te ñn jeē uní parte niándii jíin yóō jíin quīmi ni tiví. Te ni ndunee ñn jeē uní parte i, te tuá ni cúndijin ñn jeē uní parte nduú jíin ñuú.

<sup>13</sup> Te ni ndacoto ri, te ni jini sōho ri jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

## 9

<sup>1</sup> Te ndajéhé uhūn ni tivī yā trompeta. Te ni jito ri jeē ichi ándiví ní ningava ñn quīmi nde ini ñayiví. Te nuū quīmi un ní jēhe ndacáa jeē núne túhnchi cúnú ndasí. <sup>2</sup> Yūcuán na te ni nune un túhnchi, te ni cane ñuhmā ni caa nájñuhun ñuhmā ñn ñnñú cáhnu. Te ñuhmā un ní sáha jeē ní cunee niándii jíin ní núú tachí. <sup>3</sup> Te nuū ñuhmā un ní canecoo tíca ndicuéhyí, ni jité núú tí níí cáhnu ñayiví. Te ni jēhe ya jñuhun jeē sáha tí nájñuhun cásaáha tisuhma xeēn jeē iyó ini ñayiví. <sup>4</sup> Te ni ndacu ya jñiñu nuū tí jeē ma sáha tí daño ite jíin yúcu cuí jíin yujnu, chí máni ñayuu jeē tu ndéé sello Yaā Dios jneé i cúu jeē tuu tí. <sup>5</sup> Te tu ní jēhe ya jñuhun jeē cáhni tí ñayuu, chí máni jeē stóho tí i uhūn yoō. Te sáha tí jeē jetú i nájñuhun jeē jetú ñayuu jeē túu tisuhma i. <sup>6</sup> Te quiví ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

<sup>7</sup> Te tíca ndicuéhyí un cáa tí nájñuhun caballo jeē cáhīyo túhva quingoo nuū cuájñahan. Te xiní tí ñuhun nájñuhun corona oro. Te née tí nuū téé. <sup>8</sup> Te iyó xixi tí jeē cáa nájñuhun xixi xíní ñahan. Te jñuhun tí cáa nájñuhun jñuhun ndicaha. <sup>9</sup> Te níí tí ndihyú nájñuhun sahma cáa. Te níñin ndijēn tí nájñuhun níñin jeē cuángoo cuehé caballo nuū guerra cáñuhun tí carreta. <sup>10</sup> Te suhmā tí ndíso iñu nájñuhun tisuhma. Te jíin súhmā tí cuu stóho tí ñayuu uhūn yoō. <sup>11</sup> Te iyó ñn jeē cujéñnu nuū tí, te suu cúu ndajéhé jexeén jeē ndító túhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéé snāā.

<sup>12</sup> Je ni yāha ñn jñundóho, te iyó úū gā jñundóho jeē quíji.

<sup>13</sup> Te ndajéhé iñu ni tivī yā trompeta. Te ni jini sōho ri ñn jñuhun jeē ni cáhān nde mēhñú ndicúún yiquí altar oro jeē íin nuū Yaā Dios. <sup>14</sup> Te ni cahān un jíin ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

<sup>15</sup> Te ni nandají ndicúún ndajéhé un, návāha cahni ñn jeē uní parte ñayuu ñayiví. Chí je cáhīyo túhva ndajéhé un jeē siquí maá hora jíin quiví jíin yóō jíin cuíyā jeē cóo súcan. <sup>16</sup> Te ni jini sōho ri jeē achí jéé iyó úū ciento millón soldado jeē cáyoso caballo.

<sup>17</sup> Te ní steén gā yá nuū rí, te ni jito ndijin rí táca caballo. Te tēe cáyoso siquí tí cáñuhun de camisa cáa jeē cuehé, jeē ndeé, jíin jéé cuaán. Te xiní caballo un cándāa nájñuhun xiní ndicaha. Te yuhu tí quénda ñuhūn jíin ñuhmā jíin azufre. <sup>18</sup> Te jíin únī jeē quénda yuhu caballo un, te ni jihí ñn jeē uní parte

ñayuu, suu jíin ñúhūn jíin ñúhmā jíin azufre. <sup>19</sup> Chi yuhu ti jíin súhmā tī iyó fuerza jeē cáhni tī ñayuu. Chi suhmā tī cándāa nájñuhun coō, te iyó xínī, te jíin yúcuau stóho ti ñayuu.

<sup>20</sup> Te sava ga ñayuu jeē tu ní jíhí jíin táca jnúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhún i táca táchī jíin ídolo jeē ní cuváha jíin oro jíin plata jíin cáa cuaán jíin yúú jíin yujnu. Te táca un chi tu cúu coto, ni tu cúu cuni sōho, ni tu cúu caca. <sup>21</sup> Te ni tu ní cánacani ni i stóo i jeē jéhni i ndíyī, jíin jéē satásí i, jíin jéē jíca jnéni i, jíin jéē sacuíhná i.

### *Ndajéhe jeē ndahá libro lulí*

## 10

<sup>1</sup> Te ni jito ri inga ndajéhe yā jeē ndiso poder, ni cuun ya ichi ándiví. Te ñúsúcun yá vicō, te xini yā ñúhun ticō vēhndé. Te nuū yā ndíndēe nájñuhun niāndii, te síhin ya cáa nájñuhun uū síhñ jeē cáa ná cáa ñuhūn. <sup>2</sup> Te ndahá yá ññ libro lulí jéē núne. Te ni jeni ya jehē váha ya nuū mar, te jehē jecó yá nuū ñúhun íchi. <sup>3</sup> Te ni cana jee téyí yá, nájñuhun jeē ndahyú ndicaha. Te ná ni cana jee ya, te ni cacahān uxā taja. <sup>4</sup> Te ná ni cacahān uxā taja, te je iyó túhva ri jeē téé ri jñuhun un núú. Te ni jini sōho ri ññ jñuhun ichi ándiví jeē ni cáhñ jíin rí:

Chuvāha ró táca jñuhun jeē ní cacahān uxā taja ún, te ma steén rō, ni ma téé rō, áchí.

<sup>5</sup> Yūcuán na te ndajéhe jeē ní jito ri jeē ín nuū mar jíin núú ñúhun, ni ndonehen ya ndaha váha ya ichi ándiví. <sup>6</sup> Te ni ndacunehen ya síhví máá Yaā jeē técu ní cáni, Yaā ní sáha andiví jíin ñáyiví jíin mar jíin táca ndíhi jeē iyó ini. Te jíin síhví yá un ní cahān teyí ndajéhe:

Ma cucuéé gá jeē jínu ñayiví. <sup>7</sup> Chi núu na quéjéé ndajéhe uxā tivi yā trompeta, yūcuán na te squícu-ni Yaā Dios jñuhun sáhi yá, nájñuhun ni castúhun yá nuū táca mozo yā, tēe ni canacani jñuhun ya nde jenahán, áchí ndajéhe.

<sup>8</sup> Yūcuán na te máá jéē ní jini sōho ri jeē ni cáhñ ichi ándiví, ni cahān tucu jíin rí:

Cuáhñ te quihin ró libro lulí jéē núne jeē ndahá ndajéhe jeē ín nuū mar jíin núú ñúhun, áchí.

<sup>9</sup> Te ni jehēn rī nuū ndajéhe un, te ni jicān rī jeē na cuáha ya libro lulí un núú rī. Te ni cahān yā:

Quihin te caji rō. Chi vixí sáha ini yuhu ró nájñuhun ndūxi, te chíji ró chi cuhiyá sáha, áchí yá.

<sup>10</sup> Yūcuán na te ni quihin ri libro lulí jeē ndahá ndajéhe yā, te ni yeji rī. Te vixí ní sáha ini yuhu ri nájñuhun ndūxi. Te ná ni cuu ni yeji rī, te ni jité iyá ni rī. <sup>11</sup> Te ni cacahān jíin rí:

Cánuú jéē nacani tucu ró jnúhun Yaā Dios, ndese coo síquī ñayuu cuehē ñuu jíin cuehē nación jeē sññ sññ yuhu, jíin síquī cuehē rey cándacu jñiñu, áchí jíin rí.

### *Síquī uū testigo yā*

## 11

<sup>1</sup> Yūcuán na te ni cajéhe ññ yujnu nuū rī, jeē cúu ññ cūhva jeē chícuāha. Te ni cacahān jíin rí:



Ndocuñi te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán. <sup>2</sup> Te ma chicuāha ró patio yatā templo. Chi je ni jēhe ya nuū ñayuu tācá ñuu jicá. Te coyūcú i ini ñuu i yāhá, te uū xico uū yoō cueñū i siquī ñuu. <sup>3</sup> Te tají rí uū testigo rí jeē nácani jñuhun ri mil uū ciento uní xico quiṽi. Te cuhun de sahna ndáyí jeē cácuuñhyá ni de siquī cuéchi ñayuu, achí yá.

<sup>4</sup> Te ndindúu testigo un cúu nájnūhun ndindúu yujnu olivo jíin ndindúu candelero jeē ín nuū Yaā Dios, Yaā chií ñayṽi. <sup>5</sup> Te na-ni ñayuu núu nducú sáha ndevāha jíin ndindúu testigo un, te quenda ñuhūn yuhu ndindúu de, te cayū ndíhi ñayuu cájito uhū i de. Te súcuan cuu tāca ñayuu jeē nducú sáha ndevāha jíin de. <sup>6</sup> Te íyó poder ndindúu testigo un jeē cási de jeē ma cúun saū ní tiempo jeē nácani de jñuhun ya. Te suni íyó poder de sáha de jeē nduu niñi tācá ndute. Te cuu stívi de ñayṽi jíin ndinuū jñudóho, núu nasaa jínu cácuni de. <sup>7</sup> Te ná ni jínu ni canacani de jñuhun ya, yūcuán na te quenda quiti xéén jeē néne tūhnchi ún. Te cuajnáhan jíin ndindúu de, te cundeyí jíin de, te cahni de. <sup>8</sup> Te ndíyí ún cava nuū yáhu ñuu cáhnu nuū ní cajehni i máá Jítoho yō jicá cruz. Te ñuu un cácahān yatā i jeē ñuu Sodoma jíin Egipto cúu, siquī jeē xeēn cuéchi íyó ñuu ún. <sup>9</sup> Te ñayuu tācá ñuu, tāca yúcūn, tācá yuhu, tācá nación, chí coto i jeē cáva ndindúu ndíyí un úní quiṽi yosáva, te ma cuáha i jñuhun jeē quíndūji. <sup>10</sup> Te ñayuu ní cáhnu ñayṽi cusñ ndasí ni i jeē ní cajihí de, te sáha i vico, te cuāha i regalo nuū jnáhan i. Chi ndindúu téé ni canacani jñuhun ya ún, ní casáha de jeē ní candoho ndasí ñayuu ñayṽi. <sup>11</sup> Te jeē yáha uní quiṽi yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñayuu coto i jeē ní canatecu de. <sup>12</sup> Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, achí.

Te ndaa de mēhñu vícō quingoo de andiví, cuni ñayuu cájito uhū i de. <sup>13</sup> Te máá hora un jnáa ndasí, te ndicó cáva naa iin jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

<sup>14</sup> Súcuan yáha jñudóho uū, te yachí coo jñudóho uní.

### *Siquī trompeta uxā*

<sup>15</sup> Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayṽi je ni nuquihí ndaha máá Jítoho yō Yaā Dios

jíin Cristo jeé ní tají yá.

Te ndacu ya jñiñu ní cáni cuiti.

Achí.

<sup>16</sup> Yūcuán na te ndihócó cuñ tēe jéhnu cándiso jñiñu jeē cánene de mesa de ichi núu Yaā Dios, ni cajecuñi yití de, ni cachiñúhún de ya. <sup>17</sup> Te ni cacahān de:

Na cútahū na núu ní, Tátā Yaā Dios,

chí máá ní jñí ndíhi poder,

te cúu ní Yaā íyó vijna, te ni íyo ní ní cáni, te coo ní ní cáni.

Te ni najñi ní ndiví jeé íyó,

te jíin poder ni ní quejéé ní ndácu ní jñiñu nuū.

<sup>18</sup> Ñayuu tācá nación ni caquiti ni i siquī ní.

Te vijna chí ni quee quiṽi jeé cuáha ní castigo i,

jíin jeé sándaā ní jñiñu tāca ndíyí.

Te cuáha ni táhū nuū tāca mozo ni jeé ní canacani jñuhun ní,

jíin núū tāca ñáyyuu cájejníñu nuū ní, jíin ñáyyuu cáchiñúhún núū ní, cúu ñayuu cácujeñhu jíin jéē tuú.

Te vijna te snáhnú ndetū ni ñáyyuu castívi ñayívi.

Achí de jíjnáhan de.

<sup>19</sup> Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan íne yejnū jeē ñúhun contrato yā. Te ni ndindéé taja, te nāhin, te cáhán taja, te ni jnāa, te ni cuun xeēn ñiñí.

*Jnúhun ñahan jíin cóo cáhnu*

## 12

<sup>1</sup> Yūcuán na te ini andiví ní cane ñin jeē nahán náā ni yō jíto yó: ñin ñahan jeē ñúhun ña niāndii nájnūhun sahma, te íin jehē ña siquí yóo, te ñúhun ñin corona xiní ña jeē ndeé uxí uū quími. <sup>2</sup> Te ñúhun sēhe ña. Te ni ndahyū cohó ña jeē ndóho ña jéhnde chíji ña jeē scácu ña i. <sup>3</sup> Yūcuán na te ini andiví ní cane tucu inga jeē náā ni yō jíto yó: ñin cóo cuehé cáhnu ndasí. Te iyó úxā xiní tī jíin úxí ndíqui tī. Te ndihúxá xiní tī ñúhun corona. <sup>4</sup> Te jíin súhmā tī ni stáa tī ñin jeē uní parte quími jeē iyó andiví, te ni síngoo tī ini ñayívi. Te ni íne tī nuū ñáhan jeē scácu sēhe ún, ndétu tī cocó tī sēhe ña jeē jé yajni cacu i. <sup>5</sup> Te ni scácu ña ñin sēhe yíí, te sūchi un ní jeconaā jeē ndácu ñihin i jniñu nuū ndívii nación. Yūcuán na te ni ndoñúhún sēhe yíí ña ún, ni ndaa i cuahān i nde nuū íin mesa Yaā Dios nuū ndácu ya jniñu. <sup>6</sup> Te ñahan un ní jinu ña cuahān ña nde nuū ñúhun téhé núū iyó ñin lugar jeē ní sátúhva Yaā Dios. Te yūcuán condee ña nihín ña jeē cáji ña mil uū ciento uní xico quívi.

<sup>7</sup> Yūcuán na te ni cajejnáhan ini andiví. Chi ndajehé jéhnú ga jeē naní Miguel jíin táca ndajehé jeē cácuu mozo nuū yā, ni cajejnáhan jíin cóo cáhnu. Te cóo un jíin táca ndajehé maá, ni cajejnáhan jíin yá. <sup>8</sup> Te tu ní cácuñdeyí tī, te tuá ní cúu coyūcu tī andiví. <sup>9</sup> Súcuan ni cuu jeē ní quenehen ya cóo cáhnu un jéē iyó ndé jenahán ndasí. Te nání tī jexeén jíin Satanás, te maá tī cúu jeē stahú ndihi ñayuu ñayívi. Te ni scáne ya tī nde ini ñayívi jíin táca ndajehé tī.

<sup>10</sup> Yūcuán na te ni jini sōho ri ñin jnúhun jeē cáhán jee ichi ándiví:

Je ni quee quívi jeē jínu jnama ya yohó, jíin jéē steén ndijin yā jeē jnái ya poder, jíin jéē ndácu ya jniñu, jíin jéē ndíso jniñu maá Cristo jeē ní tají yá. Chi je ni quenehen ya maá jéē cáhán cuéchi siquí tācá hermano yō. Chi nduú ñuú ní cáhán cuéchi siquí i nuū Yaā Dios maá yó. <sup>11</sup> Te ni cacundeýi i siquí Satanás un, ní sáha jnúhun jeē ní jíhi Yaā cúu Londe, jíin jéē ní cacahān ndaa i jnúhun Yaā Dios, jíin jéē tu ní cundáhú ni i maá i, chí ni jēhe i jnúhun candíje i vēsú núu cuu i jeē siquí yā. <sup>12</sup> Núu súcuan te na cúsiñ ndasí ní táca róhó jéē cáyūcú andiví. Te nacā xeēn ndoho táca róhó jéē cáyūcú ini ñayívi jíin núu mar. Chi ní cuun jexeén ní jinū nuū rō jíjnáhan ró. Te quítí xeēn ni, chí jíiní jeē tuá coo cuehé gā tiempo jeē stahú ñayuu. Achí.

<sup>13</sup> Te ni jini cóo cáhnu ún jéē ní scáne ya maá cuahān ini ñayívi, te ni jinu tī jíin ñahan ní scácu sēhe yíí, jeē xeēn sáha tī jíin ña núú. <sup>14</sup> Te ni cajēhe uū ndijēn yaha chócó cáhnu nuū ñahan ún, návāha ndava ña quihín ña lugar ña nuū ñúhun téhé, te cácu ña nuū cóo ún. Te yūcuán condee ña uní cuiyā yosáva, te nihín ña jeē cáji ña. <sup>15</sup> Te yuhu cóo un ní cane ndute nájnūhun ñin yūte cáhnu, cuahān yatā ña návāha jneni ña. <sup>16</sup> Te maá ñuhun chí ni chindéé ñáhán ñahan ún, chí ni nune-ni, te ni nungoo yūte jeē ní cane yuhu cóo ún. <sup>17</sup> Yūcuán na te xeēn ní quítí ní cóo cáhnu ní jito tī ña. Te cuahān tī cuajnáhan tī jíin táca gá

sêhe ña, suu ñayuu casquícu jniñu ndácu Yaā Dios te cácan díje vāha i jñuhun Jesucristo.

### *Jñuhun síquī uū quiti xéén*

## 13

<sup>1</sup> Te ni indichi rī yumár. Te ni jito rī jeē ní cane ñn quiti xéén ini mar. Te íyó úxā xini tī jín úxī ndiqui tī. Te ndihúxí ndiqui tī ñúhun corona. Te ndihúxá xini tī ndeé ñn síhvī néé jéé quiti ní Yaā Dios sáha. <sup>2</sup> Te quiti xéén jeē ní jito rī ún, cáa tī nájnūhun cuiñī, te ndaha tī cáa nájnūhun ndaha oso, te yuhu tī cáa nájnūhun yuhu ndícaha. Te nuū quiti un ní jêhe coō cáhnu poder maá jín mesa nuū ndácu máá jniñu. Te ní sáha jeē cujéhnu ndasí quiti ún. <sup>3</sup> Te ni jito rī jeē ní tújī ñn xini tī, jeē jé yajni cuu tī nuú. Te ni nduvāha tī jeē ní tújī tī. Te nahán ní naa ní ñayuu ñí cáhnu ñayiví ní jito i, te ni cajetáhú i nuū tī. <sup>4</sup> Te ni cachiñúhún i coō cáhnu síquī jeē ní sáha tī jeē cujéhnu ndasí quiti xéén un, te suni ní cachiñúhún i quiti xéén un. Te ni cacahān i:

Tú ni ñn jeē cujéhnu nájnūhun quiti yáha, te tú ni ñn cundeyí cuajnáhan jín tī, áchí i jínáhan i.

<sup>5</sup> Te tu ní jési ya jeē cahān tī jeē quiti téyí cúu tī, jín jéé cahán ndevāha tī síquī yā. Te ní nihñ jniñu tī jeē ndácu tī jniñu uū xico uū yoō. <sup>6</sup> Te ní quejéé tī ní cahān ndevāha tī síquī Yaā Dios, jín síquī síhvī yá, jín síquī nuū ndeé yá, jín síquī táca jéé iyó andiví. <sup>7</sup> Te tu ní jési ya jeē cuajnáhan tī jín ñayuu maá Yaā Dios, te cundeyí tī jín i. Te suni ní nihñ jniñu tī jeē ndácu tī jniñu nuū ñayuu táca yúcūn, táca ñuu, táca yuhu, táca nación. <sup>8</sup> Te ñayuu ñí cáhnu ñayiví jéé tu yósó síhvī i nuū tútu, ní cachiñúhún i quiti xéén un. Te Yaā cúu Londe jeē ní cajehni i, máá yá névāha tutu un jéé yosó síhvī ñayuu cotecu ñí cáni, te je yósó síhvī i nde quiví ní jécóo ñayiví.

<sup>9</sup> Ñayuu iyó sóho na chúsóhó vāha i jñuhun cahān rī yāhá. <sup>10</sup> Táca ñayuu jeē sáha jeē quiví jnáhan vecāa, suni vecāa cone máá i. Te táca ñayuu jeē jéhni jnáhan jín espada, suni jín espada cuu maá i. Núu súcuan te ñayuu maá Yaā Dios chí jini ñúhún cuandeyí ní i jín jnúndóho te ma jécuiñí i candíje i jñuhun cundáhú ní yā i.

<sup>11</sup> Yúcuan na te ni jito rī inga quiti xéén jeē ní cane chíji ñuhun. Te íyó uū ndiqui tī jeē cáa nájnūhun ndiqui lánchi. Te nájnūhun tachī coō cáhnu, súcuan tachī cahán tī. <sup>12</sup> Te nájnūhun ndácu quiti xéén xíhna ñúhún jniñu, suni súcuan ndácu quiti uū ún jniñu, ín tī nuū quiti xíhna ñúhún. Te quiti uū sáha tī jeē chíñúhún táca ñayuu ñí cáhnu ñayiví nuū quiti xíhna ñúhún, quiti ní tújī jeé jé yajni cuu tī te ni nduvāha tī. <sup>13</sup> Te quiti uū suni sáha táca jniñu jéhnu jeé nahán náa ní yō jito yó. Chí ní scúun tī ñuhún ichi ándiví ní quiji ini ñayiví, ní cajito ñayuu. <sup>14</sup> Te ní stahú tī ñayuu ñayiví jín táca jniñu jéhnu jeé ní nihñ tī poder jeé sáha tī, jito jínúu quiti xíhna ñúhún. Te ní ndacu tī jniñu jeé na sáha ñayuu imagen quiti xíhna ñúhún, quiti ní tújī jín espada, jeé jé yajni cuu tī te ni nduvāha tī. <sup>15</sup> Te quiti uū ní nihñ tī poder jeé chutáchi tī xijní imagen quiti xíhna ñúhún, návāha cuu cahān, te cahni táca ñayuu jeé tu cájetáhú i chíñúhún i máá. <sup>16</sup> Te táca ñayuu cujéhnu jín ñayuu tu cújéhnu, táca ñayuu cucá jín ñayuu ndahú, táca ñayuu sájnñu cuenta maá jín mozo jeé ní cajeen ñayuu, ní sáha tī jeé ní jécondee ñn jnuní ndavāha i chí jnéé i. <sup>17</sup> Te ni ñn ñayuu ma cúu cuaan i xícó i te núu tu ndíso i jnuní jeé cúu síhvī tī chí jnúní número jeé cúu síhvī tī. <sup>18</sup> Jñuhun ndíchí cúu jeé cahān rī yāhá: Táca ñayuu jécūhun vāha ní cuu tava

i cuenta número quiti xéén un, chi número un cúu síhví ìn tēe. Te número un cúu ìñū ciento unī xico ìñū.

*Yaa jeē cájita 144,000 ñayuu*

## 14

<sup>1</sup> Yūcuán na te ni ndacoto ri, te ni jito ri jeē ìn máá Yaa cúu Londe xinī yucu Sión. Te cáhīn ciento uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaa Dios. <sup>2</sup> Te ni jini sōho ri jeē ñhīn ndasí ichi ándiví, nájñuhun jeē jica cuehē yūte chí jéé cahán ñhīn taja. Te jeē ñhīn un sáha nájñuhun jeē cátee cuehē ñayuu yaa jeē naní arpa. <sup>3</sup> Te cáhīn i ichi núu mesa nuū ndácu Yaa Dios jniñū, jíin núu ndicúún jeē técu, jíin núu ndihóco cuūn tēe jéhnū cándiso jniñū. Te ni cajita i ìn yaa jeē. Te ni ìn ñayuu tu cúu cutūhva i yaa ún, chí máni máá ciento uū xico cuūn mil ñayuu jeē ní jnama ya i ìni ñayiví. <sup>4</sup> Te táca tēe yáha cácuu jeē tu ní casáha cuēchi jíin ñahan casáha néé, chí tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chí ní jnama ya de ìni ñayiví, te máá de cácuu tēe jeē xihna gā ni cacandíje nuū Yaa Dios jíin núu Yaa cúu Londe. <sup>5</sup> Te tú cuiti na jñuhun stáhú cácahān de, chí tēe ndoo ánuá cácuu de, cáhīn de nuū mesa Yaa Dios.

*Jñuhun jeē ní cacahān ndinúni ndajéhe yā*

<sup>6</sup> Yūcuán na te ni jito ri inga ndajéhe yā jeē ndáva cuahān sava andiví. Te ndiso ya jñuhun jeē jnama Yaa Dios ñayuu cotecu i ní cáni. Te ni nacani ya jñuhun un núu táca ñayuu ní cáhnu ñayiví, nuū ñayuu táca nación, táca yúcūn, táca yuhu, táca ñuu. <sup>7</sup> Te ni cahān jee ya:

Conso Iyo ró núu Yaa Dios, te na cáhān rō jeē yóhho cújéhnū ya, chí je ni quee quiví jeē sándaā yā síquī rō ndese ni casáha ró. Te na chíñúhún ró yā, chí máá yá ní sáha andiví jíin ñayiví jíin mar jíin táca núu cáne ndute, áchí ndajéhe yā.

<sup>8</sup> Yūcuán na te ndíquín inga ndajéhe yā vēji, te ni cahān jee ya:

Je ni naa ì ñuu teyí Babilonia. Chí ní sáha jeē ñayuu táca nación casiquí ndéē i Yaa Dios jeē ní castóo i ya te cándiquīn i ídolo jíin táca jniñū néé, áchí ndajéhe uū.

<sup>9</sup> Yūcuán na te ndíquín inga ndajéhe unī vēji, te ni cahān jee ya:

Xeēn coo síquī ñayuu cáchiñúhún quiti xéén jíin imagen tí, te jéhe i jñuhun condee jnuni tí jneē i chí ndaha i. <sup>10</sup> Chí ñhīn i castigo xeēn síquī cuéchi ní casáha i, chí quiti ní Yaa Dios nuū i, te tuá cone cáhnu ní yā. Te ndoho i nuū cayú ñuhūn jíin azufre, coto táca ndajéhe Yaa Dios jíin Yaa cúu Londe.

<sup>11</sup> Te ñuhmā nuū cándoho i cánda ní cáni cuiti. Te nduú ñuu tu ndétátú ñayuu cándoho ún jeē ní cachíñúhún quiti xéén jíin imagen tí, jíin jéé ní jécondee jnuni síhví tí. <sup>12</sup> Jeē yúcuan ñayuu máá Yaa Dios jeē casquici i jniñū ndácu ya te cácaandíje váha i Jesús, cánuu jéé cuándeýí ní i. Achí ndajéhe unī.

<sup>13</sup> Yūcuán na te ni jini sōho ri ìn jñuhun ichi ándiví jéé ní cáhān jíin rí:

Tee ró jñuhun jeē cahán ri jíin ró yāhá: Nacā jeē ndetū táca ñayuu cácaandíje Jitoho yō jeē cájihī vijna jíin ndé ní cuahān yō. Jendaá chí ndetátú i jeē ní casáha i jniñū váha, te jniñū i un má náá chí sáha jeē quendōo váha i ní cáni, áchí Espiritu.

*Jeē ní nastútú yá ñayuu ñayiví*

<sup>14</sup> Yūcuán na te ni ndacoto ri, te ni jito ri ìn vicō cuijín. Te nuū vicó un néne Yaa ní nduu tēe. Te xinī yā ñuhun corona oro, te ndáhá yá ìn hoz xeēn. <sup>15</sup> Te

ni quenda inga ndajéhé yā ini templo, te ni cana jee, te cáhán jíin Yāā néne nuū vicó un:

Cahnde ni jíin hoz ní, te nastútú ní ñayuu ñayíví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

<sup>16</sup> Yūcuán na te Yāā néne nuū vicó ni nastútú yá ñayuu váha ini ñayíví, nájñuhun táhndé trigo jíin hoz.

<sup>17</sup> Yūcuán na te ni quenda inga ndajéhé yā ini templo jeē iyó andiví, te suni ndáhá yá ñin hoz xeēn. <sup>18</sup> Te nde nuū altar ni quenda tucu inga ndajéhé, te ndíso jñíñu ya siquí ñuhun altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayíví, nájñuhun jeē cájehnde i chutū ndehē uva jeē jé ni jíichí, áchí.

<sup>19</sup> Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayíví, nájñuhun ndútútú ndéhē uva. Te ni jnaa ya i nuū nihín i castigo xeēn Yāā Dios, nájñuhun jnáa i ndehē uva nuū taxín. <sup>20</sup> Te ni jēhe ya castigo i yatā ñúū, te ni jica níñi i nájñuhun ndúxi uva. Te ni ndaa ni jinū cūhva jeē sucún yuhu caballo, te ni jica cuahán nde unī ciento kilómetro.

*Ndihúxá ndajéhé jíin ndihúxá jñúndóho jeē sándihí*

## 15

<sup>1</sup> Te ni jito ri inga jñíñu jéhnu ichi ándiví jéé náā ni yō jito yó. Chi cáhín uxā ndajéhé yā jeē cuáha ndihúxá jñúndóho sandihí na. Te jeē jínu ndihúxá jñúndóho yáha, te jínu jeē cuáha Yāā Dios castigo xeēn siquí cuéchi.

<sup>2</sup> Te suni ni jito ri ñin jeē cáa nájñuhun mar, te cáa nájñuhun vidrio jeē ndíndēe nájñuhun ñuhun. Te yumar un cáhín ñayuu ni cacundeyí siquí quiti xéén jíin imagen tí, jíin jéé tu ní cáquihin i jñunī número jeē cúu síhví tí. Te cándāhá i yaa jeē naní arpa jeē ni jēhe Yāā Dios nuū i. <sup>3</sup> Te cájita i yaa jeē ní tava Moisés, tēe cúu mozo Yāā Dios, jíin yaa maá Yāā cúu Londe. Te súcuan cáhán yaa ún:

Yóhoy náā ni na cájito ná ndihí jñíñu jéhnu teyí jéé sáha ní,

Tátā Yāā Dios, chi jñí ní ndihí poder.

Te máni jñíñu ndaā jñíñu váha sáha ní,

jeē cúu ní Rey nuū táca nación.

<sup>4</sup> Tú ni ñin i iyó jéé ma cónso Iyo i nuū ní, Tátā Yāā Dios.

Te ndihí i cahán nahín i jeē yóhoy cújéhnu ní.

Chi máñuhún ni máá ní cúu Yāā ndoo Yāā ii.

Te quijicoo ñayuu táca nación, chiñuhún i nihín,

chi je ni cajini i jeē ndaā váha sáha ní táca jñíñu.

Achí i cájita i.

<sup>5</sup> Yūcuán na te ni ndacoto ri, te ni jito ri jeē ini andiví núne cuarto ii ini templo nuū íne tabla yuū jeē yosó ley yā. <sup>6</sup> Te ini templo un ní quendacoo ndihúxá ndajéhé jeē cándiso jñíñu siquí ndihúxá jñúndóho. Te cáñuhun ya sahna fino iyó ndoo te xíñú. Te núhni cinturón oro jicá yā. <sup>7</sup> Te ñin jnánan ndicúún jeē técu ni jēhe ñin ñin cohó oro nuū ndihúxá ndajéhé un. Te ini cohó un ñuhun chítú castigo xeēn jeē ni jēhe Yāā Dios, Yāā técu ní cáni. <sup>8</sup> Te ni chítú ndíñi ñuhmā ini templo, te suu ni steén jeē yóhoy cújéhnu Yāā Dios jíin poder jñí ya. Te ni ñin tu ní cúu quiví ini templo, chi nde na ndíñi ndihúxá jñúndóho jeē cuáha ndihúxá ndajéhé yā.

*Siquí ndihúxá cohó jeē ñuhun castigo*

## 16

1 Yūcuán na te ini templo ni jini sōho ri ñn jñuhun cáhán jee jíin ndihúxá ndajéhe yá:

Cuangoo te cati ró síquī ñayiví ndihúxá cohō jee ñuhun castigo xeēn jee ni jéhe Yaā Dios, achí.

2 Te cuahān ndajéhe ñn, te ni jeti ya cohō yā síquī ñayiví. Te tāca ñayuu jee ndeé jnūñi quiti xéén un jíin jée cáchiñúhún imagen tī, ni canecoo ndihyí xeēn jee jetú ndasí.

3 Te ndajéhe uū ni jeti ya cohō yā nuū mar, te ndute mar ni nduu nájnūhun niñi ndíyí. Te ni cajihí tācá quiti jee ñuhun ini mar.

4 Te ndajéhe unī ni jeti ya cohō yā ini tāca yúte jíin tāca núū cáne ndute, te ni nduu niñi. 5 Te ni jini ri jee cáhán ndajéhe jee ndíso jniñu síquī ndúte:

Tátā Yaā Dios, máá ní cúu Yaā ndoo Yaā ñ, Yaā iyó vijna, te ni iyo ní ñí cáni. Te ndaā sáha ní jee súcuan ni ndonda ní síquī cuéchi i. 6 Chi ni casáha i jee ní jeti niñi ñayuu ndoo ní jíin ñayuu ní canacani jñuhun ní. Te vijna chi ni sáha ní jee cájihí i niñi, chi ñayuu casáha jniñu neé cácuu i, jee cánuú ndoho i súcuan.

7 Te ni jini sōho ri jee cáhán inga nde nuū altar:

Tátā Yaā Dios, máá ní cúu jee jññ ndihí poder. Te jniñu váha jniñu ndaā ni sáha ní jee ní ndonda ní síquī cuéchi i. Achí.

8 Te ndajéhe cuñn ni jeti ya cohō yā síquī níandii, te ni jéhe Yaā Dios jñuhun jee ndujihni ndasí níandii návāha cayū ñayuu. 9 Te xeēn ndasí ní cayū tāca ñayuu. Te vésū súcuan te tu ní cánacani ni i stóo i cuéchi i, ni tu ní cácahān i jee cujéhnu Yaā Dios. Chi sa suhva ni cacahān ndevāha i síquī yā jee ni jéhe ya tācá castigo yáha nuū i.

10 Te ndajéhe uhūn ni jeti ya cohō yā nuū mesa nuū ndácu quiti xéén jniñu. Te ni cunee ñí cáhnu nuū ndácu ti jniñu. Te cánacayihí ñayuu yuhu i jee cájetū ndasí i. 11 Te vésū súcuan te tu ní cánacani ni i stóo i jniñu neé casáha i. Chi sa ni cacahān ndevāha i síquī Yaā Dios andiví síquī jee cájetū ndasí i jíin ndihyí xeēn cándoho i.

12 Te ndajéhe iñū ni jeti ya cohō yā síquī yúte cáhnu jee naní Eufrates. Te ni ichi ndihí ndute yúte ún, návāha nune ñn ichi jee quíjicoo tāca rey ichi núū cáne níandii.

13 Te ni jito ri jee ini yuhu coō cáhnu jíin ini yuhu quiti xéén jíin ini yuhu máá téé nácani jñuhun stáhú ní canecoo unī tachí jee cáa nájnūhun sáhvá. 14 Te tachí ún chi ndajéhe jexeén cácuu, te casáha jniñu jéhnu jee náá ni ñayuu cájito i. Te ni quendacoo tachí un jee nastútú tāca rey ñí cáhnu ñayiví, jee cuajnáhan de síquī Yaā Dios quiví jee ndíji ya. Te máá yá cúu jee jññ ndihí poder. 15 Cuni sōho jíjnánhan ró, chi sanaa ni ró te ndiji ri, nájnūhun jee ñn sanaa-ni te quíji ñacuihná. Te nacá jee ndetū ñayuu jee ndito ni i, te ndíto yúcn i sahna i, návāha ma cáca vichí lí i, cúu jee tú na cuéchi coo síquī i jee cucanu i nuū tāca ñayuu, achí yá. 16 Te ni canastútú táchí un tāca rey, ni candutútú ñn lugar jee yuhu hebreo naní Armagedón.

17 Te ndajéhe uxā ni jeti ya cohō yā nuū tachí. Te ini templo andiví jíin núū mesa nuū ndácu ya jniñu, ni cane ñn jñuhun jee ni cáhān jee:

Je ni jñu, achí.

18 Yūcuán na te ni ndindéé taja, te ñihin, te cáhán taja, te ni jnáa ndasí. Chi nde ñí cáni jee iyó ñayuu ñayiví, tu ní jnáa ñihin ndasí nájnūhun jee ni jnáa ni jito ri. 19 Te máá ñuu cujéhnu Jerusalén, ni cusñn ni nduu unī parte, te ñí cáhnu ñayiví ni naa tācá ñuu. Te ñuu teyí Babilonia, chi ni sáha nahín yá jee ni

ndutahū i castigo xeēn, chi ni quitī ndasí ni yā siquī cuéchi i. <sup>20</sup> Te ni naa tāca isla, te suni yucu tuá gā. <sup>21</sup> Te ichi ándiví ní cuun ñíñí náhnu siquī ñayuu, jeē véyi nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí ñíñí, chi ñin jñúndóho xeēn ni cuu.

*Jeē ndonda ya siquī ñuu neé Babilonia*

**17**

<sup>1</sup> Yūcuán na te ni quiji ñin jnáhan ndihúxá ndajéhe jeē ní candāhá ndihúxá cohō ún, te ni cahān yā jíin rí:

Nehen, te na steén rí nuū rō ndese coo castigo siquī maá ñahan jnéni jeē cúu ñuu cujéhnu íne nuū iyó cuéhē ndute. <sup>2</sup> Chi tāca rey ñayivi nájnūhun ni casiquí ndéē de jíin ñahan ún, cúu jeē ní castóo de Yaā Dios te cándiquin de jñūhun néé ní steén ña. Te ni sáha ña jeē ñayuu ní cáhnu ñayivi, nájnūhun nájini i te casiquí ndéē i Yaā Dios cúu jeē ní castóo i ya te cásáha ndasí i cuéchi. Achí ndajéhe yā.

<sup>3</sup> Te ni sáha ga Espiritu Santo jeē ní jito ndijin rí, te ndajéhe yā un cuáhān yā jíin rí nde nuū ñūhun téhé. Te ni jito rí ñin ñahan, yósó ña ñin quití xéén cacuéhé. Te ní cáhnu tí ndeé jñūhun néé jéé quití ni Yaā Dios sáha. Te íyo úxā xiní tí jíin úxí ndiquí tí. <sup>4</sup> Te ñahan un ñūhun ña sahna ndihí jíin sahna cuehé, te suni ñūhun ña siquí oro jíin yúu luu jíin perla jeē ndeé yahu. Te ndáhá ña ñin cohō oro jeē ñūhun chitú jíin jniñu néé ndasí jíin jniñu jnehén jéé jíca jnéni ña. <sup>5</sup> Te jneé ña ndeé ñin síhví jéé cúu ñin jñūhun sáhi, te suhva cáhān: Yāha cúu ñuu teyí Babilonia, jeē cúu nájnūhun náná tāca jéé cájica jnéni jíin jéé casáha néé ndasí ñi ñayivi, áhí. <sup>6</sup> Yūcuán na te ni jini rí jeē ñahan un nájini ña jeē nájnūhun ni jihí ña níñí ñayuu maá Yaā Dios jíin níñí ñayuu ni cajihí siquí jeē ní canacani ndaā i jñūhun Jesús. Te nahán ní naa ni rí ni jito rí ña. <sup>7</sup> Yūcuán na te ni cahān ndajéhe un jíin rí:

¿Naun náa ni rō jito ró? Na cástūhun rí nuū rō ndese cúni cahān jñūhun sáhi siquí ñahan un jíin quití xéén yosó ña, jeē iyó úxā xiní tí jíin úxí ndiquí tí. <sup>8</sup> Quití xéén jeē ní jito ró, chi ni cotecu tí, te vijna chí tuá tí. Te ndenda tucu tí ñi túhñchi cúnu, te yūcuán na te quihñ tí nuū jñahnú ndetū tí. Te ñayuu cáyūcu ní cáhnu ñayivi, naa ni i coto i nuū quíti un jéé ní cotecu tí te ni jihí tí, te natecu tucu tí. Te cácuu i ñayuu jeē tu yósó síhví i nuū tútu jeē yosó síhví ñayuu cotecu ní cáni jeē ní jécósó síhví i nde quívi ní jécóo ñayivi.

<sup>9</sup> Tāca ñayuu jécūhun vāha ni, cuu tava i cuenta ndese cúu: Ndhúxá xiní tí cácuu nájnūhun uxā yucu nuū néne ñahan ún. <sup>10</sup> Te ndihúxá xiní tí suni cácuu nájnūhun uxā rey. Te uhñ rey un je ni naa jeē ndácu de jniñu, te ñin de ndácu jniñu vijna, te inga de chí ná tu quiji de. Te núu na quíji de te jecu-ni tiempo coo de. <sup>11</sup> Te quití xéén jeē ní cotecu te tuá iyó tí vijna, maá tí cuu rey unā. Te ñin jnáhan ndihúxá rey un cúu tí. Te suni quihñ tí nuū jñahnú ndetū tí.

<sup>12</sup> Te ndihúxí ndiquí jeē ní jito ró cúu nájnūhun uxí rey, te ná tu ndacu de jniñu jñáhan de. Te maá de jíin quití xéén un, chí nihñ jniñu de cuu de rey jecu-ni tiempo. <sup>13</sup> Te ndihúxí rey un chí squíjñahan de jñūhun, te nacūaha de poder de jíin jniñu ndíso de nuū quití xéén un návāha ndacu tí jniñu. <sup>14</sup> Te cuajnáhan de jíin Yaā cúu Londe. Te Yaā cúu Londe quende yā poder de jñáhan de. Chí maá yá cúu Jitoho nuū tāca jítoto, te maá yá cúu Rey nuū tāca rey. Te ñayuu cáhñin jíin yá, chí ni nacāji Yaā Dios i te ni cana ya i, te cásquícu vāha i. Achí ndajéhe un.

<sup>15</sup> Te ni cahān gā yā:



Cuehē ndute jeē ní jito ró núū néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. <sup>16</sup> Te ndihúxi ndiqui jeē ní jito ró jéé névaha quiti xeén un, suu cácuu rey jeē coto uhū de ñahan jíca jnéni un. Te sāha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. <sup>17</sup> Chi Yaā Dios scánda ya ini de jeē na sāha de jniñu cúní yā. Te squíñahan de jñuhun jeē nacuaña de jniñu ndiso de nuū quíti xeén un, ndacu ti jniñu nde na squicu tāca jñuhun ni cahān Yaā Dios. <sup>18</sup> Te ñahan jeē ní jito ró cúu máa ñuu teyí jéé cujéñnu nuū tāca rey ñayívi. Achí ndajéhé un.

### *Siquí jeē naa ñuu Babilonia*

## 18

<sup>1</sup> Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéñnu ndasí yá. Te jeē ndíndēe yá te ni ndíndēe núū ñayívi. <sup>2</sup> Te ni cana jee ya:

Je ni naa íi ñuu teyí Babilonia. Te ni nduu vehe tāca táchī, nuū ñúhun ndinuū tachī neé, jíin tāca téji, quiti quíni jeē tu núñahan ni yō. <sup>3</sup> Chi ñuu un cúu nájñuhun ñn ñahan ndevāha, te ni sāha ña jeē ñayuu tācá nación, nájñuhun nájini i te casíquí ndéē i Yaā Dios, cúu jeē ní castóo i ya te cásaha ndasí i cuéchi. Te tāca rey ñayívi, nájñuhun ni casíquí ndéē de jíin ñahan ún jeē ní cajetáhú de jñuhun neé ní steén ña. Te ñayuu ní ñayívi jéé cájeen caxícó, ní cacucúca i jíin cuehē jeneé jeē ní nevāha ña.

<sup>4</sup> Yūcuán na te ni jini sōho ri inga jñuhun jeē ni cáhān ichi ándiví:

Máa ró jeē cácuu ró ñayuu maá rí, quendacoo ró ini ñuu jíñā, návaha ma quívi nduu ró jíin tāca cuéchi jeē sāha ña, te návaha ma ndóho ró jñúndóho xeén jeé ndoho ña. <sup>5</sup> Chi ni cayā cuehē ndasí cuéchi ña, nájñuhun ñn montón cáhnu ndasí jéé ní cusúcuu ndé andiví. Te vijna te nduxeēn Yaā Dios siquí cuéchi ña. <sup>6</sup> Stóho ró ña nájñuhun ni sāha ña jeē ní ndoho sava ga ñayuu. Te nachunaa ró nuū ña doble jñúndóho jeē ní jéhe ña nuū inga ñayuu. Te sāha ró jeé nandicó cóo doble siquí ña vēsú jeē ní sāha ña siquí inga ñayuu. <sup>7</sup> Te yōhoyo ni satéyí ña máa ña, te cúca ndasí ní cotecu ña. Te suni jíin cúhva yúcuan nacuaña ró jéé ndóho xeén ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuíti jñúndóho ndoho ri, achí ña. <sup>8</sup> Jeé yúcuan cúu jeé ñn quiví-ni te quiji cuehē jñúndóho siquí ña. Chi cuu ndíyi, te cucuíhyá ndasí ní ña, te coo jnamā, te cayú ña nuū ñuhún. Chi yōhoyo íyo poder maá Jítoho yō Yaā Dios, Yaā ní ndonda siquí cuéchi ña, áchí.

<sup>9</sup> Te tāca rey ñayívi jéé ní casíquí ndéē de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña. <sup>10</sup> Te cuiñí jíca de chí yuhú de coto de jeé súcuun ndoho ña castigo. Te cahān de jíñáhan de:

Nacā jeé xeén ndóho ró, ñuu cujéñnu Babilonia, chí yá-ni ñuu teyí ní cuu ró núú. Te vijna chí ñn núnúu-ni te ni quee castigo jeé náa ró, achí de jíñáhan de.

<sup>11</sup> Te tāca téé ñayívi jéé cájeen caxícó ñuu ún, ndahyū de te ndahyū cohó de jehé. Chí tuá ndé ñn cuaan ndajníñu caxícó de. <sup>12</sup> Te ndajníñu caxícó de un cúu oro, plata, yuū luu jíin perla jeé ndeé yahu, jíin sahma fino jíin sahma seda jeé ndihí jíin jéé cuehē. Te suni tācá yujnu jeé asñ jéén xicō, jíin tāca ndajníñu luu jeé ní sāha jíin marfil jíin yujnu lúu jeé ndeé yahu jíin cáa cuacán jíin cáa hierro jíin yúu cuijín luu. <sup>13</sup> Te suni caxícó de canela jíin táca jíhyo asñ jíin súje cutú jíin súje uvuā jíin táca perfume jíin vino jíin aceite jíin harina



fina jíin trigo. Te suni cáxícó de quiti ndíso jíin lanchi jíin caballo jíin carreta, te nde ñayuu cáxícó de jeē sájniñu sáa-ni i. <sup>14</sup> Te cahān de jíin ñuu ún:

Ni cujiyo ndihi ndajniñu cucá jeē ní nujnahan ndasí ni rō. Te tāca jée lúu jeē váha jeē ní cotecu cucá ró, chi ní naa ndihi, te ma nánihīn cuiti gā rō, achi de jíjnāhan de.

<sup>15</sup> Te tāca tée ni cajeen ni caxíco ní cacucúca jée siquí ndajniñu ñuu ún, chi cuiñi jíca de jeē yūhú de coto de castigo coo ñuu ún. Te ndahyū de te ndahyū cohó de. <sup>16</sup> Te cahān de jíjnāhan de:

Nacá jeē xeēn ndóho ñuu teyí yáha. Chi ní cuu nájnūhun in ñahan jeē ni ñuhun sahma fino, sahma ndihí jíin jée cuehé. Te ni ñuhun ña siquí oro jíin yūu luu jíin perla jeē ndeé yahu. <sup>17</sup> Te vijna te in núnúu-ni te ní naa ndihi tāca ndajniñu váha ún, achi de jíjnāhan de.

Te cuiñi jíca tāca tée cáscaca barco, jíin ñayuu cuángoo nuū barco, jíin tée cásjniñu ini barco, jíin tāca gá tee cásjniñu nuū mar. <sup>18</sup> Chi coto de ñuhmā jeē cayú ñuu ún, te cana jee de jíjnāhan de:

¿Ndé íne ga ñuu teyí jée cujéhnu nájnūhun ni Iyo ñuu yáha? achi de.

<sup>19</sup> Te cosō de ticachā ñuhun xini de jeē cácuuhyá ni de. Te ndahyū de te ndahyū cohó de. Te cana jee de jíjnāhan de:

Nacá jeē xeēn ndóho ñuu teyí yáha. Chi jíin ndajniñu cucá jeē ni Iyo ñuu un ní cacucúca tāca ñayuu cánevāha barco cájica nuū mar. Te vijna te in núnúu-ni te ní naa ndihi-ni, achi de.

<sup>20</sup> Te na cūsī ni tāca róhó jée cáyucú andiví, siquí jeē ní naa ñuu ún. Te na cūsī ni rohó, tāca tée apóstol, jíin tée canacani jnūhun Yaā Dios, jíin ñayuu maá Yaā Dios. Chi ní sáha néé ñuu un siquí rō jíjnāhan ró, te jeē yúcuán ní ndonda Yaā Dios siquí, achi de.

<sup>21</sup> Yúcuán na te in ndajéhé ndíso poder, ni quihin ya in yuū cáhnu nájnūhun in yōso cáhnu, te ní scāne ya ini mar. Te ní cahān yā:

Nájnūhun ní naa yōso yáha, suni súcuán naa Babilonia, ñuu cujéhnu téyí. Te ma núcoo cuiti gā jeē cóto yó núu. <sup>22</sup> Te ní cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tāca ndajniñu. Te suni ma cúni sōho ga i jeē ñhīn tāca molino rō. <sup>23</sup> Te ní in lámpara ma sáha ga jeē cūndijin nuū rō. Te ní ma cúni sōho ga i vico jeē cácusī ni ñahan tee nándāha mēhñu rō. Te ñayuu ní cajeen ni caxíco nuū rō, ní cacujéhnu ndasí i ini ñayiví. Te ní stahú ró ñayuu tāca nación jíin jniñu tasí jíin jniñu mágica. Achí ndajéhé un.

<sup>24</sup> Te ñuu un ní nihīn castigo xeēn, chi siquí ñuu un ndeé cuēchi jeē ní jeti niñi tāca tée ní canacani jnūhun Yaā Dios, jíin tāca ñayuu maá yá, jíin tāca gá ñayuu ní cajehni i ñí cáhnu ñayiví.

## 19

<sup>1</sup> Te ná ni cuu tāca jée yáha, te ni jini sōho ri jeē cahán jee cuehé ndasí ñayuu ini andiví:

Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te maá yá cujéhnu ndasí, te maá yá jniñi ndihi poder.

<sup>2</sup> Te ndaā te váha sándaā yā tāca jniñu,

chi ní ndonda ya siquí cuéchi ñuu neé cújéhnu ún.

Chi ní stív un ñayuu ní cáhnu ñayiví jíin jnūhun cásiquí ndeē Yaā Dios.

Te ní sáha ya jeē ní ndutahū ñuu un siquí jeē ní jehni tāca mozo yā.

Achí i jíjnāhan i.

<sup>3</sup> Te ni cacahān tucu i:

Yōhoyo cújéhnū ya. Chi ní cáni canda ñuhmā ñuu un jéē cayú, achí.

<sup>4</sup> Te ndihóco cuūn tēe jéhnū cándiso jniñū, jíin ndicúun jeē técu, ni cajecuiñi yití de, te ni cachiñuhún de Yaā Dios, Yaā néne nuū mesa ndácu jniñū. Te ni cacahān:

Amén. Súcuan na cóo. Yōhoyo cújéhnū ya.

<sup>5</sup> Te nde nuū mesa nuū ndácu ya jniñū ni cahān ñin jñūhun:

Róhó jéē cájejniñū nuū Yaā Dios,  
jíin róhó jéē cándiso ñyo nuū yā,  
jeē cácujehnū jíin jéē tu cácujehnū,  
na cáhán rō jeē yóhoyo vāha Yaā cúu ya.  
Achí.

### *Vico jeē nándāha Yaā cúu Londe*

<sup>6</sup> Te ni jini sóho ri jeē cácahān ñayuu cuehē ndasí, te ñihin nájnūhun ñihin cuehē yūte, te nájnūhun jeē cahán ñihin taja. Te ni cacahān: Yōhoyo cújéhnū ya. Chi Jitoho yō Yaā Dios, Yaā jñí ndihí poder, vijna te ndácu ñihin ya jniñū.

<sup>7</sup> Te na cúsiñi ni yō, te siñ ndasí na cóo ni yō, te na cáhán yō jeē yóhoyo cújéhnū ya.

Chi ni quee quiví jeē nándāha máa Yaā cúu Londe.

Te je íyó túhva ñahan nandāha jíin yá, te suu cúu ñayuu maá Yaā Dios.

<sup>8</sup> Te ni ñihin ña jñūhun cuhun ña sahma fino jeē ndóo ndasí te xíñú.

Achí i jíjnāhan i. Te sahma fino un cúu táca jniñū ndaā jeē casáha ñayuu maá Yaā Dios.

<sup>9</sup> Te ni cahān ndajéhé yā jíin rí:

Te rō jñūhun yáha: Nacá jeē ndetū táca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Tāca jñūhun yáha cúu jñūhun ndaā ni cahān Yaā Dios, achí yá.

<sup>10</sup> Te ni jecuiñi yití rí nuū jehé ndajéhé un jéē chiñuhún rí yā nuú. Te ni cahān yā jíin rí:

Ma sáha rō súcuan. Chi ruhū suni mozo Yaā Dios cúu ri, nájnūhun máa rō jíin táca hermano rō jeē cácañdije vāha jñūhun Jesús. Sa suhva nuū maá Yaā Dios chiñuhún rō. Achí yá.

Chi jñūhun siquí Jesús cúu jeē cácahān ndaā ñayuu cánacani jñūhun Yaā Dios.

### *Yaā yosó síquī caballo cuijín*

<sup>11</sup> Yūcuán na te ni jito ri jeē núne andiví. Te ni cane ñin caballo cuijín, te Yaā yosó síquī ñi naní yá Yaā ndaā, Yaā squícu, chi squícu ya jeē ni jéjnūhun ya. Te ndaā sándā yā jniñū te ndaā ndóna ya siquí táca jéneé. <sup>12</sup> Te tinūu yá ndíndēe nájnūhun yáñuhūn. Te xiní yā ñūhun cuehē corona. Te yosó ñin síhví yá jeē maá-ñi ya cúu jeē jíiní. <sup>13</sup> Te ñūhun ya ñin sahma jeē ni ñūndaji nuū ñiñí, te nání yá Jñūhun Yaā Dios. <sup>14</sup> Te táca ndajéhé yā jeē iyó andiví, cáyosō caballo cuijín, cándiquin yatá yā. Te cáñuhun sahma fino cuijín íyó ndoo. <sup>15</sup> Te ini yuhu máa Yaā jeē yosó síquī caballo, quénda jeē cáca nájnūhun ñin espada xeén. Te espada un cúu jñūhun ya jeē stóho ya ñayuu táca nación. Te ñihin ndacu ya jniñū nuú i. Te sándā yā siquí cuéchi i nájnūhun jeē jeñú siquí ndehē uva cájexin. Te cuáha ya castigo xeén ndoho i jeē quití ni yá siquí cuéchi i. Chi máa yá jñí

ndihí poder. <sup>16</sup> Te sahma ya jíin sáhin ya yosó jnúhun yáha: Rey nuū tāca rey jíin Jítóho nuū tāca Jítóho, áchí.

<sup>17</sup> Yūcuán na te ní jito ri ñin ndajéhe yā jeē ñin nuū níandii. Te ní cana jee ya xiní tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios. <sup>18</sup> Te caji rō cūñu tāca rey jíin capitán jíin téé téyí, jíin cūñu tācá caballo jíin téé ní cayosó siquí tī. Te suni caji rō cūñu tāca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujuhnu jíin ñayuu tu cácujuhnu. Achí ndajéhe yā.

<sup>19</sup> Yūcuán na te ní jito ri maá quití xéén jíin tāca rey ñayívi jíin cuéhē soldado de. Te ní candutútú de jeē cuajnáhan de jíin máá Yaā yosó caballo jíin tāca ndajéhe yā. <sup>20</sup> Te ní jniñi ya quití xéén cuahán tī preso jíin téé ní nacani jnúhun stáhú jeē ní sáha tācá jniñu jéñu jeē ní jito jíinú quití xéén. Chi jíin jniñu jéñu un cúu jeē ní stáhú de tāca ñayuu jeē ní cajéhe jnúhun condiso jnuñi quití xéén, jíin jéé ní cachiñúhún imagen tī. Te quití xéén un jíin téé ní nacani jnúhun stáhú un, cátecu ndíndúú te ní scáne ya nuū laguna ñuhún jeē cayú jíin azufre.

<sup>21</sup> Te jíin espada jeē cáne yuhu Yaā yosó caballo ní cajihí tācá soldado quití xéén un. Te tācá quití ndáva nuū tachí ní candutú chíji tī ní cayejí tī cūñu de jíinánhan de.

### *Siquí mil cuiyā*

## 20

<sup>1</sup> Te ní jito ri jeē ní cuun ñin ndajéhe yā ichi ándiví. Te ndáhá yá ndacáa jeē núne tühnchi cúnú ndasí. Te suni ndáhá yá ñin cadena cáhnu. <sup>2</sup> Te ní jniñi ya maá cóo cáhnu jeē iyó ndé jenahán ndasí, te nání tī jexeén jíin Satanás. Te ní jihni yā jeē conuhñi mil cuiyā. <sup>3</sup> Te ní scáne ya ñin tühnchi cúnú ndasí. Te ní jesi vāha ya, te ní sácutú yá yuyáú, návāha ma stáhú gá un ñayuu tācá nación, chí nde na jínu mil cuiyā. Te jeé yáha mil cuiyā ún, yūcuán na te cánúú jéé ndají caca cuu jecu na tiempo.

<sup>4</sup> Te ní jito ri tāca mesa nuū ndácu jniñu, te yūcuan cáyūcu tāca ñayuu jeē ní canihín jniñu i sándaā i jniñu. Te suni ní jito ri anuá tāca ñayuu jeē ní cajehnde xiní i siquí jeē ní canacani i jnúhun Jesús jíin jnúhun Yaā Dios. Te tu ní cachiñúhún i quití xéén jíin imagen tī, ní tu ní cájéhe i jnúhun jeē cóndee jnuñi tī jneé i chí ndaha i. Te ní jito ri jeē ní natecu i te ní candacu i jniñu jíin Cristo mil cuiyā. <sup>5</sup> Yáha cúu ndiyí jeé nátecu xíhna gā. Te tāca gá ndiyí, tu ní cánatecu i, chí nde jeé jínu mil cuiyā. <sup>6</sup> Te nacá jeé ndetú tāca ñayuu ndoo ánuá jeé nátecu xíhna gā. Chi ma cúu cuiñi i vuelta uū. Te cuu i sutú nuū Yaā Dios jíin núú Cristo, te ndacu i jniñu jíin yá mil cuiyā.

<sup>7</sup> Te jeé jínu mil cuiyā ún, te ndají Satanás te quenda nuū yíndihyú. <sup>8</sup> Te stáhú tucu ñayuu tācá nación ñí cáhnu ñayívi. Te stáhú ñayuu ñuu Gog jíin Magog. Te sáha jeé ndutútú tāca soldado ñuu un jéé cuajnáhan de. Te coo cuéhé ndasí de nájnñuhun ñití yumar. <sup>9</sup> Te cuiñé núu de quingoo de ñí cáhnu ñayívi. Te cuiñé ndúú de ñuu nuū cáyūcu ñayuu maá Yaā Dios, ñuu jeé maní yā jíin. Te Yaā Dios chí scúun ya ñuhún ichi ándiví, te cayú ndihí de. <sup>10</sup> Te jexeén jeé ní stáhú tāca ñayuu ún, chí scáne ya quihín nuū laguna ñuhún jeé cayú jíin azufre. Te yūcuán chí xíhna gā ní scáne ya quití xéén jíin téé ní nacani jnúhun stáhú. Te yūcuán ndoho ndúú ñuu ní cáni cuiñi.

### *Jeé sándaā yá jniñu nuū mesa cuijín*

<sup>11</sup> Yūcuán na te ni jito ri ñn mesa cuijín cáhnu, te néne máá Yaā ndácu jniñu. Te ñayivi jíin andívi ni ndoñúhún cuáhān jeē ní jito ya nuū, chí tuá ni cúu quendōo nuū yā. <sup>12</sup> Te ni jito ri tāca ndíyi, jeē ní cujéhu jíin jeē tu ní cujéhu, cáhiin nuū Yaā Dios. Te ni sáha ya jeē nune tāca libro, te suni ni nune inga libro jeē yosó síhvi ñáyuu cotecu ní cáni. Te ni sándaā yā siquī tāca ndíyi ún, núu ndese jniñu ni casáha i jíin ndese yósó núū tāca libro un. <sup>13</sup> Te tāca ndíyi jeē ní cajihí nuū mar, ni nanecoo. Te suni ni nanecoo tāca ndíyi jeē ní cajihí i, jeē íne i máá lugar nuū cáyūcu ánuá ndíyi. Te ni sándaā yā siquī, núu ndese ni casáha ñn ñn i. <sup>14</sup> Yūcuán na te cuehyí jéhni ñayuu jíin lugar nuū cáyūcu ánuá ndíyi, ni snáā yā ni scáne ya cuango nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. <sup>15</sup> Te yūcuan ní scáne ya tāca ñayuu ni casáha jniñu néé jéé tu yósó síhvi i nuū libro jeē yosó síhvi ñayuu cotecu ní cáni.

### *Andívi jéé jíin ñáyivi jéé*

## 21

<sup>1</sup> Yūcuán na te ni jito ri andívi jéé jíin ñáyivi jéé. Chí andívi jíin ñáyivi xíhna ñuhūn ni naa. Te suni tuá mar. <sup>2</sup> Te ruhū Juan, ni jito ri ñuu íi jeē cúu Jerusalén jeé. Te ñuu un ní cuun vēji ichi ándívi núū néne Yaā Dios. Te ñuu ún luu cáa nájnūhun ñn ñahan jeē ní sātūhva ña ni cucutú ña jeē nándaā ña jíin yí ña. <sup>3</sup> Te ní jini sōho ri ñn jnūhun jeē ní cáhān jee ichi ándívi:

Condēhé, chí vijna te ndéé Yaā Dios mēhñu ñáyuu. Te condee yā jíin i jíjnāhan i, te cuu i ñayuu maá yá. Te máá yá condee yā jíin i jeē cúu ya Yaā Dios i. <sup>4</sup> Te nacuaa yā ndute tñúú i jíjnāhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chí je ni yāha tāca jnūndóho jeē ní iyo, áhí.

<sup>5</sup> Yūcuán na te ni cahān maá Yaā néne nuū mesa:

Condēhé, chí nasáha jeé rí tāca jéé iyó, áhí yá.

Te suni ni cahān yā:

Te rójnūhun yáha. Chí tāca jnūhun yáha cúu jnūhun jeē jiní ndije ró jéé ndaā cúu.

<sup>6</sup> Te ni cahān gā yā:

Je ni jínu. Máá rí cúu nájnūhun letra A xíhna ñuhūn jíin letra Z jeē sándihí na, chí máá rí ni squejéé ndíhi te máá rí sínu. Te tāca ñáyuu cájichí, súcuan-ni cuáha ri coho i ndute cáne jeē cōtecu i ní cáni. <sup>7</sup> Tāca ñáyuu jeē cūndeyí siquī jéneé, nihīn i ndíhi jeē yáha cuu tahū i. Te cuu ri Yaā Dios i, te cuu i sēhe ri. <sup>8</sup> Te tāca ñáyuu jeē cáyūhú ndoho siquī jnūhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndíyi, jíin ñáyuu cájica jnéni, jíin ñáyuu casáha tásí, jíin ñáyuu cáchiñúhún ídolo, jíin táca ñáyuu castáhu, ñayuu ún chí quívi:coo i laguna ñuhūn jeē cayú jíin azufre. Te yūcuan cúu jeē cúu i vuelta uū.

### *Jerusalén jeé*

<sup>9</sup> Yūcuán na te ni quiji ñn jnāhan ndihúxá ndajéhé jeē ní candāhá ndihúxá cohō jeē ní ñuhūn chítú ndihúxá jnūndóho sandihí. Te ni cahān yā jíin rí:

Nehen, te na steén rí nuū rō ñahan jeē nándaā ña cuu ña ñasihí Yaā cúu Lone, áhí yá.

<sup>10</sup> Te ni sáha ga Espíritu Santo jeē ní jito ndijin rí, te ndajéhé un ní jeca ya ruhū cuahān yā jíin rí xiní ñn yucu cáhnu súcún. Te ni steén yā nuū rí maá ñuu íi cujéhu jeē cúu Jerusalén, te ni cuun vēji nde andívi núū néne Yaā Dios. <sup>11</sup> Te

ndíndéé ndasí ñuu un nájñuhun ndíndéé Yaā Dios. Te xíñú nájñuhun xíñú ñin yuū luu jeē ndeé yahu ndasí, nájñuhun yuū cuijín jeē quiyi nájñuhun vidrio. <sup>12</sup> Te yuhu ñúú un ní jicó ndúú ñin jeē cáhnu stícún ndíhyú ñuu ún. Te iyó úxi uū yehyí. Te tāca yéhyí un ñin ñin ndajéhé yā. Te tāca yéhyí un yósó síhvi ndihúxi uū yucún Israel. <sup>13</sup> Te lado nuū cáne niāndii iyó úní yehyí. Te lado norte suni iyó úní yehyí. Te lado sur suni iyó úní yehyí. Te lado nuū queé niāndii suni iyó úní yehyí. <sup>14</sup> Te iyó úxi uū yuū náhnu jeē cúu cimientu maá jéé ndihyú ñuu ún. Te tāca yúú un yósó síhvi ndihúxi uū apóstol maá Yaā cúu Londe.

<sup>15</sup> Te ndajéhé jeē ní cáhān jíin rí, ndáhá yá ñin yujnu oro jeē chícuāha yá ñuu un jíin tāca yéhyí jíin máá jéé ndihyú ñuu ún. <sup>16</sup> Te ñuu ún chí ñin cūhva-ni cúu ndicúún lado. Chí jeē cáni jíin jéé jité, inuú-ni cúu. Te ndajéhé un ní chícuāha yá ñuu un jíin yujnu ún. Te née uū mil uū ciento kilómetro jeē ñin ñin lado. Te inuú-ni cūhva jeē cáni, jeē sucún, jíin jéé jité. <sup>17</sup> Te suni ní chícuāha yá maá jéé ndihyú ñuu ún, te née uní xico cuñm metro jeé sucún. Te yūcuan cúu cūhva jejníñu ñayuu, jeé suni jéjñíñu ndajéhé un.

<sup>18</sup> Te máá jéé ndihyú ñuu un ní cuvāha jíin yúú cuijín quiyi. Te ñuu ún chí máá nene oro cúu, te cáa nájñuhun vidrio quiyi. <sup>19</sup> Te tāca yúú jeé cúu cimientu maá jéé ndihyú ñuu ún, ní cucutú jíin ndinuú yuū luu jeé ndeé yahu. Yuū ñin cúu yuū cuijín quiyi. Te jeé uú cúu yuū ndeé ndí. Te jeé uní cúu yuū pinto. Te jeé cúun cúu yuū cuí ndí. <sup>20</sup> Te jeé uhún cúu yuū pinto jeé ñúhun raya. Te jeé íñú cúu yuū cuehé pinto. Te jeé uxá cúu yuū cuaán quiyi. Te jeé uná cúu yuū cuí ndeé. Te jeé ñin cúu yuū cuaán ndí. Te jeé uxí cúu yuū cuí cuijín. Te jeé uxí ñin cúu yuū cuehé cuaán. Te jeé uxí uū cúu yuū ndihí ndí. <sup>21</sup> Te ndihúxi uū yehyí un cácuu uxí uū perla jeé ndeé yahu. Te ñin ñin yéhyí cúu ñin ñin perla. Te máá nene oro cúu calle cáhnu ñuu ún, te quiyi nájñuhun vidrio.

<sup>22</sup> Te tú na templo ní jito ri ini ñuu ún, chí ní cáhnu ñuu un ndeé máá Jítoho yō, Yaā jñí ndihí poder, jíin Yaā cúu Londe. <sup>23</sup> Te ñuu ún tu jíni ñúhún cundijin jíin luz niāndii jíin yóō. Chí jeé ndíndéé máá Yaā Dios cúu jeé cundijin ñuu ún. Te luz ñuu un cúu máá Yaā cúu Londe. <sup>24</sup> Te ñayuu tācá nación ñayivi jéé ní jnama ya, caca i jeé cundijin luz ñuu un núu i. Te tāca rey ñayivi quijicoo de ñuu ún, quindeca de tācá ndajñíñu jeé ndeé yahu jíin jéé cujéñnu de sāha. <sup>25</sup> Te tāca yéhyí ñuu ún ma cóndihyū cuiti nduú, chí tú na jecuāā coo. <sup>26</sup> Te ini ñuu ún quijicoo ñayuu tācá nación, quindeca i tācá ndajñíñu jeé ndeé yahu jíin jéé cujéñnu i sāha. <sup>27</sup> Te ma quívicoo cuiti ní ñin jeé jnehén. Ní ma quívicoo ñayuu casáha jñíñu née jíin jéé castáhú. Chí quívicoo máni máá ñayuu jeé yósó síhvi i nuū libro jeé yósó síhvi ñayuu cotecu ní cáni, jeé névāha Yaā cúu Londe.

## 22

<sup>1</sup> Yūcuán na te ndajéhé yā ní steén yā nuū rí ñin yūte iyó ndoo. Te ndute un sāha jeé cótecu yō ní cáni. Te xíñú nájñuhun vidrio, te cáne nuū mesa nuū ndácu Yaā Dios jñíñu jíin Yaā cúu Londe. <sup>2</sup> Te jíca yūte ún sava mēññu calle cáhnu ñuu ún. Te ndíndúú lado yuyúte un yñi yujnu jeé cótecu yō ní cáni sāha. Te yujnu un jéhe ndehē uxí uū jínu jeé ñin cuiyā, chí tāca yóō cúun ndehē. Te ndaha yúcu i cúu tajná jeé ndúvāha ñayuu tācá nación. <sup>3</sup> Te tācá-ni jeé ní cáhān yā jeé násūu jéé váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jñíñu jíin Yaā cúu Londe. Te ñayuu cá candíje jeé cácuu i mozo yā, chíñúhún i ya. <sup>4</sup> Te coto i nuū yā, te condee síhvi yá jñeé i. <sup>5</sup> Te ma cóo ga jecuāā ñuu ún. Te ñayuu cáyūcu yūcuan tuá jíni ñúhún i jeé cundijin lámpara nuū

i, ni jeē cúndijin niāndii. Chi jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

### *Jeē cuácuyajni ndiji Cristo*

<sup>6</sup> Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíin ndije ró jéé ndaā cúu. Te Jitoho yō Yaā Dios, máá yá sáha jíin tée cáncani jnúhun ya jeē jíin Espíritu yā cáncani de. Te suu máá yá ni tají yá ndajéhé yā návāha stéén nuū ñayuu cácuu mozo yā tāca jniñu jeē yachī coo.

<sup>7</sup> Ndiji yachī rī, achí yá.

Te nacá jeē ndetú ñayuu chusóhó jnúhun Yaā Dios jeē yosó núu tútu yáha.

<sup>8</sup> Te ruhū Juan, ni jíin sōho ri tāca jnúhun yáha, te ni jito ri tāca jniñu yáha. Te ná ni jíin sōho ri ni jito ri, yūcuán na te ni jecuiñí yití rí nuū jehé maá ndajéhé jeē ni stéén tāca jniñu yáha núu rī, jeē chiñúhún rí yā nuū. <sup>9</sup> Te ni cahān ndajéhé un jíin rí:

Ma sáha ró súcuan. Chi ruhū suni mozo Yaā Dios cúu ri, nájñuhun máá ró jíin tāca hermano rō jeē cáncani jnúhun ya, jíin ndihí ñayuu cájetáhú jnúhun yósó nuū tútu yáha. Sa suhva nuū máá Yaā Dios chiñúhún ró. Achí yá.

<sup>10</sup> Te ni cahān gā ndajéhé un jíin rí:

Ma chísaíhí ró tāca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndihí. <sup>11</sup> Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndoo máá i súcuan. Te sa ñayuu casáha jniñu ndaā, na sáha ga i jniñu ndaā. Te ñayuu cáhīyo ndoo ánuá, na cáca ndoo ga i súcuan. Achí ndajéhé un.

<sup>12</sup> Jendaá jeē ndiji yachī rī, achí Jesús. Te quiji ri jíin táhū cuāha ri nuū ññ ññ ñayuu, núu ndese jniñu ni casáha i. <sup>13</sup> Máá rí cúu nájñuhun letra A xīhna ñúhún jíin letra Z jeē sándihí na, chi íyó rí nde xīhna ñúhún te coo ri ní cáni.

<sup>14</sup> Nacá jeē ndetú ñayuu jeē jéhe i jnúhun ndundoo ánuá i nájñuhun ndúndoo sahna. Chi cuu caji i ndehé yujnu jeē sáha jeē cótecu i ní cáni, te cuu quívicoo i yéhyí ñuu íi ún. <sup>15</sup> Te ichi fuera ñuu ún cuiñí ñayuu tu cácandíje, jíin ñayuu casáha tásí, jíin ñayuu cájica jnéni, jíin ñayuu cájehni ndíyi, jíin ñayuu cáchiñúhún ídolo, jíin ñayuu cácusí ni stahú jñahan.

<sup>16</sup> Máá rúhū Jesús, ni tají rí ndajéhé rí návāha castúhun yá tāca jnúhun yáha nuū tāca grupo ñayuu cácandíje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájñuhun lucero ndíndēe cáne cúndijin. Achí yá.

<sup>17</sup> Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñayuu jeē jíin sōho, suni na cáhán i:

Nehen, quívicoo ró ndaha ya.

Te tāca ñayuu cájichí jeē cácuni i coho i, na quívicoo i ndaha ya, te súcuan-ni na cóho i ndute jeē cótecu i ní cáni sáha.

<sup>18</sup> Te tāca ñayuu jíin sōho jnúhun Yaā Dios jeē yosó núu tútu yáha, cáhán níhin ri jíin i: Núu ndé ñayuu chísoó i nuū jnúhun cáhán tutu yáha, te Yaā Dios chísoó yá jnúndóho cáhán tutu yáha, ndoho i. <sup>19</sup> Te núu ndé ñayuu quende i jecu jnúhun cáhán tutu yáha, te Yaā Dios quende yá tahū i jeē yosó núu libro jeē yosó sáhví ñayuu cótecu ní cáni, te ma níhín i tahū i ini ñuu íi ún. Te tutu yáha cúu jeē cáhán siquí tāca un.

<sup>20</sup> Te Yaā jeē ní cáhán tāca jnúhun yáha, suhva cáhán yā:

Jendaá jeē ndiji yachī rī, achí yá.

Amén. Súcuan na cóo. Jítoho ná Jesús, jícán tahu na jéē ndíji yachī ní.

<sup>21</sup> Te ñúhun ni rī jeē Jítoho yō Jesucristo na sáha ga yā jeē váha róhó jínáhan ró. Amén.